


Ɛlinjil ɛn Ƴaysa Ɛlməsix Itawann-as deƳ Arkawal
wa Aynayan



Tamajaq, Tawallammat: Ɛlinjil ɛn Ƴaysa Ɛlməsix Itawann-as
deƳ Arkawal wa Aynayan New Testament

**Əlinjil ən Ƴaysa Əlməsix Itawann-as dey
Arkawal wa Aynayan
Tamajaq, Tawallammat: Əlinjil ən Ƴaysa Əlməsix
Itawann-as dey Arkawal wa Aynayan New Testament
Le Nouveau Testament en tamajaq tawallammat,
écriture latine**

copyright © 2015 Wycliffe Bible Translators, Inc.

Language: Tamajaq, Tawallammat

Contributor: SIM International

All rights reserved.

2020-12-01

PDF generated using Haiola and XeLaTeX on 18 Apr 2025 from source files dated 29 Jan 2022

3aaeb7b2-4a3b-51fe-8c2d-ed8c05d4be0f

Contents

Matta	1
Markus	77
Luqa	124
Yaxya	200
Igitan ən Nəmmuzal	255
Kəl-Ərrum	328
1 Kəl-Korent	362
2 Kəl-Korent	396
Kəl-Galatəya	418
Kəl-Efez	430
Kəl-Filib	442
Kəl-Kolosəya	450
1 Kəl-Tesalonik	458
2 Kəl-Tesalonik	465
1 Timotay	469
2 Timotay	478
Titəs	484
Filemona	488
Kəl-ÿibri	490
Yaqub	514
1 Butros	523
2 Butros	533
1 Yaxya	539
2 Yaxya	547
3 Yaxya	549
Yuday	551
Əlkəttab wa n Ənəfilal	554

Elinjil wa n Matta

Təhəwt ən Ƴaysa d ətəwəsəmutəg-net y əššəyəl wa z'agu

Aljadan ən Ƴaysa əd təhəwt-net

Aljadan ən Ƴaysa Elməsix

¹ Əntanay da esmawan n aljadan ən Ƴaysa Elməsix, ahaya n ənnəbi Dawəd, d ənnəbi Ibrahim:

² Ibrahim eraw Isəhaq.

Isəhaq eraw Yaqub.

Yaqub eraw Yahuda əd mədrayan-net.

³ Yahuda eraw Farəs əd Zarax,

anna-nasan esəm-net Tamar.

Farəs eraw Xasrun.

Xasrun eraw Ram.

⁴ Ram eraw Ƴaminadab.

Ƴaminadab eraw Naşon.

Naşon eraw Salmuna.

⁵ Salmuna eraw Boxaz was anna-net Rahab.

Boxaz eraw Ƴubayd was anna-net Rut.

Ƴubayd eraw Yasay.

⁶ Yasay eraw Dawəd wa n əmənokəl.

Dawəd eraw Suliman was anna-net tantut n Urəyya.

⁷ Suliman eraw Roxoboham.

Roxoboham eraw Abəya.

Abəya eraw Aza.

⁸ Aza eraw Yahuşafat.

Yahuşafat eraw Yuram.

Yuram eraw Ƴuzəyas.

⁹ Ƴuzəyas eraw Yutam.

Yutam eraw Axaz.

Axaz eraw Xizqəyyas.

¹⁰ Xizqəyyas eraw Manaşša.

Manaşša eraw Amun.

Amun eraw Yuşəya.

¹¹ Yuşəya eraw Yakunəya əd mədrayan-net.

Azzaman win den əntanay

a daɣ tawayan Kəl-Israyil

əmmewayan s akal ən Babəylon

əqqalan daɣ-as ikefəlan.

¹² Dəffər adi, eraw Yakunəya Şalatəyel.

Şalatəyel eraw Zərubabil.

¹³ Zərubabil eraw Abihud.

Abihud eraw Alyaqim.

Alyaqim eraw Yazur.

¹⁴ Yazur eraw Saduq.

Saduq eraw Xakim.

Xakim eraw Eløyud.

¹⁵ Eløyud eraw Elyazar.

Elyazar eraw Mattan.

Mattan eraw Yaqub.

¹⁶ Yaqub ənta a erawan Yusəf

wa izlafan Maryama ta terawat Yaysa

was itawannu Əlməsix.

¹⁷ Dağ adi maraw meddan d əkkoz a əllanen gər Dawəd d

əmaraw-net Ibrahim. Əllân-tu maraw d əkkoz gər Dawəd

d azzaman win ətəwəkfal ən Kəl-Israyil əs Babəylon, əllân-

tu deş maraw d əkkoz gər ətəwəkfal ən Kəl-Israyil əs

Babəylon əd təhəwt ən Yaysa.

Təhəwt ən Yaysa wa n Əlməsix

¹⁸ Ənta da əmmək was d-iggaz Yaysa Əlməsix əddənet:

Maryama ta n anna ən Yaysa, imirakan dər-əs Yusəf azalaf.

Mişan harwa da wər təzlay əs Yusəf, as təga tadist, əs tarna

n Infas wa Zəddigan.

¹⁹ Yusəf, imosan aləs oşadan, wər ira əsəkkərükəd ən

Maryama daş aytedan. Awen daş a fəl isammarkas daş

man-net as a dər-əs işrəd da wər t-illa i əhan salan-nasan.

²⁰ Isamadran daş awen da as t-in-ibaz etəs inafalal-as-du

angalos n Əməli daş targət, inn-as: «Yusəf, ahaya ən Dawəd,

a kay-wər-təggəz tasa n azalaf ən Maryama, fəlas barar wa

ihan tadist-net, Infas wa Zəddigan a d-ifal.

²¹ Ad təgrəw barar amaran kay ag-as esəm Yaysa fəlas

ənta a z'assafsin tamattay-net daş bakkadan.»

²² Arat wa kul iga fəl ad andu awal wa d-imal Məşşina əs

tarrayt n ənnəbi İsayas as inna:

²³ «*Ad tagu təmawat tadist da wər təzday meddan, təgrəw*

barar. Barar wədi a das-itəwəggu esəm Emanəwel, almaşna:

Məşşina illâ şur-na.»

²⁴ As d-inkar Yusəf daş etəs, immozal s arat was t-omar

angalos n Əməli, izlaf Maryama.

²⁵ Mişan wər kala a dər-əs inamansa har ihəw barar. As

ihəw, ig-as Yusəf esəm Yaysa.

2

Tagadəxt ən musanan win dännəg Əlməsix

¹ Azzaman n Əmənokal Herod a daş ihəw Yaysa, daş

əşrəm ən Betalxam, daş amaçal ən Yahudəyya. Əglan-

du musanan ən manayan a d-əfalnen dännəg har d-osan

Yerusalam.

² Ænnan: «Ma iga æmənokal ən Kəl-Ëlyəhud wa ihəwan da səkət? Atri-net a nənay daɣ dənnəg, amaran nəkk-ay-du y a das-nəssəjəd.»

³ Arat wa as t-islə æmənokal Herod, iga aššawaša zəwwəran, ənta harkid Kəl-Yerusalam kul.

⁴ Iššədaw-du imuzaran ən limaman, əd musanan n Ættawret, issəstən-tan d adag wa daɣ z'ihəw Ælməsix.

⁵ Ænnan-as: «Aɣrəm ən Betalxam a daɣ z'ihəw daɣ amaɖal ən Yahudəyya, fəlas ənnəbi Mika iktāb ās:

⁶ *"Kam amaran Betalxam, ta n amaɖal ən Yahudəyya, təheɣ iɣərman win aɣaf daɣ akal ən Yahudəyya, fəlas kam a du-z-igməd əmuzar wa z'agin i tamattay-nin Israyil tizart ta itaggu amadan y aharay-net."*»

⁷ Təzzar isassaɣra-du æmənokal Herod imusanan win manayan en, imos awen arat igān daɣ əssir, issəstan-tan əd tamert tas igmad aššak as ənta daɣ d-inafalal ətri wa əmalan den.

⁸ Dəffər awen issok-en Betalxam inn-asan: «Agliwat, taknim asawad i dad illa barar wa ihəwan da, as tu-təgrawam, təmməram-i-du təməlam-i dad illa, fəl ad t-akka əssəjədaɣ-as nak da.»

⁹ As dasan-iɣrad æmənokal awal, əglan. Təzzar oggan atri wa dasan-inafalalan daɣ jənnawan dat awen daɣ dənnəg. Wər imməzzay ətri en ad illa dat-san, azzar-asan, as imal dənnəg adag wa iha barar, izzəkkat.

¹⁰ As ənayan atri as izzəkkat, əknan təfalawist,

¹¹ əggazan-in ehan, ənayan barar d anna-net Maryama, əgaraffen əssəjadan i barar. Dəffər adi, oran ilalan-nasan, əkkasan-as-du daɣ-san šibəddar əganen daɣ urəɣ, d əššin səqqidan əzodnen, əmosnen əzzənəf ən təɣəlbast.

¹² Dəffər awen isannafalal-asan-du Məššina daɣ targət as ad wər əqqəlan Herod. Awen da a fəl obazan tarrayt iyyat əqqalan akal-nasan.

Ëdərrəg əs Masar əd tawaɣlay ən Nazaret

¹³ Dəffər as əglān, inafalal-du angalos n Æməli i Yusəf daɣ targət, inn-as: «Ënkər, tidawaɣ əd barar d anna-net, takka tarmad akal ən Masar taqqama daɣ-as har dak-əmələɣ assaɣa wa du-za-təqqəla, fəlas barar di ad igməy Herod əd tanayaɣ-net.»

¹⁴ Inkar Yusəf, iddew əd barar d anna-net, eway ehad, obaz tarrayt ikka Masar.

¹⁵ Æqqiman daɣ Masar den da har aba Herod. Arat wa iga fəl ad andu awal wa d-iga Æməli əs tarrayt n ənnəbi Osay a daɣ inna: «Ëyre-du barar-in əssərdayaɣ-q-idu Masar.»

16 As issan Herod as imusanan win manayan əmmizrayan batu-net əxlayan-tu, ixaşaşat, omar s ad təwənxiin bararan ən yayyan kul win əhəwnen dağ əxrəm ən Betalxam, əd xələyxələyan-net, a d-obazan xur əşšin elan har azzaman win den, imos as tamert ten da as das-ənnan musanan win ənta dağ d-inafalal ətri.

17 Den dağ ad inda awal wa d-iga Əməli əs tarrayt n ənnəbi İrməya a dağ innâ:

18 «*Təga-du təkurayt dağ əxrəm ən Rama, imos awen tala n aytedan fəl təga təfəyyawt. Awen Raxil ta n təmarawt ən Kəl-İsrayil təhallit fəl bararan-net. Wər təra i das-igan əlmaçiza, fəlas bararan əjwaran aba-tan.*»

19 Dəffər təmattant ən Herod, inafalal angalos n Əməli i Yusəf dağ targət, dağ akal ən Masar.

20 Inn-as angalos: «*Ənkər, tidaway əd barar di d anna-net, təqqələx akal n İsrayil, fəlas aytedan win əranen tenaxay-net, aba-tan.*»

21 Inkar Yusəf, iddew əd barar d anna-net, iqqal akal n İsrayil.

22 Mişan igraw isalan as Arkalawəs, a imosan əmənokal n akal ən Yahudəyya, dağ adag n abba-net Herod. Təzzar təggaz tasa Yusəf, ab-as ihal iki ən Yahudəyya, ikka akal ən Galilaya id Məşşina a das-d-isannafalalan awen dağ targət.

23 Iгла ixsar dağ əxrəm as itawannu Nazaret. Emmək en dağ as əgan aratan win, fəl ad andu awal wa d-iga Əməli əs tarrayt n ənnəbitan as ənnan: «*Itawagg-as esəm aw Nazaret.*»

3

Əsəmmutəg n əşşəxəl wa z'agu Əlməsix

Yaxya wa isalmaçyan dağ aman

1 Elan dəffər awen, issənta Yaxya wa isalmaçyan dağ aman igi ən təlxtutbat dağ taneray ən Yahudəyya.

2 Igannu: «*Utabat! Illikan as, Taçmar ta n jənnawan tahôz!*»

3 Yaxya en dağ a fəl imməgrad ənnəbi Isayas assaxa wad inna: «*Aləs iyyan idkâl əməsli-net dağ əsuf igannu: "Səmmutəgat abaraqqa y Əməli! Təsəssiçədam tarrayen dat-əs!"*»

4 Yaxya ilsa tabdoq təgât dağ anzadan n əmnəs, otâb s əsatəb n agaşek. Iddâr s əjwalan əd turawat.

5 A t-in-tasin aytedan, əgmâdan-du Yerusalam, d akal ketnet wa n Yahudəyya, d amaçal kul wa n xələyxələyan n agarew wa n Yordan,

⁶ tutaban daɣ bakkadan-nasan dat tamattay, isalmaq-qan Yaxya daɣ aman daɣ agarew wen.

⁷ Osan-du Farisaytan aggotnen, əd Sadusaytan, y a tan-issəlməx Yaxya daɣ aman. As inay Yaxya arat wen inn-asan: «Xa taššolen šin! Ma kawan-issosanan ədərrəg y attadib wa d-izayan ən Məššina?

⁸ Daɣ adi taggiwat imazalan olaɣnen təsəttəddim sər-san tətubt-nawan!

⁹ Wər igda ad təgannim daɣ man-nawan: "Nakkanay əzzurrəyya n ənnəbi Ibrahim a nəmos," fəlas silakanax-awan as Məššina ifrəg ad isəmməttəy šihun šin təhannayam da, ixlək-du daɣ-asnat əzzurrəyya y Ibrahim!

¹⁰ Agat ənnəyat! Tazəft harwa əmərədda da təmmotag y a du-təsəddəngər y eškan. Daɣ adi ašək kul wa wər nətirəw aratan olaɣnen, ad itəwəxtəs, itəwəgər-in daɣ təmsay!

¹¹ Nak, aman a daq qawan-salmaɣa, fəl ad sənnəfiləlay s awen tətubt-nawan. Mišan wa du-z-asin dəffər-i, awa di-iga daɣ šigrat, wər eweda wala arra ən suɣan ən xateman-net. Ənta Infas Wa Zəddigan əd təmsay a daq qawan-z-issəlməx.

¹² Iha əlmital n awedan ittāfan tesayt y ad izzəzər alkamanet. İšadaw alkama daɣ tadangawt-net, šixal amaran ag-enat daɣ təmsay təbilaglat faw.»

Alamay ən Ƴaysa

¹³ Adan en da daɣ d-osa Ƴaysa, igmād-du akal ən Galilaya, ikka-du agarew wa n Yordan, y ad t-issəlməx Yaxya daɣ aman.

¹⁴ Mišan igmay Yaxya d a daɣ-as ikkəs awen. Inn-as Yaxya: «Nak a iddəraran s a di-təssəlməx daɣ aman, amaran kay iman-nak a di-d-ikkan?»

¹⁵ İjjəwəb-as Ƴaysa inn-as: «Əmərədda ardu s arat wədi da, fəlas ilzam-anax ad nassandu arat kul wa ira Məššina.» Təzzar irda Yaxya s əsəlməx ən Ƴaysa.

¹⁶ İtawasalmaɣ Ƴaysa ɣas, igmad-du aman, ənnolaman jənnawan daɣ amazay wen da, ogga Infas ən Məššina as d-igmad ijənnawan, iha šaššəlan ən tədabert, iwar-tu.

¹⁷ İgmad-du əməsli ijənnawan inna: «Ənta əddi Barar-in əkne tara, amaran ənta a d-issəndan agna-nin.»

4

Ətəwəjərrab ən Ƴaysa

¹ Təzzar issoka Infas wa Zəddigan Ƴaysa taneray y a daɣ-as t-ajjərrab İblis.

² As iga Ƴaysa əkkozat təmərwən n əzəl d əkkozat təmərwən n ahad izüm, iggaz-tu gələk.

³ Ihoz-t-idu Iblis a n ənəjjerrəb inn-as: «Kud kay Barar ən Məššina, taməra šihun a s ad əqqəlnat amensay.»

⁴ Mišan inn-as Ƴaysa: «Wərgex ənnan Elkəttaban: "Aggadəm wərgex imensewan ɣas as itaddar, kalar isuddur-tu ad ilkâm y awal ketnet wa d-ifalan Məššina."»

⁵ Ikka dər-əs Iblis aɣrəm wa zəddigan ən Yerusalam, issəbdad-tu fəl afalla n Ahan wa Zəwwəran n Əlɣibada,

⁶ inn-as: «Kud kay Barar ən Məššina, tətərəgge, fəlas ənnan Elkəttaban: "Ad amər Məššina angalosan daɣ talɣanak, əkbəlan-kay daɣ fassan-nasan, fəl a dak-wər-tənkəf təhunt."»

⁷ Inn-as Ƴaysa: «Wərgex za Elkəttaban di ənnân: "Ad wər tətəjjarraba Əməli-nak Məššina."»

⁸ Dəffər awen ikka dər-əs Iblis afalla n ədɣax iknan təzzəgrət, issəswad-tu daɣ taɣmaren kul n əddənət əd təhussay-nasnat,

⁹ inn-as: «Awa togge den kul əkfex-ak-ku as di-təssəjada təɣbadaɣ-i.»

¹⁰ Inn-as Ƴaysa: «Ugag-i, Aššaytan! Wərgex ənnan Elkəttaban: "Əməli-nak Məššina as za təssəjada, ənta ɣas a za təɣbada."»

¹¹ Amaran oyy-ay Iblis. Əhinan-in angalosan əkkân-du Ƴaysa əssanan daɣ-as.

Ənətti n əššəɣəl daɣ Galilaya

Ƴaysa issənta əššəɣəl-net daɣ Galilaya

¹² As isla Ƴaysa ətərməs ən Ƴaxya, iqqal akal ən Galilaya.

¹³ Mišan wər iqqim daɣ əɣrəm ən Nazaret. Kalar igla iɣsar daɣ təɣrəmt təgât Kafarnahum, təwârat təgadamayt n agaraw wa n Galilaya daɣ amaɖal ən Zəbulun əd wa n Naftali.

¹⁴ Əmmək en daɣ as inda awal wa d-iga Əməli əs tarrayt n ənənəbi Isayas a daɣ innâ:

¹⁵ «Akal ən Zəbulun əd wa n Naftali, əhanen əsəlim n agaraw wa n Galilaya, fəl təgadamayt ta n ataram ən Yordan, almayna Galilaya, ənta a daɣ əɣsaran aytedan win Kəl-Əlyəhud əd win tan-wər-nəmos!

¹⁶ Tamattay ta təhat šiyyay, tənay ənnur zəwwəran as imalawlaw, aytedan deɣ win əhanen akal wa təlsa telay ən təmattant, əntanay da ibalazlaz fall-asan ənnur.»

¹⁷ Azzaman en da a daɣ iggaz Ƴaysa šin igi ən təlxutbat igannu: «Utabat, fəlas Taɣmar ta n jənnawan təhöz!»

Ətəwəyra n əkkoz nalkiman win azzarnen

¹⁸ Əzəl iyyan ijiwankat Ƴaysa fəl təgadamayt n agaraw wa n Galilaya as inay əššin mədrayan, s iyyan esəm-net

Simxon was itawannu Butros, d amadray-net Andrawəs. Meddan win inabazan ən kifitan a əmosan. As tan-inay fattawan daɣ agaraw sangaytan-nasan win abbaz ən kifitan.

¹⁹ Inn-asan Ƴaysa: «Elkəmat-i, a kawan-aga meddan sər-i du-za-tawaynen aytedan y a tan-assafsa daɣ bakkadan-nasan.»

²⁰ Oyyan sangaytan-nasan daɣ tamazayt ten da, əlkaman-as.

²¹ As iga Ƴaysa arat ən teklay dəffər awen, inay əşšin mədrayan wiyyad, əmosnen Yaqub d amadray-net Yaxya win maddanəs ən Zabaday. As tan-inay nimahan aɣlal n aman d abba-nasan Zabaday, kannin sangaytan-nasan win as tabazan kifitan. Iyr-en Ƴaysa.

²² Amazay wen daɣ ad oyyan aɣlal-nasan, əfalan abba-nasan, əlkaman i Ƴaysa.

Isalan tiwəziwizan

²³ Issəwal Ƴaysa akal ən Galilaya ketnet, isasaɣru daɣ nan n əlɣibada ən Kəl-Əlyəhud. Immâl Elinjil, imosan isalan ən Taymar ta n jənnawan, izuzəy aytedan daɣ əkkulluk ən təwərna, d əkkulluk n əlɣib.

²⁴ Əmmək en daɣ as itawasla Ƴaysa daɣ amaɗal ən Surəya kul. A das-du-tamawayan aytedan kul win ərinnen, əd win t-əllanen d əlɣiban a əqqalan, əd win əssəranan kələsuf, əd win əlanan ikərəkkitan əd nəbdan, izuzəy-tan.

²⁵ Elkâmnat-as təmattiwen aggotnen a d-əfalnen Galilaya, d akal was itawannu «Wa-n-Maraw-Ƴərman», əd Yerusalam, d akal ən Yahudəyya, d amaɗal wa ihan dənnəg ən Yordan.

İşşəxəl wa iga Ƴaysa dat aytedan kul daɣ Galilaya əd ɣələyɣələyan-net

5

Əsəssəɣri wa azzaran: Təlɣutbat ta təgat fəl ədɣaɣ

Taymar ta n Məşşina

¹ As inay Ƴaysa şimattiwen şin t-id-osanen den, iwar adɣaɣ. Iqqim den da, əhozan-tu nəttulab-net.

² Issənta əsəssəɣri n aytedan win əllanen den. Inn-asan:

³ «Əbbilalan aytedan win əlləqqawnen daɣ man-nasan, əqbâlan as əddiraran əs Məşşina

fəlas Taymar ta n jənnawan şin-nasan.

⁴ Əbbilalan win hallinen,

fəlas a tan-isəddəwət Məşşina.

⁵ Əbbilalan win əssərəsnen iman-nasan,

fəlas ad əgrəwan akal wa dasan-issənsa Məşşina.

⁶ Əbbilalan win əknanen deran n awa oɣadan,

fəlas ad t-əgrəwan.

7 Əbbilalan win hanattatnen i naragan-nasan,
fəlas əntanay da a dasan-ihənəttət Məşşina.

8 Əbbilalan win as zaddogan wallan-nasan,
fəlas ad ənəyan Məşşina.

9 Əbbilalan win tagginen alxer,
fəlas a dasan-əgu Məşşina esəm bararan-net.

10 Əbbilalan win tawadgaznen fəl igi n awa oɣadan,
fəlas Taymar ta n jənnawan şin-nasan.

11 Təbbilalam kawanay a rabbadan aytedan, ədgâzan-
kawan, wər t-illa əzzənəf n əzgən a kawan-wər-əssəwaran,
fəl əddəlil-in.

12 Awalla, dawatat, təfəliwəsam, fəlas təlâm arozan aggot-
nen daɣ jənnawan. Ənnəbitan win dat-wan, da əmmək
wədi daɣ as tawadgazan.»

Tesəmt d ənnur

13 Inn-asan Ƴaysa: «Kawanay tesəmt a təmosam y
əddənət. Amaran as imos as tesəmt ta, ab-as təla tem-
bay, məni əmmək was tat-du-za-tətəwəsuxəl tembay-net?
Tesəmt ta, ab-as tənfa wala: wər təhor ar d a din-tətəwəgər
sədi, a tat-dayyazan aytedan.

14 Ənnur n əddənət a təmosam. Ayrəm ikrâsan fəl afalla
n ədɣaɣ, wər t-illa awedan a tu-wər-za-nənəy.

15 Əmmək en daɣ a təga fətəla: As tərɣa, wər za
tətəwəggu daw əɣəzu! Kalar ətəwəgga a za tagu daɣ adag
iknan ahaku fəl ad təsəmmələwləw aytedan kul win əhanen
əhan.

16 Əmmək di daɣ as imələwləwet ənnur-nawan, dat
aytedan kul, fəl ad ənəyan aratan olaxnen win tətəggim,
awəy-du sər-san awen ad əmmâlan tanaya n Abba-nawan
di ihan ijənnawan.»

Ƴaysa d Arkawal wa Irəwan

17 Inn-asan Ƴaysa: «Ad wər təxilam assa a d-əge y a din-
əkkəsəɣ awa iktaban daɣ Əttawret, madəɣ Əlkəttaban n
Ənnəbitan. Wərgəɣ adi a d-əkke, kalar assa a d-əgeɣ y a
tan-assanda.

18 Əgğiyyəɣ əsilakanax-awan as: Iket əllan-tu jənnawan
d amadal, Əttawret wər t-in-za-təgməd wala tətəbəqqet,
amaran wala ɣas əsakkal wər t-in-z-igməd iket wər inda
arat kul wa daɣ-as iktaban.

19 Awen daɣ a fəlas awedan wa imməzrayan wala ɣas
alwajib wa ogaran təmmədrəyt, omar aytedan s ad agin
awen da, awedan wədi ənta a z'agəran eres daɣ Taymar ta
n jənnawan. Mişan as imos as ibbirdag awedan y alwajiban

win, isasayr-en y aytedan, wædi ad igræw adkul daɣ Taɣmar ta n jənnawan.

²⁰ Awalla, əmâlaɣ-awan âs as wər təgem i Məššina əbərdəg ogaran wa das-əgan musanan n Əttawret, əd Farisaytan, wædi wər za təggəzam Taɣmar ta n jənnawan.

Əmazal n awa itawannan: Əlmital daɣ batu n alham

²¹ Təslâm as itiwanna y aljadan-nana daɣ Əttawret: "ad wər tagaɣ iman."

As iga awedan iman, ad t-ibəz əššəriɣa awwaddab.

²² Nak za ənneɣ-awan, awedan kul wa iggaz alham n iyyan, wædi ad t-ibəz əššəriɣa awwaddab. Awedan deɣ kul wa innan y iyyan: "Anafnoz!" Wædi ad itəwəsəbdəd dat Asaggawar wa Zəwwəran as itawannu Sanhedrin fəl ad itəwəšrəɣ, amaran awedan wa innan y iyyan: "Kay amaros!" Wædi əššəriɣa-net Jahannama.

²³ Daɣ adi as du-təkterɣ as iššak-kay awedan daɣ amazay wa daɣ du-tewayaya təkutay-nak s adag wa n əsəqqəd ən təkutawen,

²⁴ tayya takutay-nak əddi da, tagla har tənəməsürəfa d awedan wædi, dəffər adi amaran təqqəla taga takutay-nak.

²⁵ As kay-issəwar awedan lahan, takna dər-əs tarmad iket di ad təhâm tarrayt. As wər iga adi, awedan wædi, ad išəššiwəd batu tədi əlqali. Təzzar inkər əlqali ag-ik daɣ fassan ən soji a kay-z-agin daɣ kasaw.

²⁶ As iga adi amaran əggəyyey əsilakanay-ak as wər du-za-təgmədaɣ iket wər təɣreda arazam n arat kul was kay-əwaran ərruzmatan-net. Wala tamma iyyadda wər din-za-taqqam.

Əmazal n awa itawannan: Əlmital daɣ batu n əzzəna

²⁷ Təslâm as itiwanna: "ad wər tagaɣ əzzəna."

²⁸ Nak za ənneɣ-awan awedan kul wa igan daɣ təntut asawad daɣ isidaran ənəmənsa-net, wædi igâ dər-əs əzzəna daɣ əwəl-net.

²⁹ Kud šat-nak ta n əɣil a təbukat a dak-təqqəl əssəbab n igi n abakkad, təkəkkərəq-qat-du təgəraq-qat-in, id of-ak təgməd-kay təslət-nak iyyadda, y ad tətəwəgər təxəssa-nak kul daɣ Jahannama.

³⁰ Amaran kud əfus-nak wa n əɣil a ibukan a dak-ıqqəl əssəbab n igi n abakkad, təfrəsaq-qin təgəraq-q-in, id of-ak təgməd-kay təslət-nak iyyadda, y ad təggəz təxəssa-nak ketnet Jahannama.»

Əmazal n awa itawannan: Əlmital daɣ batu n əməzzəy

³¹ Iгла Ҷайса ішсəwal, inn-asan: «Itiwanna deɣ: "Izammazzayan tantut-net, akfet-tat širawt n əməzzəy."

³² Nak za silakanay-awan as i izammazzayan tantut-net fəl a wər nəmos igi ən meddan, wədi əsəssugi a tat-iga əzzəna, amaran as izlaf aləs iyyan tantut ta təmməzzayat da, wədi əzzəna a iga ənta da.

Əmazal n awa itawannan: Əlmital dəy batu ən təhuday

³³ Təsləm dəy as itawanna y aljadan-nana: "Ad wər təhhadam fəl arət, taqqamim wər tu-təmmoalam. Kalar sabdadat arkawalan win fəl təhadam s esəm n Əməli."

³⁴ Nak za ənnəy-awan, ad wər təhhadam fəl arət waliyyan fadda: Gər za əs jənnawan, fəlas edag n əlxəkum ən Məşşina a mosan,

³⁵ wala dəy təhədam s amaḍal, fəlas ənta a illan daw daran-net, wala dəy təhədam əs Yerusalam, fəlas ənta a təmosat ayərəm n Əmənokal wa Zəwwəran, a t-imosan Məşşina.

³⁶ Ad wər təhhadağ ənta da s aḡaf-nak, fəlas wər təfregəy əsəmləl n anzađ-net waliyyan da, wala dəy əsəkəwəl-net.

³⁷ Ganniwat ḡas: "Ayew" y awa imosan tidət, madəy "kala" y awa imosan bahu. Batu a du-təşşotam fəl adi kul Aşşaytan as du-təha.

Əmazal n awa itawannan: Əlmital dəy batu n əzəzəl

³⁸ Təsləm as itiwanna: "I d-ikkasan şat n iyyan a du-tətəwəkkəs şat-net ənta da, i d-irzan ešen n iyyan a d-itəwərzü ašen-net."

³⁹ Nak za ənnəy-awan ad wər tətəgazam iman-nawan dağ amaksan. Kalar as dak-iqqas fəl əmdəd-nak wa n əḡil, takfağ-qu əmdəd-nak wa hadan.

⁴⁰ As ira awedan a kay-ibəz s əşşəriḡa fəl ad igrəw alḡaşşaba-nak, takfağ-qu əbərnuz-nak da.

⁴¹ As kay-işahhaşşal awedan əgğay ən lalan-net har əgim ən takkolt, tawəyay-as-tan har əşşin gim ən takkolt.

⁴² I kay-onsayan takfağ-qu, i dağ-ak igməyan əmarwas, a das-tu-wər-təgdəla.

Əmazal n awa itawannan: Əlmital dəy batu ən tara n əzəngə-nana

⁴³ Təsləm as itiwanna: "Iru anammarağ-nak, təgərəğ azangaw-nak."

⁴⁴ Nak za ənnəy-awan: Iriwat izəngə-nawan, ad tətəgğim şiwatriwen olaynen y aytedan win kawan-əsənən,

⁴⁵ fəl ad təqqələm əs tidət da bararan n Abba-nawan wa ihan ijənnawan. Ənta a d-isəgmadan təfuk-net fəl aytedan win maksanan əd win olaynen, isawat akonak-net fəl win oğadnen əd win nəmməzray.

⁴⁶ Kud wər tarem ār aytedan win kawan-əranen, awak ma imos aroz wa za təgrəwam daχ awen? Wərgex aytedan win zarzamnen takəsen a əmosnen imaksanan da awen daχ a əgan?

⁴⁷ As imos as imədrayan-nak χas a tareχ təsaslamaq-qan, awak ma imos arat immittayan wa təgeχ? Wərgex aytedan win wər nəssen Məşşina da adi daχ a taggin?

⁴⁸ Daχ adi kawanay, əqqəlat aytedan əkmâlne şilat n Abba-nawan wa ihan ijənnawan.»

6

Əsəssəyri igân fəl təlmənufəqa daχ əddin

¹ Iгла Ҳайса ишсəwal, inn-asan: «Ҳнкədat d иги n əлχibada imosan sokni. As wər ига adi wər za təgrəwam arozan χur Abba-nawan wa ihan ijənnawan.»

² «As tətəgga takutay y amaddarar, ad wər iqqəl adi arat təsinafalala, zun awa taggin əlmunafiqan daχ nan n əлχibada ən Kəl-Əlyəhud, əd tarrayen, fəl tara n ad əgrəwan adkul χur aytedan. Əggəyyey əsilakanax-awan as əlmunafiqan win di arozan-nasan əgrəwan-tan.

³ Kay amaran, as tətəgga takutay, ad wər issən əfus-nak wa n zalgat awa itaggu wa n əχil,

⁴ fəl ad təqqəl təkutay-nak əssir. Abba-nak s ənta a ihannayan əssiran, a dak-z-irzəman.»

⁵ «As tətəttaram, ad wər tətəggim awa taggin əlmunafiqan ərānen ad təttaran əbdadan daχ nan n əлχibada, əd sammanayan, əgmāyan s awen a tan-ənəyan aytedan. Əggəyyey əsilakanax-awan as arozan-nasan əgrəwan-tan.

⁶ Kay amaran as tətəgga šiwatriwen, təggəzax daχ ahan-nak edag wa ogaran ənəməggag d aytedan, təxfəlaq-q-in fəl man-nak, tətərə daχ əssir s Abba-nak id illa əddi. Abba-nak s ənta a ihannayan əssiran, a kay-z-akfin arozan.

⁷ As tətəttaram, ad wər tətəggam awal aggen təgannam arat iyyanda zun awa taggin aytedan win wər nəssen Məşşina, əχilne wər dasan-z-aslu Məşşina ar s ad taggin awal aggen.

⁸ A tan-wər-təttalalam, fəlas Abba-nawan, issān awas təddəraram da harwa wər daχ-as tu-təgməyam.

⁹ Təwatray da tas ihor a tat-tətəggim kawanay:

"Abba-nana wa ihan ijənnawan,
Itəwəsəχməret esəm-nak di zəddigan,

¹⁰ taset-du Təχmar-nak.

Tətəwəməzəlet tara-nak fəl amađal
s əmmək was tətəwəmazal daχ jənnawan.

11 Akf-anay isudar-nana win azalada;

12 tæssurəfaḡ-ana tadləmt ta nəga zund əmmək as nakkanay da

nəssoraf i win danaḡ-ədlamnen.

13 A dana-wər-taga daḡ aḡarar ən jarrabatan,

kalar aḡəz-ana daḡ Iblis,

[fəlas taḡmar, əd tarna, əd tanaya ši-nak har faw.

Amin."»]

14 «As tæsufam y aytedan arak mazalan win dawan-əgan, kawanay da a dawan-issurəf Abba-nawan wa ihan ijənnawan.

15 Mišan as wər tæsufam y aytedan, wədi Abba-nawan wa ihan ijənnawan wər dawan-z-issurəf arak mazalan win təgam.»

16 «As təzumam ad wər təsənnəfiləlam təkenzert zun awa taggin əlmunafiqan, əntanay a samattaynen udmawan-nasan fəl ad əssusənan aytedan kul as əzuman. Əḡḡəyyeḡ əsilakanay-awan as aytedan win di, arozan-nasan əgrāwan-tan harwa əmərədda.

17 Kay amaran, as təzumaḡ, təšširədaḡ udəm-nak, taga alwardi,

18 fəl ad wər əssənan aytedan as təzumaḡ. Abba-nak ḡas a z'issənan daḡ adi, fəlas illa əddi daḡ əssir, ihannay awa itaggin, amaran ənta a dak-z-irzəman.»

Adrarat ta nəga əs Məššina

19 «Ad wər təšadawam təḡərgist daḡ əddənet, a daḡ-qat za təhlək tamaday əd tənək, razzan deḡ baydagan inan takaran.

20 Kalar šidəwat i man-nawan təḡərgist daḡ jənnawan, a daḡ-qat wər za təhlək tamaday za wala tənək, wala deḡ assin-tat-in baydagan win razzinen inan takaran.

21 Fəlas edag wa təha təḡərgist-nak, ənta a z'iggəz əwəl-nak.»

22 «Šittawen šilat ən fətəla a əmosnat i təḡəssa-nak. As imos as šittawen-nak əhannaynat s əlluḡ, wədi təḡəssa-nak ketnet təha ənnur.

23 Mišan as imos as šittawen-nak wər əhənnəynat s əlluḡ, wədi təḡəssa-nak ketnet təha šiyay. Daḡ adi as imos as wala ənnur wa ihan təḡəssa-nak da imos šiyay, wədi ad təḡḡəza šiyay wər nəmməkkan!

24 Wər t-illa i ifrāgan əššəḡəl y əššin muzaran. Wa ḡas ikyad iyyan daḡ-san, iru wa hadan, madəḡ abbardag y iyyan, alku wa hadan. Wər təfregay ad təḡbəda Məššina, tagla deḡ tozāla dəffər əddənet.»

25 «Daḡ adi ənnəḡ-awan a kawan wər təššəwəš təməddurt, ḡər awa za tatšim, wala awa za tašwim, wala

awa za talsim. Iman-nawan wərgex ogaran imensewan, taḡəssa-nawan dex togar isəlsa?

²⁶ Ɔswədat daḡ gədad a taggadnen daḡ alhawa, wərmad nabbalan za wər tiləyan, wər šiidiwan wala daḡ tədangawen, mišan issodar-tan Abba-nawan wa ihan ijənnawan. Kawanay wərgex togaram-tan almaqam sen ḡur Məššina?

²⁷ Məni daḡ-wan wa ifragan s aššawaša-net əšitəy ən təḡrəst-net əs wala ellaf ən šat?

²⁸ Mafel as kawan-təššəwəš talḡa ən səlsa? Ɔnzərat-in daḡ əmmək was du-daggalnət təjigawen daḡ əsuf. Wərmad šaqqalnət wala zattinat isəlsa,

²⁹ mišan ənnəḡ-awan, wala Ɔmənokal Suliman harkid təgərgist-net kul, wər kala ad ewad wala iyyadda daḡ-asnət daḡ təhussay ən talassay.

³⁰ Dad isalsu Məššina yel əs təməwit tədi, s azalada ibdād, tufat ad itəwəsərgu daḡ təjəngərerət; manəmmək as kawan-wər-z-assalsu, kəl əzəḡzan əndərran!»

³¹ «Daḡ adi ad wər təššəwəšam təgannim: "Ma za natšu?" Madəḡ: "Ma za našəw?" Madəḡ: "Ma za nalsu?"

³² Aratan win kul aytedan win wər nəssen Məššina a ozalnen daḡ agamay-nasan, amaran kawanay Abba-nawan wa ihan ijənnawan, issān as təddiraram sər-san.

³³ Ɔgməyat təzzar Taḡmar ta n Məššina d aqqad dat-əs, as iga adi aratan win di kul a kawan-tawəkfin əntanay da.

³⁴ Daḡ adi a kay-wər-iššəwəš arət wa d-izayan tufat, fəlas tufat ad təššəwəš əd təməḡutar-net. Ɔzəl kul ila šiməḡutar-net a das-əḡdānen.»

7

Alxal wa iwaran ənalkim ən ḡaysa, gar-es əd Məššina d aytedan

¹ Iḡla ḡaysa iššəwal-asan, inna: «Ad wər tannim ark arət s awedan fəl a sər-wan wər itəwənnu kawanay da.

² Fəlas əmmək was təxkamam, ənta as za tətəwəxkəmam kawanay da, amaran təsəkət tas təkkatam y aytedan, ənta as dawan-z-ikət Məššina.

³ Mafel tahannaya tezawt ta təhat šat n amadray-nak, kay amaran wər din-təḡreḡ šiləlt ta təhat šat ta-nak.

⁴ Manəmmək as za tanna y amadray-nak, "ayy-i a dak-əkkəsa tezawt ta daḡ šat-nak", kay amaran šiləlt a təhat šat ta-nak?

⁵ Ɔlmunafiq, əkkəs təzzar šiləlt ta təhat šat-nak, əddi ad za tannaflaya daḡ tazawt ta təhat šat n amadray-nak təkəkəsaḡ-as-tat!

⁶ A din-wær-tæggaray arat zæddigan madey arat ilân almaqam i maksanan fêlas wær æzlayan æd dan a kawan-du-milallaynen y a kawan-ædædan, madey iladayan hallaknen aratan win ælanen almaqam.

⁷ Ansøyat Mæššina, a kawan-akfu; ægmøyat, ad tægrëwam; ayriwat-tu a dawan-akkawan;

⁸ fêlas i onsayan, ad itëwëkfu, i igmayan ad igrëw, i iýran dey Mæššina a das-akkawan.

⁹ Mæni daý-wan wa daý z'igmøy barar-net tagëlla akf-ay tæhant?

¹⁰ Wala igmøy daý-as isan akf-ay taššolt?

¹¹ Dad zammas wala kawanay an nêllubas da tæssânâm tehakkay n awa olaýan i bararan-nawan, manëmmæk as kawan-wær-z-akfu Abba-nawan wa ihan ijënnawan awa tutionsayam?

¹² Taggiwat y aytedan arat kul was tëram a dawan-t-agin. Ænta da da arat wa ihan æššëriýa wa n Ættawret, d Ælkëttaban n Ænnëbitan.

Igi daw ayaf

¹³ Æggëzat s æmi wa këruzan s ænta a itawayan æs taýmar ta n Mæššina! Iket ilwi ig-ay æmi wa itawayan s æhluk, iket æsënnëfløy tæg-ay tarrayt ta tëtawayat s æhluk, amaran æggëtan aytedan win as ænta as taggazan.

¹⁴ Mišan iket takrazt ig-et æmi wa itawayan æs tëmëddurt, iket dey æsëmëýtër tæg-ay tarrayt ta tëtawayat æs tëmëddurt, amaran wær æggëtan aytedan win tan-garawnen.

¹⁵ Ænkëdat y ænnëbitan win bahu. As kawan-du-tasin æmosan zun ayfëd, mišan æs tidët iridalan a æmosan æknanen aššar.

¹⁶ Arat wa du-saxsalan as tan-za-tëzdëyam. Awak alýanab itâwankad-du daý tazayt? Wala itâwankad-du fig daý tëgaroft?

¹⁷ Æmmæk en daý as ašæk isxân a d-itarawan âratân olaýnen, amaran ašæk wær nësxa itaraw-du win wær noley.

¹⁸ Ašæk isxân wær ifreg ara n âratân wær noley wala dey ifrag ašæk wær nësxa ara n âratân olaýnen.

¹⁹ Ašæk kul wa wær nëtirëw âratân olaýnen, wëdi ætëwëxtas a itawaggu, itëwëgër daý tëmsay.

²⁰ Daý adi illikan as ænnëbitan win bahu awa du-saxsalan as tan-za-tëzdëyam.»

²¹ «Wær igda i di-igannin: "Æmëli, Æmëli!" Wær izzogaz awen awedan Taýmar ta n jënnawan, kalar kundaba i itamazal æs tara n Abba-nin ihân ijënnawan.

²² Ʒzəl wa ilkaman aytedan aggotnen a di-annin: "Ʒməli, Ʒməli! Awak wərgex esəm-nak as nəmal y aytedan isalan win fall-ana du-təzazzabbe? Awak wərgex ənta əs nəstax kələsuf? Nəga sər-əs təlməxujaten aggotnen?"

²³ Ʒddi a dasan-anna: "Wər kala a kawan-əzdayax. Ugagat-i inəmməzray ən Məššina!"

²⁴ «Dağ adi awedan kul wa issəsaman y awal-in wa, immozal-tu, wədi iha əlmital n aləs n əməli ən tayttay ikrasan ehan-net fəl təsəlit.

²⁵ Iwat akonak, əgan əngəytan əssohatnen, əgarnat-du təzəkwen, əstaban y ahan en, mišan wər uda fəlas təsəlit a fəl ibna.

²⁶ Amaran awedan kul wa issəsaman y awal wa əge da, iqqim wər t-immozal, wədi iha əlmital n aləs wər nəla tayttay, ikrasan ehan-net fəl əzazəl.

²⁷ Iwat akonak, əgan əngəytan əssohatnen, əgarnat-du təzəkwen, istab awen y ahan wa nad, ibarajjat, ilyam-in ketnet.»

Tanaya ən Ʒaysa

²⁸ As iğrad Ʒaysa alfaydaten šin, təqqim tamattay isimak-lal sər-əs əmmək was itaggu əsəssəxri-net.

²⁹ Fəlas ig-asan əsəssəxri n awedan ilān tanaya wər əlen musanan-nasan win Ʒttawret.

8

Təlməxujaten əd tanaya ən Ʒaysa

Ʒuzəy n awedan igrâw kətru

¹ As d-izzəbbat Ʒaysa adxax wen, təlkâm-as tamattay tagget.

² Ihin-in Ihoz-t-idu awedan təgrâw təwərna ən kətru, issəjad dat-əs, inna: «Ʒməli, as tarex adi təfrâgax a di-təzzuzəyax, izdaga.»

³ Izzal-in Ʒaysa əfus-net, idas-tu inna: «Arey adi əzzəy tizdaga!» Amazay wen da dağ izzay aləs wen dağ kətru, zəddig.

⁴ Inn-as Ʒaysa: «Ʒnəy za, ad wər təməla y awedan waliyyan arat wa igan da, amaran aglu tassaknağ iman-nak y əlimam, taga takutay ta kay-issəwar əššərixa n ənnəbi Musa, ad iqqəl adi y aytedan təgəyya ən təməzzəyt-nak.»

Ʒuzəy n amašşaxal ən kabtan ən Kəl-Ʒrrum

⁵ Amazay wa da dağ in-itaggaz Ʒaysa tayrəmt ən Kafar-nahum, ənta dağ t-in-ikka kabtan iyyan ən sojitan n Ʒrrum, onsay-tu,

⁶ inn-as: «Ʒməli, amašşaxal-in a din-oyye isrâd dağ aɣaywan, ibdân, idgâz wəllen.»

⁷ Inn-as Үaysa: «Nak iman-in a tu-z-akkin əzzuzəyaq-qu.»

⁸ Inn-as kabtan en: «Əməli, nak wər əwedəy ad təggəzəy ehan-in. Annu arat җas ad izzəy amaşşəyal-in.

⁹ Əssâna dəy adi fəlas əwedan a əmosəy a dəy əttafan wiyyad tanat, əttâfaq-qat nak iman-in dəy sojitan win daw-i əllanen. As ənnəx y iyyan: "Aglu", ad aglu, as ənnəx y iyyan: "Iyyaw", a di-d-asu. As ənnəx y əkli-nin: "agu awa", ad t-agu.»

¹⁰ As isla Үaysa y awa inna kabtan en, isammaklal sər-əs, inna y aytedan win das-əlkamnen: «Əggəyyəx əsilakanax-awan as: wər ənayəx əwedan waliyyan dəy Kəl-İsrayil igân əzəgzan ewâdan wa iga aləs a.»

¹¹ «Əsilakanax-awan as aytedan aggotnen a d-əfəlan dənnəg d ataram, nəximin d İbrahim, d Isəhaq, əd Yaqub, ədrəwan dər-san iməgura dəy Taḡmar ta n jənnawan.

¹² Mişan Kəl-Əlyəhud aggotnen s əntanay as tətawasamatag Taḡmar ta, win di a din-təwəbdəxan sədi dəy şiyay, ad hallin əddadan idədwən-nasan fəl təmagraz.»

¹³ Amaran inna Үaysa i kabtan wa nad: «Əqqəl aḡaywan-nak, aget-ak Məşşina arat wa dəy-as təgmaya fəl əzəgzan-nak.» Təzzar izzay amaşşəyal ən kabtan wen dəy amazay wen da.

Tədaggalt ən Butros

¹⁴ Dəffər adi ikka Үaysa ehan ən Butros. Inay tədaggalt ən Butros təsrâd, tənnid,

¹⁵ idas əfus-net, təwat fall-as tanaday, tənkar-du a tu-təsiməgurit.

Əzuzəy ən Үaysa aytedan aggotnen

¹⁶ As tuda təfuk, əmməwayan-as-du aytedan aggotnen əssiranan kələsuf. Iḡrad Үaysa asatəx ən kələsuf winad əs təfert iyyadda. İzzozay dəx imiranan kul win əllanen den.

¹⁷ Əmmək wen dəy as inda awal wa d-iga Əməli əs tarrayt n ənnəbi İsayas a dəy innâ: «Ənta a idkalan əlḡiban-nana, idkal fəl iri-net şiwərnawen-nana.»

Ləkkum i Үaysa

¹⁸ As inay Үaysa tamattay təḡilayḡalay-tu, omar inəttulab-net s a dər-əs idawan əḡrəsan əs tagadamayt ta hadat n agaraw.

¹⁹ İkk-ay-du əmusan n Əttawret iyyan inn-as: «Əşşəx, a dak-əlkəməx s adag kul wa təkkeḡ.»

²⁰ Inn-as Үaysa: «Izagazan әлән enwan, игәдәд дөх әлән шисәллүлә, мишән нәк Аг Аггәдәм wәр әлөх wалә edag a дах әссәнсаҗ еҗәф-in.»

²¹ Inn-as әналким-net iyyan: «Әмәли, акф-i турәгат n ad агла har din-әнбәләх abba-nin тәzzar.»

²² Мишән inn-as Үaysa: «Әлкәм-i тәyyах inәmmәttan ad әнбәлан inәmmәttan-nasan.»

Әзәрәз ән Үaysa tazafa

²³ Дәффәр әди иггәз Үaysa аҗлал n aman, әнта әд нәттүләб-net, әглан.

²⁴ Wala a ihogan тәгар-du tazafa labasat фәл агарәw, ad әггатнат тәнәzzамарән аҗлал. As itaggu әwән Үaysa әнта insâ.

²⁵ Әһозан-t-in нәттүләб-net, a tu-sankaran дах етәс гәnnin-as: «Әмәли, агәз-ana! Nәкканәy нәҗwâr нәһләк!»

²⁶ Inn-asan: «Mafel тәһ-iwan тәса тогдат d әwа, кәл әзәгзән иркәман?» Inkar-du Үaysa, isannarҗам y әду d агарәw, әҗрадан адрүр d әсәссәmmi.

²⁷ Arat wa iqqan иҗәфәwән-nasan, ad гәnnin: «Ma imos wa дах әwедан, as wala әду d агарәw da ittâf дах-san танат.»

Әзүзәy ән Үaysa әшшин әytedан әгрâwән кәләсуф

²⁸ As iwar Үaysa агәннә wа һадан n агарәw, дах акал ән Гадаратан, әссәлкәдан-as-du әшшин әytedан әссирәнән кәләсуф, әгмадан-du сәр-әс изәкwan. Aytedan win әwа әган дах тәлләбәст, wәр т-illa i иһалан a d-акәy дах адәг wән.

²⁹ Саҗарән-as-du гәnnin: «Ma дах-na tare, Barar ән Мәшшинә? Awak assa du-tәге y a дана-тәсәккәрүрә да wәр du-tewed тәмәстант?»

³⁰ Әнта illât-tu әсәгән аггән ән ладәyән әдәннән дах игәг-nasan дән,

³¹ onsayan кәләсуф win Үaysa әннән-as: «As дана-тәстәҗә, тәссүкәх-анәх әсәгән ән ән ладәyән ән.»

³² Inn-asan: «Aglat!» Тәzzar әгмадан кәләсуф меddан win әшшин ән, әккан иладәyән әггәзан-tan. Amazay wән да дах d-әwәфан ладәyән win дән кул фәл азәдәгә ән тәкашwart, җартаттаwән ад тифәтаqqән дах агарәw, әләmmазан-tan aman.

³³ Тәzzar озалан маданән ән ладәyән winад s әҗрәм, әссоҗалан арәт кул wа игән дән y әytedан, d әwа игән фәл меddан win әссәрәнән кәләсуф ән.

³⁴ Дән дах a d-әҗрадан кәл әҗрәм wән агәмад, әссәлкәдан-du i Үaysa, onsayan-tu ad игмәд акал-nasan.

9

Æzuzæy ən Ƴaysa anabdon

¹ Tæzzar iggaz Ƴaysa aylal n aman, iḡras agaraw, ikka tayræmt-net Kafarnahum.

² Ewayan-as-du aytedan anabdon ihân tæssut-net. As inay Ƴaysa æzægzan-nasan, inna y anabdon: «A kay wær iðšæwæš wala barar-in! Ibakkadan-nak tiwasarafan-ak!»

³ Tæzzar ænnan arat daḡ musanan n Ættawret wiyyad daḡ man-nasan: «Alæs wa æmadraw a itaggu!»

⁴ Inn-asan Ƴaysa issânan daḡ awa samadranan: «Mafel tætaggim arak medranan win daḡ wallan-nawan?»

⁵ Awak ma ogaran tærḡesay gær i innan: "Ibakkadan-nak tiwasarafan-ak", meḡ ak i innan: "Æbdæd jæwænkæt?"

⁶ Amaran areḡ ad tæssenam as nak Ag Aggadæm, æley daḡ æddænet tanaya a di-tæšišawadat ad æssuræfa y awedan ibakkadan-net.» Tæzzar inna Ƴaysa y anabdon: «Æbdæd, tædkæla tæssut-nak takkaḡ aḡaywan-nak.»

⁷ Ibdad alæs wen ikka aḡaywan-net.

⁸ As ænayat tamattiwen arat wen, tæḡrad-tanat tasa iguz, ad tagginat tæmmalen i Mæššina a ikfan tarna togdat d awen y aggadæm.

Ƴaysa æd Matta æd nasbakkadan

⁹ Ifal Ƴaysa edag wen, illam-du dagma n alæs iyyan igân esëm Matta, iqqiman daḡ adag wa n æzærzæm n æzræf wa n takæs, inn-as: «Ælkæm-i!» Tæzzar ibdad Matta ilkam-as.

¹⁰ Æzæl iyyan, iha Ƴaysa aḡaywan ən Matta, ænta d aytedan aggotnen ən næzzærzæm ən takæsen æd nasbakkadan, idrâw dær-san imensewan ænta æd nættulab-net.

¹¹ Ænayan Farisaytan arat wa, ænnan i nættulab-net: «Mafel idrâw æššex-nawan æd næzzærzæm ən takæsen æd nasbakkadan?»

¹² Isl-asan Ƴaysa, inna: «Aytedan win wær næla æḡæli, wær æddærraran s anasmagal, imiranan a sær-æs æddærranen.

¹³ Agliwat tæssenam almayna ən batu ta iga Mæššina as inna: "Tæhanint a are, wærgæḡ šikutawen." Wær d-oseḡ fæl a d-ayraḡ aytedan win ḡur iga as oḡâdan, kalar inasbakkadan as d-æmmozala y a tan-d-ayra æqqælan inalkiman-in.»

Amagrad wa iga Ƴaysa daḡ batu n æzum

¹⁴ Tæzzar ækkan-in nættulab ən Yaxya Ƴaysa ænnan-as: «Mafel nakkanay æd Farisaytan nætuzam faw, amaran kay inættulab-nak wær tuzaman?»

¹⁵ Ijjæwwab-asan Ƴaysa inn-asan: «Ak ilagatan a ḡur illa amazlay zakanzaran? Mišan ælkâman adan a ḡur-san z'ammadkal amazlay: æddi amaran ad z'uzaman.

16 Wær t-illa i z'iwetan šikæst taynayat daḡ tabdoḡ waššarat, fêlas æddi šikæst ta din-tættawatat, a du-tæzækkæwænzæz tabdoḡ ta waššarat, tæzzar tæššit-as azarru wællen.

17 Wær t-illa dey i z'agin esmad n alyanab aynayan daḡ gædad, fêlas as iga adi, ad abbaqqen gædad win, tæzzar affatu daḡ esmad æd gædad. Kalar arat wa ihoran, ad itæwæggju esmad wa aynayan daḡ bæyaḡ aynaynen, æmmæk wædi daḡ as z'ixlæs esmad harkid bæyaḡ.»

Ëssænkær æn Ȳaysa tæbarart daḡ tæmattant d æzzuzæy-net tantut

18 Iššewal-asan Ȳaysa den daḡ as d-osa iyyan daḡ muzaran æn Kæl-Ëlyæhud, issæjad dat-æs, inn-as: «Tæbarart-in a aba æmæreda, mišan ya, æssanaḡ âs as du-tose tæssæwæraq-qat æfus-nak, a du-tænkær.»

19 Tæzzar inkar-du Ȳaysa, ilkam-as, æddewan dær-æs nættulab-net.

20 Tællat-tu tæntut tægat maraw elan d æššin igammad-tat æzni, tæhoz-du Ȳaysa sa sær tæxærden, tædas tæbænik æn tækadkat-net,

21 fêlas tænna a tæga daḡ man-net: «Iḡda ḡas ad ædæsa tækadkat-net, ad æzzæya.»

22 Imalallay-in Ȳaysa inay-tat, inn-as: «Ad wær tæḡšæda tæbarart-in! Ëzægzan-nam sær-i a kam-izzozayan.» Amazay wen da daḡ tæzzay tæntut ten.

23 Dæffær awen ikka Ȳaysa ehan n æmuzar æn Kæl-Ëlyæhud wanad. As din-ewad Ȳaysa, inay imawatan æn tæsænsaḡ šin tæfæyyawt, d aytedan nijarwaynen, æḡân tærmuḡ.

24 Inna: «Awedan kul irdæyet! Tæbarart di wær tat-aba, etæs ḡas a tæga!» Tæzzar ægan-tu ajjab.

25 As tætawasardaḡ tamattay ten, iggaz Ȳaysa ehan wa tæha tæbarart ta aba, obaz æfus-net, issænkær-tat-du.

26 Wazawazan salan n awa igan den, daḡ akal ketnet.

Ëzuzæy æn Ȳaysa æššin mæddæryal

27 As ifal Ȳaysa edag wen, ælkâman-as æššin mæddæryal, saḡaren gannin: «Ya Ag ænnæbi Dawød! Hænættæt-ana!»

28 As din-ewad aḡaywan, iggaz ehan, æhozan-t-in mæddæryal win den, inn-asan: «Tæzzigzanam as æfragaḡ igi n arat wa tæram æddi?» Ënnan-as: «Awalla, Ëmæli.»

29 Tæzzar idas šittawen-nasan, igannu: «Itæwæggiwet-awan arat wa inamannakan d æzægzan-nawan.»

30 Den daḡ ad ægrawan asawad-nasan. Ig-asan Ȳaysa tarḡæmt tæsohet, inn-asan: «Ënkædat y ad issæn a imosan awedan daḡ awa dawan-æge da.»

³¹ Mišan as əgłan, əzəwwazawazan isalan-net dağ akal ketnet.

Əzuzəy ən Ƴaysa awedan əgrâwan kələsuf, immidad əmi-net

³² Əfalan Ƴaysa Ƴas immeway-du sər-əs awedan as immidad əmi-net, id aggəsuf a t-izdağan.

³³ Ikkas Ƴaysa aggəsuf wen Ƴas, iggaz awedan was immədəd əmi-net den šin awal. Isimakläl awen əs tamattay, ad təgannu: «Arat wa wər kala tətawanay tulat-net dağ Israyil!»

³⁴ Farisaytan amaran əntanay gannin: «Əmənokal ən kələsuf a t-ikfan fərregat n ikus ən kələsuf dağ aytedan.»

Təwatray ta n əzəmmizəl ən maššaxalan

³⁵ Illil Ƴaysa iğərman əd təğarmaten kul, isasağru dağ nan n əlğibada ən Kəl-Əlyəhud, itaggu isalan n Əlinjil imosan isalan ən Tağmar ta n Məššina, izuzəy değ aytedan dağ əzzənəfan kul ən təwərnawen d əlğiban.

³⁶ As inay tamattay, təggaz-tu təhanint-net, fələs arkanay a ənnayan, tiwayyan əd man-nasan, əmosan zun ayfəd wər nələ amadan.

³⁷ Təzzar inna i nəttulab-net: «Ƴarat təggət, mišan wər əggətan maššaxalan win tat-z-aləynen.

³⁸ Dağ adi əttərat s esəm ən məššis ən Ƴarat ta, a d-assağlu imaššaxalan a tat-olaynen.»

10

Əzəmmizəl ən nəttulab win maraw d əššin

¹ Iğra-du Ƴaysa əs man-net inəttulab-net win maraw d əššin, ikf-en tarna n ikus ən kələsuf dağ aytedan, d əzuzəy n a təqqal təwərna, d a iqqal əlğib.

² Əntanay da esmawan ən nəmmuzal win maraw d əššin: Wa azzaran esəm-net Simğon, itawann-as Butros, d Andrawəs wa n amadray-net, əd Yağub wa n ag Zabaday, əd Yaxya wa n amadray-net,

³ əd Filibus, əd Bartulamawəs, əd Tuma, əd Matta wa izarzaman takəsen, əd Yağub wa n ag Alfay, əd Tadday,

⁴ əd Simğon was itawannu wa Isaggatakken, əd Yahuza was itawannu Isxarəyuti s ənta a z'agin Ƴaysa dağ fassan.

Əsəssəğri wa n əššin: Əššəğəl ən nalkiman d alyazab-nasan

Ammaran win iga Ƴaysa inalkiman-net

⁵ Əntanay da da maraw nəttulab d əššin win izammazal Ƴaysa dəffər as tan-omâr inn-asan: «Ad wər tətakkim

aytedan win wər nəmos Kəl-Əlyəhud, wala deɣ təggəzam aɣrəm waliyyan ən Kəl-Samarəya.

⁶ Kalar akkiwat Kəl-Israyil, win əmosnen zun ayfəd əssiggalnen.

⁷ Agliwat a dasan-tətaggim isalan n âs Taymar ta n jənnawan təhôz-du.

⁸ Zuzəyat imiranan, a du-təsankaram inəmməttan, təzzuzəyam aytedan win igraw kətru, təzzəzdəgam-tan, ad tətâkkasam kələsuf daɣ aytedan. Bannan as tətawakfam, daɣ adi kawanay da hakkiwat bannan.

⁹ Ad wər tətawayam urəɣ, wala azrəf, wala deɣ a təqqəl tafelt daɣ nəfdan-nawan,

¹⁰ wala deɣ aɣrəg daɣ əşikəl-nawan, wala təkadkat ta n sanatat, wala təsəsəlt ta n sanatat, wala tallaq. Əssənət as edag tosam ad tətəwəsəməgurem fəlas imaşşaxalan-in a təmosam, amaran amaşşaxal kul ila alxaq n ad igrəw a itša.

¹¹ As du-təggazam aɣrəm, madeɣ taɣrəmt, təgməyam awedan wa inahaggan d a ɣur-əs təssəgənam, taqqamim ɣur awedan wədi da har assaxa a daɣ təgmadam aɣrəm wədi.

¹² As du-təggazam ehan tannim: "Alxer fall-awan!"

¹³ Kud aytedan n ahan wədi nihaggan d a ɣur-san təssəgənam, wədi təwatray n alxer ta dasan-təgam a fall-asan təqbəl, mišan as wər nahaggan d a ɣur-san təssəgənam, wədi təwatray ten wər za təqbel fall-asan.

¹⁴ As wər tətawaqbalam, wər itawasasam deɣ i batu-nawan daɣ aɣrəm wədi, made daɣ aɣaywan wədi, təgmadam-tu, tabbəkəkam-in əgodrar-net wa iwaran idaran-nawan.

¹⁵ Əggəyyeɣ əsilakanax-awan as, əzəl wa n tabadday, aytedan n əɣrəm wədi, ad agin alxazab ogaran wa z'agin win amaɖal ən Sədom əd Gamora.»

Amagrad ən Ƴaysa s awa z'igrəwan inalkiman-net

¹⁶ «Əssənət as zimazalaq-ɣawan təmosam zun ayfəd əhânen ammas ən ridalan, daɣ adi iliwat tayttay tagim ənnəyat zun awa tagginat taşşolen, talim əd tədəbren a wər iwer a imosan lahan.

¹⁷ Ənkədat y aytedan, fəlas a kawan-əssəbdədan dat saggawaran n əşşərixa, a kawan-əggatan əs ləkkad daɣ nan n əlyibada ən Kəl-Əlyəhud.

¹⁸ Ad tətəwəsəbdədan dat naxkiman əd mənəkalan fəlas kawan-iwar esəm-in, təqqəlam şiggəyyawen-in y-asan əntanay d aytedan win wər nəmos Kəl-Əlyəhud.

¹⁹ Mišan assaxa wad za tətəwəggim daɣ fassan, a kawan-wər-işşəwəş əmmək was za təşşiwəlam, wala deɣ awa za

tannim, fêlas arat wa za tannim a fall-awan d-azzabbat day amazay wa da day têram tenna-net,

²⁰ id wêrge kawanay a z'îššewânen, kalar Infas wa Zëddigan n Abba-nawan, a dağ-wan îşawalan.

²¹ Ad sëtërmësan aytedan imëdrayan-nasan sëssugin iman-nasan, sëtërmësan abbatan bararan-nasan sëssugin iman-nasan, affallagan bararan fêl marwan-nasan sëssugin iman-nasan.

²² Awedan kul a kawan-igzêr fêlas kawan-iwar esëm-in, mişan wa dağ-wan izmaran har têtêrêst, wêdi ad îxlês.

²³ As têtawasasam dağ êxrëm taddarragam s iyyan. Êggëyyëx êsilakanax-awan as wêr du-za-têxrëdam îxerman n Israyil harwa da as du-z-êqqëla nak Ag Aggadëm.»

²⁴ «Attalami wêr oger êššëx-net, wala dëx ogar êkli mëššis.

²⁵ Igda y attalami ad agdu d êššëx-net, akli dëx igd-as ad agdu êd mëššis. Dad zamas êmuzar n aḡaywan êgan-as esëm Aššaytan ên Baḡalzabul, manëmmëk as wêr z'agin arak batuten i kël aḡaywan-net?»

A kawan-wêr-tëggëz tasa

²⁶ «Dağ adi a tan-wêr-tiksadam. Arat kul wa îxbaran ad itewësênêfilêl, amaran êssir kul ad affaggu.

²⁷ Arat wa dawan-êne dağ šiyyay, anniwat-tu ezal a mallan. Amaran arat kul wa dawan-itawasataktakan anniwat-tu s afalla.

²⁸ Ad wêr tiksadam win naqqinen taḡëssa n awedan ḡas, amaran wêr êfregan aḡşud ên wala i man-net. Kalar iksadat Mëššina a ifragan ahluk ên taḡëssa harkid man, aggadl-en dağ Jahannama.

²⁹ Awak wêrgeḡ êššin gëḡad tefelt iyyadda a nazzan? Dêr iga awen da za, wêr tan-iha i z'êgmëdan man ar ês turagat n Abba-nawan Mëššina.

³⁰ Kawanay amaran wala anzadan ên ḡafawan-nawan da kul êḡḡunan.

³¹ Dağ adi ad wêr tiksadam wala, fêlas ḡur Mëššina togaram igëḡad êlqimat!»

Ḡaysa îlas awal dağ batu n awa z'agin fêl nalkiman-net

³² «Awedan kul wa iggëyyen dat aytedan as nak a tilan, wêdi nak da a fall-as aggëyyëx dat Abba-nin ihan ijënnawan.

³³ Mişan wa di-inkuran dat aytedan, wêdi nak da ad t-unkarax dat Abba-nin ihan ijënnawan.»

³⁴ «Ad wêr tēxilam assa a d-êgëx ewâya-du alxer s êḡḡanet: kala kala wêr d-ewayax alxer, êmêgêr a d-ewayax.

³⁵ Ose-du y ad zənnəməzrəyax ələs d abba-net, zənnəməzrəya təbarart d anna-net, zənnəməzrəya dəx tədaggalt əd təntut ən barar-net,

³⁶ əqqələn kəl aɣaywan n awedan izəngə-net.

³⁷ I igan y abba-net madəx anna-net tara togarat ta di-iga, wədi wər ihor əd tişit n ənalkim-in. I igan i barar-net madəx təbarart-net tara togarat ta di-iga, wədi wər ihor əd tişit n ənalkim-in.

³⁸ I wər nədkel təgəttawt-net, agu imateran-net, ilkəm-i, wədi wər ihor əd tişit n ənalkim-in.

³⁹ Awedan wa wər nəkəttəw ar iman-net dəx əddənət ta, wədi ad affatu dəx əlaxirat. Amaran wa iqbəlan ad isaffatu iman-net dəx əddənət ta fəl əddəlil-in, wədi a tan-igrəw.»

⁴⁰ «I dawan-igan isəxlak, wədi nak as tan-iga, amaran i di-tan-igan, wədi wa di-d-izammazalan as tan-iga.

⁴¹ I igan isəxlak y ənnəbi ən Məşşina fəl tişit-net ənnəbi, wədi ad igrəw arozan win igarraw ənnəbi. Amaran i igan isəxlak y əlɣadil ən Məşşina, fəl əddəlil ən təlɣudəla-net, wədi ad igrəw arozan win igarraw əlɣadil.

⁴² Əggəyyəx əsilakanəx-awan as, i išşəşwan wala ablu n aman sammədnən y iyyan dəx nalkiman-in win ogarnən təmmədrəyt, fəlas imos ənalkim-in, wədi illikan as ad igrəw arozan-net.»

11

Awa d-izdaran

¹ As iɣrad Ƴaysa ammar ən nəttulab-net win maraw d əşşin, ifal edag wen, ad isasəxru itaggu təlɣutbat dəx ɣərman win əhanən akal wen.

Idufan aggotnən win tawagganən dəx əsəssəɣri ən Ƴaysa

Ƴaysa əd Yaxya wa isalmaɣan aytedan dəx aman

² Yaxya wa isalmaɣan aytedan dəx aman, iha kasaw as isla awa itaggu Əlməsix, izammazal-du sər-əs arət dəx attalamitan-net,

³ y ad t-əssəstənan annin-as: «Ak kay a imosan was nəqqəl y a d-asu, meɣ ak ad nəqqəl y iyyan?»

⁴ Ijjəwwab-asan Ƴaysa inn-asan: «Əqqələt Yaxya təssuɣələm-as awas təsəllim, d awa təhənnəyam, tannim-as:

⁵ Iməddəɣəl əhənnəyan, inəbdan jawanken, aytedan win igrəw kətru əzzəyan zaddogan, imzagan əgrəwan təsalay, inəmməttan nakkaran-du dəx təməttant, şiləqqawən dəx sallanat y Əlinjil.

⁶ İbbilal awedan wa wər igmed əzəɣzan-net fəlas wər iga əşşak dəx awa əmosa.»

⁷ As æglan attalamitan ən Yaxya, issənta Ƴaysa amagrad i tamattay daƷ batu ən Yaxya, inn-asan: «Ma imos arat was tækkam əsuf y a tu-tənəyam? Awak telant isiwəliwil ađu? Kala!

⁸ DaƷ adi ma imos wa tækkam y a t-id-tənəyam? Awak aləs ilsân tabdoq tæknat šiħussay? Kala! Ənəyat za, aytedan win əqqannen šiħəddaƷ šin hossaynen, win di inan ən mənokalan a əhan.

⁹ Adi za ma tækkam y a t-id-tənəyam? Awak ənnəbi? Wəllen z'ās ənnəbi. Amaran Yaxya ogar tišit n ənnəbi fadda.

¹⁰ Fəlas Yaxya ənta a fəl ənnan Əlkəttaban: "*Ənəy za nak a dat-ək assaglay anammazul-in a z'aknin tarrayt-nak.*"

¹¹ ƏggəyyeƷ əsilakanax-awan as wər kala a d-ihəw awedan ogaran Yaxya wa isalmaƷan daƷ aman. Dər iga awen da wala Ʒas wa ogaran təmmədrəyt daƷ TaƷmar ta n jənnawan, da ogar Yaxya.

¹² A d-obazan Ʒur adan win daƷ itaggu Yaxya wa isalmaƷan daƷ aman təlxtubat, har harwa da, TaƷmar ta n jənnawan təmiqqas əd tallabəst təsohet, gammayan kəl əššur d abbaz-net.

¹³ Amaran Əlkəttaban n Ənnəbitan kul d Əttawret, əmālan TaƷmar ta n Məššina, har azzaman ən Yaxya.

¹⁴ Kud təqbālam awa dawan-ənnəƷ əddi, wədi əssənat as Yaxya, ənta a imosan Ilyas was ittəmal assa-net.

¹⁵ Wa isallin, issəsəmet!»

¹⁶ «Mas z'ammattalaƷ aytedan n azzaman win nəha da? Olān əd bararan əqqimnen daƷ əssuk, saƷaren i midawan-nasan,

¹⁷ gannin-asan: Nəwat-awan tendə, mišan wər təwəƷam! NəƷ-awan isakkan ən təfəyyawt, mišan wər təlem!

¹⁸ ƏnnəƷ-awan adi fəlas Yaxya osa-du, wərmad itattu za wər isəssu, təzzar ənnan aytedan: Aljayn a t-izdaƷan.

¹⁹ Amaran, nak Ag Aggadəm, ose-du ətatta əsassa, mišan ənnan aytedan: "Ənawat aləs wen n amawwalay en, isassin esmad s igət, imos əmidi ən nabazan ən takəsen d ark aytedan!" Masnat ta du-təfalat Məššina amaran, imazalan n aytedan win əhanen tarrayt ta n Məššina a sataddinen aqqad-net.»

Ərruymatan win iga Ƴaysa i Ʒərman win ənkurnen ammaran-net

²⁰ Təzzar issoƷal Ƴaysa təƷna labasat i Ʒərman win daƷ əganat taššam ən təlməƷujaten, id tətubt a wər əgen.

²¹ Inna: «Iket alƷazab iqqāl-awan kəl-əƷrəm ən Koradzin! Iket alƷazab iqqāl-awan kəl-əƷrəm ən Betsayda! Fəlas təlməƷujaten šin Ʒur-wan əganen ənnar əgānat daƷ əƷrəm

ən Tir əd wa n Sidon, wədi irəw as əqqanan isəlsa ən bəhu əqqiman day ezəd, imos awen əsənnəfiləl n as əhdän.

²² Awen day a fəlas ənnex-awan: Alxazab wa za tagim əzəl wa n tabadday ad agər wa z'agin aytedan n əxrəm ən Tir əd wa n Sidon.

²³ Kawanay aytedan n əxrəm wa n Kafarnahum, adis ad tammadkalam s aljannat? Kalar Jahannama a day za tətəwəgaram, fəlas təlməxjujaten šin xur-wan əganen əs ənnar əgānat day əxrəm ən Sədom, wədi har azalada ill-ay.

²⁴ Awen day a fəlas ənnex-awan: Alxazab wa za tagim əzəl wa n tabadday ad agər wa z'agin aytedan n akal ən Sədom.»

Əmmək was za nakkawan i Ƴaysa

²⁵ Iгла Ƴaysa iššəwal inna: «Əgex-ak təmmalen ya Abba, Əməli ən jənnawan d amađal fəl ayabar wa təgex aratan win i musanan, əd malan ən tayttay, təsannafalalaq-qan y aytedan win wər nəzlay əd bararan;

²⁶ id adi da a imosan agna-nak ya Abba!»

²⁷ «Arat kul ig-ay Abba-nin day əfus-in, wər t-illa i issanan awa əmosa ar Abba, wər t-illa dəx i issanan awa imos Abba ar nak an Barar-net d awedan was arex a das-tu-sənnəfiləla.

²⁸ Akkiwat-i-du ketnawan win əddaznen, ewayan əzuk, a kawan-akfa təsanfawt.

²⁹ Bardagat-i təlkamam i tara-nin, tabəzam fall-i masnat, id nak məššis ən talmat a mosa, əwəl-in dəx wər t-iha zazwar ən man. Əddi ad za təgrəwam təsanfawt i man-nawan,

³⁰ fəlas ləkkum i tara-nin isinaflay, əgəggi-nin dəx i fəsusan.»

12

Tamazaq day batu n əzəl wa n təsanfawt ən Kəl-Əlyəhud

¹ Azzaman en da, əzəl iyyan ən təsanfawt ən Kəl-Əlyəhud, issiwal Ƴaysa šiwəgas n alkama ənta əd nəttulab-net. Iggaz gələk inəttulab-net, a du-rassaban šixaxanen, tattintanat.

² As ənayan Farisaytan awen, ənnan i Ƴaysa: «Ənəy! Inəttulab-nak taggin arat xarāman day əzəl wa n təsanfawt.»

³ Inn-asan Ƴaysa: «Ak təxaray a wər təgem awa iga ənnəbi Dawəd assaxa wad t-iggaz gələk, ənta əd midawan-net?

⁴ Awak wərgex iguz a əgan ehan ən Məššina, ətšan šigəlwen šin əmosnen takutat təskátat i Məššina, imos

awen arat fall-asan xaraman? Šigəlwen šin den ilimaman gas as təxalal tattay-nasnat. Awak teyaray a wər təgem adi?

⁵ Meş ak teyaray a wər təgem daş Ettawret as əzəl wa n təsanfawt, ilimaman wər əssəfraran əššərədan n əzəl wa n təsanfawt id əzəl wədi šaqqalan daş Ahan wa Zəwwəran n Əlyibada, mišan wər fall-asan imos awen lahan?

⁶ Əggəyex-awan as wa illan da, ogar Ehan wa Zəwwəran n Əlyibada.

⁷ Ənnar təgrâm almaşna ən batu ta tənnat: "Nak təhanint a areş, wərge takutay." Wədi wər za təbəzam s əššərişya aytedan wər iwer lahan.

⁸ Ənneş-awan adi fəlas nak Ag Aggadəm a ixkaman fəl əzəl wa n təsanfawt.»

⁹ Ifal Şaysa edag wen, ikka ehan n əlyibada ən Kəl-Əlyəhud n əşrəm wen da.

¹⁰ Ehan wen ih-ay aləs as immût əfus-net. Ənnan Fərisaytan i Şaysa: «Ak xalal əzuzəy n awedan daş əzəl wa n təsanfawt?» Arat wen imos tənagmayt a das-əgân fəl ad t-əbəzan s əššərişya.

¹¹ Inn-asan Şaysa: «Məni daş-wan wa z'ilân tilay iyyadda, amaran təqqəl anu daş əzəl wa n təsanfawt, aqqam wər daş-as tat-d-ikkəs?

¹² Awedan za, ogar tilay almaşqam wəllen! Daş adi xalal igi ən tənfa y awedan daş əzəl wa n təsanfawt.»

¹³ Təzzar inna Şaysa y aləs wa: «Əzzəl əfus-nak.» İzzaltu, izzay, ola əd wa hadan.

¹⁴ Əqlan Fərisaytan, ad timəşəwwiran fəl təməwit tas z'əgin iman ən Şaysa.

Şaysa, ənta a imosan Ənaşbid wa imal ənnəbi

¹⁵ As isla Şaysa awen, igmad edag wen. Təlkam-as tamattay tögget. İzzozay imiranan kul.

¹⁶ Mišan irşam-asan fəl amel y awedan waliyyan awa imos.

¹⁷ Arat wen iga fəl ad andu awal wa iga ənnəbi İsayas as inna:

Ənta da ənaşbid-in wa sannafrana, s ənta a əkney tara, isifalawas iman-in. A fall-as du-zəzzəbbe İnfas-in di Zəddigan, ad immal i təmattiwen n əddənət kul əššərişya wa-nin.

¹⁹ Wər z'ammastan d awedan waliyyan, za wər fall-as z'isəşərət, wala aslin-as aytedan işawal daş tarrayen.

²⁰ Wər z'arzu alawag ən telant illigwen, za wər z'anşu fətəla təbukət i təmattant; almaşna as wər z'agu təkma waliyyat i nərkam. Awen daş a z'itaggu iket wər issəbdad əššərişya;

²¹ *aginat daɣ-as tamattiwen n əddənet kul attama-nasnat.*

Əməqqəs ən Ƴaysa əd Farisaytan

²² Təzzar immeway-du aləs iyyan əs Ƴaysa, as immidad əmi-net, imos deɣ əmədderɣəl, fəlas aggəsuf a t-izdaɣan. Izzozay Ƴaysa aləs wen, išşewal iswad deɣ.

²³ Isimaklal awen wəllen əs tamattay ketnet, ad təgannu: «Ma iqqal ak Ag ənnəbi Dawəd wa əttəmalan awa?»

²⁴ Mišan as əslan Farisaytan y awen, ənnan: «Aləs en Aşşaytan Baɣalzabul wa n əmənokal ən kələsuf a t-ikfan fərregat n ikus ən kələsuf daɣ aytedan.»

²⁵ Mišan ya issan Ƴaysa daɣ awa samadranan, inn-asan: «Taɣmar kul tas əmməgaran məssawəs gar-essan, tədi əbərəjji a za tagu. Wər t-illa əɣrəm, wala deɣ aɣaywan, as z'ammazrayan məssawəs, aqqam wər ibarajjat.

²⁶ As imos as Aşşaytan isattaɣ iman-net, wədi iman-net a dər imməgar. Daɣ adi manəmmək as za tihag taɣmar-net?

²⁷ Amaran kud nak tarnə ən Baɣalzabul as takkasay kələsuf daɣ aytedan, inalkiman-nawan za, ma ilan tarnə tas tan-takkasan? Adi da fəlas əntanay iman-nasan as kawan-z-əbəzan s əşşəriɣa.

²⁸ Mišan as imos as Infas ən Məşşina as takkasay kələsuf daɣ aytedan, wədi Taɣmar ta n Məşşina tos-iwan-du.

²⁹ Wər t-illa i ifrâgan iguz n ahan n aləs n əməqqerəd, iɣrəd aqqa ən tələ-net, ar s ad t-ikrâd təzzar. Dəffər as t-ikrâd amaran ad z'ifræg aqqa ən tələ-net.

³⁰ Wa dər-i wər nəddew, wədi azangaw-nin a imos, wa di-wər-nəllil deɣ s əşidəw, wədi əzəwwəziwəz a itaggu.»

³¹ «Awen da fəl dawan-ənnəɣ: A iqqal abakkad, wala alfawaxiş, kul ad təwəsürəfan y awedan, mišan ikus ən tarnə y Infas wa Zəddigan, ənta wər z'itəwəsürəf y awedan.

³² As di-ibyak awedan nak Ag Aggadəm, ifrâg ad igrəw təsureft, mišan as ibəyak awedan Infas wa Zəddigan, wərmad z'igrəw təsureft daɣ əddənet, za wər tat-z-igrəw daɣ alaxirat.»

³³ «As təlam aşək isxân, a daɣ-as təgrəwam âratän olaynen, as təlam aşək wər nəsxə, a daɣ-as təgrəwam âratän əbrarnen; fəlas âratän win itaraw aşək, əntanay as itawazday.

³⁴ Xə taşşolen şin da! Manəmmək as za tannim a olayən, ənta kawanay təkñâm tallabast? Wərgəɣ awa idkaran əwəl n awedan, ənta a d-igammadan imi-net?

³⁵ Awedan wa olayən, əlluɣ wa ihan əwəl-net a daɣ d-itakkas awa olayən, mišan anallabus ənta, talbast ta təhat əwəl-net a daɣ d-itakkas awa labasan.

³⁶ Amaran nak ənnəx-awan əzəl wa n tabadday awedan kul kundaba ibdad fəl batuten ən bannan šin iga.

³⁷ Fəlas awalan-nak a kay-tagaznen daχ əššəriχa, amaran əntanatay harwa da a kay-tabaznen s əššəriχa.»

³⁸ Ənnan arat daχ musanan n Əttawret əd Fərisaytan: «Əššex, nəra daχ-ak a dana-tassakna təlməxjujat təmosat aχalamat.»

³⁹ Inn-asan Ƴaysa: «Aytedan n azzaman win, inəllubas, wər nəksud Məššina, amaran gammayan təlməxjujat! Kala! Təlməxjujat ta dasan-tətawaggat iyyadda χas, a tat-imosan ta n ənnəbi Yunəs.

⁴⁰ Ənta əmmək wa daχ as iga Yunəs karad jilan, əd karad hadan daχ tədist ən kifi wa zəwwəran, əmmək wen daχ as nak da Ag Aggadəm ad aga karad adan gər mawetan n amađal.

⁴¹ Əzəl wa n tabadday, ad d-ənkəran aytedan n əχrəm ən Ninif, əzzəbəzan aytedan n azzaman win y əššəriχa fəlas əntanay əhəddi a əgan əzəl wa dasan-iga Yunəs təlxutbat, imal-asan awal ən Məššina. Əssənət za as, wa illan da əmərədda, ogar Yunəs mišan tugayam əs tətubt.

⁴² Əzəl wa n tabadday, a du-tənkər təmənokalt tas kala təxkam fall akal n agala igân esəm Šeba, taggayyat fəl aytedan n azzaman win, təzzəbəz-tan y əššəriχa fəlas d ad iraz amađal a du-təgmad fəl ad təssəsəm y awal ən təla n əgərri wa itaggu əmənokəl Suliman. Əssənət za as, wa illan da əmərədda, ogar ənnəbi Suliman mišan tugayam s a das-təssəsəmam.»

⁴³ «As igmad aggəsuf awedan, iras aggəsuf wen idaggan əqqurnen igammay id imal, iqqim wər t-igrew,

⁴⁴ ad annu daχ man-net: "Nak a za, ad əqqələχ ehan-in wa d-əgmada." As t-id-iqqal a t-id-asu wər itawaggaz, ifrâd, iχrad amaknaw.

⁴⁵ Təzzar aglu idaw-du d əssa kələsuf wiyyad a t-ogarnen tallabəst, əggəzan awedan wanâd, əzdəχan-tu. Tagu təχara n awedan wen aχsud ogaran was kala tu-təga. Awen da a z'igrəwan inəllubas n azzaman win.»

Anna əd mədrayan ən Ƴaysa win tidət

⁴⁶ A iššewal Ƴaysa i tamattay den da, təlla anna-net den əd mədrayan-net. Əbdâdan sədi dat ahan, ərân a das-annin arat.

⁴⁷ Inna awedan iyyan i Ƴaysa: «Ənəy, anna-nak əd mədrayan-nak, əbdâdan-ak dat ahan ərân a dak-annin arat.»

⁴⁸ Inn-as Ƴaysa: «Ma imosan anna-nin? Ma imosan imədrayan-in?»

⁴⁹ Təzzar izzal Ƴaysa ifassan dənnəg nəttulab-net, inna: «Ənəyat, anna-nin əd mədrayan-in əntanay da,

⁵⁰ id awedan kul wa itamazalan tara n Abba-nin ihan ijənnawan, ənta a imosan amadray-nin, madeƷ təmadrayt-in, madeƷ anna-nin.»

13

Əsəssəyri wa n karad: Əlmitalan daƷ batu ən Taymar ta n Məşşina

Əlmital wa n ənanbal n amasa

¹ Əzəl wen, igmad Ƴaysa ehan, igla, iqqim daƷ təgadamayt n agaraw.

² Təddew-du fall-as tamattay tagget, har as iggaz aƷlal n aman iqqim daƷ-as, təbdad tamattay ketnet daƷ təgadamayt n agaraw.

³ Imməgrad-asan daƷ aratan aggotnen s əlmitalan. Inn-asan: «Kala ad ikka əmagyak iyyan tawagost-net, y a tat-inbəl.

⁴ DaƷ anabal wa itaggu den imosan anabas n amasa, ərtaknat təblalen şiyyad fəl tama ən tarrayt, osan-du gədad, ətşan-tanat.

⁵ Şiyyad ərtaknat daƷ adag əhanat təhun, amaran wər t-ihə amađal igdān. Idwal-du amasa wen tarmad, fəlas wər daw-əs illa amađal aggen.

⁶ As təggəzzay təfuk, təssəqqad awa d-idwalan daƷ amasa wen. Iqqur fəlas ikewan-net a wər nəggug daƷ amađal.

⁷ Şiblalen şiyyad ərtaknat daƷ təfəssəƷ. Ədwalnat təfəssəƷ şin, əlməznat amasa wa d-idwalan den.

⁸ Mişan ya arət daƷ təblalen en irtak daƷ amađal olaƷan. Igməd-du, idwal, igə şixəƷanen. Şiblalen şin den akkiyyat teraw temeday ən tablalt, şiyyad sədisat təmərwen, şiyyad karadət təmərwen.

⁹ Wa isəllin, isəsəmet!»

Əddəlil wa fəl itaggu Ƴaysa əlmitalan

¹⁰ Dəffər awen əhozan-t-in nəttulab-net ənnan-as: «Mafəl tətamagrada y aytedan win s əlmitalan?»

¹¹ Ijjawwab-asan Ƴaysa inn-asan: «TaggəƷ-asan əlmitalan win, id kəwanay təgrāwam masnat daƷ əssiran ən Taymar ta n jənnawan, əntanay amaran wər tat-əgrewan.

¹² Fəlas wa ilan, a das-itəwəşitu awa ila, annaflay. Wa wər nələ amaran, arət n awa ila da a daƷ-as attarmas.

¹³ Awen da a fəl dasan-tamagrada s əlmitalan, id əswâdan mišan wər hənnəyan, əssisaman mišan wər sallin, za wər gərrin.

¹⁴ Ēntanay a fəl tənda batu ta iga ənnəbi Isayas assaxa wad inna: *"Ad taknim əsəsəm, mišan wər za tagrim wala. Taknim asawad mišan wər za tənəyam wala."*

¹⁵ *Fəlas iwəllan ən tamattay ta ab'as əlan tafəryt, əngəm agrin. Ēgan iman-nasan imzagan, šittawen-nasan dey əymasan-tanat, fəl ad ib'as hannayan əs šittawen-nasan, ib-as sallin əs təməzzugen-nasan, ib'as garrin əs wallan-nasan. Ugayan əs tətubt, əngəm əzzuzəyaq-qan."*

¹⁶ «Kawanay amaran təbbilalam id šittawen-nawan əhannaynat, təbbilalam id šiməzzugen-nawan sallinat.

¹⁷ Ēggəyyey əsilakanax-awan as sidaranan ənnəbitan aggotnen d aytedan win oxadnen aggotnen anay n awa təhannayam, mišan wər t-ənəyan, sidaranan dey tesalay y awas təsallim, mišan wər das-əslen.»

Əsəssəgri ən Ƴaysa əlmital wa n ənənbəl n amasa

¹⁸ «Dağ adi kawanay səsəmat y almağna n əlmital wa n ənənbəl n amasa.

¹⁹ Amasa wa irtakan fəl tama ən tarrayt, əlmital a imos n awedan wa islan i salan ən Tağmar ta n Məššina wər tan-igra, asa-du Iblis ikkəs awa itawanbalan dağ əwəl-net.

²⁰ Amasa wa irtakan dağ amađal əhənat təhun, əlmital a imos n awedan wa islan y awal ən Məššina, iqbal-tu əddi da əs man filawasnen,

²¹ mišan wər ila awen ekay. Awedan wa wər imos ar məššis ən təmazayen. Igda Ƴas a tu-təməl təssust, madex təddəguzt təgât fəl əddəlil n Awal ən Məššina, ad ayyu əzəgzan əddi da.

²² Amasa wa irtakan dağ təfəssağ, əlmital a imos n awedan wa islan y Awal ən Məššina, mišan aššawašatan n əddənet, d adakal wa təga təgərgist n əddənet tayttay-net, əssəfalan-du dənnəg Awal wen, igdal-as awen a d-awəy tənfa.

²³ Amasa amaran wa irtakan dağ amađal olayan, əlmital a imos n awedan wa islan y Awal ən Məššina, igr-ay. Awedan wədi a d-awəy tənfa təmosat temeday n ənətfus, iyyat təqqəl sədisat təmərwen, iyyat amaran təqqəl karadat təmərwen.»

Əlmital wa n alkama d arak yel wa dağ-as d-idwəlan

²⁴ Iga Ƴaysa i tamattay əlmital iyyan. Inna: «Tağmar ta n jənnawan təha əlmital n aləs inbalan amasa olayan dağ tawagost-net.

²⁵ As ənsan aytədan osa-du azangaw-net, inbas ark amasa daɣ təwagost ten, ijawankat.

²⁶ As tədwal tawagost, təga šiɣaxanən, inafalal-du ənta da ark amasa wanad.

²⁷ Osan-du eklan n aləs wa ilan tawagost ten, ənnan-as: "Məššikkana, wərgex amasa wa olaɣan a tənbala daɣ tawagost-nak? Ənnəs za taɣara n arak yel wa daɣ-as d-idwalan den?"

²⁸ Inn-asan aləs wen: "Adi azangaw-nin iyyan a t-igan." Ənnan-as eklan: "Meqqal tareɣ ad naglu nəxərəd-du alabay ən yel wa wər nolex en?"

²⁹ Inn-asan: "Kala! Fəlas təksəda a əgex a tu-tənakkadam har ammarsal alkama iman-net.

³⁰ Ayyiwat-tan ad ədwəlan kul har du-tawəd ɣarat. As inta əmiləy ən təwəgas, ad annax i maššaxalan win talaynen, ad izaran s arak yel wa, har t-əxərədan tewaxnay iqqəl šibolasen, itəwəsəqqəd, alkama amaran agin-tu daɣ tədangawt-in."»

Əlmital wa n təblalt n amasa ən mutard

³¹ Ig-asan Ƴaysa əlmital iyyan, inn-asan: «Taɣmar ta n jənnawan tola d amasa n annabat igān esəm mutard inbal awedan daɣ tawagost-net.

³² Amasa wa n mutard ənta a ogaran imasan kul təmmədrəyt. Mišan as idwal, ad agər annabatan kul win fərgan, iqqəl ašək, har as a d-asin gəɟad ad taggin šisəllula daɣ zəlan-net.»

Əlmital wa n xamira

³³ Ig-asan əlmital iyyan, inn-asan: «Taɣmar ta n jənnawan tola əd xamira tərway təntut daɣ karadat anafaxaten n agel n alkama har ikuf agel ketnet.»

Əddəlil wa fəl itaggu Ƴaysa əlmitalan

³⁴ Aratan win den kul igann-en Ƴaysa i tamattay s əlmitalan. Wər dasan-inna arat waliyyan wər nəmos əlmital,

³⁵ fəl ad andu awal ən Məššina wa imal ənnəbi assaxa wad inna: «Ad arax imi-nin, əššiwəla s əlmitalan, əməlay aratan win əɣbarnen harwa ɣur ənətti n əddənət.»

Əsəssəgri n əlmital wa n alkama d arak yel wa daɣ-as d-idwalan

³⁶ Dəffər awen ifal Ƴaysa tamattay, igla ikka ehan. Əhozan-t-in nəttulab-net ənnan-as: «Səssagr-anax əlmital wa n arak yel wa d-idwalan daɣ tawagost.»

³⁷ Inn-asan: «Wa inbalan amasa wa olaɣan, adi Ag Aggadəm.

38 Tawagost, adi æddænet, amasa wa olaḡan amaran immittal aytedan win æbbærdagnen i Taḡmar ta n Mæššina, arak yel immittal aytedan win ælkammen i tarrayt ta n Iblis.

39 Azangaw wa inbalan ark amasa, adi Iblis, ḡarat amaran adi æzæl wa n tabadday. Aytedan win talaynen, adi angalosan.

40 Ænta æmmæk wa daḡ as d-itawankad arak yel daḡ tawagost, itæwæsæqqæd, æmmæk wædi daḡ a z'itæwæggin æzæl wa tabadday y aytedan.

41 A d-assagla nak Ag Aggadæm angalosan-in a z'ækkæsnen daḡ Taḡmar-in aratan kul win takkasnen æzægzan daḡ aytedan, d aytedan win næmmæzray æn Mæššina.

42 Tæzzar æḡæran-tan daḡ amahander æn tæmsay, ad hallin æddadan idædwan-nasan fæl tæmagraz.

43 Æddi daḡ ad z'ægin aytedan win oḡadnen æmælæwlæw wa n tæfuk, daḡ Taḡmar ta n Mæššina di n Abba-nasan. I isallin aslet!»

Ælmital wa n ærræzæḡ iḡbâran

44 «Taḡmar ta n jænawan tola harwa da d ærræzæḡ iḡbâran daḡ tawagost, isaffagg-ay d awedan iyyan, ilas-tu aḡabar. Awa iga daḡ tæfalawist, igla izzænz-in awa ila kul, izzænza tawagost ten.»

Ælmital wa n æljuhær wa n ælæsæl

45 «Taḡmar ta n jænawan tola harwa da d amassatag igammayan æljuhær wa ihossayan.

46 As igraw æljuhær iyyan ihossayan, wa n ælæsæl, igla izzænz-in awa ila kul izzænz-ay.»

Ælmital wa n sangay wa n abbaz æn kifitan d almaḡna-net

47 «Taḡmar ta n jænawan tola harwa da æd sangay zæwwæran n abbaz æn kifitan itiwagaran daḡ agaraw, obaz-du kifitan æmosnen æzzænæfan.

48 As idnay, ærkaban-t-idu nabazan æn kifitan æs tæḡadamayt, æqqiman, ædkalan-du izmaman a daḡ-san taggin kifitan win olaḡnen, æḡgaran-in win wær nænfa wala.

49 Awen daḡ a z'ægin æzæl wa n tabadday. A d-asin angalosan, æskætan-in inæmmæzray æn Mæššina, zæmmæzæyant-tan d aytedan win oḡadnen,

50 æḡæran-tan daḡ amahander æn tæmsay, ad hallin æddadan idædwan-nasan fæl tæmagraz.»

Ælmital wa n mæššis n aḡaywan

51 Iglæ ḡaysa iššæwal inn-asan: «Ak tæḡrâm awa ænne da kul?» Ænnan-as: «Awalla.»

52 Tæzzar inn-asan: «Daḡ adi, æmusan n Ættawret kul wa itawasasayran y ad iqqæl ænalkim æn Taḡmar ta n

jənnawan, ola əd məşşis n aḡaywan, a d-itakkasan daḡ təlanet aratan win aynaynen əd win waşşarnen isataḡmal-tan.»

Awa d-izdaran

⁵³ As iḡrad Ƴaysa əsəssəḡri wa igan s əlmitalan en, igmad akal wa ihozan agaraw, igla.

Əsəssəḡri ən Ƴaysa, itittəy ətəwəşşak-net

Iba n əzəgzan daḡ Nazaret

⁵⁴ As d-osa aḡrəm wa daḡ idwal ad isasaḡru aytedan daḡ ahan-nasan wa n əlḡibada. Awa sər-san iga awen daḡ əsəmməkləl, har əqqiman gannin: «Mənis t-idu-təggaz masnat togdat d awa, əd təlməḡjujaten šin itaggu da?»

⁵⁵ «Ak awa wərgəḡ ag aləs wa ikarrasan inan? Wərgəḡ anna-net esəm-net Maryama, imədrayan-net iyyan Yaqub, iyyan Yusəf, iyyan Simḡon, iyyan Yahuza?

⁵⁶ Wərgəḡ šimədrayen-net kul əllanat ḡur-na? Daḡ adi məni iguz wa das-d-əgan aratan win da kul?»

⁵⁷ Awen daḡ a dasan-igdalan əzəgzan sər-əs. Mišan innasan Ƴaysa: «Ənnəbi wər itəwəlku ar daḡ aḡrəm wa daḡ idwal d aḡaywan-nasan.»

⁵⁸ Amaran iqqim da wər iga təlməḡjujaten aggotnen daḡ adag wen, fəlas əzəgzan a sər-əs wər əgen aytedan win den.

14

Ətəwəḡḡay ən Yaxya wa isalmaḡan aytedan daḡ aman

¹ Azzaman en da a daḡ isla Herod Antifas wa n əmuzar n akal ən Galilaya, isalan ən Ƴaysa.

² Təzzar inna Herod y aytedan-net: «A igan da Yaxya wa isalmaḡan aytedan daḡ aman, a d-inkaran den daḡ təmattant! Awen da fəl ila tarna n igi ən təlməḡjujaten.»

³ Arat wen inn-ay Herod fəlas azzaman dat awen omâr s ətərməs ən Yaxya, itawakrad itawagga daḡ kasaw, fəl əddəlil ən Herodəyas təmosat taḡur Filibus imosan amadray ən Herod a da,

⁴ fəlas Yaxya a igannin i Herod: «Xaram fall-ak azalaf ən təntut di.»

⁵ Eway-du awen əs Herod as ira ikus ən man ən Yaxya, mišan iksud tamattay təgât i Yaxya iduf n as ənnəbi a imos.

⁶ As d-iḡlay əzəl wa n təhəwt ən Herod, isassaga saksas, təga elles ən Herodəyas eweḡ iknan šihussay dat naftaḡan. Təzzar oggām-tat Herod

⁷ har as ihad-as âs, a das-agu arat kul wa daḡ-as təḡmay.

⁸ As təššəwwar anna-net tənn-as ad tannu i Herod eyaf ən Yaxya a təra. Tənkərtəbarart tənn-i Herod: «Akf-i attabla da da iha aɣaf ən Yaxya wa isalmaɣan aytedan daɣ aman.»

⁹ Arat wa təgməy təbarart ten eway-du s əmənokal Herod as əɣšadan man-net. Mišan omar s a das-itəwəggu arat wa təgməy den, fəl əddəlil ən təhuday ta das-iga d əddəlil ən naftaɣan-net.

¹⁰ Issəgla awedan y a d-ifrəs eyaf ən Yaxya daɣ kasaw.

¹¹ Immeway-du aɣaf n ənnəbi en daɣ attabla, itawakfa i təbarart, təzzar təkf-ay y anna-net.

¹² Osan-du nalkiman ən Yaxya ədkalan taɣəssa-net, ənbalan-tat-in. Əglan əmalan i Ƴaysa.

Əsətši wa iga Ƴaysa səmmos gim n aləs

¹³ As isla Ƴaysa isalan win, igmad edag wen, iha aɣlal n aman. Iгла ɣas-net ikka edag issufan a din-ikitayyen. Təsla tamattay ta təhat šiɣarmaten šin ɣələyɣələyan awen, təlka-m-as idaran-net.

¹⁴ As d-izzəbbat aɣlal inay tamattay tagget, təggaz-tu təhanint-net, ad izuzəy imiranan-nasan.

¹⁵ As təga takəst, əhozan-t-idu nəttulab-net ənnan-as: «Edag issufan awa, amaran əzəl igla, daɣ adi suɣəl tamattay a, ad təgməy id təzzənza a tətša daɣ təɣarmaten.»

¹⁶ Inn-asan Ƴaysa: «Wər təga addararat s ad aɣlin, šatšat-tan kawayay iman-nawan da!»

¹⁷ Ənnan-as: «Nakkanay ya wər nəla da ar səmmosat təgəlwen d əššin kifitan.»

¹⁸ Inn-asan Ƴaysa: «Awəyat-i-tan-du.»

¹⁹ Omar tamattay s ad taqqam daɣ yel illan den, təzzar idkal səmmosat təgəlwen šin den d əššin kifitan win, iggəzzay ijənnawan, iga igodan i Məššina. Ikaramkaram šigəlwen šin den, ikf-enat i nəttulab, a tanat-tuzanan i tamattay.

²⁰ Ətšan aytedan en ketnasan har əyyəwanan. Əššədawan-du nəttulab ikarammutan win du-tawaglaznen, ədnayan maraw əzmaman d əššin.

²¹ Aytedan win ətšanen den əmosan edag ən səmmos gim n aləs, əllanat deɣ tədoden den əd bararan.

Əjəwəнки ən Ƴaysa fəl aman

²² Wala a ihogan omar Ƴaysa inəttulab-net s ad əggəzan aɣlal n aman izaran-as-in əs təgadamayt ta hadat n aɣaraw iket di ad itasallam tamattay.

²³ As əɣradan aytedan teklay, iggəzzay Ƴaysa adɣaɣ y ad agu šiwatriwen daɣ adag ikitayyan. Illa den da ɣas-net har iga ahad.

²⁴ As itaggu awen da aɣlal iggug-in daɣ agaraw, əbbatnat-tu tənazzamaren sa əd sa fəlas aɗu issohen a dər imməqqas.

²⁵ As təga tilkamat n ahad, ikka-du Ƴaysa inəttulab-net ijiwankat fəl aman.

²⁶ As t-oggan ijiwankat-du fəl aman, ərmaɣan. Ənnan: «Awen aggəsuf!» Sakkarayan fəl awa əgan daɣ tərəmmeq.

²⁷ Mišan tamazayt ten da a dasan-iššewal Ƴaysa inn-asan: «Ad wər təɣšədam, nak awa! Təgmədet-kawan tasa!»

²⁸ Den daɣ a das-inna Butros: «Kud kay adi Əməli, taməraɣ-i s a din-jəwənkeɣ fəl aman əssəlkadaɣ-ak-in.»

²⁹ «Iyyaw!» Inn-as Ƴaysa. Izzəbbat Butros aɣlal, ijawankat fəl aman innəmad Ƴaysa.

³⁰ Mišan as din-igra assahat n aɗu wa igaran den, təggaz-tu tasa, əggazan-tu aman šin alamaz. Isaɣɣarat inna: «Əməli agəz-i!»

³¹ Tarmad as das-in-izzal Ƴaysa əfus-net, ibaz-t-idu. Inn-as Ƴaysa: «Əzəgzan-nak irkam wəllen, ma daɣ-ak igan aššak?»

³² Əggazan aɣlal ɣas, idrar aɗu.

³³ Əssəjadan-as aytedan win əhanen aɣlal en, gannin: «Illikan as kay a imosan Barar ən Məššina.»

Əzuzəy ən miranan

³⁴ As əɣrasan agaraw, ewadan akal ən Ganazaret.

³⁵ As əssanan kəl akal en as Ƴaysa awen, əmalan y aytedan ən kallan win ɣələyɣələyan n edag wen, a sər-əs du-tamawayan miranan kul.

³⁶ Ad itawansay ad ayyu aytedan ədəsan kuddeɣ təbənək ən təkadkat-net, amaran i tat-idasan ad izzəy.

15

Əssuxəl ən Ƴaysa təgna i Farisaytan

¹ Dəffər awen əfalan-du Farisaytan əd musanan n Əttawret Yerusalam, əkkan Ƴaysa, ənnan-as:

² «Mafəl wər əlkeman nəttulab-nak y aɣadaten šin dana-d-oyyan marawan-nana, wər əširidan ifassan-nasan dat tattay?»

³ Inn-asan Ƴaysa: «Kawanay za, mafəl tətamazrayam alwajiban ən Məššina, fəl ləkkum y aɣadaten-nawan?»

⁴ Wərgə Məššina a inna: "Səɣmər abba-nak d anna-nak"? Inna deɣ: "Awedan wa išaffaraššen abba-net, madəɣ anna-net, wədi a daɣ-as təwəkkəsən man"?

⁵ Mišan kawanay təgannim y aytedan, as inna awedan y abba-net madəɣ anna-net: "Arat wa kay-z-akfaɣ imos tadhəlt-nak, əssinsaɣ-qu y ad t-aga takutay,"

⁶ əddi ab-as ihhəşşal y awedan wədi saymar n abba-net wala anna-net. Emmək di da as təgam alxadat-nawan day adag n Awal ən Məşşina.

⁷ Elmunafiqan! Tidət a imos awal wa iga Məşşina day batu-nawan əs tarrayt n ənnəbi Isayas as inna:

⁸ "Tamattay ta, iləs xas as di-təssəxmar, mişan iwallan-nasan əggugan-i wəllen.

⁹ Elxibada wa di-taggin, ibbinnan, fəlas wər səsəxrin ar alwajiban a d-ənzaman aytedan day xafawan-nasan."»

¹⁰ İxra Yaysa tamattay inn-as: «Səsəmat-i, tagrim awa dawan-z-anna da:

¹¹ Wərgex awa itaggazan s əmi n aggadəm a t-isamadasan, kalar awa d-igammadan imi-net.»

Əsəssəgri ən Yaysa awal wa iga fəl Farisaytan

¹² Dəffər awen əhozan-t-in nəttulab-net, ənnan-as: «Ak təgreq-in as batuten-nak, əşşakan-tanat Farisaytan wəllen.»

¹³ Inn-asan Yaysa: «Annabat kul wa wər inbel Abba-nin ihân ijənnawan, wədi a d-itəwəlbəy.

¹⁴ Ayyat-tan xas! Awen iməddərxəl əlwaynen wiyyad. Əməddərxəl ilwâyan iyyan amaran, agadal a taggin ket-nasan day anu.»

¹⁵ İşşewal Butros inn-as: «Sassagr-anax əlmital wədi.»

¹⁶ Inna Yaysa: «Awak kawanay da harwa da wər təlem əgərri?

¹⁷ Awak wər təgrem as arat kul wa iggazan s əmi n aggadəm, akkay a z'agu əs tədist, dəffər adi inxəl-in day əsuf?

¹⁸ Mişan wa d-igammadan imi, wədi əwəl a d-ifal, amaran ənta a isamadasan aggadəm.

¹⁹ Əssənət as əwəl ənta a du-gammadnat arak ənnəyaten, d igi ən man, d igi n əzzəna, d igi ən tədoden madex igi ən meddan, əd şikra, əd təgəyya ən bahu, əd şizmit.

²⁰ Aratan win di əntanay a samadasnen aggadəm. Mişan tettay əs fassan wər nərrud, wər təsammadas aggadəm.»

Əzəgzan ən təntut ta n wələt Kanan

²¹ As ifal Yaysa edag wen, ikka amaçal ən Tir əd Sidon.

²² Təhin-in təntut n iyyat day Kananitatan təzdayat akal en da, təkkâ-du Yaysa təsikaray təgann-as: «Ya Əməli, Ag əmənokal Dawəd, hənəttət-i! Təbarart-in a izday əggəsuf a tat-izaxazzaban wəllen.»

²³ Mişan wər inna Yaysa i təntut en wala. Idgaz awen inəttulab əhozan-t-in onsayan-tu ənnan-as: «Suxəl tantut ta dana-təlkamat da təsikaray.»

²⁴ Inna Ƴaysa: «Nak wər du-tawazammazalay ar əs Kəl-Israyil, əmosnen zun ayfəd əssiggalnən.»

²⁵ Dər iga awen da ya tək-kay-du təntut en, təssəjad-as tənn-as: «Əməli, əssən dəx-i!»

²⁶ Inna Ƴaysa: «Wər oley i idkalan amensay ən bararan, iga-t-in i dan!»

²⁷ Tənn-as təntut en: «Tidət-nak Əməli, dər iga awen da ya idan əkəmmi a taggin awa d-irattakan dəx adag wa dəx tattin məssawsan, tattin-tu.»

²⁸ Inn-as Ƴaysa: «Ya tantut! Əzəgzan-nam i zəwwəran! Itəwəgget-am awa tərəx!» Amazay en da a dəx təzzay elles ən təntut en.

Əzuzəy ən Ƴaysa aytedan dəx təwərnawən aggotnən

²⁹ Dəffər awen igmad Ƴaysa edag wen, ikka təgadamayt n agaraw wa n Galilaya, təzzar iwar adxax, iqqim.

³⁰ Tək-kay-du tamattay tagget, a sər-əs du-tewayat iməggudal, əd məddərçal, əd nəbdan, d aytedan as əmmidadan mawan-nasan, əd miranan wiyyad aggotnən. Aytedan win, tawasansin dat Ƴaysa, izuzəy-tan.

³¹ Isammaklal əs tamattay anay wa təga aytedan as əmmidadan mawan-nasan əşşewalan, tənay inəbdan əgrāwan şixurad-nasan, tənay iməggudal jiwanken s əlluş, tənay iməddərçal hannayan. Ad taggin aytedan təmmalen y Əməli n Israyil.

Əşətşi ən Ƴaysa əkkoz gim n aləs

³² Iyra-du Ƴaysa inəttulab-net inn-asan: «Təh-i təhanint ən tamattay a. Karad adan a şur-i əgan, amaran ab'as t-illa a ətşan. Wər areş a tan-ayya aglin wər əreman arat, fəlas əddi mijas a tan-aggadlu gələk dəx tarrayt.»

³³ Ənnan-as nəttulab-net: «Məni du-za-nəgrəw za dəx əsuf a şigəlwen siyyawannen tamattay togdât d awa?»

³⁴ Inn-asan Ƴaysa: «Mənəkət təgəlwen təlam?» Ənnan-as: «Əssayat təgəlwen a nəla d arat ən kifitan win mədrornən.»

³⁵ Omar tamattay s ad təxrəd təximit.

³⁶ Idkal-du əssayat təgəlwen en əd kifitan win den, iga igodan i Məşşina, amaran ikaramkaram-tan ikf-en i nəttulab, əzunan-tan i tamattay.

³⁷ Aytedan en ketnasan əyyəwanan əglazan-du, har as əssa əzmaman win zəwwarnən a du-tawatkarnən dəx karammutan win d-əglazan.

³⁸ Aytedan win ətşanən den, əmosan əkkoz gim n aləs as wər əhenat tədoden əd bararan.

³⁹ Dəffər awen issəllam Ƴaysa tamattay, iggaz aylal n aman, ikka akal ən Magadan.

16

*Agamay ən Farisaytan əd Sadusaytan dağ Ҳaysa a dasan-
agu təlməxjujat*

¹ Ёккан-ду Фарисайтан, əd Sadusaytan Ҳaysa ərân ad t-ajjarraban, gammayan dağ-as a dasan-agu təlməxjujat təmosat alxalamat a du-təfâlat Məşşina.

² Inn-asan: «As iga əlməz, tənayam ijənnawan zaggayan ad tannim: "Tufat za ad agu əzəl ihossayan."

³ As affaw amaran, tənayam ijənnawan zaggayan əhânat-tan şiyyay ad tannim: "Azalada ad agu əzəl ibrâran." As təswadam dağ jənnawan, ad təssənam awa dər z'alu alhawa dəffər awen, mişan awa itaggin dağ azzaman win wər təssenam almayna-net!

⁴ Aytedan n azzaman win, inəllubas, wər nəksud Məşşina, amaran gammayan təlməxjujat! Kala! Təlməxjujat ta dasan-tətawaggat iyyadda Ҳas, a tat-imosan ta n ənnəbi Yunəs.» Den da a tan-ifal Ҳaysa, igla.

Ёsəmmutəg ən Ҳaysa inalkiman-net

Emel ən Ҳaysa i nalkiman-net əddəlil n assa-net əddənet

Xamira wa n Farisaytan əd Sadusaytan

⁵ Ёккан nəttulab tagadamayt ta hadat n agaraw. As ewadan, əgran-in âs əttəwan-in igi n allaw ən təgəlla.

⁶ Inn-asan Ҳaysa: «Ёнкədat wəllen i xamira ən Farisaytan, əd wa n Sadusaytan.»

⁷ Təzzar ad gannin nəttulab gar-essan: «Awa wər t-inna ar fəlas wər neway təgəlla.»

⁸ Issan Ҳaysa dağ awen inn-asan: «Mafəl təşşewalam gar-ewwan fəlas wər təlem təgəlla, kəl əzəgzan əndarran?»

⁹ Awak əgərri a wər təgem harwa da? Wər təkəttəwam səmmosat təgəlwen şin ətşan səmmos gim n aləs, d əket n əzmaman win du-tədnayam dağ gəlzan-nasan?

¹⁰ Məx ak təttəwam-in əssayat təgəlwen şin əşşətşanen əkkoz gim n aləs! Mənəket əzmaman win zawwarnen a du-tədnayam əzəl wen?

¹¹ Nak a dawan-ənnəx: "Ёнкədat i xamira ən Farisaytan, əd wa n Sadusaytan". Manəmmək as wər təgrem as wərgəx təgəlla as dawan-əhəx batu-net?»

¹² Den dağ ad əgran as wərgəx xamira ən Farisaytan, əd wa n Sadusaytan a fəl dasan-imməgrad den, kalar əsəssəxri-nasan as dasan-inna a das-ənkədan.

Emel ən Butros awa imos Ҳaysa

¹³ Ikkâ Ƴaysa amaḍal ən Qaysarəya wa n əmuzar Filibus as issəstan Ƴaysa i nəttulab-net, inn-asan: «Ak daɣ iduf n aytedan, ma əmosa nak Ag Aggadəm?»

¹⁴ Ğnna-as: «Wiyyad za gannin kay Ƴaxya wa isalmaɣan aytedan daɣ aman. Wiyyad gannin kay ənnəbi Ilyas. Wiyyad amaran a gannin kay ənnəbi Irməya a təmosa, madeɣ iyyan daɣ ənnəbitan win hadatnen.»

¹⁵ Inn-asan Ƴaysa: «Kawanay za, ma tənnam ma mosa?»

¹⁶ Inn-as Simɣon Butros: «Ělməsix a təmosa, barar ən Məššina di n Amaɣlol.»

¹⁷ Inna Ƴaysa i Simɣon Butros: «Təbbilala ya Simɣon, ag Yunəs, fəlas arat wədi wərgəɣ kay a daɣ-as issosanan iman-nak, kalar Abba-nin di ihan ijənnawan a dak-isannafalalan.

¹⁸ Nak amaran ənneɣ-ak: Kay Butros təhunt a təmosa, amaran təhunt ta, ənta a fəl z'əkrəsəɣ Ělkənisat-in. Ělkənisat ta, tarna ən təmattant da wər təfreg a das-təɣšəd wala.

¹⁹ A kay-akfa təsassarut ən Taymar ta n jənnawan. Arat kul wa təssəxrama daɣ əddənet dada, ijənnawan da a daɣ-san ixram, arat deɣ wa təssəxlala daɣ əddənet dada, ijənnawan da a daɣ-san ixlal.»

²⁰ Təzzar iga i nəttulab-net ammar a daɣ idgâz, s ad wər əmelan y awedan waliyyan as ənta a imosan Ělməsix.

Emel wa azzaran iga Ƴaysa y alyazab-net əd təmattant-net

²¹ A obazan ɣur əzəl wen, ənta ad iggaz Ƴaysa šin əsəssəgri ən nəttulab-net as iwâr-tu iki ən Yerusalam, y ad agu alyazab aggen, a das-z-agin muzaran ən Kəl-Ělyəhud, əd muzaran ən limaman, əd musanan n Ěttawret, təwəggin man-net, inkər-du deɣ daɣ təmattant əzəl wa n karad.

²² Təzzar iwat-tu Butros s ahal, iššewal fall-as, inn-as: «Ěməli, ihənəttətət-ak Məššina daɣ arat wa təmaləɣ əddi! Kala wər kay-z-igrəw adi!»

²³ Mišan imalallay-in Ƴaysa Butros, inn-as: «Ěfəl dəffər-i Aššaytan! Təqqaləɣ-i təsənkəft daɣ əššəɣəl wa di-dewayan s əddənet, fəlas imedranan-nak, wərgəɣ Məššina a d-əfalan, kalar imedranan n aggadəm ɣas a əmosan.»

Tarrayt ən wa ilkaman i Ƴaysa

²⁴ Dəffər awen inna Ƴaysa i nəttulab-net: «Wa iran a di-ilkəm, wədi igmədet tara ən man-net, agu imateran-net, idkəl təgəttawt-net, ilkəm-i.

²⁵ Ěssənət as awedan wa wər nəgəmməy ar aggaz ən man-net, wədi ad t-əgmədan, mišan wa iqbalan ad t-əgmədan fəl əddəlil-in, wədi a tan-igrəw.

²⁶ Ma z'aknu y awedan ad igræw æddænet ketnet, ænta amaran temsay a ikka? Awak mas ifrag awedan tehakkay-net y a sær-æs agæz iman-net daɣ tæmsay?

²⁷ Æssæn at as nak Ag Aggadæm a d-asa æleɣ tanaya n Abbanin, æddewa d angalosan-net, æddi amaran, awedan kul ad t-akfu maruzat n awa ewadan mazalan-net.

²⁸ Æggæyyeɣ æsilakanax-awan as wiyyad daɣ aytedan win æbdadnen da wær tan-z-iba iket wær ænayan assa-nin nak Ag Aggadæm æmosax æmænokal.»

17

Ætæwanay æn tanaya æn ɣaysa

¹ As ægan sædis adan dæffer awen, iddew ɣaysa æd Butros, æd Yaqub, æd Yaxya imosan amadray æn Yaqub en da, ikka dær-san adɣax zagren ɣas-nasan.

² Den da ad immættay azzahir-net dat-san, imalawlaw udæm-net s ænnur olan æd wa n tæfuk, ægan sælsa-net tæmællay tæsiraqqet wællen, tækna æsæmæxmæɣ.

³ Æhinan-in oggân ænnæbi Musa, d ænnæbi Ilyas as du-nafalalan, mišawalan æd ɣaysa.

⁴ Iggad-du Butros inna i ɣaysa: «Æmæli, olaɣ as nælla da! Kud tareɣ adi, ad ækræsa karad hæktan daɣ adag wa. Iyyan i-nak, iyyan in Musa, iyyan in Ilyas.»

⁵ Harwada iššewal Butros as tan-tælsa tægarak tæmilawlawat, tæqqal-asan zun telay. Igmæd æmæsli tagarak ten, inna: «Awa Barar-in wa æknæɣ tara; ænta a d-issændan agna-nin. Sæsæmat-as!»

⁶ As æslan nættulab i batu ten, ærmæɣan wællen, fataqqen æssæjadan.

⁷ Ihoz-tan-in ɣaysa, idas-tan, inn-asan: «Ænkærat, tægmædet-kawan tasa!»

⁸ Ædkalan-du nættulab isawadan-nasan wær hænneyan ar ɣaysa.

⁹ Tazabben-du adɣax en da, as tan-omar ɣaysa, inn-asan: «Ad wær tæmælam y awedan waliyyan awa tænayam da, iket wær d-ænkeræ nak Ag Aggadæm daɣ tæmattant.»

¹⁰ Æssæstanan nættulab ɣaysa, ænnan-as: «Mafel za gannin musanan n Ættawret: "Kundaba osa-du Ilyas tæzzar as du-z-asu Ælmæsix?"»

¹¹ Ijjæwwab-asan ɣaysa inn-asan: «Awalla za ar a d-asu Ilyas, annazzam aratan kul.

¹² Amaran æssosanaq-qawan as Ilyas, osâ-du, mišan wær t-æqbelan aytedan, kalar ægan-as awas æran. Æmmæk en daɣ as illikan as a di-zæɣxæzzæban nak Ag Aggadæm.»

¹³ Ægran nöttulab as Yaxya wa isalmağan aytedan day aman, as iha Ƴaysa batu-net den.

Barar wa tægraw tazakarkarat æd tarna ta ila æzægzan

¹⁴ As d-izzabbat Ƴaysa æd nöttulab-net win karad en adɣaɣ, æhozan-du tamattay, ikk-ay-du alæs iyyan igaraffat dat-æs,

¹⁵ inn-as: «Æmæli, hænöttæt i barar-in, tazakarkarat a tu-tægrawat, amaran iɣɣizzab wællen fêlas faw da itudu day tæmsay, madex aman.

¹⁶ Ewayaq-qu æs nöttulab-nak y ad t-æzzuzæyan, mišan indar-asan.»

¹⁷ Inna Ƴaysa: «Xa! Iket iba n æzægzan, iket æššur day aytedan n azzaman a! Awak har æmmay æddewa dær-wan, æzizaydara dær-wan? Awøyat-i-du barar sa da!»

¹⁸ Iharaššat Ƴaysa aggæsuf wa ihan barar en, tæzzar igmad-tu. Izzay barar day amazay wen da.

¹⁹ Æhozan-in nöttulab Ƴaysa ænnan-as: «Mafel nakkanay indâr-anay ikus n aggæsuf wen?»

²⁰ Inn-asan: «Adi za aššaddat æn rækkæm n æzægzan-nawan! Æggøyeyex æsilakanay-awan as ænnar tælâm day æzægzan a ogdân æd wala imi æn tæzuxay n æšënnan, har tænnam y ædɣaɣ en: "Ægmæd edag di takka wen", ad ammazal s adi. Æddi wær t-illa arat as dawan-z-indær igi-net.

²¹ [Amaran æzzænæf n aggæsuf wen, wær igæmmæd awedan ar æs tæwatriwen, d æzum.»]

Emel wa n æššin iga Ƴaysa y alyazab-net æd tæmattant-net

²² Æzæl iyyan æddewan nöttulab æn Ƴaysa day akal æn Galilaya as dasan-inna: «Nak Ag Aggadæm æjwâra ad æggâzay ifassan n aytedan,

²³ agin iman-nin, tæzzar ænkæra-du day tæmattant æzæl wa n karad.» Tæɣšad batu ten iman-nasan wællen.

Amana wa itawarzaman y Ahan wa Zæwwæran n Ælyibada

²⁴ Iгла Ƴaysa æd nöttulab-net har ewadan Kafarnahum. Ænkaran aytedan win zarzammen amana y Ahan wa Zæwwæran n Ælyibada, æhozan-in Butros, æssæstanan-tu ænnan-as: «Awak æššex-nawan arazam a wær itæggu amana y Ahan wa Zæwwæran n Ælyibada?»

²⁵ Inn-asan Butros: «Awalla za ar irazzam-tu». Iggaz Butros ehan, azzar-as Ƴaysa awal issæstan-tu inn-as: «Ma tænnæ kay Simɣon, ma irazzaman takæsen d amana i mænokalæn n æddænet? Awak maddanæsan a dasan-tan-razzammen, mey aytedan sa hadan?»

²⁶ Inn-as Simyon: «Aytedan sa hadan a dasan-tan-razzammen.» Inn-as Ƴaysa amaran: «Daɣ adi maddanəs ən mənokalan wər tan-iwer arazam ən wala.

²⁷ Mišan ya fəl ad wər nəqqəl təsənkəft y əzəgzan n aytedan win zarzammen, aglu akku agaraw, təgəra daɣ-as azabzab wa n abbaz ən kifitan. Kifi wa tobazaɣ əstizarat, aru imi-net, a daɣ-as in-tagəza tefelt n əzrəf wa mallan. Tefelt ten əkkəs-tat-du, tagla takfaɣ-asan-tat, ad təqqəl ərruzmatan n amana wa-nin, əd wa-nak.»

18

Ʒəsəsxri wa n əkkoz: Təməddurt ta tənammannakat əd Taɣmar ta n Məššina

Eres d ədkul

¹ Amazay wen daɣ a daɣ din-əhozan nəttulab Ƴaysa, ənnan-as: «Ma imos za wa ogaran daɣ Taɣmar ta n jənnawan?»

² Təzzar iɣra-du Ƴaysa arat ən barar, issəbdad-tu garəssan,

³ inna: «Əggəyyey əsilakanax-awan əs as wər təsammattayam alxal, təqqələm zun bararan, wədi wər ilkem a təggəzam Taɣmar ta n jənnawan.

⁴ Awen daɣ a fəlas awedan kul wa issərasan iman-net, zun arat ən barar wa, wədi illikan as ənta ogaran daɣ Taɣmar ta n jənnawan.»

Ʒəsənkəd y igi ən bakkadan

⁵ «Amaran i iqbala barar šilan wa fəl əddəlil-in, wədi nak iman-nin as di-iqbal.

⁶ Mišan i iqqalan əssəbab n abakkad y iyyan daɣ aytedan win sər-i əzzəgzannen, əmosnen zun bararan madrornen, wədi of-as ad itəwəqqən əzəzəd zəwwəran ən təhunt daɣ iri-net, itəwəgər daɣ ammas n agaraw əmazal wa iga əddi.

⁷ Iket alɣazab ill-ay y aytedan n əddənət! Əddəlilan aggotnen a t-əllanen tan-sisuginen ibakkadan! Illikan as ad t-əməlan əddəlilan win den har faw, mišan iket alɣazab ill-ay y awedan wa dasan-d-iqqalan əssəbab!

⁸ Kud əfus-nak madex adar-nak a kay-sisuginen ibakkadan, wədi əfrəs-tan-in, təgəraq-qan-in sədi. Id of-ak təggaza aljannat təgeɣ əfus, madex təgeɣ adar y ad tələɣ əššin fassan, d əššin daran, tətəwəgəra dər-san daɣ Jahannama.

⁹ Amaran kud šat-nak a təbukat a dak-təqqəl əssəbab n igi n abakkad, wədi kəkkərət-tat-du, təgəraq-qat-in sədi, id of-ak ad təgeɣ šat daɣ aljannat, y ad tələɣ sanatat šittawen tətəwəgəra dər-əsnat daɣ təmsay an Jahannama.»

Elmital wa n tilay ta tæssaggalat

¹⁰ «Ënkædat! Ad wær talkim iyyan daɣ aytedan win madrornen di, fêlas silakanax-awan as angalosan-nasan êhân ijënnawan, faw êllan ɣur Abba-nin.

¹¹ [Nak Ag Aggadëm oseɣ-du gammayaɣ aytedan win êxraknen y a tan-êɣlêsa.»]

¹² «Ma tënnam kawanay y awen? Awak amadan ilân temeday ên tilay, har daɣ-asnat tæssaggal iyyadda, wêrgeɣ ad ayyu tazayat tëmêrwen êd tazayat ŝin hadatnen êdânnat, tëzzar azêl iswêd i ta tæssaggalat?

¹³ Êggëyyeɣ êsilakanax-awan âs as d-igraw tilay ta n iyyadda en, ogar têdêwit ta z'agu fêl êddêlil-net, i ta z'agu fêl êddêlil ên tazayat tëmêrwen êd tazayat ŝin wêr nêssêgêl.

¹⁴ Êmmêk en daɣ as abba-nawan ihân ijënnawan, wêr ira ad ihlêk waliyyan daɣ aytedan win madrornen di.»

Awas danax-iwar igi-net y amadrax-nanay igân abakkad

¹⁵ Iгла Ҷайса ишшewal inna: «As kay-idlam amadrax-nak, takkaq-qu daɣ adag a daɣ têmosam ɣas-nawan, têsassagraq-qin lahan-net. Kud za issêsam-ak itub, wêdi zun as amadrax-nak a du-têgrawaɣ a kay-igmâdan.

¹⁶ Miŝan as ugay s a dak-issêsam, tiddawa d awedan iyyanda, madeɣ êŝŝin, têqqêlaq-qu. Êmmêk en daɣ as "batu kul ad taknu êqqimnat-as sanatat têgëyyawen madeɣ karadat."

¹⁷ Amaran as ugay s ad ilkêm y awal wa das-êgan aytedan win di, têmêlay almasalat têdi y Êlkênisat. As ugay s ad ilkêm y awa das-tënnâ Êlkênisat, wêdi ag-as iduf wa têgeɣ y aytedan win wêr nêssen Mêŝŝina, madeɣ tagaɣ-as iduf wa têgeɣ y aytedan win zarzammen takêsen.

¹⁸ Êggëyyeɣ êsilakanax-awan as arat kul wa têsêxramam daɣ êddênet ta, wêdi ijënnawan da a daɣ-san ixram. Amaran wa têsêxlalam daɣ êddênet ta, wêdi ijënnawan da a daɣ-san ixlal.

¹⁹ Êsilakanax-awan deɣ âs as namardan êŝŝin daɣ-wan daɣ êddênet da da êttaran s esêm n Abba-nin ihân ijënnawan, wêdi arat kul wa daɣ-as êgmayan, a dasan-takfu.

²⁰ Fêlas edag wa daɣ êmmênayan êŝŝin, madeɣ karad daɣ-wan s esêm-in, wêdi êssênat as êlle gar-essan êddi da.»

Day batu ên têsureft: Elmital wa n êkli wa wêr têha têhanint

²¹ Tëzzar ihoz-in Butros Ҷайса issêstan-tu inn-as: «Êmêli, har mênêket tāklaten as di-iwar ad êssurêfa y amadrax-nin a di-idlâman? Awak har êssayat tāklaten?»

²² Inn-as Үaysa: «Wәр dak-әнne har әssayat täklaten, kalar a dak-әнne surәf-as әssayat tәмәрwen әn täklat har әssa.

²³ Әmmәk en daҗ as Таҗмар та n jәnnawan, tәha әlmital n әmәnokal ad iҗrән eklan-net, irә ad issәҗrәd әrrәzәҗan-net.

²⁴ As issәnta, itawayra-du iyyan daҗ eklan en, a җur ila igiman әn giman әn tafelt.

²⁵ Mišan akli wen wәр ifreg әrruzmatan n әzrәf en. Awen daҗ a fәl omar мәššis s a din-itәwәzәнzu әnta әd taҗurәs әd maddanәs d awa ila kul, әqqәlan әrruzmatan n әrrәzәҗan win җur-әs ila.

²⁶ Tәzzar ifataqqad әkli en issәjad dat мәššis, inn-as: "Ag-i tәzaydart, мәšši, a dak-әрzәmaҗ awa җur-i tәleҗ kul."

²⁷ Arat wen eway-du әs мәššis as tu-tәggaz tәhanint-net. Tәzzar issoraf-as awa җur-әs ila, oyy-ay.

²⁸ Azzama a din-igmäd әkli wen, ifäl-in мәššis, immәnay d iyyan daҗ midawan-net daҗ әššәҗәl wәр irwes ar temeday әn tafelt n әzrәf. Tәzzar obaz-as tarzam, inn-as: "Әrzәm-i azrәf wa daҗ-ak әleҗ!"

²⁹ Tәzzar ifataqqad әmidi-net wen, onsay-tu inn-as: "Ag-i tәzaydart, a dak-әрzәma."

³⁰ Mišan uҗay әkli wen, isassaga fadda әmidi-net en daҗ kasaw y ad t-izzәrzәm әmarwas wa t-iga.

³¹ As әnayan midawan-net daҗ әššәҗәl awa иган den, әҗšadan man-nasan wәllen, әҗlan әҗan isalan win kul i мәššis.

³² Tәzzar isassayr-ay-du мәššis inn-as: "Illikan as kay amaksan! Nak әssorafay-ak awa җur-әk әle kul fәlas ditonsayay awen.

³³ Kay da, iwâr-kay a kay-tәggәz tәhanint n әmidi-nak, tagay-as әhәnәtta zun wa dak-әgeҗ nak."

³⁴ Tәzzar iggaz alham мәššis, isassaga akli en daҗ kasaw. Itawattaf har iҗrad arazam n awa җur-әs ila ketnet.»

³⁵ Inn-asan Үaysa: «Әmmәk en daҗ as Abba-nin ihân jәnnawan wәр dawan-z-issurәf as imos âs akkiyyan daҗ-wan wәр isurif s әwәl iyyanda i мәdrayan-net daҗ әzәgzan.»

Awa iga Үaysa daҗ Yahudәyya

19

Үaysa iha tarrayt әn Yerusalam

Әsәnti

¹ Dәffәр as iҗräd Үaysa alfaydaten šin, ifal akal әn Galilaya, ikka akal әn Yahudәyya ihân aganna wa hadan n agarәw wa n Yordan.

² Ælkamnat-as tamattiwen aggotnen, a tanat-izuzəy den da.

Azalaf d əməzzəy

³ Əhozan-t-in Farisaytan əgan-as əsəstan imosan tənagmayt, ənnan-as: «Awak xalal y aləs əzəməzzəy ən təntut-net fəl a iqqal əddəlil?»

⁴ Inn-asan Ƴaysa: «Wərgəx təxrâm as əstizarat as d-ixlak Əmaxlak əddənət, "ixlak-du aytedan, ixlak-kan-du əmosan yay əd təntay.»

⁵ «Inna: "Adi dəx a fəl iffal aləs abba-net, d anna-net, irtəy əd təntut-net, əqqəlan arat iyyanda.»

⁶ «Əmmək en dəx as ad ib-as əmosan əşšin, kalar ad əqqəlan təxəssa iyyadda. Dəx adi, awa issərtəy Məşşina a tu-wər-izəmməzzəy awedan.»

⁷ Ənnan-as: «Dəx adi, mafel as omar ənnəbi Musa ad tətəwəkfu şirawt n əməzzəy i təntut, tətəwəzəməzzəy?»

⁸ Inn-asan: «Aşşaddat ən təggərməmt a fəl kawan-ikfa Musa turagat n ad təzaməzzayam şidoden-nawan. Mişan arat wədi wərgəx ənta a igan əstizarat.

⁹ Amaran nak əsilakanəx-awan as i izamməzzayan tantut-net, a das-wər-nətəggu meddan, izlaf iyyat, wədi əzzəna a iga əddi.»

¹⁰ Ənnan-as nəttulab-net: «Adi za, kud awen dəx a illan gər aləs əd təntut, wədi ofa i wər nəzlef fadda.»

¹¹ Inn-asan: «Awal wa, wərgəx aytedan kul əqbəlan-tu, kalar wər t-iqbel ar win ikfa Məşşina fərregat n əlqəbulat-net.

¹² Fəlas əllan-tu əddəlilan gaddalnen azalaf əmosnen as: meddan wiyyad as d-əhəwan da wər əfregan azalaf, wiyyad dəffər a igan ad tawazaman, əllān-tu dəx win as iman-nasan as sannafranan iba n azalaf fəl ad wər əlen dəx əşşəxəl ar wa n Taymar ta n jənnawan. Wa ifragan əlqəbulat n adi, əqbəlet-tu.»

Igi ən Ƴaysa şiwatriwen i bararan

¹³ Təzzar a du-tawayan aytedan bararan, fəl a tan-issəwər Ƴaysa ifassan-net, ittər-asan. Əşşewalan nəttulab fəl aytedan win den.

¹⁴ Mişan inn-asan Ƴaysa: «Ayyiwat bararan a di-d-akkin, a tan-in-wər-təwəxam fall-i; fəlas Taymar ta n jənnawan şin aytedan win şilaten-nasan.»

¹⁵ Issəwar-tan ifassan-net, ittar-asan, dəffər awen obaz tarrayt-net, igla.

Əməşiwəl ən Ƴaysa d aləs iyyan aynayan n əməgğergəs

16 Təzzar ihoz-in aləs iyyan aynayan Ƴaysa, inn-as: «Əşşex, ma imos arat olâxan was as t-əgeç ad əgrəwax təməddurt ta təxlalat?»

17 Inn-as Ƴaysa: «Mafel as di-təsastana daç batu n awa olayan? Məşşina ças a olayan. Amaran as tareç ad təgrəwa təməddurt ta təxlalat, təlkəma y alwajiban-net.»

18 Inn-as aləs wen: «Ma mosan za alwajiban win den?» Inn-as Ƴaysa: «Adi za, ad wər tagaç iman; ad wər tagaç əzzəna; ad wər takəra; ad wər taga təgəyya ən bahu fəl awedan waliyyan;

19 səxmər abba-nak d anna-nak; agu y əşəqqaç-nak tara ta təgeç i man-nak.»

20 Inn-as aləs wen: «Aratan win di kul əssibdadaç-qan. Ma di-in-iqqiman harwa?»

21 Inn-as Ƴaysa: «As tareç ad təqqəlaç awedan ikmâlan, tagla tazzanzaç-in təla-nak, takfaç inazzan-net i tələqqawen, əddi ad təgrəwax ərrəzəç a dak-z-ansin daç alaxirat. Dəffər adi amaran tagla-du təlkəmaç-i.»

22 As isla aləs wen i batu ten, inkar, igla əçşâdan man-net, fəlas ərrəzəç aggen a ila.

Efsan d arozan

23 Den daç ad inna Ƴaysa i nəttulab-net: «Əggəyyeç silakanax-awan as izzəwat fəl əməgğergəs iguz ən Taçmar ta n jənnawan.

24 Awalla, silakanax-awan as ogar tərçəsəy ta iga fəl ałam aradaç daç təbuday n ənəzmay, i ta iga fəl əməgğergəs iguz ən Taçmar ta n Məşşina.»

25 As əslan nəttulab y awen, isammaklal sər-san wəllen, ənnan: «Daç adi, ma ifragan ad ixləs daç təmsəy?»

26 Iswad daç-san Ƴaysa, inn-asan: «Arat wədi muxal a imos çur aytedan, mişan çur Məşşina arat kul ifrâç igi.»

27 Den daç ad išşewal Butros inna: «Nakkanay za? Awak wərgeç noyya arat kul, nəlkam-ak? Daç adi ma daç-na z'agin?»

28 Inn-asan Ƴaysa: «Əggəyyeç əsilakanax-awan as: As tawaşaşanayan aratan kul, əqqima nak Ag Aggadəm daç adag-in, a t-imosan təxawit ən taçmar-in di təlat tanaya, əddi kawanay a di-əlkammen ad taqqamim fəl marawat təxiwa ən taçmar əd sanatat, təşrəçam i tawşeten ən Kəl-İsrayil an marawat əd sanatat.

29 Awedan kul wa ifalan açaywan-nasan, əd mədrayan-net, əd təmədrayen-net, d abba-net, d anna-net əd bararan-net, madeç amaçal-net fəl əddəlil-in, wədi ad igrəw

temeday n ənətfus n aratan win den, igrəw deŷ təməddurt ta təŷlalət.

³⁰ A aggen daŷ win əhanen eŷaf əmərədda, ilkâm ad əggəzan ələqqam; amaran a aggen daŷ win əhanen ələqqam əmərədda, ilkâm ad əggəzan eŷaf.»

20

Elmital wa n maššaxalan win afarag n alxanab

¹ Iгла Ҷайса iššewal inna: «Энта да а ва дәр тола Таҗмар та н јөннан: А д-инкәр аведан илән афараг н алханаб әзәл ийян ахәра, ира ад идкәл имаššaxalan y afarag-net.

² Inamarda әd maššaxalan win әs, әzәl kul a tan-akfu tefelt n әzrәf, tәzzar issok-en afarag.

³ As tәga әdәgәlšet ilas-du agamad, inay imaššaxalan wiyyad wәр nәgrәw әššәxәl harwa әqqiman daŷ asam-nay n әxrәм.

⁴ Inn-asan: "Kawanay da agliwat tәšxәlam daŷ afarag-in, a dawan-agax әrruzmatan olāxnen."

⁵ Eglan maššaxalan, әkkan afarag-net. Dәffәр awen ilas igmad-du җur ammasnazal, igmad-du deŷ әs tazzar. Amaran i d-igmad ad agu zun awen da.

⁶ As tәga takәst zagret ilas-du agamad, inay imaššaxalan wiyyad әqqimnen, inn-asan: "Mafel tәklām ad tәqqimam әddi, wәр tahem wala?"

⁷ Ennan-as: "Ağaraw a wәр nәga i danaŷ-iššәšxalan." Inn-asan: "Agliwat kawanay da tәšxәlam daŷ afarag-in n alxanab.»

⁸ «As tuda tәfuk, inna mәššis n afarag wen y әmuzar әn maššaxalan-net: "Aҗra-du imaššaxalan kul tәrzәma y akkiyyan alxaq-net. Izar әs win әdkala daŷ tilkamat, tәssәlkәmәx әs win әdkalaŷ әstizarat."

⁹ Osan-du win әssәntanen әššәxәl takәst zagret, akkiyyan daŷ-san igraw tefelt n әzrәf.

¹⁰ Dәffәр awen tәssәxlay-du әs win әšxalnen әstizarat, әgән iduf n as ad әgrәwan a ogaran awa әgrawan meddan win. Mišan әntanay da akkiyyan daŷ-san igraw tefelt.

¹¹ As әgrawan әrruzmatan-nasan, әssoxalan tәgna mәššis n afarag wen.

¹² Ennan: "Aytedan win tәtkalaŷ әs tilkamat, alwaq iyyanda җas a әšxalan, amaran tәšašagdaq-qan dәр-na nakkanay a әklanan nәšxâl, tәkaggay-ana tәfuk."

¹³ Tәzzar iššewal mәššis n afarag y iyyan daŷ-san, inn-as: "Әmidi-nin, nak wәр dak-әgeŷ arat waliyyan wәр noxed. Wәрge kay iman-nak a dәр namarda fәl tafelt iyyadda n әzrәf daŷ әzәl?"

14 Daḡ adi abəz azrəf wa imosan alxaq-nak, tagla. Kud nak a iran ad šaššagdaḡ alxaq-nak əd wa n meddan win ətkalaḡ daḡ tilkamat, tədi nak a təqqal.

15 Awak nak wər z'agaḡ awa areḡ s ərrəzəḡan-in? Meḡ ak manjaḡ a təgeḡ as əmosaḡ aləs olāḡan?"»

16 Inna Ƴaysa: «Əmmək en daḡ as win əhanen eḡaf əmərədda, ilkâm ad əggəzan ələqqam; amaran win əhanen ələqqam əmərədda, ilkâm ad əggəzan eḡaf.»

Emel wa n karad iga Ƴaysa y alḡazab-net əd təmattant-net

17 Iggəzzay Ƴaysa, ikka Yerusalem ənta əd nəttulab win maraw d əššin. Iwar dər-san tama, da jiwanken fəl tarrayt, inn-asan:

18 «Səsəmat: Nakkanay da əggəzzaynen əs Yerusalem da. Den daḡ ad z'ətəwəgga nak Ag Aggadəm daḡ fassan ən muzaran ən limaman, əd musanan n Əttawret. Aytedan win a di-əxkəman təmattant.

19 A di-agin daḡ fassan n aytedan wər nəmos Kəl-Əlyəhud, a daḡ-i tajaban, ayyawanani-šiwuit. Dəffər awen attaytayan-i fəl təgəttawt, ib-i, ənkəra-du daḡ təmattant əzəl wa n karad.»

Alḡazab d əššəḡəl

20 Təhoz-in taḡur Zabadaḡ Ƴaysa, təddew əd maddanəs. Təgaraffat y a tu-tansəy.

21 Inn-as: «Arat iyyan a tareḡ?» Tənn-as: «Bararan-in a n əššin a as daḡ-ak are a di-tagəḡ arkawal n as ad əggəzan idagga ətkâlnen: iyyan daḡ əḡil-nak, wa hadan daḡ zalgat-nak, daḡ Taḡmar-nak.»

22 Inna Ƴaysa: «Wər təssenam almaḡna n arat wa təgmayam əddi. Awak təfrâgam a dər-i tədrəwam alḡazab wa z'aga daḡ alwaq wər nəggug?» Ənnan-as: «Awalla, nəfrâg a dər-ək tu-nədrəw.»

23 Inn-asan Ƴaysa: «Awalla, illikan as təfrâgam a dər-i tədrəwam alḡazab wa. Mišan daḡ batu ən wa z'aqqamin daḡ əḡil-in wala zalgat-in, wərgəḡ nak a t-ihakkin, kalar idagga win di in win as tan-isammatag Abba-nin.»

24 Əslan maraw nəttulab win hadatnen y awen, əššakan əššin mədrayan win den.

25 Təzzar iḡr-en-du Ƴaysa, əhozan-t-in, inn-asan: «Təssânam as imuzaran ən təmattiwen saknin tarna y aytedan win as azzaran, amaran aytedan win daḡ-san attafnen əlxəkum saknin aytedan win as azzaran taḡmar.

26 Mišan kawanay ad wər tagim adi gar-ewwan. Kalar as ira iyyan daḡ-wan ad ilu almaqam, iqqələt zun amaššəḡal-nawan.

²⁷ Amaran wa daɣ-wan iran tizart, iqqəlet akli-nawan.

²⁸ Emmək en daɣ as nak Ag Aggadəm wər d-oseɣ əddənet y a di-əşxəlan aytedan. Kalar assa a d-əge y ad əşxəla y aytedan, akfa iman-nin fəl ad səddərfəɣ əs təmattant-in aytedan aggotnen daɣ bakkadan-nasan.»

Əzuzəy ən Ƴaysa əşšin məddəryal

²⁹ Igməd Ƴaysa əd nəttulab-net aɣrəm wa n Yerikaw, təlkâm-asan tamattay tagget.

³⁰ Əllân məddəryal den əşšin, əqqıman fəl afay ən tarrayt. Əslan âs Ƴaysa a itakayan den, ədkalan əməsli-nasan ad gannin: «Hənəttət-anax, Əməli, Ag ənnəbi Dawəd!»

³¹ Təsannaryaman-asan tamattay fəl ad affastin, mişan əşşotan adakal ən maslan-nasan gannin: «Hənəttət-anax, Əməli, Ag Dawəd!»

³² İzzəkkat Ƴaysa, iɣr-en, inn-asan: «Mas taram a dawan-t-aga?»

³³ Ənnan-as: «Əməli, asawad-nanax as nara agaraw-net.»

³⁴ Təggaz təhanint-nasan Ƴaysa, idas şittawen-nasan. Amazay wen daɣ a tan-d-iqqal asawad-nasan, təzzar əlkaman-as.

21

Adan win əlkamnen ən Ƴaysa daɣ Yerusalam

Iguz ən Ƴaysa Yerusalam imos əmənokal

¹ As din-ihoz Ƴaysa əd nəttulab-net Yerusalam, daɣ ənəmihaz ən təxrəmt ta n Betfajay, dagma n ədɣax was itawannu wa n "Eşkan ən Zaytun", izammazal Ƴaysa əşšin nəttulab,

² inn-asan: «Akkiwat təxrəmt ten dat-wan den. Tosâmtat-in ɣas, tənâyam tajat təqqanat təlât əhulel. Ariwat-tan-du təlwəyam-i-tan-du.

³ As dawan-inna awedan arat, tannim-as: "Əməli a sər-san iddəraran." Əddi a kawan-ayyu taglim dər-san amazay wen da.»

⁴ Arat wa iga fəl ad andu awal wa d-imal Məşşina əs tarrayt n ənnəbi as inna:

⁵ «Anniwat y əɣrəm wa n Səyon: Ənəy! Əmənokal-nak izây-kay-du. İkna əsərəs ən man-net. İwân tâjat, əhulel fadda, imosan ara n əmudar a fəl itamaway əzuk.»

⁶ Əgılan nəttulab əmmożalan awa as tan-omar Ƴaysa.

⁷ Əlwayan tajat d əhulel-net i Ƴaysa. Ədfaran fall-asan isəlsa-nasan, iwan Ƴaysa əhulel.

⁸ Tægla-du tamattay tægget wællen ad têtissæw i Ƴaysa isælsa-net fæl tarrayt, wiyyad farrasan-du ilædlad tissæwan-as-tan fæl tarrayt.

⁹ Tamattay ta tælkamat i Ƴaysa, æd ta das-tazzarat, tætkâl æmæslī-net tægannu:

«Ozana!

Tæmmal y ahaya n æmænokal Dawæd!

Iga Mæššina albaraka daɣ

wa d-osan s esæm n Ʒmæli!

Ozana! Tæmmal i Mæššina

daɣ jønnawan win ædkalnen!»

¹⁰ As d-iggaz Ƴaysa Yerusalām, aytedan n æɣræm ketnasan nijarwayan gannin: «Ma imos alæs en?»

¹¹ Ad tægannu tamattay: «Adi za ænnæbi Ƴaysa imosan ag æɣræm æn Nazaret ta n akal æn Galilaya.»

Assa æn Ƴaysa Ehan wa Zæwwæran n Ʒlyibada

¹² Iggaz Ƴaysa aɣalla wa iɣlayan Ehan wa Zæwwæran n Ʒlyibada. Iɣrad daɣ-as asataɣ n aytedan kul win massa-tagan, harkid win mazanzan. Isabbanbay tebæren šin fæl sansin kæl sanji izærfan-nasan, isabbanbay deɣ šisæqqima æn massatagan æn tædæbren.

¹³ Tæzzar inn-asan: «Iktâb as: *"Ehan-in a das-itæwæggus esæm ehan n ælyibada." Kawanay amaran tægâm-tu "æsælɣæs æn baydagan".*»

¹⁴ Ʒhozan-in mæddæryal, æd mæggudal Ƴaysa daɣ Ahan wa Zæwwæran n Ʒlyibada en da, izzozay-tan.

¹⁵ Mišan ænkaran muzaran æn limaman æd musanan n Ʒttawret æššakan wællen aratan simaklalnēn win iga Ƴaysa den. Ʒššakan deɣ šixaraten šin taggin bararan daɣ Ehan wa Zæwwæran n Ʒlyibada gannin: «Ozana! Tæmmal y ahaya n æmænokal Dawæd!»

¹⁶ Awen a fæl ænnan i Ƴaysa: «Tæsâlla y awa gannin da?» Amaran inn-asan Ƴaysa: «Awalla. Awak teɣaray a wær tægem daɣ Ʒlkættaban batu ta tænnat: *"Kay a d-ewayan æs bararan, æd janɣayan a dak-agin tæmmalen!"*»

¹⁷ Dæffær awen ifal-tan Ƴaysa, igmad Yerusalām, edwa taɣræmt ta n Betanøy insa daɣ-as.

Alayan æn Ƴaysa ašæk wa n fig

¹⁸ As affaw iqqal-du Yerusalām harwa aɣôra, ifray i gælæk daɣ tarrayt.

¹⁹ Inay ašæk æn fig immar-t-in mišan wær daɣ-as in-ogez ar ifærkak ɣas. Tæzzar inna y ašæk wen: *"Tammazzaɣet d igi n aratan har faw daɣ æddænet!"* Amazay wen daɣ ad iqqur ašæk en.

²⁰ As ənayan nəttulab-net awen, isammaklal sər-san, ad gannin: «Manəmmək as iqqur ašək ən fig wen imi iyyanda?»

²¹ Inn-asan Ƴaysa: «EggəyyeƷ əsilakanax-awan əs as təzzəgzanam, wər təgem a imosan aššak, wərgəƷ awa əgəƷ y ašək a Ʒas as za təfrəgam igi-net. Kalar ad təfrəgam ad tannim y adƷax wa: "Egməd adag di təfətəqqe daƷ agarew", agu deƷ awen da.

²² Arat kul wa tonsayam Məššina s əzəgzan, a tu-təgrəwam.»

Əsəstan igân daƷ batu ən tarna ən Ƴaysa

²³ Ikka Ƴaysa Ehan wa Zəwwəran n Əlyibada, a daƷ-as isasaƷru. Əhozan-t-in muzaran ən limaman, əd muzaran ən Kəl-Əlyəhud ənnan-as: «Awak ma təmos tarna tas tətəggaƷ aratan win? Ma kay-ikfan tarna ta?»

²⁴ Inn-asan Ƴaysa: «Nak da a dawan-agax əsəstan iyyanda. As təjjəwwabam y əsəstan-in, a dawan-əməla da d-əgrawax tarna n igi n aratan win tagga da.

²⁵ Ənta da əsəstan-in: "Awak əsəlməƷ wa iga Yaxya aytedan daƷ aman Məššina a Ʒur d-ifal awen meƷ ag-gadəm?"» Təzzar ad tinəmənnin gar-essan: «As nənna: "Məššina a Ʒur d-igraw turəgat n awen", a danaƷ-annu: "Mafel za wər sər-əs təzzəgzanam?"

²⁶ As das-nənna amaran: "Aggadəm a Ʒur d-igraw Yaxya tarna ten", wədi a dana-təššək tamattay, fəlas ketnet təkkâs aššak as Yaxya ənnəbi a imos.»

²⁷ Təzzar ənnan i Ƴaysa: «Wər nəssen.» Inn-asan Ƴaysa: «Nak da za wər dawan-z-əməla wa di-ikfan tarna n igi n aratan win.»

Əlmital wa n bararan win əššin

²⁸ Iгла Ƴaysa iššewal inn-asan: «Ma tənnam s əlqissat ta? Aləs iyyan a ilan əššin bararan. Ihoz-in barar-net wa azzaran, inn-as: "Aglu barar-in təšƷəla daƷ afarag-nana wa n alƷanab azala."

²⁹ Inn-as barar-net wen: "Wər di-iha adi." Mišan ya dəffər awen, imməgraz barar en tugəyt ta iga y abba-net, təzzar igla ikka afarag-nasan.

³⁰ Ihoz-in aləs wen barar-net wa n əššin igmay daƷ-as arat wa igmay daƷ wa azzaran. Ig-as barar-net wen aljawab igân əs saƷmar, inn-as: "Awalla Abba-nin, ad akkaƷ afarag-nana!" Mišan iqqim da wər t-ikka.

³¹ Awak ma imos daƷ bararan en wa immozalan tara n abba-nasan?» Ənnan-as: «Adi za barar wa azzaran!» Əddi a dasan-inna Ƴaysa: «EggəyyeƷ əsilakanax-awan za as,

inabazan ən takəsen əd təkərwaten, da a dawan-izaran ətəwəqbal dağ Tağmar ta n Məşşina.

³² Ənnex-awan adi fəlas Yaxya, os-iwan-du, issəkn-iwan awa kawan-iwaran əmərədda gar-ewwan əd Məşşina, mişan wər sər-əs təzzəgzanam. Amaran inabazan ən takəsen, əd təkərwaten, əzzıgzanan sər-əs. Kawanay iman-nawan tənâyam awen, mişan wər sər-wan d-eway təmagrist waliyyat n arak mazalan-nawan əngəm za təzzəgzanam sər-əs.»

Əlmital wa n magyakan n alıyanab

³³ Səsəmat y əlqissat iyyat təmosat əlmital: «Məşşis n aɣaywan iyyan a inbalan alıyanab dağ amaɗal-net, issəɣlay-tu afarag, izzəɣaz dağ-as tagdayt ta dağ itawazmu alıyanab. Issəkras ogga ihhoken as z'iggâr awedan wa ogazan afarag en. Təzzar issəɣfar afarag-net en i magyakan wiyyad, işşokal.

³⁴ As du-tahoz tamert ta n əmiləy n alıyanab, izammazal eklan-net əs magyakan win əɣfarnen afarag-net, y a das-d-awəyan adagar-net dağ alıyanab.

³⁵ Mişan obazan magyakan win eklan win, əgan y iyyan dağ-san šiwwit, əgan iman ən wa hadan, ad əggaran wa n karad əs təhun har t-aba.

³⁶ İlas məşşis n afarag izammazal sər-san eklan wiyyad ogarnen win den igət, mişan əgan-asan meddan win əɣfarnen afarag en awa dağ əgan i win din-izammazal dat awen.

³⁷ Təzərəst n awen, as sər-san izammazal barar-net, fəlas inna dağ man-net: "Dad zamas barar-in awa immikkan as ad t-əssəxməran!"

³⁸ Mişan as ənayan magyakan win barar-net namannan gar-essan: "Ənta əddi amakkasu n afarag. Əndawat a tunanɣu kərəz, ad nəkkusət afarag."

³⁹ Təzzar obazan-tu, əkkasan-tu dağ afarag, ənɣan-tu kərəz.»

⁴⁰ Inn-asan Ƴaysa: «Awak as d-osa məşşis n afarag n alıyanab wen, ma z'agu i magyakan n alıyanab win den?»

⁴¹ Jajjayen aytedan ənnan-as: «As d-osa za, ad iyrəd tenaɣay ən maksanan win di, issəɣfar afarag-net i magyakan wiyyad a das-du-za-tawaynen tənfa dağ tamert-net.»

⁴² Inn-asan Ƴaysa: «Awak teɣaray a wər təgem dağ Əlkəttaban as: "*Təhunt ta din-əgaran makrasan, ənta a təqqalat təhunt ta təkbalat ehan, arat wen Əməli a d-ifal, amaran isimaklal sər-na*"?»

⁴³ «Awen dağ a fəlas əmâlaɣ-awan as Tağmar ta n Məşşina a dağ-wan tattarmas, tətəwəkfu i tamattay ta dağ-as du-za-tawəyat tənfa.

44 Awedan wa udan fəl təhunt ten, ad addagdag, wa fəl tuda deḡ a tu-təlkəš.»

45 As əslan muzaran ən limaman əd Farisaytan y əlmitalan win iga Ƴaysa den, əgran as əntanay a fəl imməgrad.

46 Ad gammayan əmmək was tu-za-səttərməsan, mišan əksudan tamattay, fəlas təga i Ƴaysa iduf n as ənnəbi a imos.

22

Əlmital wa n təkṛəst

1 Ilas Ƴaysa ig-asan əlqissat iyyat təmosat əlmital, inn-
asan:

2 «Təḡmar ta n jənnawan, təha əlmital n əmənokal iyyan isassagan saksas daḡ təkṛəst ən barar-net.

3 Izammazal eklan-net y ad əməlan y aytedan win as ira a d-əggəzan saksas wen, mišan ugayan s a d-asin.

4 Ilas əzəmmizəl n eklan-net wiyyad y ad annin y aytedan win den: "Nak sammatagaḡ iməgura-nin, əgzamaḡ izəgran-in, əd haran-in win əddəratnen, arat kul immotag əməṛədda, aḡliwat-du amaran ad nassantu saksas."

5 Mišan əgmadan batu-net, wiyyad əkkan šiwəgas-nasan, wiyyad əkkan idaggan win daḡ satagan,

6 təzzar obazan win hadatnen inammazalan win den, əgan-asan taršəxšad, ənyan-tan kəṛəz.

7 Iggaz alham labasan əmənokal, issəgla sojitan-net, əḡradan tenaḡay ən maggan ən man win den, əḡradan əsəqqəd n əḡrəm-nasan ketnet.»

8 «Təzzar inna y eklan-net: "Imutag za win saksas əḡân, mišan meddan win den, wər əhoran əd məgura win.

9 Daḡ adi, aḡliwat takkim idaggan win daḡ əmmənaynat tarrayen, təḡrim-du aytedan kul win tənayam, a d-akkin saksas."

10 Təzzar əḡlan eklan win den, əḡran-du aytedan kul win ənayan, gər za win olaḡnen, wala win əmosnen imaksanan, har iḡrad adag wa n saksas en adanay n aytedan.

11 Iḡla-du əmənokal y ad inəy əljəmaḡat ta du-təddewat den i təkṛəst. Inay daḡ meddan win əllanen den iyyan wər nəlsa tabdoḡ tas ihor a du-tətəwəqqən əs təkṛəst.

12 Inn-as əmənokal: "Obaz, kay ak mas du-təggazaḡ edag a wər təqqena tabdoḡ tas ihor a du-tətəwəqqən əs təkṛəst?" Wər du-təḡmed tefert waliyyat imi n aləs wen.

13 Den daḡ ad inna əmənokal i maššaxalan-net: "Abəzat-tu, təḡrədam kerrad ən daran-net əd fassan-net, təḡəram-t-in sədi daḡ šiyyay, daḡ adag wa daḡ hallin aytedan, əddâdan idədwən-nasan fəl təmagraz."»

14 Inna Ýaysa: «Aytedan aggotnen a du-tawayranen, mişan wër daɣ-san eǵǵotan win tawasanafrannen.»

Arazam n amana i Qaysara

15 Dæffær awen maşawwaran Farisaytan, ad gammayan æmmæk as eǵan i Ýaysa taftaw, eǵân a tu-sæssugin batu a tu-za-tagit daɣ xunan.

16 Zammazalan-du arat daɣ nalkiman-nasan, d aytedan wiyyad æwarnen aganna n æmænokal Herod y ad annin i Ýaysa: «Æşşex, næssân as æmæggi eñ tidet a tæmosa, amaran tæsasaɣra æs tidet awas dana-iwar igi-net daɣ tarrayt ta n Mæşşina. Wër t-illa i tæksuda daɣ awa tæganna, fêlas wër tæzlaya daɣ almaqam n aytedan.

17 Daɣ adi, nêra daɣ-ak a dana-tæmêla: Awak xalal arazam n amana y æmænokal wa zæwwëran Qaysara, me wër xalal?»

18 Mişân igra Ýaysa æşşur-nasan, inn-asan: «Mafel têtajjarrabam-i, ælmunafiqan win?»

19 Sakniwat-i tefelt n eǵrêf tas itawarizam amana.» Tæzzar tæmmeway-as-du tafelt.

20 Inn-asan Ýaysa: «Ma ilan eɣaf d esêm win æwarnen tefelt ta?»

21 Ennan-as: «In Qaysara.» Tæzzar inn-asan Ýaysa: «Enøyat za, agiwat i Qaysara awa kawan-issëwar, tagim i Mæşşina awa kawan-issëwar.»

22 Isammaklal sêr-san aljawab wen, oyyan Ýaysa eǵlan.

Æsæstan daɣ batu n azalaf daɣ alaxirat

23 Eǵel wen daɣ a d-osan Sadusaytan, æmosnen aytedan eǵanen iduf n as wër tu-têlla tanakra dæffær tæmattant. Ehozan-in Ýaysa, æssæstanan-tu,

24 ænnan-as: «Æşşex, ænnæbi Musa inna: "As aba awedan wër igrew barar, wædi amadray-net a iwar ad izlêf tantut ta d-oyya den, fêl ad agu æzzurrøyya y æmidi-net wa aba den."»

25 «Enna nakkanay, eñân-anax æssa mædrayan. Izlaf wa dasan-waşşaran ketnasan, aba-tu da wër ila barar, oyya-du tantut-net y amadray-net.

26 Iga awen da fêl amadray-net wen, igraw wa n karad, xasil a tat-zallafan itiba-tan da wër dêr-æs êlen bararan, har eǵradan fêl æssa-essan.

27 Dæffær as tan-aba ketnasan, aba tantut ten.

28 Daɣ adi eǵel wa n tabadday, ma imos daɣ æssa mædrayan win den was za tæqqêl tæntut ten taɣuræs, dad zamas ketnasan eǵlâfan-tat.»

29 Inn-asan Ýaysa: «Ikêl n alxata têtâtâfam-tu, fêlas wêrmad tæssanam awa ænnan Elkêttaban, wala deɣ tæssanam awa dêr togda tarna eñ Mæşşina.

30 Æssənat âs əzəl wa n tabadday, wər t-illa azalaf i meddan wala šidoden. Kalar tēməddurt a z'agin šilat ən ta əgan angalosan daɣ jənnawan.

31 Daɣ batu amaran ta təqqalat tanakra ən nəmməttan, awak edes a kawan-wər-iga as təxrâm awa a dawān-inna Məššina daɣ Ælkəttaban? Wərgəɣ a inna:

32 "*Nak a imosan Æməli n Ibrahim, Æməli n Isəhaq, Æməli ən Yaqub?*" Məššina wər imos Æməli ən tēməxxsa, kalar Æməli ən win əddarnen a imos.»

33 Tamattay ta təslat y aljawaban win den, isimaklal sər-əs wəllen əsəssəɣri wa iga Ƴaysa den.

Alwajiban win ogarnen

34 As əslan Farisaytan as Ƴaysa iga aljawab isifastan Sadusaytan, əmmənayan.

35 Inkar iyyan daɣ-san imosan əmusan n əššəriɣa, ira ad agu tənagmayt i Ƴaysa. Issəstan Ƴaysa inn-as:

36 «*Əššex, ma imos alwajib wa ogaran daɣ Əttawret?*»

37 Inn-as Ƴaysa: «*Ənta da alwajib wa ogaran: "Iru Æməli-nak Məššina s əwəl iyyanda, əd man ərdānen, tireq-qu deɣ əs tayttay-nak kul."*

38 Ənta da da alwajib wa ogaran alwajib kul, imos deɣ wa azzaran.

39 Amaran alwajib da wa ilkaman i wen, a dər-əs olân: "*Agu y əšəqqay-nak tara ta təgeɣ i man-nak."*

40 Alwajiban win əššin a, əntanay a daɣ iqqan arat kul wa ihan Ælkəttaban.»

Əlməsix əd Dawəd

41 Əqlan Farisaytan win den əllân den da, əmminayan. Issəstan-tan Ƴaysa amaran,

42 inn-asan: «*Ma imos iduf-nawan daɣ Əlməsix? Ma tənnam ma imos abba-net?*» Ənnan-as: «*Adi za Ag əmənokal ənnəbi Dawəd!*»

43 Inn-asan Ƴaysa: «*Daɣ adi, manəmmək as t-iɣra ənnəbi Dawəd əs tilalt n Infas wa n Məššina s esəm wa n: "Əməli?" Fəlas a inna:*

44 "*Inna Æməli y Æməli-nin: 'iyyaw qamu daɣ əɣil-in, har əxrədəɣ əsərəs ən zənga-nak, agaq-qan daw daran-nak.'*"

45 Dad zamas iɣr-ay Dawəd s esəm wa n Æməli, daɣ adi manəmmək as z'iqqəl barar-net?»

46 Wər t-illa awedan waliyyan ilfâdan i Ƴaysa wala təfert iyyadda n aljawab y əsəstan wa iga den. Amaran a obazan ɣur əzəl wen, ab'as t-illa awedan ihalan a das-agu əsəstan waliyyan.

23

Ŷaysa iggâz šin mæssəsəŷra n Ettawret əd Farisaytan

¹ Den daŷ ad iššewal Ŷaysa i tamattay, əd nəttulab-net, inn-asan:

² «Imusanan n Ettawret, əd Farisaytan, əntanay a sasaxrinen aytedan əššəriŷa wa d-oyya ənnəbi Musa.

³ Daŷ adi mazalat aratan kul win kawan-sasaxrin, tabbardagam y awa dawan-gannin. Mišan ad wər tətəggim imazalan win taggin, fəlas awa gannin, wər idrew arat d awa tamazalan.

⁴ Əzuk zəwwəran as izzəwat aggay-net a sawaran aytedan, əntanay amaran wər tu-z-ədəsan əs wala idədwən-nasan.

⁵ Imazalan-nasan kul wər əmosan ar soknit. Awen daŷ a fəlas šira šin təkannaren-nasan, əgan-tanat ši zawwarnen wəllen, əzzəzwaran deŷ šin taqqanan daŷ təgəltam-nasan, fəl ad ilenat anay wəllen. Šibənək ən təkədkaden-nasan deŷ əbālan-asnat bašakšakan zagrotnen, əlānen anay wəllen.

⁶ Ərān təŷimit daŷ daggan n aytedan win tawasaymarnen daŷ əməgura əd daggan win əlanen almaqam daŷ nan n əŷibada ən Kəl-Əlyəhud.

⁷ Ərān a dasan-taggin aytedan assalam ən saŷmar daŷ sammanayan, ərān deŷ a tan-ŷarrin aytedan s esəm wa n "Əššex-in".»

⁸ «Mišan kawanay, ad wər tagim i man-nawan esəm wa n Əššex, fəlas kawanay Əššex iyyanda a təlam, amaran ketnawan imədrayan a təmosam.

⁹ Ad wər təŷarrim deŷ iyyan daŷ-wan s esəm wa n abba daŷ əddənet, fəlas Abba iyyanda a təlam, a t-imosan: Abba wa ihan ijənnawan.

¹⁰ Ad wər təraddim deŷ itawann-awan "Əššex", fəlas Əššex iyyanda a təlam, a t-imosan Əlməsix.

¹¹ Wa daŷ-wan imosan əmuzar, wədi ad iqqəl zun amašşaxal-nawan.

¹² I idkalan iman-net, ad t-issərəs Məššina, i əssərasan iman-net deŷ ad t-idkəl Məššina.»

¹³ «Iket aŷazab iqqâl-awan, ya imusanan n Ettawret, əd Farisaytan win əlmunafiqan! Kawanay a əmosnen y aytedan zun təsəhərt təŷfəlat gar-essan əd Taŷmar ta n jənnawan. Fəlas kawanay iman-nawan da wər təggezam Taŷmar ta n jənnawan, təgdalam deŷ iguz-net i win t-əranen.»

¹⁴ [«Iket aŷazab iqqâl-awan, ya imusanan n Ettawret, əd Farisaytan win əlmunafiqan! Təttatim eharay ən tədoden šin as aba meddan-nasnat, amaran tətəggim imaddan

zagrotnen wər nəmos ar sokni. Awen day a fəlas attadib wa-nawan, ad agər attadiban kul tallabəst.»]

15 «Iket alɣazab iqqâl-awan, ya imusanan n Ettawret, əd Farisaytan win əlmunafiqan! Təşakalam, təssiwalam idaggan kul, fəl amaɖal əd gərwan, təgâmmayam kuddeɣ awedan iyyanda təssərdam s ad ilkəm y əsəssəɣri wa n Ettawret. Amaran as sər-əs təssərdam awedan, a tu-tagim aw Jahannama, har as alɣazab wa z'agu, a d-agu əşšin nədfisan fəl wa-nawan.»

16 «Iket alɣazab iqqâl-awan, ya imuzaran əddirɣalnen! Kawanay a ganninen: As ihad awedan s Ahan wa Zəwwəran n Əlɣibada, wədi wər imos wala, mišan as ihad s urəɣ wa ihan Ehan wa Zəwwəran n Əlɣibada, wədi tahuday-net təglâ.

17 Iməskilan ən məddəɣal! Awak urəɣ a ogaran almaqam, meɣ ak edag wa zəddigan s ənta a izzazdagan urəɣ?

18 Madəɣ tannim: "As ihad awedan əs majmar wa zəwwəran n əsəqqəd ən təkutawen, wədi tahuday-net wər təmos wala, mišan as ihad əs təkutay ta təwarat majmar, wədi tahuday-net təglâ."

19 Iməddəɣal win! Awak takutay a togarat almaqam, meɣ majmar wa tat-izazdagan?

20 Əssənət as awedan wa ihadan əs majmar wa zəwwəran n əsəqqəd ən təkutawen, wədi awa iwaran majmar da ihâd sər-əs.

21 Awedan wa ihadan s adag wa zəddigan n Ahan wa Zəwwəran n Əlɣibada, wədi edag wa zəddigan as ihâd əd Wa t-ihan.

22 Amaran awedan wa ihadan əs jənnawan, wədi təxawit ta n taɣmar ən Məşşina as ihâd, əd wa fall-as iqqiman.»

23 «Iket alɣazab iqqâl-awan ya imusanan n Ettawret əd Farisaytan win əlmunafiqan! Tətâkkasam təməssədək day ənniɣnaɣ, əd ɣanit d alkemun, amaran toyyam aratan win ogarnen assahat day əlqanun, a tan imosan: əşşəriɣa, təhanint d əzəɣzan. Aratan win di əntanay a azzarnen, iwâr-kawan a tan-tammazalam, da wər din-təglemam win hadatnen.

24 Imuzaran əddirɣalnen! Təzazdaram aman y a daɣsan təkkasam şizəbbawen, amaran təlâmmazam aləm iɣrâdan!»

25 «Iket alɣazab iqqâl-awan ya imusanan n Ettawret əd Farisaytan! Əlmunafiqan! Təzazdagam afalla n əsəlkəw d əɣəzu, mišan ammas-nasan ijirgan fəlas idnay tarkəbt d arak deranan.

²⁶ Farisay iddiryalan! Zəzdəg təzzar ammas n əsəlkəw d əxəzu, əddi ad z'izdag afalla-net ənta da.»

²⁷ «Iket alxazab iqqâl-awan ya imusanan n Əttawret əd Farisaytan win əlmunafiqan! Tolâm əd zəkwan a fəl tiwasalsanen arat mallan, hossayan dağ azzahir, amaran ammas-nasan ədnayan-tu xasan ən nəmməttan, d əzzənəfan kul ən tadjarganen əmmîdasnen.

²⁸ Emmək en dağ a təgam kawanay da. Dağ azzahir za, toxâdam, mişan iwallan-nawan, wər ədkeran ar təlmənufəqa əd talbast.»

²⁹ «Iket alxazab iqqâl-awan ya imusanan n Əttawret əd Farisaytan win əlmunafiqan! Təkârrasam izəkwan y ənnəbitan, tədállagam izəkwan n aytedan win oğadnen,

³⁰ amaran təgannim: "Ənnar du-nəggâz azzaman win d-əggazan marawan-nana, wər dər-san za nənəmənnək dağ tanağla ta əgan azni n ənnəbitan."

³¹ Emmək en dağ as təsattaddam tişit-nawan ihayawan n aytedan win ənğanen ənnəbitan.

³² Dağ adi səkkəsəwat awa din-əglaman marawan-nawan.

³³ Iket ən taşşolen! Əzzənəf ən taşşolen şin iha əssam wa labasan! Manəmmək as za taddarragam y attadib an Jahannama?

³⁴ Awen dağ a fəl kawan-d-əssokax ənnəbitan, əd malan-ən-tayttay, əd musanan n Əttawret. Ad tagim iman ən wiyyad tattaytayam-tan fəl təgəttawen, tagim šiwwit n ələkkud i wiyyad dağ nan-nawan win əlxibada, təlləmam gər xərman tədgəzam-tan,

³⁵ fəl a kawan-iwər alxaq kul n əzni wa təwanxalan dağ tədləmt, a d-obazan xur Habila wa n alxadil, har əlimam Zakarayya wa n ag Barakəya wa tənşam gər edag wa zəddigan əd majmar wa zəwwəran n əsəqqəd ən təkutawen dağ Ahan wa Zəwwəran n Əlxibada.

³⁶ Əggəyyəx əsilakanax-awan as aratan win əmalax əddi, kul ad agin fəl aytedan n azzaman win!»

Təkurat fəl Yerusalam

³⁷ «Xa aytedan ən Yerusalam, iket təgam iman n ənnəbitan, tənşam dəx əs təgur ən təhun win sər-wan d-izammazal Məşşina! Awak har mənəket taklaten, gammaya d a kawan-d-əşşidəwa s əmmək as du-təşadaw təkəjit ikərətan-net daw əfrutan-net, mişan tugayam s awen!

³⁸ Ənəyat za, ehan-nawan ad itəwəyyu issûf.

³⁹ Fəlas əsilakanax-awan as wər di-za-tələsam anay a obazan xur əmərədda har əzəl wad za tannim: "Wa d-osan s esəm n Əməli, igrâw arraxmat!"»

24

Ʒsæssæȝri wa n sæmmos: Ahluk ən Yerusalam d æȝrud n æddænet

Ʒsænti

¹ As iȝrad Ȝaysa batuten šin den, igmad Ehan wa Zæwwæran n Ʒlȝibada, igla. Ʒhozan-t-in nættulab-net y a t-in-sassagrín tæmækrust n Ahan wa Zæwwæran n Ʒlȝibada wen.

² Mišan inn-asan Ȝaysa: «Tæhannayam ækærrus wa? Ʒggæyyeȝ æsilakanæȝ-awan as awa tæhannayam da, ketnet wær daȝ-as du-z-aqqam tæhunt tæwârat tæmidit-net, ketnet ad itæwæjæbbæræjjæt.»

³ Dæffær awen igla, iqqim fæl ædȝæȝ wa n Eškan ən Zaytun. Ʒhozan-t-in nættulab-net ȝas-nasan, ænnan-as: «Ʒmæl-anæȝ æmmay ad z'agu arat wædi, tæmælaȝ-anæȝ alȝalamat ta za tassaknit assa-nak, d æȝrud n æddænet.»

Alȝalamaten n æȝrud n æddænet

⁴ Inn-asan Ȝaysa: «Ʒnkædat. A kawan-wær-issæxræk awedan waliyyan.

⁵ Fælas aytedan aggotnen a du-z-asinen ættâfan esæm-in, akkiyyan daȝ-san igannu imos Ʒlmæsix. Amaran ad æssæxrækan s awen aytedan aggotnen.

⁶ Ad taslim i tærmuȝ ən mæȝiran, æd salan ən mæȝiran. Mišan ænkædat y a kawan-issærmæȝ awen, fælas aratan adi as kundaba æȝan. Mišan wærgæȝ æntanay a mosnen tæzæræst n æddænet.

⁷ Ad æknæsnať addawlaten gar-essanať, æknæsnať taȝmaren gar-essanať. Imæl-tu laz labâsan, æd næȝæynæȝæyan n amaȝal daȝ daggan aggotnen.

⁸ Mišan aratan win kul, wær æmosan ar ænætti ən tælawayť tæhât ælmital ən ta du-tætizarat æs tæntut tætaggazat amzur.

⁹ Ʒddi ad za tæwæggim daȝ tæssust labasat, ad tætawanyim, tætiwagzaram daȝ tæmattiwen n æddænet kul, fælas kawan-iwar esæm-in.

¹⁰ Arat wen a d-awæy s aytedan aggotnen a tan-igmæd æzægzan-nasan, ad tinæmækæddilan, næmægzæran.

¹¹ Ad t-æmælan ænnæbitan ən bahu aggotnen, a z'æssæxræknen aytedan aggotnen.

¹² Ad tætitteȝ talbast har as tašsam n aytedan a daȝ-san tæfnæz tara wællen.

¹³ Mišan wa daȝ-wan izmaran har tæzæræst, wædi ad iȝlæs.

¹⁴ Isalan n Ʒlinjil, imosan isalan ən Taȝmar ta n Mæššina win da, ad tæwæmælan daȝ æddænet ketnet, fæl ad aslinat tæmattiwen kul n æddænet tæȝæyya ta. Ʒddi amaran a du-za-tawæd tæzæræst.»

¹⁵ Iгла Ҷайса ишсевал инн-асан: «As тәнәям "taxxaramt ta sәksәdat" ta imal әnnәbi Danәyel, тәһа edag wa zәddigan, – wәdi wa iҗarrin, агрет! –

¹⁶ Eddi аytedan win akal әn Yahudәyya, addaggaganet s әdҗаған;

¹⁷ Awedan wa iqqiman даҗ adag wa n аfalla n аһан-net, а du-wәр-azzabbat y а din-idkәl ar-es ihән eһан-net.

¹⁸ Awedan wa ihan tawagost-net, а du-wәр-iqqәl аҗайwan-net igmây isәlsa-net!

¹⁹ Iket аҗазаб ad t-аginat тәdoden šin әганен šidusen әd šin sankasnen даҗ adan win den!

²⁰ Egmәyat даҗ Mәššina а fәl du-wәр-imazayyat әdәggәg-nawan әd tamert n аsamed irtayan d аkonak, madеҗ әzәl wa n тәsanfawt.

²¹ Fәlas adan win den, а tu-tәмәl тәssust labasat as, а du-tәnta әddәnet wәр тәtawanay ši wәр toger; amaran wәр ilkem deҗ ad тәtiwanay tulat-net дәffәр awen.

²² Kundaba as adan win den ikf-en Eмәli тәzәрәst, wәdi wәр t-illa i даҗ-san du-z-irәgan. Kalar ad тәwәzzәgzәlan fәl әddәlil n аytedan win tawasanafrannen.

²³ Eddi amaran, as dawan-inna awedan: "Eнәyat! Elmәsix illa da", madеҗ: "Illa den", а das-wәр-tәzzәgzәnam!

²⁴ Fәlas ad t-әмәlan әlmәsixan әn bahu, әмәlan-tu deҗ әnnәbitan әn bahu. Ad taggin аҗalamaten simaklалnen, әd тәlmәҗjujaten әmmittaynen, һар as әnnar әfragan awen, әssәxrәkan аytedan һarkid win isannafran Mәššina.

²⁵ Даҗ adi әнкәдат әd man-nawan! Aratan win, әgeҗ-awan-tan daw аҗaf!

²⁶ Amaran as dawan-itawanna: "Eнәyat, Elmәsix den iһа teneray", а tu-wәр-takkim. Madеҗ itawann-awan: "Eнәyat, iһа даҗ аһан edag wa ogaran ilҗi", kaššeday, ad wәр тәzzәgzәnam wala даҗ batuten šin di.

²⁷ Eссәnat as, assa-nin nak Ag Aggadәм ola d essam а du-z-assantin әbәlәzlәz da d-inta dәnnәg, һар da d-iraz ataram.

²⁸ Edag тәggaz тәmaxsәyt, а даҗ-as iddawan јадаран.»

Tewaxlay n Ag Aggadәм

²⁹ Iгла Ҷайса ишсевал, инн-асан: «Tarmâd дәffәр adan әn тәssust ta labasat en, ad alsinat šiyyay тәfuk, tallit deҗ igmәd-tat әnnur-net, әртәkan-du etran, нәgәynәgәynat тәxәllak šin әланen тarna даҗ јәnnawan.

³⁰ Eddi а du-za-tәнәfilәl аҗalamat-in nak Ag Aggadәм даҗ јәnnawan. Šimattiwen kul n әddәnet ad sәkkirәynat, тәzzar әнәynat-i nak Ag Aggadәм as du-z-asa әһeҗ šignawen, әkneҗ тәla әn тarna әd tanaya.

³¹ Təzzar insəy in asak, zəmmizəla nak Ag Aggadəm angalosan-in, əşşidəwan-du aytedan win əsannafrana daɣ təxəmmar an əkkozat n əddənet.»

Təssunt ta n ašək ən fig

³² Inn-asan: «Abəzat alfaydat s əlmital wa n ašək ən fig. Igda ad hussəyan lədlad-net, iggaz-du šin tanazra, ad təssənam as tamert ta n akasa təhōz.

³³ Zund əmmək en daɣ əs as tənayam aratan kul win dawan-əmaləy əddi, təssənam as aɣrud n əddənet ihoz, wər illa gar-ewwan dər-əs arət.

³⁴ Əggəyyəy əsilakanəy-awan as tamattay ta da n azzaman win nəha da, ad tənəy ənətti n aratan kul win dawan-əməla da.

³⁵ İjənnawan d amaɣal ilkam ad ib'as t-əllan, mišan batuten-in əllanat-tu har faw.»

Əzəl wala alwaq wa n tanakra n alaxirat, wər tawassanan

³⁶ İgla Ƴaysa iššewal inn-asan: «Əzəl amaran wala alwaq wa daɣ z'agu awa dawan-əməla da, wər t-illa i daɣ-san issānan, gər za angalosan a əhanen ijənnawan, wala Barar iman-net. Wər t-illa i daɣ-san issānan ar Abba Ƴas.

³⁷ Awa igan daɣ azzaman n ənnəbi Nux, a z'agin daɣ adan win daɣ du-z-asa nak Ag Aggadəm.

³⁸ Təssānam as adan dat alwabil, aytedan tâtin, sassin, zâllafan, zâzlafan har əzəl wa daɣ iggaz Nux aɣlal n aman.

³⁹ Wər əgen aššak daɣ arət waliyyan, har d-ewad alwabil, iɣrad-tan ebət ketnasan. Zun awen daɣ a z'agin Ƴur assanin nak Ag Aggadəm.

⁴⁰ Əddi əššin magyakan nimaşƷalnen daɣ tawagost iyyadda, ad ammadkal iyyan, itəwəyyad-du wa hadan.

⁴¹ Sanatat tədoden taddanen daɣ adag iyyanda, ad tamadkal iyyat, tətəwəyyad-du ta hadat.»

Əlmital wa n məššis n aɣaywan d abaydag

⁴² Inn-asan: «Daɣ adi ənəkədat, fəlas wər təssenam əzəl wa daɣ du-z-asu Əməli-nawan.

⁴³ Təssānam wəllen əs ənnar issān məššis n aɣaywan amazay wa daɣ du-z-idəl abaydag, ahad wədi ad akəy isəmmutəg y a das-igdəl terazay n ahan-net.

⁴⁴ Awen daɣ a fəlas kawanay da, səmmutəgat, fəlas nak Ag Aggadəm, a d-asa daɣ assaɣat ta wər tordem.»

Əlmital wa n əkli wa olaɣan əd wa wər noley

⁴⁵ İgla Ƴaysa iššewal inn-asan: «Daɣ adi əkli iɣdâlan, ilân əgərri, ənta a isannafran məššis izzuzər-tu y eklan-net win hadatnen y a tan-ihakku imensewan daɣ alwaq was ihor.

⁴⁶ Ibbilal ækli wen, as d-iqqal mæššis, ogaz-t-id iha æššəxəl wa daq q-id-oyya den.

⁴⁷ Eǵǵəyyeǵ əsilakanax-awan as akli wen, ad t-izzuzər mæššis i təla-net kul.

⁴⁸ Mišan ənnar imos ark ækli, inna daǵ man-net: "Mæšši illolat-in,"

⁴⁹ təzzar ad iggat imidawan-net, idarraw d aytedan win tamawaden, itinəməšəw dər-san esmad,

⁵⁰ wədi ilkâm a t-id-iǵdər mæššis daǵ əzəl d amazay wər orda.

⁵¹ Təzzar ad t-iggât mæššis har t-iksən, ag-ay dad tawaggin əlmunafiqan. Den da ad əllan aytedan win hallinen əddadan idədwan-nasan fəl təmagraz.»

25

Əlmital wa n marawat təmawaden wər nəzday meddan

¹ Iǵla Ǵaysa iššewal i nəttulab-net, inn-asan: «Əzəl wədi assa ən Taymar ta n jənnawan, ad iggəz əlmital ən marawat təmawaden wər nəzday meddan, ədkalnen ibelan-nasnat əzəl ən təkrest, əssəlkadnat y amazlay.

² Səmmosat daǵ-asnat za wər əlenat tayttay, səmmosat amaran əlānat-tat.

³ Šin wər nəla tayttay za, as ədkalnat ibelan-nasnat, wər ewaynat widi wa n əsəryi-nasan.

⁴ Šin əlanen tayttay amaran, as ədkalnat ibelan-nasnat, ewaynat šitəkan iha widi wa n əsəryi-nasan.

⁵ Illolat-in amazlay, har as obaz-tanat etəs ketnasnat.

⁶ As iga adawannay, təga-du təxərit, itawanna: "Amazlay əddi, ərdəǵat-du səlkədat-as!"

⁷ Təzzar ənkarnat-du təmawaden šin marawat en ketnasnat, sammatagnat ibelan-nasnat.

⁸ Ənnanat šin wər nəla tayttay i šin hadatnen: "Ibelan-nana əggazan šin təmattant, akfimat-ana-du daǵ widi."

⁹ Ənnanat-asnat šin əlanen tayttay: "Kala, widi-nana wər danax-ewed dər-əkmat. Aǵlimat akkimat imassatagan ən widi tazanzimat-du widi i belan-nakmat."

¹⁰ As əǵlanat y a d-azzanzinat widi, osa-du əmazlay, əggaznat fall-as səmmosat təmawaden šin sammatagnen edag wa daǵ itaggu saksas, tətawahar-du təsəhərt n ahan.

¹¹ Dəffər awen, ewadnat-du təmawaden šin hadatnen, ad saǵaratnat y amazlay, ganninat-as: "Mandam! Mandam! Aləm-ana!"

¹² Təzzar inn-asnat amazlay: "Eǵǵəyyeǵ əsilakanax as wər kamat-əzdayax.»

¹³ Iǵla Ǵaysa iššewal inn-asan: «Daǵ adi ənkədat, fəlas wərmad təssānam əzəl, za wala assaǵat ta du-z-asa.»

Elmital wa n tæsəgras n urəx

¹⁴ «Batu ta təqqalat Taɣmar ta n jənnawan, təha əlmital n aləs işakalan. Iɣra-du eklan-net, a tan-isaɣlaf ərrəzəxan-net.

¹⁵ Ikfa iyyan daɣ-san səmmosat tæsəgras ən dinaran n urəx, ikfa wa hadan sanatat, ikfa iyyadda y əkli wa n karad, a daɣ ewal awen əs da du-təqqal fərregat-nasan, amaran işşokal.

¹⁶ Tarmad as igla wa issəɣlaf səmmosat tæsəgras, işşəşɣal urəx wen, igraw-du fall-as səmmosat tæsəgras şiiyyad ən dinaran.

¹⁷ Wa issəɣlaf sanatat deɣ igla, işɣal, igraw-du fall-asnat sanatat şiiyyad.

¹⁸ Wa wər nəgrew ar təsəgrəst iyyadda, igla iga anu daɣ amaɗal inbal daɣ-as təsəgrəst ta iɣlaf den.

¹⁹ As təga tərut dəffər awen, osa-du məşşissan, ad isaɣrad ərrəzəxan win tan-issəɣlaf.

²⁰ Ibdad-du wa issəɣlaf səmmosat tæsəgras, eway-du səmmosat şin fall-asnat d işşota. Inn-as: "Məşşi, səmmosat tæsəgras a di-təssəɣlafa, amaran əgrawa-du fall-asnat səmmosat şiiyyad. Əntanatay da."

²¹ Inn-as məşşis: "Alafəyet! Illikan as akli olâxan a təmosa, təmosaɣ deɣ awedan ən təfləst. Təssiknaɣ adi daɣ arat wər nəggət. Dəffər awa a kay-əssəɣləfay a aggen. Iyyaw taga təfalawist ta əgeɣ nak an məşşik!"»

²² «Wa issəɣlaf sanatat tæsəgras deɣ ibdad-du, inna: "Məşşi, sanatat tæsəgras a di-təssəɣlafa, amaran əgrawa-du fall-asnat sanatat şiiyyad. Əntanatay da."

²³ Inn-as məşşis: "Alafəyet! Illikan as akli olâxan a təmosa, təmosaɣ deɣ awedan ən təfləst. Təssiknaɣ adi daɣ arat wər nəggət. Dəffər awa a kay-əssəɣləfay a aggen. Iyyaw taga təfalawist ta əgeɣ nak an məşşik!"»

²⁴ «Dəffər awen amaran, ibdad-du wa issəɣlaf təsəgrəst iyyadda, inna: "Məşşi, əssânaɣ as aləs labasan a təmosa, tətälaya-du ɣarat daɣ adag a daɣ wər tənbelə, tətälaya-du deɣ tənfa daɣ adag a daɣ wər tənbesaɣ amasa waliyyan.

²⁵ Adi da fəl di-təggaz tasa-nak, əgley ənbala təsəgrəst ta di-təssəɣlafa. Əmərədda ənta da."

²⁶ Inn-as məşşis: "Kay arak əkli a təmosa, təmosa deɣ anaffaraşşay! Dad zamas təssânaɣ as ətälaya-du ɣarat daɣ adag a daɣ wər ənbela, ətalaya-du deɣ tənfa daɣ adag a daɣ wər ənbesaɣ amasa waliyyan,

²⁷ wədi, ənnâr di təssinsaɣ azrəf-in daɣ bank, as du-zəqqəlayə əgrâwa-du fall-as tətəyt, ətkəlaq-q-idu."

²⁸ Inna məşşis: "Daɣ adi abəzat-du daɣ-as təsəgrəst tədi, takfim-tat i wa ilan marawat.

29 Fəlas awedan kul wa ilan, wədi a das-itəwəšitu awa ila, annaflay, amaran wa wər nəla, arat n arat wa ila da, a daɣ-as attarmas.

30 Akli amaran wa wər nənfa wala, əgərat-t-in dəffər ahan daɣ šiyyay. Den da ad əllan aytedan win hallinen əddadan idədwan-nasan fəl təmagraz."»

İššəriya wa n əzəl wa n tabadday

31 Iгла Үaysa iššewal inn-asan: «As d-əqqala nak Ag Aggadəm əheɣ tanaya-nin, əddewa-du d angalosan kul, ad əqqama fəl təxawit-in ta n tanaya.

32 Šimattiwen n əddənet kul a d-idawnat, əbdədnat dat-i. A tanat-zamazaya s əmmək as isakkat amadan ayfad-net daɣ wəlli,

33 agay ayfad daɣ əxil-in, aga wəlli daɣ zalgat-in.

34 Den daɣ ad z'anna nak an əmənokal i win əhanen aɣil-in: "Ayewat kawanay win as iga Abba-nin arraxmat, ad təgrəwam taɣmar ta dawan-tətawasamatagat harwa ɣur ənətti n əddənet.

35 Fəlas iggâz-i gələk, təššətšam-i; iggâz-i fad, təššəšwam-i; əqqalaɣ ənaftaɣ, təsammagarem-i.

36 Əzlama, təssəlsam-i; ərina, təssanam daɣ-i; əggazaɣ kasaw, təssəslamam-i-in."

37 Den daɣ a di-z-annin aytedan win oɣadnen: "Əməli, əmmay a kay-nənay ih-ik gələk nəššətš-ik, wala ih-ik fad, nəššəšəw-ik?

38 Əmmay kay-nənay təmosaɣ ənaftaɣ nəsammarat-kay, wala təzlâma nəssəls-ik?

39 Əmmay kay-nənay tərina, wala taheɣ kasaw, əngəm nəssən daɣ-ak, wala nəssəsləm-kay-in?"

40 Den daɣ a dasan-z-anna nak an əmənokal: "Əggəyyey əsilakanay-awan as dad zamas təgâm aratan win di y iyyanda daɣ mədrayan-in win əknanen təmmədrəyt di, wədi nak as tan-təgam."»

41 «Dəffər awen amaran annay i win əhanen zalgat-in: "Ugagat-i imawaran ən tulɣant. Agliwat əggəzat Jahannama, tətawasamatagat y Iblis, d angalosan win das-əlkammen.

42 Fəlas iggâz-i gələk, mišan wər di-təššətšam; iggâz-i fad, mišan wər di-təššəšwam.

43 Əqqalaɣ ənaftaɣ, mišan wər di-təsammagarem; əzlama, mišan wər di-təssəlsam. Ərina, əggaza kasaw, mišan wər daɣ-i təssenam za wər di-in-təssəslamam."

44 Təzzar annin-i: "Əməli, əmmay a kay-nənay ih-ik gələk, wala ih-ik fad, wala təmosaɣ ənaftaɣ, wala təzlama, wala tərina, wala tahe kasaw, nəqqim wər daɣ-ak nəssen?"

⁴⁵ Eddi a dasan-z-anna: "Eggəyyeḡ əsilakanax-awan as, dad zamas wər təgem aratan win di y iyyanda daḡ win əknanen təmmədrəyt di, wədi nak iman-in as tu-wər-təgem."

⁴⁶ Den da ad z'akkin aytedan win edag n attadib ixlâlan, win oḡadnen amaran əgrəwan təməddurt ta təḡlalət.»

26

Emel wa n əkkoz iga Ḡaysa i təmattant-net d igi wa fall-as z'agin aytedan eyaf

¹ As iḡrad Ḡaysa alfaydaten šin kul, inna i nəttulab-net:

² «Təssânam as amud wa n Akkay, ab-as-in əššin adan, amaran əddi daḡ ad za təwəsətərməsa nak Ag Aggadəm, y ad təwətəytəya fəl təgəttawt.»

³ As itaggu awen imuzaran ən limaman, əd muzaran ən Kəl-Əlyəhud əddewan daḡ aḡarḡar n aḡaywan ən Kayif s ənta a imosan Əlimam wa Zəwwəran,

⁴ ənamardan fəl təmərkəst tas z'abəzan Ḡaysa, agin iman-net.

⁵ Dər iga awen da ya gannin: Ad wər nagu adi daḡ adan n əmud, fəl ad wər ijənnəjərwəy awen tamattay.

Iba ən Ḡaysa əd tanakra-net daḡ təmattant

Ətərməs ən Ḡaysa d ətəwətəytay-net d iba-net

Ətəwənxal n alwardi fəl Ḡaysa daḡ Betanəy

⁶ Iha Ḡaysa təḡrəmt ən Betanəy iqqim daḡ ahan ən Simḡon was kala a t-igraw kətru,

⁷ as du-tosa təntut iyyat təhoz-t-in daḡ amazay a daḡ isiḡamar itattu. Tantut ten teway butalay igân daḡ təhunt təknât šihussay, iha alwardi iyyan ilân almaqam wəllen. Təzzar ad tənəqqal alwardi wen fəl aḡaf ən Ḡaysa, imos awen aḡalamat ən saḡmar.

⁸ As ənayan nəttulab arat wen, əššakan-tu wəllen, ənnan: «Ma infa əhluk n alwardi a?

⁹ Alwardi wa ilan almaqam a, ənnâr inazzan a din-itawagga azrəf aggen, təwəkfin nazzan-net i tələqqawen.»

¹⁰ Igr-in Ḡaysa awen, inn-asan: «Mafəl təḡaššadam iman i təntut ta? Əmazal olâḡan a di-təga da;

¹¹ fəlas šiləqqawen faw da əllânat ḡur-wan, nak amaran wərge faw əllex ḡur-wan.

¹² Alwardi wa, tanaxla a tu-təga fəl təḡəssa-nin fəl a di-təsəmmutəḡ y əzəkka-nin.

¹³ Egğəyyeḡ əsilakanax-awan as edag a daḡ ittəmal Əlinjil daḡ əddənet ketnet, a daḡ-as attamal awa təga təntut a, tətəwəkta-du.»

Iguz ən Yahuza šimərkas šin as z'attarmas Ḡaysa

¹⁴ Əzəl wen da ad inkar iyyan daḡ nəttulab win maraw d əššin igân esəm Yahuza was itawannu Isxarəyuti, ikka imuzaran ən limaman,

¹⁵ inn-asan: «Ma di-za-takfim a dawan-t-aga daḡ fassan nak iman-in?» Təzzar inamarda dər-san, əkfan-tu karadat təmərwen ən tafelt n əzrəf.

¹⁶ A obazan ḡur amazay wen da, ad iggaz šin agamay ən tamazayyat ta daḡ z'agu Ḡaysa daḡ fassan.

Imutag n amensay n əmud wa n Akkay

¹⁷ As d-ewad əzəl wa azzaran n əmud wa daḡ tamatšinət təgəlwen šin wər iha xamira, əhozan-in nəttulab Ḡaysa, ənnan-as: «Mənid tərəḡ a dak-nəsəmmutəḡ imensewan n amud wa n Akkay?»

¹⁸ Inn-asan: «Egğəzət aḡrəm, takkim awedan iyyan illan den, tannim-as: "Inn-ak Əššex, alwaq ən təmattant-in ihôz. Kay a ḡur za nammansaw daḡ əmud wa n Akkay nak əd nəttulab-in."»

¹⁹ Əmmozalan nəttulab awas tan-omar Ḡaysa, sammata-gan imensewan win Akkay.

²⁰ As tuda təfuk, inaxama Ḡaysa əd nəttulab-net an maraw d əššin.

²¹ Tattin den daḡ as inna: «Egğəyyeḡ əsilakanax-awan as, iyyan daḡ-wan a di-z-agin daḡ fassan.»

²² Batu ten, teway-du sər-san as əḡšadan man-nasan wəllen, a das-igannu akkiyyan daḡ-san: «Əməli, əngəm wərgeḡ nak a kay-z-agin daḡ fassan?»

²³ Itajawwab-asan, igann-asan: «Wa di-z-agin daḡ fassan, ədrawa dər-əs da da daḡ əḡəzu iyyanda.

²⁴ Tidət as nak Ag Aggadəm a di-iba s əmmək wa əmalan Əlkəttaban daḡ batu-nin. Mišan ya, iket aḡazab ad t-agu wa di-igan nak Ag Aggadəm daḡ fassan! Awedan wədi, a das-afu fadda a du-wər-iggez əddənet.»

²⁵ Təzzar iššewal Yahuza s ənta a tu-z-agin daḡ fassan, inn-as: «Əngəm wərgeḡ nak as təgannax əddi, Əššex?» Inn-as Ḡaysa: «Kay iman-nak as tənney adi.»

Tadrəwt ta təlkamat iga Ḡaysa əd nəttulab-net

²⁶ Amazay wen daḡ a daḡ tattin den, a daḡ d-idkal Ḡaysa tagəlla, iga igodan i Məššina, irza tagəlla ten, izun-tat i nəttulab-net, inn-asan: «Atšiwat da. Taxəssa-nin adi.»

²⁷ Dəffər awen, idkal-du təkabart, iga igodan i Məššina, ikf-asan-tat, inn-asan: «Ašwat daḡ-as ketnawan,

28 fəlas azni-nin adi, isitaddan azni wa n arkawal ən tassağ gər Məşşina əd tamattay-net. Azni wa ad inxəl fəl ad əgrəwan aytedan aggotnen təsureft ən bakkadan-nasan.

29 Əsilakanax-awan as a obazan xur əmərədda wər z'ələsa tessay n esmad n alxanab wa, iket wər d-ewed əzəl wa dağ z'aşwa wa aynayan nak dər-wan dağ Taymar ta n Abba-nin.»

30 Təzzar əssəggadan dağ təmmalen a d-əğmadnen Azzabur, as tanat-əxradan, əkkan adxax wa n Eşkan ən Zaytun.

Emel ən Yaysa ətəwəyya-net d ətəwənkər-net

31 Əhən tarrayt den da as dasan-inna Yaysa: «Ahad ada, ketnawan as dawan-z-əqqələx əssəbab n ad iwəliwəl əzəgzan-nawan, fəlas ənnan Əlkəttaban: "Ad əwətay amadan, iba-tu, təzzar wəziwəznat ayfad-net."

32 Mişan dəffər ətəwəsənkər-in dağ təmattant, a dawan-in-izarax s akal wa n Galilaya, əqqələx-awan dağ-as.»

33 İşşewal Butros, inn-as: «Kud iwəlawəl əzəgzan-nasan ketnasan dağ batu-nak, da wa-nin wər ilkem ad iwəlawəl.»

34 Inn-as Yaysa: «Əggəyyeğ silakanax-ak as ahad ada, as z'ayru əkəji ayora, təggədəx-i har karadat təklaten.»

35 Inn-as Butros: «Kud iqqal as ətəwənxa kərəz a za nugu nak dər-ək, da wər kay-z-əggəda.» Ənnan nəttulab ketnasan awen da.

Təwatray ən Yaysa dağ Gatsemanay

36 Ewad dər-san Yaysa afarag n eşkan ən zaytun as itawannu Gatsemanay, inn-asan: «Qamiwat əddi da, ad akkax edag en, ad aga şiwatriwen.»

37 İzzənkəz fall-asan Yaysa, iddew əd Butros, d əşşin meddan ən maddanəs ən Zabaday, təzzar əssəntan man-net ağşud, işşəwaş.

38 Den dağ a dasan-inna: «Awa əgan man-in dağ ağşud, əbukax a di-aba. Ad wər təfəlam da, ad nakəy nak dər-wan.»

39 Təzzar iga fall-asan arat n əzənkəz, issəjad, ittar, inna: «Abba-nin, kud immikkan adi təssəgəgəx-i təkabart ta n alxazab di! Dər iga awen da ya, wərgəx awa arex nak a itaggin, kalar awa tarex kay a z'agin.»

40 Dəffər awen iqqal-du Yaysa inəttulab-net win karad en, os-en-du ənsən. Inna i Butros: «Dağ adi indar-awan ad tagim alwaq iyyanda tokəyam nak dər-wan!

41 Akəyat, tansəyam Məşşina a kawan-oggazan dağ jarra-batan n İblis. Tidət as əñnəyat n aggadəm təsidaran igi n awa olaxan, mişan igdal-as rəkkəm ən təxəssa-net awen.»

⁴² Ilas əzənkəz fall-asan, ad itaggu šiwatriwen, inna: «Ya Abba-nin, kud wər t-illa əmmək as di-təxlay təkabart ta n alxazab di, kud ilzâm-i a tat-aşwa, wədi tagiwet tara-nak!»

⁴³ Ilas iqqal-in inəttulab-net win karad, ogaz-tan-in əqqâlan etəs, fəlas awa dasan-iga etəs daɣ iguz ab-as əfragan arra ən şittawen-nasan.

⁴⁴ Ilas ifal-tan, ikka den, iga təwatray-net ta n karadat, a daɣ inna arat wa inna dat awen.

⁴⁵ Dəffər awen iqqal-du inəttulab-net, inn-asan: «Kawanay harwa da tənsâm, təsanfim! Ənəyat! Alwaq ihoz-du wa daɣ za təwəgga daɣ fassan ən nasbakkadan nak Ag Aggadəm.

⁴⁶ Ənkərat-in əndawat! Ənəyat! Wa di-z-agin daɣ fassan, ewad-du.»

Ətərməs ən Ƴaysa

⁴⁷ İşşəwal harwa da, as d-ewad Yahuza, imosan iyyan daɣ nəttulab-net win maraw d əşşin, iddew əd təmmattay tagget a d-əssiglan muzaran ən limaman əd muzaran ən Kəl-Əlyəhud. Tamattay ten tewây şikabiwen əd təburəgen.

⁴⁸ Wa tu-z-agin daɣ fassan, imâl-asan alxalamat tas z'itəwəssən, inn-asan: «Wa zalamme daɣ meddan en, əssənət as ənta, tabəzam-tu.»

⁴⁹ Osa-du Yahuza ɣas, ihoz-in Ƴaysa, inn-as: «Ma təxlakay Əşşex?» Təzzar izalammət-tu.

⁵⁰ Inn-as Ƴaysa: «Əmidi-nin, arat wa kay d-ewayan, agay.» Təzzar ewadan-du, obazan Ƴaysa.

⁵¹ Amazay wen da a daɣ d-ilbay iyyan daɣ nəttulab ən Ƴaysa takoba-net, iwət sər-əs akli n Əlimam wa Zəwwəran, ifras-du təməzzuk-net.

⁵² Təzzar inn-as Ƴaysa: «Suxəl takoba-nak tətərut, fəlas aytedan kul win şaqqalnen əs takoba, takoba as z'ammatin.

⁵³ Wər tordeɣ as əfrəgax ad əgməya tilalt daɣ abba-nin assagl-i-du əmərədda a ogaran maraw gənan n angalosan d əşşin?»

⁵⁴ Mişan as iga adi, mas z'andu awa ənnan Əlkəttaban, a əmalnen as awa kul ilzâm ad andu s əmmək wa da?»

⁵⁵ Təzzar inna Ƴaysa i tamattay: «Mafel tosam-i-du tewâyam şikabiwen, əd təburəgen y a di-tabəzam, zun as təgmâyam əjajəb iyyan n abaydag? Nak wərgəx əzəl kul niɣama dər-wan daɣ Ahan wa Zəwwəran n Əlxibada, sasayra daɣ-as, amaran wər di-tobezam.

⁵⁶ Mişan əssənət as awa igan da ketnet iga fəl ad andu awa ənnan Əlkəttaban.» Den daɣ a t-əfalan nəttulab-net ketnasan, əddəggagan.

Təbadday ən Ƴaysa dat Asaggawar wa Zəwwəran

⁵⁷ Aytedan win obaznen Ƴaysa, ewayan-tu əs Kayif s ənta a imosan Əlimam wa Zəwwəran. Ənta a Ƴur əmmənyayan musanan n Əttawret, əd muzaran ən Kəl-Əlyəhud.

⁵⁸ Iga Butros i Ƴaysa ləkkum zagren, har ewad aƳalla n aƳaywan n Əlimam wa Zəwwəran, iggaz-tu, inaxama əd maşşaxalan, iswad y ad inəy awa z'agin.

⁵⁹ Ənkaran muzaran ən limaman, d Asaggawar wa Zəwwəran ketnet, ad gammayan awedan iqqalan təgəyya ən bahu fəl Ƴaysa, fəl ad əgrəwan tarrayt n igi ən man-net.

⁶⁰ Mişan şigəyyawen aggotnen ən bahu şin fall-as taggin da, ab-asan-du daƳ-asnat əddəlil issohen a fəl itawanxa. Xasil osanat-du təgəyyawen şiyad sanatat,

⁶¹ ənnanat: «Awedan wa a inna: "ƏfrâgaƳ əjəbbərəjji n Ahan wa Zəwwəran n Əlyibada ən Məşşina, ələsaq-qu akaras daƳ karad adan.»

⁶² Təzzar ibdad Əlimam wa Zəwwəran, inna i Ƴaysa: «Kay wər təganna wala daƳ təƳəttas şin dak-tawagginen da?»

⁶³ Mişan igla Ƴaysa iffista. İlas Əlimam wa Zəwwəran inn-as: «Əgmâya daƳ-ak dat Məşşina di İddaran, a danaƳ-təməla kud kay a imosan Əlməsix, Barar ən Məşşina wala.»

⁶⁴ Inn-as Ƴaysa: «Awalla kay iman-nak a innan adi. Amaran əmələƳ-awan as, a obazan Ƴur əməərədda, a di-tənəyam nak Ag Aggadəm, əqqima daƳ əƳil n Əməli ən Tarna, tənəyam-i deƳ əzaya-du, əwâra şigaraken a n jənnawan.»

⁶⁵ Təzzar izazzarrat Əlimam wa Zəwwəran takatkat-net fəl awa əgan man-net daƳ aƳşud, inna: «Aləs wa amadraw a iga i Məşşina. Awak ma nəkka i təgəyyawen şiyad? Wər təsəllim y əmadraw wa iga da?»

⁶⁶ Ma tənəm?» Ənnan-as ketnasan: «Aləs wa, əşşərixa-net təmattant.»

⁶⁷ Təzzar ad sutufan fəl udəm-net, əggâtan-tu, taqqasan-as,

⁶⁸ gannin-as: «Əlməsix, dad zamas kay ənnəbi, əməl-ana wa kay-iggatan!»

Şigget ən Butros Ƴaysa

⁶⁹ As itaggu awen, Butros iqqim dat ahan, daƳ aƳalla n aƳaywan wen. Təhoz-t-in təmaşşaxalt iyyat n aƳaywan en da, tənən-as: «Kay da, tətidaƳaƳ əd Ƴaysa wa n akal ən Galilaya.»

⁷⁰ Mişan iggad Butros awen dat aytedan kul, inna: «Wər əssenax almayna ən batu-nam.»

⁷¹ Təzzar idag Butros sa sər əmi n aɣaywan, tənay-tu təmaşşaxalt iyyat, tənna y aytedan win əllanen den: «Aləs wen, itidaw əd Ƴaysa wa n aɣrəm ən Nazaret.»

⁷² İlas iggad-tu ihad inna: «Wər əzdayax aləs wen.»

⁷³ As iga arat n amazay dəffər awen, əhozan-du meddan wıyyad əbdâdnen den, ənnan i Butros: «İllikan as kay da iyyan daɣ aytedan win daɣ den a təmosa, fəlas awal-nak da immûn.»

⁷⁴ Təzzar ad ihhad Butros igannu: «Məşşina ya təlɣânaɣ-i kud bahu a əgeɣ as wər əzdayax aləs wen.» Amazay wen daɣ ad iɣra əkəji aɣora.

⁷⁵ İkta-du Butros tənna ta das-iga Ƴaysa: «Dat taɣaray n əkəji aɣora, a di-tunkara har karadat taklaten.» Təzzar igmad sədi, ad ihallu fəl awa iga daɣ təməgraz.

27

İsuki wa iga Asaggawar wa Zəwwəran Ƴaysa Bilatəs

¹ As affaw aɣôra, immənay asaggawar ən muzaran ən limaman, əd muzaran ən Kəl-İlyəhud ketnasan, ad taggin şinaden daɣ batu ən Ƴaysa y a das-tətəwəxkəm təmattant.

² Əkradan-tu, ewayan-tu s ənaxkim Bilatəs.

İba ən Yahuza

³ Yahuza wa igan Ƴaysa daɣ fassan, as inay as Ƴaysa itawaxkam-as attadib ən təmattant, udanat daɣ-as təməgraz, eway-du karadat təmərwen ən tafelt n əzrəf şin igraw y tanat-issuɣal i muzaran ən limaman, əd muzaran ən Kəl-İlyəhud.

⁴ Inn-asan: «Nak əgeɣ abakkad. Awedan wər nəxşed wala, a əge daɣ fassan, y ad itəwənɣu!» Mişan ənnan-as: «Nakkanay wər nəzlay daɣ tədi! Batu tədi kay a təqqal!»

⁵ İgar Yahuza azrəf wen daɣ Ahan wa Zəwwəran n Əlɣibada, igla, išşolay iman-net aşək.

⁶ Əkkəmmen-du muzaran ən limaman azrəf wen, ənnan: «Əşşəriɣa-nana issixəram fall-ana igi n əzrəf wa daɣ əssənduq wa iha ərrəzəɣ n Ahan wa Zəwwəran n Əlɣibada, fəlas azrəf wa azni a d-igmad.»

⁷ Əgan şinaden, əzzənzən daɣ əzrəf wen tawagost as itawannu: «Tawagost n akanaw», y a tat-agin edag ən zəkwan n aytedan win wər ila akal.

⁸ Awen daɣ a fəlas tawagost ten, har azalada itawann-as: «Tawagost ta n əzni.»

⁹ Əmmək en daɣ as inda awal wa iga ənnəbi İrməya, as inna: «*Ədkalan-du karadat təmərwen ən tafelt, əmosnen əlqimat tas t-ədkadan maddanəs n İsrayil.*

¹⁰ *Ēzzənzən sər-əsnat tawagost ta n akanaw, s əmmək was di-omar Ēməli.*»

Tebadday ən Ƴaysa dat Bilatəs

¹¹ Itawasabdad Ƴaysa dat ənaxkim Bilatəs. Issəstan-tu ənaxkim, inn-as: «Awak kay daƷ a imosan əmənokal ən Kəl-Ēlyəhud?» Inn-as Ƴaysa: «Kay iman-nak as tənneƷ adi.»

¹² Mišan wər inna Ƴaysa wala daƷ batu ən lahanan win t-əssəwaran muzaran ən limaman əd muzaran ən Kəl-Ēlyəhud.

¹³ Təzzar inn-as Bilatəs: «Wər təsəlla i lahanan aggotnen win kay-əssəwaran aytedan win?»

¹⁴ Mišan wər das-inna Ƴaysa wala təfert iyyadda daƷ batuten šin. Arat wen isammaklal wəllen s ənaxkim.

¹⁵ Imos alƷadat n ənaxkim as id d-iƷlay əmud wa n Akkay ad ikkəs amaskasaw was tara tamattay agamad.

¹⁶ Azzaman en, ill-ay amaskasaw a fəl təƷa masnat, igân esəm Ƴaysa Baryabbas.

¹⁷ Təzzar inna Bilatəs y aytedan win əddewnen den: «Ma imos daƷ meddan win was taram a dawan-t-əkkəsə? Awak Baryabbas, me Ƴaysa was itawannu Ēlməsix?»

¹⁸ Bilatəs issân as aššaddat ən manzaƷ a fəl əƷan muzaran ən limaman Ƴaysa daƷ fassan.

¹⁹ Amazay wa daƷ iqqim Bilatəs daƷ adag wa n əššəriƷa den, ənta as sər-əs du-təzammazal taƷurəs tənn-as: «Aləs di oƷâd, ad wər təƷƷəza batu-net, fəlas əndod, ənâya daƷ targət alƷazab aggen fəl əddəlil-net.»

²⁰ Ēnkaran muzaran ən limaman, əd muzaran ən Kəl-Ēlyəhud, əssərđan tamattay s ad təƷməy ad itəwəkkəs Baryabbas, təwəkkəsən man daƷ Ƴaysa.

²¹ Iššewal ənaxkim, inn-asan: «Ma imos daƷ əššin meddan win di was taram ad t-əkkəsə?» Ēnnan-as: «Baryabbas.»

²² Inn-asan Bilatəs: «Ma z'aga za i Ƴaysa, was itawannu Ēlməsix?» Ēnnan-as ketnasan: «Itəwətəytəyet fəl təƷəttawt!»

²³ Mišan ya inn-asan ənaxkim: «Mafel za? Ma iƷšad?» Iqqal-asan awen as sahhaken imaslan-nasan wəllen, ənnan: «Itəwətəytəyet!»

²⁴ Inay Bilatəs as wər d-ixəssəl wala daƷ awen, amaran tənajarwayat tətittəy, idkal-du aman, iššorad sər-san ifassan-net dat tamattay, inna: «Nak ərruda daƷ əzni n aləs di. Batu tədi kawanay a təqqal!»

²⁵ Təjajjayat tamattay kul tənna: «İwəret-ana alxaƷ n əzni-net nakkanay əd bararan-nana!»

²⁶ Təzzar ikkas-asan-du Bilatəs Barğabbas, Үaysa amaran isassag-as tenaxay labasat s ələkkud, ikf-ay i sojitan y ad t-attaytayan.

Təmakakkayt ən sojitan day Үaysa

²⁷ Təzzar ewayan sojitan n ənaxkim Bilatəs Үaysa, əkkan dər-əs ammas n aҗarҗar n aҗalla n ahan wa n əşşəriҗa. Ёşşedawan-du sojitan kul win əllanen den, əҗalayҗalayan-tu.

²⁸ Ёkkasan day-as tabdoq-net, əssəlsan-tu əbərnuz igan təzuxay təsimaymayat zun wa lasan mənokalan, imos awen təhələlet day-as.

²⁹ Ёzdän təkəbbut zun ta n mənokalan təgat day şənnanan, əssəwaran-tat y aҗaf-net, əgan agabal ən telant day əfus-net wa n əxil. Təzzar a dat-əs tigərəffen, taggan day-as təmakakkayt, gannin-as: «Oyy-ik, əmənokal ən Kəl-Ёlyəhud!»

³⁰ A fall-as sutufan, tabazan-du agabal ən telant wen, əggatan sər-əs eҗaf-net.

³¹ Dəffər as day-as əyyəwanan igi ən təmakakkayt, əkkasan day-as əbərnuz wa t-əssəlsan den, əssoҗalan-tu isəlsa-net, ewayan-tu y ad itəwətəytəy.

Ёtəwətəytay ən Үaysa əd təmakakkayt ta day-as tətawaggat

³² Ёhân tarrayt as əmmənayan əd Simҗon, imosan aləs n aҗrəm ən Qərwan, şahhaşşalan-tu aggay ən təgəttawt ta fəl z'itəwətəytəy Үaysa.

³³ Ewadan edag as itawannu Golgota, almayna n awen «Edag wa n Təkəyya».

³⁴ Ёkfan-t-in esmad n aҗnanab irtâyan d eҗay. Iram-tan Үaysa, uҗay əs tassay-nasan.

³⁵ Dəffər as t-əttəytayan fəl təgəttawt, ad tuzanan şibədday-net əs təşəxeren.

³⁶ Təzzar əqqiman ewalan-tu.

³⁷ Ёşşolayan dənnəg aҗaf-net əsəllum, a fəl iktâb as: «Awa Үaysa WA N Ёmənokal ən Kəl-Ёlyəhud», imos awen arat isidaganan əddəlil wa fəl immut.

³⁸ Tawataytayan dagma-net əşşin meddan ən jujab ən baydagan. Iha iyyan aҗil-net, wa hadan zalgat-net.

³⁹ A day-as tajaban aytedan win tallamen den, taggin-as arak batuten,

⁴⁰ gannin: «Dew! Kay wərgəҗ tənneҗ təfragay əjəbbərəjji n Ahan wa Zəwwəran n Ёlyibada, təlasaqq- qu akaras day karad adan? Kud kay Barar ən Məşşina tassafsay iman-nak, tazzabbe-du təgəttawt di!»

41 Æmmæk en da as daḡ-as taggan muzaran ən limaman, əd musanan n Ættawret əd muzaran ən Kəl-Ëlyəhud tamakkakkayt əntanay da, gannin:

42 «Aləs wa isafsin aytedan, wər ifreg əsəfsi ən mannet! Kud ənta a imosan əmənokal n Israyil, azzabbatet-du təgəttawt ten! Æddi a sər-əs nəzzəgzən.

43 Iga attama-net daḡ Məššina. Ağəzet-tu Məššina əmərədda, kud ir-ay. Fəlas a inna: "Nak Barar ən Məššina a mosa."»

44 Ijujab ən baydagan win dagman-əs əttəytaynen, da əhân šin-net s əmmæk en da.

Iba ən Ƴaysa

45 Ælsanat šiyay akal ketnet, a obazan Ƴur ammasnazal, har dəffər tazzar.

46 Ƴur attayan ən tazzar, idkal Ƴaysa əməsli-net wəllen, inna: «Eli, Eli, lama sabaxtani?» Almaḡna n awen: "Æməlinin, Æməlinin, mafel toyyeḡ-i əd man-in?"

47 Æslan-as arat daḡ aytedan win əbdadnen den, ənnan: «Awen ənnəbi Ilyas a iyarru.»

48 Tarmad as ozal iyyan daḡ-san, idkal-du təduft, issəlmaq-qat daḡ esmad n aḡyanab ikkizbaran wəllen, ittat d əmi n alawag ən telant, izzal-t-in i Ƴaysa y ad ašəw.

49 Mišan ənkaran win hadatnen ad gannin: Ayy-ay, ad nəssən a d-asu Ilyas assafs-ay.

50 Amazay wen da, a daḡ ilas Ƴaysa ikus n əməsli issohen, əgmadan-tu man.

51 Assayət ten da a daḡ izzərrat əfər wa zəwwəran imosan anaxer gər adag wa zəddigan əd wa ogaran tazdak daḡ Ahan wa Zəwwəran n Ælḡibada, issərrat-du anaxer wen Ƴur afalla har eres. Inagaynagay amaḡal, ad tasarratnat təsäläten.

52 Ænnolaman zəkwan, ənkaran-du nəməttan aggotnen əmosnen inaybidan ən Məššina,

53 əgmadan-du izəkwan. Dəffər tanakra ən Ƴaysa, əggazan aḡrəm wa zəddigan ən Kəl-Ëlyəhud a t-imosan Yerusalem. Inəmməttan win den nifalalan y aytedan aggotnen.

54 As inay kabtan əd sojitan win ogazen Ƴaysa ənəgəynəgəy wa iga amaḡal, d aratan win əganen den, təggaz-tan tasa zəwwərat, ənnan: «Illikan as Barar ən Məššina awen!»

55 Ællanat tədoden aggotnen den, əbdadnen sədi, əswâdnat. Šidoden šin den harwa daḡ akal ən Galilaya ad əddewnat əd Ƴaysa əssânnat daḡ-as.

56 Təh-enat Maryama Madəl, əd Maryama ta n anna ən Yaquub əd Yusəf, d anna ən maddanəs ən Zabaday.

Ætawægga ən Ƴaysa day əzəkka

⁵⁷ Ill-ay aləs n əmæggergəs igân esəm Yusəf, n əxrəm n Arimatay, imosan iyyan day məzzəgzan əs Ƴaysa. Osa-du yur agadal ən təfuk,

⁵⁸ Ikka Bilatəs, igmay day-as tağəssa ən Ƴaysa. Təzzar omar Bilatəs s ad itəwəyyu Yusəf awəy tağəssa ən Ƴaysa.

⁵⁹ Idkal Yusəf tağəssa ten, ig-et day šifit təhossayat.

⁶⁰ Eway-tat, issəns-et day əzəkka aynayan imosan akazam isisaga i man-net. Təzzar isayğararad-du təhunt zəwwərat, ihar sər-əs imi n əzəkka, igla.

⁶¹ Təlla Maryama Madəl den, əd Maryama ta hadat, əqqimnat day tənəmiwəla n əzəkka wen.

Ætawigaz n əzəkka

⁶² As iga əzəl wa dəffər awen, imosan əzəl wa dəffər əsəmmutəg n əzəl wa n təsanfawt ən Kəl-Əlyəhud, əglan muzaran ən limaman, əd Fərisaytan, əkkan Bilatəs,

⁶³ ənnan-as: «Ya əmuzar, nəkittəw as anasbahu en harwa da iddar ad inna y aytedan: "Dəffər karad adan a du-təwəsankara day təmattant."

⁶⁴ Day adi amər s ad itəwigəz əzəkka wen har əzəl wa n karad, fəl a du-wər-asin nalkiman-net akəran tağəssanet, ad gannin y aytedan: "Itawasankar-du day təmattant." Bahu wa, as iga, ad agər wa azzaran.»

⁶⁵ Inn-asan Bilatəs: «Ənta əddi da! Idawat əd təsəgərt ən sojitan, təzəzzigəzam-tan əzəkka əs təməwit tas təram.»

⁶⁶ Təzzar əkkan əzəkka, əyfalənu-tu əğradan əzəzzəwi wəllen i təhunt ta tu-təharat, zəzzagazan-tu i sojitan wen den.

28*Tanakra ən Ƴaysa day təmattant**Əzəkka wər tu-təha təğəssa ən Ƴaysa*

¹ Dəffər as okay əzəl wa n təsanfawt ən Kəl-Əlyəhud, affaw ağora n alxad, təgla Maryama Madəl, əd Maryama ta hadat, y a d-ənəynat əzəkka.

² Ihin-in amaḍal iga ənəgəynəgəy issohen fəlas iyyan day angalosan n Əməli a d-izzabbe day jənnawan, ihoz-in əzəkka, isayğararad təhunt zəwwərat ta tu-təharat, iqqim fall-as.

³ İla azzahir a n essam, təga tabdoq-net təməllay təsiraqqet.

⁴ Təga taysəst day sojitan win ogaznen əzəkka, fəl awa dasan-təga tasa day iguz, zun tan-əgmādan man.

⁵ Işşewal angalos, inna i tədoden şin din-osanen əzəkka wen: «Kamatay a kamat-wər-təggəz tasa, fəlas əssanay as Ƴaysa as təsaggadmat wa itawataytayan fəl təgəttawt.

⁶ Wər illa da, fəlas itawasankar-du day təmattant s əmmək was imal awen. Aglimat-du ad tənəymat edag was kala a day-as tənsa təxəssa-net,

⁷ taglimat tarmad təməlmət i nəttulab-net as itawasankar-du day təmattant. Azzar-asan-in əs Galilaya. Den da a tu-za-tənəyam. Adi da as are a dakmat-t-anna.»

Əmənəy ən tədoden əd Ƴaysa dəffər tanakra-net

⁸ Əfalnat əzəkka tarmad, təh-enat tasa, mişan ya əfilawasnat wəllen, ozalnat əganat isalan i nəttulab-net.

⁹ Əglānat den da, as əmmənəynat əd Ƴaysa, inn-asnat: «Ma təxlakmat.» Əhoznat-t-in, gabarratnat idaran-net, əssəjadnat-as.

¹⁰ Təzzar inn-asnat Ƴaysa: «A kamat-wər-təggəz tasa! Aglimat tannimat i mədrayan-in, ad akkin Galilaya. Den day a di-z-ənəyan.»

Arat was ənnan sojitan ənāyan-tu əd tanat ta əgan muzaran ən Kəl-Əlyəhud

¹¹ Harwada əhānat tarrayt, as d-ewadan arat day sojitan win ogaznen əzəkka ayrəm, əssoyalan i muzaran ən limaman awa igan ketnet.

¹² Təzzar əmmənəyan muzaran ən limaman, əd muzaran ən Kəl-Əlyəhud, əgan şinaden, əkfan sojitan win azrəf aggen.

¹³ Ənnan-asan: «Anniwat: "Inəttulab-net a d-osanen ehad, nənsa, okaran təxəssa-net."»

¹⁴ As isla ənaxkim Bilatəs arat wa, a tu-nəsassagru awa imos, taqqamim da wər kawan-igrew wala.»

¹⁵ Ədkalan sojitan azrəf, əmmožalan s arat wa dasan-itawannan den. Əlqissat ta tawazawaz day Kəl-Əlyəhud, amaran har azalada suxulan-tat.

Əlməsix əd nəttulab-net dəffər tanakra-net day təmattant

Ənəməğraw ən Ƴaysa əd nəttulab-net win maraw d iyyan day Galilaya

¹⁶ Əglan nəttulab win maraw d iyyan, əkkan Galilaya, əggəzzayan adxay wa dər tan-isannamawal Ƴaysa.

¹⁷ As ənəyan Ƴaysa, əssəjadan-as. Mişan wiyyad day-san əgan day-as aşşak.

Awa issəwar Ƴaysa inəttulab-net

¹⁸ Təzzar ihoz-tan-in Ƴaysa, iššewal-asan, inna: «Tiwakfa taɣmar kul daɣ jənnawan, tiwakfaq-qat deɣ fəl amaɗal:

¹⁹ Daɣ adi agliwat, takkim šimattiwen kul n əddənet tagim-tanat inalkiman-in. Salməɣat-tan daɣ aman s esəm n Abba, əd Barar, d Infas wa Zəddigan.

²⁰ Sassaxriwat-tan ləkkum y aratan kul win as kawanomara. Nak amaran əssənət as əlle ɣur-wan faw, har əɣrud n əddənet.»

Ēlinjil wa n Markus Ēsəmmutəg y əššəxəl ən Ƴaysa

Isalan win iga ənnəbi Yaxya

¹ Ēnta da təsəntit n Ēlinjil ən Ƴaysa Ēlməsix, Barar ən Məššina.

² Ēnta en da a fəl inna ənnəbi Isayas daḡ əlkəttab-net: «*Ēnəy za a dat-ək assaḡlay anammazul-in a z'aknin tarraytnak.*»

³ *Idkāl əməsli-net daḡ əsuf igannu: "Səmmutəgat abaraqqa y Ēməli! Təsəssiḡədam tarrayen dat-əs!"*

⁴ Adi da a fəl d-osa Yaxya, iggaz əsuf ad itaggu y aytedan təlxtubat, igann-asan ad təwəsəlməḡan daḡ aman imos awen arat issiknan tətubt-nasan, fəl ad əgrəwan təsurreft ən bakkadan-nasan.

⁵ A t-in-tasin aytedan aggotnen a din-gammadnen akal ketnet wa n Yahudəyya d aytedan kul n əḡrəm wa n Yerusalam. Ētutaban daḡ bakkadan-nasan dat tamattay, isalmaḡ-qan daḡ aman daḡ aḡarew was itawannu Ƴordan.

⁶ As itaggu awen izlāḡ Yaxya asalsaw igān s anzadan n əmnəs, otāb s əsatəb n aḡašek. Iddār s əjwalan əd turawat.

⁷ Itaggu təlxtubat, igannu i tamattay:

"A dəffər-i d-asu aləs
s awa di-iga daḡ šigrat,
wər eweda wala enez
y ad ara i suḡan ən ḡateman-net.

⁸ Nak, aman a daḡ-qawan salmaḡa,
mišan ənta Infas Wa Zəddigan
a daḡ-qawan z'issəlməḡ."

Ētəwəsəlməḡ ən Ƴaysa daḡ aman d ətəwəjərrab-net

⁹ Adan en da a daḡ d-osa Ƴaysa, igmād-du Nazaret təmosat təḡrəmt tēhāt akal ən Galilaya. Ikka edag wa daḡ isalmaḡ Yaxya aytedan daḡ aḡarew wa n Ƴordan, issəlməḡ-qu Yaxya.

¹⁰ Igməd-du Ƴaysa aman ḡas ogga ijənnawan as ənnolaman, izzəbbat-du fall-as Infas wa Zəddigan, iha šaššelan ən tədabert.

¹¹ Igməd-du əməsli ijənnawan, inna: «Kay a imosan Barar-in əkneḡ tara, təssinda-du aḡna-nin.»

¹² Tamazayt tenda a daḡ issoka Infas wa Zəddigan Ƴaysa taneray.

¹³ Iga daḡ-as əkkozat təmərwen n əzəl, itajarrab-tu Iblis. Itinəmərzig əd wəxsan, əssānan daḡ-as angalosan.

Æššəxəl ən Ƴaysa daƷ akal ən Galilaya əd xələyyələyan-net

Iguz ən Ƴaysa akal ən Galilaya

¹⁴ Dəffər ətərməs ən Yaxya wa isalmaƷan aytedan daƷ aman, ad ikka Ƴaysa akal ən Galilaya, a daƷ-as immal əmazal wa d-ifalan Məššina.

¹⁵ Igannu i tamattay: "Təmastant tənda, TaƷmar ta n Məššina təhōz. Utabat, təzzəgənam s Əlinjil."

Inəttulab win azzarnen ən Ƴaysa

¹⁶ Əzəl iyyan illil Ƴaysa tagadamayt n agaraw wa n Galilaya as ogga SimƷon d amadray-net Andrawəs, fattawan daƷ agaraw sangaytan-nasan win as tabazan kifitan, fəlas inabazan ən kifitan a əmosan.

¹⁷ Inn-asan Ƴaysa: "Əlkəmat-i, a kawan-aga meddan sər-i du-za-tawaynen aytedan y a tan-assafsa daƷ bakkadan-nasan."

¹⁸ Oyyan sangaytan-nasan daƷ tamazayt ten da, əlkaman-as.

¹⁹ Iga Ƴaysa y adag en arat n akkay, inay Yaqub d amadray-net Yaxya win maddanəs ən Zabaday, əntanay da əhân aƷlal n aman; kannin sangaytan-nasan win as tabazan kifitan.

²⁰ IƷr-en-du daƷ amazay wen da. Oyyan abba-nasan Zabaday əd maššaxalan-net daƷ əƷlal, əlkaman i Ƴaysa.

ƏsəssəƷri ən Ƴaysa daƷ Kafarnahum

²¹ Ikka Ƴaysa əd nəttulab-net taƷrəmt təgât Kafarnahum. Ewad-du əzəl wa n təsanfawt Ʒas, iggaz Ƴaysa ehan n əlxibada ən Kəl-Əlyəhud, a daƷ-as isasaƷru.

²² Isammaklal əs tamattay əmmək was itaggu əsəssəƷri-net, fəlas ig-asan əsəssəƷri n awedan ilân tanaya wər əlen musanan n Əttawret.

²³ Wala a ihogan idkal aləs iyyan iha aggəsuf əməsli-net daƷ ahan n əlxibada ad igannu:

²⁴ "Ma daƷ-na tareƷ, Ƴaysa wa n Nazaret? Əngəm assa a du-təgeƷ y a danaƷ-təhləka? ƏssânaƷ awa təmosa: Kay a imosan Əmizdag wa d-izammazal Məššina".

²⁵ Iharašsat-tu Ƴaysa, inn-as: "Fastu, təgmədaƷ aləs di!"

²⁶ Təzzar izazzakarkar aggəsuf aləs en, izyak, igmad-tu.

²⁷ Əhagan aytedan ketnasan ad tinəmənnin gər-essan: "Ma imos awa? Ma təmos masnat ta wər nəzday a, təddewat əd tanaya! Awedan wa, wala kələsuf əttâfan tənna-net".

²⁸ Tarmad as təwazawaz sallat ən Ƴaysa daƷ Galilaya ketnet.

Əzuzəy ən Ƴaysa aytedan aggotnen

29 Igmad-du Ƴaysa ehan n əlyibada ən Kəl-Əlyəhud Ƴas, ikka ehan ən Simxon d Andrawəs iddew əd Ƴaqub əd Ƴaxya.

30 As itaggu awen tədaggalt ən Simxon təzizalallat-tat tanaday. Os-in Ƴaysa Ƴas təttəmal-as.

31 Təzzar os-et-in, ibaz əfus-net, issəbdad-tat, təwat fall-as tanaday, a tan-təsiməgurit.

32 As tuda təfuk, a sər-əs du-tamawayan aytedan kul win ərinnen əd win əhan kələsuf.

33 Iddew-du əxrəm ketnet dat əmi n ahan wen.

34 Izzozay Ƴaysa aytedan aggotnen əgrawnat təwərnawen wər nola, ikkas dəx dəx wiyyad kələsuf aggotnen. Amaran igaddal i kələsuf en emel n awa imos, id masnat a əgan as ənta a imosan Əlməsix.

Emel ən Ƴaysa Əlinjil dəx Galilaya

35 Əzəl wa hadan, inkar-du Ƴaysa datazal, igmad, ikka edag issufan ad itattar.

36 Dəffər awen, igla Simxon d aytedan win Ƴur-əs əllanen, a das-saggadan.

37 As t-in-osan, ənnan-as: «Aytedan kul saggadan-ak.»

38 Təzzar inn-asan Ƴaysa: "Akkiwat-ana šiƳarmaten šin dana-ƳalayƳalaynen, a dəx-asnat aga təlxutbat əntanatay da, fəlas adi da a fəl d-əmmoza."

39 Illil Ƴaysa akal ən Galilaya ketnet, itaggu təlxutbat dəx nan n əlyibada ən Kəl-Əlyəhud, itakkas dəx kələsuf dəx aytedan.

Əzuzəy ən Ƴaysa aləs igrâw kətru

40 Osa-du awedan iyyan təgraw təwərna ən kətru, igarafat dat Ƴaysa, onsay-tu, inn-as: «As tarex adi, təfrâgəx a di-təzzuzəyəx, izdaga.»

41 Ihanattat-as Ƴaysa. Izzal-in əfus-net, idas-tu, inn-as: "Arey adi, əzzəy tizdaga."

42 Izzay awedan wen dəx tamazayt ten da, zəddig.

43-44 Issəllam-tu alwaq wen da, dəffər as das-irxâm wəllen inn-as: «Ənəy za, ad wər təməla y awedan waliyyan arat wa igan da, amaran aglu tassaknaş iman-nak y əlimam, taga takutay ən tazdak ta kay-issəwar əşşərixa n ənnəbi Musa, ad iqqəl adi y aytedan təgəyya ən təməzzəyt-nak.»

45 Mišan igla aləs en Ƴas, iggaz šin əzəwwəziwəz ən salan n awa igan, har ab'as ifrag Ƴaysa iguz n əxrəm hannayan-tu aytedan. Awen dəx a fəl iggaz əsuf a dəx-as t-in-tasin aytedan, a sər-əs du-gammadnen šisədag kul.

2

Əməstan ən Ƴaysa əd musanan n Əttawret

Ɛməstan day batu ən təsureft ən bakkadan

¹ Adan dəffər awen, iqqal Ƴaysa aɣrəm ən Kafarnahum. Ɛslan aytedan as iha ehan wa daɣ isaggan ɣas,

² əkkan-t-idu s igət, har as ab'as t-iha adag, wala ɣas dat əmi n ahan. A dasan-itaggu təlxutbat.

³ Itaggu təlxutbat da da, as das-d-immeway anabdon misawayan meddan əkkoz.

⁴ Mišan orn-asan a t-in-awədan fəl igət n aytedan. Ɛwaran afalla ən taɣazamt, əftayan əsəfəl daɣ tənəmiwəla n adag wa iha Ƴaysa. Təzzar əssərasan-du anabdon wa daɣ təxərəbbet ta əgan den, izilallat daɣ təssut-net.

⁵ As inay Ƴaysa əzəgzan-nasan, inna y anabdon wen: "Barar-in, ibakkadan-nak tiwasarafan-ak."

⁶ Awen as itag əqqıman arat daɣ musanan n Ɛttawret. Ɛslan y awa inna Ƴaysa da ɣas ad tihənzəmme daɣ man-nasan gannin:

⁷ «Wa aləs ma t-issəhalan igi n awal wa? Arat wa, əmadraw. Ma ifragan əsurəf ən bakkadan ar Məşşina ɣas?»

⁸ Issan Ƴaysa daɣ tamazayt tenda awa samadranan, təzzar inn-asan: «Mafəl tətihənzəmmem adi daɣ wallan-nawan?»

⁹ Ma ogaran tərɣəsəy gər ad tanna y anabdon: "Tiwasarafan-ak bakkadan-nak", meɣ ak a das-tanna: "Ɛbdəd, tədkəla təssut-nak, təcəwenke?"

¹⁰ Amaran, areɣ ad təssənam as nak Ag Aggadəm əley daɣ əddənet tanaya a di-təşışawadat ad əssurəfa y awədan ibakkadan-net.» Təzzar inna Ƴaysa y anabdon:

¹¹ «Ɛbdəd, tədkəla təssut-nak, takkaɣ aɣaywan-nak.»

¹² İbdad aləs wen tamazayt ten da, idkal təssut-net. İgmad əswədan daɣ-as aytedan kul, isimaklal sər-san awen, əmməlan Məşşina gannan: «Wər kala ad nənay arat şilat ən wa.»

Ɛməstan day batu ən tədrəwt əd nasbakkadan

¹³ İgmad Ƴaysa aɣrəm, ilas tewaɣlay ən tagadamayt n agaraw wa n Galilaya. A t-in-tasin aytedan s igət, isasaɣr-en.

¹⁴ İjiwankat as inay aləs iyyan igân esəm Lebi ag Alfay iqqim daɣ adag n əşşəɣəl-net imosan əzərzəm n əzrəf ən takəsən, inn-as Ƴaysa: "Ɛlkəm-i." İbdad Lebi ilkam-as.

¹⁵ İnnəftay Ƴaysa i Lebi. İdraw Ƴaysa ənta əd nəttulab-net d aytedan aggotnen ən nəzzərzəm ən takəsən əd nasbakkadan. Aytedan şilat ən win, əggətan win lakkammen i Ƴaysa.

¹⁶ As ənayan musanan n Ɛttawret ən taggayt ta n Fərisaytan Ƴaysa idrâw əd nasbakkadan əd nəzzərzəm ən

takäsen, önnan i nöttulab-net: "Mafäl idarraw ölföqqi-nawan öd nөzzөrzam ön takäsen öd nasbakkadan?"

¹⁷ Isl-asan Үaysa, inn-asan: «Aytedan win wөр nөla әҗәli, wөр әddәрaran s anasmagal, imiranana a sөр-әs әddәрarnen. Nak wөр d-әmmozala s aytedan win җur iga as oҗädan, kalar inasbakkadan as d-әmmozala y a tan-d-aҗra әqqölan inalkiman-in.»

Әmөstan daҗ batu n әzum

¹⁸ Ezäl iyyan ad әzuman nöttulab ön Yaxya öd win Farisaytan, osan-du aytedan wiyyad Үaysa, önnan-as: «Mafäl tuzaman nöttulab ön Yaxya öd win Farisaytan, amaran win-nak wөр tuzaman?»

¹⁹ Inn-asan Үaysa: «Mänөmmөk as z'aklin lagatana a җur illa әmazlay әs mawan-nasan? Kalar iket illa җur-san wөр z'aklin әs mawan-nasan.

²⁰ Mišan ilkäm ezäl a җur-san z'ammadkal әmazlay, ezäl wәdi amaran ad uzaman.

²¹ Wөр t-illa i z'iwөtan daҗ tabdoq waššarat šikөst taynat. As iga adi, ad tөkөwөnzөz šikөst tәdi, tәššit-tu tabdoq ten azarru wөllen.

²² Wөр t-illa deҗ i z'agin esmad n әzzәbib aynayan daҗ gәdad. Fөlas as iga adi, ad ukafan abbaqqen, affatu daҗ esmad wәdi, igәdad deҗ әxsөdan. Kalar esmad n әzzәbib wa aynayan ibәyaҗ aynaynen a daҗ itawaggu.»

Әmөstan daҗ batu n әzәl wa n Әssәbөt imosan әzәl ön tәsanfawt

²³ Ezäl iyyan ön tәsanfawt ön Kәl-Әlyәhud, ijiwankat Үaysa өnta öd nöttulab-net daҗ tөwөgas n alkama. Ji-wanken nöttulab-net rassaban-du šiyaxanen, tattin-tanat.

²⁴ Tөzzar sassagran-in Farisaytan Үaysa awen, önnan-as: "Әnak awa taggin nöttulab-nak! Mafel taggin arat xarâman daҗ әzәl wa n tәsanfawt?"

²⁵ Inn-asan: «Ak teҗaray a wөр tәgem awa iga әnnөbi Dawәd assaxa wad imaxatar, tөzzar iggaz-tu gәlөk өnta öd midawan-net?

²⁶ Awak wөrgеҗ iguz a iga ehan ön Mөššina daҗ azzaman win daҗ imos Abiyatar Әlimam wa Zөwwөran, tөzzar itša daҗ tәgәlwen šin әmosnen takutay tәskätat i Mөššina, әs limaman җas as tәxalal tattay-nasnat? Fadda ikfa daҗ-asnat imidawan-net.»

²⁷ Inn-asan deҗ: «Aggadөm wөrgеҗ өnta a d-itawaxlakan fәl әddәlil n әssәbөt, kalar әssәbөt a du-tөtawaxlakat fәl tөnfа n aggadөm.

²⁸ Daҗ adi nak Ag Aggadөm a ixkaman fәl әzәl wa n tәsanfawt.»

3

Æmæstan daƷ batu n æzuzæy iga Ʒaysa daƷ æzæl æn tæsanfawt

¹ Ilaſ Ʒaysa iguz n ahan n ælƷibada æn Kæl-Ælyæhud wa n Kafarnahum. Illa alæs den as immût æfus-net.

² Tæzzar ægaran daƷ-as Farisaytan ſittawen y ad æssænan kud ad izzuzæy awedan daƷ æzæl wa n tæsanfawt fæl ad t-æxtæsan s awen.

³ Inna Ʒaysa y alæs was immût æfus-net da: «Ænkær, æbdæd daƷ ammas n æljæmaƷat.»

⁴ Amaran inna y æljæmaƷat: «Awak daƷ awa inna Ættawret æzæl wa n tæsanfawt igi n arat olâƷan a daƷ-as xalalan, meƷ ak igi æn wa wær nolæƷ? Awak ereƷ n awedan daƷ tæmattant, meƷ ak ſiyyit-net ihlæk?» Wær tan-ihæ i daſ-innân arat.

⁵ Iſſælal-tan Ʒaysa asawad-net ih-ay alham, tæƷſâd taƷart ta ægan wallan-nasan iman-net wællen. Tæzzar inna y alæs wen: «Æzzæl æfus-nak.» Izzal-tu, izzay iqqal æmmæk-net.

⁶ Ægmadan Farisaytan Ʒas, ækkan arat daƷ aytedan æn Herod, wa n æn æmænokal æn Galilaya, a dær-san tinæmæſæwwiran fæl tæmæwit tas z'agin iman æn Ʒaysa.

Tosa-du tamattay tagget Ʒaysa

⁷ Iddew Ʒaysa æd nættulab-net, ikka tæƷadamayt n agaraw wa n Galilaya. Tæddew dær-æs tamattay tagget, s iyyat akal æn Galilaya a du-tæƷmad, iyyat akal wa n Yahudæyya,

⁸ iyyat aƷræm æn Yerusalem, iyyat akal n Adumay æd mædlan win æwarnen aganna wen sen n agarew wa n Yordan, iyyat imædlan win æhoznen aƷræm æn Tir æd wa n Sidon a du-tæƷmad. Aytedan win kul, tesalay n aratan win itaggu Ʒaysa a tan-du-tewayat.

⁹ Awa tæƷa tamattay daƷ igæt, inna Ʒaysa i nættulab-net a daſ-sæmmutægan aƷlal n aman y a t-iggæz as tu-tæſas tamattay.

¹⁰ Fælaſ izzozay daƷ-san aytedan aggotnen, eway-du awen as fall-as tanabdaƷan aytedan kul win ærinnen, gammayan d ades-net.

¹¹ Amaran aytedan win æhan kælæſuf, æntanay id ænayan Ʒaysa a daſ-æſſæjædan, zayyakan gannin: «Kay a imosan Barar æn Mæſſina,»

¹² miſan iraqam-asan Ʒaysa wællen fæl amel n awa imos.

Æſænnæfræn æn Ʒaysa maraw d æſſin daƷ nættulab-net

¹³ Ikka Ʒaysa afalla n adƷaƷ iyyan, iƷr-in meddan win æhanen agna-net, oſan-t-in.

¹⁴ Isannafran daḡ-san maraw d əššin win dər z'itidaw, igasan esəm inəmmuzal. Isinafran-tan deḡ y ad əmmâlan Isalan n Əlinjil;

¹⁵ ikf-en deḡ tarna n ikus ən kələsuf daḡ aytedan.

¹⁶ Əntanay əddi ismawan ən maraw meddan d əššin win isannafran: Simḡon was iga esəm Butros,

¹⁷ əd Yaḡub d amadray-net Yaxya win maddanəs ən Zabaday, win as iga esəm Bohanargas, almayna n adi: Maddanəs ən teqqaḡ;

¹⁸ d Andrawəs əd Filibus əd Bartulamawəs əd Matta əd Tuma əd Yaḡub wa n ag Alfay, əd Tadday əd Simḡon was itawannu wa Isaggatakken,

¹⁹ əd Yahuza Isxarəyuti was ənta a z'isəttərməsan Ḡaysa.

Iduf wa əgan aytedan wəyyad daḡ Ḡaysa

²⁰ Dəffər awen, iqqal-du Ḡaysa ehan wa daḡ issəgan daḡ Kafarnahum. Təlas fall-as tamattay tiddawt s awa təga daḡ igət, ab'as wala alwaḡ a daḡ igraw əs tattay ənta əd nəttulab-net.

²¹ Əslan marwan-net awen, əkkan-t-idu y ad t-əbəzan, aglin dər-əs fəlas gannin: «Awa arat a t-immaran.»

²² Əggadan-du musanan n Əttawret wiyyad a d-əgmadnen Yerusalām, ad gannin: «Awa Aššaytan Baḡalzabul, wa n əmənokal ən kələsuf a t-ihan, ənta a t-ikfan fərregat n ikus ən kələsuf daḡ aytedan.»

²³ Təzzar iḡr-en-du Ḡaysa, igasan tangalt a daḡ dasaninnâ: «Manəmmək as z'ikkəs Aššaytan daḡ aytedan kələsuf-net s ənta as əlkaman?»

²⁴ Taḡmar tas əmməgaran məssawəs gar-essan, tədi əbərəjji a za tagu.

²⁵ Aḡaywan iyyanda deḡ as əmməzrayan məssawəs, wədi əbərəjji a z'agu.

²⁶ Zun d əmmək di daḡ as, kud Aššaytan iman-net a dər imməgar, wədi taḡmar-net wər za tihag. Əbərəjji a za tagu, təyrəd.

²⁷ Awalla wər t-illa i ifrâgan iguz n ahan n aləs n əməqqerəd, iḡrəd aqqa ən təla-net, ar s ad t-ikrâd təzzar. Dəffər as t-ikrâd amaran ad z'ifrəg ad iḡrəd aqqa ən təla-net.

²⁸ Əggəyyeḡ əsilakanax-awan as, wər t-illa abakkad d alfawaxiḡ as wər ifrəg Məššina a t-issurəf y awedan

²⁹ ar alfawaxiḡ imosan ikus ən tarna y Infas wa Zəddigan, fəlas abakkad adi iḡallalan fəl awedan.»

³⁰ Batu ta ig-asan-tat Ḡaysa fəlas tənna a taggin: «Ih-ay aggəsuf.»

Anna əd mədrayan ən Ḡaysa win tidət

³¹ Tosa-du anna ən Ƴaysa əd mədrayan-net, əbdadan dat əmi n ahan, zammazalan sər-əs awedan y a dasan-t-id-aǵru.

³² Təqqim tamattay tagget ǵur Ƴaysa, təǵilayǵalay-tu as das-itawanna: «Təbdâd-ak anna-nak əd mədrayan-nak dat ahan, sastanan dər-ək.»

³³ Inna Ƴaysa: «Ma imosan za anna-nin, ma imosan imədrayan-in?»

³⁴ Təzzar issəlal asawad-net tamattay ta ǵur-əs təqqimat da təǵilayǵalay-tu, inna: «Əntanay da da anna-nin əd mədrayan-in,

³⁵ fəlas awedan kul wa itamazalan tara ən Məššina, ənta a imosan amadray-nin, madeǵ təmadrayt-in, madeǵ anna-nin.»

4

Igi ən Ƴaysa əlmitalan aggotnen əmmigradnen əs Taymar ta n Məššina

Əlmital wa n əmagyak

¹ İlas Ƴaysa tewaxlay ən təgadamayt n agaraw wa n Galilaya, ad isasaxru aytedan. Təddew-du fall-as tamattay tagget, har as iggaz aǵlal n aman a d-ihân imi n agaraw da da, iqqim daǵ-as. Tamattay amaran ketnet təqqim-du təbdâd daǵ əsəlim n agaraw.

² A tat-isasaxru aratan aggotnen s əlmitalan. Inn-asan daǵ əsəssəǵri-net:

³ «Səsəmat! Əmagyak iyyan a iglan y ad inbəl tawagost-net.

⁴ Daǵ anabal wa itaggu den imosan anabas n amasa, ərtaknat təblalen šiyyad fəl tama ən tarrayt, osan-du gədad ətšan-tanat.

⁵ Ərtaknat šiyyad daǵ amaǵal əhanat təhun. İdwal-du amasa wen tarmad fəlas wər illa daw-əs amaǵal aggen daǵ əglan kewan,

⁶ mišan as təggəzzay təfuk, illəsway, iqqur fəlas wər iha amaǵal a daǵ in z'ugagan kewan-net.

⁷ Šiyyad ərtaknat daǵ təfəssaǵ. Ədwalnat təfəssaǵ šin, əlmaznat amasa wa d-idwalan den, igdal-asnat awen ara.

⁸ Mišan ya arat daǵ təblalen en irtak daǵ amaǵal olaǵan. İgmad-du, idwal, iga šiǵaxanen. Šiǵaxanen-net šiyyad akkiyyat əhanat-tat karadat təmərwen ən təblalt. Šiyyad sədisat təmərwen, šiyyad temeday.»

⁹ Dəffər awen inn-asan Ƴaysa: «Wa isallin, issəsəmet.»

Əssiran win əqqalnen Taymar ta n Məššina

¹⁰ As tēfal tamattay Ƴaysa, ənkaran-du nēttulab-net win maraw d əššin d aytedan wiyyad a dər-əs tidawnen, əssəstanan-tu d almaɣna n əlmitalan win itaggu.

¹¹ Inn-asan: «Kawanay təgrāwam masnat daɣ əssiran ən Taɣmar ta n Məššina, mišan aytedan win hadatnen arat kul tangalen as dasan-itatamal.

¹² *Adi a d-ewayan as əswādan, mišan wər hənnəyan, əssisaman, mišan wər gərrin. Id ənnar wər iga adi, utaban, təwəsürəfan-asan bakkadan-nasan.»*

Almaɣna n əlmital wa n əmagyak

¹³ Inn-asan deɣ: «Awak əgərri a wər təgem wa daɣ əlmital? Daɣ adi manəmmək as za tagrim əlmitalan win hadatnen?

¹⁴ Əmagyak wa n ihogan, əlmital a imos n awedan immalan awal ən Məššina y aytedan.

¹⁵ Amasa wa irtakan fəl tama ən tarrayt, əlmital a imos n aytedan win əslanen y awal ən Məššina mišan a d-asu Aššaytan den da ikkəs-tu daɣ wallan-nasan.

¹⁶ Amasa wa irtakan daɣ amaɗal əhanat təhun, əlmital a imos n aytedan win as, as əslan y awal ən Məššina ad t-əqbalan əddi da əs man filawasnen,

¹⁷ mišan wər ila awen ekay. Aytedan win wər əmosan ar məssawəsan ən təmazayen. Igda ɣas a tu-təməl təssust, madeɣ təddəguzt təgât fəl əddəlil n Awal ən Məššina, ad ayyin əzəgzan əddi da.

¹⁸ Amasa wa irtakan daɣ təfəssaɣ, əlmital a imos n aytedan win əslanen y Awal ən Məššina,

¹⁹ mišan aššawašatan n əddənət, d adakal wa təga təgərgist n əddənət taytwen-nasan, d ark deranan wiyyad aggotnen, əssəfalan-du dənnəg Awal wen, igdal-as awen a d-awəy tənfa.

²⁰ Amasa wa irtakan amaran daɣ amaɗal olaɣan, əlmital a imos n aytedan win as, as əslan y Awal ən Məššina, a sər-əs əzzəgzənan, iqqəl-asan tənfa, təmosat karadat təmərwen n ənətfus, iyyat təqqəl sədisat təmərwen, iyyat amaran təqqəl temeday.»

Səsəmat s əlluy

²¹ Inn-asan Ƴaysa deɣ: «Awak fətəla təryât idakkal-tat awedan ag-et daw əɣəzu madeɣ daw tessat? Wərgex ətəwəsəwar a tətawaggu edag ihhoken?

²² Wər t-illa a iɣbāran, wər za nənəfiləl; wala iyyan imosan əssir, wər za naffaggu.

²³ Wa isallin, aslet!»

²⁴ Inn-asan dey: «Taggat əsəsəm olâxan y əmazal wa d-ifalan Məşşina! Təsəkət tas təkkatam y aytedan ənta as dawan-z-ikət Məşşina, išşit-awan dey fall-as.

²⁵ Fəlas wa ilan, a das-itəwəşitu awa ila; wa wər nəla amaran, arat n awa ila da a dağ-as attarmas.»

Əlmital wa n tadwala n amasa

²⁶ Inn-asan dey: «Tağmar ta n Məşşina təha əlmital n awedan inbâlan amasa dağ tawagost-net.

²⁷ Gər z'insâ wala okây, gər z'ehad wala ezal; amasa wədi a d-igməd, ad idaggal. Wər issen məşşis əmmək was d-igmad wala was idaggal,

²⁸ fəlas amaḍal, gar-es əd man-net as d-itakkas tənfa. Yel a d-itizaran agamad, dəffər awen agu şixaxanen, amaran ədwəlnat-du dağ-asnat təblalen.

²⁹ Təḥḥâ təbzəst ɣas, idkâl-du məşşis əlmoşi, assantu dağ allay-net; fəlas tamert n allay a təgat.»

Əlmital wa n amasa nannabat igân esəm mutard

³⁰ Dəffər awen inn-asan Ƴaysa: «Mas za nammattal Tağmar ta n Məşşina? Ma imos əlmital wa tat-isassagran?

³¹ Tağmar za ta n Məşşina təha əlmital n amasa n annabat igân esəm mutard ogaran imasan kul təmmədrəyt.

³² Mişan dər iga awen da, as itawanbal, ad idwəl, agər annabatan kul win nebəlan təzzəgrət. Agu izəlan əgânen təzzəgrət ta n as a dağ-san agin gəḍad şisəllula.»

³³ Əlmitalan aggotnen şilat ən win di as dasan-immal Ƴaysa awal wa d-ifalan Məşşina, a dağ ewâl awen s awas əfragan əgərri-net.

³⁴ Wər t-illa a inna i tamattay əs wərgex əlmitalan a daq-qu inna, mişan as iqqal ɣas-net ənta əd nəttulab-net a dasan-iməl almaɣna n əlmitalan win di ketnasan.

Igi ən Ƴaysa təlməxujaten

Ƴaysa ila tarnə fəl tazafa

³⁵ Əzəl wenda, as d-ihoz ahad, inna Ƴaysa i nəttulab-net: «Nəxrəset əs tagadamayt ta hadat n agaraw.»

³⁶ Əfalan tamattay, matakwayan nəttulab-net, ewayan-tu dağ əɣlal n aman wa da dağ iqqim da. Əddewan dər-əs əɣlalan n aman wiyyad.

³⁷ Əglân as d-igar aḍu issohen fəl agaraw. Ad satabnat tənazzamaren y əɣlal, taggazan-t-id aman har ibuk y ad idnəy.

³⁸ As itaggu awen, Ƴaysa ənta issomat adəfor insâ dağ ələqqam n əɣlal. Təzzar əssənkaran-tu nəttulab-net dağ etəs, ənnan-as: «Əlfəqqi! Awak zələy a wər təge dağ a danaɣ-atşin aman?»

³⁹ Inkar-du Ýaysa, isannarхам y аду, inna y agaraw: «Ëdrer, taffasta!» Təzzar izzəkkat аду, ihrad arat kul adrur.

⁴⁰ Təzzar inn-asan: «Ma kawan-issərmaхан? Awak əzəgzan a wər təgem harwa da?»

⁴¹ Təggaz tasa zəwwərat inəttulab, ad tinəmənnin: «Kawanay ak, ma imos wa daх awedan, s аду d agaraw da ittāf daх-san tanat?»

5

Ýaysa ila tarna fəl kələsuf

¹ Ewad-in Ýaysa əd nəttulab-net əsəlim n agaraw wen sen, daх akal ən Garassenatan.

² Izzəbbat-du Ýaysa аhlal n aman хаs, igmad-du sər-əs əmeskel iyyan izəkwan.

³ Izəkwan en da a daх ixsar, amaran indār y aytedan kerrad-net, əs wala isassaran.

⁴ Ýəwənan kerrad ən fassan-net əs sassaran, asəхан idaran-net əs təzabagawen, mišan ad ixtəs awen kul.

⁵ Iha izəkwan en da d ədхахан ehad-ezal, izayyak, italay iman-net əs təhun.

⁶ Mišan, as ogga Ýaysa daх igөг, ozal-du sər-əs, issəjad-as.

⁷ Idkal aggəsuf wa ihan aləs wa əməsli-net wəllen inna: «Ma daх-i tareх Ýaysa, Barar ən Məššina di n Amadkol? Egmaya daх-ak fəl Məššina, a di-wər-təzəхgəzzəba.»

⁸ Innā awen, fəlas das-inna Ýaysa: «Aljayn wa labasan, əgməd d aləs di!»

⁹ Təzzar issəstan-tu Ýaysa, inn-as: «Ma esəm-nak?» Inn-as aggəsuf: «Esəm-in Egan, fəlas igət a nəga.»

¹⁰ Ad itansay aggəsuf wen Ýaysa fəl a tu-wər-ikkəs daх akal en.

¹¹ As itaggu awen, idān əsəgən aggen ən ladayan fəl tasaga ən təkəšwart təhozat den.

¹² Ad tansayan kələsuf en Ýaysa gannin-as: «Sukanах iladayan en, a tan-nəggəz.»

¹³ Ird-asan Ýaysa s awen. Egmadan kələsuf aləs wen, əggazan iladayan. Eddəggagan-du ladayan en fəl azadaga ən təkəšwart, ad titərəggen daх agaraw. Etsan-tan aman, əmosan edag n əššin gim.

¹⁴ Təzzar ozalan madanan ən ladayan win, əgan isalan y əхrəm wen əd хələyхəlayan-net. Eglan-du aytedan y ad ənəyan awa igan den.

¹⁵ Osan-du Ýaysa, ənayan aləs was kala ad t-əhan kələsuf; iqqim, ilsâ, təqqâl-t-idu tayttay-net, təzzar təggaz-tan tasa.

¹⁶ Egan daх-san aytedan win əggəyyatnen y awen, isalan kul n awa itawaggan y aləs en, d awa igrawan iladayan,

¹⁷ təzzar ad tansayan Ƴaysa a dasan-igməd akal-nasan.

¹⁸ Itaggaz Ƴaysa aɣlal n aman as d-inkar aləs wa əgmadan kələsuf, a t-itansay ad t-ayyu a dər-əs idaw.

¹⁹ Wər das-irɗa Ƴaysa s awen, eges ya inn-as: «Aɣlu əqqəl ehan-nawan d aytedan-nak, təmələɣ-asan arat kul wa dak-iga Ɛməli s əhənətta-net.»

²⁰ Təzzar igla aləs en, ikka akal igân esəm «Wa-n-Maraw-Ƴərman» ad immal arat kul wa das-iga Ƴaysa. Aytedan kul win das-əslanen isannahal sər-san awen əsəmməkləl.

Ƴaysa ila tarna fəl təwərna əd təmattant

²¹ Iqqal Ƴaysa, iɣras agaraw s əsəlīm-net wa hadan. Təlas fall-as tamattay tagget tiddawt.

²² Təzzar osa-du aləs igân esəm Jayɣus, imosan iyyan daɣ muzaran n ahan n əɣibada ən Kəl-Ǝlyəhud. Inay Ƴaysa ɣas, issəjad dat-əs.

²³ Onsay Ƴaysa, inn-as: «Tabarart-in a ɣur təlla təmattant, areɣ daɣ-ak a sər-əs nidaw təssəwəraq-qat ifassan-nak ad təzzəy.»

²⁴ Igla Ƴaysa, iddew dər-əs. Təlkâm-as tamattay tagget, tətənanbdaɣ fall-as.

²⁵ Tamattay en, tah-et təntut təgât maraw elan d əššin igammad-tat əzni.

²⁶ Tənây aɣazab aggen daɣ fassan ən nasmagalan aggot-nen. Awa təla kul as daɣ-san tu-tənɣa. Mišan edag n ad təggudəy, tətəyət fadda a fall-as təga təwərna-net.

²⁷ Təntut ten kala da təslâ y awa gannin aytedan əs Ƴaysa. Təggaz-in tamattay ta təhat šixərden ən Ƴaysa, tədas takadkat-net,

²⁸ fəlas tənna daɣ man-net: «As ədasa kuddeɣ isəlsa-net, ad əzzəya.»

²⁹ Da da ad tədas təkadkat-net ənta daɣ-as izzəkkat əzni wa daɣ-as inaqqalan, təfray i təɣəssa-net as təzzay daɣ təwərna ten.

³⁰ Tamazayt ten da a daɣ ifray Ƴaysa i tarna iyyat as t-in-təgmad. Imalallay-du tamattay, inna: «Ma idasan isəlsanin.»

³¹ Ɛnnan-as nəttulab-net: «Tahannaya tamattay ta fall-ak tətənanbdaɣat, eges təganna "Ma di-idasan?"»

³² Dər iga awen da ya issələl Ƴaysa tamattay asawad-net y ad inəy wa t-idasan.

³³ Təzzar tərmaɣ təntut, təndaw-tat taysəst, fəlas təssân daɣ təməzzəyt ta təga den. Təkka-du Ƴaysa, təssəjad dat-əs, təmal-as tidət ketnet.

³⁴ Inn-as: «Tabarart-in əzəgzan-nam sər-i a kam-izzozayan. Aɣlu daɣ alxer, təzzaya daɣ təwərna-nam.»

³⁵ Harwada iššewal Ƴaysa as d-osan aytedan a d-əfalnen aƣaywan ən Jayxus wa n əmuzar n ahan wa n əlƣibada ən Kəl-Əlyəhud, ənnan-as: «Tabarart-nak wər tədder, igd-ak tədgāzax Əššex.»

³⁶ Mišan wər-in-iger Ƴaysa tenbay daƣ awa itawannan den, inna y əmuzar n ahan wa n əlƣibada ən Kəl-Əlyəhud: «Ad wər tərməxa, əttəf ƣas əzəgzan-nak.»

³⁷ Igdal Ƴaysa i tamattay a dər-əs tidaw. Iгла, wər iddew ar əd Butros əd Yaqub əd Yaxya wa n amadray ən Yaqub.

³⁸ Əddewan əd Jayxus wa n abba ən tabarart s aƣaywan-net. As din-osan inay Ƴaysa tanajarwayat n aytedan hallinen, sikalalan.

³⁹ Iggaz-in fall-asan, inn-asan: «Mafel tənijarwayam təhallim? Təbarart-nawan wər tat-aba, etəs ƣas a təga.»

⁴⁰ Təzzar əgan-tu ajjab. Issərdaq-qan ketnasan, wər d-iqqim ar imarwan ən tabarart əd nəttulab-net win dər d-iddew, təzzar iggaz dər-san edag wa daƣ tənsa təxəssa ən tabarart.

⁴¹ İbaz əfus-net, inn-as: «Talita qum!» Almaƣna n awen: «Tabarart ənnex-am, ənkər-du!»

⁴² Tənkar-du tabarart daƣ tamazayt tenda, təjawankat. Tabarart ten, maraw elan-net d əššin. Awa sər-san iga awen daƣ əsəmməkləl, əhagan.

⁴³ İrƣam-asan Ƴaysa wəllen fəl amel n awen y awedan waliyyan, dəffər adi inn-asan a tat-akfin a tətša.

6

Tunkart n aytedan ən Nazaret Ƴaysa

¹ İgmad Ƴaysa edag wen, iddew əd nəttulab-net, ikka aƣrəm wa daƣ idwal.

² As əzəl wa n təsanfawt, iggaz Ƴaysa ehan n əlƣibada ən Kəl-Əlyəhud a daƣ-as isasaƣru. Isammaklal awen s aytedan aggotnen win das-əssəsammen, har əqqiman gannin: «Mənid d-issan wa daƣ awedan aratan win? Ma təmos masnat ta tu-tətawakfat da, as itaggu təlməxjujaten?»

³ Awak awa wərgəx əmakras ən nan wa n ag Maryama, əməqqar ən Yaqub əd Yosas əd Yahuda əd Simyon? Wərgəx šimədrayen-net da da əxsarnen gər-ena da!» Awen daƣ a dasan-igdalan a sər-əs əzzəgzənan.

⁴ Inn-asan Ƴaysa: «Ənnəbi wər itəwəlku ar daƣ aƣrəm wa daƣ idwal, əd šəqqaxan-net d aƣaywan-nasan.»

⁵ Igdal-as awen a ƣur-san agu təlməxjujaten. İmiranan wər nəggət ƣas a issəwar ifassan-net, izzozay-tan.

^{6a} İsimaklal sər-əs iba n əzəgzan-nasan.

Əzəmmizəl wa iga Ƴaysa inəttulab win maraw d əššin

6b Illil Ƴaysa šiřarmaten šin əhoznen Nazaret, isasayru aytedan.

7 Əzəl iyyan iřra-du Ƴaysa inəttulab-net win maraw d əššin, ikf-en tarna fəl kələsuf, a tan-izamazal s əššin əššin.

8 Omar-tan, inn-asan: «Ad wər tawəyam arat waliyyan dař əşikəl-nawan, ar tallaq. Ad wər tawəyam allaw, wala ařrəg, wala tefelt dař nəfdan-nawan.

9 Əsəlat iřateman-nawan, amaran ad wər tawəyam sanatat təkadkaden.

10 Ehan was tənneftayam, a tu-wər-təgmədam s iyyan iket təhəm ařrəm wədi.

11 As wər tətawaqbalam, wər itawasasam deř i batu-nawan dař adag wədi, as tu-təgammadam təbbikbakam-in əgodrar-net wa iwaran idaran-nawan, ilkâm ad aggayyat awen fall-asan.»

12 Əglan nəttulab ad taggin təlxtutbat y aytedan fəl ad utaban.

13 Takkasan deř kələsuf aggotnen dař aytedan, ill-ay widi zaggayan i miranan aggotnen, zuzəyan-tan.

Ƴaysa əd Yaxya wa isalmařan dař aman

Iduf wa əgan aytedan dař Ƴaysa

14 Isla əmənokal Herod isalan ən Ƴaysa, fəlas sallat-net a tewadat edag kul, amaran gannin sər-əs aytedan: «Awen Yaxya wa isalmařan dař aman a d-inkaran dař təmattant! Adi a fəl ila tarna n igi ən təlməxjujaten.»

15 Gannin wiyyad: «Awen ənnəbi Ilyas.» Wiyyad deř gannin: «Awen iyyan dař ənnəbitan win ərəwnen.»

16 As isla Herod y aratan win tawanninen den əs Ƴaysa inna: «Yaxya wa isalmařan dař aman was d-əssəfrasay əřaf-net, ənta a d-inkaran dař təmattant.»

Isalan ən təmattant ən Yaxya wa isalmařan dař aman

17 Herod iman-net a omaran s ad attarmas Yaxya, issəkrad-tu, isassag-ay dař kasaw. Igâ Herod awen fəl əddəlil n azalaf-net Herodəyas təmosat tařur Filibus, amaran Filibus amadray ən Herod en dař a imos.

18 Ənta Yaxya iyyəwan tənna i Herod: «Xaram fall-ak ad tərəkəba dař amadray-nak tařurəs.»

19 Təzzar təgzar Herodəyas Yaxya fəl awen da, ad təgammay d a dař-as təkəkəs iman, mišan wər təgrew təməwit n awen,

20 fəlas Herod a iksudan Yaxya. Issân as aləs n alřadil a imos n əmizdag, adi a fəl t-ogaz. Ira ad isasam i batuten-net, mišan ya, i dasnat-islam, ad t-iššəwəš wəllen awa igannu Yaxya.

²¹ Awen day a igan, har sər-əs təgraw Herodəyas tarrayt xur ayalay n əzəl wa day ihəw Herod. Əzəl wen isassaga day-as Herod saksas zəwwəran, migaren-as-du muzaran n əlxəkum-net, əd muzaran ən sojitan-net, d aytedan win əlanen tenbay day akal wa n Galilaya.

²² Təggaz-du elles ən Herodəyas ad təggax. Oggäm Herod əd naftaxan-net ewex-net, təzzar inn-as: «Əgməy day-i awa tarex kul, a dam-t-akfa.»

²³ Iгла har das-ihad, inn-as: «Arat kul wa day-i təgmaya, a dam-t-akfa kuddey iqqal a dər-əm uzana akal-in day ammas.»

²⁴ Təgmad, tənna y anna-net «Ma day-as z'əgməya?» Tənn-as anna-net: «Əgməy day-as eɣaf ən Yaxya wa isalməyan aytedan day aman.»

²⁵ Tarmad as du-təqqal təmawat ten əmənokal Herod, tənn-as: «Eɣaf ən Yaxya wa isalməyan aytedan day aman as ərey a di-tu-takfa əmərədda insâ day attabla.»

²⁶ Arat wen ixsad iman n əmənokal wəllen, mişan wər ira a das-ugəy fəl əddəlil ən təhuday ta das-iga d əddəlil ən naftaxan-net.

²⁷ Issəgla day tamazayt ten da iyyan day sojitan-net win tu-tagaznen, inn-as a das-d-awəy eɣaf ən Yaxya wa isalməyan day aman. Iгла soji, ifras-du eɣaf ən Yaxya day kasaw.

²⁸ Eway-t-id day attabla, ikf-ay i təmawat ten. Tabarart deɣ təkf-ay y anna-net.

²⁹ As əslan nalkiman ən Yaxya awen, əgлан, ədkalan təxəssa-net, ənbalan-t-in.

Əsəssəxri d əşşətši win iga ɣaysa i tamattay

ɣaysa əd nəttulab-net

³⁰ Əqqalan-du nəmmuzal winad izammazal ɣaysa da, əsoxalan-as isalan n arat kul wa əgan, d awa sassaxran aytedan.

³¹ Inna ɣaysa i nəttulab-net: «Ayewat, akkiwat-anax edag issufan fəl ad tassanfim a əndərran.» Arat wen inn-asan-tu fəlas aytedan win tan-du-tasinen əd win gallinen, a əganen igət, was arat n amazay day ətşan nəttulab-net, da wər t-əgrewan.

³² Təzzar əggazan aylal n aman, əgлан, əkkan edag issufan a din-ikitayyen.

³³ Oggan-tan aytedan aggotnen as əgлан, əzdayan-tan. Iga-du uzzal n aytedan day xərman kul win əhoznen den, azzaran-in i ɣaysa əd nəttulab-net s adag wa əkkan.

³⁴ As d-izzəbbat Ƴaysa aɣlal n aman, inay tamattay tagget, təggaz-tu təhanint-nasan, fəlas əmosan zun ayfəd wər nəla amadan. Təzzar a tan-isasaɣru aratan aggotnen.

İşşətsi ən Ƴaysa səmmos gim n aləs

³⁵ As gəzzul əzəl, əhozan-t-idu nəttulab-net, ənnan-as: «Edag issufan awa, amaran əzəl igla;

³⁶ suxəl tamattay a, ad təgməy id təzzənza a tətša daɣ ɣawnatan əd taɣarmaten win əhoznen.»

³⁷ Inn-asan Ƴaysa: «Şatşat-tan kawanay iman-nawan da!» Ənnan-as: «Awak a tareɣ ad nədkəl sanatat təmad n ərrəyal n əzrəf wa mallan nazzanza-du şigəlwen ətşan aytedan win?»

³⁸ Inn-asan: «Əssənət-du mənəket təgəlwen təlam.» As d-əssanan awa t-illan əqqalan-t-id ənnan-as: «Səmmosat təgəlwen d əşşin kifitan.»

³⁹ Təzzar omar-tan s ad agin aytedan təzunen, səɣximin-tan den da daɣ yel.

⁴⁰ Əqqiman aytedan əmosan təzunen. Təzunen en şiyyad əmosnat temeday temeday n awedan, şiyyad əmosnat səmmosat təmərwen.

⁴¹ Amaran idkal Ƴaysa səmmosat təgəlwen şin den d əşşin kifitan win, iggəzzay ijənnawan, iga igodan i Məşşina, ikaramkaram şigəlwen şin den, ikf-enat i nəttulab-net y a tanat-uzanan i tamattay. Əzunan-asan deɣ kifitan winad n əşşin a.

⁴² Ətşan aytedan en ketnasan har əyyəwanan.

⁴³ Əşşədawan-du nəttulab ən Ƴaysa awa d-iqqiman daɣ təgəlwen əd kifitan, ədkaran daɣ-as maraw əzmaman d əşşin.

⁴⁴ Əddukad ən səmmos gim n aləs a əhanen tamattay ta tətşat den.

Teklay ən Ƴaysa fəl aman

⁴⁵ Wala a ihogan omar Ƴaysa inəttulab-net s ad əggəzan aɣlal n aman, izaran-as-in əs təgadamayt ta hadat n agaraw əs təxrəmt ta n Betsayda, iket di ad itasallam tamattay.

⁴⁶ Issəgla tamattay ɣas, ikka adɣaɣ iyyan y a fall-as agu şiwatriwen.

⁴⁷ As iga ahad, aɣlal n aman wa əhan nəttulab ən Ƴaysa isigaraygaray daɣ agaraw, Ƴaysa amaran ənta iwâr adɣaɣ ɣas-net itattar.

⁴⁸ Ogg-en əbbillanan d əsəgli n əɣlal fəl aman, fəlas adu a dər d-əmməqqasan. As təga tilkamət n ahad ikk-en-du Ƴaysa ijiwankat fəl aman. As zama tan-okây,

⁴⁹ oggan-tu ijiwankat fəl aman, əɣilan aggəsuf, sakkarayan.

⁵⁰ Ketnasan issirmaq-qan anay wa t-əgan. Mišan tamazayt ten da a dasan-iššewal Ƴaysa inn-asan: «Ad wər təxšədam, nak awa! Təgmədet-kawan tasa!»

⁵¹ Iggaz-du fall-asan aɣlal ɣas, idrar aɗu. Iga sər-san awen əsəmməkləl labasan,

⁵² fəlas wər əgren almaɣna ən təməxjujat ta iga Ƴaysa əs təgəlwen id iwallan-nasan a garmomnen.

Ʒuzəy ən Ƴaysa imiranan daɣ akal ən Ganazaret

⁵³ As əɣrasan agaraw, ewadan akal ən Ganazaret, əndayan aɣlal n aman daɣ təšəšwit.

⁵⁴ Ʒgmadan aɣlal n aman ɣas, əssanan aytedan as Ƴaysa awen.

⁵⁵ Təzzar ozalan daɣ akal ketnet, edag as əslan as ih-ay a sər-əs du-tawəyan imiranan daɣ təssəwen.

⁵⁶ Edag osa Ƴaysa, gər za aɣrəm wala taɣrəmt wala iɣawnatan n əsuf, a d-awəyan aytedan imiranan s adag wa imosan asammanay, ansəyan Ƴaysa ad ayyu aytedan ədəsan kuddeɣ təbənək ən təkadkat-net. I tat-idasan deɣ ad izzəy.

7

Tazdak d ammadas

Alwajiban ən Məššina d ammadas

¹ Ʒddewan Farisaytan ɣur Ƴaysa əntanay d arat daɣ musanan n Ʒttawret a d-əgmadnen Yerusalām.

² Ʒnayan arat daɣ nəttulab ən Ƴaysa tattin əs fassan əmmidasnen, almaɣna wər nərrud.

³ Ʒnta Farisaytan əd Kəl-Ʒlyəhud kul wər təttin iket wər əššoradan ifassan-nasan har təɣəmmar, imos awen alɣadat ən marawan-nasan.

⁴ Wər təttin deɣ as d-əgmadan assamanay n aytedan, iket wər əzzəzdagan. Ʒttāfan deɣ šiyyad alɣadaten aggotnen, əmosnen əzəzdəg ən kassan, əd təkən, əd təɣeren əd təssuwen šin daɣ tattin.

⁵ Adi a fəl əssəstanan Farisaytan əd musanan n Ʒttawret Ƴaysa, ənnan-as: «Mafəl wər əlkeman nəttulab-nak y alɣadaten ən marawan-nana, tattan əs fassan əmmidasnen?»

⁶ Inn-asan Ƴaysa: «Ʒlmunafiqan! Tidət a imos awa sər-wan inna ənnəbi Isayas s əmmək was itiwaktab as: "Tamattay ta, iləs ɣas as di-təssəɣmar, mišan iwallan-nasan əggugan-i wəllen.

⁷ Ʒlyibada wa di-taggin, ibbinnan, fəlas wər səsəɣrin ar alwajiban a d-ənzaman aytedan daɣ ɣafawan-nasan."

⁸ Emmæk en da a tøgam kawanay da, toyyam alwajiban ən Məşşina, təlcamam y alɣadaten n aytedan.»

⁹ Inn-asan Ƴaysa deɣ: «Şiyyit tolâɣat a tøgam y alwajiban ən Məşşina, fəl ləkkum y alɣadaten-nawan!

¹⁰ Wərgex ənnəbi Musa a inna: "Səɣmər abba-nak d anna-nak" inna deɣ: "Awedan wa išaffaraşšen abba-net, madex anna-net, wədi a daɣ-as təwəkkəsan man."»

¹¹⁻¹² Mişan kawanay tögannim: «Ifrâg awedan ad annu y abba-net madex anna-net: "Tadhəlt tas daɣ-i tøgam ənnəyat-net, əssəwaraq-qat aganna təmos ađđawal." Daɣ adi awedan wədi wər tu-toyyem s amaknaw n arat y abba-net wala anna-net.

¹³ Təməwit tədi da as tøgam alɣadat-nawan daɣ adag n Awal ən Məşşina, təsasaxrim-tat i bararan-nawan. Tətaggim deɣ wiyyad aratan aggotnen şilat n adi.»

Ammadas wa n tidət

¹⁴ As iga Ƴaysa batu ten i Farisaytan əd musanan n Əttawret, iɣra tamattay, inn-as: «Səsəmat-i ketnawan, tagrim awa dawan-z-anna da.

¹⁵ Wər t-illa arat itaggazan taɣəssa n aggadəm, ifrâgan əsəmmədəs-net. Kalar awa t-id-igammadan a tat-isamadasan.

¹⁶ Wa isallan, aslet!»

¹⁷ As imməzzay Ƴaysa əd tamattay, iggaz ehan, əssəstanan-tu nəttulab-net d almaɣna n iggi wa iga den.

¹⁸ Inn-asan: «Awa zaɣnin kawanay da, wər təlem əgərri? Wər tögrem as, wər t-illa arat itaggazan taɣəssa n aggadəm ifrâgan əsəmmədəs-net,

¹⁹ fəlas wərgex əwəl-net a itaggaz. Kalar tadist-net a itaggaz, dəffər adi inɣəl-in daɣ əsuf.» Emmæk wa da as issəxlal Ƴaysa imensewan kul.

²⁰ Inn-asan deɣ: «Awa d-igammadan əwəl n aggadəm, ənta a t-isamadasan,

²¹ fəlas əwəl n aggadəm a du-gammadnat arak ənnəyaten a tu-tawaynen s igi ən tədoden madex igi ən meddan əd şikra, d igi ən man,

²² d igi n əzzəna, əd tara n əddənet, əd tişit n amaksan, əd təkaddilt, d igi n aratan win ogarnen taxxaramt, əd manjaɣ, əd şizmit, d ədkul ən man, əd təmətəkwəyen kul şin iba ən təla n almaɣna.

²³ Aratan win di labasnen kul əwəl n aggadəm a du-gammadan, amaran əntanay a tu-samadasnen.»

Ƴaysa əd təntut iyyat wər nəmos təlyəhut

²⁴ Ifal Ƴaysa edag wen ikka amaḍal ən Tir. Os-in Ƴas iggaz ehan iyyan, fəlas wər ira a fall-as tagu masnat; mišan indaras ad aqqam wər fall-as təga masnat.

²⁵ Kalar iraz-in Ƴas təsl-ay təntut iyyat təlât tabarart iha aggəsuf, tək-k-ay-du, təssəjad-as.

²⁶ Təntut ten wər təmos iyyat daƳ Kəl-Ƴlyəhud, ələsəl-net Kəl Fenisəya əd Kəl Surəya. Tonsay Ƴaysa a das-ikkəs aggəsuf daƳ tabarart-net.

²⁷ Təzzar inn-as Ƴaysa: «Ayyu bararan ad ayyawanan təzzar, fəlas wər oley i daw-san idkalan amensay-nasan igər-t-in i ɗan.»

²⁸ Tənn-as təntut: «Tidət-nak Ƴməli, mišan ya, iɗan da əkəmmi a taggin awa d-irattakan daƳ bararan, tattin-tu.»

²⁹ Inn-as Ƴaysa: «Aglu, təqqələƳ aƳaywan-nam; tabarart-nam igmad-tat aggəsuf fəl əddəlil ən batu ta di-təge da.»

³⁰ Təqqal aƳaywan-net, tos-in tabarart-net təzzilallat daƳ tessat, igmād-tat aggəsuf, təzzây.

Ƴuzəy wa iga Ƴaysa aləs immizagan, indây dey iləs-net

³¹ Dəffər adi igmad Ƴaysa akal ən Tir, irzag Sidon os-in akal wa n Galilaya iga sər-əs tarrayt ta təmmarat akal Wan-Maraw-Ƴərman.

³² Den daƳ a sər-əs d ewayan aytedan aləs immizagan, as indây iləs-net. A tu-tansayan y ad t-issəwar ifassan-net, izzuzəy-tu.

³³ Iddew dər-əs Ƴaysa, igmad dər-əs aytedan, təzzar iga idədwan-net daƳ təməzzugen n əmzag en, dəffər adi issəwar-tan imətman-net, idas sər-san iləs n əmzag en.

³⁴ Amaran iggəzzay Ƴaysa ijənnawan, ihanaffat, inn-as: «Effata!» Almayna: Nuləm.

³⁵ Tamazayt tenda a daƳ ənnolamnətt təməzzugen n əmzag en, itawayya-du iləs-net, iššewal s iləs isrâdan.

³⁶ Dəffər awen omar Ƴaysa aytedan s ad wər əmelan awa igan den y awedan waliyyan, mišan iket itamar-tan s awen sanahalan-tu emel.

³⁷ Iga sər-san awen əsəmməkləl labasan, gannin: «Awa itaggu kul iknâ əllux. Wala imzagan issəsl-en, iššašawal dey win as əndayan ilsawan-nasan.»

8

Ƴətsi wa iga Ƴaysa əkkoz gim n aləs

¹ Adan en da a daƳ təlas tamattay tagget tiddawt fəl Ƴaysa. Tamattay en wər təla a tətša. IƳra Ƴaysa inəttulab-net, inn-asan:

² «Aytedan a təh-i təhanint-nasan. Karad adan a Ƴur-i əgan, amaran ab'as t-illa a ətšan.

³ As tan-æssoka iyawnatan-nasan wər əreman arat, a tan-aggadlu gələk daɣ tarrayt, id wiyyad daɣ-san igəg a d-əgmadan.»

⁴ Ənnan-as nəttulab-net: «Məni du-z-igrəw awedan daɣ əsuf a şigəlwen siyyawannen tamattay togdāt d awa?»

⁵ Issəstan-tan Ƴaysa, inn-asan: «Mənəkət təgəlwen təlam?» Ənnan-as: «Əssayat.»

⁶ Omar Ƴaysa tamattay s ad təxrəd təɣimit. Idkal-du əssayat təgəlwen şin, iga igodan i Məşşina, i karamkaram-tanat, ikf-enat i nəttulab-net y a tanat-uzanan i tamattay en. Əzunan-asan-tanat.

⁷ Əlān deɣ arat ən kifitan win madrornen. Iga Ƴaysa igodan i Məşşina inna i nəttulab-net, a tan-uzanan əntanay da y aytedan.

⁸ Aytedan en əyyəwanan əglazan-du, har as əssa əzmaman win zawwarnen a du-tawadkarnen daɣ karammutan win d-əglazan.

⁹ Əddukad n əkkoz gim n aləs a ətşanən den. As tətşa tamattay, issəllam-tat Ƴaysa.

¹⁰ Tamazayt ten da a daɣ iggaz aɣlal n aman ənta əd nəttulab-net, ikka akal ən Dalmanuta.

Agamay ən Farisaytan daɣ Ƴaysa a dasan-agu təlməxjujat

¹¹ Osan-du arat daɣ Farisaytan, maşawalan dər-əs, gammayan daɣ-as təlməxjujat təmosat alɣalamat a du-təfâlat Məşşina, imosan awen jarraba-net.

¹² Iga Ƴaysa təhənəffət zagret, inna: «Mafəl gammayan aytedan n azzaman win təlməxjujat a du-təfâlat Məşşina? Əggəyyeɣ əsilakanax-awan as, wər ilkem a dawan-tətiwagga təlməxjujat waliyyat.»

¹³ Təzzar ifal-tan, ilas iguz n əɣlal n aman, ikka əsəlim wa hadan n agarew.

Əsəmmətər ən Ƴaysa inəttulab-net

¹⁴ Əttəwan-in nəttulab a d-awəyan allaw ən təgəlla. Tagəlla iyyadda ɣas a təhat aɣlal-nasan.

¹⁵ Isəmmatar-tan Ƴaysa, inn-asan: «Ənkədat wəllen i xamira ən Farisaytan əd wa n əmənokəl Herod!»

¹⁶ Ad tinəmənnin nəttulab-net gar-essan: «Awa wər t-inna ar fəlas wər nəla tagəlla.»

¹⁷ Issan Ƴaysa daɣ awen, inn-asan: «Mafəl təşşewalam daɣ iban təla-nawan tagəlla? Awak əgərri a wər təgəm harwa da? Awak iwallan-nawan a əganen təxart tas ab'as təgərrim?»

¹⁸ Awak şittawen a wər tələm əs tənayam, wala deɣ şiməzzugen əs təslam? Awak tatawt a din-təgam

¹⁹ iket n əzmaman a du-tədnayam daɣ karammutan win du-təglaz tamattay assaxa wad əzunax səmmosat təgəlwen i səmmos gim n aləs?» Ənnan-as: «Nəkittəw as maraw əzmaman d əşšin a du-nədnay.

²⁰ Şigəlwen şin əssayat za, şin əzuna y əkkoz gim n aləs, mənəket əzmaman a du-tədnayam daɣ karammutan win du-tawaglaznen?» Ənnan-as: «Əssa.»

²¹ Amaran inn-asan: «Eges harwa da wər təgrem wala?»

Əzuzəy ən Ƴaysa əmədderyəl iyyan

²² Os-in Ƴaysa ənta əd nəttulab-net taɣrəmt ən Betsayda. Əlwayan-du sər-əs aytedan aləs n əmədderyəl, onsayan-tu ad t-idəs izzuzəy-tu.

²³ İbaz Ƴaysa əfus n əmədderyəl en, ilway-tu har dər-əs igmad taɣrəmt. İssəwar imətman-net şittawen-net, issəwar-tu ifassan-net, inn-as: «Awak təhannayax arat meɣ?»

²⁴ İdkal əmədderyəl eɣaf-net, inna: «Hannayax aytedan, mişan olân-i d eşkan jiwankatnen.»

²⁵ İlas Ƴaysa əsəwər ən fassan-net şittawen n əmədderyəl en. İqqal-t-id asawad-net ketnet, izzay, innəflay daɣ arat kul.

²⁶ İssəlləm-tu Ƴaysa inn-as: «Ad wər təqqəla taɣrəmt ten, aglu akku aɣaywan-nak.»

Ƴaysa itawassan as Əlməsix a imos

²⁷ Dəffər awen iddew Ƴaysa əd nəttulab-net əkkan şixarmaten əhanen amaɗal as itawannu Qaysarəya wa n əmuzar Filibus. Əglân as tan-issəstan Ƴaysa, inn-asan: «Ak daɣ iduf n aytedan, ma əmosa?»

²⁸ Ənnan-as: «Wiyjad a gannin Yaxya wa isalmaɣan aytedan daɣ aman a təmosa, wiyjad a gannin ənnəbi İlyas, wiyjad deɣ a gannin iyyan daɣ ənnəbitan.»

²⁹ «Kawanay za, ma tənnam ma əmosa?» Inn-as Butros: «Kay a imosan Əlməsix.»

³⁰ İssənkad-tan Ƴaysa inn-asan: «Tidət a imos adi mişan a tu-wər-təmələm y awedan waliyyan.»

İki ən Ƴaysa Yerusalam

Ətəməl wa azzaran n alɣazab wa z'inəy Əlməsix ən Məşşina

³¹ Den da ad issənta Ƴaysa əsəssəɣri ən nəttulab-net, inn-asan: «Nak Ag Aggadəm, kundaba ənaya alɣazab aggen, unkaran-i muzaran ən Kəl-Əlyəhud əd muzaran ən limaman əd musanan n Əttawret, təwəggin man-nin, ənkarə-du deɣ daɣ təməttant əzəl wa n karad.»

³² Ig-asan i batu en igi isisagran wøllen. Təzzar iwat-tu Butros s ahal, iššewal fall-as fəl awa inna den.

³³ Mišan imalallay fall-as Ƴaysa, iswad day nəttulab-net win hadatnen, iharaššat Butros, inn-as: «Əfəl dəffər-i, Aššaytan, fəlas imedranan-nak, wərgəx Məššina a d-əfalan, kalar imedranan n aggadəm xas a əmosan.»

Ləkkum i Ƴaysa Əlməsix

³⁴ Dəffər awen iyra-du Ƴaysa tamattay əd nəttulab-net, inn-asan: «Wa iran a di-ilkəm, wədi igmədet tara ən man-net, agu imateran-net, idkəl təgəttawt-net, ilkəm-i.

³⁵ Əssənət as awedan wa wər nəgəmməy ar aggaz ən man-net, wədi ad t-əgmədan, mišan wa iqbalan ad t-əgmədan fəl əddəlil-in d əddəlil n Əlinjil, wədi ad ixləs.

³⁶ Ma z'aknu y awedan ad igrəw əddənət ketnet, ənta amaran temsay a ikka?

³⁷ Awak mas ifrag awedan tehakkay-net y a sər-əs agəz iman-net day təmsay?

³⁸ Awedan kul wa isakkarakad ləkkum y-i, madey isikarakad-tu əsuyəl n awal-in day azzaman win, day iggət iba ən təksəda ən Məššina, wədi nak da, Ag Aggadəm, a di-təsəkkərəkəd əlqəbulat-net əzəl wa du-z-əqqəla əley tanaya n Abba-nin, əddewa d angalosan a zaddognen.»

9

¹ İlas Ƴaysa inn-asan: «Əggəyyəx silakanax-awan as, wiyyad day-wan əbdâdnen da, wər tan-z-iba wər ənayan assa ən Taymar ta n Məššina igân əs tarna.»

Ənəfilal ən tanaya ən Ƴaysa Əlməsix

Tanaya ən Ƴaysa Əlməsix

² Sədis adan dəffər awen, iyra-du Ƴaysa Butros əd Yaqub əd Yaxya, iddew dər-san əntanay xas s ədxağ iyyan zagren. Əllân den da, as imməttay azzahir ən Ƴaysa dat-san.

³ Malawlawan səlsa-net. Əgan təməllay təsiraqqet wøllen əs kala wər tətawanay šilat-net day əddənət.

⁴ Təzzar oggan ənnəbi İlyas d ənnəbi Musa, mişawalan əd Ƴaysa.

⁵ İggad-du Butros inna i Ƴaysa: «Əššex, olâx as nəlla da! Ad nəkrəs karad həktan. İyyan i-nak, iyyan in Musa, iyyan in İlyas.»

⁶ Wər din-igra Butros axaras wa iga den fəl awa iga day tərəmməq ənta əd nəttulab win hadatnen.

⁷ Tamazayt ten da a dənnəg-san du-tənafalal təgarak, təls-en telay-net; təzzar iga-du awal day tagarak en da, inna: «Awa Barar-in wa əkney tara, səsəmat-as.»

⁸ Wala a ihogan, waraywarayan nöttulab, wər hənnəyan awedan waliyyan a ħur-san illân ar Ƴaysa.

Assa n Ilyas

⁹ Tazabben-du adħay en da as dasan-inna Ƴaysa: «Ad wər təməlam awa tənayam da y awedan waliyyan iket wər d-ənkera nak Ag Aggadəm daħ təmattant.»

¹⁰ Ettafan taryəmt ta dasan-iga den, mišan tinəməsəstinan gər-essan d awa issoka Ƴaysa əs «tanakra daħ təmattant» ta imal den.

¹¹ Əssəstanan-tu, ənnan-as: «Mafəl gannin musanan n Ettawret: "Kundaba osa-du Ilyas təzzar as du-z-asu Əlməsix?"»

¹² Inn-asan: «Tidət-nasan as kundaba osa-du ənnəbi Ilyas təzzar, annazzam aratan kul; mišan ya, mafel iktâb as Ag Aggadəm kundaba inay alħazab aggen, itəwəsəknu məlka?»

¹³ A kawan-əssusənaħ âs ənnəbi Ilyas osâ-du, amaran əgân-as aytedan arat kul wa əran, imos as awen da a iktaban daħ batu-net.»

Əzuzəy ən Ƴaysa barar iha aggəsuf

¹⁴ As d-iqqal Ƴaysa əd nöttulab-net win karad ogga inöttulab-net win hadatnen təħilayħalay-tan tamattay tagget, tənċâr tamazaq gar-essan əd musanan n Ettawret.

¹⁵ Togga tamattay Ƴaysa ħas, isammaklal sər-san awen, ozalan sər-əs a tu-saslaman.

¹⁶ Inna Ƴaysa i nöttulab-net: «Ma dər-san təmməzaħam?»

¹⁷ Inn-as aləs iyyan daħ tamattay en: «Əlfəqqi, ewâya-du sər-ək barar-in iha aggəsuf labasan, indâyan iləs-net.

¹⁸ As daħ-as d-inkar, a t-aggadlu, ad isakafkaf isamakyak, təzzar issəf. Əgmâya daħ nöttulab-nak a daħ-as t-əkkəsan, mišan indar-asan»

¹⁹ Inn-asan Ƴaysa: «Xa! Iket iba n əzəgzan daħ aytedan n azzaman a! Awak har əmmay əddewa dər-wan, zizaydar dər-wan? Awəyat-i-du barar.»

²⁰ Təzzar ewayan-as-t-id. Da da ħas ad inay aggəsuf Ƴaysa, ənta ad izazzakarkar barar, ifataqqat, ad itizəbərdil, isakafkaf.

²¹ İssəstan Ƴaysa abba ən barar, inn-as: «Əmmay du-t-igaz awa šin agaraw?» Inn-as: «Harwa mədrəy.

²² Əyyəwan-tu aggəsuf təməgirt daħ təmsay madəħ aman y ad t-anħu. Kud təfrâgaħ a təkneħ daħ awa, təhənəttəħ-ana, tilalaħ-ana.»

²³ Inn-as Ƴaysa: «Kud təfrâga ya? Arat kul əfragaħ igi-net i wa sər-i izzəgzanan.»

²⁴ Idkal abba ən barar əməsli-net dəy tamazayt ten da, inna: «Əzzigzanaç, agəz-i dəy iba n əzəgzan.»

²⁵ As inay Ƴaysa uzzal ən tamattay iggâd-du sər-əs, iharaşsat aggəsuf, inn-as: «Aljayn wa igaddalan awal, izamazag, omaraq-qay s ad təgməda barar di; amaran a tu-wər-tələsəç iguz!»

²⁶ Izyak aggəsuf, iga i barar en əzəzzəkərkər labasan, amaran igmad-tu. Wər iha adag barar en itimətəkwəyan, zun t-aba, har ənnan aytedan aggotnen: «Aba-tu.»

²⁷ Mişan ibaz-t-id Ƴaysa s əfus, issənkar-t-id, ibdad barar.

²⁸ As iggaz Ƴaysa ehan iyyan, əssəstanan-tu nəttulab-net wər iqqim awedan waliyyan, ənnan-as: «Aljayn wa n ihogan, mafel indâr-anəç ikus-net dəy barar en?»

²⁹ Inn-asan: «Əzzənəf n aggəsuf wen, wər t-itəkkəs ar şiwatriwen.»

Ətəməl wa n əşšin n alyazab wa z'inəy Əlməsix ən Məşşina

³⁰ Igmad Ƴaysa edag wen ənta əd nəttulab-net, ərzagan akal ən Galilaya, mişan wər ira ad issən awedan waliyyan dad illa,

³¹ fəlas əsəssəçri a itag inəttulab-net. Igann-asan: «Nak Ag Aggadəm əjwâra ad əggâzaç ifassan n aytedan, agin iman-in, mişan karad adan dəffər iba-nin, a d-ənkəra dəy təmattant.»

³² Mişan wər əgren nəttulab-net batu ta dasan-iga den, amaran tah-en tasa n əsəstan-net.

Adkul wa n tidət

³³ Ewad-in Ƴaysa ənta əd nəttulab-net açrəm ən Kafar-nahum. Əggazan-in ehan ças issəstan-tan, inn-asan: «Ma təmməzaçam dəy tarrayt?»

³⁴ Wər das-ənnen arət, fəlas tamazaç a əgan gər-essan dəy tarrayt, ərân ad əssənən wa dəç-san ogaran.

³⁵ Iqqim Ƴaysa, inna i nəttulab-net win maraw d əşšin a t-id-ihazan, inn-asan: «Wa dəç-wan iran tizart, iwâr-tu ad agu iman-net daw aytedan kul, aget iman-net akli-nasan.»

³⁶ Ibaz-du Ƴaysa əfus n arət ən barar iyyan ilân den, issəbdad-tu gar-essan, ibaz-t-id izalammat-tu, inn-asan:

³⁷ «I iqbalaç barar şilan wa fəl əddəlil-in, wədi nak iman-nin as di-iqbal; wa di-iqbalan dəç, wərge nak a iqbalaç, wa di-d-izammazalan a iqbalaç.»

I wər nəgəmməy təkma-nana, wədi əmidi-nana a imos

³⁸ Inn-as Yaxya: «Əşşəç, nənây aləs iyyan itakkasan kələsuf dəy aytedan s esəm-nak, nənn-as a wər iləs igi n awen, fəlas wər danəç-iha əs ləkkum y-ak.»

³⁹ Inn-as Үaysa: «A das-wər-təgdəlam igi n adi, fəlas wər t-illa awedan as z'agin təlməxjujat s esəm-in, annu sər-i a labasan dəffər adi.

⁴⁰ I wər nəgəmməy təkma-nana, wədi əmidi-nana.

⁴¹ Amaran əggəyyey silakanax-awan as, i kawan-işşəşwan wala ablu n aman fəlas a kawan-iwar esəm n Elməsix, wədi illikan as ad igrəw arozan-net.»

Ləkkum i Үaysa Elməsix

⁴² «I iqqalan əssəbab n abakkad y iyyan dağ aytedan win sər-i əzzəgzannen, əmosnen zun bararan madrornen, wədi of-as ad itəwəqqən əzəzəd zəwwəran ən təhunt dağ iri-net itəwəgər-in dağ agaraw əmazal wa iga əddi.

⁴³⁻⁴⁴ Kud kay əfus-nak a ibukan a dak-iqqəl əssəbab n igi n abakkad, təfrəsaq-q-in; id of-ak ad təggəza aljannat təgəx əfus, y ad tələx əşšin fassan təggəzax temsay an Jahannama.

⁴⁵⁻⁴⁶ Kud dey adar-nak a ibukan a dak-iqqəl əssəbab n igi n abakkad, təfrəsaq-q-in; id of-ak ad təggəzax aljannat təgəx adar y ad tələx əşšin daran təggəzax temsay an Jahannama.

⁴⁷ Amaran kud şat-nak a təbukat a dak-təqqəl əssəbab n igi n abakkad, təkəkkərəq-qat-du; id of-ak ad təggəza Taymar ta n Məşşina təgəx şat y ad tələx sanatat şittawen, tətəwəgərə dər-əsnat dağ təmsay an Jahannama,

⁴⁸ təmosat edag as wərmad tamattatnat təwəkkawen-net, wala dey temsay-net.»

⁴⁹ «Awedan kul ad itəwəzəzdəg əs təmsay, zun d əmmək as tətəggaz tesəmt imensewan fəl a tan-təggəz tenbay.

⁵⁰ Tesəmt arat olāxan a təmos, mişan as tat-təgmad tenbay-net, awak ma imos arat wa dağ-as z'itəwəggin təqqəl-tat-du? Təqqəlet təməddurt-nawan a ilân tenbay zun tesəmt, amaran iməlet alxer gar-ewwan.»

10

Isalan n əməzzəy

¹ Ifal Үaysa edag wen ikka akal ən Yahudəyya ihân aganna wa hadan n agarew wa n Yordan. Təlas fall-as tamattay tiddawt, a tat-isasaxru imos awen arat itaggu faw da.

² Əhozan-t-in Farisaytan əgan-as əsəstan imosan tənəgmayt, ənnan-as: «Awak xalal y aləs ad izəmməzzəy tantut-net meyx wər xalal?»

³ Inn-asan Үaysa: «Mas imos alwajib wa dawan-d-oyya Ənnəbi Musa dağ batu tədi?»

⁴ Ænnan-as: «Ænnæbi Musa ikfâ turagat n ad têtewæktêb širawt n æmæzzøy i têtut, têtewæzæmæzzøy.»

⁵ Inn-asan Ƴaysa: «Aššaddat ên taggarmamt ên wallan-nawan a fêl dawan-d-oyya Musa alwajib wêdi.

⁶ Dêr iga awen da ya,
 œs tizarat as d-ixlak Mœššina æddœnet,
 "ixlak-du aytedan,
 ixlak-kan-du œmosan yay æd tœntay."

⁷ Adi da a fêl iffâl alœs
 abba-net d anna-net,
 irtœy æd tœntut-net,

⁸ œqqœlan fêl œššinessan arat iyyanda.
 Emmæk en daḡ as

ad ib-as œmosan œššin aytedan,
 kalar ad œqqalan taḡœssa iyyadda.

⁹ Daḡ adi, awa issœrtay Mœššina a tu-wêr-izœmmæzzøy awedan.»

¹⁰ As iggaz Ƴaysa ehan, œssœstanan-tu nœttulab-net œntanay da æd batu ten.

¹¹ Inn-asan: «I izammæzzayan tantut-net, izlaf iyyat, wêdi œzzœna a iga œddi.

¹² Tantut deḡ ta tœmmæzzayat d alœs-net, izlaf-tat iyyan, œnta da œzzœna a tœga di.»

Bararan æd Taymar ta n Mœššina

¹³ A du-tawayan aytedan bararan œs Ƴaysa fêl a tan-issœwêr ifassan-net ittêr-asan, mišan œššewalan nœttulab fêl aytedan win den.

¹⁴ Inay Ƴaysa awen ḡas iššak-ku, inn-asan: «Ayyiwat bararan a di-d-akkin. A tan-in-wêr-tœwœḡam fall-i, fœlas Taymar ta n Mœššina šin aytedan win šilatén-nasan.

¹⁵ Æggœyyey œsilakanaḡ-awan as, i wêr nœga i Taymar ta n Mœššina œlqœbulat šilat œn ta das-iga barar, wêdi wêr das-ilkem a tat-iggaz.»

¹⁶ Tœzzar ad itizœlœmmit Ƴaysa bararan win den, isawar-tan ifassan-net, itattar-asan.

Alœs n œmœggergœs æd Taymar ta n Mœššina

¹⁷ As zama imitakway Ƴaysa daḡ adag wen iraz-du sêr-œs alœs iyyan sêr-œs d-ozâlan, igaraffat dat-œs, inn-as: «Ëššœx olâḡan, mas di-iwar igi-net y ad œgrœwa tœmœddurt ta tœḡlalat?»

¹⁸ Inn-as Ƴaysa: «Mafel as di-tœgannaḡ Ëššœx olaḡan? Wêr t-illa i olâḡan ar Mœššina.

¹⁹ Alwajiban-net tœssânaq-qan, ih-en as: "Ad wêr tagay iman, ad wêr tagay œzzœna, ad wêr takœra, ad wêr

taggayyey əs bahu, ad wər taga təkma y awedan, səxmər abba-nak d anna-nak.»

²⁰ Inn-as aləs wen: «Əlfəqqi, aratan win di kul harwa da mədrəya as tan-əssəbdada.»

²¹ Təzzar idak-ku Ƴaysa s asawad təha tara, inn-as: «Arat iyyanda a dak-in-iqqiman əmərədda: Aglu zanz-in təla-nak kul, takfaḫ inazzan-net i tələqqawen, ad təgrəwaḫ ərrəzəḫ a dak-z-ansin daḫ alaxirat. Dəffər adi amaran tagla-du təlkəmaḫ-i.»

²² Isla aləs en i batu ten ḡas, izakkanzar. Inkar, igla əḡşâdan man-net fəlas ərrəzəḫ aggen a ila.

²³ Issələl Ƴaysa asawad-net tamattay ta tu-təḡalayḡalayay den, amaran inna i nəttulab-net: «İket əzzəwi ig-ay iguz ən Taḡmar ta n Məşşina fəl win əggərgasnen.»

²⁴ Batu ten, təqqan iḡafawan ən nəttulab-net, ilas Ƴaysa inn-asan: «Bararan-in, iket əzzəwi ig-ay iguz ən Taḡmar ta n Məşşina!

²⁵ Ogar tərḡasay ta iga fəl aḡam aradaḫ daḫ təbuday n ənəzmay, i ta iga fəl əməggərgəs iguz ən Taḡmar ta n Məşşina.»

²⁶ Batu ta təsammaklal wəllen əs nəttulab, təzzar ad tinəmənnin: «Adi za ma ifragan ad iyləs daḫ təmsay?»

²⁷ Iswad daḫ-san Ƴaysa inna: «Muxal a imos adi ḡur aytedan, mişan Məşşina wər sər-əs t-imos, fəlas arat kul ifrâk-ku.»

Alak wa z'igrəw ənalkim ən Ƴaysa

²⁸ Təzzar inn-as Butros: «Nakkanay za? Awak wərgəḡ noyya arat kul nəlkam-ak?»

²⁹ Inn-asan Ƴaysa: «Əggəyyey silakanəḫ-awan as, awedan kul wa ifalan fəl əddəlil-in d əddəlil n Əlinjil ehan-net madeḡ imədrayan-net madeḡ şimədrayen-net madeḡ anna-net madeḡ abba-net madeḡ bararan-net madeḡ şiwəgas-net,

³⁰ wədi awedan ad igrəw harwa da əmərədda, temeday n ənətfus ən nan madeḡ imədrayan madeḡ şimədrayen madeḡ annaten madeḡ bararan madeḡ şiwəgas. Amaran adi ketnet ad t-igrəw iddew-as d alḡazab, igrəw deḡ təməddurt təḡlâlat daḫ alaxirat.

³¹ Amaran a aggen daḫ win əhanen eḡaf əmərədda, ilkâm ad əggəzan ələqqam, win əhanen ələqqam deḡ əmərədda, ilkâm a əggəzan eḡaf.»

Ətəməl wa n karad n alḡazab wa z'inəy Əlməsix

³² İha Ƴaysa tarrayt ənta əd nəttulab-net, azzar-asan, taggazayan əs Yerusalam. As itaḡḡu awen əşşiwaşan nəttulab-net, taha deḡ tasa aytedan win das-əlkamnen. İlas

Ŷaysa ikus ən nəttulab-net win maraw d əššin daŷ aytedan y a dasan-iməl arat a fall-as z'agin daŷ alwaq wər nəggug.

³³ Inn-asan: «Səsəmat: Nakkanay da əggəzzaynen əs Yerusalem da. Den da ad za təwəgga nak Ag Aggadəm daŷ fassan ən muzaran ən limaman, əd musanan n Əttawret. Aytedan win a di-əxkəman təmattant, agin-i daŷ fassan n aytedan wər nəmos Kəl-Əlyəhud,

³⁴ a daŷ-i tajaban, əssutəfan fall-i, ayyawanan-i šiwwit, agin iman-in, mišan a d-ənkəra daŷ təmattant əzəl wa n karad.»

Əsəssəŷri igân daŷ batu ən tizart

³⁵ Ənkaran nəttulab əššin win maddanəs ən Zabaday əmosnen Yaqub əd Yaxya, əhozan-du Ŷaysa, ənnan-as: «Əššex, a daŷ-ak nəgməy arat as nəra a danaq-qu-taga.»

³⁶ Inn-asan: «Mas tərəm a dawan-t-aga?»

³⁷ Ənnan-as: «Nəra daŷ-ak ad aqqam iyyan daŷ-na daŷ əxil-nak, aqqam wa hadan daŷ zalgat-nak alwaq wad za təggəza tanaya-nak.»

³⁸ Inn-asan Ŷaysa: «Wər təssenam almaŷna n arat wa təgmayam əddi. Awak təfragam a dər-i tədrəwam alyazab wa z'aga daŷ alwaq wər nəggug?»

³⁹ Ənnan-as: «Awalla, nəfrâg a dər-ək tu-nədrəw.» Inn-asan: «Tidət a imos as təfrâgam a dər-i tədrəwam alyazab wa, tagim deŷ təmattant ta z'aga.

⁴⁰ Amaran daŷ batu ta təqqalat wa z'aqqamin daŷ əxil-in wala zalgat-in, wərgex nak a t-ihakkin. Kalar idaggan win in win as tawasammatagan.»

⁴¹ Əslan maraw nəttulab win hadatnen y awen, əššakkan Yaqub əd Yaxya.

⁴² Təzzar iŷr-en-du Ŷaysa inn-asan ketnasan: «Təssânam as aytedan win tawattafnen daŷ tišit ən muzaran ən təmattiwen saknin tarna y aytedan win as azzaran, amaran aytedan win daŷ-san attafnen əlxəkum saknin aytedan win as azzaran taŷmar.

⁴³ Mišan kawanay ad wər tagim adi gar-ewwan. Kalar as ira iyyan daŷ-wan ad ilu almaqam, wədi iqqəlet zun amašşaxal-nawan.

⁴⁴ Amaran wa daŷ-wan iran tizart, wədi iqqəlet zun aklı n awedan kul,

⁴⁵ fəlas nak Ag Aggadəm wər d-oseŷ əddənət y a di-əşxəlan aytedan. Kalar assa a d-əge y ad əşxəla y aytedan, akfa iman-nin fəl ad səddərfəŷ əs təmattant-in aytedan aggotnen daŷ bakkadan-nasan.»

Əzuzəy wa iga Ŷaysa Bartimay

⁴⁶ Iгла Ҷайса эд нэттүлэб-нет хар дин-эвэдэн аҗрэм ва н Ҷерикау. Ас иггаз Ҷайса шин агамад н эҗрэм вен энта эд нэттүлэб-нет эд таматтай таггет, илл-ай эмэддерҗэл ийян игъан есэм Бартимай аг Тимай иққиман фэл афай эн таррайт итасай.

⁴⁷ Да да җас ад исла ас Ҷайса ва н эҗрэм эн Назарет авен, энта ад идкал эмэсли-нет ад иганну: «Ҷа Ҷайса, Аг эннаби Дауэд, хөнөттөт-и.»

⁴⁸ Эрҗаман-ас айтедан агготнен у ад афасту, мишан исаххакат эмэсли-нет вөllen, иганну: «Ҷа Ҷайса, Аг Дауэд, хөнөттөт-и.»

⁴⁹ Иззэкат Ҷайса, инна: «Аҗриват-и-т-ид». Итауаҗра эмэддерҗэл, итауанн-ас: «Дават, төбдөда, иҗарр-ик.»

⁵⁰ Игар-ин эмэддерҗэл асалсау-нет ва н афалла, иггад, иннөмад Ҷайса.

⁵¹ Иссэстан-ту Ҷайса инн-ас: «Мас тареҗ а дак-к-ага?» Инн-ас эмэддерҗэл: «Эшшэс, а эреҗ а ди-д-иққэл асауад-ин.»

⁵² Төззар инн-ас Ҷайса: «Аглу, иззоуай-кай эзэгзан-нак сэр-и.» Иққал-т-ид асауад-нет даҗ тамазайт тен да, обаз таррайт, иггаз таматтай та төлкөмат и Ҷайса.

Игитан эн Ҷайса даҗ эҗрэм эн Ҷерусалам эд җөлөуҗөлауан-нет

11

Иги эн Ҷайса и Ҷерусалам игуз н эмөнөкал

¹ Ас дин-иһоз Ҷайса Ҷерусалам энта эд нэттүлэб-нет, даҗ энөмиһаз эн төҗрөмт та н Бөтфайай эд та н Бөтанөу, дөгма н өдҗаҗ was итауанну ва н "Ешкан эн Зайтун"; изаммазал эшшин даҗ нэттүлэб-нет.

² Инн-асан: «Аккиват таҗрөмт тен дат-ван ден. Төггәзам-тат-ин җас төнәуам өһуле н эздан иққанан, ас вөр кала ад иттөван. Ариват-ту, төлвөуам-т-иду.

³ Амаран ас дауан-инна аведан: "Ма төтаггим өдди?" Төним-ас: "Эмөли а сэр-эс иддэраран." Амаран а т-ид-иссуҗэл тармад.»

⁴ Эглан нэттүлэб вин ден осан-ин өһуле иққән фэл таррайт дат өми н аһан ийян; а ту-тарин.

⁵ Төззар өннан-асан айтедан өлләнөнен ден: «Ма төтаггим өдди? Мас төтарим өһуле ди?»

⁶ Эҗжөууабан-асан нэттүлэб с ава дауан-инна Ҷайса. Амаран тауаууан, оран өһуле, эглан дөр-эс.

⁷ Элууан-т-ид и Ҷайса. Эдфаран-ас фалл-ас исөlsa-насан, иуан-ту.

⁸ Ad tissəwan aytedan aggotnen i ʁaysa isəlsa-nasan day tarrayt, wiyyad ɣattasan-du ilədlad wər əhen šənnanan tissəwan-as-tan.

⁹ Aytedan win das-azzarnen əd win das-əlkamnen, ket-nasan siɣaren, gannin:

«Ozana! Təmmal i Məššina!

Iga Məššina albaraka

day wa d-osan s esəm n Ɛməli.

¹⁰ Iga Məššina albaraka

day taɣmar ta du-təzayat,

taɣmar n amaraw-nana Dawəd.

Ozana! Təmmal i Məššina

day jənnawan di ədkalnen!»

¹¹ Iggaz ʁaysa aɣrəm ən Yerusalam, ikka Ehan wa Zəwwəran n Ɛlɣibada, izaggazda arat kul wa day-as itaggin. As iga awen da idgâz-t-id ahad, igmad aɣrəm ənta əd nəttulab-net win maraw d əššin, əkkan Betanəy.

ʁaysa ilyan ašək iyyan as itawannu fig

¹² As əzəl wa hadan, igmâd-du ʁaysa əd nəttulab-net Betanəy, as ifray i gələk.

¹³ Ogga day igəg ašək ən fig inzâran. Ikk-ay y ad issən erâw. As t-in-osa, wər t-ihə ar ifərkak fəlas tamert n ar-net a wər nəga.

¹⁴ Təzzar iššewal ʁaysa s ašək wen, inna: «Təɣrədet əddənet wər iles awedan tettay n ara-nak.» Arat wa inna ʁaysa den sallan-as nəttulab-net.

Asatay ən ʁaysa kəl jola day Ahan wa Zəwwəran n Ɛlɣibada

¹⁵ As d-ewad ʁaysa əd nəttulab-net Yerusalam, iggaz aɣalla wa iɣlayan Ehan wa Zəwwəran n Ɛlɣibada a day-as isattay imassatagan əd mazanzan; isabbanbay tebəren šin fəl sansin kəl sanji izərfan-nasan, isabbanbay deɣ šisəqqima ən massatagan ən tədəbren.

¹⁶ Təzzar igdal y awedan waliyyan ad irzəg Ehan wa Zəwwəran n Ɛlɣibada ewây arat.

¹⁷ Inna y aytedan day əsəssəɣri wa tan-itaggu: «Wərgəy iktâb as, inna Məššina: "Ehan-in, a das-itəwəggu esəm ehan n əlɣibada i tawšeten kul". Kawanay amaran təgâm-tu "əsəlɣəs ən baydagan".»

¹⁸ Ɛslan muzaran ən limaman əd musanan n Ɛttawret y awen ɣas, ad gammayan təməwit tas z'əgin iman ən ʁaysa, mišan tah-en tasa-net fəlas tamattay ketnet a təsannahalat təggəma n əsəssəɣri-net.

¹⁹ As d-ihoz ahad, igmad ʁaysa əd nəttulab-net aɣrəm.

Tayart ən fig d əzəgzan əd təwatriwen

²⁰ As affaw əzəl wa hadan, iha Ƴaysa əd nəttulab-net tarrayt ən Yerusalām as d-əllaman dəgma n ašək ən fig wanād, ənayan-tu iqqur ketnet harkid kewan-net.

²¹ Ikta-du Butros ašək wen, inna i Ƴaysa: «Əššex, ənak fig wa təlɣana, ketnet iqqur.»

²² Təzzar inn-asan Ƴaysa: «Zəgzənat əs Məššina.

²³ Əggiyyey əsilakanax-awan as, i innan y ədɣax en: "Əgməd edag di tətətəqqe daɣ agarew", amaran as inna awen wər iga aššak daɣ əwəl-net, izzigzan as awa inna da ad agu; awedan wədi a das-agu Məššina awa daɣ-as igmay əddi.

²⁴ Daɣ adi, əmalax-awan as: arat kul wa ton-sayam Məššina daɣ təwatriwen-nawan, wədi zəgzənat as təgrāwam-tu, əddi a dawan-t-akfu Məššina.»

²⁵ «Amaran as tətattaram, kud ill-ay arat a iqqal wər noley tətəfam daɣ man y awedan, təssurəfam-as təzzar, əddi Abba-nawan wa ihan ijənnawan ənta da a dawan-issurəf ark mazalan-nawan.

²⁶ [Mišan as wər təssurufam y aytedan, wədi wər dawan-z-issurəf Abba-nawan wa ihan ijənnawan ark mazalan-nawan.»]

Ma ikfan Ƴaysa turagat ta ila

²⁷ İlas-du Ƴaysa ənta əd nəttulab-net tewaxlay n əɣrəm ən Yerusalām. İsaylay Ƴaysa daɣ Ahan wa Zəwwəran n Əlyibada as t-id-osan muzaran ən limaman, osan-t-id dey musanan n Əttawret əd muzaran ən Kəl-Əlyəhud,

²⁸ ənnan-as: «Awak ma təmos tarna tas tətəggaɣ aratan win? Ma kay-ikfan tarna n igi-nasan?»

²⁹ Inn-asan Ƴaysa: «A dawan-agax əsəstan iyyanda. As di-təjjəwwabam, a dawan-əməla wa di-ikfan tarna n igi n aratan win tagga da.

³⁰ Əməlat-i, awak əsəlməɣ wa iga Yaxya aytedan daɣ aman Məššina a ɣur d-ifal awen meɣ aggadəm?»

³¹ Təzzar ad tinəməšəwwiran gər-essan, gannin: «As das-nəna: "Məššina a d-ifal" a danaɣ-annu: "Mafel za wər təzzəgzanam s awa dawan-inna Yaxya?"

³² Wər das-za-nannu za: "Aggadəm".» Wər əhelan tənna n awen fəlas tamattay ketnet tətəfam as, Yaxya ənnəbi a imos.

³³ Təzzar ənnan i Ƴaysa: «Wər nəssen». Inn-asan Ƴaysa: «Daɣ adi nak da wər dawan-z-əməla wa di-ikfan tarna n igi n aratan win.»

12

Əlmital wa n magyakan n alɣanab

¹ Iššewal-asan Ƴaysa daƷ əlmitalan, inn-asan: «Aləs iyyan a inbalan eškan n əzzəbib, issəɣlay-tan afarag. IƷaz daƷ-as tagdayt ta daƷ za itawazmu əzzəbib, ikras deƷ ogga ihokken as z'iggar awedan wa itagazan afarag. Təzzar issəɣfar afarag-net en i magyakan wiyyad, iššokal.

² As du-tewad tamert ta n əmiləy n əzzəbib, izammazal iyyan daƷ eklan-net əs meddan win ɣur-əs əɣfarnen afarag-net y a ɣur-san d-awəy adagar-net.

³ As tan-in-osa əkli en, əbazan-tu, əgan-as šiwwit, əsoɣalan-tu məššis isikarayray ifassan.

⁴ Izammazal sər-san iyyan akli. As tan-in-osa, sabbasan eɣaf-net, əgan-as tar šəxšad.

⁵ Ilas məššis n afarag izammazal sər-san akli-net iyyan. As tan-in-osa, əbazan-tu, ənɣan-tu kərəz. Dəffər adi izammazal sər-san daƷ tanamazray wiyyad eklan-net aggotnen. Wiyyad za əggatan-tan har tan-əksanan, wiyyad ənɣan-tan kərəz.

⁶ Ab'as d-iqqim i məššis n afarag ar barar-net wa ikna tara. Izammazal-tu sər-san daƷ tilkamat, fəlas a inna daƷ man-net: "Immikkan as ad əssəɣməran barar-in."

⁷ Mišan as ənayan magyakan win əɣfarnen afarag barar wen, namannan gar-essan: "Ənta əddi amakkasu n afarag. Əndawat a tu-nanɣu kərəz, ad nəkkusət afarag."

⁸ Təzzar əbazan-tu, ənɣan-tu kərəz. Əgaran-in tafəkka-net sədi y afarag.»

⁹ «DaƷ adi ma z'agu məššis n afarag wen? Wərgəɣ assa a du-z-agu ənta iman-net, agu iman ən magyakan win, issəɣfər afarag-net i wiyyad aytedan?

¹⁰ Awak teɣaray a wər təgem daƷ Əlkəttaban as: "*Təhunt ta din-əgaran makrasan, ənta a təqqalat təhunt ta təkbalat ehan,*

¹¹ *arat wen Əməli a d-ifal, amaran isimaklal sər-na!"*»

¹² Ad gammayan muzaran win den əmmək was za səttərməsan Ƴaysa fəlas əgrân as əntanay a issoka s əlmital wen; mišan ya wər əhelan awen fəlas tamattay a əksudan. Adi fəl t-oyyan, əglan.

TənaƷmayt daƷ batu n amana

¹³ Dəffər awen əssokan-t-id arat daƷ Farisaytan d aytedan wiyyad əwarnen aganna n əmənokəl Herod fəl a das-agin tənagmayt, s a tu-sassannin arat fəl t-əbazan.

¹⁴ Osan-t-id ənnan-as: «Əššex, nəssân as əməggi ən tidət a təmosa, amaran wər t-illa i təksuda daƷ awa təganna, fəlas wər təzlaya daƷ almaqam n aytedan. Təsasaɣra əs tidət awas dana-iwar igi-net daƷ tarrayt ta n Məššina. A kay-nəssəstən, awak xalal arazam n amana y əmənokəl wa

zæwwëran Qaysara meɣ wër xalal? A tu-nërzëm, meɣ wër tu-za-nërzëm?»

¹⁵ Inn-asan Ƴaysa igrân tælmənufəqa-nasan: «Mafel tətajarrabam-i? Akfiwat-i-du tefelt n əzrəf a tat-ənəya.»

¹⁶ Ekfan-as-tat-in, təzzar inn-asan: «Ma ilan udəm d esəm win tat-əwarnen?» Ğnnan-as: «In Qaysara.»

¹⁷ Inn-asan: «Adi za agiwat i Qaysara awa kawan-issəwar, tagim deɣ i Məššina awa kawan-issəwar.» Isammaklal sər-san aljawab wa tan-ikfa Ƴaysa da.

Isalan əgânen daɣ batu ən tanakra daɣ təmattant

¹⁸ Dəffər awen osan-du Sadusaytan Ƴaysa, əmosnen aytedan əttâfnen as wër tu-təlla tanakra dəffər təmattant. Ğssəstanan-tu, ənnan-as:

¹⁹ «Əššex, ənnəbi Musa iktâb as: "As aba aləs oyya-du tantut dər wër ila barar, ilzâm amadray-net a tat-izləf fəl ad agu əzzurrəyya y əmidi-net wa aba den."

²⁰ Ğnta kala a t-əllan əssa mədrayan. Izlaf wa dasan-waššaran ketnasan, aba-tu wër d-oyya a imosan barar.

²¹ Izlaf wa n əššin təntut ta ɣur aba əmidi-net den. Ğnta da aba-tu wër d-oyya ara. Iga wa n karad awen da.

²² Ğssa mədrayan win, ketnasan əgan awen da, wër tan-ihə i d-oyyan ara. Dəffər as tan-aba ketnasan, aba tantut ten ənta da.

²³ Awak əzəl wa n tabadday, ma imos daɣ əssa mədrayan win den was za təqqəl təntut ten taɣurəs, dad zamas ketnasan əzlâfan-tat?»

²⁴ Inn-asan Ƴaysa: «Kawanəy alxata a təttafam, fəlas wərmad təssanam awa ənnan Ğlkəttaban, wala deɣ təssanam awa dər togda tarna ən Məššina,

²⁵ fəlas əzəl wa n tabadday, wër t-illa azalaf i meddan wala šidoden. Kalar təməddurt a z'agin šilat ən ta əgan angalosan daɣ jənnawan.

²⁶ Amaran daɣ batu ta təqqalat inəmməttan əd tanakranasan: awak teɣaray a wër təgem daɣ Ğttawret awa inna Məššina y ənnəbi Musa ɣur ənəfilal wa das-iga ɣur təfsəq. Wəgeɣ a das-inna Məššina: "Nak a imosan Ğməli n Ibrahim, d Isəhaq, əd Yaquub?"

²⁷ Məššina wër imos Ğməli ən təməxsə, kalar Ğməli ən win əddarnen a imos. Daɣ adi alxata zəwwëran a təham.»

Tamazaq təgât daɣ batu n alwajib wa ogaran

²⁸ Ihoz-du iyyan daɣ musanan n Ğttawret issisaman y əməšiwəl wa iga Ƴaysa da əd Sadusaytan, d aljawab oggâm wa dasan-iga Ƴaysa, inna i Ƴaysa: «Ma imos alwajib wa ogaran daɣ alwajiban kul win danəy-ikfa Məššina?»

²⁹ Inn-as ʒaysa: «Ēnta da alwajib wa ogaran: "Səsəmat Kəl-Israyil! Ēməli-nana Məššina, ənta ɣas Ēməli.

³⁰ Iru Ēməli-nak Məššina s əwəl iyyanda əd man ərdānen. Tireq-qu s awa tələɣ kul daɣ tayttay əd təɣurad."»

³¹ «Amaran alwajib wa ilkaman i wədi as: "Agu y əšəqqaqɣ-nak tara ta təgeɣ iman-nak."»

³² Təzzar inna əmusan n Ēttawret wen i ʒaysa: «Tidət-nak Əššex! Məššina iyyanda, amaran wər t-illa iyyan ar ənta.

³³ Amaran as t-ira awedan s əwəl iyyanda, ir-ay deɣ s awa ila kul daɣ tayttay əd təɣurad, ira deɣ əšəqqaqɣ-net s əmmək was ira iman-net, wər tu-təlla takutay tətirəkəmmet wala takutay iyyat wər oger adi.»

³⁴ Da daɣ ad isla ʒaysa i batu təgât s əgərri ta iga aləs a ənta a das-inna: «Kay, wər kay-iggug iguz ən Taymar ta n Məššina.» Ab'as t-illa i ihalan əsəstan ən ʒaysa.

Isalan əqqalnen Ēlməsix d ənnəbi Dawəd

³⁵ Isasaxru ʒaysa daɣ Ahan wa Zəwwəran n Əlyibada as iga əsəstan wa, inna: «Awak wərgəɣ a gannin musanan n Ēttawret, Ēlməsix Ag əmənokal ənnəbi Dawəd a imos?

³⁶ Dawəd za iman-net as t-isassanna Infas wa Zəddigan daɣ batu n Ēlməsix: "Ēməli Məššina inna y Ēməli-nin: Qamu daɣ əɣil-in, har əɣrədaɣ əsərəs ən zəngə-nak, agaq-qan daw daran-nak."

³⁷ Dawəd iman-net as iɣra Ēlməsix s esəm wa n Ēməli, daɣ adi manəmmək as z'iqqəl barar-net?» Batu ta iga ʒaysa da, toggam-tat tamattay tagget ta das-təssəsamat.

Tarɣəmt ən ʒaysa fəl ləkkum i musanan n Ēttawret

³⁸ Inna ʒaysa i tamattay daɣ əsəssəɣri wa tat-itaggu den: «Agəzat iman-nawan daɣ musanan n Ēttawret. Ērân ad saɣlayan əzlâgan šikadkaden zagrotnen, d ətəwəsəslam igân əs saɣmar daɣ sammanayan n aytedan.

³⁹ Ērân deɣ təɣimit daɣ daggan win əlanen almaqam daɣ nan win əlyibada ən Kəl-Əlyəhud d iguz ən daggan n aytedan win tawasaxmarnen daɣ məgura.

⁴⁰ Tayan awa əlanat tədoden šin as wər ədderan meddan-nasnat, taggin deɣ imaddan zagrotnen wər nəmos ar sokni. İlkâm a dasan-itəwəxkəm attadib labasan.»

Takutay ta tolayat

⁴¹ Iqqîm ʒaysa daɣ Ahan wa Zəwwəran n Əlyibada, illa dat-əs əssənduq wa daɣ itiddaw ərrəzəɣ n Ahan wa Zəwwəran n Əlyibada, iswād daɣ tamattay tətəggu daɣ-as azrəf. Sartakan daɣ-as məggərgas aggotnen azrəf aggen.

⁴² Tosa-du tēntut ən tēlōqqay as wēr idder alēs-net, tēssertak daḡ-as sanatat tēfelen as wēr tewed əlqimat-nasnat ərrəyal.

⁴³ Təzzar iḡra-du Ƴaysa inəttulab-net əs man-net inn-asan: «Əggyey silakanax-awan as, tēntut ən tēlaqqay ta, əs wēr idder alēs-net, togar aytedan a ketnasan tehakkay,

⁴⁴ fəlas ketnasan azrəf was wēr əddəran a daḡ əkfan, mišan ənta harkid əlləqqu-net tēdkal-du ərrəyalan s əntanay Ƴas a fəl təssan, təkf-en.»

13

Əsəssəyri igâ Ƴaysa inəttulab-net

Əsəssəyri igâ Ƴaysa daḡ batu n əbərəjji n Ahan wa Zəwwəran n Əlyibada

¹ Igammad Ƴaysa Ehan wa Zəwwəran n Əlyibada as das-inna iyyan daḡ nəttulab-net: «Əššex, ənak šiḡussay ən təhun šin as ikras ahan a! Šiḡussay n ahan!»

² Inn-as Ƴaysa: «Təhannayax ehan a zəwwəran a? Wēr daḡ-as du-za-taqqam təhənt təwərat təmidit-net. Ketnet ad itəwəjəbbərejjet.»

³ Dəffər awen, iqqîm Ƴaysa fəl ədḡax wa n Eškan ən Zaytun, daḡ tənəmiwəla n Ahan wa Zəwwəran n Əlyibada, as t-issəstan Butros əd Yaqub əd Yaxya d Andrawəs, wər əqqiman nəttulab win hadatnen, ənnan-as:

⁴ «Əməl-anax əmmay ad z'agu arat wa tənney ihogan? Ma za təqqəl alḡalamat ta za tassaknit as ibuk y igi?»

Əsəssəyri igâ Ƴaysa daḡ batu n əzəl wa ilkaman

⁵ Inn-asan Ƴaysa: «Ənkədat, a kawan-wər-issəxrək awedan waliyyan,

⁶ fəlas aytedan aggotnen a du-z-asinen əttafan esəm-in, akkiyyan daḡ-san igannu imos Əlməsix, əssəxrəkən s awen aytedan aggotnen.

⁷ Amaran as təslam i tərnuq ən məgiran, əd salan ən məgiran, a kawan-wər-issərməx awen. Aratan di kundaba osan-du, mišan wərgəx əntanay a əmosnen təzərəst n əddənet.

⁸ Ad əknəsnat addawlaten gar-essanat, əknəsnat taymaren gar-essanat, əməlan-tu nəgəynəgəyan n amaḡal daḡ daggan aggotnen əd laz labâsan. Mišan aratan win kul, wər əmosan ar ənətti ən təlawayt təhât əlmital ən ta du-tətizarat əs tēntut tətəgəzət amzur.»

⁹ «Kawanay amaran ənkədat əd man-nawan. Ad tat-tarmasam, tətəwəsəbdədam dat saggawaran n əššəriḡa, təwəgginat-awan təwit daḡ nan n əlyibada ən Kəl-Əlyəhud.

Ad tətəwəsəbdədam dat naxkiman əd mənokalan fəlas kawan-iwar esəm-in, akf-iwan adi tarrayt n a fall-i tag-gayyem,

¹⁰ fəlas tawşeten kul n əddənet kundaba əslenat i salan n Əlinjil.

¹¹ As tətərməsam, tətəwasəbdədam dağ adag n əşşəriğa, a kawan-wər-işşəwəş awa za tannim. Agat ɣas batu ta kawan za tətawakfit dağ assayət tədi da, fəlas wərgəy kawanay iman-nawan a tat-igan; kalar Infas wa Zəddigan a tat-z-agin dağ mawan-nawan.

¹² Ad sətərməsan aytedan imədrayan-nasan səssugin iman-nasan, sətərməsan abbatan bararan-nasan səssugin iman-nasan, affallagan bararan fəl marwan-nasan səssugin iman-nasan.

¹³ Awedan kul a kawan-igzər fəlas kawan-iwar esəm-in, mişan wa dağ-wan izmaran har təzərəst, wədi ad iɣləs.»

¹⁴ «As tənayam "taxxaramt ta səksədat" təha edag was wər imməkkan a tu-təha – Agret awedan wa iɣarrin isalan win! – aytedan win d-ogaz adi dağ akal ən Yahudəyya, win di addaggənet s ədɣayan;

¹⁵ wa iqqiman dağ adag wa n afalla n ahan-net, a du-wər-azzabbat y a din-idkəl arat ihân ehan-net.

¹⁶ Wa ihan tawagost-net a du-wər-iqqəl aɣaywan y a din-idkəl asalsaw-net.

¹⁷ İket aɣazab ad t-aginət tədoden šin əganen šidusen əd šin sankasnen dağ adan win di!»

¹⁸ «Əgməyat dağ Məşşina a du-wər-imazayyat adi əd tamert n asamed irtâyan d akonak,

¹⁹ fəlas aɣazab səksədan a du-z-asin dağ adan win di as a d-ixlak Məşşina əddənet wər kala tətawanay tulat-net, za wər ilkem du-tosa tulat-net.

²⁰ Kundaba as adan win di ikf-en Əməli təzərəst, wədi wər t-illa i dağ-san du-z-irəgan. Kalar ad təwəzzəgzəlan fəl əddəlil n aytedan win tawasanafrannen.»

²¹ «Əddi amaran, as dawan-inna awedan: "Ənəyat! Əlməsix illa da", madəɣ: "İlla den", a das-wər-təzzəgzənam!

²² Fəlas ad t-əməlan əlməsixan ən bahu, əməlan-tu dəɣ ənnəbitan ən bahu. Ad taggin aɣalamaten əd təlməxjujaten, har as ənnar əfragen awen, əssəxrəkan aytedan harkid win isannafran Məşşina.

²³ Dağ adi ənkədat əd man-nawan! Aratan di ketnasan əgey-awan-tan daw aɣaf.»

Əsəssəɣri igâ ɣaysa dağ batu ən tawaxlay-net əddənet

²⁴ «Dəffər təssust ta za tagit dağ adan win di, ad alsinat šiyay təfuk, igməd ənnur tallit,

²⁵ ertəkan-du etran, nəgəynəgəynat təxəllak šin əlanen tarna daɣ jənnawan,

²⁶ alwaq wədi da ad za təwənəya nak Ag Aggadəm as du-z-asa əheɣ šignawen, daɣ tarna-nin tagget, əd tanaya-nin,

²⁷ təzzar zəmmizəlay angalosan əs təxəmmar an əkkozat n əddənet, y a d-əššidəwan aytedan kul win sannafranax.»

²⁸ Inn-asan: «Abəzat alfaydat s əlmital wa n ašək ən fig. Igda ad hussəyan lədlad-net, iggaz-du šin tanazra, ad təssənam as tamert ta n akasa təhōz.

²⁹ Zund əmmək en daɣ əs as tənayam aratan win dawana-əmalax əddi, təssənam as aɣrud n əddənet ihoz, wər illa gar-ewwan dər-əs arat.

³⁰ Əggəyyey əsilakanax-awan as tamattay ta da n azza-man win nəha da, ad tənəy ənətti n aratan kul win dawana-əməla da.

³¹ İjənnawan d amaɣal ilkam ad ib'as t-əllan, mišan batuten-in əllanat-tu har faw.»

Əsəssəɣri daɣ issinkad Ƴaysa inəttulab-net

³² «Əzəl amaran wala alwaq wa daɣ z'agu awa dawana-əməla da, wər t-illa i daɣ-san issənan, gər za angalosan a əhanen ijənnawan, wala Barar iman-net. Wər t-illa i daɣ-san issənan ar Abba.

³³ Ənkədat, təsəmmutəgam, fəlas wər təssenam assaxat ta daɣ z'agu adi.

³⁴ İha adi əlmital n aləs iškalan. As iggaz šin teklay iga šinaden n aɣaywan-net daɣ fassan n eklan-net. Akkiyyan imal-as əššəxəl was t-iwar igi-net. Inna i wa ogazan imi n ahan ad inkəd.

³⁵ Daɣ adi ənəkədat, fəlas wər təssenam alwaq wa daɣ du-z-asu məššis n aɣaywan, kud alməz, wala adawannay n ahad, wala datazal, wala aɣora.

³⁶ A kawan-du-wər-asu daɣ alwaq daɣ as wər təswedam, aɣəz-kawan-du tənsəm.

³⁷ Awa dawana-ganna da, ketnawan as dawana-tu-ganna, a t-imosan as: Ənkədat.»

İsalan ən təməttant ən Ƴaysa

14

Ətəwənyal n alwardi fəl Ƴaysa

¹ Əššin adan a din-aba daɣ əmud wa n Akkay d əmud wa daɣ tamatšinat təgəlwen šin wər iha xamira. Imuzaran ən limaman əd musanan n Əttawret harwa da gammayan təmərkəst tas z'abəzan Ƴaysa agin iman-net,

² fəlas a gannin: «Ad wər nagu adi daɣ adan n əmud, fəl a du-wər-awəy ənəjərway əs tamattay.»

³ Awen as itaggu Ƴaysa ənta iha taɣrəmt ta n Betanəy, imigarat i Simɣon was kala a t-igraw kətru. Itamansaw den da as du-t-osa təntut tewâyat butalay igân daɣ təhunt mallat, iha alwardi iknan šizada d əzzəwi as itawannu nar. Tosa-du ɣas tərza imi ən butalay wa teway da, ad tənəqqal alwardi wen fəl aɣaf ən Ƴaysa.

⁴ Arat wen iga alham daɣ arat daɣ aytedan win əllanen den, ad tinəmənɲin gər-essan: «Ma infa əhluk n alwardi a?

⁵ Wərgex ifrâg a din-anzu əlqimat ən karadat təmad n əzəl n əššəxəl, itəwəkfu awen i tələqqawen?» Ad suɣulan təntut ten təgna.

⁶ Mišan inn-asan Ƴaysa: «Akfat-tat əməslag! Mafəl das-təxaššadam iman? Əmazal olâɣan a di-təga da,

⁷ fəlas šiləqqawen faw da əllānat ɣur-wan, id təram adi təfrāgam a dasnat-tilalam; nak amaran, wərgex faw əllex ɣur-wan.

⁸ Təntut ta awa təfrag, təg-ay. Təɣal fall-i alwardi y ad təsəmmutəg taɣəssa-nin y əzəkka harwa dat alwaq.

⁹ Eggiyyex silakanax-awan as, edag a daɣ ittəmal Əlinjil daɣ əddənət ketnet, a daɣ-as attamal awa təga təntut ta, tətəwəkta-du.»

Əsəttərməs ən Yahuza Ƴaysa

¹⁰ Den da ad inkar Yahuza Isxarəyuti wa n iyyan daɣ nəttulab ən Ƴaysa win maraw d əššin, ikka imuzaran ən limaman fəl a dasan-iməl təməwit tas z'agu Ƴaysa daɣ fassan-nasan.

¹¹ Isaddawat-tan awen, təzzar əgan-as arkawal n ad t-akfin azrəf. Ad igammay Yahuza təməwit tas z'agu Ƴaysa daɣ fassan.

Əsəmmutəg n əmud wa n Akkay

¹² Əzəl wa azzaran n əmud wa daɣ tamatšinət təgəlwen šin wər iha xamira, əzəl s ənta a daɣ tawagzaman jəɣal win əmud wa n Akkay, ənnan nəttulab i Ƴaysa: «Mənid tarex a dak-nəsəmmutəg imensewan n əmud wa n Akkay?»

¹³ Təzzar issoka Ƴaysa əššin daɣ nəttulab-net Yerusalem, inn-asan: «Əggəzat aɣrəm, ad tammanayam d aləs ewâyan ətəkin idkâran aman. Əlkəmat-as.

¹⁴ Ehan wa iggaz, annat i məššis, "Inn-ak Əššex: 'Məni edag daɣ ahan-nak wa daɣ za nammansaw nak əd nəttulab-in daɣ əmud wa n Akkay?'"

¹⁵ A kawan-assaknu daɣ suru-net ehan wa n afalla elwân, əhân-tu mutag kul, iknâ. Əddi da a dana-za-təsəmmutəgam imensewan win Akkay.»

¹⁶ Eglan nöttulab, ækkan aḡrēm. As din-ewadan ənayan awa da dasan-imal ʒaysa. Təzzar sammatagan imensewan win Akkay.

Etəmäl ən təkaddilt

¹⁷ As tuda tēfuk osa-du ʒaysa, iddew əd nöttulab-net win maraw d əššin.

¹⁸ Isixamar ʒaysa ənta əd nöttulab-net den da taman-sawan as dasan-inna: «Eggəyyey əsilakanax-awan as, iyyan daḡ-wan a dər-i idrâwan da da a di-z-aggin daḡ fassan.»

¹⁹ Iḡsad awen iman-nasan, akkiyyan daḡ-san inna i ʒaysa: «Engəm wərge nak?»

²⁰ Inn-asan: «Iyyan daḡ-wan, kawanay inöttulab-in win maraw d əššin, a dər-i idrâwan əmərədda daḡ əḡəzu iyyanda a z'agin adi.»

²¹ Illikan as nak Ag Aggadəm a di-iba s əmmək iman-net wa əmalan Elkəttaban daḡ batu-nin, mišan ya, iket alḡazab a t-inəy awedan wa di-igan daḡ fassan. Awedan wədi, a dasafu fadda a du-wər-iggez əddənet.

Esəbdəd ən saktan ən tassaḡ ta taynayət

²² Tattin da da as idkal ʒaysa tagəlla, iga igodan i Məššina, irza tagəlla ten, izun-tat i nöttulab-net, inn-asan: «Atšiwat da, taḡəssa-nin adi.»

²³ Dəffər awen idkal təkabart, iga igodan i Məššina, amaran ikf-asan-tat, namaglazan awa tat-ihan ketnasan.

²⁴ Amaran inn-asan: «Adi azni-nin isitaddan arkawal ən tassaḡ gər Məššina əd tamattay-net. Azni wa, ad inḡəl fəl tənfa n aytedan aggotnen.

²⁵ Eggəyyey silakanax-awan as, wər z'ələsax tessay n esmad n alḡanab, iket wər d-ewed əzəl wa daḡ z'ašwa wa aynayan daḡ Taymar ta n Məššina.»

²⁶ Dəffər awen issəggad ʒaysa əd nöttulab-net daḡ təmmalen a d-əḡmadnen Azzabur. As tanat-əḡradan, ækkan adḡax wa n Eškan ən Zaytun.

Emel ən ʒaysa šigget ta tu-z-əgu Butros

²⁷ Inna ʒaysa i nöttulab-net: «Ketnawan ad iwəliwəl əzəḡzan-nawan id ənnan Elkəttaban: "Ad əwətay amadan, iba-tu, təzzar wəziwəznat ayfad-net."

²⁸ Mišan dəffər ətəwəsənkər-in daḡ təmattant, a dawan-in-izarax s akal wa n Galilaya, əqqələx-awan daḡ-as.»

²⁹ Təzzar inn-as Butros: «Kud iwalawal əzəḡzan-nasan ketnasan, da wa-nin wər z'iwəliwil.»

³⁰ Inn-as ʒaysa: «Eggəyyey silakanax-ak as, ahada da, as z'əgu əkəji y aḡora sanatat təḡər, taggâdaḡ-i har karadat tāklaten.»

³¹ Mišan izazzawat Butros daḡ batu-net, inna: «Kud iqqal as ətəwəŋxa kərəz a za nagu nak dər-ək, da wər kay-z-əggəda. Ənnan nəttulab ketnasan awen da.»

Gatsemanay

³² Dəffər awen iddew dər-san Ƴaysa s afarag n eškan ən zaytun igân esəm Gatsemanay. As din-ewadan, inn-asan: «Qamiwat da da iket di ad tagga šiwatriwen.»

³³ Izzənkaz fall-asan, iddew əd Butros əd Ƴaqub əd Ƴaxya. Tamazayt tenda a daḡ əssəntan man-net aḡşud, išşəwaş.

³⁴ Inn-asan: «Awa əgan man-in daḡ əḡşud, əbuka a di-aba. Ad wər təfələm da, amaran a kawan-wər-ibəz etəs.»

³⁵ Izzənkaz fall-asan a əndərran, issəjad ad itattar, igmay daḡ Məşşina kud immikkan a t-issəgəg awa t-id-izayan daḡ alwaq wen.

³⁶ Inna daḡ təwatray-net: «Ya Abba-nin, arat kul təfrəgəy igi-net. Səgəg-i ta daḡ takabart n alɣazab, dər iga awen da ya, taget tara ta-nak, wərgəy ta-nin.»

³⁷ Dəffər awen iqqal-du Ƴaysa inəttulab-net win karad en, ogaz-tan-du ənsân. Issənkə-tan, inna i Butros: «Simɣon, kay adis etəs a təgəy? Indar-ak ad taga wala ɣas alwaq iyyanda tokâya?»

³⁸ Akəyat, tansəyam Məşşina a kawan-oggazan daḡ jarra-batan n Iblis. Tidət as ənnəyat n aggadəm təsidadan igi n awa olaɣan, mišan igdal-as rəkkəm ən təɣəssa-net igi n awen.»

³⁹ İlas əzənkəz fall-asan, iga təwatray ta daḡ iga ihogan.

⁴⁰ Dəffər adi ilas-in tewaylay ən nəttulab-net win karad, os-en-in ənsân, fəlas awa dasan-iga etəs daḡ iguz ab-as əfragan arra ən şittawen-nasan. Wər əssenən a das-ənnən.

⁴¹ As dasan-d-iga tewaylay ta n karadat, inn-asan: «Harwa da tənsâm, təsanfim? Batu za təɣrad. Əssənət âs alwaq ewad-du wa daḡ za təwəgga nak Ag Aggadəm daḡ fassan ən nasbakkadan.

⁴² Ənkərat-in əndawat! Ənəyat! Wa di-z-agin daḡ fassan ewad-du.»

Təkaddilt ta iga Ƴahuza Ƴaysa d ətərməs ən Ƴaysa

⁴³ Harwada išşewal Ƴaysa as d-osa Ƴahuza wa n iyyan daḡ nəttulab-net win maraw d əşşin, iddew əd tamattay a d-əssiglan muzaran ən limaman əd musanan n Əttawret əd muzaran ən Kəl-Əlyəhud. Tamattay ten tewây şikabiwen əd təburəgen.

⁴⁴ Əməkəddəl wa igan Ƴahuza imâl i tamattay ten əmmək was z'əzdəyan Ƴaysa, əs tənna ta dasan-iga: «Aləs

was di-tənyam as tu-zalammeḡ, ənta ʔaysa. Abəzat-tu, taglim dər-əs, tagim dər-əs ənnəyat.»

⁴⁵ Osa-du Yahuza ʔas, ihoz-in ʔaysa, inn-as: «Əššex?» Təzzar izalammat-tu.

⁴⁶ Təggad-in tamattay əs ʔaysa, təbaz-tu.

⁴⁷ Iha-du iyyan daḡ nəttulab ən ʔaysa, ilbay takoba-net iwat sər-əs akli n Əlimam wa Zəwwəran, ifras-du təməzzuk-net.

⁴⁸ Təzzar inna ʔaysa i tamattay ten: «Awak nak əjajəb iyyan n abaydag a əmosa as di-du-tətakkim tewayam šikabiwen əd təburəgen y a di-təbəzam?»

⁴⁹ Wərgəḡ əzəl kul əlḡ gar-ewwan, sasayra daḡ Ahan wa Zəwwəran n Əlyibada, mafel wər di-təbəzam? Əssənət za as, awa igan da, igâ fəl ad andu awa sər-i ənnan Əlkəttaban.»

⁵⁰ Den da a t-əfalan nəttulab-net ketnasan, əddəggagan fall-as.

⁵¹ İlkam əmawad iyyan i tamattay en, ilsa afər ihossayan daw wər iqqen arat. Əggadan-in sər-əs meddan y ad t-əbəzan,

⁵² oyy-asan-du afər wa ilsa, ozal wər ilsa arat.

Təbadday ən ʔaysa dat Asaggawar wa Zəwwəran

⁵³ Immeway ʔaysa s Əlimam wa Zəwwəran a ɣur əddewan muzaran ən limaman, əd muzaran ən Kəl-Əlyəhud, əd musanan n Əttawret.

⁵⁴ Iga Butros i ʔaysa ləkkum zagren har iggaz ammas n aɣalla n aɣaywan n Əlimam wa Zəwwəran. Iqqim ad isukus ɣur maššaxalan n Əlimam wa Zəwwəran əqqimnen əs təmsay tərɣāt den.

⁵⁵ As itaggu awen, imuzaran ən limaman d Asaggawar wa Zəwwəran ketnet gammayan i z'aggayen fəl ʔaysa fəl ad əgrəwan tarrayt n igi ən man-net, mišan wər t-əgrewan,

⁵⁶ fəlas aytedan aggotnen a d-ənkarnen əgan fəl ʔaysa šiggəyyawen əmosnen bahu, mišan wər tanat-təha ši tənimmannakat əd tahadat.

⁵⁷ Ənkaran-du wiyyad daḡ-san əssəwaran-tu bahu, ənnan:

⁵⁸ «Nəsl-âs as inna: "Ehan wa Zəwwəran n Əlyibada, s aytedan a t-əkranen, a tu-jəbbərəjjeḡ, əssəbdəda daḡ karad adan iyyan wər əkresan aytedan."»

⁵⁹ Mišan batu ta dâ, əmmizrayan daḡ-as.

⁶⁰ Təzzar inkar Əlimam wa Zəwwəran, ibdad daḡ ammas n əljəməɣat, issəstan ʔaysa, inn-as: «Awak arat a wər təgəna daḡ təɣəttas šin dak-tawagginen da?»

61 Mišan igla Ƴaysa iffista, wər das-inna wala. Ilas Elimam wa Zəwwəran, inn-as: «Awak kay a imosan Elməsix, Barar ən was nətaggu təmmalen?»

62 Inn-as Ƴaysa: «Awalla əmosaq-qu; amaran a di-tənəyam nak Ag Aggadəm əqqima daw əxil n Əməli ən Tarna, tənəyam-i deχ əzaya-du, əheχ igarakan əgmâda-du ijənnawan.»

63 As isla Elimam wa Zəwwəran y awen, izazzarrat təkadkat-net fəl awa əgan man-net daχ əχsüd, inna: «Awak ma nəkka i təgəyyawen šiyyad?»

64 Təslâm y əmadraw wa iga da i Məššina! Ma tənnam?» Ənnan ketnasan əššəriχa-net təmattant.

65 A fall-as sutufan wiyyad daχ-san, əχmasan-as, ad t-əggâtan, gannin-as: «Kay ya ənnəbi, əməl wa kay-iwatan.» Dəffər awen itawakfa i magazan n Ahan wa Zəwwəran n Əlyibada a das-tagin šiqqas.

Ikus ən Butros tazdəyt i Ƴaysa

66 Harwa da iqqim Butros daχ ammas n aχalla en da, as du-tosa iyyat daχ tamašşaxalen n Elimam wa Zəwwəran,

67 tənay-tu isukus əs təmsay, təzaggazd-ay, tənn-as: «Kay da, iyyan daχ aytedan win əddewnen əd Ƴaysa wa n aχrəm ən Nazaret!»

68 Mišan iggad Butros as t-izdây, inna: «Wərmad əssânay awa daχ-i təšşewala, za wər t-əgreχ.» Təzzar igmad aχalla, ikka imi-net. Iyra əkəji aχora da tamazayt ten da.

69 Tənay-tu təmašşaxalt təlas tənna y aytedan əbdâdnen den: «Aləs wa, iyyan daχ-san a imos.»

70 Ilas Butros iggad Ƴaysa.

Arat n amazay dəffər awen, ənnan aytedan əbdâdnen den, əntanay dâ, i Butros: «Illikan as kay da iyyan daχ-san a təmosa, fəlas kay da in akal ən Galilaya.»

71 Ad ihhad Butros, igannu: «Məššina ya təlyanay-i kud bahu a əge. Əhâdaχ-awan as wər əzdayay aləs was təgannim əddi.»

72 Da da χas ad inna Butros awen, ənta ad iga əkəji y aχora teχaray ta n sanatat, ikta-du Butros batu ta das-iga Ƴaysa, as das-inna: «As z'agu əkəji y aχora sanatat təχər, təgeχ-i karad ikusan i təzdəyt.» Təzzar əχşadan man ən Butros wəllen iggaz šin tala.

15

Təbadday ən Ƴaysa dat ənaxkim Bilatəs

1 As affaw aχōra əmmənayan muzaran ən limaman əd muzaran ən Kəl-Əlyəhud əd musanan n Əttawret,

almaḡna Asaggawar wa Zəwwəran ketnet, sassakradan Ƴaysa, ewayan-tu, əgan-tu daḡ fassan n ənaxkim Bilatəs.

² Issəstan-tu Bilatəs, inn-as: «Awak kay daḡ a imosan əmənokəl ən Kəl-Əlyəhud?» Inn-as Ƴaysa: «Kay iman-nak as tənneḡ adi.»

³ Ad sawaran muzaran ən limaman Ƴaysa ark igitan aggotnen.

⁴ İlas-tu Bilatəs əsəstan, inn-as: «Təsalla y aratan kul win kay-əsawaran da. Kay ma tənneḡ?»

⁵ İqqim Ƴaysa wər das-iles tənna n arat. Isammaklal awen əs Bilatəs.

⁶ İd d-iḡlay əmud wa n Akkay a d-ikkəs ənaxkim Bilatəs amaskasaw was tara tamattay agamad.

⁷ As itaggu awen ill-ay aləs igan esəm Baryabbas, ihân kasaw ənta əd nəffəllag wiyyad əs kala jannajarwayan tamattay har əgan iman n awedan daḡ awen.

⁸ Tənkər tamattay ad təgammay daḡ Bilatəs a das-əgu tənəfust ta ḡur-əs təlmad.

⁹ Inn-asan Bilatəs: «Awak tara a təgam a dawan-əkkəsəḡ əmənokəl ən Kəl-Əlyəhud daḡ fassan?»

¹⁰ Ənta Bilatəs issân as aššaddat ən manzaḡ ən muzaran ən limaman Ƴaysa a fəl t-əgan daḡ fassan.

¹¹ Mišan əgan-du muzaran ən limaman daḡ tamattay ad tədgəz Bilatəs y a das-d-ikkəs Baryabbas, wərgəḡ Ƴaysa.

¹² İlas Bilatəs awal, inn-asan: «Daḡ adi mas təram ad t-əga y aləs was təgannim da əmənokəl ən Kəl-Əlyəhud?»

¹³ Əlasan adakal ən maslan-nasan ad gannin: «Taytay-tu fəl təgəttawt, a t-iba!»

¹⁴ Inn-asan Bilatəs: «Mafel za? Ma iḡşad?» Mišan sahhaken wəllen imaslan-nasan, ad gannin: «Taytay-tu fəl təgəttawt!»

¹⁵ İssof Bilatəs ləkkum y awa təra tamattay. İkkas-asan-du Baryabbas daḡ kasaw, Ƴaysa amaran isassag-as tenəḡay labasat s ələkkud dəffər adi amaran ixkam-as ətəwətəytay fəl təgəttawt.

Tamakkakkayt ən sojitan daḡ Ƴaysa

¹⁶ Ewayan sojitan Ƴaysa s ammas n aḡarḡar n aḡalla n ahan wa n əšşəriḡa. Əḡran-du sojitan kul win hadatnen.

¹⁷ Əssəlsan-tu əbərnuz zaggəḡan wa lasan mənokalan, əssəwaran-as deḡ almat ən təkəbbut zun ta n mənokalan təḡât daḡ şənnanan. İmos awen igi daḡ-as tamakkakkayt.

¹⁸ A tu-saslaman, gannin-as: «Oyy-ik, əmənokəl ən Kəl-Əlyəhud!»

¹⁹ Ad əggatan eḡaf-net s agabal ən telant, sutufan fall-as, tigərəffen sajadan-as.

20 As daḡ-as əḡradan igi ən təmakkakkayt tørtayət əd təsəssəlka, əkkəsan fall-as əbərnuz zaggayan wa t-əssəlsan, əssoḡalan-tu isəlsa win-da-net, əḡlan dər-əs, əḡmədan dər-əs aḡrəm y ad t-attaytayan fəl təḡəttawt.

Ətəwətəytəy ən Ƴaysa fəl təḡəttawt

21 Emmənayan sojitan əd Simḡon wa n əḡrəm ən Qərwan wa erawan Alaskandər əd Rufus ifâl-du šiwəgas. Şahhaşşalan-tu aggay ən təḡəttawt ta fəl z'itəwətəytəy Ƴaysa.

22 Ewayan Ƴaysa s adag as itawannu Golgota, almaḡna n awen «Edag wa n Təkəyya.»

23 Əkfan-tu esmad n əzzəbib irtāyan d amagal imosan əzzənəf ən təḡəlbast ifannazan talawayt, mişan ugay Ƴaysa əs təssay-nasan.

24 Təzzar ətaytayan-tu sojitan fəl təḡəttawt, əzunan isəlsa-net əs təşayeren.

25 Ədəḡəlşet as t-əttaytayan fəl təḡəttawt.

26 Əttaytayan dənnəg-əs əsəllum a fəl iktâb əddəlil wa sər-əs d-ewayan təmattant. Əsəllum en, iktâb fall-as as: «Awa Əmənokal ən Kəl-Əlyəhud.»

27 İjjiyat Ƴaysa d əşşin jujab ən baydagan ətəwətəytəy. İyyan itawataytay daḡ əxil ən Ƴaysa, wa hadan itawataytay daḡ zalgat-net.

28 Emmək en da as tənda batu ta tənnat daḡ Əlkəttaban: «Ad uddan daḡ maggan ən təkma.»

29 A das-taggin aytedan win du-takaynen den ark batuten, siwəliwilan iḡafawan-nasan, gannin-as: «Dew! Kay wa innan ad təjəbbərəjjeḡ Ehan wa Zəwwəran n Əlyibada tələsaq-qu akaras daḡ karad adan,

30 əmərədda safsu iman-nak, tazzabbəḡ-du təḡəttawt di.»

31 Emmək en daḡ as imuzaran ən limaman əd musanan n Əttawret da əḡân daḡ-as tamakkakkayt, tinəmənнин gar-essan: «Ənta wa issəfsan aytedan, wər ifreg əsəfsi ən man-net.

32 Kud ənta Əlməsix a imos, wa n əmənokal n Is-rayil, azzabbatet-du təḡəttawt əmərədda ad nənəy adi, nəzzəgzən sər-əs.» Meddan win dər ijjiyat Ƴaysa ətəwətəytəy əntanay da əhân şin-net.

Agamad ən man Ƴaysa

33 As iga ammasnazal, əlsanat şiyay akal ketnet har təga tazzar.

34 As təga tazzar, idkal Ƴaysa əməsli-net, inna: «Eli, Eli, lama sabaxtani?» Almaḡna n adi: «Ya Əməli-in, Ya Əməli-nin, mafel toyeyə-i əd man-in?»

35 Æslan-as arat day aytedan win æbdadnen den, ad gannin: «Səsəmat! Iḡarru ənnəbi Ilyas!»

36 Ozal-in sər-əs awedan iyyan, issəlmaḡ-du təduft day bənegər, ittal-tat d əmi n agabal, izzal-as-tat-in y a tat-aššəw, igannu: «Səllanat, ad nəssən a t-id-asu ənnəbi Ilyas, ikkəs-t-idu fəl təgəttawt ta»

37 Amazay wen da ad ikkas Ḡaysa əməsli issohen, amaran əgmadan-tu man.

38 Assayət ten da ad izzərrat əfər wa zəwwəran imosan anaxər gər adag wa zəddigan əd wa ogaran tazdak day Ahan wa Zəwwəran n Əlḡibada. Issərrat-du anaxər wen ḡur afalla har eres.

39 As inay kabtan ən sojitan ən Kəl-Ərrum ibdâdan den əmmək was əgmadan man Ḡaysa, inna: «Illikan as aləs wa Barar ən Məššina.»

40 Əbdâdnat deḡ tədoden šiyyad sədi, əswâdnat day awa igan den. Šidoden en təh-enat Maryama Madəl, əd Maryama ta terawat Yaḡub wa əndərran əd Yosas, d iyyat təgât esəm Salma.

41 Harwa iha Ḡaysa akal wa n Galilaya as das-əlkamnat, ədhâlnat-tu s awa əfragnat. Əbdâdnat deḡ tədoden šiyyad den aggotnen a d-əddewnen əd Ḡaysa əs Yerusalam.

Ətəwəgga ən təḡəssa ən Ḡaysa day əzəkka

42 As tokay takəst n əzəl wa n əlgəmət, simutugan aytedan y əzəl wa n təsanfawt;

43 ikka Yusəf wa n əḡrəm n Arimatay ehan ən Bilatəs. Yusəf aləs a imos itiwasaḡmaran ihân Asaggawar wa Zəwwəran, imos deḡ awedan igân attama day assa ən Taḡmar ta n Məššina. Ənta a igan əmazal ən taholat imosan as ikka Bilatəs, igmay day-as təḡəssa ən Ḡaysa.

44 Isammaklal əs Bilatəs tərrib n agamad wa əgan man Ḡaysa. Isassaḡra-du kabtan wanâd, issəstan-tu kud itidda iba ən Ḡaysa wala.

45 As das-iga kabtan wa isalan n iba ən Ḡaysa, ikfa Bilatəs Yusəf turagat n ad idkəl təḡəssa ən Ḡaysa.

46 Izzənza-du Yusəf šifit ta təhossayat, ikkas-du Ḡaysa fəl təgəttawt, ig-ay day-as, təzzar ig-ay day əzəkka imosan akazam, isaḡḡararad-du təhunt zəwwərat ihar sər-əs iminet.

47 Təlla Maryama Madəl den əd Maryama ta terawat Yosas, əswâdnat day adag wa day tətawagga təḡəssa ən Ḡaysa den.

Tanakra ən Ḡaysa day təmattant

16

Emel wa iga angalos tanakra en Yaysa day tэмattant

¹ As okay əzəl wa n təsanfawt, tənkar Maryama Madəl əd Maryama ta terawat Yaqub əd Salma əzzənzanat-du ađutan əzodnen y a tan-əsələlnat tağəssa ən Yaysa.

² Əqlanat ağôra, ħur gəmmud ən təfuk əzəl wa n alxad, əkkanat əzəkka.

³ Əglānat tinəmənninat gər-essanat: «Nakkanatay a da ma dana-z-isəyğərurədan təhunt ta təharat əzəkka?»

⁴ Ədkalnat asawad-nasnat, ənaynat as, təhunt tanad, tətawasaxararad sədi. Təhunt ten da za təkna təzzəwwərt.

⁵ Əggaznat əzəkka, ənaynat dağ-as aləs n əmawad n əsamlal, iqqım dağ əxil-nasnat, ərməxnat.

⁶ Inn-asnat: «Ad wər tərməxnat. Yaysa wa n Nazaret, wa itawataytayan fəl təgəttawt as təsaggadmat. Wər illa da. Inkar-du dağ tэмattant. Ənakmat edag was kala a dağ-as tənsa təğəssa-net.

⁷ Əmərədda aglimat təməlmat i nəttulab-net, harkid Butros, as a dasan-in-izar s akal wa n Galilaya. Den da a tu-za-tənəyam s əmmək was dawan-t-inna.»

⁸ Təzzar əgmadnat-du əzəkka ozālnat, təga dağ-asnat təysəst, isimaklal sər-əsnat awa igan den. Awa əganat dağ tərəmməq wər t-illa i s ənnanat arat dağ tarrayt.

Ənəfilal ən Yaysa y aytedan aggotnen

⁹ Ağora n əzəl wa n alxad a d-inkar Yaysa dağ tэмattant, iga ənəfilal-net wa azzaran i Maryama Madəl, tas kala dağ-as ikkas əssa kələsuf.

¹⁰ Təgla təga isalan y aytedan win as kala tidawan əd Yaysa. As itaggu awen əğsādan man-nasan, hallin iba-net.

¹¹ Mišan as əslan as iddâr, tənây-tu, ugayan s ad əzzəgzənan awen.

¹² Dəffər awen inafalal Yaysa əs təməwit iyyat y əşšin dağ nalkiman-net jiwankatnen dağ əsuf.

¹³ Təzzar əqqalan Yerusalam əmalan awen i nalkiman win hadatnen, mišan əntanay da wər dasan-itawazagzan awen.

Əzəmmizəl wa iga Yaysa i nəttulab-net s əddənet ketnet

¹⁴ Dəffər awen inafalal-du Yaysa i nəttulab-net win maraw d iyyan dağ amazay a dağ tattin. Issoğal-tan təgna n iba n əzəgzan-nasan əd taggarmamt ən wallan-nasan, fəlas wər əzzəgzanan y aytedan win t-ənaynen dəffər tanakra-net dağ tэмattant.

¹⁵ Inn-asan: «Ağliwat, tilalam əddənet ketnet təmmālam isalan n Əlinjil y id t-illa awedan.

¹⁶ I izzəgzanan, itawasalməx dəx dəx aman s esəm-in ad igrəw efsan. Amaran wa ugayan s əzəgzan, ad t-iwər attadib ən Məššina.

¹⁷ Əntanatay da alyalamaten šin za təwənəynen fəl aytedan win sər-i əzzəgzannen: Ad əkkəsan kələsuf dəx aytedan əs tarna n esəm-in, əššiwəlan awalan ən tawšeten wər əzdayan,

¹⁸ amaran kud ədkalan taššolen əs fassan-nasan wala əšwan sənsəg da wər dasan-z-iyşəd adi wala. As əssəwaran ifassan-nasan imiranan, ad əzzəyan.»

Tewaylay ən Yaysa ijənnawan

¹⁹ Ig-asan Əməli Yaysa batu ten xas, immədkal əs jənnawan, iqqim dəx əxil ən Məššina.

²⁰ Əntanay amaran, əqlan ad əmmalan isalan n Əlinjil dəx adag kul. Illil-asan Əməli s əššəxəl wen, isataddu awa gannin s alyalamaten əmosnen təlməxjujaten šin taggin.

Ēlinjil wa n Luqa Ēsenti

1-3 Ya Tayofil wa əkney saǵmar, aytedan aggotnen a əktabnen isalan n awa ǵur-naǵ igan, s əmmək iman-net was dana-tan-əssəǵalan aytedan win tan-əggəyatnen əs šittawen-nasan harwa ǵur ənətti-nasan, əqqalan aytedan əšǵâlnen daǵ amel n awal ən Məššina. Awen da fəl di-d-iggaz nak da, dəffər as əššiggarəǵ isalan di kul s əlluǵ a d-ibazan ǵur ələsəl-nasan, a dak-in-aga y-asan akatab innizzaman,

4 fəl ad təkkəsəǵ aššak as təssunen šin tətəwasasəǵra əttiddanat.

Təhəwt ən Ǵaysa əd təmmədrəyt-net

Ētaməl ən təhəwt n ənnəbi Yaxya wa isalməǵan aytedan daǵ aman

5 Elan win daǵ imos Herod əmənokal n akal ən Yahudəyya, ill-ay əlimam iyyan igân esəm Zakarayya ihân taggayt ən limaman win hayawan n Abəya. Tantut-net tahayawt ən Harun, esəm-net Elizabet.

6 Ēnta dər-əs əmosan alǵadılan dat Məššina, əǵân y alwajiban n Ēməli d alamaran-net ləkkum daǵ wər əlen lahan waliyyan.

7 Wər əlen barar waliyyan fəlas Elizabet a wər nətilu bararan, əgmâdan-tan dey elan wəllen.

8 Ēzəl iyyan itaggu Zakarayya dat Məššina əššəǵəl wa taggin limaman fəlas taggayt ən limaman ta iha as d-issəǵlay igi n awen.

9 Ēbaznat-tu tašəǵeren, əmosnen as, ənta a z'iggəzan edag wa zəddigan daǵ Ahan wa Zəwwəran n Ēlǵibada n Ēməli, issəqqəd daǵ-as ađutan fəl majmar wa iskatan y awen. Šišəǵeren šin imos igi-nasnat alǵadat ən limaman.

10 As iga alwaq wa daǵ taqqadan ađutan, tamattay ketnet təbdâd daǵ təfərray n Ahan wa Zəwwəran n Ēlǵibada, tətattar.

11 Wala a ihogan inafalal-as-du angalos n Ēməli ibdâd daǵ əǵil ən majmar wa n əsəqqəd n ađutan.

12 Inay Zakarayya angalos ǵas irmaǵ, təggaz-tu tasa.

13 Mišan inn-as angalos: «Zakarayya! A kay wər təggəz tasa fəlas Məššina iqbâl mansay-nak, tantut-nak Elizabet ad təgrəw barar, amaran ag-as esəm Yaxya.

14 Ad taddawəǵ, təfəliwəsəǵ; təsəddəwət dey təhəwt-net aytedan aggotnen,

15 amaran ad iqqəl awedan zəwwəran dat Əməli. Wər mad as z'asū esmad n alyanab wala deyx esmad waliyyan. Ad t-idnøy Infas Wa Zəddigan harwa da iha tadist n anna-net.

16 Ad d-issuyəl Kəl-Israyil aggotnen Əməli-nasan Məşşina.

17 Ənta a du-z-izaran y Əməli imos anammazul-net, igrâw Infas Wa Zəddigan əd tarna şilat ən win igraw ənnəbi İlyas, fəl a d-awəy alxer gər aytedan əd bararan-nasan, awəy-du inəmməzray s ad ilen tayttay ta əlan aytedan win əyğalnen. Təməwit tədi as z'isəmmutəg y Əməli tamattay təsimatagat i ləkkum y-as.»

18 Təzzar inna Zakarayya y angalos: «Məni alyalamat ta di-za-təssusənat as adi ad agu? Ənta nak ayxmar waşşaran a əmosa, tantut-in deyx əğlân dağ-as elan wəllen.»

19 Inn-as Angalos: «Awa nak Jibril, akli ən Məşşina wa dat-əs ibaddadan. Ənta a di-d-izimmazalan sər-ək y a dak-agay isalan hossaynen win di.

20 Amaran dad zamas wər təzzəgzanax isalan win dak-əgey da, as z'andinen dağ alwaq-nasan, ad ammadad əminak. Wər za tələsəy awal iket wər d-osa əzəl wa dağ z'agu arat wədi.»

21 Awen as itaggu tamattay təqqâl i Zakarayya, əqqânan yafawan-nasan y awa t-in-isahhagan dağ adag wa zəddigan.

22 As t-id-igmad, indar-as a dasan-işşiwəl fəlas imi-net a immədadan, a dasan-isidugun. Əssanan as arat iyyan a das-d-inafalalan.

23 As issənda adan-net win əşşəxəl dağ Ahan wa Zəwwəran n Əlyibada, iqqal ayaywan-net.

24 Dəffər awen təga tantut-net Elizabet tadist, təzzar təğdal i man-net ətəwənay har təga səmmosat təlil, təgannu:

25 «Awa igi n Əməli! Ənta dağ-i issanan, ikkas-i asakor wa di-əggatan aytedan.»

Ətaməl ən təhəwt ən Yaysa

26 Təha Elizabet tallit-net ta n sədisat as izammazal Məşşina angalos Jibril s əxrəm as itawannu Nazaret ihân akal ən Galilaya.

27 Issok-ay təmawat iyyat wər nəzday meddan harwada təğât esəm Maryama. Amaran Maryama təsımarkas d aləs igân esəm Yusəf, imosan arat dağ əzzurrəyya n əmənokəl Dawəd wa n ənnəbi.

28 Os-et-du angalos, inn-as: «Maryama, ma təxlaka! Əməli izizabbat-du fall-am arraxmat-net. Issân dağ-am.»

29 Iqqan awal wen eɣaf ən Maryama, idgaz-tat, təzzar ad təsamadran awa imos almayna n assalam wen.

30 Inn-as angalos: «A kam-wər-təgəz tasa Maryama, Məššina izizzabbat-du fall-am arraxmat-net.

31 Ad taga tadist, təgrəwa barar, tagaɣ-as esəm Ƴaysa.

32 Ad itəwəsəxmər, agu esəm Barar ən Məššina di n Amadkol. Ad t-akfu Ɛməli Məššina taɣmar n amaraw-net Dawəd,

33 izar i hayawan ən Yaqub har faw, amaran təmənukəla-net ad təxləl.»

34 Tənnə Maryama y angalos: «Manəmmək as z'agu adi ənta nak harwada wər əzdaya meddan?»

35 Inn-as angalos: «A fall-am d-azzabbat Infas wa Zəddigan, talsim tanaya ən Məššina di n Amadkol, təqqəl-am zun telay, awen da fəlas barar wa za tileɣ ad agu esəm Ɛmizdag agu deɣ esəm Barar ən Məššina.

36 Ɛnâm təšəqqaq-nam Elizabet! Ɛglân daɣ-as elan wəllen mišan təga tadist ən barar. Ɛnta tas itawannu wər tətīlu bararan, tallit-net ta n sədisat a təha əmərədda,

37 fəlas wər t-illa a imosan muxal fəl Məššina.»

38 Tənn-as Maryama: «Nak taklit n Ɛməli, itəwəgget-i awa tənneɣ.» Təzzar ifal-tat angalos.

Iki ən Maryama Elizabet

39 Tənkər Maryama daɣ adan en da, təhaz təkka taɣrəmt iyyat n akal ən Ƴahudəyya imosan akal n ədɣaɣan.

40 Tos-in ehan ən Zakarayya, təssəslam fəl Elizabet.

41 Da da ɣas ad təsla Elizabet y assalam ən Maryama ənta ad izabagat barar wa ihan tadist n Elizabet, təzzar idnaytat Infas wa Zəddigan.

42 Tədkal Elizabet əməsli-net, tənnə: «Togara šidoden kul agaraw n arraxmat, barar deɣ wa du-z-igmədan tadist-nam igrâw arraxmat.

43 Awak nak ma əmosa as di-du-tətasu anna n Ɛməli-nin?

44 Da da ɣas ad əsley y assalam-nam ənta ad izabagat barar wa ihan tadist-in fəl tədəwit.

45 Təbbilaləɣ kam təzzigzanat as, awa dam-inna Ɛməli ad andu.»

Təmmal ta təga Maryama i Məššina

46 Tənnə Maryama:

«Ɛwəl-in immâl adkul n Ɛməli,

47 Iman-in isidawat-tan Məššina di n Ɛmaɣlas-in.

48 Fəlas asawad a din-iga daɣ təmmədrəyt ən təklit-net.

A ibazan ɣur əmərədda

aytedan n azzaman kul ad annin əbbilalaḡ.

⁴⁹ Fəlas Wa ilan Tarna ig-i aratan zawwarnen.

Esəm-net i zəddigan.

⁵⁰ Itihənəttit y aytedan n azzaman kul

win t-əksudnen.

⁵¹ Iga əfus-net imazalan ən təla ən tarna.

Iziwazawaz aytedan win ədkalnen iman-nasan.

⁵² Ikkas daw muzaran taḡmar-nasan,

idkal šiləqqawen.

⁵³ Isayyawan win əlluznen daḡ awa izodan,

oyya iməggərgas əqquran fassan-nasan.

⁵⁴ Idhal Kəl-İsrayil n eklan-net,

fəlas itihənəttit

⁵⁵ y İbrahim d əzzurrəyya-net har faw,

imos awen arkawal iga i marawan-nana.»

⁵⁶ Təmal Maryama ḡur Elizabet har təga edag ən karadat təlil amaran təqqal aḡaywan-net.

Təhəwt ən Yaxya wa isalmayan daḡ aman

⁵⁷ Osa-du alwaḡ n iguz n əmzur fəl Elizabet, təgraw barar.

⁵⁸ Əslan mahharagan-net əd šəqqaqan-net əhənəttə zəwwəran wa das-iga Məššina da, əddəwen əntanay da.

⁵⁹ As əzəl wa n əttam osan-du y ad səmməmkədan barar.

Ərân a das-agin esəm Zakarayya, esəm wa daḡ iga abba-net.

⁶⁰ Mišan tənn-asan anna-net: «Kala kala! Ad agu esəm Yaxya.»

⁶¹ Ənnan-as: «Esəm ya wədi wər tələḡ əšəqqaq a t-igân!»

⁶² Təzzar ad sidugunan y abba ən barar, y a dasan-iməl esəm was ira ad t-agu barar-net.

⁶³ Isaddagan-asan Zakarayya a t-id-akfin əsəllum. Iktab fall-as: «Esəm-net Yaxya.» Isammaklal sər-san awen ketnasan.

⁶⁴ Təzzar okay əmədəd Zakarayya amazay wen da, immora iləs-net, ad itaggu təmmalen i Məššina.

⁶⁵ Təggaz tasa aytedan kul win əxsarnen daḡ ihəz-nasan, wazawazan salan n awa igan den daḡ akal ən Yahudəyya ketnet wa n ədḡayan.

⁶⁶ Aytedan kul win əslanen awen ətaffan-tu daḡ wallan-nasan, gannin: «Ma z'iqqəl wa da barar?» İllikan as issiwar-tu Əməli əfus-net.

Təmmal ta iga Zakarayya i Məššina

⁶⁷ İdnyay İnfas wa Zəddigan Zakarayya wa n abba ən barar, isannafalal-as Məššina awal-net, ad igannu:

⁶⁸ «Təmmal i Məššina,

Əməli n İsrayil,

fəlas masnat a iga daḡ tamattay-net,

isaddarf-tat.

⁶⁹ Ikkas-ana-du daɣ ahan n əkli-net

Dawəd Amaylas ilân tarna,

⁷⁰⁻⁷¹ a dana-z-agəzan daɣ zənga-nana,

ikkəs-ana daɣ fassan ən maksanan-nana kul.

Imos awen arkawal iga daɣ mawan n ənnəbitan-net

win irəw, isinafran.

⁷² Emmək wədi as issəkna təhanint-net

i marawan-nana,

issənda arkawal ən tassaɣ-net

zəddigan.

⁷³ Arkawal wen ihād fall-as

y amaraw-nana Ibrahim as,

⁷⁴ a danaɣ-assafsu daɣ zənga-nana,

fəl a tu-nəɣbəd ši wala tasa ən waliyyan.

⁷⁵ Nəzəddig noɣād iket nəddar.

⁷⁶ Amaran kay barar-in,

a kay iwər esəm ənnəbi ən Məššina di n Amadkol,

kay a du-z-izaran y Əməli

fəl a dat-əs takna tarrayt-net,

⁷⁷ təssusəna tamattay-net

as efsan əllân ɣur təsureft ən bakkadan.

⁷⁸ Awen itagg-ay Əməli-nana Məššina

fəl əssəbab ən təhanint tagget ta tu-təhat.

Adi a fəl dana-du-z-asu Əlməsix

ola əd gəmmud ən təfuk,

⁷⁹ fəl ad imələwləw ənnur-net

fəl aytedan win əqqimnen daɣ šiyyay,

əhân telay ən təmattant,

izəzzəluləɣ takkolen-nana daɣ tarrayt ta n alxer.»

⁸⁰ Ad idaggal Yaxya, tətawad-t-id tayttay-net. Izday ikallan ən saffan har əzəl wad issosan Kəl-Israyil fəl man-net.

2

Təhəwt ən Ƴaysa

¹ Azzaman win daɣ z'ihəw Ƴaysa a daɣ omar Qaysara Ogəstəs wa n əttəbəl n Ərrum s ad uddanan aytedan kul win taɣmar-net.

² Tuddant ten ənta a tazzarat. As təga Kirinəyas a imosan əmuzar n akal wa n Surəya.

³ Aytedan kul gallin ad uddanan. Əkkulluk n awedan ikka aɣrəm ən marawan-net.

⁴ Adi fəl igmad Yusəf ənta da aɣrəm wa n Nazaret ihân akal ən Galilaya, igəzzay s aɣrəm n aljad-net əmənokəl Dawəd a t-imosan aɣrəm ən Betalxam, ihân akal ən Yahudəyya,

⁵ fəl a daḡ-as uddan. Iddew əd Maryama dər isimarkas. As itaggu awen da təḡa tadist.

⁶ Əhân Betalxam as fall-as iga alwaq n iguz n əmzur.

⁷ Təggaz Maryama amzur n aḡafadday-net. Itaggu awen dəgma n əsəḡən n aharay osaxan d ahan wa ḡur əzzəbben fəlas edag a wər əḡrewan daḡ ahan en. Təttal barar daḡ əfər, təssəns-ay daḡ əḡlal ilân den.

Ənəflal wa d-iga angalos i madanan

⁸ Akal en əhân-tu madanan əssimbarnen eharay-nasan.

⁹ Den da a d-inafalal dat-san angalos n Əməli, təsammalawlaw tanaya n Əməli edag wa əhan, əgan tərəmməq zəwwərat.

¹⁰ Inn-asan angalos: «Ad wər tərmeḡam, isalan olaxnen a dawan-d-eway a du-z-awəynen tədəwit tagget əs tamattay ketnet.

¹¹ Azalada Əməḡlas-nawan ihəw daḡ əḡrəm n Dawəd. Ənta a imosan Əlməsix Əməli.

¹² Ənta da awas tu-za-təzdəyam: "Ad tənəyam ajanḡay ittalan daḡ əfər, isrâd daḡ əḡlal."»

¹³ Wala a ihogan inafalal-du agan zəwwəran n angalosan ḡur wen, əmmâlan Məşşina gannin:

¹⁴ «Təmmal i Məşşina daḡ jənnawan, alxer daḡ əddənet y aytedan win əhanen agna-net.»

¹⁵ Əqqalan angalosan ijənnawan ḡas, namannan madanan: «Əndawat Betalxam, ad nənəy awa danaḡ-imal Əməli da.»

¹⁶ Təzzar əḡlan əhâzan. Osan-in Maryama əd Yusəf d ajanḡay, isrâd daḡ əḡlal.

¹⁷ As ənayan madanan barar, əssoḡalan awa dasan-itawannan sər-əs.

¹⁸ Aytedan kul win əslanen y awa ənnan madanan isimaklal sər-san awen.

¹⁹ Maryama ənta, təttâf isalan en kul daḡ man-net, tənazzar daḡ-san.

²⁰ Təzzar əqqalan madanan əmmâlan adkul ən Məşşina, taggin-as təmmalen fəl aşşaddat n arat kul was əslan əd wa ənayan, əs ketnet iga s əmmək wa daḡ as dasan-ittəmal.

²¹ As əzəl wa n əttam, itawasamankad barar, itawagg-as esəm ḡaysa, imos as esəm wa da a imal angalos y anna-net dat igi-net tadist.

Əməwəy ən ḡaysa s Ahan wa Zəwwəran n Əlyibada

²² As d-ewad alwaq ən zazdag wa imal Əttawret n ənnəbi Musa, iddew Yusəf əd Maryama s əḡrəm ən Yerusalam fəl

ad əzzəzdəgan iman-nasan. Ewâyan deş barar y ad tagin da təşlift ən Məşşina,

²³ s əmmək as iktâb daş əşşəriş n Əməli as «*Barar kul wa n aşafadday, ad iskət y Əməli.*»

²⁴ Yusəf əd Maryama issiwar-tan əşşəriş n Əməli daş tarrayt n əzəzdəg-nasan ad akfin təzəgzəmt ən sanatat tədəbren şin əsuf madeş sanatat şin əşrəm.

²⁵ Aşrəm ən Yerusalam ixsâr daş-as aləs igân esəm Simşon n alşadil n əmiksad ən Məşşina. Igâ attama n Ənəssəsməd a du-z-asin assafsu Israyil. Simşon en izzibbad-du fall-as Infas wa Zəddigan,

²⁶ s ənta a das-isannafalan as wər tu-z-iba wər inay Əlməsix n Əməli.

²⁷ Eway-t-id Infas ən Məşşina s Ahan wa Zəwwəran n Əlyibada. Imazayyat-du əd marwan ən Şaysa tamazalan s alşadat ta tan-issəwar əşşəriş daş batu ən barar-nasan.

²⁸ Idkal Simşon barar, iga təmmal i Məşşina, inna:

²⁹ «Əmərədda Əməli ad tayyaş akli-nak

ad t-iba daş alxer,

id awa di-tənneş inda,

³⁰ fəlas ənaya əs şittawen şin-da-nin

Əmaşlas wa dana-du-təssoka,

³¹ wa du-təsammatagaş i təmattiwen kul,

³² imos ənnur

as z'ikkəsan daş şiyay

aytedan win wər nəmos Kəl-Əlyəhud,

awəy-du deş adkul əs tamattay-nak Kəl-Israyil.»

³³ Abba-net d anna-net əqqânan şafawan-nasan y aratan win sər-əs tawanninen da.

³⁴ Təzzar ittar-asan Simşon a dasan-igan albaraka, amaran inna i Maryama anna ən Şaysa: «Əssən as barar a isinafran-tu Məşşina fəl ad d-awəy agadal əd tanakra ən Kəl-Israyil aggotnen, iqqəl əssəbab n ənəməşray gər aytedan.

³⁵ Əmmək wədi as z'isəffəggu awa ihan iwallan n aytedan aggotnen. Kam iman-nam a kam-izzuzər əwəl zun tu-tərzâg takoba.»

³⁶ Təll-ay deş tənnebit iyyat təknât tuşaray təgât esəm Xənnətu wələt Fanwal ən tawşet ta n Aşşir, ədâsan əssa elan n azalaf daş təmmədrəyt-net.

³⁷ A aba aləs-net wər təles azalaf, har təga əttamat təmərwen n awatay d əkkoz. Faw təha Ehan wa Zəwwəran n Əlyibada. Təşbâd Məşşina ehad ezal, tətuzam, tətattar.

³⁸ Tamazayt tenda a daş-qan du-tosa, təga igodan i Məşşina. Ad tətəggu isalan ən Şaysa y aytedan kul win

əganen attama n ad d-izəzzəbbət Məššina tədarfit-net fəl Yerusalam.

³⁹ As əssəndan marwan ən Ƴaysa igi n arat kul wa tan-issəwar əššərixa n Ƴməli, əqqalan aƳrəm-nasan Nazaret ihan akal ən Galilaya.

⁴⁰ Idagğal barar, itilu tayttay d əgərri, izazabbat-du fall-as Məššina arraxmat-net.

Assa ən Ƴaysa Ehan wa Zəwwəran n Ƴlyibada imos aw maraw elan d əššin

⁴¹⁻⁴² Awatay kul əggizzayan marwan ən Ƴaysa s aƳrəm ən Yerusalam y əmud was itawannu wa n Akkay, imos awen alxadat n əmud wen. As iqqal Ƴaysa aw maraw elan d əššin əddewan dər-əs s əmud wen.

⁴³ As əƳradan adan win amud, əqqalan aƳaywan, Ƴaysa amaran iqqim-in daƳ Yerusalam wər əssenən daƳ awen.

⁴⁴ A əxilan iha aljamaƳat ən məššukal win dər əddewan. As əgan əşikəl n əzəl, a das-sagğadan daƳ šəqqaqan-nasan əd təməzdəyt-nasan.

⁴⁵ Mišan wər t-əgrewan, təzzar əqqalan Yerusalam, sagğadan-as.

⁴⁶ As əzəl-nasan wa n karad gar-essan dər-əs, osan-t-id daƳ Ahan wa Zəwwəran n Ƴlyibada inixama əd musanan n Ƴttəwret, issisam-asan, isastan-tan deƳ.

⁴⁷ Aytedan kul win əslanen y awa igannu, təsimaklal sər-san tayttay-net d aljawaban-net.

⁴⁸ As t-ənayan marwan-net əhagan, tənn-as anna-net: «Barar-in ma imos awa dana-təge da? Nak d abba-nak təššiwaš-ana taƳara-nak, nosa edag kul nəsağğad-ak.»

⁴⁹ Inn-asan: «Ma fel za as di-təsagğadam? Masnat a wər təgem as təlzâm-i təximit daƳ ahan n Abba-nin?»

⁵⁰ Mišan wər əgren awa dasan-inna den.

⁵¹ Iddew Ƴaysa əd marwan-net, zagadayan əqqalan aƳrəm ən Nazaret, ibbirdag-asan. Anna-net təttaş aratan en kul daƳ man-net.

⁵² Idagğal Ƴaysa, tətittəy təla-net əgərri, ikannu gərrezat i Məššina d aytedan.

Ƴaysa əd Yaxya wa isalmaƳan daƳ aman

3

Təlxtubat ən Yaxya

Təsəntit n əššəxəl ən Yaxya

¹ Awatay wa n maraw əd səmmos ən Qaysara Tabirəyas da taƳmar, Fons Bilatəs a imosan əmuzar n akal wa n Yahudəyya, amaran Herod ixkâm fəl akal wa n Galilaya,

amaqqar-net Filibus ixkâm fəl wa n Iturayya əd wa n Tərakonit, Lisanəya ənta ixkâm fəl akal wa n Abila.

^{2a} Xânan əd Kayif əntanay əmosan ilimaman win za-wwarnen.

^{2b} Awatay wen da a d-izzəbbat awal ən Məşşina fəl Yaxya aq Zakarayya dağ əsuf.

³ Dəffər awen illil Yaxya ikallan kul win ahanen attayan n agarew wa n Yordan, itaggu y aytedan təlxutbat, igannasan ad təwəsəlməxan dağ aman imos awen arat issiknan tətubt-nasan, fəl ad əgrəwan təsureft ən bakkadan-nasan.

⁴ Emmək əddi was tənda batu ta iktab Ənnəbi Isayas, as inna: «*Aləs iyyan idkâl əməsli-net dağ əsuf igannu: "Səmmutəgat abaraqqa y Əməli! Təsəssiyədam tarrayen dat-əs!*

⁵ *Id t-illa ənahox ketnet ad inbəl. Idxaxan əd gefan ad ərəsan, tarrayen šin əfraxnen ad axədnat, ibaraqqaqan win wər nogda ad agdin*

⁶ *Inəy awedan ketnet əlyillas wa d-izazzabbat Məşşina."*»

Təlxutbat ən Yaxya

⁷ Adi a fəl igannu Yaxya i təmattiwen šin t-idu-tasinen y a tanat-issəlməx dağ aman: «*Xa taşşolen šin! Ma kawan-issosanan ədərrəg y attadib ən Məşşina wa d-izayan.*

⁸ Dağ adi taggiwat imazalan olaxnen təsəttəddim sər-san tətubt-nawan! Wər igda ad təgannim dağ man-nawan: "Nakkanay əzzurrəyya n ənnəbi İbrahim a nəmos", fəlas silakanax-awan as Məşşina ifrâg ad isəmməttəy šihun šin təhannayam da, ixlək-du dağ-asnat əzzurrəyya y İbrahim!

⁹ Agat ənnəyat! Tazəft harwa əmərədda da təmmotag y a du-təsəddəngər y eşkan. Dağ adi aşək kul wa wər nətirəw aratan olaxnen ad itəwəxtəs, itəwəgər-in dağ təmsay.»

Emmək was za nagu alxal wa imal Yaxya

¹⁰ A tu-sastanan aytedan, gannin-as: «*Dağ adi mas danağ-iwar a tu-nagu?*»

¹¹ Inn-asan: «*Awedan wa ilan əşşin səlsa, akf-et iyyan i wa tu-wər-nəla; wa ilan a itša, akfet dağ-as wa tu-wər-nəla.*»

¹² İnabazan n amana əntanay da, tasin-du Yaxya fəl a tan-issəlməx dağ aman, ənnan-as: «*Əşşex, mas danağ-iwar a tu-nagu?*»

¹³ Inn-asan: «*Ad wər təzzərzəmam a ogaran awa dawan-itawannan.*»

¹⁴ Əssəstanan-tu dəx sojitan, ənnan-as: «*Nakkanay za, mas danağ-iwar a tu-nagu?*» Inn-asan: «*Ad wər tərəkəbam dağ awedan waliyyan azrəf-net, wala dəx təssəwəram-tu bahu. Agdat s alxaq-nawan.*»

Assa n Ælmæsix

¹⁵ Aytedan kul win æslanen y awa igannu Yaxya, ægân attama; akk awedan isamadranan daḡ æwæl-net kud Yaxya en da a imosan Ælmæsix wala.

¹⁶ Awen da fæl dasan-inna Yaxya ketnasan: «Nak, aman a daḡ qawan-salmaḡa, mišan izay-du aləs s awa di-iga daḡ šigrat, wær eweda wala arra ən suḡan ən ḡateman-net. Ænta Infas Wa Zæddigan æd tæmsay a daḡ qawan-z-issælmæḡ.

¹⁷ Iha ælmital n awedan ittâfan tesayt y ad izzæzær alkama-net. Išadaw alkama daḡ tadangawt-net, šixal amaran ag-enat daḡ tæmsay tæbilaglagat faw.»

Iguz ən Yaxya kasaw

¹⁸ Iгла Yaxya daḡ amel n Ælinjil, itaggu y aytedan ænnæsixatan wiyyad aggotnen.

¹⁹ Herod amaran wa n æmænokal n akal ən Galilaya æruḡmatan a das-iga daḡ batu ən Herodæyas tæmosat taḡur amadray ən Herod en da igân esæm Filibus, ig-âs deḡ wiyyad æruḡmatan fæl arak mazalan labasnen kul win hadatnen iga.

²⁰ Iššota Herod fæl arak mazalan win den kul igi ən Yaxya daḡ kasaw.

Ætawæsalmæḡ ən ḡaysa daḡ aman

²¹ As tawasalmæḡan aytedan kul daḡ aman, itawasalmæḡ daḡ-san ḡaysa ænta da. Itattar alwaḡ wen da as ænnolaman jænnawan,

²² izzæbbat-du fall-as Infas wa Zæddigan iha šaššelan ən tædabert, igmad-du æmæsli ijænnawan, inna:

«Kay a imosan Barar-in æknex tara, tæssinda-du agna-nin.»

Aljad ən ḡaysa Ælmæsix

²³ Ila ḡaysa edag ən karadat tæmærwæn n awatay as issænta æššæḡæl-net.

Ættâfan aytedan as ag Yusæf wa n ag Heli.

²⁴ Heli ænta ag Mâtat, Mâtat ag Lebi,

Lebi ag Malki, Malki ag Yannay, Yannay ag Yusæf,

²⁵ Yusæf ag Matasiyas, Matasiyas ag Amos,

Amos ag Nahum, Nahum ag Xasli, Xasli ag Naggay.

²⁶ Naggay ag Matti, Matti ag Matasiyas,

Matasiyas ag Samḡi, Samḡi ag Yosax, Yosax ag Yoda,

²⁷ Yoda ag Yohanan, Yohanan ag ḡaysa,

ḡaysa ag Zærubabil, Zærubabil ag Assalat, Assalat ag Nayri,

²⁸ Nayri ag Malxi, Malxi ag Addi, Addi ag Kosam,

Kosam ag Almadama, Almadama ag Er,

²⁹ Er ag ḡaysa, ḡaysa ag Alyazar, Alyazar ag Yorim,

Yorim ag Mâtat, Mâtat ag Lebi,

³⁰ Lebi ag Simyon, Simyon ag Yahuda,
 Yahuda ag Yusəf, Yusəf ag Yunam, Yunam ag Ilyakim,
³¹ Ilyakim ag Malaya, Malaya ag Mayna,
 Mayna ag Mâtat, Mâtat ag Natan, Natan ag Dawəd,
³² Dawəd ag Yasay, Yasay ag Yubayd,
 Yubayd ag Boxaz, Boxaz ag Sala, Sala ag Nasun,
³³ Nasun ag Yaminadab, Yaminadab ag Admin,
 Admin ag Arni, Arni ag Xasrun, Xasrun ag Farəs, Farəs ag
 Yahuda,
³⁴ Yahuda ag Yaqub, Yaqub ag Isəhaq,
 Isəhaq ag Ibrahim, Ibrahim ag Terax, Terax ag Naxur,
³⁵ Naxur ag Sarux, Sarux ag Raggaw,
 Raggaw ag Falax, Falax ag Yabbir, Yabbir ag Salax,
³⁶ Salax ag Kaynam, Kaynam ag Arfakšad,
 Arfakšad ag Sam, Sam ag Nux, Nux ag Lamax,
³⁷ Lamax ag Matusala, Matusala ag Henox,
 Henox ag Yarit, Yarit ag Malelyal, Malelyal ag Kaynam,
³⁸ Kaynam ag Enus, Enus ag Set, Set ag Adəm,
 Adəm ənta Məššina t-id-ixlakan.

4

Ətəwəjərrab ən Yaysa

¹ Igməd Yaysa tamawen n agarew wa n Yordan idkâr-tu Infas wa Zəddigan. Infas wa da a t-issokan teneray.

² Iga day-as əkkozat təmərwen n əzəl itajarrab-tu Iblis. Adan win kul ig-en wər itša wala, as əğradan ih-ay laz.

³ Inn-as Iblis: «Kud kay Barar ən Məššina, taməra təhunt ta s ad təqqəl amensay.»

⁴ Inn-as Yaysa: «Wərgex ənnan Elkəttaban: "Awedan wər itəddər əs mensewan yas."»

⁵ Ikka dər-əs Iblis edag iknan əhuki, issəsbad-tu day tağmaren kul n əddənət day ellaf ən šat.

⁶ Amaran inn-as: «A kay-akfa tağmaren en kul əd təhussay-nasnət fəlas tiwakfanat-i hakkaq-qanat dey i was tanat-ərəx.

⁷ Day adi as di-təssəjada ad təgrəwax awen kul.»

⁸ Inn-as Yaysa: «Wərgex ənnan Elkəttaban: "Əməli-nak Məššina as za təssəjada, ənta yas a za təybəda."»

⁹ Təzzar ikka dər-əs Iblis Yerusalam, issəbdad-tu fəl afalla n Ahan wa Zəwwəran n Əlyibada, inn-as: «Kud kay Barar ən Məššina tətərəgge,

¹⁰ fəlas ənnan Elkəttaban: "Ad amər angalosan-net a kay agəzan day əššur,"

¹¹ iktâb dey as: "A kay-əkbəlan day fassan-nasan fəl a dak-wər-tənkəf təhunt."»

¹² Inn-as Ҷaysa: «Wərgеҗ za Ёлкəttaban di ənnān: "Ad wər tətajjarraba Ёməli-nak Məššina."»

¹³ As t-iҗrad Iblis əjərrəb, igla oyy-ay har sər-əs iləs aҗaraw ən tarrayt.

Ёššəҗəl ən Ҷaysa daҗ Galilaya

Isalan ən Taymar ta n Məššina

Ёsəssəҗri ən Ҷaysa daҗ Nazaret

¹⁴ Dəffər awen, iqqal Ҷaysa akal ən Galilaya, təh-ay tarna n Infas wa Zəddigan. Təffəzzat sallat-net daҗ akal en ketnet.

¹⁵ Isasаҗru aytedan daҗ nan win əлҗibada ən Kəl-Ёlyəhud, ketnasan əssiҗmaran-tu.

¹⁶ Osa deҗ Ҷaysa Nazaret, аҗrəm wa daҗ idwal. As əzəl wa n təsanfawt iggaz ehan wa n əлҗibada ən Kəl-Ёlyəhud imos awen arat itaggu faw. Ibdad y ad аҗru awal ən Məššina.

¹⁷ Itawakf-ay-in əlkəttab wa n ənnəbi Isayas. Ikkas y əlkəttab ađda wa iga, olam fəl adag a daҗ iktab as:

¹⁸ «*Iwār-i Infas n Ёməli, fəlas isinafran-i y ad əməlay isalan n Ёlinjil i tələqqawen. Izimazal-i-du y ad aҗay isalan i win tawattafnen, əgrəwan iman-nasan, əzzuzəҗay iməddəҗal, aytedan win tawadgaznen deҗ aҗaq-qan daҗ tara ən man-nasan,*

¹⁹ *əməlay awatay taha arraxmat n Ёməli.*»

²⁰ As iҗrad Ҷaysa teҗaray ihar əlkəttab, issoҗal-tu y amaššayal n ahan wa n əлҗibada ən Kəl-Ёlyəhud, iqqim. Ёҗaran daҗ-as aytedan kul win əllanen den šittawen.

²¹ Amaran inn-asan: «Azalada awal ən Məššina was təslam da, inda.»

²² Ketnasan əmmālan-tu. Simaklalnāt sər-san batuten olaynen šin du-gammadnen imi-net, ad gannin: «Ak awa wərgеҗ ag Yusəf?»

²³ Inn-asan Ҷaysa: «Illikan as a di-du-tassaktim iggi wa innan: "Anasmagal, zuzəҗ iman-nak," təzzar tannim-i: "Agu daҗ akal-nak da da awas nəsla as təgəq-qu daҗ əҗrəm ən Kafarnahum."»

²⁴ Inn-asan deҗ: «Ёggəyyay silakanay-awan as wər t-illa ənnəbi itiwaqbalan daҗ аҗrəm wa daҗ idwal.

²⁵ Amaran a dawan-əməla tidət: Daҗ elan n ənnəbi Ilyas akal n Israyil əhānat-tu tədoden aggotnen əs wər ədderan meddan-nasnat. Elan en da a daҗ iga akonak karad elan d aganna wər iwet, iga laz labasan daҗ akal ketnet.

²⁶ Dər iga awen da ya, wər izammazal Məššina ənnəbi Ilyas əs waliyyat daҗ tədoden en. Kalar izammazal-tu s iyyat təxsārat daҗ təҗrəmt ta n Sarəfta təhāt akal ən Sidon.

27 Æhân dey kətrutan aggotnen akal n Israyil daɣ elan n ənnəbi Elisayas, mišan wər tan-iha i itawazozayan ar Naɣman wa n akal ən Surəya.»

28 As əslan aytedan win əhanen ehan n əlɣibada y awen, iggaz-tan alham labasan.

29 Ebdadan, əgan ifassan da Ƴaysa, əkkasan-tu daɣ əɣrəm, ewayan-tu s afalla n ədɣaɣ wa fəl ikras əɣrəm y ad t-əgəran daɣ əɣəɣi, iba-tu.

30 Mišan illam Ƴaysa gar-essan igla.

Æššəɣəl ən Ƴaysa daɣ Kafarnahum

31 Dəffər awen iras Ƴaysa əs təɣrəmt təgât Kafarnahum təhât ənta da akal wa n Galilaya, ad isasaɣru aytedan daɣ ahan n əlɣibada ən Kəl-Əlyəhud daɣ jilan win təsanfawt.

32 Isimaklal sər-san əmmək was isasaɣru, fəlas əsəssəɣri-net in awedan ilân tanaya.

33 Ehan n əlɣibada wen, ih-ay aləs iha aggəsuf. Idkal aləs wen əməsli-net, ad igannu:

34 «Xa! Ƴaysa wa n Nazaret, ma daɣ-na tareɣ? Əngəm assa a du-təgeɣ y a dana-təhləka? Əssanaɣ awa təmosa: Əmizdag wa d-izammazal Məššina.»

35 Iharašsat-tu Ƴaysa, inn-as: «Fastu, təgmədaɣ aləs di!» Təzzar iggədlə aggəsuf aləs en gər aytedan, amaran igmad-tu wər das-ixšed arat.

36 Æhagan aytedan ketnasan, ad tinəmənnin gar-essan: «Ma imos almaɣna n awal n aləs wa? Kələsuf da ittâf daɣ-san tanat, itamar-tan əs tanaya, gammadan aytedan.»

37 Təwazawaz sallat ən Ƴaysa daɣ id t-illa adag daɣ akal en kul.

38 As igmad Ƴaysa ehan n əlɣibada ən Kəl-Əlyəhud, ikka ehan ən Simɣon. As itaggu awen tədaggalt ən Simɣon təfrâyat, tənnid wəllen, təzzar əgməyan daɣ-as aytedan a tat-izzuzəy.

39 Inaz-in fall-as Ƴaysa, isannarɣam i tanaday, təzzar təwat fall-as. Tənkar daɣ təmazayt ten da a tan-təsiməgurit.

40 As tuda təfuk, ewayan-du sər-əs aytedan imirananasan əgânen šiwərnawen əmosnen əzzənəfan. Akk iyyan issəwar-tu ifassan-net, izzozay-tu.

41 Gammadan dey kələsuf aytedan aggotnen, saɣaren kələsuf en, gannin: «Kay Barar ən Məššina», mišan isannarɣam-asan, igdal-asan awal, id masnat a əgan as ənta a imosan Əlməsix.

42 As affaw, igmad Ƴaysa aɣrəm, ikka edag issufan. A das-təsaggad tamattay har t-in-tosa. Ad gamməyan təməwit tas das-z-əgdəlan a tan-ifəl.

⁴³ Mišan inn-asan: «Iwâr-i ad əməla Əlinjil, imosan isalan ən Taymar ta n Məşşina, i xərman win hadatnen əntanay da, fəlas adi da a fəl d-əmmozała.»

⁴⁴ Təzzar igla Yaysa, itaggu təlxtutbat daχ nan n əlxibada ən Kəl-Əlyəhud win n akal ən Yahudəyya.

5

Inəttulab ən Yaysa win azzarnen

¹ Əzəl iyyan ibdād Yaysa daχ təşəşwit n agaraw wa n Ganazaret, tətənadəχ fall-as tamattay fəl ad aslin y awal ən Məşşina wa immal.

² Inay Yaysa əşşin əxlalan n aman daχ təşəşwit n agaraw. İxlalan win əgmâdan-tan məssawsan, takkasan təjjərgənt daχ sangaytan-nasan win as tabazan kifitan.

³ Təzzar iggaz daχ-san wa n Simxon, igmay daχ-as a din-izzənkəz fəl təşəşwit, amaran iqqim ad isasaχru tamattay.

⁴ As iraz daχ əsəssəχri inna i Simxon: «Akku kay əd midawan-nak dad zagrotan aman, təgəram sangaytan-nawan, tabəzam kifitan.»

⁵ Inn-as Simxon: «Əşşex, ahad iyrâdan a nəga nəşxâl eges wər nəbez wala, mišan ya zama adi a tənneχ, adi za ad əgəra sangaytan daχ aman.»

⁶ Əgan awa dasan-inna Yaysa, təzzar əbazan kifitan s awa əgan daχ igət har əbukan sangaytan-nasan y azarru.

⁷ Ad tallafan i midawan-nasan win əhanen aχlal n aman wa hadan y a d-aglin a dasan-ilalan. Osan-du, ədnayan əşşin əxlalan win den har əbukan y ədəkəyyi.

⁸ As inay Simxon Butros awen, issəjad i Yaysa, inn-as: «Ya Əməli, nəməggəg dər-i fəlas anasbakkad a əmosa.»

⁹ Innâ awen fəlas ənta əd midawan-net ketnasan as əhagan χur anay-nasan igət ən kifitan win əbazan.

¹⁰ Eheg wa iga Simxon den, ənta a iga Yaqub əd Yaxya win maddanəs ən Zabaday dər idrâw əşşəxəl. Təzzar inna Yaysa i Simxon: «Ad wər tərmeχa, a obazan χur əmərədda, təqqalam meddan a sər-i du-za-tawaynen aytedan y a tan-assafsa daχ bakkadan-nasan.»

¹¹ Amaran əsoχalan ixlalan-nasan təgadamayt n agaraw, oyyan arat kul əlkaman-as.

Təmazaq əd Farisaytan

Əzuzəy ən Yaysa aləs igrâw kətru

¹² İha Yaysa aχrəm iyyan, as t-inay aləs as təlsa təwərna ən kətru elam-net ketnet. İkk-ay-du issəjad dat-əs, onsaytu, inn-as: «Əməli, as tareχ adi, təfrâgaχ a di-təzzuzəyaχ, izdaga.»

¹³ Izzal-in Ƴaysa əfus-net, idas-tu, inn-as: «Arex adi, əzzəy tizdaga!» Amazay wen daɣ ad izzay daɣ kətru.

¹⁴ Təzzar issənkad-tu Ƴaysa, inn-as: «Ənəy za, ad wər təməla y awedan waliyyan awa igan da, amaran aglu tassaknaɣ iman-nak y əlimam, taga takutay ən tazdak ta kay-issəwar əşşərixa n ənnəbi Musa, ad iqqəl adi y aytedan təgəyya ən təməzzəyt-nak.»

¹⁵ Dər iga awen da ya, təgla sallat ən Ƴaysa tətittəy, tətiddaw fall-as tamattay tagget fəl a das-təssəsəm, izzuzəy dəɣ šiwərnawen-nasan.

¹⁶ Mišan ənta, itakku idaggan əssufnən y a daɣ-san ixbəd Məşşina.

Tarna ən Ƴaysa

¹⁷ Əzəl iyyan isasaɣru Ƴaysa, əqqiman Farisaytan əd musanan n Əttawret a d-əgmâdnən šiɣarmaten kul šin n akal ən Galilaya əd wa n Yahudəyya əd Yerusalam. As itaggu awen Ƴaysa igrâw ɣur Əməli tarna n əzuzəy n aytedan.

¹⁸ Har d-osan meddan wiyyad misawaynən aləs n anabdon daɣ təssut. Ad gammayan a dər-əs əggəzan, assansin-tu dat Ƴaysa.

¹⁹ As dasan-aba təməwit as dər-əs əggəzan fəl igət n aytedan, əwaran afalla ən taɣazamt, olaman əsəfəl-net, əssərasan-tu daɣ-as iha təssut-net har təssənsan daɣ ammas ən tamattay, dat Ƴaysa.

²⁰ As inay Ƴaysa əzəgzan-nasan, inna y anabdon wen: «İbakkadan-nak tiwasarafan-ak.»

²¹ Əslan musanan n Əttawret əd Farisaytan y awen ɣas, ad gannin daɣ man-nasan: «Ma imos aləs wa itaggin amadraw da? Ma ifragan əsurəf ən bakkadan ar Məşşina ɣas?»

²² İssan Ƴaysa awa samadranan, inn-asan: «Mafəl tətihənzəmmem adi daɣ wallan-nawan?»

²³ Ma ogaran tərɣəsay gər i innan: "Tiwasarafan-ak bakkadan-nak" meɣ ak i innan: "Əbdəd jəwənkət?"

²⁴ Amaran arex a təssənam as nak Ag Aggadəm ələɣ daɣ əddənət tanaya a di-təşişawadat ad əssurəfa y awedan ibakkadan-net.» Təzzar inna Ƴaysa y anabdon: «Əbdəd, tədkəla təssut-nak, takkaɣ aɣaywan-nak.»

²⁵ İbdad aləs wen tamazayt ten da dat aytedan kul, idkal təssut-net, iqqəl ehan-net, immâl Məşşina.

²⁶ Aytedan kul isimaklal sər-san awen wəllen. Əmmâlan Məşşina, təh-en tasa gannin: «Azalada nənây aratan as wər kala ətawanayan!»

Awa inna Ƴaysa əs nashakkadan

²⁷ Igmad Ƴaysa edag en, ogga aləs iyyan igân esəm Lebi iqqim day adag wa n əzərzəm n əzrəf ən takəs, inn-as: «Əlkəm-i.»

²⁸ İbdad Lebi, oyya awa iha kul, ilkam i Ƴaysa.

²⁹ Dəffər awen iga Lebi i Ƴaysa iməgura zawwarnen day ahan-net. Ədrawan d aytedan aggotnen ən nəzzərzəm ən takəsen d aytedan wiyyad.

³⁰ Ənayan Farisaytan əd musanan-nasan win Əttawret awen Ƴas gatantanan, ad gannin i nəttulab ən Ƴaysa: «Mafəl tədrāwam əd nəzzərzəm ən takəsen əd nasbakkadan?»

³¹ Inn-asan Ƴaysa: «Aytedan wər nəfray, wər əddəraran s anasmagal, imiranan a sər-əs əddərarnen.

³² Nak wər d-oseƳ fəl əddəlil n aytedan win Ƴur iga as oƳadān, kalar əmazal ad-əgeƳ fəl a d-aƳraƳ inasbakkadan əs tətubt.»

Awa inna Ƴaysa s əzum

³³ Dəffər awen ənnan-as Farisaytan əd musanan n Əttawret: «İnəttulab ən Ƴaxya əd win Farisaytan tuzaman faw, tattaran, win-nak amaran tattin sassin.»

³⁴ Inn-asan Ƴaysa: «Awak təfrāgam ad təzzuzəmam ilagatan a Ƴur illa əmazlay?

³⁵ Mišan əlkāman adan a Ƴur-san z'ammadkal əmazlay. Adan win di, ad uzaman.»

³⁶ Ig-asan Ƴaysa tangalt iyyat, inn-asan: «Wər t-illa i du-z-ikkəsən şikəst day tabdoq taynayat y a tat-iwət day iyyat waşşarat, fəlas as iga adi, ad iƳşəd tabdoq ta taynayat, şikəst deƳ ta day-as d-ikkas wər tənnəha əd tabdoq ta waşşarat.

³⁷ Wər t-illa deƳ i z'əgin esmad n alƳanab aynayan day gədəd. I igan adi ad abbaqqen gədəd win, təzzar affatu day esmad əd gədəd.

³⁸ Kalar esmad n alƳanab aynayan, ibəyaƳ aynaynen a day itawaggu.

³⁹ Awedan işwân esmad n alƳanab waşşaran, wər z'iru dəffər adi tessay ən wa aynayan, fəlas ad annu: "Wa waşşaran a izodan.»

6

Ƴaysa d əzəl wa n təsanfawt

¹ Əzəl iyyan imosan əzəl wa n təsanfawt ən Kəl-Əlyəhud, ijiwankat Ƴaysa day təwəgas n alkama, rassaban-du nəttulab-net şiyəyanen, tifəffərən-tanat gər fassan-nasan, tattin-tanat.

² Təzzar ənnan-asan arat day Farisaytan: «Mafəl tətaggim arat xarāman day əzəl wa n təsanfawt?»

³ Ijjəwwab-asan Ƴaysa, inn-asan: «Ak teƳaray a wər təgem awa iga ənnəbi Dawəd əzəl wa t-iggaz gələk ənta əd midawan-net?»

⁴ Awak wərgeƳ iguz a iga ehan ən Məššina, idkal šigəlwen šin əmosnen takutay təskâtat i Məššina əs limaman Ƴas as təxalal tattay-nasnat, itša daƳ-asnat, ikfa daƳ-asnat deƳ aytedan-net?»

⁵ Inn-asan Ƴaysa deƳ: «Nak Ag Aggadəm a ixkaman fəl əzəl wa n təsanfawt.»

⁶ Əzəl iyyan ən təsanfawt ən Kəl-Əlyəhud, iggaz Ƴaysa ehan n əlƳibada ən Kəl-Əlyəhud ad isasaƳru. Ehan-en ih-ay aləs as immût əfus-net wa n əxil.

⁷ Əgaran daƳ-as musanan n Əttawret əd Fərisaytan šittawen fəl ad əssənan kud ad izzuzəy awedan daƳ əzəl wa n təsanfawt wala, fəl tara n ad əgrəwan əddəlil əs təxtəst-net.

⁸ Ƴaysa ənta issân awa ihan iman-nasan. Inna y aləs was immût əfus-net: «Ənkər, əbdəd daƳ ammas n əljəməƳat.» Inkar aləs, ibdad.

⁹ Təzzar inn-asan Ƴaysa: «Əssistanaq-qawan, awak xalal daƳ əzəl wa n təsanfawt igi n arat olâƳan meƳ igi n a labasan, ereg n awedan daƳ təmattant meƳ awak šiyyit-net iba-tu?»

¹⁰ Issələl-tan Ƴaysa asawad-net ketnasan, amaran inna y aləs was immût əfus-net: «Əzzəl əfus-nak» Iga awa das-inna, izzay əfus-net.

¹¹ Arat wen iga daƳ-san alham labasan, ad tinəməšiwiran gar-essan fəl awa z'agin i Ƴaysa.

Ƴaysa isassaƳru inəttulab-net

Əsənnəfrən ən Ƴaysa inəttulab win maraw d əššin

¹² Adan en da a daƳ ikka Ƴaysa adƳaƳ iyyan y a fall-as agu šiwatriwen. Iga fall-as ahad iyrâdan itattar.

¹³ As affaw iƳra-du inəttulab-net, isannafran daƳ-san maraw d əššin, ig-asan esəm inəmmuzal.

¹⁴ Ismawan-nasan da: SimƳon was iga esəm Butros d amadray-net Andrawəs; Yaqub, Yaxya, Filibus, Bartulamawəs,

¹⁵ Matta, Tuma, Yaqub wa n ag Alfay, SimƳon was itawannu wa Isaggatakken,

¹⁶ Yahuz wa n ag Yaqub əd Yahuza Isxarəyuti wa z'akkaddalan Ƴaysa.

Ƴaysa əd tamattay

¹⁷ Dəffər awen izzəbbat dər-san Ƴaysa adƳaƳ, ibdad daƳ ataƳas iyyan a daƳ təbdâd tamattay tagget ən nalkiman-net əd tamattay tagget a du-təfâlat akal ən Yahudəyya əd

Yerusalām əd xərman win Tir əd Sidon əhanen tagadamayt n agaraw wa zəwwəran.

¹⁸ Aytedan en osân-du fəl ad əssəsəman y awa isasayru Ƴaysa, təwəzuzəyan dəx dəx təwərnawen-nasan. Izzozay dəx-san dəx win əhan kələsuf.

¹⁹ Tamattay en ketnet təgammay d ades ən Ƴaysa fəlas tarna t-id-təgammadat təzuzəy-tan ketnasan.

Əššin əzzənəfan n aytedan a t-əllanən

²⁰ Iswad Ƴaysa dəx nəttulab-net, inna:

«Təbbilalam kawanay win sallaqqawnen iman-nawan dat Məššina fəlas Taymar ta n Məššina ši-nawan.

²¹ Təbbilalam kawanay

win iha laz əmərədda

fəlas ad tayyawanam.

Təbbilalam kawanay

win hallinen əmərədda

fəlas ad tadzim.

²² Təbbilalam kawanay

win əkyadan aytedan,

əkkâsan-kawan dəx ammas-nasan,

rabbadan-kawan, xəššadan ismawan-nawan

fəlas di-təlkəmam nak Ag Aggadəm.

²³ Dawatat, təfəliwəsəm əzəl wədi,

fəlas təlâm arozan aggotnen dəx jənnawan.

Arat wa dawan-əgan əddi

ənta iman-net a əgan marawan-nasan y ənnəbitan.

²⁴ Mišan kawanay iməggərgas

iket alxazab iqqâl-awan,

fəlas awa əran man-nawan iha ifassan-nawan.

²⁵ Iket alxazab iqqâl-awan

kawanay win əyyəwənnen əmərədda,

fəlas ad tullazam.

Iket alxazab iqqâl-awan

kawanay win dazzenin əmərədda,

fəlas a dəx-wan tagu təfəyyawt, talim.

²⁶ Iket alxazab iqqâl-awan

kawanay win əmmalan aytedan;

a dida a əgan marawan-nasan y ənnəbitan win bahu.»

Tara n aytedan

²⁷ «Kawanay win di-əssəsəmnen amaran, ənnəx-awan: "Iriwat izənga-nawan, ad tətamazalam əlluğ i win kawan-əkyadnen.

28 Tattarat a igan arraxmat i win kawan-sawarnen allaḡanat, tansəyam Məššina a igan alxer i win dawan-tagginen taršəxšad.

29 As dak-iqqas awedan, takfaq-qu amdəd-nak wa hadan. As daḡ-ak irkab awedan əbərnuz-nak, alḡaššaba-nak da ayy-as-tu.

30 I kay-onsayan takfaq-qu. Ad wər təgməya daḡ awedan a kay-d-issuxəl awa daḡ-ak irkab."»

31 «Arat was təram a dawan-t-agin aytedan, agat-asan-tu kawanay da.

32 Kud wər tarem ar aytedan win kawan-əranen, awak ma imos aroz wa za təgrəwam? Wala ark aytedan da ərân aytedan win tan-əranen.

33 Kud wər tətəggim a olaḡan ar i win dawan-tu-tagginen, awak ma imos aroz wa za təgrəwam? Wala arak aytedan taggin adi.

34 Kud deḡ wər təsəmərwisam ar aytedan win as tordam as a dawan-ərzəman, awak ma imos aroz wa za təgrəwam? Ark aytedan da tinəməkfin imarwasan gar-essan fəlas əssānan as a tan-d-iqqəl awa sammarwasan ketnet.»

35 «Kalar iriwat izənga-nawan, ad tətəggim y aytedan awa olaḡan, tətizəbənem i win daḡ-wan əgmaynen əzəbəna. Tagim adi ketnet da wər təgem attama n a dawan-itəwəggu. Əddi ad igat aroz-nawan, təqqəlam bararan ən Məššina di n Amadkol fəlas ənta itaggu əlluḡ y aytedan win wər iha agoda əd win maksanan.

36 Təggəzet-kawan təhanint ta təhat Abba-nawan.»

37 «Ad wər tannim ark arat s awedan fəl a sər-wan wər itəwənnu. Ad wər təssəwəram awedan lahan fəl a kawan-wər-itəwəsəwər kawanay da. Sirufat, ad təgrəwam təsureft.

38 Hakkat, ad tətəwakfim. Təsəkət tolâḡat, tədkârat, təssiksakat har təfətənxəl a dawan-z-itəwəggin daḡ səbbətəran-nawan. Təsəkət tas təkkatam y aytedan ənta as dawan-z-ikət Məššina.»

39 Ig-asan deḡ Ƴaysa tangalt, inn-asan: «Awak əmədderḡəl ifrâḡ alaway n iyyan əmədderḡəl? As iga adi wərgəḡ ketnasan as z'uden daḡ anu?

40 Attalami wər oger əššex-net, mišan attalami kul wa issəxtaman, ad agdu d əššex-net.

41 Mafəl təhannaya tezawt ta təhat šat n amadray-nak, kay amaran wər din-təgreḡ šiləlt ta təhat šat ta-nak?

42 Manəmmək as təganna y amadray-nak: "Ayy-i a dak-əkkəsəḡ tezawt ta təhat šat-nak?" As iga awen, kay iman-nak wər təhənnəya šiləlt ta təhat šat ta-nak. Əmunafiq,

ækkæs tæzzar šilølt ta təhat šat-nak, æddi ad za tannaflayaḡ daḡ tazawt ta təhat šat n amadray-nak, tækkəsax-as-tat!»

⁴³ «Wər t-illa ašək isxân itârawan âratân əbrarnen, wala iyyan wər nəsxa itârawan âratân olaḡnen.

⁴⁴ Əkkulluk n ašək âratân-net as itawazday. Wər tənimidan aratan ən fig daḡ tazayt, wala deḡ itanamad aḡyanab daḡ tamat.

⁴⁵ Awedan wa olaḡan, əlluḡ wa ihan əwəl-net a daḡ d-itakkas awa olaḡan, mišan anallabus ənta, talbast ta təhat əwəl-net a daḡ d-itakkas awa labasan. Awa idkaran əwəl n awedan a d-igammadan imi-net.»

Ənalkim wa n tidət əd wa n bahu

⁴⁶ «Ma fel as di-təgannim: "Əməli, Əməli!" Mišan wər tətəggim awa dawan-ganna?»

⁴⁷ «Awedan kul wa di-d-itasin isasam y awal-in, itamazal s awa ənnəḡ, a dawan-əməla awedan wa s tu-z-ammattala.

⁴⁸ Immittalaḡ-qu s awedan ikarrasan ehan. Iḡaz wəllen har ewad təsəlīt, ikras-du fall-as ehan-net. Dəffər awen osa-du əngəy issohen, irzak-ku mišan wər t-isammatakway fəlas təsəlīt a fəl d-ikras.»

⁴⁹ «Amaran awedan wa isasaman y awal-in mišan wər sər-əs itəmizil, iha əlmital n awedan ikrasan ehan-net da wər t-iḡez. Osa-du əngəy, istab-as. Ibarajjat, iḡrad ahluk.»

7

Təhanint n Əlməsix

Əzuzəy ən Ƴaysa akli ən kabtan iyyan

¹ As iḡrad Ƴaysa emel ən salan win den kul i tamattay en, iggaz taḡrəmt ən Kafarnahum.

² Taḡrəmt ten ih-et kabtan iyyan ən sojitan n Ərrum ilân akli-net ikna tara irinan, ibuk y iba.

³ As isla kabtan en isalan ən Ƴaysa, izammazal sər-əs arat daḡ muzaran ən Kəl-Əlyəhud fəl a t-ansəyan a d-asu izzuzəy akli-net.

⁴ Osan-in Ƴaysa, onsayan-tu, ənnan-as: «Aləs a, ihôr a das-tagax tənəfust ta,

⁵ fəlas irâ tamattay-nana, ənta fadda a danax-issəkrasan ehan-nana wa n əlyibada.»

⁶ Təzzar iddew dər-san Ƴaysa. As din-ihoz Ƴaysa ehan, izammazal-du sər-əs kabtan en imidawan-net y a das-annin: «Əməli, ad wər təsəlliyyəḡax iman-nak, nak wər əwedax ad təggəzax ehan-in.

⁷ Adi da fəl kay-in-wər-oseḡ nak iman-in. Annu arat ḡas ad izzəy amašşaxal-in.

⁸ Æssâna daɣ adi fêlas awedan a əmosaɣ a daɣ əttafan wiyyad tanat, əttâfaq-ɣat nak iman-in daɣ sojitan win daw-i əllanen. As ənneɣ y iyyan: "Aglu", ad aglu, as ənneɣ y iyyan: "Iyyaw", a di-d-asu. As ənneɣ y əkli-nin: "agu awa", ad t-agu.»

⁹ As isla Ƴaysa y awen, isammaklal sər-əs, imalallay-in aytedan win das-əlkamnen, inna: «Ənneɣ-awan, wala Kəl-Israyil wər daɣ-san ənayax awedan igân əzəɣzan ewâdan wa iga aləs a.»

¹⁰ As din-əqqalan meddan win əmmozaɣnen ehan, osan-in akli wa irinan izzây.

Æsənkər ən Ƴaysa əmawad iyyan daɣ təmattant

¹¹ Dəffər awen ikka Ƴaysa axrəm iyyan igân esəm Nayn, əddewan dər-əs nəttulab-net əd tamattay tagget.

¹² As din-ihoz imi n əxrəm immənay d aytedan aggotnen ewaynen ənəmməttən y a t-in-ənbəlan. Aləs wa n ənəmməttən en, wər təla anna-net ar ənta, abba-net dəɣ wər idder.

¹³ As tat-inay Əməli təsahhanatat-tu, inn-as: «Ayyu tala.»

¹⁴ Ikka-du ənəmməttən, idas təssut ta daɣ immeway, əbdadan aytedan win t-ewaynen, təzzar inna: «Əmawad ənneɣ-ak: Ənkər!»

¹⁵ İqqim-du aləs wa aba, išşewal, issoɣal-tu Ƴaysa y anna-net.

¹⁶ Ərmaɣan aytedan kul, ad əmmalan Məşşina gannin: «Ənnəbi zəwwəran a d-inafalalan daɣ-na, Məşşina osa-du tamattay-net fəl a daɣ-as issən.»

¹⁷ Təzzar təffəzzat sallat ən Ƴaysa daɣ akal ən Yahudəyya ketnet, əd kallaɣ win tu-ɣalayɣalaynen.

Ƴaysa əd Yaxya wa isalmaɣan aytedan daɣ aman

¹⁸ İgraw Yaxya isalan win den kul ɣur attalamitan-net. İɣra-du əşşin daɣ-san,

¹⁹ izammazal-tan s Əməli Ƴaysa y a das-annin: «Awak kay da was nəqqəl y a d-asu, meɣ ak ad nəssəgəd y iyyan?»

²⁰ As din-osan Ƴaysa, ənnan-as: «Yaxya wa isalmaɣan daɣ aman a dana-d-izammazalan sər-ək, inn-ak: "Awak kay da was nəqqəl y a d-asu, meɣ ak ad nəssəgəd y iyyan?"»

²¹ Assaxat ten da iman-net, izozay daɣ-as Ƴaysa aytedan aggotnen daɣ təwərnawen əd tələwayyen əd kələsuf, issəsbad dəɣ iməddərxal aggotnen.

²² İjjəwwab Ƴaysa i meddan win sər-əs d-əmmozaɣnen, inn-asan: «İqqələt Yaxya təssuɣəlam-as awa tənayam d awas təslam, tannim-as: İməddərxal əhannayan, inəbdan jawanken, aytedan win igraw kətru əzzayan zaddogan,

imzagan əgrawan tesalay, inəmməttan nakkaran-du dəy təmattant, şiləqqawen dəy sallanat y Əlinjil.

²³ İbbilal awedan wa wər igmed əzəgzan-net fəlas wər iga aššak dəy awa əmosa.»

²⁴ As əqlan meddan win d-izammazal Yaxya, issənta Ƴaysa amagrad i tamattay dəy batu ən Yaxya, inna: «Ma imos arat was təkkan əsuf y a tu-tənəyam? Awak telant isiwəliwil ađu? Kala!

²⁵ Dəy adi ma təkkan y a t-id-tənəyam? Awak aləs ilsân tabdoq təkkanat şihussay? Kala! Ənəyat za aytedan win əlsanen tabdoq ta təhossayat, əgân dəy təməddurt dəy ənniflayan, inan ən mənokalan a əhan.

²⁶ Adi za ma təkkan y a t-id-tənəyam? Awak ənnəbi? Wəllen z'âs ənnəbi. Amaran Yaxya oğar tişit n ənnəbi fadda.

²⁷ Fəlas Yaxya ənta a fəl ənnan Əlkəttaban: "Ənəy za a dat-ək assaglay anammazul-in a z'aknin tarrayt-nak."

²⁸ Ənnəx-awan, wər kala a d-ihəw awedan oğaran Yaxya; dər iga awen da wala Ƴas wa oğaran təmmədrəyt dəy TaƳmar ta n Məşşina, da oğar Yaxya.»

²⁹ Aytedan win əslanen y awal ən Yaxya, harkid nabazan n amana, kul əqbalan as tarrayt ta n Məşşina ənta a toƳadat, adi a fəl ərdən issəlmaq-Ƴan Yaxya dəy aman.

³⁰ Mişan Farisaytan əd musanan n Əttawret, əntanay əssəknan əs tugəyt ta əgan s a tan-issəlməƳ Yaxya dəy aman, iba ən tərəddawt-nasan s awa ixtas Məşşina.

³¹ Inna Ƴaysa: «Mas z'ammattalay aytedan n azzaman win nəha da? Awak ma dər olan?

³² Olân əd bararan əqqimnen dəy əssuk tinəməƳrin gannin:

"Nəwat-awan tende,
mişan wər təwəƳam!

Nəg-awan isakkan ən təfəyyawt,
mişan wər təlem!"»

³³ «Ənnəx-awan adi fəlas Yaxya wa isalmaƳan aytedan dəy aman as d-osa, issigat əzum wər isəssu dəy esmad n alƳanab, tənnam əgğəsuf a t-izdəyan.

³⁴ Amaran, nak Ag Aggadəm ose-du, ətatta əsassa, mişan tənnam: "Ənəwat aləs wen n amawwalay en, isassin esmad s igət, imos əmidi ən nabazan ən takəsən d ark aytedan!"»

³⁵ Masnat ta du-təfalat Məşşina amaran, aytedan kul win əhanen tarrayt ta n Məşşina, əntanay a sataddinen aqqad-net.

Agaraw wa təga təntut iyyat təsureft ən bakkadan-net

³⁶ Igmay Farisay iyyan daɣ Ƴaysa a ɣur-əs atšu. Təzzar ika Ƴaysa ehan ən Farisay wen, saɣɣamaran ad taman-sawan.

³⁷ Wala a ihogan tərəz-du təntut iyyat ən tanasbakkadt təhât aɣrəm en da, təslât as Ƴaysa imigarat i Farisay wen. As du-tosa tewây butalay n alwardi.

³⁸ Təmal-du dəffər Ƴaysa, ɣur daran-net ad təhallu har təssəbdag idaran ən Ƴaysa əs məttawan-net, təmmas-tan əs jəkkad-net. A dasan-tətamallat tənəqqal fall-asan alwardi.

³⁹ As inay Farisay wa isimuguren Ƴaysa awen, inna daɣ man-net: «Ənnar imos aləs a ənnəbi, issən as təntut ta tu-təddasat da, tanasbakkadt.»

⁴⁰ Inn-as Ƴaysa: «Simɣon, a dak-annaɣ arat.» Inn-as Simɣon: «Šiwəl, Əššex!»

⁴¹ Inn-as Ƴaysa: «Kala a t-illa aləs iyyan irwâsan əššin meddan. Iyyan irwâs-tu səmmosat təmad ən tamma n əzrəf, wa hadan irwâs-tu səmmosat təmərwen.

⁴² Dad wər əlen as ərzaman, oyy-asan awa tan-irwas. Awak ma tənneɣ məni daɣ-san wa tu-z-iren wəllen?»

⁴³ Inn-as Simɣon: «Ordeɣ as was oyya əmarwas wa aggen.» Inn-as Ƴaysa: «Tidət-nak.»

⁴⁴ Amaran imalallay-in tantut təzzar inna i Simɣon: «Tahannayaɣ tantut ta? As d-əggazaɣ ehan-nak wər di-təkfeɣ aman əs əššorada idaran-in, mišan ənta təssəbdakan əs məttawan-net təmas-tan əs jəkkad-net.

⁴⁵ As d-oseɣ ehan-nak wər di-du-təssəlkada, mišan ənta a d-oseɣ tətamallat i daran-in fəl saɣmar a di-təga.

⁴⁶ Kay wər təzwayaɣ eɣaf-in, mišan ənta idaran-in a fəl tənɣal alwardi.

⁴⁷ Adi a fəl dak-ənneɣ: tara zəwwərat ta di-təssəkna təsitadda as ibakkadan-net tiwasarafan-as kul kuddeɣ əggətan; mišan awedan wa igrawan təsureft n a əndərran, ənta tara-net ši əndərrat.»

⁴⁸ Təzzar inna Ƴaysa i təntut ten: «Ibakkadan-nam tiwasarafan-am.»

⁴⁹ Ad gannin aytedan win dər-əs ədrawnen imensewan daɣ man-nasan: «Ma imos wa daɣ awedan as wala ibakkadan isuruf-tan y aytedan?»

⁵⁰ Amaran inna Ƴaysa i təntut ten: «Əzəgzan-nam a kam-iɣlasan, aglu daɣ alxer.»

8

Ƴaysa isasayru əs tangalen d əlmitalan

Aytedan win tidawnen əd Ƴaysa

¹ Dæffær awen illil Ƴaysa iḡerman æd təḡarmaten immâl y aytedan Ælinjil, imosan isalan ən Taḡmar ta n Mæššina. Eddewan dær-æs nættulab-net win maraw d æššin.

² Iddew deḡ æd tædoden as šiiyyad kæləsuf a daḡ-asnat ikkas, šiiyyad šiwərnawen a daḡ-ḡanat izzozay. Æmosnat Maryama Madəl, s ənta a d-əḡmadan əssa kæləsuf,

³ æd Jannata ta n tæntut ən Xuza wa innættafan æd taḡawšiwən n əmənokal Herod, æd Suzana æd šiiyyad šidoden aggotnen. Ketnasnat ədhâlnat Ƴaysa æd nættulab-net s awa əlanat.

Ælmital wa n əmagyak

⁴ Wær t-illa əḡrəm a du-wær-ḡəmmədan aytedan takkin-du Ƴaysa, tæzzar təḡa fall-as tiddawat tagget, ig-asan əlmital wa:

⁵ «Kala ad igla əmagyak iyyan y ad inbəl amasa-net. Daḡ anabal wa itaggu den imosan anabas n amasa, ərtaknat tæblalen šiiyyad fəl tama ən tarrayt, tæzzar əkkokalan daḡ-asnat aytedan, ətšan-tanat ḡəḡad.

⁶ Šiiyyad ərtaknat daḡ adag əhanat təhun. As d-əḡmadnat, əḡḡurnat fəl iba ən bəddug.

⁷ Šiiyyad ərtaknat daḡ təfəssaḡ, ədwalnat dær-əsna, əlməznat-tanat.

⁸ Šiiyyad ərtaknat daḡ amaḡal olâḡan, tæzzar ədwalnat. Ækkulluk ən tæblalt terâw temeday n iyyat.» As inna Ƴaysa awen idkal əməsli-net inna: «Wa isallin, isəsəmet!»

Ma fel isasaḡru Ƴaysa s əlmitalan?

⁹ Dæffær awen əssəstanan-tu nættulab-net d almayna n əlmital wa iḡa den.

¹⁰ Inn-asan: «Kawanay təḡrâwam masnat daḡ əssiran ən Taḡmar ta n Mæššina, mišan aytedan win hadatnen tanḡalen as dasan-ittəmal əssir wa, fəl ad iḡḡəl as "əswâdan, mišan wær hənnəyan; əssisaman mišan wær ḡərrin."»

Almayna n əlmital wa n əmagyak

¹¹ Iḡla Ƴaysa iššewal, inn-asan: «Ælmital wədi almayna-net da: amasa əlmital a imos n Awal ən Mæššina.

¹² Amasa wa irtakan fəl tama ən tarrayt, əlmital a imos n aytedan win əslanen y awal ən Mæššina, mišan ad d-asu Iblis ikkəs-tu daḡ wallan-nasan fəl ad wær əzzəḡzənan, əḡrəwan efsan.

¹³ Amasa wa irtakan daḡ təhun, əlmital a imos n aytedan win əslanen y Awal ən Mæššina, əḡḡalan-tu əs man filawasnen, mišan wær ila awen ekay, əzəḡzan-nasan wær itihag. As tawajarraban, a tan-igməd.

¹⁴ Amasa wa irtakan daɣ tɔfɔssaɣ, əlmital a imos n aytedan win əslanen y awal ən Məşşina əqbəlan-tu, mişan as tan-ədgəzan ašşawaşatan n əddənət əd tara n əddənət d arak deranan, əssəfalan-du dännəg awal wen, ad igdəl awen y əzəgzan-nasan alkamalat.

¹⁵ Amasa wa irtakan amaran daɣ amaɗal olaɣan, əlmital a imos n aytedan win əslanen y awal ən Məşşina əlân iwəllan olaɣnen lammodnen, təzzar əqbəlan-tu, əttəfan-tu s əlluɣ, təgmad-tan-du tənfa fəlas əzmâran y arat kul.»

Tangalt ta n fətəla

¹⁶ Inn-asan Ƴaysa deɣ: «Wər t-illa awedan isarɣin fətəla təzzar isəbbənbəy fall-as əxəzu madəɣ ag-et daw tessat. Kalar əşiləy a tat-itaggu təşəşşiləyt-net fəl ad ənəyan aytedan win du-taggaznen ehan s ənnur-net.

¹⁷ Wər t-illa a iɣbâran əs wərgəɣ ad affaggu, wala iyyan istâran əs wərgəɣ a d-inənəfiləl, itəwəssən ezal a mallan.

¹⁸ Daɣ adi ənkədat y əmmək was təsasamam. Awedan wa ilan, a das-itəwəşitu awa ila; wa wər nəla amaran, arat n awas iɣil il-ay da a daɣ-as attarmas.»

Imarwan ən Ƴaysa win tidət

¹⁹ Tosa-du anna ən Ƴaysa əd mədrayan-net, mişan orn-en a t-in-awədan fəl igət ən tamattay.

²⁰ Itawann-as: «Anna-nak əd mədrayan-nak əbdâdan-ak, ərân anay-nak.»

²¹ Mişan inn-asan Ƴaysa: «Anna-nin əd mədrayan-in aytedan win sasammen y awal ən Məşşina, tamazalan s awa inna.»

Tarna ən Ƴaysa

Ƴaysa ila tarna fəl aɗu

²² Əzəl iyyan iggaz Ƴaysa aɣlal n aman ənta əd nəttulab-net. Inn-asan: «Nəxrəset agaraw əs tagadamayt-net ta hadat.» Təzzar əgla.

²³ Əglân fəl aman as din-ibaz etəs Ƴaysa. Wala a ihogan igar-du aɗu issohen fəl agaraw, ad idakkar əɣlal aman, əggazan zega n a tan-atşin aman.

²⁴ Əhazan-du nəttulab Ƴaysa, a tu-sankaran daɣ etəs, gannin as: «Əşşex, Əşşex, nəhlak.» Inkar-du Ƴaysa isannarɣam y aɗu əd tanazzamaren takkinen ijənnawan, təzzar ibdad aɗu, idrar arat kul.

²⁵ Amaran inn-asan Ƴaysa: «Ma iga əzəgzan-nawan?» Issirmaq-ɣan awen, isimaklal sər-san. Ad tinəmənnin: «Ma imos wa daɣ awedan as wala aɗu d aman ittâf daɣ-san tanat?»

Yaysa ila tarna fəl kələsuf

²⁶ Dəffər awen ewadan-in akal ən Garassenatan in-imaɣlayan agaraw d akal wa n Galilaya.

²⁷ Da da ɣas a d-izzəbbat Yaysa aɣlal n aman ənta a das-d-issəlkad aləs iyyan əhân kələsuf. Aləs wen in əɣrəm ihan akal en da. Irəw as issənsa isəlsa, igmad aɣaywan, ixsar daɣ zəkwan.

²⁸ Inay Yaysa ɣas, ad itakkas imaslan labasnen, təzzar issəjad i Yaysa, idkal əməsli-net wəllen inna: «Ya Yaysa wa n Barar ən Məššina di n Amadkol ma daɣ-i tareɣ? Onsəyaq-qay a di-wər-təzəɣɣəba.»

²⁹ Innâ awen fəlas Yaysa a omaran aggəsuf wa t-ihan s a t-id-igməd. Iyyəwan-du sər-əs aggəsuf en əsənkər, karradan-tu aytedan əs sassaran əd təzabagawen mišan ad iɣtəs awen kul, awəy-tu aggəsuf s əsuf.

³⁰ Issəstan-tu Yaysa, inn-as: «Ma esəm-nak?» Ijjiwwabas inn-as: «Esəm-in Egan.» Inn-as aləs en awen fəlas kələsuf aggotnen a t-əhanen.

³¹ Ad tansayan kələsuf win t-əhanen Yaysa a tan-wər-issuku anu wa wər nəla eder.

³² Illât-tu əsəgən aggen ən ladayan ədânnen fəl tasaga ən təkəşwart. Onsayan kələsuf Yaysa y a tan-akfu turagat n ad əggəzan iladayan en, ikf-asan-tat.

³³ Əgmadan kələsuf aləs en, əggəzan iladayan. Təzzar ozalan-du ladayan fəl azagada ən təkəşwart ad titərəgtərigan daɣ agaraw, tattan-tan aman.

³⁴ As ənayan madanan ən layadayan awa igan den, ozalan, əgan isalan n awen daɣ əɣrəm en əd ɣələyɣələyan-net.

³⁵ Əglan aytedan y ad ənəyan awa igan. As din-osan Yaysa ogazan-in ɣur-əs aləs wa əgmadan kələsuf, iqqim ɣur daran-net, ilsâ, təqqâl-t-idu dəɣ tayttay-net, təzzar təggaz-tan tasa.

³⁶ Egan daɣ-san aytedan win əgəyyatnen y awen isalan n əmmək was itawasafsa aləs wa daɣ tawakkasan kələsuf.

³⁷ Mišan ənkaran-du aytedan kul win akal ən Garassenatan ad gammayan daɣ Yaysa a tan-ugag fəlas tasa a tan-təggazat zəwwərat. Iggaz Yaysa aɣlal n aman iqqal.

³⁸ Onsay-tu aləs wa əgmadan kələsuf ad t-ayyu a dər-əs idaw, mišan issoɣal-tu Yaysa inn-as:

³⁹ «Əqqəl ehan-nak, təməla y aytedan iket n arraxmat ta dak-iga Məššina da.» Təzzar igla ad immal daɣ əɣrəm en ketnet arat kul wa das-iga Yaysa.

Yaysa ila tarna fəl təwərnawen əd təmattant

40 As iqqal ʔaysa əsəlim wa hadan n agaraw, təssəlkad-as-du tamattay as ketnet təqqâl-as.

41 Alwaq wen da a d-osa aləs iyyan igân esəm Jayxus imosan iyyan daɣ muzaran n ahan n əlxibada wa n Kəl-Əlyəhud ən təxrəmt ten. Issəjad dat ʔaysa, ad t-itansay ad idawan s ahan-net,

42 fəlas elles təmosat wələt maraw elan d əşšin, s ənta ɣas a ilə, a təbukat y iba.

Iddew dər-əs ʔaysa, tətənadɣ fall-as tamattay.

43 Tamattay en tah-et təntut təgât maraw elan d əşšin igammad-tat əzni. Tənɣa təla-net kul daɣ nasmagalan, mišan wər t-illa awedan ifrâgan əzuzəy-net.

44 Təhoz-du ʔaysa sa sər təxərden, tədas təbənək ən təkadkat-net, izzəkkat əzni wa tat-igammadan tamazayt ten da. Təzzay.

45 Təzzar inna ʔaysa: «Ma di-idasan?» Iggad awedan kul as t-idâs, amaran inn-as Butros: «Əşşex, tamattay a ketnet as kay-taɣalayɣalay, təsâs-kay.»

46 Mišan ya inna ʔaysa: «Awedan iyyan idâs-i fəlas əfrâya i tarna iyyat as di-təgmad.»

47 As təssan təntut ten as təffigga, təkka-du ʔaysa təndaw-tat taysəst, təssəjad dat-əs, təmal-as dat aytedan kul əddəlil wa fəl tu-tədas əd təməzzəyt ta təga tamazayt ten da.

48 Inn-as ʔaysa: «Tabarart-in, əzəgzan-nam sər-i a kam-izzozayan, aglu daɣ alxer.»

49 Harwada išşewal ʔaysa as d-osa awedan iyyan a d-ifalan aɣaywan ən Jayxus wa n əmuzar n ahan wa n əlxibada ən Kəl-Əlyəhud, inn-as: «Allek aba-tat, mazzay d əddaguz n Əşşex.»

50 Isla ʔaysa y awen, inna i Jayxus: «Ad wər tərməɣa, zəgzən ɣas, allek ad təzzəy.»

51 As din-ewad ʔaysa ehan ən Jayxus, igdal y aytedan ad t-əggəzan, wər oyya ar Butros əd Yaxya əd Yaqub d abba ən təbarart d anna-net.

52 Aytedan kul win əllanen den, hallan, sikalalan fəl təbarart mišan inn-asan ʔaysa: «Ayyiwat tala, təbarart wər tat-aba, etəs ɣas a təga.»

53 A daɣ-as tajaban fəlas əssânan as wər tədder.

54 Təzzar iggaz ʔaysa fəl təbarart, ibaz əfus-net, iɣr-et, inn-as: «Tabarart ənkər-du!»

55 Əqqalan-tat-du man-net təbdad-du daɣ tamazayt ten da, təzzar omar-tan ʔaysa s a tat-akfin a tətša.

56 Əhagan marwan ən təbarart, mišan irɣam-asan ʔaysa fəl amel n awen y awedan waliyyan.

9

Yaysa əd nəttulab-net win maraw d əşšin

Əzəmmizəl ən Yaysa inəttulab-net

¹ İyra-du Yaysa inəttulab-net win maraw d əşšin, ikf-en tarna d əlxəkum fəl kələsuf kul, ikf-en deş fərregat n əzuzəy ən təwarnawen.

² İzammazal-tan y ad agin isalan ən Taymar ta n Məşşina, əzzuzəyan deş imiranan.

³ Inn-asan: «Ad wər tawəyam wala daş əşikəl, gər z'iqqal tallaq wala aşrəg, wala allaw, wala azrəf, wala deş a okāyan təkadkat iyyadda.

⁴ As din-tosam aşrəm, ehan wa təggazam isammagarat-kawan, zabbatat daş-as har təgmədam aşrəm wədi.

⁵ Aşrəm təggazam wər kawan-əqbelan aytedan-net, as tu-təgammadam təbbikbakam-in əgodrar-net wa iwaran idaran-nawan, ilkām ad aggayyat awen fall-asan.»

⁶ Əqlan nəttulab, əllilan şığarmaten, ad əmmâlan Əlinjil daş adag kul, zuzəyan daş-as deş imiranan.

Iduf wa iga Herod daş Yaysa

⁷ İsla Herod wa n amuzar n akal ən Galilaya aratan kul win itaggu Yaysa əd nəttulab-net, iqqaan awen eşaf-net fəlas əllan-tu aytedan ganninen əs Yaysa: «Awen Yaxya wa isalmaşan aytedan daş aman a d-inkaran daş təmattant.»

⁸ Wiyyad gannin: «Awen ənnəbi İlyas a d-izzəbben.» Wiyyad deş gannin: «Awen iyyan daş ənnəbitan win ərəwnen a d-inkāran daş təmattant.»

⁹ Inna Herod: «Yaxya, nak iman-in a d-issəfrasan eşaf-net, daş adi ma imos aləs wa fəl sallaş aratan win?» Ad igammaş Herod d anay ən Yaysa.

Əşətşi ən Yaysa səmmos gim n aləs

¹⁰ Əqqalan-du nəmmuzal, əssoşalan i Yaysa awa əgan kul. Təzzar igmad dər-san aytedan s adag issufan a din-ikitayyen, ihan anamod ən təşrəmt ta n Betsayda.

¹¹ Mişan təsla tamattay awen, təlkam-as. İg-asan Yaysa marxaba, təzzar işşewal-asan daş salan ən Taymar ta n Məşşina, izzozay daş-san win əddərarnen s awen.

¹² As təbuk təfuk y agadal, əhozan-t-idu nəttulab-net win maraw d əşšin, ənnan-as: «Suşəl tamattay a, ad takku şığarmaten əd şawnatan win əhoznen, ad təgməy id tənşə d a tətşə fəlas edag issufan awa.»

¹³ Inn-asan: «Satşat-tan kawanay iman-nawan da!» Ənnan-as: «Nakkanay wər nəttef ar səmmosat təgəlwen d əşšin kifitan, kundaba za ad nəglâ nazzanza-du imensewan i təxlək a kul.»

14 Edag ən səmmos gim n aləs a əllanen den. Inna Ƴaysa i nəttulab-net: «Saxxamiwat aytedan kul, tagim-tan šiḡimten ən səmmosat səmmosat təmərwen n awedan.»

15 Egan nəttulab awen da, saxxaman aytedan kul.

16 Təzzar idkal Ƴaysa səmmosat təgəlwen šin den d əššin kifitan win, iggəzzay ijənnawan, iga igodan i Məššina amaran ikaramkaram šiḡəlwen šin, iga awen da i kifitan, ikf-en i nəttulab-net y a tan-uzanan i tamattay.

17 Ətšan aytedan en ketnasan har əyyəwanan. Tawašadawan-du karammutan win du-tawaglaznen, tawadnayan daḡ-san maraw əzmaman d əššin.

Awa inna Butros əs Ƴaysa

18 Əzəl iyyan itattar Ƴaysa ḡas-net, wər ḡur-əs illa ar inəttulab-net, dəffər awen issəstan-tan, inn-asan: «Awak daḡ iduf n aytedan, ma əmosa?»

19 Ennan-as: «Wiyyad a gannin Yaxya wa isalmaḡan aytedan daḡ aman a təmosa, wiyyad a gannin: ənnəbi Ilyas, wiyyad deḡ a gannin iyyan daḡ ənnəbitan win ərəwnen a d-inkâran daḡ təmattant.»

20 Təzzar inn-asan: «Kawanay za ma tənnam ma əmosa?» Inn-as Butros: «Əlməsix ən Məššina a təmosa.»

21 Issənkad Ƴaysa nəttulab-net, omar-tan s ad wər əməlan y awedan waliyyan isalan win den.

22 Inn-asan: «Nak Ag Aggadəm ilzâm-i ad ənəyaḡ arkanay aggen, unkaran-i muzaran ən Kəl-Əlyəhud əd muzaran ən limaman əd musanan n Əttawret, təwəggin man-in, ənərə-du deḡ daḡ təmattant əzəl wa n karad.»

Ləkkum i Ƴaysa

23 Dəffər awen inn-asan ketnasan: «Wa iran a di-ilkəm, wədi igmədet tara ən man-net, agu imateran-net idkəl təgəttawt-net akk əzəl, ilkəm-i.

24 Əssənət as awedan wa wər nəgəmməy ar aggaz ən man-net, wədi ad t-əgmədan, mišan wa iqbalan ad t-əgmədan fəl əddəlil-in, wədi ad ixləs.

25 Ma z'aknu y awedan ad igrəw əddənət ketnet, ənta issixrak iman-net, iffota daḡ alaxirat?

26 Awedan kul wa isakkarakad ləkkum y-i, madeḡ isikarakad-tu əsuxəl n awal-in, wədi nak da, Ag Aggadəm, a di-isəkkərəkəd əlqəbulat-net əzəl wa du-z-əqqəla aheḡ tanaya-nin, təmosat tanaya ta n Abba, təmos deḡ ta n angalosan a zaddognen.

27 Əggəyyeḡ əsilakanax-awan as, wiyyad daḡ-wan əbdâdnen da da, wər tan-z-iba wər ənayan Taḡmar ta n Məššina.»

Ætawənaɣ ən tanaya ən Ƴaysa

²⁸ Edag n əttam adan dəffər igi wa dasan-iga Ƴaysa batuten šin den, inkar iddew əd Butros əd Yaxya əd Yaquḅ s ədɣaɣ iyyan fəl a fall-as ansəy Məššina.

²⁹ Itattar den da as imməttay udəm-net, təzzar əgan səlsa-net təməllay tətassamat.

³⁰⁻³¹ Əhinan-in oggân ənnəbi Musa d ənnəbi Ilyas daɣ tanaya ən Məššina, mišawalan əd Ƴaysa daɣ batu n agamad wa z'agu əddənet a z'attaddin daɣ Yerusalam əs təmattant-net.

³² As itaggu awen Butros əd midawan-net ibâz-tan-in etəs. As d-ənkaran ənayan tanaya ən Ƴaysa, ənayan deɣ əššin meddan win dər innəbdad.

³³ As iggaz ənnəbi Musa d Ilyas šin əgəlli, inna Butros i Ƴaysa: «Əššex, olâɣ as nəlla da. Əndawat ad nəkrəs karad həktan: iyyan i-nak, iyyan in Musa, iyyan in Ilyas.» Wər issen Butros a igannu den.

³⁴ Igannu Butros awen da as du-tənafalal təgarak iyyat, təlsa Ƴaysa d ənnəbitan əššin win dər innəbdad. As təlsa Butros əd midawan-net, təggaz-tan tasa.

³⁵ Igməd-du əməsli təgarak ten, inna:

«Awa Barar-in
wa sannafranax,
səsəmat-as.»

³⁶ As tənda batu ten, wər hənnəyan nəttulab ar Ƴaysa. Əffəstan fəl awen, wər t-illa awedan əs t-əmâlan daɣ adan en.

Əzuzəy ən Ƴaysa barar iha aggəsuf

³⁷ As əzəl wa ilkaman i wen, izzəbbat-du Ƴaysa əd nəttulab-net win karad en adɣaɣ, təzzar təssəlkad-as-in tamattay təgget.

³⁸ Wala a ihogan idkal aləs iyyan daɣ ammas ən tamattay en əməsli-net, inna: «Ya Əššex, onsayaq-qay a di-təhənəttəɣ i barar-in, ənta ɣas a ələɣ.

³⁹ Aljayn a t-itabazan, təzzar ad izayyak, itizəbərdil, isakafkaf. Gərrid as t-itayyu, issikn-ay alɣazab.

⁴⁰ Onsâyaɣ inəttulab-nak a daɣ-as t-əkkəsən, indarasan.»

⁴¹ Təzzar inna Ƴaysa: «Xa! Iket iba n əzəgzan d əššur daɣ aytedan n azzaman a! Awak har əmməy əddewa dərwan, əzmâraɣ-awan? Awəy-du barar-nak.»

⁴² As d-ihoz barar Ƴaysa, iggədl-ay aggəsuf, ad itizəbərdil. Iharaššat Ƴaysa aggəsuf, ikkas-tu daɣ barar, izzay, issoɣal-tu y abba-net.

⁴³ Aytedan kul təsimaklal sər-san təzzəwwərt ən tarnə ən Məššina.

Emel ən Ƴaysa təmattant-net

Harwada isimaklal s aytedan arat kul wa iga Ƴaysa den, as inna i nəttulab-net:

⁴⁴ «Təggəzet batu ta šiməzzugen-nawan, təttafam-tat: "Nak Ag Aggadəm əjwâra ad əggâzaḡ ifassan n aytedan.»

⁴⁵ Mišan wər əgren batu ta dasan-iga den, ittinkal-asan almaḡna-net fəl a tat-wər-agrin, amaran tah-en tasa n əsəstan-net.

Tamazaq gər nəttulab

⁴⁶ Tənkər tamazaq gər nəttulab ən Ƴaysa daḡ batu ən wa daḡ-san ogaran almaqam.

⁴⁷ Issân Ƴaysa awa samadranan, a di fəl d-idkal arat ən barar iyyan issəbdad-tu dəgma-net,

⁴⁸ amaran inn-asan: «I iqbalan barar a, fəl əddəlil-in, nak a iqbal. I di-iqbalan deḡ, wa di-d-izammazalan a iqbal. Wa daḡ-wan wər nəmos arat, ənta a zəwwəran.»

Əsəstan daḡ batu n aləs itakkasan kələsuf daḡ aytedan

⁴⁹ Inna Ƴaxya i Ƴaysa: «Əššex, nənây aləs iyyan itakkasan kələsuf daḡ aytedan s esəm-nak, nənn-as ad wər iləs igi n awen, fəlas wər danaḡ-ihə əs ləkkum y-ak.»

⁵⁰ Inn-as Ƴaysa: «A das-tu-wər-təgdəlam, fəlas i wər nəgəmməy təkma-nawan, wədi əmidi-nawan.»

Iki ən Ƴaysa Yerusalam*Arat wa ilzaman ənalkim ən Ƴaysa d alak wa das-insan*

Tuḡəyt ən təxrəmt iyyat ən Samarəya s əlqəbulat ən Ƴaysa

⁵¹ As d-əhozan adan win daḡ z'assandu Ƴaysa arat wa ixtas Məššina, a t-imosan əmədkəl-net əs jənnawan, isaggatakkat y iki n əxrəm ən Yerusalam.

⁵² Issəgla inammazalan dat-əs, əkkan təxrəmt iyyat n akal ən Samarəya y a das-aknin edag n əzəbbi.

⁵³ Mišan ugayan aytedan ən təxrəmt ten s a dasan-iməguret fəlas ikkâ Yerusalam.

⁵⁴ As inay Ƴaqub əd Ƴaxya win nəttulab-net awen, ənnan: «Əməli, tareḡ ad nannu i təmsay a fall-asan du-tazzabbat, təsərrəkəmmət-tan?»

⁵⁵ Imalallay-tan-in Ƴaysa, isannarḡam-asan,

⁵⁶ təzzar okayan əs təxrəmt iyyat.

Awa ihan ləkkum i Ƴaysa

⁵⁷ Jiwanke as inna aləs iyyan i Ƴaysa: «A dak-əlkəma s adag kul wa təkke.»

⁵⁸ Inn-as Үaysa: «Izagazan әлән enwan, игәдәд дөх әлән шисәллүлә, мишан нак Аг Аггәдәм вәр әлөх вала едәг дәх әссәнса еҗаф-ин.»

⁵⁹ Inna Үaysa y iyyan әләс: «Әлкәм-и.» Тәззар инн-ас: «Әмәли, акф-и турәгат n ад агла һар дин-әнбәләх абба-нин тәззар.»

⁶⁰ Мишан инн-ас Үaysa: «Аyyу инәммәттан ад әнбәлан инәммәттан-насан, кәй аманан, аглу тага y аyтедан исалан ән Таҗмар та n Мәшшина.»

⁶¹ Inn-as iyyan әләс: «Әмәли, әрөх а дак-әлкәма, мишан акф-и турәгат n ад нәмәгга d аyтедан-ин шиwатриwен тәззар.»

⁶² Inn-as Үaysa: «Аwедан wa issәнтан дәх ләккүм y-и, мишан вәр ига аwен s әwәл iyyанда, wәди wәр иһор әд Таҗмар та n Мәшшина.»

10

Әзәммизәл wa ига Үaysa инәттүләб win әсsayат тәмәрwен d әшшин

¹ Дәффәр аwен исаннафран Әмәли wийyад инәттүләб әмоснен әсsayат тәмәрwен d әшшин, изаммазал-тан s әшшин әшшин y а das-ин-изаран әс җәрман әд дагган win аs иbүк y а таң-иммәр.

² Inn-асан: «Җарат тәггәт, мишан вәр әггәтан маššаҗалан win tat-z-әләynен. Дәх ади әттәрәт s есәм ән мәшшис ән җарат та, а d-ассаглу имаššаҗалан а tat-олайнен.

³ Аглат! Zимазалақ-қawan тәмосам zun јамаран әһанен аммас ән ridалан.

⁴ Ад wәр тawәyam азрәф wала әхрәг wала тәсәсәл та n санатат. А kawan-wәр-sәллүлен аssаламан дәх тарраyт.»

⁵ «Еһан тәггәзам, тәгәрәм fall-ас аssалам тәззар.

⁶ Kud иһ-аy аwедан n алхер, wәди а kawan-иқбәл, игрәw алхер-наwan. Kud дөх wәр t-иһа, wәди таkәyam d алхер-наwan.

⁷ As тәгrawам еһан n аwедан n алхер, тәхsәрәм дәх-ас. Татшим, ташwим аwа kawan-итawакфан, фәлас амаššаҗал кул иһор d алхақ-нет. Ад wәр тилалам инан.»

⁸ «Ахрәм а дин-тосам дөх әқбәлан-kawan мәссawәс, татшим ара́т was kawan-sаммагарен,

⁹ тәzzuzәyam имиранан win t-әһанен, тәззар таним y аyтедан-нет: "Таҗмар та n Мәшшина тәһөз-kawan-ду."

¹⁰ Мишан ахрәм а дин-тосам wәр kawan-әқбәлан мәссawәс, ила́лат тарраyен-нет тәганим:

¹¹ "Тәггиyем аs wала аbоққа n әхрәм-наwan wa иwаран идаран-nана да нәbbикбакк-ин, мишан әссәнат аs Таҗмар та n Мәшшина тәһөз."

¹² Ænney-awan, əzəl wa n tabadday, aytedan n əxrəm wədi, ad agin alxazab ogaran wa z'agin win əxrəm wa n Sədom.»

¹³ «Iket alxazab iqqâl-awan kəl-əxrəm ən Koradzin! Iket alxazab iqqâl-awan kəl-əxrəm ən Betsayda! Fəlas təlməxjujaten šin xur-wan əganen ənnar əgânat daɣ əxrəm ən Tir əd wa n Sidon, wədi irəw as əqqanan isəlsa ən bəhu əqqiman daɣ eɣəd, imos awen əsənnəfiləl n as əhdän.

¹⁴ Awen daɣ a fəlas, alxazab wa za tagim əzəl wa n tabadday ad agər wa z'agin aytedan n əxrəm ən Tir əd wa n Sidon.

¹⁵ Kawanay aytedan n əxrəm wa n Kafarnahum, adis ad tammadkalam s aljannat? Kalar Jahannama a daɣ za tətəwəgaram.»

¹⁶ Inna Ƴaysa deɣ i nəttulab-net: «Awedan wa dawan-issəsaman, nak as issəsam; wa kawan-inkuran deɣ, nak a inkur. Amaran wa di-inkuran, wədi wa di-d-izammazalan a inkur.»

Təwaxlay ən nəttulab ən Ƴaysa win əssayat təmərwən d əššin

¹⁷ As d-əqqalan nəttulab win əssayat təmərwən d əššin, əknân təfalawist, gannin i Ƴaysa: «Əməli, wala kələsuf əttâfan tənna-nana as dasan-nəxra esəm-nak!»

¹⁸ Təzzar inn-asan Ƴaysa: «Hannayax Aššaytan as d-ifataqqat daɣ jənnawan zun essam.

¹⁹ Əssənat as əkfeq-qawan tarna fəl taššolen əd təzurdam d awa ila azangaw-nana Iblis kul daɣ tarna. Wər t-illa a ifrâgan a dawan-əgu təkma.

²⁰ Mišan a kawan-wər-isəfəliwəs as əttâfan kələsuf tənna-nawan, kalar isəffəliwəset-kawan akatab wa əgan əsmawan-nawan daɣ aljannat.»

Tədəwit ən Ƴaysa

²¹ Assayat ten da ad ikna Infas wa Zəddigan əsəddəwi ən Ƴaysa, təzzar inna: «Əgeɣ-ak təmmalən ya Abba, Əməli ən jənnawan d amaɣal fəl aɣabar wa təgeɣ aratan win i musanan, əd malan ən tayttay, təsannafalalaq-qan y aytedan win wər nəzlay əd bararan; id adi da a imosan agna-nak ya Abba.

²² Arat kul ig-ay Abba-nin daɣ əfus-in, wər t-illa i issanan awa əmosa ar Abba, wər t-illa deɣ i issanan awa imos Abba ar nak an Barar-net d awedan was areɣ a das-tu-sənnəfiləla.»

²³ Imalallay-in Ƴaysa inəttulab-net, iššewal-asan əntanay xas, inn-asan: «Əbbilalnat šittawen šin hannaynen awa təhannayam!

²⁴ Silakanax-awan as sidaranan ənnəbitan aggotnen əd mənokalan anay n awa təhannayam, mišan wər t-ənayan, sidaranan dəx tesalay y awas təsallim, mišan wər das-əslen.»

Awa izlayan ənalkim ən Yaysa d aytedan win hadatnen

Əsəstan wa iga əmusan n Əttawret i Yaysa

²⁵ Dəffər awen inkar-du əmusan n əşşərixa iyyan iga i Yaysa əsəstan imosan tənagmayt, inn-as: «Əşşex, mas dilzam igi-net, y ad əgrəwa təməddurt ta təxlalat?»

²⁶ Inn-as Yaysa: «Ma iktaban dağ Əttawret? Ma dağ-as təxreç?»

²⁷ Ijjəwwab-as, inn-as: «Iktâb dağ-as as: "Ad tireç Əməlinak Məşşina s əwəl iyyanda, əd man ərdânen, tireç-qu əs təxurad-nak kul əd tayttay-nak kul, tireç dəx əşəqqax-nak əs təməwit tas tareç iman-nak."»

²⁸ Inn-as Yaysa: «Aljawab-nak oğâd, taggu adi da ad təddəra.»

Əlmital wa n aw Samarəya wa olaxan

²⁹ Mišan dad ira əmusan wen ad aknu batu-net, inna i Yaysa: «Ma imosan za əşəqqax-in?»

³⁰ Ijjəwwab-as Yaysa s əlmital wa, inn-as: «Aləs iyyan a d-igmadan ayrəm ən Yerusalam, iras ikka wa n Yerikaw har t-əgrawan baydagan. Əbazan dağ-as awa ila, əggâtan-tu, as t-oyyan illa gər təməddurt d iba.

³¹ Imazayyat d awen d as d-iga əlimam iyyan tarrayt ten. Inay aləs wen, iğlay-tu.

³² Illam-du iyyan dağ Kəl-Ləbi ənta da den, inay-tu, iğlay-tu.

³³ Mišan as d-illam aw Samarəya iyyan den išşokalan, inay-tu, təggaz-tu təhanint-net.

³⁴ Ikk-ay-du, išşorad ibusan-net s azzayt d esmad n alxanab, ittal-tan, təzzar issəwan-tu təsənəyt-net, eway-tu s azazzabbaw, issan dağ-as.

³⁵ As affaw, idkal-du əşşin dinaran n əzrəf ikf-en y aləs wa innəttafan d azazzabbaw, inn-as: "Əssən dağ aləs di, as d-əqqala, nak a dak-z-irzəman arat kul wa fall-as tənçex, kud ənta ogar adi."»

³⁶ Amaran inna Yaysa y əmusan n Əttawret wen: «Məni dağ meddan win karad a, was tordeş as ənta a igan y aləs wa ənçan baydagan a amazal wa itaggu awedan y əşəqqax-net?»

³⁷ Inn-as: «Wa das-ihanatten.» Inn-as Yaysa: «Adi za aglu, taga kay da zun d awen dağ.»

Maryama əd Marta

³⁸ Iгла Ҷайса даъ әшкәл-net әнта әд нәттүләб-net һар иггәз тәхрәмт ийят иннәфтаъ i тәнтүт тәгәт есәм Марта.

³⁹ Тәнтүт та тәлә тәмадрәйт-net тәгәт есәм Мәриямә. Тәққим Мәриямә хур даран н Әмәли Ҷайса, тәссисәм y аwа игәннү.

⁴⁰ Марта амаһан, ишимаһан-tat әшшәхәл n әсәммәғүри ән Ҷайса.

Wala ihogan төһоз-du Ҷайса, тәһн-ас: «Әмәли, аwак зәләят а wәр тәгеъ даъ аs di-toyya тамадрайт-in d әшшәхәл кетнет хас-in? Ann-as а di-tilal.»

⁴¹ Inn-as Ҷайса: «Марта, Марта! Әшшиwаһан-kam аратан агготнән, әссиггәдан тәйттай-һәм.

⁴² Әнта арат ийянда аs тәга әддарарат олâх а t-imosan әсәсәм y awal-in, әнта а тәсәннафран Мәриямә, амаһан wәр даъ-ас z'әттәрмас.»

11

Təwatray әn Ҷайса

¹ Әзәл ийяһ итәттәр Ҷайса даъ әдаг ийяһ. Аs иссәнда, инн-ас ийяһ даъ нәттүләб-net: «Әмәли, susән-ана тәwатрайт zun аwа ига Yaxya i нәттүләб-net.»

² Inn-asan Ҷайса: «Аs тәтәттәрәм, тәһним:

"Аbба,

Itəwəsəxməret esəm-nak di zəddigan,
taset-du təxmar-nak.

³ Akf-anax akk əzəl isudar-nana,

⁴ təssurəfəx-anax ibakkadan-nana,

zund əmmək as nakkanay da

nəsuruf i win danax-əganen ark mazalan.

A dana-wər-taga daъ aղարар ән jarrabatan n Iblis."»

Gälleyat daъ təwatriwen

⁵ Inn-asan Ҷайса дөх: «Məni daъ-wan wa z'ilen əmidi, as-ay-du adawannay n ahad ann-as: "Zəbənət-i-du karadat təgəlwen,

⁶ fəlas iyyan daъ midawan-in a di-d-innəftəxan, wər əley a t-əššətša."

⁷ Təzzar ann-as-du daъ ammas n ahan: "A di-wər-tədgəza, ehan-in əmərədda ixfāl, nak əd bararan-in nəqqāl s etəs, wər əfrega a din-əbdədaъ akfaq-qay arat."

⁸ Ənneъ-awan, kud wər d-inker akf-as-tanat fəlas imos əmidi-net, da ad d-inkər akf-ay arat kul was iddərər fəlas wər t-isakkarakad mansay wa t-iga den.»

Əzəgzan əs təwatriwen

⁹ Amaran nak ənney-awan: «Ansəyat Məşşina a kawan-akfu; əgməyat, ad təgrəwam. Kawkawat təsəhərt a dawan-tannalam; ayrat-tu, a dawan-akkawan.

¹⁰ Awalla i onsayan ad itəwəkfu; i igmayan, ad igrəw, i iğran dəx Məşşina, a das-akkawan.

¹¹ Məni dəx-wan wa dəx z'igməy barar-net isan, akf-ay taşşolt?

¹² Wala igməy dəx-as təkəkit akf-ay təzardəmt?

¹³ Kud kawanay an nəllubas təssānam tehakkay n awa olayan i bararan-nawan, manəmmək as kawan-wər-z-akfu Abba-nawan wa ihan ijənnawan Infəs wa Zəddigan as das-tu-tonsayam?»

Iyyat təmazaq əd Farisaytan

Tarna ən Məşşina meyx tarna n Iblis

¹⁴ Dəffər awen ikkas Yaysa dəx aləs iyyan aggəsuf a das-igaddalan awal. Iğmad-tu aggəsuf ças işşewal, isammaklal awen əs tamattay.

¹⁵ Mişan ad gannin wiyyad dəx-san: «Awen Aşşaytan Baçalzabul, wa n əmənokəl ən kələsuf a t-ikfan fərregat n ikus ən kələsuf dəx aytedan.»

¹⁶ Wiyyad dəx arān ad t-ajjarraban, gammayan dəx-as a dasan-agu təlməxjujat təmosat alçalamat a du-təfəlat Məşşina.

¹⁷ Yaysa ənta issān awa samadranan, adi a fəl dasan-inna: «Tağmar kul tas əmməgaran məssawəs gar-essan, əbərəjji a za tagu, təzzar əbərəjjen çawnatan-net s iyyan iyyan.

¹⁸ Təgannim nak Aşşaytan Baçalzabul a di-ikfan fərregat n ikus ən kələsuf dəx aytedan; kud adi a iğan wədi manəmmək as za tihag tağmar-net ənta iməggar əd man-net?

¹⁹ Amaran kud nak tarna ən Baçalzabul as takkasay kələsuf dəx aytedan, inalkiman-nawan za ma ilan tarna tas tan-takkasan? Adi da fəlas əntanay iman-nasan as kawan-z-əbəzan s əşşəriça.

²⁰ Kud amaran nak tarna ən Məşşina as takkasay kələsuf, dəx adi Tağmar ta n Məşşina tos-iwan-du.

²¹ Aləs n əməqqrəd otāban fəl təzoli, ogāz ehan-net, wədi təla-net wər tat-in-ikka wala.

²² Mişan as t-id-ibag iyyan a t-ogaran assahat, orn-ay; a dəx-as ibəz təzoli-net ta fəl iffəlla, irkəb dəx-as təla-net, uzan-tat.

²³ Wa dər-i wər nəddew, azangaw-nin a imos; wa di-wər-nəllil dəx s əşidəw, wədi əzəwwəziwəz a itaggu.»

Tewaxlay ən kələsuf

²⁴ «As igmad aggəsuf awedan, ad irəs aggəsuf wen idaggan əqqurnen, igammay id imal, iqqim wər t-igrew, ad annu daɣ man-net: "Nak a za, ad əqqələx ehan-in wa d-əgmada."»

²⁵ As t-id-iqqal, a t-id-asu ifrâd, immotag.

²⁶ Təzzar aglu idaw-du d əssa kələsuf wiyyad a t-ogarnen tallabəst, əggəzan awedan wanâd, əzdəxan-tu. Tagu taɣara n awedan wen aɣşud ogaran was kala tu-təga.»

Əbbələl wa n tidət

²⁷ İşşewal Ƴaysa den da as tədkal təntut iyyat əməslinet, tənn-as: «Təbbilal təntut ta kay-terawat, əd fəfan win tənkaşax.»

²⁸ Mişan inn-as Ƴaysa: «Aytedan win ogarnen əbbələl da əssəsammen y awal ən Məşşina, tamazalan awa inna.»

Alɣalamat ta n Yunəs

²⁹ As inay Ƴaysa aytedan tiddawan fall-as, inn-asan: «Aytedan n azzaman win, inəllubas; gammayan təlməxujat! Kala! Təlməxujat ta dasan-tətawagat iyyadda ɣas, a tat-imosan ta n ənnəbi Yunəs.

³⁰ Əmmək was kala ad iqqal Yunəs alɣalamat y aytedan n əɣrəm ən Ninif, əmmək en da as z'əqqəla nak Ag Aggadəm alɣalamat y aytedan n azzaman win.

³¹ Əzəl wa n tabadday, a du-tənkər təmənokalt tas kala təkam fall akal n agala igân esəm Şeba, taggayyat fəl aytedan n azzaman win, təzzəbəz-tan y əşşəriɣa fəlas d ad iraz amaɖal a du-təgmad fəl ad təssəsəm y awal ən təla n əgərri wa itaggu əmənokəl Suliman. Əssənət za as, wa illan da əmərədda, ogar ənnəbi Suliman mişan tugayam s a das-təssəsəmam.

³² Əzəl wa n tabadday, ad d-ənkəran aytedan n əɣrəm wa n Ninif, əzzəbəzan aytedan n azzaman win y əşşəriɣa fəlas tətubt a əgan əzəl wa dasan-iga Yunəs təlxutbat, imal-asan awal ən Məşşina. Əssənət za as, wa illan da əmərədda, ogar Yunəs mişan tugayam əs tətubt.

Ənnur əd şiyay

³³ Wər t-illa awedan isarɣin fətəla təzzar ixbər-tat, madəx ag-et daw əxəzu, kalar əsəwər a tat-itaggu edag ihhoken fəl ad ənəyan aytedan win du-taggaznen ehan s ənnur-net.

³⁴ Şat, şilat ən fətəla a təmos i təxəssa-nak. As imos as şat-nak təhannay s əlluɣ, wədi təxəssa-nak ketnet təha ənnur; mişan as imos as şat-nak wər təhənnəy s əlluɣ, wədi təxəssa-nak ketnet təha şiyay.

³⁵ Daḡ adi agu ənnəyat əd man-nak, ənnur wa kay ihan a tu-wər-alsinat šiyyay.

³⁶ Amaran kud taḡəssa-nak ketnet təha ənnur, wər tat-ihā adag ihân šiyyay; wədi ad təmələwlew ketnet, zun təheḡ edag təsimalawlaw fətəla.»

Təlmənufəqa ən Farisaytan əd musanan n Əttawret

³⁷ Iḡrad Ƴaysa awal ḡas igmay daḡ-as Farisay iyyan a ḡur-əs ammansaw. Os-in Ƴaysa ehan ən Farisay wen, iggaz edag wa daḡ əskaran mensewan, isayḡamar, ad itattu.

³⁸ Isammaklal əs Farisay en awas issənta Ƴaysa tettay wər iššorad ifassan-net awa tənna alyadat-nasan.

³⁹ Təzzar inn-as Əməli Ƴaysa: «Kawanay Farisaytan, təzazdagam afalla n əsəlkəw d əḡəzu, as iga awen, ammas ən wallan-nawan wər ədnayan ar tarkəbt əd talbast.

⁴⁰ Aljahilan! Wərgəḡ wa d-igan afalla ən təḡəssa, ənta a d-igan ammas-net da?

⁴¹ Daḡ adi əkətət i təlaqqawen awa ihan ikassan-nawan, əddi arat kul a dawan-izdag.

⁴² Iket alyazab iqqâl-awan ya Farisaytan, fəlas təhakkam awa imosan təməssədək-nawan daḡ ənniḡnaḡ d əzzənəfan ən yelatan kul win fərgan, as iga awen, tətamazrayam əššəriḡa ən Məššina əd tara-net, s əntanay əs kawan-iwar ləkkum y-asan, da wər din-təglemam win hadatnen!

⁴³ Iket alyazab iqqâl-awan kawanay Farisaytan, fəlas tərām təḡimit daḡ adag wa ilan almaqam daḡ nan n əlyibada ən Kəl-Əlyəhud, d a kawan-saslaman aytedan daḡ sammanayan.

⁴⁴ Iket alyazab iqqâl-awan, fəlas tolâm əd zəkwan wər nəmmun, fəl itijəwənkit awedan wər issen, samadasan-tu.»

⁴⁵ Inna iyyan daḡ musanan n Əttawret i Ƴaysa: «Əššəx, daḡ awa tənneḡ əddi, nakkanay da, təgeḡ-ana arak batu.»

⁴⁶ Inn-as Ƴaysa: «Iket alyazab iqqâl-awan kawanay da, imusanan n Əttawret, fəlas təsawaram aytedan əzuk as izzəwat aggay-net; kawanay amaran wər tu-za-tədəsam əs wala idədwān-nawan.

⁴⁷ Iket alyazab iqqâl-awan fəlas təkarrasam izəkwan hossaynen y ənnəbitan as imarawan-nawan a tan-ənḡanen.

⁴⁸ Emmək wədi as təgḡiyyem fəl awa əgan, tərḡam sər-əs fəlas əntanay za ənḡan-tan, kawanay amaran təkrasam izəkwan-nasan.

⁴⁹ Awen daḡ a fəl inna Məššina daḡ masnat-net wər nəla təzərəst: "A sər-san zəmmizəlay ənnəbitan əd nəmmuzal, ad agin iman ən wiyyad daḡ-san, zəḡḡəzzəban win hadatnen."

⁵⁰ Adi as, aytedan n azzaman win, əhân-tan man n ənnəbitan kul win tanwanğanen, wa n ənətti n əddənet har azalada.

⁵¹ Awalla, illikan as, aytedan n azzaman win, əhân-tan man n aytedan di kul, a d-ibazan ğur man win Habila har win Zakarayya, wa ənğan dağ Ahan wa Zəwwəran n Əlğibada, gər majmar wa zəwwəran n əsəqəqəd ən təkutawen d adag wa zəddigan.

⁵² İket alğazab iqqâl-awan ya imusanan n Əttawret, fəlas təharam tarrayt ta tətawayat awedan əs masnat ən Məşşina; kawanay iman-nawan wər-tat-təggezam, təgdalam değ iguz-net i win t-əranen.»

⁵³ As ifal Ƴaysa ehan wen, əssintan musanan n Əttawret əd Farisaytan dağ əddəğuz-net wəllen, taggin-as isəstanan aggotnen,

⁵⁴ dağ gammayan a tu-sassannin arat a tan-z-akfin tarrayt əs təxtəst-net.

12

Əsəmmutəğ

A kay-wər-təggəz tasa n əzəğzan əs Ƴaysa

¹ As itaggu awen təddew tamattay təkənât igət fəl Ƴaysa, har əqqıman aytedan tinəməkukulan. İşşewal Ƴaysa, azzar əs nəttulab-net, inn-asan: «Ənkədat i xamira wa n Farisaytan a t-imosan təlmənufəqa.

² Arat kul wa iğbaran ad itəwəsənəfiləl, amaran əssir kul ad affaggu.

³ Dağ adi, a tənnam dağ şıyyay, ad itəwəslu ezal a mallan. A təsəmmataktakam değ dağ ammas ən nan-nawan, ad attamal fəl fallatan-nasan.

⁴ Kawanay imidawan-in, ənney-awan: Ad wər tiksadam aggadəm əs fərregat-net wər t-okay ikus ən man dağ təğəssa.

⁵ A dawan-əmələğ wa za tiksadam: İksadat Məşşina a inaqqin, ila değ tarna n a kawan-igər dağ Jahannama. Awalla, ənney-awan ənta en da as kawan-iwar a tu-tiksadam.

⁶ Wərgəğ səmmos gəqəd a din-nazzinen sanatat təfelen? Dər iga awen da za, wər tan-iha i din-itataw Məşşina.

⁷ Kawanay amaran wala anzadan ən ğafawan-nawan da kul əddunan. Dağ adi ad wər tiksadam wala, togaram igəqəd aggotnen əlqimat.

⁸ Ənney-awan, awedan kul wa iggəyyen dat aytedan as nak Ag Aggadəm a t-ilan, nak da, ad əggəyyeğ dat angalosən ən Məşşina as nak a t-ilan.

⁹ Mišan wa di-inkuran dat aytedan, wædi nak da ad t-unkaray dat angalosan ən Məššina.

¹⁰ Awedan deɣ wa di-ibyakan nak Ag Aggadəm, ifrâg ad igrəw təsureft; mišan awedan wa ikkasan tarna y Infas wa Zəddigan, wædi wər z'igrəw təsureft.

¹¹ As təmmewayam əs nan n əlɣibada win Kəl-Əlyəhud, madeɣ əs mənokalan madeɣ əs muzaran y ad tətəwəšrəɣam; a kawan-wər-iššəwəš əmmək was za təkkəsam iman-nawan, wala awa za tannim,

¹² Infas wa Zəddigan a kawan-z-issusənan daɣ assayət tædi da awas inahagga a tu-tannim.»

Əlmital n əmæggergəs wa wər nəla əgərri

¹³ Inna-du awedan iyyan i Ƴaysa daɣ ammas ən tamattay: «Əššex, annu y əmaq qar-in a dər-i uzan təkasit-nana.»

¹⁴ Inn-as Ƴaysa: «Aləs, ma di-igan əlqali-nawan, wala tuzanay-awan təkasit?»

¹⁵ Təzzar inna Ƴaysa i tamattay: «He kawanay! Agəzat iman-nawan daɣ a imosan əwwəli fəlas kud iggərgas awedan, da təməddurt-net wər təqqen daɣ ərrəzəɣ-net.»

¹⁶ Təzzar ig-asan əlmital wa, inna: «Šiwəgas n əmæggergəs iyyan a əganen igi olâɣan.

¹⁷ Ad isamadran gar-es əd man-net, igannu: "Awak ma z'agay? Nak ab'as ələɣ edag a daɣ əgeɣ attayam-in."

¹⁸ Təzzar inna: "Əssanay awa z'aga. Ad arzay šidangawen-in, əkrəsay šin tanat-ogarnen, əššidəway daɣ-asnat attayam-in kul d awa ələɣ."

¹⁹ Amaran annay i man-in: "Ya mandam, tələɣ ərrəzəɣ aggen a dak-igân elan aggotnen, sanfu, tatša, tašwa, tannaflaya."

²⁰ Mišan inn-as Məššina: "Ameskel! Ahad a da a kay-z-əgmədan man-nak. Ma z'igrəwan awa təššədaway?"

²¹ Awen daɣ a igarrawan awedan wa išadawan əddənet fəl man-net amaran wər iššədaw wala daɣ talɣa ta gar-es əd Məššina."»

Iba n aššawaša

²² Dəffər awen inna Ƴaysa i nəttulab-net: «Awen da fəl dawan-ənnəɣ: A kawan-wər-təššəwəš təməddurt gər awa za tatšim, wala awa za talsim,

²³ fəlas iman-nawan ogaran imensewan almaqam, taɣəssa-nawan deɣ togar isəlsa almaqam.

²⁴ Ənzərat daɣ əɣrutan, wərmad nabbalan za wər tiləyan, wərmad əlân isəɣbar za wala šidangawen mišan issodartan Məššina. Tofâm-tan za s aggen.

25 Məni daɣ-wan wa ifragan s aššawaša-net əšitəy ən təxrəst-net əs wala ellaf ən šat?

26 Dad zama as wər təfregam igi n a ogdân d awa təmmədrəyt, ma fel as kawan iššəwaš awa hadan?

27 Ʒnʒərat daɣ əmmək was du-daggalnət təjigawen: wərməd šaqqalnət wala zattinat isəlsa, mišan ənnəɣ-awan wala Ʒmənokəl Suliman harkid təgərgist-net kul wər kala ad ewad wala iyyadda daɣ-asnət šihussay ən talassay.

28 Dad isalsu Məššina yel əs təməwit tədi, s azalada ibdād, tufat ad itəwəsəryu daɣ təjəngərərt; manəmmək as kawan-wər-z-assalsu, kəl əzəgzan əndərran!

29 Daɣ adi a kawan-wər-ədgəzan medranan n awa za tatšim, wala awa za tašwim, wala deɣ iššəwəšan-kawan.

30-31 Aratan win di kul aytedan win wər nəssen Məššina, a ozalnen daɣ aɣamay-nasan. Mišan kawanay, ədgəzat daɣ aɣamay ən Taɣmar ta n Məššina. Aratan win di kul a kawan-tawakfin əntanay da, fəlas Abba-nawan issân as təddiraram sər-san.

32 Təsəgərt n ayfad-in a kamət-wər-təggəz tasa, fəlas Abba-nakmat igrâz-as wəllen a kamət-akfu taɣmar-net.

33 Zanzat-in awa təlām, təkətām-tu i tələqqawen, tagim i man-nawan fartamanitan wər nətəməndu, təššidəwam daɣ jənnawan ərrəzəɣ wa wər nəxərrəd, wər mad t-in-z-ihazan baydagan wala deɣ təxšəd-tu tamaday.

34 Edag wa təggaz təgərgist-nawan, ənta a z'əggəzan wallan-nawan.»

Assa n Ag Aggadəm

35 «Ʒqqələt aytedan otâbnen, əs əryânat fətəlaten-nasan.

36 Talim d eklan əqqâlnen y ad d-ifəl məššissan takrəst fəl a sər-əs in-əbdədan da da ad d-izzəkəkət daɣ əmi n ahan.

37 Ʒbbilalan eklan win d-ogaz məššissan okâyan. Silakanay-awan as, ad atəb ənta iman-net, isəɣximen, isəmmənsəw-tan.

38 Gər z'iqqâl-du adawannay n ahad wala deɣ ammas n ahad, eklan win d-ogaz məššissan okâyan əbbilalan.

39 Wərgəɣ kawanay iman-nawan təssânam as, ənnâr issân məššis n aɣaywan amazay wa daɣ du-z-idəl abaydag, akəy isəmmutəg y a das-igdəl terazay n ahan-net?

40 Səmmutəgat za kawanay da, fəlas nak Ag Aggadəm ad d-asa daɣ assayət tas wər tordem a daɣ-as d-asa.»

41 Təzzar inn-as Butros: «Ʒməli, nakkanay ɣas a fəl təgəɣ tangalt tədi, meɣ aytedan kul?»

42 Ijjəwwab-as əməli Ʒaysa inn-as: «Ʒməššaxal wa iɣdalan ila deɣ əgərri ənta a isannafran məššis izzuzər-tu

i maššaxalan-net win hadatnen fəl a tan-ihakku idəgran-nasan daɣ sudar daɣ alwaq wa igmadan y awen.

43 Ibbilal əkli wen as d-iqqal məššis, ogaz-t-id iha əššəxəl wa daq q-id-oyya den.

44 Əggəyyeɣ əsilakanax-awan as, ad t-izzuzər məššis i təla-net kul.

45 Mišan ənnar inna əkli wədi daɣ man-net: "Məšši illolat-in," təzzar ad iggat imaššaxalan əd təmaššaxalen win hadatnen, itattu, issasu esmad har ammaswad,

46 akli wədi, ilkâm a t-id-iɣdər məššis daɣ əzəl d amazay wər orda, təzzar ad t-iggât har t-iksən, ag-ay dad tawaggin aytedan win wər nəɣdel.

47 Amaran akli wa issanan awa ira məššis, iqqim wər t-iga madeɣ wər iga ənnəyat n igi-net, a das-təwəgginat təwit aggotnen.

48 Mišan akli wa wər nəssen awa ira məššis, amaran iga arat ihoran d əwəddəb, a das-təwəgginat təwit wər nəggət. Awedan igrawan a aggen, a daɣ-as itəwəgməy a aggen. I itawasaylafan a aggen, a daɣ-as itəwəgməy a ogaran awa itawasaylaf.»

Ənəməzray d əššəriɣa wa d-izayan

49 Dəffər awen inna Ƴaysa: «Oseɣ-du fəl ad assarɣa temsay daɣ əddənet. Sidaranax ad imos as tərɣâ.

50 Amaran ilkâm daɣ-i ətəwəsəlmaɣ, s iket wər t-əgeɣ əknan-i man-in əddəguz.

51 Tordâm as, assa a d-əgeɣ fəl a d-awəyax alxer s əddənet? Kala kala, ənəməzray a sər-əs d-ewaya.

52 Id a ibazan ɣur əmərədda, səmmos aytedan n ahan iyyanda ad nəməzrəyan, əwaran karad aganna fəl əššin, əššin deɣ əwəran aganna fəl karad.

53 Ad inəməzrəy aləs əd barar-net, barar deɣ inəməzrəy d abba-net, tənəməzrəy təntut əd tabarart-net, tabarart deɣ tənəməzrəy d anna-net, tənəməzrəy tədaggalt əd təntut ən barar-net, tənəməzrəy deɣ təntut əd tədaggalt-net.»

54 Inna Ƴaysa deɣ i tamattay: «Wərgəɣ as tənayam tagarak as du-təgmad daɣ ataram ad tannim əddi da: "Akonak izay-du." Təzzar agu adi da.

55 As tənayam deɣ əhud as d-igar, ad tannim: "Ad tagu tuksay." Təzzar agu adi da.

56 Əlmunafıqan, təssânam emel n aɣalamaten šin əganen fəl amaɖal əd šin əganen daɣ jənnawan, mišan adis wər təgrem azzaman win fall-awan əganen da?

57 Mafel za wər təgrem kawanay iman-nawan awa oɣadan?

⁵⁸ Masalan as kay-iğra awedan s adag n əşşəriya, təgməya təməwit əs tənəmaknam dağ tarrayt. As wər təgeç adi, a kay-ilwəy har kay-issəbdəd dat əlqali. Əlqali amaran a kay-agu dağ fassan ən soji wa kay-z-iğəran dağ kasaw.

⁵⁹ Əsilakanax-ak əs: Wər du-za-təgməda iket wər tərzema. Wala tamma iyyadda wər din-za-taqqam.»

13

Addararat əs tətubt

¹ Harwada išşewal Ƴaysa as d-ənkaran aytedan əllanən den, əssoğalan-as isalan ən meddan wiyyad ən Galilaya as isisaga ənaxkim Bilatəs iman-nasan alwaq a dağ taggin şikutawen dağ Ahan wa Zəwwəran n Əlyibada dağ Yerusalam.

² Inn-asan Ƴaysa: «Awak tordâm as, Kəl-Galilaya win di ogaran Kəl-Galilaya kul win hadatnen tişit ən nəsbakkadan fəl as əgan arak təmattant tədi?

³ Ənneç-awan, kala! Amaran kawanay da, as wər tətubam, ad təhləkam ketnawan.

⁴ Ma tənnam za s aytedan win maraw d əttam win fəl ibarajjat suru was itawannu Silowam dağ əğrəm ən Yerusalam, inç-en? Tordâm as, ogaran Kəl-Yerusalam kul win hadatnen tişit ən nəsbakkadan?

⁵ Ənneç-awan, kala! Amaran, kawanay da, as wər tətubam, ad təhləkam ketnawan.»

⁶ Ig-asan Ƴaysa tangalt iyyat, inn-asan: «Kala inbal aləs iyyan aşək as itawannu fig dağ afarag-net n alçanab. As təga tamert n ara-net, os-ay-du y ad d-inkəd aratan-net, mişan wər dağ-as igrew wala.

⁷ Təzzar inna y amaşşaxal wa innəttafan d afarag: "Ənəy! Əmərədda karad elan a əgeç tasa-du, gammaya-du aratan n aşək wa, mişan wər kala dağ-as əğrawa wala. Dağ adi əxtəs-t-in! Ma ikannu dağ amaçal wər t-idu-təgəmməd tənfa."

⁸ Inn-as amaşşaxal wen: "Məşşi, are dağ-ak a tu-tayya tenewa da ças, ad əğəzax amaçal wa t-iğlayan, ənçələ dağ-as tamaqqost.

⁹ İha mijas awatay wa d-izayan ad arəw, as wər erew, təssəxtəsaq-q-in."»

Təməzzəyt ən təntut iyyat dağ əzəl ən təsanfawt

¹⁰ Əzəl iyyan ən təsanfawt isasaxru Ƴaysa dağ ahan n əlyibada ən Kəl-Əlyəhud.

¹¹ Təlla təntut iyyat den təlât maraw elan d əttam issirantat aggəsuf, imos əruru-net təganzay, wər təfreg aqqad ən tabadday-net.

12 As tat-inay Ҷaysa, iҗr-et-du, təzzar inn-as: «Tantut, təwərna-nam təzzayax daҗ-as!»

13 Issəwar-tat ifassan-net, toҗad tebadday-net alwaq wen da, ad təmmâl Məššina.

14 Mišan iggaz alham əmuzar n ahan n əlҗibada wen fəlas izzozay Ҷaysa awedan daҗ əzəl ən təsanfawt, inna əmuzar en i tamattay: «Wərgəx sədis adan as imməkkan a daҗ-san itəwəggu əššəxəl? Asiwat-du daҗ-san təgməyam təməzzəyt, wərgəx əzəl wa n təsanfawt!»

15 Inn-as Ҷaysa: «Əlmunafiqan, məni daҗ-wan wa wər nətəkkəs tewaxnay y azgar-net madəx itrəg ajad-net daҗ əzəl wa n təsanfawt y a t-id-aššašəw?»

16 Tahayawt n ənnəbi Ibrahim ta amaran, ikrâd Iblis a ilân maraw elan d əttam, adis wər imməkkan ad tətəwəzuzəy daҗ əzəl ən təsanfawt?»

17 As inna Ҷaysa awen, təbaz təkarakit aytedan kul win nəmməzray-net, aytedan sa hadan amaran, ketnasan sidawen-tan mazalan əknanen šihussay win itaggu.

Əlmital n amasa n annabat igân esəm mutard əd wa n xamira

18 Inna Ҷaysa: «Ma dər tola Taymar ta n Məššina? Mas tat-z-ammattala?»

19 Tolâ d amasa n annabat igân esəm mutard, idkal awedan inbal-tu daҗ afarag-net, idwal, iqqal ašək, ad taggin gədad šisəllula daҗ zəlan-net.»

20 Inn-asan Ҷaysa dəx: «Mas z'ammattala Taymar ta n Məššina?»

21 Tola əd xamira tərway təntut əd karad annafaxaten n agel n alkama har ikuf agel ketnet.»

Tarrayt ta n Taymar ta n Məššina

Iguz ən Taymar ta n Məššina

22 Iгла Ҷaysa, illil iҗərman əd təxarmaten, isassaxru aytedan, idâg sa sər Yerusalam.

23 Inn-as awedan iyyan: «Əməli, awak aytedan wər nəggət xas a z'assafsu Məššina?» Təzzar inna Ҷaysa i tamattay:

24 «Imi ən Taymar ta n Məššina i kəruzan, daҗ adi bal-lanat təgməyam d iguz-net. Ənnəx-awan aytedan aggotnen a z'əgməynen d iguz-net, mišan a dasan-indər.

25 As ijwar məššis n aҗaywan iҗfal-in fəl man-net təsəhərt n ahan, kawanay təbdâdam dat-əs, ad təggəzam šin əkukəw, təgannim: "Mandam, aləm-anax!" Ann-awan: "Wər kawan-əzdayax za wər əssena da du-təfalam."

²⁶ Alwaq wædi a das-tannim: "Wærgex nêdraw dêr-æk tettay æd tassay, tæsisaxra dex day xerman-nana?"

²⁷ Mišan a dawan-annu: "Nak wær kawan-æzdayax. Ketnawan imaggan ən talbast a tamosam, ugagat-i."

²⁸ As tənayam Ibrahim d Isəhaq æd Yaqub d ənnəbitan kul əqqiman day Taymar ta n Məššina, ənta kawanay iman-nawan tətawastayam day-as, ad talim, ad tədaddam idədwān-nawan fəl təmagraz.

²⁹ Ad d-əgmədan aytedan dənnəg d ataram æd tamasna d agala, təzzar nəximin ədrəwan iməgura day Taymar ta n Məššina.

³⁰ Ənəyat za! Aytedan win əhanen ələqqam əmərəddā ad izaran, win azzarnen dex əmərəddā ad əggəzan ələqqam.»

Igi n ənnəyat əd Herod

³¹ Alwaq wen da t-id-əhozan arat day Farisaytan, ənnan-as: «Əgməd edag a, fəlas əmənokal Herod ira igi ən man-nak.»

³² Inn-asan Yaysa: «Aqlat tannin y awaqqas wa igan Herod: "Takkasax kələsuf day aytedan, zuzəyax imiranan azalada æd tufat, amaran əzəl wa n karad ad assanda əššəxəl-in."

³³ Dər iga awen da ya, əššil a imos ad agla day əšikəl-in, azalada æd tufat æd tufat ten, fəlas wær imməkkan ad iba ənnəbi day adag wær nəmos Yerusalam.»

Tala ən Yaysa fəl Yerusalam

³⁴ Inna Yaysa: «Xa aytedan ən Yerusalam, iket təgam iman n ənnəbitan, tənçam dex əs təgur ən təhun win sərwan d-izammazal Məššina! Awak har mənəket taklaten, gammaya d a kawan-d-əššidəwa s əmmək as du-təšadaw təkəjit ikərətan-net daw əfrutan-net, mišan tugayam s awen!

³⁵ Ənəyat za, Məššina a day-wan idkəl ifassan-net, iqqəl ahan-nawan əməjir. Amaran ənnəx-awan, wær di-za-tələsam anay iket wær d-osa əzəl wa day za tannim: "Wa d-osan s esəm n Əməli, igrāw arraxmat."»

14

Əzuzəy ən Yaysa aləs iyyan day əzəl ən Kəl-Əlyəhud wa n təsanfawt

¹ Əzəl iyyan ən təsanfawt, iggaz Yaysa ehan n iyyan day muzaran n Farisaytan fəl a xur-əs atšu. Əgaran day-as Farisaytan əllānen den šittawen.

² Illa aləs iyyan den as ibəyaxat alam-net ketnet, iqqım dat Yaysa.

³ Issəstan Ƴaysa imusanan n Ƴttawret əd Farisaytan, inn-asan: «Awak əzuzəy n awedan daɣ əzəl wa n təsanfawt xalâl, meɣ wər xalal?»

⁴ Mišan wər das-ənnen wala. Amaran idas Ƴaysa əmiran en, izzozay-tu, issəgl-ay.

⁵ Təzzar inn-asan: «Məni daɣ-wan was z'ihannayan barar-net madeɣ azgar-net har iqqəl daɣ anu əzəl wa n təsanfawt, aqqam wər t-id-ikkəs daɣ-as tamazayt tədi da?»

⁶ Wər əssenən a das-ənnən daɣ batuten šin iga da.

Idaggan win saɣmar

⁷ Igr-in Ƴaysa əsənnəfran wa əgan naftayan idaggan win taggazan aytedan win tawasaymarnen təzzar ig-asan ahol, inn-asan:

⁸ «As daɣ-ak igmay awedan izazlayan a das-in-təməgureɣ, ad wər təsənnəfrənəɣ edag wa taggazan aytedan win tawasaymarnen fəlas mijas igmây daɣ awedan iyyan a kay-ogaran almaqam a das-in-iməguret,

⁹ təzzar as-ik-du məššis n ahan wa kawan-d-iɣran əs məgura-net, ann-ak: "Əgməd edag y aləs wa." Təbəz-kay təkarakit, takkaɣ dəffər aytedan taqqama.

¹⁰ Kalar as daɣ-ak itawagmay a din-tasay iməgura, takka dəffər aytedan taqqama. Eddi, as d-osa məššis n ahan, a dak-annu: "Əmidi-nin, zənkəz-du s adag ofân wədi." Akf-ik adi ətəwəsəɣmar ɣur naftayan kul win hadatnen.

¹¹ Fəlas awedan kul wa idkalan iman-net, ad itəwəsərəs, wa issərəsan iman-net deɣ ad itəwədkəl.»

¹² Dəffər awen inna Ƴaysa i Farisay was innəftay: «As du-təɣarray aytedan y a tan-taššatšay ezal madeɣ ehad, a du-wər-tayra imidawan-nak, wala imədrayan-nak wala išəqqayan-nak wala imahharagan-nak ən məggərgas, fəl a kay-du-wər-ayrin əntanay da, əzəl iyyan, ərzəman-ak awa dasan-təgeɣ.

¹³ Kalar as iqqal as təšatšay aytedan, šatšu šiləqqawen əd nəbdan əd məggudal əd məddərgal.

¹⁴ Təbbilalay as təgeɣ adi, fəlas əntanay wər əfregan a dak-ərzaman. Ərruzmatan-nak a tan-təgrəwa əzəl wa n tanakra n alɣadılan.»

Əlmital wa n məgura win zawwarnen

¹⁵ As isla iyyan daɣ naftayan i batu ten, inna i Ƴaysa: «Ibbilal awedan wa z'atšin daɣ məgura win z'aginen daɣ Taymar ta n Məššina.»

¹⁶ Inn-as Ƴaysa: «Aləs iyyan a itaggan iməgura zawwarnen, igmay daɣ aytedan aggotnen a t-id-asin.

17 As d-əmməgnen mensewan, izammazal akli-net y ad annu i naftayan: "Asiwat-du, imensewan əmərədda əmmotagan."

18 «Mişan əggazan-tu ketnasan s iyyan iyyan əd sur. Inn-as wa azzaran: "Səket əzzənza tawagost, kundaba oseq-qat ənəyaq-qat. A di-wər-təşşəkaş."

19 Inn-as-du iyyan: "Səket d-əzzanza maraw zəgran y agayak, amaran areş a tan-ərəma. A di-wər-təşşəka."

20 Inn-as-du iyyan: "Səket əzlafa, daş adi wər əfrega a kay-in-asaş."»

21 «As d-iqqal əkli, iga i məşşis isalan kul win den. Iggaz alham labasan məşşis n aşaywan, amaran inn-as: "Aglu tarmad, tilalaş aşrəm, tidawa-du əd tələqqawen əd nəbdan əd məddəryal əd məggudal."»

22 «As d-iqqal əkli, inna i məşşis: "Məşşi, əgeş awa di-tənneş, mişan ehan harwa da ih-ay adag."

23 Inn-as məşşis: "Əgməd aşrəm, tilalaş əd tarrayen əd tamawen ən fərgan, təşəhhəşşəlaş aytedan a d-asin fəl ad idnəy ahan-in.

24 Illikan as aytedan win as əzzara əgməya daş-san a di-d-asin, wər tan-ihə i z'irəman imensewan-in."»

Əşşəradan win əhanen ləkkum i Ƴaysa

25 Imalallay-in Ƴaysa tamattay təknaş igət ta dər-əs təddewat, inn-asan:

26 «Awedan wa iran a di-ilkəm, əntə wər di-iga tara togarat ta iga y abba-net, d anna-net əd təntut-net əd bararan-net əd mədrayan-net əd təmədrayen-net d əntə iman-net, wədi wər ifreg ad iqqəl anattalib-in.

27 I wər nəger iri y ad idkəl təgəttawt-net, agu imateran-net ilkəm-i, wədi wər ifreg ad iqqəl ənalkim-in.

28 Id nənna masalan ad ira iyyan daş-wan ad ikrəs ehan imosan suru. Wərgəş təşimit a itaggu, ixsəb awa t-ikrasan təzzar, issən kud ila azrəf a t-issindan wala?

29 As wər iga awen, as t-issəntə akaras har t-orna əsəndi-net, a daş-as agin aytedan kul win t-ənaynen tamakkakkayt,

30 annin: "Awedan wa, issəntə akaras n ahan, orn-ay ad t-isəkkəsəw."

31 Madəş nənna masalan, əmənokəl iyyan as inkar əməgər gar-es d iyyan. Wərgəş təşimit a z'agu təzzar, isəmmədrən, issən kud əntə wa ilan maraw əgim n aləs, ifrəg terazay n əmənokəl wa hadan ilən əntə sanatat təmərwen n əgim n aləs?

32 As inay as wər t-ifreg, harwa da igguğ əmənokəl wa hadan as tu-z-issuku inəmmuzal, igməy daş-as alxer.

³³ Kawanay da za əmmək di da, i dağ-wan wər nəmməzzay d awa ila kul, wər ifreg ad iqqəl anattalib-in.

³⁴ Tesəmt arat olâxan a təmos, mişan as tat-təgməd tembay-net, məni təməwit tas tat-za-tətəwəsuxəl?

³⁵ Ab-as tat-təha tənfa waliyyat y amaḍal wala deḡ tah-et tənfa i tamaqqost. Tanayla ḡas a din-za-tətəwəggu. Wa isallin, aslet!»

15

Isalan əkkânen aytedan win əxraknen

Əlmital ən tilay ta aba

¹ Osan-du nabazan n amana əd nasbakkadan kul Ƴaysa y a das-əssəsəman.

² Əggazan Fərisaytan əd musanan n Əttawret šin əgətəntən, gannin əs Ƴaysa: «Awedan wa iqbâl inasbakkadan, idarraw deḡ dər-san imensewan.»

³ Təzzar ig-asan Ƴaysa əlmital wa, inna:

⁴ «As ila iyyan dağ-wan temeday ən tilay har dağ-asnat təssəggal iyyadda, awak wərgəḡ ad ayyu tazayat təmərwen əd tazayat šin hadatnen ədânnat, təzzar azəl iswəd i ta təssəggalat har tat-d-igrəw?

⁵ As tat-d-igrəw, a tat-issəwər izeran-net fəl awa iga daḡ tədəwit,

⁶ as d-iqqal aḡaywan a d-aḡru imidawan-net əd mahharagan-net, ann-asan: "Ayewat, tagim tədəwit ta əgəḡ, fəlas aḡaraw a d-əgəḡ tilay-nin ta təssəggalat."

⁷ Ənneḡ-awan zund əmmək di daḡ as, təfalawist ta z'əgin win əhanen ijənnawan fəl tətubt n anasbakkad iyyanda, toḡar ta tan-za-təsəssugu tazayat təmərwen n alḡadil əd taza as ḡur iga as wər əddəraran əs tətubt.»

Tamma n əzrəf ta aba

⁸ «Madəḡ nənna masalan, təntut iyyat a tələt marawat tammaten n əzrəf har daḡ-as aba iyyat. Wərgəḡ ad tassarḡu fətəla, təfrəd ehan-net ketnet, təswəd-as s əlluḡ iket wər tat-təgrew?

⁹ As tat-təgrəw, a du-taḡru šimidawen-net əd tamahharagen-net, tann-asnat: "Aḡimat tədəwit ta əgəḡ, fəlas aḡaraw a d-əgəḡ tamma-nin ta daḡ-i aba."

¹⁰ Ənneḡ-awan zund əmmək di daḡ as, tətubt n anasbakkad iyyanda təsifəliwis angalosən ən Məşşina.»

Barar wa ixrakan

¹¹ Inn-asan Ƴaysa deḡ: «Aləs iyyan a ilan əşšin bararan.

¹² As əzəl iyyan inna wa mədrəyan y abba-net: "Abba, akf-i adaḡar-in daḡ təkəsīt." Izun-asan abba-nasan təla-net.

13 Arat n adan dæffær awen, inkar barar wa ændarran išsedaw awa ila kul, ikka akal iyyan iggugan. Ilkam i tara ən man-net, ad iyaššad awa ila.

14 As inxa awa ila kul, osa-du laz labasan akal wa iha, tæzzar iggaz šin təmaɣatirt.

15 Iгла, išɣal y awedan iyyan n akal en da. Issok-ay šiwəgas-net y a das-idən daɣ-asnat iladayan-net.

16 Awa das-iga laz daɣ iguz, isidaran tettay ən šətša win tattin ladayan, mišan wər t-illa i das-tan-ikfân.

17 Amaran isammadrän daɣ man-net, inna: "Awak wərgex imaššaxalan n abba-nin əggətan mišan ketnasan əlân a ətšan har t-id-əgləzan, ənta nak inaqq-i laz da!

18 Ad ənkəraɣ, əqqəla abba-nin, annaɣ-as: 'Abba, əmmizrayaɣ Məššina, kay deɣ əbbodaraq-qay,

19 ab-as əhora d a di-itəwənnu barar-nak, ag-i iyyan daɣ maššaxalan-nak."

20 Tæzzar inkar iqqal abba-net. Izây-in ehan daɣ igəg as t-ogga abba-net, təggaz-tu təhanint-net, ozal sər-əs, izalammat-tu, a das-itamallat.

21 Tæzzar inna barar y abba-net: "Abba, əmmizrayaɣ Məššina, kay deɣ əbbodaraq-qay, ab-as əhora d a di-itəwənnu barar-nak."

22 Mišan inna abba-net y eklan-net: "Tarmâd awəyat-du takatkat ta təhossayat, tæzzəzləgam-as-tat, tagim təsəndərt daɣ adad-net, təssəsəlam-tu.

23 Tabəzam-du əhəri wa iddəren, təgzəmam-tu, ad natšu, nagu saksas,

24 fəlas barar-in wa, šilat n as t-aba, amaran əmərədda idar-du; kala ixrak, amaran əmərədda igraw-du." Amaran əssəntan daɣ saksas.

25 As itaggu awen, barar-net wa n aɣafadday iha šiwəgas. As d-iqqal, ihoz-du aɣaywan, isla i səwat d awex.

26 Iyra-du iyyan daɣ eklan-nasan, issəstan-tu d awa itaggan den?

27 Inn-as əkli: "Amadray-nak a d-iqqalan, igzam abba-nak əhəri wa iddəren, fəlas tewaxlay a t-id-iga barar-net wər ila malad."

28 Iggaz-tu alham, ugay s iguz n ahan. Iqqab-du abba-net ad t-itansay.

29 Eges inna y abba-net: "Wərgex a ilan elan əşɣâlay-ak, wər kala əmməzrayaɣ tənna-nak, harkid awen, wər kala di-təkfex wala ɣas eɣayd əgzama aga fall-as saksas nak əd midawan-in.

30 Rurek amaran wa iɣšadan eharay-nak daɣ təkərwaten ənta, osa-du ɣas təgazamaɣ-as əhəri wa iddəren."

³¹ Inn-as abba-net: "Barar-in, kay fawda tälley gur-i, awa äley ketnet i-nak.

³² Mišan immikkan ad naddawat nagu saksas, fêlas amadray-nak, šilat n as t-aba, amaran ämêrêdda idar-du; kala ixrak, amaran ämêrêdda igraw-du."»

16

Taryämt fäl tara n äddänet

Amaššaxal wa ilan tayttay

¹ Inna Ÿaysa i nêttulab-net: «Kala a t-illa alês iyyan n ämäggergês ilân amaššaxal isinattaf d ärrêzêx-net, amaran itawann-as ixaššat-tu.

² Têzzar isassaŸr-ay-du, inn-as: "Ma imos awa fall-ak sallaŸ? Ämêl-i awa têgeŸ y ärrêzêx-in, nak ab-as areŸ äššêŸel-nak."

³ Inna amaššaxal wa gar-es äd man-net: "Awak ämêrêdda ma z'aga as di-ikkas amuzar-in daŸ äššêŸel? Nak, wêr äfregax agayak, mansay deŸ isikarakad-i.

⁴ Ässânax awa z'aga as kud tawakkasa daŸ äššêŸel-in da, a di-äqbalan aytedan daŸ nan-nasan."

⁵ Têzzar isassaŸra-du aytedan win irwas alês was iŸxal s iyyan iyyan. Inna i wa azzaran: "Ma kay irwas ämuzar-in?"

⁶ Inn-as: "Temeday ên tanaw ên wêdi wa n azzayt." Inn-as amaššaxal: "Ÿam, tädkêla širawt-nak ta n ämarwas, tädtebaŸ fall-as tarmäd sëm mosat tämêrwen ên tanaw."

⁷ Dêffêr awen inna y iyyan: "Kay za ma têtawarwasax?" Inn-as: "Temeday ên bêhu n alkama." Inn-as: "Ädkêl širawt-nak ta n ämarwas, tädtebaŸ fall-as ättamat tämêrwen."

⁸ Tämêrkest ten, isl-et alês wa iššêŸxalan ark amaššaxal wen, têzzar ad t-immâl fäl têla-net tayttay. Tidêt a imos as aytedan win wêr nêksud Mêššina, ogaran win t-äksudnen têla ên tayttay daŸ taŸawšiwên šin êllanen gar-essan.

⁹ Nak za ännêŸ-awan: Agiwat imidawan s ärrêzêxan ên bannan win n äddänet ta; äddi as kawan-ägmadan, ad têtewêqbalam daŸ adag ên tämêxsurt iŸlâlan.

¹⁰ Awedan wa têha têflêst daŸ arat ändêrran, wa zêwwêran da têh-ay daŸ-as. Wa wêr têha têflêst daŸ a ändêrran, wa zêwwêran da, wêr daŸ-as tu-têha.

¹¹ DaŸ adi, da kawan-wêr-têha têflêst daŸ ärrêzêx ên bannan wa n äddänet ta, ma kawan-z-izêzzigêzan ärrêzêx wa n tidêt, wa ihan alaxirat.

¹² Amaran kud wêr kawan-têha têflêst daŸ arat wa wêr têlem, ma kawan-z-akfin arat wa têlam daŸ alaxirat?

¹³ Wêr t-illa amaššaxal ifrâgan ad iŸŸel y äššin muzaran. Wa Ÿas ikyad iyyan, iru wa hadan; madêŸ abbardag y iyyan,

alku wa hadan. Wær tæfregam ad tæxbødam Mæššina, taglim deŷ tozâlam dæffær æddænet.»

¹⁴ Æssisaman Farisaytan y awa inna Ƴaysa den kul, taggin daŷ-as tamakkakkayt fêlas imaran n æzrêf a æmosan.

¹⁵ Inn-asan Ƴaysa: «Kawanay tæsaknim dat aytedan as alxadilan a tæmosam, Mæššina amaran issân awa ihan iwallas-nawan; fêlas arat wa æzzæzwaran aytedan, Mæššina ænta tagêlfat a t-iga.»

Ættawret d Ælinjil

¹⁶ «Ættawret d Ælkættaban win Ænnæbitan æntanay Ʒas a tawasasaxrinen har æzêl wa d-osa Ƴaxya wa isalmaŷan aytedan daŷ aman. Æddi amaran ad æggazan salan win Ælinjil šin ætæwægga, æmosnen isalan n assa æn Taŷmar ta n Mæššina, amaran ad igammay awedan kul iguz-net s assahat æd tallabæst.

¹⁷ Dær iga awen da za, ogar tærŷasay ta iga ad iba ijønnawan d amaðal, ta iga ad iba wala Ʒas æsakkal iyyanda n Ættawret.

¹⁸ Adi a fêlas, alæs kul wa izammazzayan tantut-net, izlaf iyyat, wædi iga æzzæna. Alæs deŷ wa izlafan tantut tæmmizzayat, ænta da igâ æzzæna.»

Æmæggergæs iyyan æd tælaqqay tægât Lazaræs

¹⁹ Inn-asan Ƴaysa deŷ: «Kala ad t-illa alæs iyyan n æmæggergæs n amayyawan æs faw izlâg isêlsa win hossaynen, æzzæwatnen, faw deŷ inniflay issiksas.

²⁰ As itaggu awen, dat æmi n ahan-net, isrâd alæs iyyan æn tælaqqay igân Lazaræs, æs ælsânat šiqqas elam-net.

²¹ Isidaran tettay æn kæræmræman win du-rattaknen daŷ mensewan n æmæggergæs en. Wala iðan, tasin-t-idu tallaxan šiqqas-net.

²² Har æzêl wad aba talæqqay ten, tæzzar ewayan-tu angalosan s ænnæbi Ibrahim daŷ aljannat. Æmæggergæs ænta da, aba-tu itawanbal-in.

²³ Iha Jahannama, itaxazzab daŷ-as as idkal asawad-net, ogga Ibrahim daŷ igæg, illâ Ʒur-æs Lazaræs.

²⁴ Ad iyarru Ibrahim, igann-as: "Ƴa Abba Ibrahim, hænættæt-i, tæzæmmizæla-du sær-i Lazaræs y ad issælmæŷ kuddeŷ imi n adad-net daŷ aman, issæsmæd-i sær-æs ilæs-in, fêlas alŷazab a tagga daŷ tæmsay ta."

²⁵ Mišan inn-as Ibrahim: "Barar-in, Akta-du as kay tægrâwax arat kul wa tareŷ daŷ tæmæddurt-nak, as iga awen, Lazaræs ænta wær inay ar alŷazab. Amaran æmæreda ænta as tawaknan man, kay tætaxazzaba.

²⁶ Wa dæffær adi as, illâ æxæxi wær næla eder gar-ena dærwæn, fæl ad wær iru waliyyan daɣ-na a kawan-in-akku, ifræg adi, wala dex ifræg waliyyan daɣ-wan a dana-d-akku."

²⁷ Inna æmæggergæs: "Daɣ adi Abba, ægmâya daɣ-ak ad tæzæmmizæla Lazaræs s aɣaywan n abba-nin,

²⁸ fælas æley sæmmos mædrayan, y a dasan-iryæm fæl a du-wær-æggæzan æntanay da edag n aɣazab wa."

²⁹ Mišan inn-as Ibrahim: "Imædrayan-nak ættâfan ælkættab wa n Ettawret d Elkættaban n ænnæbitan win hadatnen, ælkæmanet-asan."

³⁰ Inna y Ibrahim: "Kala kala Abba-nin Ibrahim, adi wær igda, mišan as tan-in-iqqal awedan a d-inkâran daɣ næmmættan, ad utaban."

³¹ Mišan inn-as ænnæbi Ibrahim: "As wær æssæsæman y ænnæbi Musa d ænnæbitan win hadatnen, wær z'utaban kuddeɣ ig-asan awedan a d-inkâran daɣ næmmættan isalan."

17

Æsæssæyri æn ɣaysa daɣ batu n abakkad æd tæsurreft d æzægzan

¹ Ezæl iyyan inna ɣaysa i nættulab-net: «Wær t-illa a tu-wær-æmelan aratan as za sæssuginen aytedan ibakkadan, mišan iket aɣazab ill-ay y awedan wa dasan-d-igan æssæbab.

² A das-afu ad itæwæqqæn æzæzæd zæwwæran æn tæhunt daɣ iri-net itæwægær-in daɣ agarew, tišit n æssæbab n abakkad i wala iyyanda daɣ aytedan win madrornen di.

³ Agat ænnøyat æd man-nawan!

As kay-idlam amadray-nak, tærɣæmaɣ-as. Kud immægraz, tæssuræfaɣ-as.

⁴ Kud imos as ig-ak æssayat tadlamen daɣ æzæl, ig-ak-du æssa assatan igammay tæsurreft daɣ æzæl wen da, da suræf-as.»

⁵ Ænnan næmmuzal y Æmæli ɣaysa: «Šitu æzægzan-nana.»

⁶ Inn-asan Æmæli ɣaysa: «As tælam æzægzan ogdân æd wala imi æn tæzuyay n æšænnan ad tæfrægam ad tannim y ašæk wa: "Ælbøy-du iman-nak, taɣta daɣ agaraw en", agu awa tænnam.»

Tangalt n amaššaxal wa wær næla maruzat

⁷ «Mæni daɣ-wan wa du-z-adæw akli-net iddânan madex igayyakan, ann-as: "Ayo tarmad tammansawaɣ!"

⁸ Wærgex tænna a das-za-tagim: "Sanɣ-i a ætšex tæzzar, tawøyax-i-t-id, tæšxæla har atša, ašwaɣ, dæffær adi amaran tatša tašwa kay."

⁹ Awak aləs en ad iggudəy y əkli-net fəlas iga awas t-omar?

¹⁰ Kawanay da za, as təgam arat kul was tətawamaram, tannim: "Nakkanay wər nəmos ar eklan, wər nəga ar awas danaç-iwar igi-net."»

Assa n Ag Aggadəm

Agoda iga aləs iyyan n aw Samarəya i Məşşina

¹¹ Yur iki ən Yaysa Yerusalam, illam gər akal wa n Samarəya əd wa n Galilaya.

¹² As d-iggaz taçrəmt iyyat, əssəlkədan-as-du maraw meddan igrāw kətru, əbdadan-as-in daç igəç.

¹³ Ədkalan imaslan-nasan, ənnan-as: «Ya Yaysa, Əşşex-nana, hənəttət-ana!»

¹⁴ Iswad daç-san, inn-asan: «Aglat saknat iman-nawan i limaman.» Əglân əkkân ilimaman y a dasan-əməlan, as əzzayan zaddogan.

¹⁵ As din-igra iyyan daç-san təməzzəyt ta iga den, iqqal Yaysa, idkâl əməsli-net, immâl Məşşina.

¹⁶ As t-in-osa issəjad dat-əs, a das-itigudəy. Aləs en in akal ən Samarəya.

¹⁷ Inna Yaysa: «Wərgəç marawessan as əzzayan, zaddogan, ma əgan taza win hadatnen?»

¹⁸ Adis wər tan-iha i d-iqqâlan iggudəy i Məşşina ar ənaftaç wa?»

¹⁹ Amaran inna Yaysa y aləs wen: «Əbdəd, aglu, əzəgzan-nak a kay-içlasan.»

Assa ən Taçmar ta n Məşşina

²⁰ Yaysa, as t-əssəstanan Farisaytan d alwaç wa du-zatasu Taçmar ta n Məşşina, inn-asan: «Taçmar ta n Məşşina wər du-tətəçgu assa ilân anay.

²¹ Wər mad z'itəwənnu: "Ənta da", wala "Ənta den". Əssənət as, Taçmar ta n Məşşina təlla gar-ewwan.»

Assa n Ag Aggadəm

²² Dəffər awen inna Yaysa i nəttulab-net: «Əlkâman adan a daç za təsəddirənam anay ən tawaçlay-nin nak Ag Aggadəm, kuddeç anay n əzəl iyyanda, mişan wər di-zatənəyam.

²³ Amaran a dawan-itəwənnu: "Ənta den" madəç "Ənta da". Ad wər taglim, wala təlkəmam y awen.

²⁴ Əbələzləz a itaggu essam daç jənnawan, isəmmələwləw tama n amaçal ta har ta, a dər z'alu assa-nin nak Ag Aggadəm daç əzəl-in.

²⁵ Mişan dat adi, ilzâm-i nak Ag Aggadəm anay n alyazab aggen, unkaran-i deç aytedan n azzaman win.

²⁶ Awa igan day azzaman n ənnəbi Nux, a z'agin day adan win day du-z-asa nak Ag Aggadəm.

²⁷ Azzaman win den, aytedan tattin, sassin, zallafan, zâzlafan har əzəl wa d-iggaz Nux aɣlal n aman, təzzar osa-du alwabil, ihlak-kan ketnasan.

²⁸ Zun d awen da deɣ a igan day azzaman ən Lot. Aytedan tattin, sassin, zanzan, satagan, nabbalan, gayyakan, kar-rasan,

²⁹ har əzəl wad igmad Lot aɣrəm ən Sədom, təzzar issofay-du Məşşina fəl əɣrəm en adaɣas-ən-tahart ibi-laglagan, ihlak aytedan-net ketnasan.

³⁰ Zun d adi da a z'agin əzəl wa du-za-təwəsənəfiləla nak Ag Aggadəm.

³¹ Əzəl wədi, awedan wa iqqiman day adag wa n afalla n ahan-net, amaran əhân lalan-net ehan-net, a du-wər-azzabbat y a tan-in-idkəl. Wa ihan tawagost-net deɣ, ad wər iqqəl aɣaywan.

³² Aktiwat-du awa igrawan taɣur Lot.

³³ Id awedan wa wər nəgəmməy ar aggaz ən man-net day əddənət ta, ad affatu day alaxirat; mişan wa isaffatan iman-net day əddənət ta, ad iɣləs.

³⁴ Ənnəy-awan ahad wədi, ad ənsân əşşin aytedan day tessat iyyadda, ammadkal iyyan, itəwəyyad-du wa hadan.

³⁵ Ad taddinat sanatat tədoden day adag iyyanda, tam-madkal iyyat, tətəwəyyad-du ta hadat.

³⁶ Ad əhân əşşin meddan tawagost iyyadda, ammadkal iyyan, itəwəyyad-du wa hadan.»

³⁷ Əssəstənan nəttulab Ƴaysa ənnan-as: «Əməli, wədi arat mənid z'agu?» Inn-asan: «Edag təggaz təmaxsayt, a day-as iddawan jadaran.»

18

Əlmital n əmaşray əd təntut as wər idder aləs-net

¹ Iga Ƴaysa i nəttulab-net əlmital iyyan a day ira a tan-issusən as, ihor ad tansayan Məşşina faw, a day-as wər əkkəsən attama.

² Inn-asan: «Aɣrəm iyyan a iha əmaşray wər nəksud Məşşina, wər issəɣmar deɣ awedan waliyyan.

³ Amaran aɣrəm en, təh-ay təntut as wər idder aləs-net a du-tətasit əmaşray en, təgann-as: "Akf-i alxaq-in day amakkarad-in."

⁴ As iga tamert itugəy-as, inna gar-es əd man-net: "Kud wər əksudaɣ Məşşina, wala əssiɣmaraɣ awedan waliyyan,

⁵ da tantut ta, tədgaz-i. A tat-akfa alxaq-net fəl a day-as əgrəwəɣ iman-in."»

⁶ Təzzar inna Əməli Ҷaysa: «Təsallam y awa inna arak amaşray wa?

⁷ Tordâm as Məşşina wər z'akfu aytedan win isannafran alxaq-nasan, tu-tansaynen hallan ehad ezal? Tordâm as a fall-asan-in isahhagu tadhəlt-net?

⁸ Ənney-awan, a tan-akfu alxaq-nasan tarmad. Mişan harkid adi, əzəl wa du-z-əqqəla nak Ag Aggadəm, awak a d-agəzay day əddənet aytedan əzzigzannen?»

Tilwat n əlyillas

Əlmital wa iga Ҷaysa fəl Farisay d ənabaz n amana

⁹ Dəffər awen, iga Ҷaysa əlmital y aytedan əttâfnen iman-nasan day tişit n alxadilan, as iga awen olkân aytedan, inn-asan:

¹⁰ «Kala ad əggəzayan meddan əşşin s Ahan wa Zəwwəran n Əlyibada fəl ad agin şiwatriwen. Iyyan Farisay, wa hadan anabaz n amana.

¹¹ Farisay za, ibdad ad itattar, igannu day man-net: "Ya Məşşina, əgğodayax-ak as wər oley d aytedan win hadatnen əmosnen inarkaban əd nəmməzray əd maggan n əzzəna, wala dey oley d anabaz n amana wa.

¹² Əssa adan kul, tuzama day-san əşşin. Takkasay təməssədək day awa garrawa kul."

¹³ Mişan anabaz n amana ənta, ibdad-in day igəg, wər ihel wala adakal n asawad-net sa sər jənnawan, iggât idmaran-net fəl awa əgan man-net day əxşud, igannu: "Ya Məşşina təggəzet-kay təhanint-in nak n anasbakkad."

¹⁴ Ənney-awan, anabaz n amawan wa, iqqal ehan-net igrâw taqqat dat Məşşina, mişan Farisay wen ənta wər igrew taqqat dat Məşşina; fəlas i idkalan iman-net, ad t-issərəs Məşşina, i issərasan iman-net ad t-idkəl Məşşina.»

Təwatray ən Ҷaysa i bararan

¹⁵ Harkid bararan win janxayan tawayan-tan-du aytedan əs Ҷaysa fəl a tan-issəwər ifassan-net, ittər-asan. Ənayan nəttulab-net awen, əşşewalan fəl aytedan win den.

¹⁶ Mişan iyr-en-du Ҷaysa əs man-net, inna i nəttulab-net: «Ayyat bararan a di-d-akkin, a tan-in-wər-təwəxam; Taymar ta n Məşşina, şin aytedan win şilaten-nasan.

¹⁷ Əgğəyey silakanax-awan as, awedan wər nəga i Taymar ta n Məşşina əlqəbulat şilat ən ta das-iga barar, wədi wər das-ilkem a tat-iggaz.»

Əddənet meç alaxirat

¹⁸ İssəstan əmuzar iyyan ən Kəl-Əlyəhud Ҷaysa, inn-as: «Əşşex olâxan, mas di-iwar igi-net y ad əgrəwa təməddurt ta təylalat?»

¹⁹ Inn-as Ýaysa: «Mafel as di-tөгanna Ёššex olayan? Wөр t-illa i olâxan ar Mөššina.

²⁰ Tөssânax alwajiban-net: Ad wөр tagax әzzөna, ad wөр tagax iman, ad wөр takөra, ad wөр tagax tөгөyya әn bahu, sөxmөр abba-nak d anna-nak.»

²¹ Inn-as alөs wen: «Aratan win di kul harwa da mөdrөya as tan-өssөbdada.»

²² As isla Ýaysa y awen, inn-as: «Arat iyyanda a dak-in-iqqiman әmөрөdda: Aglu zanz-in awa tөlөx kul, tuzanax inazzan-net i tөлөqqawen ad tөgrөwax әrrözөx a dak-zansin dax alaxirat. Dөffөр adi amaran tagla-du tөlkөmөx-i.»

²³ As isla y awen, әxšadan man-net wөllen fөlas tөгөrgist tagget a iga.

²⁴ As inay Ýaysa as, әxšadan man n alөs en wөllen, inna: «Iket әzzөwi ig-ay iguz әn Taymar ta n Mөššina fөл win өggөrgasnen.

²⁵ Ogar tөryasay ta iga fөл ałam aradax dax tөbuday n әnazmay, i ta iga fөл әmөggөrgөs iguz әn Taymar ta n Mөššina.»

²⁶ Tөzzar әnnan-as aytedan win das-өssөsamnen: «Adi za ma ifragan ad ixlөs dax tөmsay?»

²⁷ Inn-asan Ýaysa: «Awa imosan muxal xur aytedan, Mөššina ifrâk-ku.»

²⁸ Inn-as Butros: «Nakkanay za, a oyyanen awa nөla kul, nөlkam-ak?»

²⁹ Inn-asan Ýaysa: «Ёggөyөx әsilakanax-awan as, wөр t-illa i din-z-ayyin ehan-net madex tantut-net, madex imөdrayan-net, madex imarwan-net madex bararan-net fөл өddөлil әn Taymar ta n Mөššina,

³⁰ әs wөrgөx ad igrөw inөdfusan-nasan dax harwa әmөрөdda, igrөw dөx tөmөddurt ta tөxlalat dax azzaman win әlkammen.»

Ihaz n alyazab wa z'inөy Ýaysa

³¹ Ikkas Ýaysa inөttulab-net win maraw d әššin dax aytedan, inn-asan: «Sөsөmat: nakkanay da өggөzzaynen әs Yerusalam da, amaran den da ad z'andu arat kul wa әktaban әnnөbitan dax salan-in nak Ag Aggadөm.

³² Ad tawagga dax fassan n aytedan wөр nөmos Kөл-Ёlyәhud, agin dax-i tamakkakkayt, agin-i šisөssөлka, әssutөfan fall-i,

³³ ayyawanani-i šiwwit, agin iman-in, tөzzar әnkara-du dax tөmattant әzөл wa n karad.»

³⁴ Mišan wөр t-illa a әgrân nөttulab-net dax awa inna den, ittinkal-asan almayna-net, wөр әgren awa dax dasan-iššewal.

Ёzuzөy әn Ýaysa әmөdderyөл iyyan

³⁵ As d-ihoz Ƴaysa aƳrəm wa n Yerikaw, okay fəl əmədderxəl iyyan iqqiman fəl afay ən tarrayt, itansay.

³⁶ As isla amədderxəl i tamattay ta fall-as tətakayat da, issəstan d awa imos awen.

³⁷ Itawann-as: «Ƴaysa wa n əƳrəm ən Nazaret a itakayan.»

³⁸ Amaran idkal əməsli-net, igannu: «Ya Ƴaysa wa n Ag ənnəbi Dawəd, hənəttət-i!»

³⁹ Sannarxaman-as aytedan win azzarnen y ad affastu, mišan idkal əməsli-net wəllen, igannu: «Ya Ag Dawəd, hənəttət-i!»

⁴⁰ Təzzar izzəkkat Ƴaysa, omar s a das-d-attalway. As t-id-osa, issəstan-tu, inn-as:

⁴¹ «Mas tarex a dak-k-aga?» Inn-as əmədderxəl: «Əməli, a əreş a di-d-iqqəl asawad-nin.»

⁴² Inn-as Ƴaysa: «Iqqəlet-kay-du asawad-nak, əzəgzan-nak a kay-iğlasan.»

⁴³ Iqqal-du asawad amədderxəl tamazayt ten da, igla ilkam i Ƴaysa, immâl Məşşina. Aytedan kul win ənaynen awa igan den, əntanay da əmmâlan Məşşina.

19

Zakkəyas wa n anabaz n amana

¹ Iggaz Ƴaysa aƳrəm ən Yerikaw, okay daş ammas-net y ad t-irdəş.

² AƳrəm en ih-ay aləs igân esəm Zakkəyas imosan əmuzar ən nabazan n amana n əməgğergəs.

³ Ad igamma y d anay ən Ƴaysa, mišan təgdal-as-tu tamattay fəlas təgzəlay a iga.

⁴ Təzzar ozal, azzar i tamattay, iftan aşək igân esəm sikamor fəl ad inəy Ƴaysa fəlas den da a du-z-akəy.

⁵ As d-ewad Ƴaysa edag wen, idkal asawad-net, inn-as: «Zakkəyas, zabbat-du tarmâd, azalada kundaba əzzəbbəş daş aƳaywan-nak.»

⁶ Izzəbbat-du Zakkəyas tarmâd, iqbəl awen, ifilawas.

⁷ As ənayan aytedan awen, gatantanan ketnasan, gannin: «Izzəbbat xur aləs n anasbakkad.»

⁸ Amaran ibdad Zakkəyas dat Əməli Ƴaysa, inn-as: «Ya Əməli, ad akfaş təzunt ən təla-nin i tələqqawen, kud deş ill-ay i daş ətşəş arət, a das-t-əssuxəla imos əkkoz nədfusan.»

⁹ Təzzar inna Ƴaysa: «Azalada, ehan wa iggaz-t-id əlğillas, fəlas aləs wa, ənta da ahaya n ənnəbi İbrahim a imos.

¹⁰ Nak Ag Aggadəm oseş-du gammaşaş aytedan win əxraknen y a tan-əğləsa.»

Æššəḡəl ən Ƴaysa daƳ Yerusalam

Tangalt ta n tammaten

¹¹ Æssisaman aytedan y awa igannu Ƴaysa ketnet. Ig-asan Ƴaysa tangalt iyyat fəlas ihoz Yerusalam amaran əxilan alwaq wad za tənəfiləl Taɣmar ta n Məššina ewad-du.

¹² Inn-asan: «Kala ikka aləs iyyan n ag əket akal iyyan iggugan y a daɣ-as d-igrəw təmənukəla, iqqəl-du.

¹³ Dat teklay-net, iɣra-du maraw daɣ eklan-net. Akk iyyan daɣ-san ikf-ay tamma inn-asan: "Agiwat daɣ-asnat jola har d-əqqəla."

¹⁴ Amaran aləs en, wər t-əren aytedan n akal-net. As igla, əssəḡlan inəmmuzal s əmənokal wa zəwwəran y a das-annin: "Aləs di, wər nəra ad iqqəl əmənokal-nana."

¹⁵ Mišan igraw taɣmar, iqqal-du akal-net. Isassaɣra-du eklan-net winād ikfa tamatten da, fəl ad issən awa sər-san d-iggazan daɣ jola-nasan.

¹⁶ Os-ay-du wa azzaran, inn-as: "Məšši, tamma ta di-təkfəɣ əgrawa-du fall-as marawat šiyyad."

¹⁷ Inn-as məššis: "Alafəyet! Illikan as akli olâɣan a təmosa. Zamas təh-ik təfləst daɣ awa wər nəggət, adi za a kay-əzzuzəraɣ i maraw ɣərman."

¹⁸ Os-ay-du wa n əššin, inn-as: "Məšši, tamma ta di-təkfəɣ əgrawa-du fall-as səmmosat šiyyad."

¹⁹ Inna i wa: "Kay, ad tizarəɣ i səmmos ɣərman."

²⁰ Os-ay-du wa n karad, inna: "Məšši, tamma ta di-təkfəɣ ənta da. Akamas a tat-əgeɣ daɣ əlkəšifa-nin, ogazaq-ɣat.

²¹ Təksəda a kay-əgeɣ, fəlas əssânaɣ as aləs labasan a təmosa. Tədakkalaɣ a wər təssənsa, tətalaya deɣ tawagost wər tənbelə."

²² Inn-as məššis: "Kay, ark əkli a təmosa, awa d-igmadan imi-nak as kay-z-abəzaɣ. Dad təssanaɣ as əmôsaɣ awedan labasan, idakkalan a wər issənsa, italay deɣ tawagost wər inbel,

²³ ma fel as wər təgeɣ azrəf-in daɣ bank, əddi as du-z-əqqəla əgrâwa fall-as tətəyt."

²⁴ Təzzar inna y aytedan win əllanen den: "Abəzat daɣ-as tamma ta ittaf, takfım-tat i wa ilan marawat."

²⁵ Ənnan-as: "Məššikkana, wərgəɣ ilâ marawat?"

²⁶ Ijjəwwab-asan, inna: "Silakanəɣ-awan as, wa ilan, wədi a das-itəwəšitu awa ila; amaran wa wər nəla, arat n arat wa ila da, a daɣ-as attarmas."

²⁷ Amaran aytedan win zənga-nin, wər nəra ad əqqəla əmənokal-nasan, awəyat-tan-du, təgžəmam-tan dat-i.»

28 As inna awen, iggaz eƣaf ən nəttulab-net, iggəzzay əs Yerusalām.

29 As din-ihoz taƣrəmt ta n Betfajay əd ta n Betanəy, dəgma n ədƣaƣ was itawannu wa n "Eškan ən Zaytun", izammazal əššin daƣ nəttulab-net.

30 Inn-asan: «Akkiwat taƣrəmt ten dat-wan den. As tat-in-təggazam, ad tənəyam əhulel n əzdan iqqānan əs kala wər ittəwan. Ariwat-t-id, təlwəyam-t-idu.

31 As kawan-issəstan awedan, inn-awan: "Xa, ma tətəggim əddi?" Tannim-as: "Əməli a sər-əs iddəranan."

32 Əglan nəttulab win den, ənayan arat kul s əmmək wa daƣ as dasan-t-inna Ƴaysa.

33 Tāran əhulel, as dasan-ənnan məssawəs: «Xa, ma tətəggim əddi?»

34 Ənnan-asan nəttulab win əššin en: «Əməli a sər-əs iddəranan.»

35 Əlwayan-t-id i Ƴaysa. Ədfaran-as fall-as isəlsa-nasan, əssəwanan-as-tu.

36 Imatakway, a das-tissəwan aytedan isəlsa-nasan daƣ tarrayt-net.

37 As d-ewad Ƴaysa edag wa daƣ təzagaday tar-rayt adƣaƣ wa n Eškan ən Zaytun, daƣ ənəmi haz ən Yerusalām, ədkalan nalkiman-net ketnasan imaslan-nasan, əssəggadan daƣ təmmalen i Məššina daƣ batu ən təlməxjujaten kul šin ənayan.

38 Gannin:

«Iga Məššina albaraka y əmənokal

wa d-osan s esəm n Əməli.

Attadet alxer əd tanaya

daƣ jənnawan win ədkalnen!»

39 Təzzar ənnan Farisaytan əhanen tamattay en i Ƴaysa: «Əššex, ərƣəm i nalkiman-nak!»

40 Inn-asan Ƴaysa: «Ənneƣ-awan, as əffəstan, šihun a, a za səƣxərətne.»

Awa iqqalan i Yerusalām

Tala ən Ƴaysa fəl Yerusalām

41 As din-ihoz Ƴaysa aƣrəm ən Yerusalām, ogg-ay, iggaz fall-as šin tala;

42 igannu: «Ya Yerusalām, ənnar kam dâ, təssənay əmmək was za təgrəwaƣ alxer azalada; mišan wər tu-təssena, fəlas aƣabar a dam-iga.

43 Əlkāman adan a daƣ kam-za-ƣəliƣələyan zəngə-nam, aƣin-am afarag issohen n əməgər, ədgəzan-kam fəl gan-natan kul.

⁴⁴ Addagdagan-kam, kam d aytedan-nam. Wər daḡ-am du-z-ayyin təhunt təwârat iyyat, fəlas tugayax s ad tagrax assa wa dam-d-iga Məššina y dam-agu arraxmat-net.»

Asatay ən Ƴaysa imassatagan daḡ Ahan wa Zəwwəran n Əlyibada

⁴⁵ Dəffər awen, iggaz Ƴaysa aḡalla wa iḡlayan Ehan wa Zəwwəran n Əlyibada, a daḡ-as isattaḡ imassatagan.

⁴⁶ Igann-asan: «Wərgəḡ iktâb as, inna Məššina: "Ehan-in ad iqqəl ehan ən təwatriwen." Kawanay amaran təgâm-tu "əsəlyəs ən baydagan"?»

⁴⁷ Akk əzəl isassaḡru Ƴaysa daḡ Ahan wa Zəwwəran n Əlyibada. Ad gammayan muzaran ən limaman əd musanan n Əttawret əd muzaran ən Kəl-Əlyəhud d igi ən man-net,

⁴⁸ mišan ab-asan təməwit tas z'agin awen, fəlas aytedan kul əknân-as əsəsam.

20

Əsəssəyri ən Ƴaysa daḡ Ahan wa Zəwwəran n Əlyibada

Ma ikfan Ƴaysa tarna ta ila?

¹ Əzəl iyyan isassaḡru Ƴaysa aytedan daḡ Ahan wa Zəwwəran n Əlyibada, immal-asan Əlinjil as t-id-osan muzaran ən limaman əddewan əd musanan n Əttawret əd muzaran ən Kəl-Əlyəhud,

² ənnan-as: «Əməl-ana da du-təgrawa tarna n igi n aratan win tətægga da? Ma dak-kat-ikfan?»

³ Inn-asan: «Nak da a dawan-agax əsəstan iyyan, amaran əməlat-i:

⁴ Awak əsəlməḡ wa iga Yaxya aytedan daḡ aman, Məššina a ḡur d-ifal awen meḡ aggadəm?»

⁵ Təzzar namaşawwaran gar-essan, ənnan: «As das-nənna "Məššina a ḡur d-ifal" a danaḡ-annu: "Mafel za wər təzzəgzənam s awa inna?"

⁶ As das-nənna "Aggadəm a ḡur d-ifal", tamattay ta, ketnet as dana-za-tanḡu əs zabaw ən təgur, fəlas tək-kâs aššak as Yaxya ənnəbi a imos.»

⁷ Ənnan-as amaran: «Wər nəssen wa ḡur d-ifal.»

⁸ Inn-asan Ƴaysa: «Nak da za, wər dawan-z-əmələḡ dad d-əgrawaḡ tarna n igi n aratan win.»

Əlmital ən magyakan n alyanab

⁹ Amaran imalallay-in Ƴaysa tamattay ig-as əlmital wa, inna: «Kala ad ila aləs iyyan afarag n alyanab. Təzzar issəḡfar afarag-net en i magyakan wiyyad, iššokal, ig-in tamert tagget.

10 As du-tewad tamert ta n əmiləy n alɣanab, izammazal sər-san iyyan daɣ eklan-net y a t-id-akfin adagar-net daɣ awa d-eraw afarag, mišan əgan-as šiwwit, əssoɣalan-tu məššis isikarayray ifassan.

11 Izammazal sər-san iyyan akli. Ənta da, əgan-as šiwwit, saffallasan-tu, əssoɣalan-tu wər eway wala.

12 As taklat ta n karadat, izammazal sər-san iyyan akli. Ənta da sabbasan-tu, əstəyan-tu.

13 Dəffər awen inna məššis n afarag: "Awak ma z'aga? A sər-san zəmmizəla ruray wa əkney tara, mijas ənta a t-əssəxməran."

14 Mišan as ənayan magyakan win əɣfarnen afarag barar-net izay-tan-du, namannan gar-essan: "Ənta əddi amakkasu n afarag. Anɣiwatanaq-qu kərəz, fəl ad təqqəl təkəsit šin-nana."

15 Əkkasan-tu daɣ afarag, ənɣan-tu kərəz.» Amaran inna ɣaysa i tamattay: «Əmərədda ma tordam ma z'agu məššis n afarag i win den meddan?

16 Adi za ad aglu ənta iman-net, agu iman ən magyakan win, issəɣfər afarag-net i magyakan wiyyad.» Əslan aytedan y awen ɣas, ənnan: «Məššina ya wər təgeɣ adi!»

17 Təzzar idak-kan ɣaysa s asawad, inn-asan: «Daɣ adi ma imos almaɣna ən batu ta tənnat daɣ Əlkəttaban: "Təhunt ta din-əgaran makrasan, ənta a təqqalat təhunt ta təkbalat ehan"?

18 Awedan kul wa udan fəl təhunt ta, ad addagdag, wa fəl tuda deɣ a tu-təlkəš.»

19 Əgran musanan n Əttawret əd muzaran n limaman as əntanay a fəl iga ɣaysa əlmital wen, təzzar əgməyan d abbaz-net amazay wen da, mišan wər əgen awen, fəlas tamattay a əksudan.

Arazam n amana i Qaysara

20 Adi a fəl ewalan ɣaysa, ənkâdan-as. Əssokan-tidu meddan əgânen iman-nasan almat alɣadılan, fəl a tu-šəššiwəlan sassannin-tu arat wər nətəwənnu, abəzən-tu sər-əs, agin-tu daɣ fassan n əmuzar n akal d əlxəkum-net.

21 Əssəstanan ɣaysa, ənnan-as: «Əššəx, nəssân as awa təganna d awa təsassaɣra oɣâd; wər tətəgga təmərit gər aytedan. Təsasaɣra əs tidət awas danaɣ-iwar igi-net daɣ tarrayt ta n Məššina.

22 Amaran əməl-ana, awak xalal-ana arazam n amana y əmənokal wa zəwwəran Qaysara meɣ?»

23 Igra ɣaysa tənəgməyt-nasan, inn-asan:

24 «Saknat-i tefelt n əzrəf. Ma ilan udəm d esəm win t-əwarnen?» Ənnan-as: «In Qaysara.»

²⁵ Inn-asan: «Adi za agiwat i Qaysara awa kawan-issəwar, tagim dex i Məššina awa kawan-issəwar.»

²⁶ Indar-asan a tu-səssugin ark awal dat aytedan. Isam-maklal sər-san aljawab wa dasan-iga den, əffəstan.

Əsəstan igân daɣ batu ən tanakra daɣ təmattant

²⁷ Dəffər awen osan-t-id arat daɣ aytedan ən taggayt ta n Sadusaytan. Sadusaytan əttâfan as wər tu-təlla tanakra dəffər təmattant. Əssəstanan-tu,

²⁸ ənnan-as: «Əššex, inna ənnəbi Musa daɣ Əttawret: "As aba aləs, oyya-du tantut dər wər ila barar, a tat-izləf amadray-net fəl ad agu əzzurrəyya y əmidi-net wa aba den."»

²⁹ Amaran kala a t-əllan əssa mədrayan. Izlaf wa dasan-waşšaran ketnasan, aba-tu wər ila barar.

³⁰ Izlaf wa n əššin tantut ta d-oyya əmaq qar-net, ənta da aba-tu wər d-oyya ara.

³¹ Wa n karad dex awen da. Əssa mədrayan en ketnasan igraw-tan awen da, wər tan-ihə i d-oyyan ara.

³² Dəffər awen, aba tantut ənta da.

³³ Awak əzəl wa n tabadday, ma imos daɣ əssa mədrayan win den was za təqqəl təntut ten təyurəs, dad zamas ketnasan əzlâfan-tat?»

³⁴ Inn-asan Ƴaysa: «Daɣ əddənət ta nəha da, zallafan meddan, tawazlafnat tədoden,

³⁵ mišan aytedan win isannaha Məššina əd tanakra daɣ təmattant fəl ad əggəzan aljannat, win di wər dasan-t-illa azalaf gər za meddan wala šidoden.

³⁶ Id ab-as daɣ-san təl kam təmattant, olân d angalosan, əqqalan bararan ən Məššina id tanakra a d-əgan daɣ təmattant.

³⁷ Amaran daɣ awa iqqalan tanakra ən nəmməttan, ənnəbi Musa ənta iman-net as isattadda awen daɣ Əttawret, daɣ batu ən təfsəq, assaxa wad inna Məššina imos "Əməli n Ibrahim, d Isəhaq əd Ƴaqub."

³⁸ Daɣ adi Məššina wər imos Əməli ən təməxxa, kalar Əməli ən win əddarnen a imos, fəlas xur-əs aytedan kul əddâran.»

³⁹ Ənnan wiyyad daɣ musanan n Əttawret i Ƴaysa: «Əššex, təgêx awal olâxan.»

⁴⁰ Dəffər adi ab-as əhalan əsəstan-net d arat waliyyan.

Əsəstan igân daɣ batu n awa imos Əlməsix

⁴¹ Dəffər awen issəstan-tan Ƴaysa inn-asan: «Manəmmək as itawannu Əlməsix Ag əmənokal ənnəbi Dawəd a imos?»

⁴² Ənta Dawəd iman-net as sər-əs inna daɣ əlkəttab wa n Azzabur: "Inna Əməli y Əməli-nin: 'Qamu daɣ əxil-in,

⁴³ *har aga izəngə-nak daw daran-nak."*

⁴⁴ Dağ adi dad zamas Dawəd iman-net iğra Əlməsix s esəm wa n Əməli, manəmmək as z'iqqəl barar-net?»

Ənnəkud i təlmənufəqa ən musanan n Əttawret

⁴⁵ Harwada əssisaman aytedan kul, as inna Ƴaysa i nəttulab-net:

⁴⁶ «Ənkədat i musanan n Əttawret, ərân əsəxləy əzlâğan şikadkaden zagrotnen, d ətəwəsəslam igân əs saşmar daş sammanayan, ərân təximit daş daggan win əlanen almaqam daş nan win əlxibada ən Kəl-Əlyəhud, əd daggan n aytedan win tawasaymarnen daş məğura.

⁴⁷ Tattan eharay ən tədoden şin as aba meddan-nasnat, as iga awen, taggin imaddan tahaginen wər nəmos ar sokni. İlkâm a dasan-itəwəxkəm attadib labasan.»

21

Takutay ən təntut as aba aləs-net

¹ İdkal Ƴaysa asawad-net, inay iməggərgas taggin azrəf wa əkkatan daş əssənduq wa daş itiddaw ərrezəş n Ahan wa Zəwwəran n Əlxibada.

² Inay deş tantut iyyat ən tələqqay as wər idder aləs-net as təga daş əssənduq en sanatat təfelen.

³ Təzzar inna: «Əggəyyeş silakanax-awan as, tantut ten ən tələqqay en as wər idder aləs-net en, togar aytedan a ketnasan tehakkay.

⁴ Fəlas ketnasan awas wər əddəraran a əkfan, ənta amaran, addararat-net a daş tədkal awa təla kul təkat-tu.»

Assa n əzəl wa ilkaman

Əbərəjji wa ilkaman daş Ahan wa Zəwwəran n Əlxibada

⁵ Əşşewalan aytedan wiyyad daş batu n Ahan wa Zəwwəran n Əlxibada, əmmâlan adalag wa iga əs təhun hossaynen d aratan win əkfan aytedan daş təkutawen-nasan. Inna Ƴaysa:

⁶ «A wa təhannayam da, əlkâman adan a daş-as du-wər-za-taqqam təhunt təwârat təmidit-net, ketnet ad itəwəjəbbərəjjət.»

Ənkədat y awa ilkaman

⁷ Təzzar əssəstanan-tu, ənnan-as: «Əşşex, əmmay ad z'agu wədi arat? Ma za təqqəl alğalamat ta za tassaknit as ibuk y igi?»

⁸ Inn-asan Ƴaysa: «Ənkədat ad wər tətəwəsəxrəkam, id aytedan aggotnen a du-z-asinen əttafan esəm-in. Akkiyyan daş-san igannu: "Nak a imosan Əlməsix", "Taqqan tewad." A dasan-wər-təlkəmam.

⁹ As tæslam i tærmuq ən mægiran d əlfəllagatan, ad wər tæššəwəšam fəlas, aratan di kundaba izâran-du, mišan wər dasan-za-təlkəm tæzəræst n əddənət əddi da.»

¹⁰ Inn-asan deɣ: «Ad əknəsnaat addawlaten gar-essanat, əknəsnaat taɣmaren gar-essanat,

¹¹ əməlan-tu nəgəynəgəyan n amaɗal labasnen; iməltu laz əd təwərnawen əssiksadnen daɣ daggan aggotnen, əməlan-tu deɣ aratan əssiksadnen d aɣalamaten əsimaklalnen daɣ jənnawan.

Ətəwədgaz ən nalkiman

¹² Mišan dat adi kul, ad tattarmasam, tətəwəzəxəzzəbam, tammawayam əs nan win əɣibada ən Kəl-Əlyəhud, tətəwəggim da kasaw, tətəwəsəbdədam dat mənokalan əd naxkiman, tətəwəsəstənam fəlas kawan-iwar esəm-in.

¹³ A kawan-akfu adi tarrayt n a fall-i taggayem.

¹⁴ Daɣ adi sansiwat taytwen-nawan, ad wər təsəmmutəgam awa za tannim y ad təkəkəsam iman-nawan,

¹⁵ fəlas a kawan-akfa masnat n awal əd təla n əgərri as tuwər-illa azangaw-nawan a dasan-z-ifrəgan wala deɣ ifrəg isəbbəhəw-nawan.

¹⁶ Wala imarwan-nawan a kawan-səttərməsən, səttərməsən-kawan mədrayan-nawan əd šəqqəyan-nawan əd midawan-nawan, təwənɣin wiyyad daɣ-wan kərəz.

¹⁷ A kawan-əgzəran aytedan kul fəlas kawan-iwar esəm-in,

¹⁸ mišan wər dawan-z-iɣšəd adi wala a odgan əd təzuxay n əmi n əššənnan.

¹⁹ Zəmmerat-nawan as za tagəzam iman-nawan.

Ətəwəšray wa ilkaman daɣ əɣrəm ən Yerusalam

²⁰ As tənayam əɣrəm ən Yerusalam ɣilayɣalayan-tu gənan ən sojitan, təssənam as ijwâr itiwadagdag.

²¹ Əddi, aytedan win ahanen akal ən Yahudəyya, win di addaggaganət s ədɣayan. Win əhanen əɣrəm ən Yerusalam, əgmədanət-tu, win t-əgmadnen əs saffan-net, a t-idu-wər-əqqəlan,

²² fəlas adan win di, ad əqqəlan adan a daɣ z'awwaddab Məššina aytedan, fəl ad andin aratan kul win ənnan Əlkəttaban.

²³ İket aɣazab ad t-əginat tədoden šin əganen šidusen əd šin sankasnen daɣ adan win den, fəlas ad tagu təssust labasat daɣ akal, azzabbat-du attadib ən Məššina fəl tamattay ta.

²⁴ Arat daɣ tamattay ta ad itəwənyu əs takoba, awa hadan ikfəl əs kallaŋ kul, əggəznat təmattiwen wər nəmos Kəl-Əlyəhud aɣrəm ən Yerusalama, a tu-tataftafnat har tandu təmastant ta tanat-ikfa Məššina.

Assa n Ag Aggadəm

²⁵ Ad təwənyan aratan saksodnen əmosnen aɣalamaten as z'aginen da təfuk əd təllit d etran. Ad əššəwəšnat təmattiwen n əddənet wəllen, iqqən əməsli labasan wa tagginat tanazzamaren n aman ən gərwan iɣafawan-nasan.

²⁶ Aytedan a tan-tanɣu tasa n aratan win hannayan əzayan-du əddənet fəlas ad təwəsənəgəynəgəynat təxəllak šin əlānen tarna daɣ jənnawan.

²⁷ Alwaq wədi, a di-ənəyan aytedan nak Ag Aggadəm as du-z-asa, əheɣ tagarak, ələɣ tarna əd tanaya tagget.

²⁸ As əntan aratan win di, təsəmmutəgam, annalamanet man-nawan, fəlas alwaq ən tədarfit-nawan ihôz.»

Əlmital wa iga ɣaysa s ašək ən fiɣ

²⁹ Ig-asan ɣaysa əlmital, inn-asan: «Ənzərat-in daɣ ašək ən fiɣ d eškan win hadatnen.

³⁰ As əggazan šin tanazra, ad təssənam kawanay iman-nawan as tamert ta n akasa təhôz.

³¹ Zund əmmək en daɣ âs as tənayam aratan win dawan-əmalay əddi, təssənam as Taymar ta n Məššina təhôz.

³² Əggəyyey əsilakanay-awan as tamattay ta da n azzaman win nəha da, ad tənəy ənətti n aratan kul win dawan-əməla da.

³³ Ijənnawan d amaɖal ilkâm ad ib'as t-əllan, mišan batuten-in əllanat-tu har faw.»

Səmmutəgat, tənkədam

³⁴ «Ənkədat fəl man-nawan! Ad wər iɣšəd igət ən tattay əd tassay n esmad əd medranan n əddənet ənnəyaten-nawan, aɣ-awan əzəl wədi aɣadar,

³⁵ zun wa tətəggu taftaw y awedan. Arat wədi ad agu fəl aytedan kul win əwarnen tesayt n amaɖal.

³⁶ Daɣ adi agat ənnəyat, ad tətansayam Məššina alwaq kul a kawan-issəfragan ikus ən man-nawan daɣ awa d-izayan ketnet, təfrəgam a dat-i təbdədam nak Ag Aggadəm.»

Əššəɣəl ən ɣaysa daɣ Ahan wa Zəwwəran n Əlyibada

³⁷ Faw isasaɣru ɣaysa aytedan daɣ Ahan wa Zəwwəran n Əlyibada, amaran as iga ahad, ad adəw adɣay igân esəm wa n Eškan ən Zaytun.

³⁸ Id affaw, a d-ənzəyan aytedan kul s Ahan wa Zəwwəran n Əlyibada y a das-əssəsəman.

Tamattant əd tanakra ən ɣaysa Əlməsix

22

Tadrəwt ən Ƴaysa ta təlkatat əd nəttulab-net imensewan

Anu ən təxdərt wa itawayazan i Ƴaysa

¹ Amud wa daɣ tattin aytedan šigəlwen šin wər iha xamira, was itawannu wa n Akkay, ihôz.

² Imuzaran ən limaman əd musanan n Ettawret gammayan təmərkest tas z'agin iman ən Ƴaysa, mišan əksudan ad t-anɣin ijənnəjərwəy awen tamattay.

³ Iggaz Aššaytan Yahuza was itawannu Isxarəyuti imosan iyyan daɣ nəttulab ən Ƴaysa win maraw d əššin.

⁴ Iгла, ikka imuzaran ən limaman əd muzaran n aytedan win ogaznen Ehan wa Zəwwəran n Əlyibada, imašawal dər-san daɣ batu n əmmək was z'agu Ƴaysa daɣ fassan-nasan.

⁵ Isaddawat-tan awen; ərdan s ad t-akfin azrəf.

⁶ Ird-asan, təzzar ad igammay təməwit tas z'agu Ƴaysa daɣ fassan daɣ amazay a ɣur-əs wər təlla tamattay.

Imutag n əmud wa n Akkay

⁷ As d-ewad əzəl n əmud wa n təgəlwen šin wər iha xamira, wa daɣ tawagzaman jəɣal win əmud wa n Akkay,

⁸ izammazal Ƴaysa Butros əd Yaxya, inn-asan: «Aɣlat təsəmmutəgam-anax imensewan win əmud wa n Akkay.»

⁹ Ənnan-as: «Mənid tareɣ a tan-nəsəmmutəg?»

¹⁰ Inn-asan: «As din-təggazam aɣrəm, ad tammanayam d aləs a d-iktāran ətəkin-net. Əlkəmat-as s ahan wa z'iggəz,

¹¹ tannim i məššis n ahan wədi: "Inn-ak Əššex: 'Məni tu daɣ ahan-nak edag wa n naftaxan, wa daɣ za nammansaw nak əd nəttulab-in daɣ əmud wa n Akkay?'"

¹² A kawan-assaknu daɣ suru-net, ehan wa n afalla, elwân, əhân-tu mutag kul. Əddi da ad za təsəmmutəgam imensewan.»

¹³ Əɣlan, ənayan arat kul s əmmək was dasan-t-inna Ƴaysa; təzzar ad simutugan imensewan win Akkay.

Imensewan win əmud wa n Akkay

¹⁴ As iga alwaq ən tattay, inaxama Ƴaysa əd nəmmuzal-net, əggazan šin tattay.

¹⁵ Təzzar inn-asan: «Əkneɣ deran ən tədrəwt ta dər-wan əgeɣ imensewan n əmud wa, harwa wər əɣɣəzzaba.

¹⁶ Silakanax-awan as, wər di-ilkem a tan-ələsa tettay iket wər d-osa əzəl wa daɣ z'andu almaɣna-nasan daɣ Taymar ta n Məššina.»

¹⁷ Təzzar idkal-du Ƴaysa təkabart iha esmad n alxanab, iggoday i Məššina, inna: «Abəzat təkabart ta, tənəməgləzam awa tat-ihan,

18 fəlas əsilakanax-awan as, wər ilkem ad əşwəx esmad n alɣanab, iket wər du-tosa Taɣmar ta n Məşşina.»

Əsəbdəd ən mensewan win əmosnen isaktan n Əməli

19 Dəffər awen idkal Ƴaysa tagəlla, iga igodan i Məşşina, irz-et izun-asan-tat, inn-asan: «taɣəssa-nin adi, tətəiwakfat fəl əddəlil-nawan. Tuzanat-tat əs təməwit ta da, imos adi isaktan-in.»

20 Zund əmmək en da əs as ətšan, idkal təkabart, inn-asan: «Təkabart ta, arkawal wa aynayan ən tassaq a təmos gər Məşşina əd tamattay-net. Arkawal wa, azni-nin a z'inɣəlan fəl tənfa-nawan a t-isattaddan.»

Emel ən Ƴaysa ətəwəkəddal wa z'itəwəggu

21 «Fadda ənəyat, aləs wa di-z-aggin daɣ fassan, illa da da, idrâw dər-i.

22 Illikan as nak Ag Aggadəm a di-iba əs təməwit ta d-ixkam Məşşina harwa dat alwaq, mišan iket alɣazab ad t-inəy awedan wa di-igan daɣ fassan.»

23 Təzzar ad tinəməsəstinan nəmmuzal-net gar-essan əd wa daɣ-san z'agin wen daɣ arat.

Ma imos wa daɣ-wan ogaran

24 Dəffər awen tənkar tamazaq gar-essan təgât daɣ batu ən was əttafan as ənta a daɣ-san ogaran.

25 Inn-asan Ƴaysa: «Imənokalan ən təmattiwen n əddənet saknin tarna y aytedan win as azzaran, zamazalan fall-asan dəx əlxəkum-nasan; mišan dər iga awen da əttâfan as imadhalan n aytedan a əmosan.

26 Mišan kawanay, ad wər tagim awen. Kalar, wa daɣ-wan ogaran almaqam, iqqəlet zun wa daɣ-wan mədrəyan. Wa daɣ-wan azzaran, iqqəlet zun amaşşaxal.

27 Awak ma ogaran awedan wa iqqiman itattu əd wa das-işxalan? Wərgəx wa iqqiman itattu? Mišan nak imosan əmuzar-nawan aheq-qawan əmosa zun amaşşaxal-nawan.»

Əşşəxəl wa ilkaman daɣ nəttulab win maraw d əşşin

28 «Kawanay win da, a d-əqqimnen təl-kâmam-i daɣ jarrabatan win ənaya.

29 Adi as, tehakkay ta di-iga Abba-nin taɣmar, ənta a dawan-z-aga y-as nak əmərədda.

30 Fəl a dər-i tədrəwam tettay əd tassay daɣ taɣmar-in, taqqamim fəl təsəqqima ən təmənukəla y ad təsrəxam i tawşeten marawat əd sanatat şin İsrayil.»

Emel ən Ƴaysa ikus wa das-z-əgu Butros tazdəyt

31 «Simxon, Simxon! Ənkəd! Aşşaytan igmây turagat n a dawan-əgu əsəkənsəki wa itawaggin y alkama.

³² Mišan nak onsâyaḡ-ak Məššina fəl a kay-wər-igməd əzəgzan wa sər-i təgeḡ. Amaran as di-du-təqqala, təsəssuhey əzəgzan ən mədrayan-nak.»

³³ Inn-as Simyon Butros: «Əməli, nak simataga s a dər-ək idawa kuddeḡ əs kasaw, əd təmattant.»

³⁴ Mišan inn-as Ƴaysa: «Butros, silakanay-ak as, wər z'ayru əkəji ayora ahada da wər di-təggeda har karadat təklaten.»

Ənnəkud i təməyutar šin d-əzaynen

³⁵ Dəffər awen inna Ƴaysa i nəmmuzal-net ketnasan: «Alwaq wa kawan-zammazala wər tewayam azrəf, wala ayərəḡ, wala təsəsəlt ta n sanatat, awak ill-ay arat a din-todānam?» Ənnan-as: «Kala.»

³⁶ Inn-asan: «Əmərədda za, wa ilan azrəf awəyet-tu, wa ilan ayərəḡ awəyet-tu. Wa wər nəla takoba, azzanzet-in əbərnuz-net, azzanzet-du.

³⁷ Silakanay-awan as, awa fall-i itawannan daḡ Əlkəttab ən Məššina n as "iddun daḡ maggan ən təkma." Kundaba inda. Awalla, arat kul wa fall-i itawannan ad andu.»

³⁸ Ənnan-as: «Əməli, sanatat təkabiwen da.» Inn-asan: «Ayyat batu di, wər di-təgrem.»

Ətərməs ən Ƴaysa d əššəriya wa das-itawaggan

Təwatray ən Ƴaysa

³⁹ Igməd Ƴaysa, iddēw əd nəttulab-net, ikka adḡay wa n Eškan ən Zaytun, imos awen arat itaggu faw.

⁴⁰ As din-ewadan, inn-asan: «Ansəyat Məššina a kawan-ogazan daḡ jarrabatan n Iblis.»

⁴¹ Ənta amaran izzənkaz-in fall-asan, əddukad ən taggor ən təhənt, igaraffat ad itattar,

⁴² igannu: «Abba, kud immikkan adi, təsəgəgəy-i təkabart ta n alḡazab di! Dər iga awen da ya, taget tara ta-nak wərgəḡ ta-nin.»

⁴³ Amaran inafalal-as angalos y ad t-isəssuhət.

⁴⁴ Təzzar ədgazan man Ƴaysa, idgəz wəllen daḡ təwatriwen, har təqqal tarraft-net šilat n əzni, ad tətattab daḡ amaḡal.

⁴⁵ As iyrad šiwatriwen, ibdad, iqqal-du inəttulab-net, os-en-du issins-en əḡşud ən man.

⁴⁶ Inn-asan: «Mafel tənsām? Ənkərat tansəyam Məššina a kawan-ogazan daḡ jarrabatan n Iblis.»

Ətərməs ən Ƴaysa

⁴⁷ Harwada iššəwal-asan as tan-təggəz tamattay təgget as azzar Yahuza wa n iyyan daḡ nəttulab-net win maraw d əššin. Ihoz-du Yahuza Ƴaysa y ad t-izələmmət.

48 Mišan inn-as Ƴaysa: «Adis kay Yahuza, tɛzɛlɛmmet as di-za-tɛsɛssuga daɣ fassan, nak Ag Aggadɛm?»

49 As ɛnayan nɛttulab win hadatnen awa ibukan y igi da, ɛnnan: «Ɛmɛli, ma iqqal nɛʃʃɛʃxɛl ʃikabiwen-nana?»

50 Tɛzzar iwat iyyan daɣ-san akli n Ɛlimam wa Zɛwwɛran, ifras-du tɛmɛzzuk-net ta n ɛyil.

51 Mišan iharaʃʃat-tan Ƴaysa, inn-asan: «Ayyat adi!» Tɛzzar idas tɛmɛzzuk n ɛkli wen, izzozay-tat, tɛqqɛl ɛmmɛk-net.

52 Amaran inna i muzaran ɛn limaman ɛd muzaran n aytedan win tagaznen Ehan wa Zɛwwɛran n Ɛlyibada ɛd muzaran ɛn Kɛl-Ɛlyɛhud, ɛs ketnasan osɛn-du y ad t-ɛbɛzan: «Awak ɛjajɛb iyyan n abaydag a ɛmosa as sɛr-i du-tewayam ʃikabiwen ɛd tɛburɛgen?»

53 Wɛrgɛx ɛzɛl kul ɛrtɛya dɛr-wan daɣ Ahan wa Zɛwwɛran n Ɛlyibada mišan wɛr di-tobezam? Ɛmɛrɛdda za alwaq-nawan a d-ewadan, kawanay ɛd taɣmar ta n Iblis ɛd ʃiyyay-net.»

Ikus ɛn Butros tazdɛyt i Ƴaysa

54 Tɛzzar obazan Ƴaysa, ewayan-tu s aɣaywan n Ɛlimam wa Zɛwwɛran. Ig-asan Butros lɛkkum zagren.

55 As din-osan, tɛtawasarya tɛmsay daɣ ammas n aɣalla, ɛqqiman sɛr-ɛs aytedan. Iggaz-tan-in Butros.

56 Tɛnay-tu tɛmaʃʃaɣalt iyyat iqqim ɛs tɛmsay, tɛzaggazd-ay wɛllen, amaran tɛnna: «Alɛs wa, ɛnta da, iddew ɛd Ƴaysa.»

57 Mišan iggad Butros awen, inna: «Tantut, wɛr t-ɛzdaya.»

58 Arat n amazay dɛffɛr awen, inay-tu iyyan awedan, inn-as: «Kay da, iyyan daɣ-san.» Mišan inn-as Butros: «Xa alɛs wa, kala wɛr t-ɛmosa.»

59 As iga adag n alwaq dɛffɛr awen, inna alɛs iyyan s assahat: «Illikan as alɛs wa iddew dɛr-ɛs, fɛlas ɛnta da in akal ɛn Galilaya.»

60 Inn-as Butros: «Xa alɛs, wɛr ɛssenay awa daɣ-i tɛʃʃewalaɣ.» Harwa da iʃʃewal Butros alwaq wen da as iɣra ɛkɛji aɣora.

61 Tɛzzar imalallay-in Ɛmɛli Ƴaysa iswad daɣ Butros. Den da a d-ikta Butros awal wa das-iga Ɛmɛli, as das-inna: «Wɛr z'aɣru ɛkɛji aɣora azalada wɛr di-tɛkkesay tazdɛyt har karadat tɛklaten.»

62 Tɛzzar Igmad Butros, ad ihallu fɛl awa ɛgan man-net daɣ ɛɣʃud.

Tamakkakkayt ɛn sojitan daɣ Ƴaysa

⁶³ Alwaq wen, meddan win əttafnen Ƴaysa, əgân daƣ-as tamakkakkayt, əggâtan-tu.

⁶⁴ Ƴegan-as abanaban, a das-gannin: «Kay ya ələwli! Ƴməl wa kay-iwatan.»

⁶⁵ A das-taggin batuten ſiyyad aggotnen labasnen.

Tebadday ən Ƴaysa dat Asaggawar wa Zəwwəran

⁶⁶ As affaw aƣôra, immənay Asaggawar wa Zəwwəran ən muzaran ən Kəl-Ƴlyəhud, əhân-tu əmuzaran ən limaman əd musanan n Ƴttawret, itawasabdad dat-san Ƴaysa.

⁶⁷ Ƴnnan-as: «Kud kay Ƴlməsix, təmələƣ-ana?» Təzzar inn-asan: «Kud dawan-əmala da wər di-za-təzzəgzənam,

⁶⁸ kud kawan-əssəstana dəƣ wər di-za-tajjawwabam.

⁶⁹ Mišan a obazan ƣur əmərədda, Nak Ag Aggadəm ad aqƣama daƣ əƣil ən Məſſina di n Ƴməli ən Tarna.»

⁷⁰ Ƴnnan-as ketnasan: «Daƣ adi kay Barar ən Məſſina?» Inn-asan: «Kawanay iman-nawan as tənnam əmosaq-ƣu.»

⁷¹ Təzzar ənnan: «Ma nəkka y iyyat təgəyya? Wərgəƣ nakkanay iman-nana nəslâ y awa d-igmadan imi-net?»

23

Tebadday ən Ƴaysa dat Bilatəs

¹ Tənkər aljamayət ketnet, teway Ƴaysa əs Bilatəs wa n ənaxkim.

² A ƣur-əs tu-ƣattasan gannin: «Aləs wa, as t-in-nosa isaxrak tamattay-nana. Igaddal dəƣ y aytedan ad ərzəman amana i Qaysara wa n əmənokəl wa zəwwəran, harwa igannu ənta a imosan Ƴlməsix, əmənokəl.»

³ Awen da a fəl t-issəstan Bilatəs, inn-as: «Awak kay daƣ a imosan əmənokəl ən Kəl-Ƴlyəhud?» Inn-as Ƴaysa: «Kay iman-nak as tənneƣ adi.»

⁴ Inna Bilatəs i limaman win zawwarnen əd tamattay: «Wər hənnəyax əddəlil waliyyan a fəl obazaƣ aləs a.»

⁵ Mišan ədgazan wəllen daƣ təƣəttas-net, gannin: «Ijinəjərwəy aytedan əs səssəƣritan-net daƣ akal ən Yahudəyya ketnet. Issənta-du awen daƣ Galilaya har awas d-ewad Yerusalam da.»

Tebadday ən Ƴaysa dat əmənokəl Herod

⁶ Isla Bilatəs y esəm wa n Galilaya ƣas, issəstan kud Ƴaysa in akal ən Galilaya wala.

⁷ As issan as taƣmar ta n Herod a das-tazzarat, issok-as-tu fəlas iha Yerusalam daƣ adan en.

⁸ Herod isidawat-tu wəllen anay ən Ƴaysa, irəw ira anay-net fəl əddəlil n aratan win sər-əs isallu. Igâ dəƣ attama n a dat-əs agu Ƴaysa təlməƣjujat.

⁹ Ig-as isəstanan aggotnen, mišan wər das-inna Ƴaysa wala.

¹⁰ As itaggu awen, imuzaran ən limaman əd musanan n Ǝttawret əllân den, siḡaren da təḡəttas ən Ƴaysa.

¹¹ A das-itaggu Herod əd sojitan-net šisəssəlka, taggin daḡ-as tamakkakkayt; əzzəzlagan-tu takatkat təkənât əbələzləz, amaran issoḡal-tu Herod i Bilatəs.

¹² Eway-du awen əzəl wen da as immedaw Bilatəs əd Herod, id dat awen nimagzaran.

Ǝtəwəxkam ən təmattant i Ƴaysa

¹³ Iššədaw-du Bilatəs ilimaman win zawwarnen əd muzaran ən Kəl-Ǝlyəhud win hadatnen əd tamattay,

¹⁴ inn-asan: «Təwayam-du sər-i aləs a, tənnam isafallag aytedan. Ǝšraḡaḡ-as dat-wan, mišan wər ənaya əddəlil waliyyan a fəl t-əbaza daḡ aratan win tu-təssəwaram.

¹⁵ Wala deḡ inay-tu daḡ-as Herod, fəlas issoḡal-anaq-q-id. Amaran ənəyat! Aləs wa, wər iga arat waliyyan a t-issiwaran təmattant.

¹⁶ Daḡ adi a das-səssuga šiwwit, amaran ayyaq-qu.»

¹⁷ Təll-ay alḡadat təmosat as i d-iḡlay əmud wa n Akkay, iwâr Bilatəs a dasan-ikkəs awedan iyyan daḡ kasaw.

¹⁸ Jajjayan adakal ən maslan-nasan ketnasan daḡ jənnawan gannin: «Agu iman n aləs di, təkkəsəḡ-ana-du Barḡabbas.»

¹⁹ Barḡabbas wen, ənəjərway as kala ad t-əgan aytedan daḡ əḡrəm n Yerusalem d igi ən man n awedan a fəl iggaz kasaw.

²⁰ Ilas-asan Bilatəs awal fəlas tara a iga ad ayyu Ƴaysa.

²¹ Mišan əḡlan siḡaren daḡ jənnawan, gannin: «Taytay-tu fəl təḡəttawt! Taytay-tu fəl təḡəttawt!»

²² Ig-asan Bilatəs tənna ta n karadat: «Mafel za? Ma iḡsəd? Wər hənnəyḡ əddəlil waliyyan a t-issiwaran təmattant. Daḡ adi a das-səssuga šiwwit ḡas, ayyaq-qu.»

²³ Mišan əššotan šḡaraten wəllen, gammayan daḡ-as ad itəwətəytəy Ƴaysa fəl təḡəttawt. Ǝḡlaban Bilatəs əs takat.

²⁴ Təzzar ixtas Bilatəs i Ƴaysa əššəriḡa wa daḡ-as təḡmay tamattay ten.

²⁵ Ikkas aləs wa daḡ-as gammayan, igḡāzan kasaw fəl ənəjərway n aytedan d igi n man n awedan. Ƴaysa amaran, ig-ay daḡ fassan-nasan, y a daḡ-as itəwəxkəm awas əran.

Tamattant ən Ƴaysa

Iki ən Ƴaysa edag wa daḡ z'itəwətəytəy

²⁶ Æzzærgazan sojitan Ƴaysa. Æglân dær-æs as æmmenayan d alæs iyyan n æxræm ən Qærwan igân esəm Simxon a d-ifâlan šiwægás, tæzzar æbazan-tu, sassawayan-tu tægöttawt ta fæl z'itewätæytøy Ƴaysa, ilkam-as dær-æs.

²⁷ Tælkâm-as tamattay tagget, æhânat tødoden aggotnen a fall-as hallinen, sikalalnat.

²⁸ Iswad-in daɣ-asnat Ƴaysa, inn-asnat: «Aššet Yerusalem, ayyimat fall-i tala. Kalar alimat fæl man-nakmat, æd maddannækmat,

²⁹ fêlas ælkâman adan a daɣ z'itewænnu: "Æbbilalnat tødoden šin wær nêtilu bararan, æd šin æs kala wær tan-ælenat, æd šin æs kala wær æsênkasnat."

³⁰ Adan win-di ad annin aytedan y ædɣaɣan: "Bæræjjætät fall-ana", annin i kašwaran: "Alsiwat-ana";

³¹ fêlas dad itawagga æmazal wa y ašæk wa ibdagan, wædi ma d-innayan wa iqquran?»

Ætewätæytøy ən Ƴaysa fæl tægöttawt

³² Ællan meddan den æššin ən næsgufa labasnen s æntanay da tiwazargazan s adag ən tømattant.

³³ As ewadan sojitan edag igân esəm Tækøyya, ættæytayan Ƴaysa fæl tægöttawt, æssæxtan-tat dær-æs. Ægan awen da i meddan win æššin en. Iyyan ægan-tu daɣ æɣil ən Ƴaysa, wa hadan ægan-tu daɣ zalgat-net.

³⁴ Inna Ƴaysa: «Ya Abba, suræf-asan; wær æssenän awa taggin.»

Æzunan tabdoq ən Ƴaysa æs tæšæyeren.

³⁵ Tamattay tæbdâd den tæswâd. Imuzaran amaran ægân tamakkakkayt daɣ Ƴaysa, gannin: «Ænta wa issæfsan aytedan, assafset iman-net kud ænta a imosan Ælmæsix, Tafreñt ən Mæššina.»

³⁶ Sojitan da, ægân daɣ-as tamakkakkayt. Tihazan-t-in, tazzalan-as-in bønægær.

³⁷ Gannin-as: «Kud kay æmænokal ən Kæl-Ælyæhud a tæmosaɣ, tassafsaya iman-nak.»

³⁸ Ættæytayan deɣ dænnæg-æs æsellum a fæl iktâb as: «Awa Æmænokal ən Kæl-Ælyæhud.»

Meddan win æššin ən næsgufa

³⁹ A das-itaggu iyyan daɣ meddan ən jujab ən baydagan win dægman-æs tawataytaynen ark batuten, igann-as: «Wærgæɣ kay Ælmæsix? Safsu za iman-nak, tassafsaya-ana.»

⁴⁰ Isannaryam-as wa hadan, inn-as: «Kay tæksæda a wær tæge Mæššina, kay wa obaz æššæriɣa imosan tømattant wa t-ibazan?»

⁴¹ Nakkanay aššəriya wa danaḡ-itawaggan oḡâd, awa dər əhoran mazalan-nana a danaḡ-itawaxkaman, mišan aləs wa, ənta wər iga ark amazal waliyyan.»

⁴² Təzzar inna i ʔaysa: «ʔaysa, aktəw-i-du as du-təqqala taheḡ taḡmar-nak.»

⁴³ Inn-as ʔaysa: «Əggəyey əsilakanax-ak as, azalada ad nənəməgəz aljannat nak dər-ək.»

Tamattant ən ʔaysa Əlməsix

⁴⁴ Awen itaggu attayan n ammasnazal. Təzzar əlsanat šiyay amaḡal ketnet har təga tazzar,

⁴⁵ fəlas təfuk a igmad ənnur. Afər deḡ wa izammazzayan edag wa zəddigan əd wa ogaran tazdak daḡ Ahan wa Zəwwəran n Əlyibada, izzərrat daḡ ammas.

⁴⁶ Təzzar ikkas ʔaysa əməsli issohen, inna: «Abba, əgeḡ iman-in gər fassan-nak.» Inna awen ʔas əgmadan-tu man.

⁴⁷ As inay kabtan ən sojitan ən Kəl-Ərrum win əttəytaynen ʔaysa awa igan den, iga təmmal i Məššina, amaran inna: «İllikan as aləs wa alḡadil.»

⁴⁸ Əddəwan aytedan aggotnen den y ad ənəyan awa z'agin. As t-ənayan, əqqalan əggâtan idmaran-nasan fəl awa əgan man-nasan daḡ əḡşud.

⁴⁹ As itaggu awen, imidawan ən ʔaysa kul, əhânat tədoden šin das-d-əlkamnen harwa daḡ akal ən Galilaya, əbdâdan sədi, əswâdan.

Tanakra ən ʔaysa daḡ təmattant

Ətəwəgga ən ʔaysa daḡ əzəkka

⁵⁰ İll-ay aləs igân Yusəf ihân Asaggawar wa Zəwwəran ən muzaran ən Kəl-Əlyəhud, imosan awedan olâḡan n alḡadil.

⁵¹ Ənta wər irda əs tanat ta əgan muzaran win, wala deḡ s arat wa igan. Yusəf wa, in əḡrəm ən Kəl-Əlyəhud igân esəm Arimatay, amaran igâ attama-net daḡ assa ən Taḡmar ta n Məššina.

⁵² İkka Yusəf Bilatəs wa n ənaxkim n akal, igraw-du ʔur-əs turagat n ad itkəl taḡəssa ən ʔaysa.

⁵³ Təzzar ikkas-tat-du fəl təgəttawt, ig-et daḡ šifit, ig-et daḡ əzəkka imosan akazam əs wər kala a daḡ-as itawagga ənəmmettən.

⁵⁴ Awen itaggu daḡ əzəl wa daḡ simutugan aytedan y əmud wa n təsanfawt, ibukan y ənətti.

⁵⁵ Šidoden šin d-əddewnen əd ʔaysa harwa daḡ Galilaya, əlkâmnat i Yusəf. Ənaynat əzəkka d əmmək was daḡ-as tətawagga təḡəssa ən ʔaysa.

⁵⁶ Əqqalnat aḡaywan, təzzar ad simutugnat aḡutan əzodnen d alwarditan win za təwəḡəlnen fəl təḡəssa-net.

As d-ewad əzəl wa n əssəbət əssənfanat, imos awen alwajib n əşşərixa wa n Əttawret.

24

Agamad ən Ƴaysa əzəkka

¹ As əzəl wa n alxad, ənzaynat tədoden šin den s əzəkka ən Ƴaysa, ewâynat ađutan win sammatagnat.

² Osanat-in təhünt ta təharat əzəkka, tətivasaxararad, təlla den y əzəkka.

³ Əggaznat əzzəka mišan wər dağ-as ənaynat tağəssa ən Ƴaysa.

⁴ Əqqanan Ƴafawan-nasnat y awen. Wala a ihogan əbdadan-du əşšin meddan dəgma-nasnat əlsânen isəlsa bilazlaznen.

⁵ Ərmağnat, oyyanat idmaran s amađal, təzzar ənnan-asnat meddan win əşšin en: «Mas təsaggadmat y i iddâran dağ nəmməttan?»

⁶ Ab'as illa da, inkar-du dağ təmattant. Aktimat-du awa inna harwa iha akal ən Galilaya,

⁷ as inna: "Ag Aggadəm ilzâm-tu ad itəwəggu dağ fassan ən nasbakkadan, itəwətəytəy fəl təgəttawt, iba-tu, təzzar inkər-du dağ təmattant əzəl wa n karad."»

⁸ Amaran əktanat-du awa inna Ƴaysa.

⁹ Əfalnat əzəkka, əqqalnat əssoğalnat awen kul i nəmmuzal ən Ƴaysa win maraw d iyyan əd nalkiman kul win hədatnen.

¹⁰ Šidoden šin əmosnat Maryama Madəl əd Taxya əd Maryama ta n anna ən Yaqub əd tədoden šiyvad dər-əsnat əddawnen. Əntanatay a əssoğalnen aratan win i nəmmuzal.

¹¹ Mišan wər sər-san əlen aratan en almağna; adi a fəl dasnat-wər-əzzəgzanan.

¹² Dər iga awen da ya, igga-du Butros, ozal s əzəkka. As t-in-osa, işşəgga dağ-as, wər dağ-as inay ar šifit, təzzar iqqal, iqqân awen eğaf-net.

Tarrayt n Emayos

¹³ Əzəl wen da iman-net ad əkkan nalkiman ən Ƴaysa əşšin tağrəmt iyyat təgât Emayos as təlla teklay n əşšin alwaqan gar-es əd Yerusalam.

¹⁴ Mişawalan dağ batu n aratan win əganen den kul.

¹⁵ Mişawalan den da as tan-d-ewad Ƴaysa ənta iman-net, iddew dər-san.

¹⁶ Hannayan-tu mišan wər t-əzdayan.

¹⁷ Inn-asan: «Ma dağ təməşawalam da?» Əbdadan, təwâr təkənzert udmawan-nasan.

18 Inn-as wa daɣ-san igan esəm Kløyubas: «Adis kay ɣas daɣ aytedan win əhanen Yerusalam a wər əhen salan n awa daɣ-as igan daɣ adan win?»

19 Inn-asan: «Ma daɣ-as igan?» Ğnnan-as: «Arat wa igrawan Ƴaysa wa n Nazaret, imosan ənnəbi itaggan imazalan d awalan ən təla tarna dat Məššina d aytedan kul.

20 Sattarmasan-tu limaman win zawwarnen əd muzaran-nana, tətawaxkam-as təmattant, sattaytayan-tu fəl təgəttawt.

21 Nakkanay dat awen, nəgâ attama n as ənta a z'isəddərfeŋ tamattay n Israyil. Mišan azalada, əzəl n aratan en wa n karad d igi.

22 Dər iga awen da ya, əqqânnat tədoden-nana šiyyad iɣafawan-nana, ənzaynen s əzəkka,

23 mišan wər daɣ-as ənaynat taɣəssa-net. Ğqqalnat-du, ənnanat nifalalan-asnat angalosan, ənnan-asnat iddâr.

24 Təzzar əkkan wiyyad daɣ-na əzəkka, osan-in, ənayan arat kul wa ənnanat tədoden en, mišan ənta wər t-ənayan.»

25 Amaran inn-asan Ƴaysa: «Xa kawanay za aljahilan! Izzəwwat fall-awan əzəgzan s arat kul wa ənnan ənnəbitan daɣ Ğlkəttaban.

26 Wərgəɣ Ğlməsix ilzâm âs ad inəy alɣazab təzzar, amaran igrəw tanaya-net?»

27 Təzzar a tan-isasagru Ƴaysa awa sər-əs ənnan Ğlkəttaban kul. Ibaz-du ɣur Ğlkəttaban win ənnəbi Musa har win ənnəbitan kul win hadatnen.

28 As din-əhozan taɣrəmt ta əkkan, issəkna Ƴaysa as okây.

29 Mišan əwaɣan-tu, ənnan-as: «Ƴam ɣur-na fəlas əzəl igla, ehad ibuk y igi», təzzar izzəbbat ɣur-san.

30 As əggazan šin tattay, idkal Ƴaysa tagəlla, iggoday i Məššina, irz-et ikf-asan-tat.

31 Ğmmoranat šittawen-nasan alwaq wen da, əzdayan-tu, mišan iggaz-asan ətənkul tamazayt ten da.

32 Təzzar namannan gar-essan: «Zaɣnin awen da fəl əknan man-nana təfalawist alwaq wa danaɣ-iššewal daɣ tarrayt, isasagr-ana Ğlkəttaban n ənnəbitan.»

33 Ğbdadan tamazayt ten da, əqqalan Yerusalam. Osan-in inəmmuzal win maraw d iyyan əd nalkiman win hadatnen əddewan daɣ adag iyyanda,

34 gannin: «Tidət daɣ a imos as Ğməli Ƴaysa inkâr-du daɣ təmattant, amaran inifalal i Simyon.»

35 Ğssoɣalan-asan meddan win əššin əntanay da awa ənayan daɣ tarrayt, d əmmək was t-əzdayan alwaq wad irza tagəlla.

Ğnəfilal ən Ƴaysa i nalkiman-net

³⁶ Harwada aššewalan day awen as d-ibdad Ƴaysa iman-net gar-essan, inn-asan: «Alxer fall-awan.»

³⁷ Ƴegan tərəmmeq zəwwərat, təggaz-tan tasa fəlas əxilan aggəsuf a hannayan den.

³⁸ Təzzar inn-asan Ƴaysa: «Ma fel təššiwašam? Ma fel dey təgām aššak?»

³⁹ Ƴnəyat ifassan-in əd daran-in, nak iman-in awa. Ƴdəsat-i ad tənəyam, fəlas aggəsuf wər ila taɣəssa wala iɣasan win as di-təhannayam da əleq-qan.»

⁴⁰ As dasan-inna awen, isakn-en ifassan-net əd daran-net,

⁴¹ mišan əqlan wər day-as əkkesan aššak fəl awa əgan day təfalawist, ikna dey sər-san awen əsəmməkləl. Adi a fəl a dasan-inna: «Awak təlām a itamatšan da?»

⁴² Ƴkfan-tu tablalt ən kifi tənɣāt.

⁴³ Ibaz-tat, itš-et dat-san.

Ƴəššəɣəl wa day iga Ƴaysa inalkiman-net

⁴⁴ Dəffər awen inn-asan Ƴaysa: «Ƴentanay da aratan win dawan-ənnə harwa kawan-əheɣ: Aratan kul win fall-i əktabnen day Ƴttawret n ənnəbi Musa d Ƴlkəttaban win hadatnen d Azzabur əššil ad andin.»

⁴⁵ Amaran ora iɣafawan-nasan alwaq wen da y ad agrin Ƴlkəttaban.

⁴⁶ Inn-asan: «Wərgəɣ iktâb as, Ƴlməsix ad inəy aɣazab, iba-tu, inkər-du day təmattant əzəl wa n karad,

⁴⁷ təzzar təwəggin salan ən tətubt s esəm-net i təmattiwen kul fəl ad əgrəwnat təsureft ən bakkadan, antu awen day Yerusalam.

⁴⁸ Kawanay təmôsam šigəyyawen n aratan win.

⁴⁹ Amaran nak a fall-awan du-zəzzəbbəɣ Infas wa Zəddigan s Abba-nin a igan arkawal-net. Day adi ad wər təgmədam aɣrəm wa da har d-azzabbat Infas wa Zəddigan, akf-iwan tarna ta du-təfalat Məššina.»

Tewaylay ən Ƴaysa ijənnawan

⁵⁰ Dəffər awen, iddew dər-san, əgmədan aɣrəm, har din-əhozan taɣrəmt ta n Betanəy, təzzar idkal ifassan-net, ittar-asan a tan-ikfan albaraka.

⁵¹ Itattar-asan harwa da as dər-san imməzzay, immədkał əs jənnawan.

⁵² Ƴentanay amaran, as das-əssəjadan, əqqalan Yerusalam əknân təfalawist.

⁵³ Faw əhân Ehan wa Zəwwəran n Ƴlyibada, əmmâlan Məššina.

Əlinjil wa n Yaxya Əsənti

Awal wa imosan ənnur əd təməddurt

¹ Əstizarat as d-ixlak Məşşina əddənet da Awal ill-ay. Awal illa çur Məşşina, amaran Awal wa imos Məşşina.

² Awal əstizarat illa çur Məşşina.

³⁻⁴ Ixlak-du sər-əs Məşşina arat kul; wər t-illa arat daç əddənet wa sər-əs du-wər-nəxlek fəlas Awal wa ənta a ihakkin təməddurt ta təmosat ənnur y aytedan.

⁵ Imilawlaw daç şiiyyay mişan wər t-əqbelnat.

⁶ Osa-du aləs iyyan igân esəm Yaxya, a d-izimazal Məşşina;

⁷ imos təgəyya fəl ad ammagrad s ənnur wa, əzzəgzənan aytedan kul s aratan win igannu.

⁸ Ənta iman-net wər imos ənnur, ətəwəsəgla ças a d-iga imos təgəyya fəl ad ammagrad s ənnur wa.

⁹ Awal wa ənta a imosan ənnur wa n tidət, wa d-ikkan əddənet isimələwləw aytedan kul.

¹⁰ Ənta a ihan əddənet, ixlak-kat-du sər-əs Məşşina, mişan wər tu-təqbel əddənet.

¹¹ Osa-du akal-net eges wər t-əqbelan aytedan-net.

¹² Amaran aytedan kul win t-əqbalnen, əzzəgzənan sər-əs, win di ikf-en almaçam ən tişit ən bararan ən Məşşina.

¹³ Bararan en əlâsan təhəwt. Mişan təhəwt en wər tola əd ta tətawazdayat. Wər təga əs ləkkum i deran n aggadəm, wala tanat-net. Kala kalar Məşşina iman-net as tan-iga bararan-net.

¹⁴ Wa imosan Awal, iqqal awedan ixsar çur-na, ikna təla n əlxurma, imos məşşis ən tidət. Nəsinagra tanaya-net, tanaya ta igarraw Barar a n iyyanda çur Abba-net.

¹⁵ Iggəyyat-as Yaxya, işşewal s afalla ad igannu: «Wa daç as əhe batu-net, assaça wa dawan-ganna: "A d-asu dəffər-i mişan ogar-i, fəlas dat-i da ill-ay."»

¹⁶ Awalla ketnana nəgraw albaraka wər nəla əddukad s əlxurma-net ikmâlan.

¹⁷ Fəlas Məşşina ikf-anax əşşəriça daç əfus ən Musa, əlxurma əd tidət amaran osa-du dər-san Çaysa Əlməsix.

¹⁸ Wər t-illa awedan inâyan Məşşina, mişan Barar a n iyyanda imosan Məşşina, illa çur Abba, ənta a danaq-q-issosaçan.

İşşəçəl wa iga Çaysa dat aytedan kul

Təgəyya ən Yaxya wa isalmayan daç aman

19 Ënta da tægəyya ta iga Yaxya y arat daɣ limaman əd Kəl-Lebi win d-əfalnen Yerusalām assaɣa wa tan-du-zammazalan muzaran ən Kəl-Əlyəhud y ad t-əssəstənan d awa imos.

20 Wər uɣay s a dasan-ajjawwab. Kala kalar idkal əməslinet s afalla inn-asan: «Nak wər əmosaɣ Əlməsix.»

21 Ənnan-as: «Ma təmosa za? İlyas a təmosa?» «Kala kala» inn-asan, «wər t-əmosa.» «Ənnəbi wa ittəmalan a təmosa?» «Kala kala» inn-asan, «wər t-əmosa.»

22 Təzzar ənnan-as: «Daɣ adi ma təmosa? İhor a din-nasu aytedan win dana-d-əssəglanen newâ-y-asan aljawab n awa təmosa. Daɣ adi əməl-anaq-qu.»

23 Inn-asan arat wa inna ənnəbi İsayas irəw, as inna: «Nak, a imosan wa isayaren daɣ əsuf igannu: "Səssiɣədat abaraqqa y Əməli."»

24 Aytedan win d-əmmozaalnen əs Yaxya da, əhân-tan kəl taggayt ta n Farisaytan.

25 Əlasan-tu əsəstan ənnan-as: «Ma fəl təsalmaɣaɣ aytedan daɣ aman, kay tənne wər təmosaɣ Əlməsix, wər təmosaɣ deɣ ənnəbi wa ittəmalan?»

26 Inn-asan: «Nak, aman a daɣ salmaɣa, mišan illa gar-ewwan awedan wər təzdayam,

27 s ənta a du-z-asin dəffər-i, amaran awa di-iga daɣ şıgırat, wər eweda wala arra ən suyan ən ɣateman-net.»

28 Aratan win kul amaɣdal ən Betanəy a daɣ taggan fəl tagadamayt ta hadat n agarew wa n Yordan s ənta a daɣ isalmaɣ Yaxya aytedan.

29 As iga əzəl wa hadan ogga Yaxya Ƴaysa izay-t-idu, təzzar inna: «Ënta den ajaɣol ən Məşşina wa itakkasan ibakkadan daɣ əddənet.

30 Ënta as əhe batu-net as dawan-ganna: "Aləs iyyan a d-asu dəffər-i, mišan oɣar-i fəlas dat-i da ill-ay."

31 Nak iman-in wər t-əzdaya mišan ose-du ad salmaɣaɣ aytedan daɣ aman, fəl a d-inəfiləl i Kəl-Əlyəhud.»

32 İlas Yaxya tægəyya inna: «Əswâda daɣ İnfas wa Zəddigan as d-igmad jənnawan, iha şaşşelan ən tədabert, iwar-tu.

33 Dat awen wər t-əzdaya, mišan Məşşina, s ənta di-d-izammazalan y ad əsalmaɣaɣ aytedan daɣ aman, inn-i: "Aləs was tənayaɣ İnfas wa Zəddigan as fall-as d-izzəbbat, aləs wədi ənta a z'isalmaɣan aytedan daɣ İnfas wa Zəddigan."

34 Əmərədda arat wa ənayaq-qu əs şittawen-in; amaran əggəyye silakanay as aləs wa ənta Barar ən Məşşina.»

35 As iga əzəl wa hadan, iha Yaxya edag wa harwa da, ənta əd nəttulab-net əşşin,

36 ogga Ƴaysa as dagma-nasan d-illam, inna: «Ənta den, Ajaɣol ən Məşşina.»

37 Əslan nəttulab win əşşin a i batu ta iga da, təzzar əlkaman i Ƴaysa.

38 Iswad-in Ƴaysa dəffər-əs ogg-en əlkâman-as, inn-asan: «Mas təsaggadam?» Ənnan-as «Mənid təxsara Əşşex?»

39 Inn-asan «Aqliwat-du a tu-tənəyam». Itaggu awen takəst zagret. Əglan əddewan dər-əs, ənayan dad illa, təzzar əssəndan xur-əs əzəl.

40 Meddan win əşşin əlkammen i Ƴaysa dəffər tasalay ta əgan y awal ən Yaxya, esəm n iyyan daɣ-san Andrawəs, amadray ən Simxon Butros.

41 Immənay Andrawəs d əmaq qar-net Simxon əstizarat, inn-as: «Nakkanay nəmminay d Əlməsix.» (Almaɣna Kristos.)

42 Amaran ilway-tu əs Ƴaysa. Iswad Ƴaysa daɣ Simxon ɣas inn-as: «Kay Simxon ag Yaxya, ad tagaɣ esəm Qayfas.» (Esəm wa ola əd wa n Butros, almaɣna-net təhunt.)

43 As affaw ira Ƴaysa iki n amaɣal ən Galilaya. Immənay əd Filibus inn-as: «Əlkəm-i.»

44 (Filibus d Andrawəs əd Butros aɣrəm-nasan iyyanda, esəm-net Betsayda.)

45 Immənay Filibus əd Natanəyel inn-as: «Nakkanay nəmminay əd was imməgrad ənnəbi Musa daɣ Əttawret, əmmigradan sər-əs deɣ Əlkəttaban n ənnəbitan, a t-imosan Ƴaysa wa n ag Yusəf wa n əxrəm ən Nazaret.»

46 Təzzar inn-as Natanəyel: «Immikkan aɣrəm ən Nazaret a t-id-əgməd arat ihossayan?» Inn-as Filibus: «Ayaw tənəya.»

47 Ogga Ƴaysa Natanəyel izay-t-idu, inna: «Ənta den awedan n İsrayil wa n tidət, wa wər iha a imosan təlmənufəqa.»

48 Inn-as Natanəyel: «Məni awas di-təzdaya?» İjjəwwab-as Ƴaysa inn-as: «Harwa kay du-wər-iɣra Filibus, assaɣa wad təlle daw aşək wa n fig, da əhannayaq-qay.»

49 Inn-as Natanəyel: «Əşşex, kay a imosan Barar ən Məşşina, təmosaɣ əmənokal n İsrayil.»

50 Inn-as Ƴaysa: «Təzzəgzana fəl as dak-ənney əhannayaq-qay daw aşək ən fig. Ad tənəyaɣ aratan wiyyad zawwarnen ogarnen wədi.»

51 Inn-as Ƴaysa deɣ: «Əggəyyeɣ əsilakanax-awan as dəffər awa ad tənəyam ijənnawan ənnolaman tagazzayan sər-san angalosan, tazabben-du fall-i nak Ag Aggadəm.»

2

Takræst ta tægat day æyræm ən Kâna

¹ Æzæl wa n karad tæmal-tu tækræst day æyræm ən Kâna day amaðal ən Galilaya, tæh-et anna ən Yaysa,

² tæzzar itawaḡra-du Yaysa ænta da, iddew-du æd nættulab-net æs tækræst en.

³ As ab'as d-iqqim wala day esmad n alḡanab, tænna anna ən Yaysa y as: «Ësmad n alḡanab iḡrad.»

⁴ Inn-as Yaysa: «Anna, tædi a kam-wær-tædgæz. Alwaq-in wær d-ewed.»

⁵ Tænna anna-net i mašḡaḡalan: «Agat awas dawan-inna kul.»

⁶ Æskâran den sædis tækan taggazan aman as taggin Kæl-Ëlyæhud æzæzdæg imosan alḡadat-nasan. Ækkulluk n iyyan itaggaz-tu æddukad ən temeday ən litær.

⁷ Inna Yaysa i mašḡaḡalan en: «Ëdnøyat itækan di aman.» Æntanay deḡ ædnayan-tan har fayyan.

⁸ Inn-asan amaran: «Ëlkæwat daḡ-san æmæreðda y æmaway ən saksas.» Ægan awen da.

⁹ As iram æmaway ən saksas aman win æmmættaynen da, æqqalan esmad n alḡanab, as wær issen iguz wa d-iga, mišan imašḡaḡalan win tan-d-ælkawnen da æssânan, iḡra amazlay,

¹⁰ inn-as: «Imæssæksas kul esmad n alḡanab wa izodan a garrawan, amaran dæffær as filawasan ad garrawan wa isammakkanan. Eges kay tæḡbara wa izodan har æmæreðda!»

¹¹ Ænta æddi tælmæxjujat tæmosat alḡalamat ta tazzarat immozal Yaysa. Ig-et daḡ æyræm ən Kâna ta n Galilaya. Isannafalal sær-æs tanaya-net, tæzzar æzzægzanan sær-æs nættulab-net.

¹² Dæffær awen izagaday Yaysa, ikka tæḡræmt ən Kafar-nahum, ænta d anna-net, æd mædrayan-net, æd nættulab-net. Wær daḡ-as ægen ar arat n adan.

Assa ən Yaysa Ehan wa Zæwwæran n Ælyibada

¹³ As d-ihoz æmud wa n Akkay imosan amud maqqaran ən Kæl-Ëlyæhud, iggæzzay Yaysa ikka Yerusalem.

¹⁴ Ogaz-in Yaysa daḡ aḡalla wa iḡlayan Ehan wa Zæwwæran n Ælyibada, imassatagan ən zægran, d ayfæd, æd tædæbren, æd tæḡximiten ən kæl sanji.

¹⁵ Iga ælækkud æs ḡunan istaq-qan daḡ afarag en ketnasan, æntanay d ayfæd, æd zægran, infaz daḡ amaðal izærfan ən kæl sanji, isabbanbay tebæren-nasan.

¹⁶ Imassatagan ən tædæbren æntanay inn-asan: «Ëkkæsat awa daḡ adag a, ad wær tagim ehan n Abba-nin æssuk.»

¹⁷ Æktan-du nættulab akatab n ænnæbi Dawæd wa innan: «Tara-nin ehan-nak tærya daḡ-i šilat ən tæmsay.»

18 Ǝssəstanan-tu muzaran ən Kəl-Ǝlyəhud ənnan-as: «Ma təmos təlməxjujat tas təfragax igi-net təmosat aɣalamat, təsitaddat as tələx tarrayt n igi n adi?»

19 Ijjəwwab-asan Ǝaysa inn-asan: «Jəbbərəjjətət Ehan wa Zəwwəran n Ǝlɣibada di, ad t-əssəbdəda daɣ karad adan.»

20 Ǝnnan-as: «Ehan wa Zəwwəran n Ǝlɣibada di əkkozat təmərwen n awatay əd sədis a fəl itawakras. Kay mas tuza-təssəbdəda daɣ karad adan?»

21 Ehan wa Zəwwəran n Ǝlɣibada wa immal Ǝaysa da, taɣəssa-net a sər-əs issoka.

22 As d-inkar daɣ təmattant əktan-du nəttulab-net tənna ta iga adi. Ǝzzəgzanan s Awal ən Məššina, d awal wa iga Ǝaysa da.

23 Aytedan aggotnen əzzigzanan əs Ǝaysa ɣur anay ən təlməxjujaten šin immozal əmosnen aɣalamaten, daɣ adan win iga daɣ Yerusalām ɣur əmud wa n Akkay.

24 Mišan ya Ǝaysa wər tan-ifles fəlas izdây-tan ketnasan, ənta

25 wər iddərar s i das-igan isalan n awedan id wər das-ixber awa ihan əwəl-net.

3

Ǝaysa əd Nikodemos

1 Ill-ay aləs iyyan igan esəm Nikodemos, ihân taggayt ən Farisaytan, imos iyyan daɣ muzaran ən Kəl-Ǝlyəhud.

2 Osa-du Ǝaysa ahad iyyan inn-as: «Ǝššex-in, nakkanay nəssân as Məššina kay d-izammazalan sər-na, a dana-təsassayra, id wər t-illa i z'agin təlməxjujaten šin təge əmosnen aɣalamaten, ar əs tədhəlt ən Məššina.»

3 Ǝaysa deɣ inn-as: «Ǝggəyyey əsilakanax-ak as: Wər t-illa awedan ifrâgan anay ən Taɣmar ta n Məššina ar s ad ilas təhəwt.»

4 Issəstan-tu Nikodemos inn-as: «Mas z'iləs awedan waššaran təhəwt? Ši təgat da wər ifreg ad iləs tewaɣlay ən tədist n anna-net.»

5 Inn-as Ǝaysa: «Ǝggəyyey əsilakanax-ak as: awedan wər ifreg iguz ən Taɣmar ta n Məššina ar s ad ihəw s aman d Infas wa Zəddigan.

6 Ǝləsəl n aggadəm iyyan aggadəm, amaran awedan wa d-igmadan Infas wa Zəddigan, Infas wa Zəddigan a daɣ-as innodan.

7 Daɣ adi a dak-wər-iqqən eɣaf as dak-ənnex: Iwâr-kawan ad tələsam təhəwt.

8 Adu iggâr sas ira, təsalla y əməsli-net, mišan wər təssena da d-ifal wala dad ikka. Samal di da a iha awedan wa ihəwan s Infas wa Zəddigan.»

⁹ Issəstan-tu Nikodemos inn-as: «Məni tat təməwit tas z'agin aratan win di?»

¹⁰ Ijjəwwab-as Ƴaysa inn-as: «TəmosaƷ əmusan zəwwəran daƷ Israyil eges wər təssenəƷ aratan win!

¹¹ ƏggəyyeƷ əsilakanəƷ-ak as: Nətamagrad s awa nəssan, nətagayyat deƷ fəl awa nənay, eges tugayam s ad təqbəlam təgəyya-nana.

¹² Dad wər təzzəgzanam s awa dawan-ganna s əddənet mas za təzzəgzənam awa dawan-ganna s alaxirat?

¹³ Wər t-illa is kala ad inay ijənnawan, ar nak Ag Aggadəm a tan-d-igmadan.

¹⁴ Əmmək was issərgag ənnəbi Musa taşşolt fəl əgət daƷ taneray, əmmək wen daƷ as kundaba tawasahake nak Ag Aggadəm,

¹⁵ fəl ad iqqəl as i sər-i izzəgzanan, ad igrəw təməddurt ta təƷlalət.

¹⁶ Fəlas, Məşşina awa iga y əddənet daƷ tara ikfa Barar-net a n iyyanda fəl ad iqqəl as i sər-əs izzəgzanan wər z'ihlək, kalar ad igrəw təməddurt ta təƷlalət.

¹⁷ Məşşina wər d-issoka Barar-net əddənet fəl a tat-ihlək kalar issok-as-tat-du fəl a sər-əs tafsu.

¹⁸ I sər-əs izzəgzanan wər ihlek, mişan wa sər-əs wər nəzzəgzan ihlāk fəlas wər izzəgzan s esəm ən Barar a n iyyanda ən Məşşina.

¹⁹ Əddəlil da wa d-ewayan ahluk: Ənnur a d-osan əddənet, mişan əssofan-tu aytedan şiyay id arak mazalan a taggin.

²⁰ Amaran i itaggan təkma wədi oglaf ənnur, wər t-id-z-akku fəlas iksud ad nəfiləlan arak mazalan-net ezal a mallan.

²¹ Mişan wa itaggan arat wa imosan tidət, wədi itakka-du ənnur, fəl ad itəwənəy as əmazal-net issind-ay daƷ ləkkum i Məşşina.»

Ƴaysa əd Yaxya wa isalmaƷan daƷ aman

²² Dəffər awen ikka Ƴaysa əd nəttulab-net amadal ən Yahudəyya. Iqqim daƷ-as har iga arat n azzaman ənta dər-san, isalmaƷ Ƴaysa aytedan daƷ aman.

²³ Yaxya ənta da isalmaƷ aytedan daƷ aman daƷ təsəssəngəyt ta n Aynon, dagma ən Salim, fəlas əllan-tu aman den aggotnen. Tasin-t-idu aytedan isalmaƷ-qan.

²⁴ Arat wa as itaggu Yaxya harwa da wər iggez kasaw.

²⁵ Tənkar təmazaq gər nəttulab ən Yaxya d iyyan daƷ Kəl-Əlyəhud, daƷ batu ən təməwiten şin as itaggu zazdag.

²⁶ Ekkan Yaxya ənnan-as: «Əşşex-nana, təkittəwa aləs wa dər təddewa fəl afay ən Yordan wen sen, s ənta as dana-təmməgrada? Tahannaya! Əmərədda isalmağ aytedan dağ aman amaran ketnasan takkin-tu!»

²⁷ Inn-asan Yaxya: «Awedan wər z'igrəw ar awa t-ikfa Məşşina.

²⁸ Kawanay iman-nawan təggəyyem-i as ənnəx: "Wər əmosax Əlməsix, ətəwəzəmizal ɣas a d-əge dat-əs."

²⁹ Əmazlay da ilan təmazlayt, amaran əmidi-net wa n ənafliş-net, ənta a innəttafan əd zəzlay, issigad den da iqqâl-as. As isla y əməsli n əmazlay igmây-du təmazlayt, ad aknu tədəwit. Tədəwit tədi za ənta a əgeɣ, amaran əmərədda tənda.

³⁰ Ittəyet ətəwəsəɣmar-net ifnəz wa-nin.

³¹ Wa d-igmadan afalla, ənta a idkalan dənnəg awedan kul, wa ihan əddənet in əddənet amaran aratan n əddənet as itamagrad. Wa d-igmadan ijənnawan, idkâl dənnəg awedan kul,

³² iggəyyat s awa inay d awas isla mişan wər t-illa i iqbâlan təgəyya-net.

³³ Wa iqbalan təgəyya-net, isilakan awa inna Məşşina,

³⁴ fəlas wa d-izammazal Məşşina, awal ən Məşşina a immal, id Məşşina a das-igan y Infas wa Zəddigan tehakkay wər nəla əddukad.

³⁵ Abba ira Barar-net amaran aratan kul ig-en dağ əfus-net.

³⁶ Wa izzəgzanan əs Barar ən Məşşina wədi igraw təməddurt ta təylâlat, amaran wa ugayan s a sər-əs izzəgzən wədi eway-du əs man-net alham ən Məşşina.»

4

Yaysa əd təntut ən Kəl-Samarəya

¹⁻³ Eşlan Farisaytan as itawannu Yaysa igarraw inəttulab ogarnen win Yaxya isalmaq-ğan dağ aman. (Arat wa imosan tidət as Yaysa iman-net wər isəlmiɣ awedan waliyyan dağ aman, inəttulab-net a salmaɣnen aytedan dağ aman.) As isla Yaysa y awa itaqqalan, igmad amaɖal wa n Yahudəyya, iqqal Galilaya.

⁴ Dad t-ilzam imur n amaɖal wa n Samarəya,

⁵ išşokal har ewad ayrəm iyyan ən Samarəya igân esəm Şixar, dagma ən tawagost ta ikfa Yaqub barar-net Yusəf.

⁶ Edag wen ənta a iha əɣarus ən Yaqub. As t-id-ewad Yaysa, iddâz əşikəl, təzzar iqqim fəl əmi n əɣarus, itaggu awen ammasnazal.

7-8 As ækkan nøttulab-net aȝrəm y ad d-azzanzin imensewan, təwar-du təntut ən Kəl-Samarəya a du-təzrâgat anu en. Inn-as Ȝaysa: «Šašw-i-du.»

9 Tənn-as: «Kay təmosaȝ iyyan daȝ Kəl-Əlyəhud təgammaya daȝ-i aman, nak təmosat iyyat daȝ Kəl-Samarəya?»

10 Inn-as Ȝaysa: «Ənnar təssânaȝ arat wa ihakku Məššina, təssânaȝ deȝ awa əmosa nak wa kam-itansayan aman ən tassay, tansiyax-i-tan kam, akfaȝ-am-tan deȝ əmosan win sidurnen.»

11 Tənn-as təntut: «Əššex-in, anu i zagren amaran kay wər tələȝ aga, daȝ adi məni du-za-təgrəwax aman win sidurnen di?»

12 Šigrat a təgeȝ əmaraw-nana Yaqub a danax-ikfan anu a, išwa aman-net, əšwan-tan maddanəs d aharay-net?»

13 Inn-as Ȝaysa: «I išwan aman di, ad t-iləs fad iguz,

14 mišan i išwan aman win tu-z-akfa wədi immizzay əd fad, fəlas a daȝ-as əqqəlan adri ingayan s aman win hakkinen təməddurt ta təxlalat.»

15 Tənn-as təntut: «Šašw-i-du daȝ aman win di, fəl a di-igməd fad, ammazzaya d azarog n anu a.»

16 «Aglu», inn-as Ȝaysa. «Aȝra-du aləs-nam təqqəlay-i-du da da.»

17 Tənn-as: «Wər ələȝ aləs.» Inn-as Ȝaysa: «Tidət-nam as tənne wər tələȝ aləs,

18 fəlas səmmos as kala tan-təle, amaran wa ȝur tələȝ əmərədda wərgəȝ aləs-nam. Tidət a di-təge.»

19 Təzzar tənn-as: «Əhannayaȝ as kay ənnəbi a təmosa.

20 Imarwan-nana adȝax a da a fəl əȝbadan Məššina, mišan kawanay Kəl-Əlyəhud tənnam Yerusalām a iha adag wa daȝ itawaȝbad Məššina.»

21 «Təntut», inn-as Ȝaysa, «Zəgzən-i, alwaȝ izay-du a daȝ wər za təȝabbadam Abba gər za fəl ədȝax wa, wala deȝ Yerusalām.

22 Kawanay Kəl-Samarəya wər təzdayam wa təȝbadam, nakkanay Kəl-Əlyəhud nəzdây wa nəȝbad, fəlas efsan iguz wa n Kəl-Əlyəhud a d-əgan.

23 Mišan alwaȝ izay-du – amaran osa-du – was inaybidan win tidət ad əȝbədān Abba s Infas wa Zəddigan əd tidət, fəlas Abba inaybidan win t-əȝbadnen əs təməwit tədi, əntanay a ira.

24 Məššina Infas wa Zəddigan a imos, amaran inaybidan-net ilzām-tan ad t-əȝbədān s Infas wa Zəddigan əd tidət.»

25 Tənn-as təntut: «Əssânaȝ as Əlməsix, itawann-as Kristos, a d-asu. As d-osa a danax-isassagru aratan kul.»

²⁶ Inn-as Ҷaysa: «Nak a t-imosan, nak wa dam-iššewalan da.»

²⁷ Assayāt ten da a d-əqqalan nəttulab, iqqan-asan eḡaf əməšiwāl wa iga Ҷaysa əd təntut. Mišan wər tan-iha i ihalan ad t-issəstən, ann-as: «Ma daḡ-as tare?» Madəḡ: «Mas dər-əs təmašawala?»

²⁸ Təzzar toyya-du təntut ətəkin-net təqqal aḡrəm tənna y aytedan:

²⁹ «Ayewat ad tənəyam awedan a di-imâlan arat kul was kala ad t-əge, ifrâḡ as ənta a imosan Ǝlməsix!»

³⁰ Təzzar əḡmadan-du aytedan aḡrəm əkkan Ҷaysa.

³¹ As itaggu awen inəttulab gammayan daḡ Ҷaysa ad atšu, gannan-as: «Ǝššəx, atšu arat iyyan.»

³² Inn-asan: «Imensewan win z'atša wər tan-təzdayam.»

³³ Ad tənəmännin nəttulab gar-essan: «Ǝḡəm ḡas wərgəḡ awedan iyyan a das-d-ewayan imensewan?»

³⁴ Inn-asan Ҷaysa: «Imensewan-in wər tan-imos ar ad ammazala tara ən wa di-d-izammazalan, aḡrədaḡ əššəḡəl wa daḡ-i iga.

³⁵ Awak kawanay wər təḡənnim: "Ǝqqimnat-in əkkozat təlil y ad tagu ḡarat?" Nak za ənneḡ-awan akniwat əzəḡḡəzdi ən təwəḡas ad tənəyam as šiḡaḡanen əḡḡanat, wər ərenat ar əmiləy.

³⁶ Awedan wa italayan, wədi igraw ərruzmatan-net. Šiḡaḡanen šin təməddurt ta təḡlalāt a išadaw, fəl ad ajjayat wa inabbalan əd wa italayan tədəwit.

³⁷ Fəlas tidət ən təmajəq ta tənnat: "Aləs iyyan inabbal, iyyan italay."

³⁸ Ǝssəḡlaq-qawan fəl ad taləyam tawagost a daḡ wər təšḡelam, aytedan wiyyad a daḡ-as əšḡalnen, mišan təḡrawam tənfa daḡ əššəḡəl wa əḡan den.»

³⁹ Ǝzzəḡzanan aytedan aggotnen ən Kəl-Samarəya əs Ҷaysa fəlas tantut a dasan-tənnat: «Imâl-i aratan win as kala tan-əge.»

⁴⁰ Awen da a fəlas osan-t-idu ḡas əḡmayan daḡ-as a ḡur-san aqqam. Iqqim ḡur-san Ҷaysa har iga əššin adan.

⁴¹ Ǝslan aytedan y awal-net, əzzəḡzanan sər-əs wiyyad oḡarnen winad igət.

⁴² Təzzar ənnan i təntut: «Nakkanay səket nəkna əzəḡzan fəlas əstizarat kam ḡas a danaḡ-igan isalan, əmərədda iman-nana as das-nəsla, amaran nəssân as tidət as ənta a imosan Ǝnəssefsi n əddənet.»

Təməzzəyt ən barar n amaššəḡəl n əmənokāl ən Kafar-nahum

⁴³ As əndan əşšin adan win den, ikka Ƴaysa amaḍal ən Galilaya,

⁴⁴ fəlas ənta iman-net as inna, ənnəbi wər itəwəsəxm̄ir daḡ aḡrəm wa daḡ idwal.

⁴⁵ As din-osa Galilaya əqbalan-tu Kəl-Galilaya id ənâyan imazalan kul win iga daḡ Yerusalam ḡur əmud wa n Akkay fəlas əntanay da osân-in amud en.

⁴⁶ İlas-du Ƴaysa assa ən təḡrəmt ən Kâna ta n Galilaya, ta daḡ isammattay aman ig-en esmad n alḡanab. İll-ay aləs imosan amaşşaxal n əmənokal daḡ təḡrəmt ən Kafarnahum. Aləs a ila barar-net irinan.

⁴⁷ As isla as Ƴaysa igmâd-du amaḍal ən Yahudəyya iha Galilaya, os-ay-du onsay-tu ad idawan, a das-izzuzəy barar-net a ḡur təlla təmattant.

⁴⁸ Inn-as Ƴaysa: «As wərgəḡ ad tənâyam alḡalamaten əmmittaynen əd təlməḡujaten, wər za təzzəgzənam fadda.»

⁴⁹ Inn-as amaşşaxal n əmənokal: «Əməli, ərəs-anax əs Kafarnahum tarmad harwa ad wər aba barar-in.»

⁵⁰ Inn-as Ƴaysa: «Aglu, barar-nak izzay.» Aləs deḡ izzəgzan s awal ən Ƴaysa, igla.

⁵¹ İha tarrayt iqqâl as immənay əd maşşaxalan-net das-d-əlkamnen. Ənnan-as: «Barar-nak izzay.»

⁵² İssəstan-tan inn-asan: «Ma imos alwaḡ wa daḡ igraw iman-net?» Ənnan-as: «Əndazəl iggi ən tazzar a fall-as təwat tanaday.»

⁵³ İkta-du aləs as alwaḡ wen da iman-net a daḡ-as inna Ƴaysa: «Barar-nak izzay.» İzzəgzan sər-əs ənta d aḡaywan-net kul.

⁵⁴ Ənta da da təlməḡujat təmosat alḡalamat ta n sanatat immozal Ƴaysa daḡ Galilaya dəffər agamad-net Yahudəyya.

5

Təməzzəyt n anabdon

¹ Dəffər adi ewad-du əmud iyyan ən Kəl-Əlyəhud, təzzar ikka Ƴaysa Yerusalam.

² Aḡrəm wa n Yerusalam təh-ay təḡazart təhozat edag was itawannu təsəhərt ta n Ayfəd. Təḡazart ta esəm-net Betsada, daḡ təḡibrit, amaran təlla gər səmmosat taliwen.

³ Taliwen šin əsrâdan daw-əsnat miranan əgânen daḡ məddəḡxal, əd məggudal, əd nəbdan. Əssigadan y ad əggəzan aman šin əmətəkwəy,

⁴ fəlas immal-tu alwaḡ a daḡ d-itazabbat angalos iyyan n Əməli ijənnəjərwəy aman ən təḡazart ten. Əmiran kul wa azzaran iguz-net dəffər ənəjərwəy wa təga da, wədi ad izzəy daḡ təwərna ta tu-təḡrawat, a təqqal.

⁵ Edag en ih-ay aləs igân karadat tēmərwen n awatay d əttaṁ irin.

⁶ Ogg-ay Ƴaysa isrâd, amaran issan as iga təwərna tərəwat, issəstan-tu inn-as: «Awak tere tēməzzəyt?»

⁷ Inn-as əmiran wa: «Əššex, nak wər əley awedan a di-igan daḡ təḡazart ta daḡ amazay wa daḡ tinəjərwəyan aman-net, amaran id əgmaya d iguz-net, a di-izar sər-əs awedan iyyan.»

⁸ Inn-as Ƴaysa: «Əbdəd, tədkəla təssut-nak təjəwənke»

⁹ Izzay aləs wen daḡ tamazayt ten da, idkal təssut-net ijawankat.

Ənta arat wa itaggu daḡ əzəl ən təsanfawt ən Kəl-Əlyəhud.

¹⁰ Ənnan muzaran ən Kəl-Əlyəhud y aləs wa izzayan da: «Kay ak masnat a wər təgeḡ as azalada əzəl ən təsanfawt a daḡ-ak wər xalal aggay ən təsalat-nak?»

¹¹ Eges ya inn-asan aləs wen: «Aləs wa di-izzozayan, ənta a di-innan: "Ədkəl təsalat-nak təjəwənke".»

¹² Ənnan-as: «Ma imos za aləs wa dak-innan: "Ədkəl təsalat-nak təjəwənke"?»

¹³ Ənta aləs wa izzayan da, wər t-əhen salan n awa imos awedan wa t-izzozayan den, fəlas aytedan əknanen igət a əhanen edag wa daq-q izzozay Ƴaysa den, iras-tan Ƴaysa, ijawankat.

¹⁴ Dəffər awen ogaz-t-in Ƴaysa daḡ Ahan wa Zəwwəran n Əlyibada inn-as: «Səsəm. Kay da izzayan da əmərədda. Əḡrəd d igi ən bakkadan, a kay wər igrəw arat ogaran wanad tallabəst.»

¹⁵ Ijawankat aləs wen təzzar imal i muzaran ən Kəl-Əlyəhud as Ƴaysa a t-izzozayan.

¹⁶ Arat wa eway-du sər-san as əknan gezzar ən Ƴaysa fəlas əzəl ən təsanfawt a daḡ iga awen.

¹⁷ Mišan inn-asan Ƴaysa: «Abba-nin faw da išḡâl, daḡ adi nak da əšḡâla.»

¹⁸ Batu ta, teway-du əs muzaran ən Kəl-Əlyəhud as əššotan daḡ agamay ən tanaḡay ən Ƴaysa, fəlas wərgəḡ əlqanun n əzəl wa n təsanfawt ḡas a imməzray, kalar iššota-du fall-as as inna imos Məššina abba-net. Daḡ adi išaššagda iman-net əd Məššina.

Tanaya ən Ƴaysa

¹⁹ Inn-asan Ƴaysa: «Əggəyyəḡ əsilakanax-awan as Barar wər ifreg igi n arat waliyyan gar-es əd man-net. Wər itəggu ar arat was ihannay Abba-net itagg-ay. Amaran arat kul wa itaggu Abba, Barar da itagg-ay s asaway wen da.

20 Fəlas Abba ira Barar, amaran isakn-ay arat kul wa itaggu; ad t-assaknu aratan ogarnen win da təla n almayna y a tan-agu, fəl ad taxjim.

21 Emmək wa daɣ-as d-isankar Abba inəmməttan itaggu daɣ-san iman, əmmək wədi da as ihakku Barar ənta da təməddurt i was tat-ira.

22 Wa dəffər adi as Abba wər ixəkkəm y awedan waliyyan, kalar əşşərixa kul ig-ay daɣ əfus ən Barar

23 fəl ad əzzəzwəran aytedan kul Barar s əmmək was əzzəzwəran Abba. Awedan kul wa wər nəzzəzwar Barar, wədi wər izzəzwar Abba wa t-id-izammazalan.»

24 «Əggəyyeɣ əsilakanax-awan as awedan kul wa issəsaman i batuten-in, izzəgzan əs wa di-d-izammazalan, wədi igrâw təməddurt ta təɣlalət. Wər z'awwaddab, kalar təmattant a d-igməd əs təməddurt.»

25 «Əggəyyeɣ əsilakanax-awan as izay-du alwaq – s ənta da da nəha da əmərədda – as aytedan win sər-i wər nəzzəgzan ad aslin y əməsli ən Barar ən Məşşina, amaran win das-əslanen əkkəwanan-as ad əgrəwan təməddurt ta təɣlalət.

26 Fəlas əmmək wa daɣ as ihakku Abba təməddurt, əmmək wədi daɣ as ikfa Barar fərregat n a tat-ihakku ənta da.

27 Ikf-i deɣ turagat n əşşərixa y aytedan, fəlas nak Ag Aggadəm a mosa.

28 Ad wər əqqənan ɣafawan-nawan y arat wa: ilkâm a d-awəd alwaq a daɣ z'aslin nəmməttan kul daɣ zəkwan-nasan, y əməsli-nin nak Ag Aggadəm

29 əgmədan-du izəkwan-nasan əddi da. Win əganen aratan olaxnen, a d-əgmədan izəkwan y a d-ənkəran daɣ təmattant əgrəwan təməddurt, win əganen təkma amaran a d-əgmədan izəkwan y ad awwaddaban.

30 Wər t-illa arat as əfragay igi-net gər-i əd man-in. Əşşərixa wa tagga, əlkama daɣ-as y awa di-igannu Məşşina, amaran əşşərixa-nin oɣâd, fəlas wər əlkema y arat wa əre nak iman-in, kalar arat wa ira wa di-d-izammazalan as əlkama.»

Şigəyyawen ən Ƴaysa

31 «As imos as nak ɣas-in as əggəyyeɣ i man-in, wədi təgəyya-nin wər təmos tidət.

32 Illat-tu wa di-imosan iyyat təgəyya, amaran əssânaɣ as arat wa igannu daɣ talxa-nin, tidət a imos.

33 Təssəglam inammazalan əs Yaxya, iggəyyat-asan fəl arat wa imosan tidət.

34 Nak wər əddəraray əs təgəyya n awedan. Arat wa, wər tu-gənnay ar fəl ad təgrəwam təsureft.

³⁵ Yaxya zun fətəla tərɣât təbilazlaz a imos, amaran təqbalam ad tagim arat n assaxat ən tədəwit dəx ənnur-net.

³⁶ Nak amaran əle təgəyya togarat ta n Yaxya assahat: Əşşəxəlan win tagga, a tan-imosan win as di-issəwar Abba igi-nasan, əntanay a əmosnen təgəyya-nin, sitaddan as Abba di-d-izammazalan.

³⁷ Abba iman-net s ənta a di-d-izammazalan, ənta da iggiyyat-i. Wər kala ad təslam y əməsli-net wala dəx tənâyam azzat-net.

³⁸ Amaran wər iha awal-net iwallan-nawan, arat wədi isitadd-ay iba n əzəgzan-nawan əs wa d-izammazal.

³⁹ Tətaggam y Awal ən Məşşina təxaray təgat s ənnəzər fəlas təxilam a sər-əs təgrəwam təməddurt ta təxlalat. Awal wa təxarrim da, ənta iman-net as fall-i iggəyyat,

⁴⁰ eges wər tərəm a di-du-takkim y ad təgrəwam təməddurt.»

⁴¹ «Nak wər gəmməyax ətəwəsəxmar xur aytedan.

⁴² Əzdâyaq-qawan: əssânaɣ as iman-nawan wər tan-təha tara i Məşşina.

⁴³ Nak Abba-nin a di-d-issəglañ mişan wər tərəm əlqəbulat-in. Amaran as kawan d-osa awedan iyyan a d-iglañ gar-es əd man-net, a tu-təqbəlam!

⁴⁴ Tərâm ad tətinəməsəxmiram gar-ewwan, eges wər tərəm saɣmar wa d-ifalan Məşşina di n iyyan. Dəx adi manəmmək as za təzzəgzənam?

⁴⁵ Ad wər təxilam a kawan-əssəwəra lahan xur Abba-nin. Ənnəbi Musa ənta kawan z'issəwəran lahan, ənta wa dəx təgam attama-nawan.

⁴⁶ Ənnar təzzigzanam əs Musa, təzzəgzənam sər-i nak da, fəlas immigrad sər-i dəx Əlkəttaban-net.

⁴⁷ Mişan dad imos as wər təzzəgzənam s Əlkəttaban-net, manəmmək as za təzzəgzənam awa ganna?»

6

Əsətši wa iga Ƴaysa i səmmos gim n aləs

¹ Dəffər adi ikka Ƴaysa təgadamayt ta hadat n agaraw wa n Galilaya, itâwann-as dəx agaraw wa n Tiberəyad.

² Təlkâm-as tamattay tagget, fəlas əhannayan aytedan aɣalamaten šin as itamazal əmosnen əmmək was izuzəy imiranan.

³ Iggəzzay Ƴaysa adɣax, təzzar iqqim den da ənta əd nəttulab-net.

⁴ As itaggu awen amud wa n Akkay ihoz-du.

⁵ Iswad Ƴaysa inay tamattay tagget tēzây-t-idu, inna i Filibus: «Mēni du-za-nazzanzu tagella ətšan aytedan en kul?»

⁶ Ēsəstan wa as t-iga Ƴaysa da issân arat was otas igi-net. A ira Ƴas ad issən awa das-z-annu Filibus.

⁷ Inna Filibus i Ƴaysa: «Kud du-nəzzənza tagella ən sanatāt tēmad ən tafelt, almaƳna alxaq ən sanatāt tēmad n əzəl n əššəxəl, da wər dasan-təkna arat.»

⁸ Inn-as ənattalib-net igân Andrawəs wa n amadray ən SimƳon Butros:

⁹ «Illa barar da ilân səmmosat təgəlwen n əššəxir d əššin kifitan, mišan ya ma za aknin y aytedan ogdânen d awa?»

¹⁰ Inna Ƴaysa: «SaƳƳamiwat tamattay kul.» Təzzar əqqiman aytedan kul daƳ yel aggen illân den. Səmmos gim n aləs a əhanen tamattay en.

¹¹ Idkal-du Ƴaysa šigəlwen šin den. As iga igodan i Məššina, izun-tanat i tamattay. Iga awen da i kifitan. Igraw awedan kul awa das-igdan.

¹² As əyyəwanan aytedan inna Ƴaysa i nəttulab-net: «Šidəwat-du ikarammutan win du-tawaglaznen, fəl a daƳ-as wər iƳšəd wala.»

¹³ ĒƳradan-du əkəmmi ən karammutan win d-əglazan aytedan daƳ təgəlwen n əššəxir šinad ən səmmosat a. Maraw əzmaman d əššin a d-ədnayan daƳ gəlzan en.

¹⁴ As ənayan aytedan win alƳalamat tas immozal Ƴaysa da, ad gannin: «Igmâd aššak as aləs wa ənta a imosan ənnəbi wa du-z-asin əddənet!»

¹⁵ Issan Ƴaysa as aytedan win abbaz a tu-z-agin šəhhəšəlan-tu tišit n əmənokal, ilas-tan efel, ikka edag iyyan daƳ ədƳaƳ en da, Ƴas-net.

Ējəwənkī wa iga Ƴaysa fəl aman

¹⁶ As təga takəst zagadayan nəttulab-net s agaraw,

¹⁷ əggazan aƳlal əssəwalan agaraw y ad əƳrəsən əs taƳrəmt ta n Kafarnahum. Itaggu awen ehad, Ƴaysa amaran wər tan-in-ewed harwa da.

¹⁸ Igar-du ađu issohen ad tanastaban aman n agaraw.

¹⁹ As əgan nəttulab ən Ƴaysa edag ən səmmos kilawtan madeƳ sədis n əšikəl, oggan Ƴaysa daƳ ihəz ijiwankat-du fəl aman izay-du aƳlal wa han, təzzar təggaz-tan tasa.

²⁰ Mišan inn-asan Ƴaysa: «Təgmədet-kawan tasa, nak awa!»

²¹ Gammayan d a t-id-əzzugəzan aƳlal den da, as dər-san ewad əƳlal edag wa əkkan.

Ƴaysa a imosan amensay wa ihakkin təməddurt

22 As əzəl wa hadan təgr-in tamattay ta təwarat efay n agaraw wen sen as aylal iyyanda xas a illan den əndazəl, amaran əssanan as Yaysa wər inamaggaz aylal wa əd nəttulab-net. Əssânan ənta da as inəttulab-net xas-nasan as əqlan.

23 Ənzayan-du wiyyad a d-əfalnen axtəm ən Tiberəyad. Osan-du dagma n adag wa daɣ tətša tamattay tagəlla dəffər godan win iga Yaysa y Əməli.

24 As tənay tamattay as Yaysa wər illa den ənta wala inəttulab-net, təggaz ixlalan win den əgmayan Yaysa əs Kafarnahum.

25 Osan-t-in fəl afay n agaraw wa hadan, təzzar ənnan-as: «Ya Əššex, Əmmay du-tose da?»

26 Ig-asan Yaysa aljawab wa, inna: «Əggəyye silakanax-awan as wər di-təsəggədəm ar fəl as tətšam tagəlla har daɣ-as təyyəwanam, wərgex aššaddat n əgərri n almayna n alxalamaten šin əmmozaala a fəl di-təlkamam.

27 Ayyat əššəxəl daɣ agamay ən mensewan win xaššadnen, gammayat imensewan win wər nəxəššəd, hakkin təməddurt ta təxlalat. Imensewan win nak Ag Aggadəm a dawan-tan-z-akfin fəlas nak a issəwar Məššina di n Abba ejwal wa n taɣmar-net.»

28 Əssəstanan-tu ənnan-as: «Məni za arat was danax-iwar a tu-nagu y ad naknu əššəxələn win ira Məššina?»

29 Ijəwwab-asan Yaysa inn-asan: «Əššəxəl wa daɣ-wan ira Məššina, wər t-imos ar ad təzzəgzənam əs wa d-issəgla.»

30 Əlasan-tu əsəstan ənnan-as: «Ma təmos za alxalamat ta dana-za-tammazala fəl a sər-ək nəzzəgzən? Ma za taga?»

31 İmarawan-nanax ətšan daɣ taneray amensay wa n Manna. Ənta da awa ənnan Əlkəttaban daɣ batu tədi: "İššəts-en amensay wa d-ifalan ijənnawan."»

32 Inn-asan Yaysa: «Əggəyyeyx silakanax-awan as wərgə ənnəbi Musa a kawan-ikfan amensay wa d-ifalan ijənnawan. Abba-nin ənta kawan-ikfan amensay wa d-ifalan ijənnawan, imos amensay wa n tidət.

33 Fəlas amensay wa d-ifalan Məššina ənta a d-igmadan ijənnawan, amaran ənta a ihakkin təməddurt y əddənət.»

34 Ənnan-as: «Əməli, amensay wədi hakk-anaq-qu faw.»

35 Inn-asan Yaysa: «Nak a imosan amensay wa ihakkin təməddurt ta təxlalat. Wa di-d-ikkan wər das-ilkem ad t-iggaz gələk, amaran wa sər-i izzəgzənan wər daɣ-as ilkem ad t-iggaz fad.

36 Mišan ənnəx-awan: tənayam-i eges wər təzzəgzənam.

³⁷ Awedan kul wa di-ikfa Abba a di-d-asu, amaran wər za mələlləya fəl i di-d-ikkan,

³⁸ fəlas əzəbbi a d-əge dəy ijənnawan fəl ad ammazala s arat wa ira wa di-d-issəqlan, wərgəy arat wa əre nak iman-in.

³⁹ Ənta wa di-d-izammazalan wər ira ad ixrək awedan waliyyan dəy win di-ikfa, kalar a ira a tan-d-əssənkəra dəy təmattant əzəl a ilkaman.

⁴⁰ Awalla, ənta da awa ira Abba-nin: Aytedan kul win di-ənaynen nak Barar-net, əzzəgzanan sər-i, əntanay a z'əgrəwnen təməddurt ta təylalat, əssənkəraq-qan-du dəy təmattant, əzəl wa ilkaman.»

⁴¹ Təzzar ad tigətəntinan Kəl-Əlyəhud əhân batu-net fəl as inna: «Nak a imosan amensay wa d-igmadan jənnawan.»

⁴² Gannin: «Awak awen wərgə Yaysa wa n ag Yusəf, nəkna təməzdəyt n abba-net d anna-net, manəmmək as du-z-inkər əmərədda ad igannu ijənnawan a d-igmad?»

⁴³ Ijəwwab-asan Yaysa inn-asan: «Ayyiwat əgətəntən gar-ewwan.

⁴⁴ Wər t-illa i di-du-z-akkin ar s a t-id-ewây sər-i Abba a di-d-issəqlan, nak amaran əssənkəraq-q-idu dəy təmattant əzəl wa ilkaman.

⁴⁵ Əlkəttabañ n ənnəbitan ih-en as: "*Ketnasan a tan-issaxru Məşşina.*"

Awedan kul wa islan y Abba, iqbal əsəssəyri-net wədi a di-d-akku.

⁴⁶ Wər t-illa is kala ad inay Məşşina di n Abba ar wa t-id-ifalan. Ənta ɣas a t-inayan.

⁴⁷ Əggəyyey əsilakanax-awan as i izzəgzanan ad igrəw təməddurt ta təylalat.

⁴⁸ Nak a imosan amensay wa ihakkin təməddurt.

⁴⁹ İmarawan-nawan ətşan Manna dəy taneray mişan wər dasan-igdel awen təmattant.

⁵⁰ As iga awen amensay was ganna nak, ijənnawan a dəy d-igmad. I t-itşan wər tu-z-iba.

⁵¹ Nak a imosan amensay wa d-igmadan jənnawan ihakku təməddurt. Awedan kul wa itşan amensay wa ad iddər har faw. Amaran təxəssa-nin a təmosat imensewan win z'akfa fəl ad təgrəw əddənet təməddurt.»

⁵² Tənkər tamazaq təsohet gər Kəl-Əlyəhud ad gannan: «Manəmmək as dana-z-akfu awedan wa təxəssa-net natş-et?»

⁵³ Təzzar inn-asan Yaysa: «Awalla, əggəyyey əsilakanax-awan əs as wər tətşem təxəssa-nin nak Ag Aggadəm, taşwim dey azni-nin, wər dawan-tu-təlla təməddurt ta təylalat.

⁵⁴ Awedan wa itšan taḡəssa-nin išwa ənta da azni-nin, wədi igrâw tēməddurt ta təḡlalat, əssənkəraq-q-idu dəḡ dəḡ tēmattant əzəl a ilkaman.

⁵⁵ Fəlas taḡəssa-nin amensay wa n tidət a təmos, azni-nin dəḡ aman ən tassay win tidət a imos.

⁵⁶ Awedan wa itšan taḡəssa-nin, išwa dəḡ azni-nin, wədi irtay dər-i, nak dəḡ əheḡ əwəl-net.

⁵⁷ Abba wa di-d-izammazalan ənta ḡur təlla tēməddurt, amaran ənta a di-tat-ikfan, dəḡ adi wa itšan taḡəssa-nin ad t-əssudəra nak da.

⁵⁸ Ənta əddi da amensay wa d-igmadan ijənnawan. Wər ola əd wa ətšan marawan-nawan fəlas wər dasan-igdel adi tēmattant. Awedan wa t-itšan, wədi ad igrəw tēməddurt ta təḡlalat.»

⁵⁹ Arat da da wa inna ḡaysa dəḡ ahan n əlyibada ən Kəl-Əlyəhud dəḡ əḡrəm wa n Kafarnahum.

Efel wa əgan aytedan wiyyad dəffər ḡaysa, əlkaman-as wiyyad

⁶⁰ As əslan nəttulab-net aggotnen y arat wa inna da, ənnan: «Batu ta ši labasat, izzəwat əzəḡzan-net. Ma ifragan əlqəbulat-net?»

⁶¹ Issan ḡaysa dəḡ man-net as gitantanan nəttulab-net gar-essan dəḡ talḡa ten, inn-asan: «Əngəm əzəḡzan-nawan a tədas batu di?»

⁶² Ma za tagim za as di-toggam nak Ag Aggadəm tagazzaya s adag wa əheḡ əstizarat?»

⁶³ Infas wa Zəddigan a ihakkin tēməddurt. Awedan əs taḡəssa-net, wər imos wala. Awalan win dawan-əgeḡ, Infas a mosan, hakkin dəḡ tēməddurt.

⁶⁴ Mišan əhân-kawan aytedan wər nəzzəḡzan.» ḡaysa harwa ḡur tizarat da issân win wər nəzzəḡzan, issân dəḡ wa tu-z-agin dəḡ fassan.

⁶⁵ İlas inn-asan: «Adi da a fəl dawan-ənnə: "Wər t-illa i ifragan a di-d-akku ar s ad t-ikfa Abba fərregat n adi."»

⁶⁶ Den da dəffər-əs ifal a əggen dəḡ nəttulab-net, əḡradan əd tidawt-net.

⁶⁷ Təzzar inna ḡaysa i nəttulab win maraw d əššin: «Meqqal kawanay da təram teklay?»

⁶⁸ Inn-as Simḡon Butros: «Əməli, ma imos wa za nakku? Kay a itaggan awalan win əhakkanen tēməddurt ta təḡlalat.

⁶⁹ Nakkanay nəzzigzan sər-ək, nəssân as kay Əmizdag a d-ifâlan Məššina.»

⁷⁰ Inn-asan ḡaysa: «Ak wərgəḡ əsənnəfrən a kawan-əge ketnawan, fəl marawəwwan d əššin, kuddeḡ âs iyyan dəḡ-wan İblis.»

⁷¹ Batu ta Yahuza wa n ag Simyon Isxarəyuti a fəl tat-iga Ƴaysa. Fəlas Yahuza a tu-z-agin daƳ fassan kuddeƳ âs iyyan daƳ nəttulab win maraw d əššin a imos.

7

Əlməsix iha tarrayt əs Yerusalam

¹ Dəffər adi issəwəl Ƴaysa d akal ən Galilaya, fəlas wər ira əsəwəl ən wa n Yahudəyya, id imuzaran ən Kəl-Əlyəhud a gammaynen əd tanaxay-net.

² As itaggu awen əmud ən Kəl-Əlyəhud was itawannu wa n Təkarbanen ihoz-du.

³ Ənnan-as mədrayan-net: «Əfəl da takka akal wa n Yahudəyya fəl ad ənəyan nəttulab-nak əššəxəlan win tətəgga.

⁴ Awedan as ira fall-as tagu masnat wər işəqqəl daƳ əssir. Dad zama as tətəggaƳ aratan ogdanen d awa, wədi agu təməwit ta fəl tan-z-inəy awedan kul.»

⁵ As das-gannin mədrayan-net awen da wər sər-əs əzzəgzanan.

⁶ Inn-asan Ƴaysa: «Assaxat ta-nin harwa da wər du-tewed. Kawanay amaran wər təzlayam assaxaten.

⁷ Wər t-illa əddəlil a fəl kawan-za-təgzər əddənət. Nak amaran əddənət təgzâr-i fəlas təgəyya a əmosa y arak mazalan win daƳ-as tagginen.

⁸ Akkiwat amud wen kawanay. Nak wər t-əkke fəlas assaxat-in harwa da wər du-tewed.»

⁹ As dasan-ixrad tənna n aratan win, iqqim-du daƳ Galilaya.

¹⁰ Dər iga awen da ya as əkkan mədrayan-net amud, ikk-ay Ƴaysa ənta da, eges iki wa zun as iga daƳ əssir, fəlas wər issəkna iman-net y aytedan.

¹¹ Itaggu əmud den da gammayan-tu muzaran ən Kəl-Əlyəhud gannan: «Ma iga aləs a?»

¹² As itaggu awen tənkar təmazaq gər aytedan daƳ talxa ən Ƴaysa. Wiyyad za gannan: «Aləs di olâx.» Wiyyad amaran gannan: «Kalar əsəxrək fadda a itaggu tamattay.»

¹³ Mişan wər t-illa awedan ihalan amagrad dat aytedan daƳ talxa-net, fəl təksəda ən muzaran ən Kəl-Əlyəhud.

Assa ən Ƴaysa Ehan wa Zəwwəran n Əlyibada

¹⁴ As isaggaraygaray əmud ikka Ƴaysa Ehan wa Zəwwəran n Əlyibada a daƳ-as isasaxru.

¹⁵ Əsəssəxri wa iqqan ixafawan ən Kəl-Əlyəhud wəllen har əqqiman gannin: «Wa ak awedan ma t-issosanan aratan win, ənta wər ixra?»

16 Inn-asan Ҷaysa: «Ғсәссәғри-nin wәрge nak a d-ifal, kalar wa di-d-izammazalan a d-ifal.

17 Awedan kul wa iran ad ammazal tara әn Mәššina, wәdi ad issән kud әсәссәғри-nin әnta Mәššina a d-ifal wala deғ arat a imos a d-әnzama gәр-i әd man-in.

18 Awedan wa iššewalan s aratan a d-inzâm gar-es әd man-net, wәdi iman-net as igammay tanaya. Mišan awedan wa išḡalan daḡ әsәnnәfilәl әn tanaya әn wa t-id-izammazalan, wәdi tidәt a immal, wәр daḡ-as t-illa a imosan lahan.

19 Wәrgeḡ ikf-iwan әnnәbi Musa Ғlqanun? Wәр kawan-iha za i das-ilkâman. Mafel as tәram a di-tanḡim?»

20 Ennan-as aytedan: «Kay aggәsuf a kay-ihan. Ma iran tenaḡay-nak?»

21 Inn-asan Ҷaysa: «Nak tәlmәḡjujat iyyadda ḡas a әge daḡ әzәl әn tәsanfawt, mišan әqqanan-as ḡafawan-nawan.

22 Kawanay wәrgeḡ tәšaqqalam daḡ әzәl әn tәsanfawt fәlas bararan-nawan a daḡ-as tәsamankadam? Amaran wәр fall-awan imos awen lahan, fәlas әnnәbi Musa a dawan-t-innan – as iga awen imarawan-nana a t-id-әssәntanen, wәrge Musa.

23 Enәyat za, dad imos as itawasamankad barar daḡ әzәl әn tәsanfawt fәl lәkkum y әššәriḡa wa n әnnәbi Musa, mafel as kawan-iha alham-in fәlas әgeḡ y awedan әzuzәy ikmâlan daḡ әzәl әn tәsanfawt?

24 Ad wәр tәxakkamam awedan s azzahir-net. Kalar xakkamat әs tidәt.»

25 As t-oggan arat daḡ aytedan win Yerusalam ad gannin: «Awak alәs wen, wәrgeḡ әnta as әran muzaran-nana tenaḡay-net?

26 Amaran әnta den әmәрәdda iššewalan den dat awedan kul, wәр t-illa i das-igannin wala! Awak immikkan imuzaran-nanaḡ a sallakannen as әnta a imosan Ғlmәsix?

27 As iga awen da za alәs wa nәssân akal wa d-igmad, Ғlmәsix amaran assaḡa wa du-z-asu әnәfilal ḡas a du-z-аgu, wәр t-illa awedan a issânan da d-igmad.»

28 Harwa da isasaḡru Ҷaysa daḡ Ahan wa Zәwwәran n Ғlyibada as idkal әmәsli-net wәllen inna: «Tәzdâyam-i tәssânam sas d-әhe! As iga awen da ya wәр d-ose gәр-i әd man-in, kalar wa imosan tidәt a di-d-izammazalan; amaran wәр tu-tәzdayam.

29 Nak әzdayaq-qu, fәlas әnta sәр-wan d-әfala, amaran әnta di-d-izammazalan.»

30 Den da ad әgmayan muzaran әn tamattay d abbaz-net mišan wәр tan-iha i t-idasan, fәlas alwaq-net a du-wәрnewed harwa da.

³¹ Aytedan aggotnen a əzzəgzannen əs Ƴaysa daƳ tamattay en, gannin: «Tordâm as kud d-osa Ɣmæsix ifrâƳ əsəkni n alƳalamaten ogarnen ſin issəkna aləs wa?»

³² Arat wa simətəktikan aytedan daƳ tamattay ta, əslantu Farisaytan. Ɣnkaran limaman win zawwarnen, əd Farisaytan əssəƳlan-du imagazan n Ahan wa Zəwwəran n Ɣlyibada y ad abəzan Ƴaysa.

³³ Inn-asan Ƴaysa: «Nak ad agaƳ arat ən tamert əddəwa dər-wan, dəffər adi amaran ad z'akka wa di-d-izammazalan.

³⁴ A di-təƳməyam miſan wər di-za-təƳrəwam fəlas edag wa z'akka wər təfregam iki-net.»

³⁵ Ad tinəməsəstinan Kəl-Ɣlyəhud, gannin: «Ma imos za adag wa z'akku daƳ-qu wər za nəƳrəw? MeƳƳal Kəl-Ɣlyəhud win wazawaznen daƳ kallan win tama a z'akku iggəz-tan? MeƳ ak aytedan win wər nəmos Kəl-Ɣlyəhud a z'isasaƳru?

³⁶ Ma imos almaƳna ən batu ta iga da, as inna: "A di-təƳməyam miſan wər di-za-təƳrəwam, fəlas wər təfregam iki n adag wa z'akka"»?

Aman win sidurnen

³⁷ As d-ewad əzəl wa ilkaman n əmud wa n Təkarbanen, s ənta a imosan əzəl wa zəwwəran daƳ əmud en, ibdad Ƴaysa dat tamattay idkal əməsli-net inna: «Awedan kul wa iffudan akkiwet-i-du ad aſəw.

³⁸ Awedan kul wa sər-i izzəgzanan "ad əngəyan Ƴərwan n aman win sidurnen daƳ əwəl-net", s əmmək was iktab awen daƳ Ɣlkəttaban.»

³⁹ Batu ta iga Ƴaysa den, Infas wa Zəddigan a sər-əs issoka, a z'əƳrəwan aytedan win sər-əs əzzəgzannen. Ɣnta azzaman en Infas wa Zəddigan wər itawakfa harwa da fəlas Ƴaysa a wər nəggez tanaya-net.

Ɣməzzəy Ƴər aytedan

⁴⁰ As isla ades ən tamattay en i batuten ſin iga Ƴaysa da ənnan: «Illikan as aləs wa ənta a imosan Ɣnnəbi wa ittəmalan!»

⁴¹ Ɣnnan wiyyad: «Ɣmæsix awa!» Ɣnnan-asan wiyyad: «Manəmmək as du-z-igməd Ɣmæsix Galilaya?

⁴² Awak Ɣlkəttaban wərgəƳ a ənnan: "Ɣzzurrəyya ən Dawəd, əd təƳrəmt ən Betalxam s ənta as kala daƳ-as iƳsar Dawəd, a du-z-igməd Ɣmæsix."»

⁴³ Ɣmmək en daƳ as təmməzray tamattay daƳ talƳa ən Ƴaysa.

⁴⁴ Wiyyad daƳ-san ərân abbaz-net, miſan wər tan-iha is t-idas əfus-net.

⁴⁵ Eġlan magazan n Ahan wa Zəwwəran n Əlyibada əqqalan ilimaman win zawwarnen, əd Farisaytan. Osan-in ƣas ənnan-asan: «Mafel wər t-idu-tewayam?»

⁴⁶ Ənnan-asan magazan: «Wər kala itawanay awedan igan awal wa iga aləs en.»

⁴⁷ Ənnan-asan Farisaytan: «Daƣ adi kawanay da toyyam iman-nawan tətawasaxrakam?»

⁴⁸ Əssənət ill-ay i sər-əs izzigzanan daƣ-na?

⁴⁹ Wər sər-əs izzəgzan ar tamattay n aljahilan wər nəssen wala daƣ awa ihan əşşəriƣa n Əttawret, as ketnasan təwâr-tan tulƣant.»

⁵⁰ Inn-asan Nikodemos imosan iyyan daƣ Farisaytan s ənta din-osan Ƴaysa dat awen:

⁵¹ «Əşşəriƣa-nana wər t-iha ad itəwəxkəm awedan iket wər išşewal, itəwəssən awa daƣ išşokal.»

⁵² Ənnan-as: «Galilaya kay təlat kay da? Aknu teƣaray n Əlkəttaban ad tənəya kay iman-nak as wər t-illa ənnəbi a du-z-igmədan Galilaya.»

⁵³ Təzzar ikka awedan kul ehan-net.

8

Tantut ta təgat əzzəna

¹ Ikka Ƴaysa adƣaƣ as itawannu wa n Eşkan ən Zaytun.

² As affaw aƣôra iqqal Ehan wa Zəwwəran n Əlyibada, təzzar tək-k-ay-du tamattay ketnet. Iqqim a tan-isaşƣru.

³ Išşewal den da as d-osan musanan n Əttawret əd Farisaytan ewāyan tantut a d-əƣdaran tətəggu əzzəna. Əssəbdadan-tat dat awedan kul,

⁴ ənnan i Ƴaysa: «Ya Əşşex-nana, tantut a əzzəna a təga, amaran tətowanay tətəgg-ay.

⁵ Daƣ Əttawret za a inna Musa: "Tantut zun ta, ilzâm a tat-əggaran aytedan əs təhun har tat-iba." Amaran kay ma tənne?»

⁶ Arat wa təmərkest a imos a das-əgân fəl ad t-əssəwəran lahan. Edag ân a dasan-ajjawwab Ƴaysa, inaz ad ikattab s adad-net fəl amaƣal.

⁷ Eqqiman ədgâzan-tu s əsəstan, as ihog ibdad-du inn-asan: «Inkəret-du daƣ-wan was kala wər iga abakkad izaret əs taggor-net.»

⁸ İlas enez ad ikattab s adad-net fəl amaƣal.

⁹ Əslan i batu ta ƣas, mazazaran əġlan, azzaran-asan win waşşarnen. Iqqim-du Ƴaysa ƣas-net ənta əd təntut ta nad, təbdâd dat-əs.

¹⁰ İbdad-du inn-as: «Tantut, ma əgan aytedan win kam-əbaznen? Wər tan-iha i kam-ibâzan s əşşəriƣa?»

11 Tənn-as: «Waliyyan dağ-san, Əməli-nin». Inn-as
 Ҳaysa: «Nak da za wər kam-z-abəza s əššərixa. Aglu
 təjəwəнке, mišan ad wər tələsağ igi ən bakkadan.»

Ҳaysa ənta a imosan ənnur n əddənet

12 Ilas Ҳaysa awal i tamattay inna: «Nak a imosan ənnur
 n əddənet. Dağ adi wa di-ilkaman ad igrəw ənnur wa
 isiduran, amaran iyrâd d ad ijiwankat dağ šiyyay.»

13 Ənnan-as Farisaytan: «Təgəyya ən man-nak a təmosa,
 arat wa təgannay əddi irkam wəllen.»

14 Inn-asan Ҳaysa: «Kud imos as təgəyya ən man-in a
 mosa da təgəyya-nin tidət a təmos fəlas əssâna sas d-əhe,
 əd sas ədaga. Kawanay amaran wər təssenam sas d-əhe,
 wala sas ədaga.»

15 Kawanay azzahir Ҳas as təšarraҲam aytedan, nak
 amaran wər šərrəxa waliyyan.

16 As iga awen da as fall-i d-osa adi, ad šarraҲa, amaran
 əššərixa-nin issohat, fəlas iddew dər-i Abba wa di-d-
 izammazalan.

17 Əššərixa-nawan iktâb dağ-as âs təgəyya n əššin med-
 dan a təmosat tidət.

18 Nak za təgəyya iyyadda a mosax i man-in, təgəyya-nin
 ta n sanatat amaran Abba s ənta di-d-izammazalan a tat-
 imosan.»

19 Təzzar ənnan-as: «Mənid illa za Abba-nak?» Inn-asan
 Ҳaysa: «Wərmad di-təzdâyam za wər təzdayam Abba-nin.
 Ənnar di-təzdâyam təzdâyam Abba-nin.»

20 Batuten šin itagg-enat Ҳaysa assaxa wa dağ isasaxru
 dağ Ahan wa Zəwwəran n Əlyibada dagma n adag wa iha
 əssənduq wa dağ tiddawnat təkutawen. Mišan wər t-illa
 i igmâyan d abbaz-net fəlas alwaq-net a du-wər-newed
 harwa da.

Wər təfregam iki ən dad əkke

21 Ilas Ҳaysa inn-asan: «Nak teklay a z'aga. A di-
 təgməyam amaran a kawan-iba dağ tišit ən nasbakkadan.
 Wər təfregam a din-tawədam edag wa əkke.»

22 Ad tinəmənnin arat dağ Kəl-Əlyəhud gar-essan:
 «Meqqal iman-net a z'anxu, fəlas a inna wər nəfreg a din-
 nawəd edag wa ikka.»

23 Inn-asan Ҳaysa: «Kawanay aytedan n ares a təmosam,
 nak in afalla. Kawanay kəl əddənet a da a təmosam, nak
 wər di-təla əddənet a.»

24 A di da a fəl dawan-ənnə a kawan-iba dağ tišit ən
 nasbakkadan. As wər təzzəgzanam as nak a imosan "Wa
 illan da", wədi a kawan-iba əd tišit ən bakkadan.»

25 Ənnan-as: «Ak ma təmosax?» Inn-asan Ҳaysa: «Awa
 dawan-əməla Ҳur tizarat har əmərədda ənta a mosa.»

26 Ællân-tu aratan aggotnen as æfrâgax a tan-anna day talxa-nawan, ællân-tu dex aratan aggotnen as æfrâgax a kawañ-awwaddaba fall-asan. Mišan wa di-d-izammazalan mæššis ən tidət a imos, amaran arat wa di-d-inna, xas a əmmala y əddənet.»

27 Wər əgren as batu n Abba a day dasan-imməgrad.

28 Inn-asan Ƴaysa: «As təgam iman-in nak Ag Aggadəm s əsəhhuki wa di-za-tagim fəl təgəttawt, ad təssənam as nak da a imosan "Wa Illan da", təssənam dex as wər t-illa a tagga gər-i əd man-in, arat wa di-isassaxra Abba xas a ganna.

29 Wa di-d-izammazalan iddew dər-i. Wər di-oyya xas-in fəlas faw da arat wa das-igrazan xas a tagga.»

30 Æslan aytedan aggotnen y awa inna Ƴaysa den əzzəgzanan sər-əs.

Win əmosnen əzzurrəyya n Ibrahim əs tidət

31 Inna Ƴaysa i Kəl-Ælyəhud win sər-əs əzzəgzannen: «As təbbərdagam y awa kawan-sassaxra, ad təqqəlam inəttulab-in win tidət,

32 təssənam tidət, tidət amaran ənta kawan-za-təsaddarfit.»

33 Ənnan-as: «Nakkanay ya əzzurrəyya n ənnəbi Ibrahim a nəmos, wər kala day əddənet ad nəqqal eklan ən waliyyan, mafel təganna: "Ad taddarfem"?»

34 Inn-asan Ƴaysa: «Əggəyyəx əsilakanax-awan as awedan kul wa itaggin ibakkadan, wədi akli ən bakkadan a imos.

35 Akli amaran wər das-t-illa adag ən faw day axaywan, mišan Barar wa eraw axaywan wədi edag-net ill-ay har faw.

36 Day adi as kawan-isaddarfət Barar, wədi ad taddarfem əs tidət.

37 Æssānax as əzzurrəyya n Ibrahim a təmosam, mišan təgammayam d ad tagim iman-in fəlas awal-in a wər nədes iwallan-nawan.

38 Nak arat wa ənaya xur Abba-nin a əmmala, amaran kawanay tətəggim awas təslam xur abba-nawan Iblis.»

39 Ənnan-as: «Abba-nana ya ənnəbi Ibrahim a t-imosan.» Inn-asan Ƴaysa: «Ənnar tidət əs təmosam bararan n Ibrahim ad tətəggim imazalan win iga Ibrahim.

40 Kawanay amaran əmərədda təgammayam əd tanaaxay-nin, nak imosan awedan a dawan-immalan tidət s əmmək was di-tat-d-inna Məššina. Arat wədi wər t-iga Ibrahim.

41 Imazalan win iga abba-nawan a tətəggam.» Ənnan-as: «Nakkanay wər nəmos iniba; wər nəla ar abba iyyanda a t-imosan Məššina.»

42 Inn-asan Ƴaysa: «Ǝnnar Məššina a imosan Abbanawan tarim-i, fəlas Məššina a d-əgmada, ənta a d-əfala, wərgə gər-i əd man-in as d-ose, kalar ənta di-d-izammazalan.

43 Mafel wər təgrem awal-in? Wər dawan-igdel əgərri-net ar as wər təfregam əsəsəm y as.

44 Wər təlem dağ abbatan ar Iblis, amaran tərâm ad tassandim deranan n abba-nawan. Harwa çur ənətti ad iqqal əməggi ən man, amaran wər ibded dağ tidət, fəlas wər təha tidət əwəl-net. Igi ən bahu a imosan əttəbiğat-net fəlas anasbahu a imos, imos deç abba ən bahu.

45 Nak amaran tidət as tamagrada, adi da fəl di-wər-təzzəgzanam.

46 Məni dağ-wan wa ifragan ad aggayyat as kala ad əgeç abakkad? Kud tidət a əmmala mafel wər di-təzzəgzanam?

47 Awedan imosan arat dağ tamattay ən Məššina, əsəsəm a itaggu y awa inna Məššina. Kawanay amaran wər das-təsəsimam, fəlas wər təmosam tamattay ən Məššina.»

Ƴaysa d Ibrahim

48 Təzzar ənnan Kəl-Əlyəhud i Ƴaysa: «Wərgəç kala ad nənna kay iyyan dağ Kəl-Samarəya a təmosaç amaran ih-ik aggəsuf?»

49 Inn-asan Ƴaysa: «Wər di-iha aggəsuf, Abba-nin ças a əssəçmara, kawanay amaran wər di-təssəçmaram.

50 Wər gəmməyaç tanaya i man-in. Ill-ay wa di-gammayan tanaya, amaran ənta a ixakkaman.

51 Əggəyyeç əsilakanaç-awan as awedan wa ittafan awal-in, wər ilkem ad inay təmattant.»

52 Ǝnnan-as arat dağ Kəl-Əlyəhud: «Ǝmərədda ad nəkkas ašşak as ih-ik aggəsuf! Ibrahim da aba-tu ənta harkid ənnəbitan kul, kay amaran təganna: "Awedan kul wa ittafan awal-in, wər ilkem ad inay təmattant."

53 Abba-nanay Ibrahim dâ aba-tu: tordeç as togaraq-qu almaçam? Ǝnnəbitan dâ aba-tan. Kay ma təxsabaç iman-nak?»

54 Inn-asan Ƴaysa: «As imos as iman-in a fəl sanamala, wədi tanaya-nin wər tənfa wala. Abba-nin s ənta as təgannim imos Ǝməli-nawan, ənta a di-ihakkan tanaya,

55 amaran wər tu-təzdayam, mišan nak əzdâyaç-qu. As ənne wər t-əzdaya, wədi ad əqqələç anasbahu ən şilat-nawan. Kalar əzdâyaç-qu, amaran əttâfaç awal-net.

56 Abba-nawan Ibrahim imâl-tu əd tədəwit fəl as das-igmad ašşak as ad inəy assa-nin, amaran inay-tu, ikn-ay awen əsəffəliwəs.»

57 Ænnan-as Kæl-Ëlyəhud: «Kay wər teweda wala səmmosat təmərwen n awatay eges tənne tənâyağ İbrahim?»

58 Inn-asan: «Ëggəyye silakanay-awan as dat təhəwt n ənnəbi İbrahim da nak əmosa "Wa İllan da".»

59 Təzzar ad takammen šihun y a das-agin zabaw, mišan ya igmad-tan dağ tamattay, irdağ afarag n Ahan wa Zəwwəran n Ëlyibada.

9

Ëzuzəy wa iga Ƴaysa y awedan a d-ihəwan əd taddarɣalt

1 Ijiwankat Ƴaysa as inay aləs s as d-ihəw da iddirɣal.

2 Æssəstanan-tu nəttulab-net ənnan-as: «Ëššəx, mafəl d-ihəw aləs a əd taddarɣalt? Awak əddəlil n abakkad-net, meɣ ak abakkad ən marwan-net?»

3 Inn-asan Ƴaysa: «Wərmad iddirɣal fəl əddəlil n abakkad-net, wala deɣ abakkad ən marwan-net. Wər d-ihəw əd taddarɣalt ar y a sər-əs təwənəyan igitan ən Məššina.

4 İwâr-anay ad naknu əššəxəlan ən wa di-d-izammazalan iket di ad iga azal, fəlas ehad izay-du, amaran wər t-illa i dağ-as ifragan əššəxəl.

5 İket əheɣ əddənət əmosay ənnur n əddənət.»

6 As iga batu ta, issotaf dağ amaɗal, iga arat ən talaq əs mətman-net, issəlal-tat i šittawen n əmədderɣəl en,

7 inn-as: «Aglu takka təɣazart ta n Siloxam təšširəda dağ-as udəm-nak.» (Siloxam almaɣna-net anammazal.) İgla əmədderɣəl iššorad udəm-net, as d-iqqal da ihannay.

8 Ad gannin mahharagan-net, d aytedan win t-ənaynen dat awen imos əmədderɣəl itansayan: «Ak awen wərgəɣ aləs was faw iqqim itansay?»

9 Wiyyad gannin: «Ënta dağ awen.» Wiyyad ənta da gannin: «Kala, tulat ɣas a dər-əs iga.» Ënta amaran igannu: «Nak dağ awa.»

10 A tu-sastanan gannan-as: «Məni təməwit tas təgraway asawad-nak?»

11 İgann-asan: «Aləs as gannin Ƴaysa, a igan arat ən talaq, təzzar issəlal-tat i šittawen-in, inn-i ad aglay əšširədağ udəm-in dağ təɣazart ta n Siloxam. Ëgleɣ əššoradaq-qu ɣas, əgraway asawad-in.»

12 Ænnan-as: «Ma iga za aləs wədi?» Inn-asan: «Wər əssena».

13 Ëlwayan aytedan win aləs was kala ad imos əmədderɣəl da əs Farisaytan.

14 Ënta əzəl ən təsanfawt ən Kæl-Ëlyəhud a dağ iga Ƴaysa talaq, issəsəwad əmədderɣəl wen.

15 A tu-sastanan Farisaytan əntanay da əd təməwit tas igraw asawad-net. Inn-asan: «Arat ən talaq a issələl şittawen-in, əşşoradağ udəm-in, əswada.»

16 Ad gannin arat dağ Farisaytan: «Aləs wa igan arat wa, wər d-ifel Məşşina fəlas wər isassahat əzəl ən təsanfawt-nana.» Ənnan wiyyad: «Alğalamaten şin, manəmmək as tanat-z-agu awedan imosan anasbakkad?» Təzzar iga əməzrəy gar-essan.

17 Əlasan əsəstan n aləs was kala ad iddərğal ənnan-as: «Kay a innan izzozay-kay aləs dağ taddərğalt, əməl-anay was tordey as imos-tu.» Inn-asan: «Ənnəbi a imos.»

18 Əqlan Farisaytan wər əzzəgzanan as aləs wa kala ad iddərğal har du-sassayran imarwan-net.

19 Ənnan-asan: «Ak ənta da da barar-nawan was tənnam as d-ihəw da iddirğal? Məni təməwit tas igraw asawad-net əmərədda?»

20 Ənnan-asan marwan n aləs: «Nəssân as barar-nanay a imos, nəssân ənta da âs as d-ihəw da iddirğal,

21 mişan wərmad nəssân təməwit tas igraw asawad-net, za wala değ awedan wa t-issəswadan. Səstənat-tu iman-net, fəlas aləs waşşaran a imos ifragan ad ammagrad dağ talğa ta tu-təqqalat.»

22 Batu ta wər tat-əgen marwan-net ar fəl təksəda ən muzaran ən Kəl-Əlyəhud fəlas tənna a gan awedan kul wa iggəyyen as Ƴaysa a imosan Əlməsix, wədi ad t-əkkəsan dağ əljəməğat n ahan n əlğibada ən Kəl-Əlyəhud.

23 Awen da fəl ənnan marwan-net: «Tuşaray-net təşişawad-tu a dawan-ammagrad dağ talğa ta tu-təqqalat, səstənat-tu.»

24 Əlasan-du Farisaytan teğaray n aləs was kala ad iddərğal ənnan-as: «Iksad Məşşina təməla tidət. Nakkanay nəssân as aləs di anasbakkad.»

25 Inn-asan aləs wa: «Nak wər əssena kud anasbakkad a imos wala. Arat iyyanda ɣas a dağ əssana, as kala ad əddərğala, əmərədda əhannaya.»

26 Dəffər awen ənnan-as: «Ma imos arat wa dak-iga? Məni təməwit tas kay-issəswad?»

27 Inn-asan: «Arat wədi ya əməlağ-awan-tu mişan wər di-təzzəgzanam. Mafəl təram a dawan-t-ələsağ emel? Meqqal ak kawanay da a təram ad təqqələm inalkiman-net ketnawan?»

28 Əgan-as ərrəbdan ənnan-as: «Kay a imosan ənalkim-net, nakkanay inalkiman n ənnəbi Musa a nəmos.

29 Musa nəssân as išşewal-as Məşşina, amaran aləs wədi wər nəssen sas d-ihə fadda.»

³⁰ Inn-asan: «Aləs wa wər təssenam wala sas d-iha mišan izzozay-i daɣ taddarɣalt! Arat ya wa ənta a isammaklalan wəllen!

³¹ Təssânam as Məššina wər iqəbbəl šiwatriwen ən nasbakkadan. Awedan wa das-ibbərdagan itamazal taranet, ənta as iqqabbal šiwatriwen-net.

³² Wər kala ad itawasla awedan ipsiswadan iyyan a d-ihəwan əd taddarɣalt.

³³ Ənnar du-wər-ifel aləs di Məššina, wər z'ifrəg igi ən wala.»

³⁴ Haraššen-tu ənnan-as: «Ko! Adis kay was as du-təhəwa da təmosa təbəluləq n abakkad, kay a iran a dana-takfaɣ alfaydaten?» Təzzar əstaxan-tu.

Aytedan win əddərɣalnen daɣ batu ta təqqalat əddin

³⁵ As isla Ƴaysa əmazal wa igan da, iswad y aləs wen har t-igraw inn-as: «Awak təzzigzanax sər-i Ag Aggadəm?»

³⁶ Inna aləs i Ƴaysa: «Əməl-i awa imos, Əməli-nin, fəlas areɣ a sər-əs əzzəgzəna.»

³⁷ Inn-as Ƴaysa: «Tənayaq-qu, amaran ənta da da dak-imməgradan da.»

³⁸ Inn-as aləs: «Daɣ adi əzzigzanax Əməli-nin.» Təzzar issəjad-as.

³⁹ Amaran inna Ƴaysa: «Nak assa a d-əgəɣ əddənət y ad ammazalax əššəriɣa, əswədan win wər nəhənnəy, addarɣalan win hannaynen.»

⁴⁰ Əslan arat daɣ Farisaytan win dər iddew y awa inna da ənnan-as: «Daɣ adi nakkanay da iməddərɣal a nəmos?»

⁴¹ Inn-asan Ƴaysa: «Ənnar təmosam iməddərɣal wədi wər kawan-iwer abakkad, mišan dad imos as təgannim: "Nakkanay nəhannay", wədi iwâr-kawan abakkad.»

10

Ƴaysa ənta a imosan amadan wa olaɣan

¹ «Əggəyyey əsilakanax-awan as: Awedan wa wər nəggez afarag n ayfəd s əmi was itawaggaz, itaraggat-t-idu, wədi abaydag a imos n ənarkab.

² Amaran wa d-iggazan s əmi n afarag, wədi ənta a imosan amadan n ayfəd.

³ Ənaxlif n afarag a das-z-aləman imi, aslinat ayfəd y əməsli-net, ad iɣarru šin-net s esmawan-nasnat isardaqqanat afarag.

⁴ As d-iɣrad ikus ən šin-net, a dasnat-izar, əlkəmnat-as, fəlas əzdâynat əməsli-net.

⁵ As iga awen awedan wa dasnat-imosan ənaftay, wər das-z-əlkəmnat, ewef fadda a tu-z-aginat fəlas wər əzdaynat əməsli-net.»

⁶ Əlmital wa da, a dasan-iga Ƴaysa, mišan wər əgren almaɣna n awa daɣ-san imməgrad da.

⁷ İlas Ƴaysa inn-asan: «Əggəyyeɣ əsilakanay-awan as nak a imosan imi was raddaynat ayfəd.

⁸ Win dat-i d-osanen kul ibaydagan ən narkaban a mosan, amaran wər dasan-əssəsəmnat ayfəd.

⁹ Nak a imosan imi n afarag. Wa sər-i d-iggazan ad afsu. İfrâg ad itaggaz iradday, igrəw əntada imensewan-net.

¹⁰ Abaydag wər d-itisu ar fəl šikra, d igi ən man d əhluk. Nak amaran ose-du fəl ad əgrəwan aytedan təməddurt, əgrəwan-tat da za əs təməwit wər nəla əddukad.

¹¹ Nak a imosan amadan wa olaɣan. Amadan wa olaɣan iman-net a ihakku fəl ayfəd-net.

¹² Mišan awedan wəs ayfəd wərgəɣ šin-net, ətəwəɣfar ɣas a itawagga y a tanat-idən, wədi as ogga əridal izaytanat-du, ad addaggag ayy-enat-in, abəz daɣ-asnat əridal awa ira, izəwwəziwəz-tanat.

¹³ Arat wa itagg-ay aləs wa fəlas ətəwəɣfar ɣas a iga y əššəɣəl wa, wər izlay a əganat ayfəd.

¹⁴ Nak a imosan amadan wa olaɣan. Əzdâyay ayfəd-in, ayfəd-in deɣ əzdaynat-i,

¹⁵ əs təməwit ta daɣ as di-izday Abba-nin, nak deɣ əzdâyay-qu. Əkfəɣ iman-in fəl ayfəd-in.

¹⁶ Ələɣ ayfəd šiyyad wər nəha afarag wa. Əntanatay da kundaba azzaray-asnat, aslinat y əməsli-nin. Ayfəd-in kul ad ərtəynat əqqəlmat əsəgən iyyanda, ilân amadan iyyanda.

¹⁷ Abba ir-i fəlas iman-in a əkfe fəl a tan-ələsəɣ agaraw.

¹⁸ Wər t-illa i daɣ-i z'abəzan iman, kalar iman-in a əkfəɣ əs təradawt-in. Ələɣ fərregat ən tahakkay-nasan, ələɣ da fərregat n əsuxəl-nasan. Ənta da daɣ arat was di-omar Abba-nin s igi-net.»

¹⁹ Elasan Kəl-Əlyəhud əməzrəy daɣ talɣa n aratan win igannu Ƴaysa da.

²⁰ A daɣ-san aggen gannin: «Aləs wa aggəsuf a t-ihan! Awa əmeskel! Mafel təssisamam-as?»

²¹ Wiyyad gannin: «Awedan iha aggəsuf wər itəggu awal wa. Tordam as ill-ay aggəsuf ifrâgan əsəswəd ən məddəɣal?»

22 Azzaman en tagræst. Ewad-du æmud imosan isaktan n ætæwæzæzdag wa iga Ahan wa Zæwwæran n Ælyibada day Yerusalem.

23 Itijæwænkit Yaysa day Ahan wa Zæwwæran n Ælyibada issiwal æd tarrayt tæfâlat as itawannu «ta n Suliman.»

24 Yilayçalayan-tu Kæl-Ælyæhud win ællanen den ganninas: «Kay ak har æmmay wær dana-tore day aḡaf? Kud kay Ælmæsix a tæmosa, tæzælulæḡa-du da da tannaḡ-anaq-qu.»

25 Inn-asan Yaysa: «Æmâlaḡ-awan, mišan wær di-tæzzægzanam. Imazalan win æge s esæm n Abba-nin, æggæyyen-i,

26 mišan wær di-tæzzægzanam fêlas wær tætabaqqem day ayfæd-in.

27 Ayfæd-in æsallinat y æmæsli-nin, æzdâyaq-qanat, amaran ælkâmnat-i.

28 Ækfeq-qanat tæmæddurt ta tæḡlalat, wær day-asnat tælkem tæmattant, amaran wær t-illa i day-i tanat-z-irkæban.

29 Abba-nin a di-tanat-ikfan, wær t-illa i wær oger. Amaran wær t-illa i tanat-z-irkæban day æfus-net.

30 Nak d Abba arat iyyanda a næmos.»

31 Ælasan-du sær-æs adakal æn tæhun y ad t-anḡin.

32 Ilas Yaysa inn-asan: «Æssiknaq-qawan imazalan aggotnen olaḡnen a d-æfalnen Abba. Mæni day-san wa fêl taram a di-tanḡim?»

33 Ænnan-as: «Nakkanay wær næra tenaḡay-nak fêl as tægeḡ æmazal olaḡan, kalar æmadraw wa tægeḡ æddi a fêl kay-za-nanḡu. Kay wær tæmosaḡ ar aggadæm amaran tareḡ ad tagaḡ iman-nak Mæššina.»

34 Inn-asan Yaysa: «Awak wærgæḡ iktâb day Ættawret as inna Mæššina: "*Kawanay tæmosam imalan*"?»

35 Wær næfreg a din-nægær arat wa ihan Ælkættaban. Esæm wa n malan, iḡra sær-æs Mæššina aytedan win ikka awal-net.

36 Nak Mæššina a di-isannafranan izammazal-i-du s æddænet. Manæmmæk day adi as za tannim taggaḡ æmadraw fêlas ænne: "Æmosa Barar æn Mæššina"?

37 As imos as wær tæggæḡ imazalan win as di-d-issæḡla Abba-nin y a tan-aga, a di-wær-tæzzægzanam.

38 Mišan dad imos as taggaq-qan, wædi kud sær-i wær tæzzægzanam da, zægzanat kuddeḡ æs mazalan win tagga, fêl ad tæssænam, tassantim deḡ day ægærri n as Abba irtây dær-i, nak deḡ ærtâya d Abba.»

39 Ælasan agamay d abbaz-net, mišan igmad-tan.

40 Ilas Yaysa iki æn tægadamayt ta hadat æn Yordan, day adag wa day issænta Yaxya æsælmæḡ n aytedan day aman, iqqim den da.

⁴¹ Osan-t-in aytedan aggotnen, gannin: «Yaxya wər iga aɣalamat waliyyat, mišan aratan kul win danax-inna s aləs wa, tidət a mosan.»

⁴² Den daɣ ad əzzəgzanan aytedan aggotnen əs Ƴaysa.

11

Iba ən Lazarəs

¹ Ill-ay aləs irinan igan esəm Lazarəs, ihan təyrəmt ən Betanəy s ənta a daɣ təxsar Maryama əd Marta əmosnen šimədrayen.

² Maryama ta da a tənɣalat alwardi fəl Əməli Ƴaysa, təmas idaran-net əs jəkkad-net. Amaran amadray-net Lazarəs a irinan den.

³ Əssokanat təmədrayen-net Ƴaysa əmazal as: «Əməli, əməri-nak irîn.»

⁴ As isla Ƴaysa i salan win den, inna: «Təsəlkaht ən təwərna ten, wər za təqqəl təməttant ən Lazarəs, arat a təmos a z'assaknin tanaya ən Məššina, isənnəfiləl-du əntada tanaya ta ila Barar ən Məššina.»

⁵ Ƴaysa ira Marta wəllen, ənta əd təmadrayt-net, əd Lazarəs.

⁶ Isla təwərna-net, mišan iga dəffər awen əššin adan wər igmed edag wa iha.

⁷ Dəffər adi inna i nəttulab-net: «Əndawat ad nəqqəl Yahudəyya.»

⁸ Ənnan-as nəttulab-net: «Əššex-nana, imuzaran-nana wərge edes-nasan səket dâ da dâ gammayan əd tanaxay-nak, kay amaran tareɣ tewaxlay n akal wen?»

⁹ Inn-asan Ƴaysa: «Əzəl wərgəɣ maraw alwaqan d əššin a imos? As ijawankat awedan ezal, wər z'inəgərtəttəf, fəlas ihannay dat-əs.

¹⁰ Mišan as ijawankat awedan ehad, ad inəgərtəttəf, fəlas wər t-iha ənnur.»

¹¹ As iga batu ta inna tolas: «Əmidi-nana Lazarəs insâ, ad aɣlay a t-id-əssənkəra.»

¹² Ənnan-as nəttulab-net: «Əməli, dad zamas insâ, wədi əngəm ad izzəy.»

¹³ Ənta Ƴaysa təməttant ən Lazarəs as dasan-imməgrad den, mišan əntanay a ɣilan etəs wa n aɣadat as igannu.

¹⁴ Adi a fəl d-izalalay Ƴaysa inn-asan: «Lazarəs aba-tu.

¹⁵ Amaran isidawat-i as wər əlle den alwaq wədi, fəlas arat wa ənta sər-wan du-z-awəyan a sər-i təzzəgzənam. Əməredda əndawatanaq-qu.»

¹⁶ Inkar Tuma was gannin Eknay, inna i nəttulab win hadatnen: «Əndawat nakkanay da a danax-iba nəddew dər-əs.»

Yaysa ənta a imosan tanakra daɣ təmattant, imos təməddurt

¹⁷ As din-osa Yaysa ittəmal-as as Lazarəs iga əkkoz adan daɣ əzəkka.

¹⁸ Betanəy təhoz Yerusalam. Edag ən karad kilawtan ɣas a illan gar-essanat.

¹⁹ Osan-in Kəl-Əlyəhud aggotnen Marta əd Maryama fəl a dasnat-in-šəwwəškənan daɣ adag n amadray-nasnat.

²⁰ As təsla Marta as Yaysa ihoz-du taɣrəmt, təssəlkad-as. Maryama ənta təqqim-in daɣ aɣaywan.

²¹ Tənnə Marta i Yaysa: «Əməli, ənnar təlle da, wər z'iba amadray-nin.

²² Mišan əmərədda da əssanaɣ as arət kul wa təgmaya daɣ Məššina a dak-k-agu.»

²³ Inn-as Yaysa: «Amadray-nam a d-inkər daɣ təmattant.»

²⁴ Tənn-as Marta: «Əssânaɣ as amadray-nin a d-inkər ɣur tanakra n aytedan əzəl wa ilkaman.»

²⁵ Inn-as Yaysa: «Nak a imosan wa d-isankaran daɣ təmattant, əmosa təməddurt. Awedan wa sər-i izzəgzanan, wədi kud t-aba da a d-iddər.

²⁶ Amaran awedan kul wa iddaran izzigzan sər-i, wədi wər ilkem ad t-aba. Təzzigzanaɣ adi?»

²⁷ Tənn-as: «Awalla, Əməli, əzzigzanaɣ as kay a imosan Əlməsix, təmosa deɣ Barar ən Məššina, as ittimal as a d-asu əddənet.»

Tanakra ən Lazarəs daɣ təmattant

²⁸ As təga Marta batu ta, təkka təmadrayt-net Maryama, təwat-tat s ahal tənn-as: «Əššəx illa-da, isastan dər-əm.»

²⁹ As təgraw Maryama isalan win, təggad-du, təssəlkad i Yaysa.

³⁰ As itaggu awen harwa da wər d-iggez taɣrəmt, wər igmed edag wa daq-q in-tosa Marta.

³¹ Əllân Kəl-Əlyəhud ɣur Maryama a das-du-šiwəškənnen. As tat-ənayan as du-təggad tarmad təqqab, əlkaman-as əɣilan əzəkka a təkka y a fall-as təhallu.

³² As din-tosa Maryama edag wa iha Yaysa togg-ay ɣas təfataqqat ɣur daran-net, tənn-as: «Əməli, ənnar təlle da, wər z'iba amadray-nin.»

³³ As tat-inay Yaysa təhallu, inay Kəl-Əlyəhud win dər-əs d-əddewnen əntanay da əhallin, ikna tərəmmeq, əɣšadan man-net.

³⁴ Inn-asan: «Məni tu-təgam?» Ənnan-as «Əməli, ayaw tənəya.»

³⁵ Ad ihallu Yaysa.

36 Ænnan aytedan: «Ænawat awa dær togda tara ta iga y alæs wa.»

37 Tæzzar ænnan wiyyad daḡ-san: «Alæs wa issəs-wadan æmædderḡæl, wærgex ifrâḡ a ad igdæl i Lazaræs tæmattant?»

38 Ilas Ḡaysa tæræmmeḡ, tæzzar ikka æzækka imosan akazam, tædbâḡ tæhunt zæwwerat.

39 Inna Ḡaysa: «Ækkæsat tæhunt!»

Tænn-as Marta ta n tamadrayt n alæs wa aba da: «Æmæli, alæs di æmæred-da ila aḡu, fælas æzæl-net wa n ækkoz d anabal awa.»

40 Inn-as Ḡaysa: «Wærgex ænneḡ-am as tæzzægzana ad tæneyaḡ tanaya æn Mæššina?»

41 Tætawakkas-du tæhunt. Iswad Ḡaysa daḡ jønnawan inna: «Abba, æggodayaḡ-ak as di-tæqbala tæwatray-nin.

42 Nak iman-in æssânḡ as faw da tæqqabbala šiwatriwen-in. Æddælil æn tamattay ta di-tæḡalayḡalayāt da a fæl dak-æššewala fæl ad tæzzægzæn as kay a di-d-izammazalan.»

43 As iga tæwatray ta, idkal æmæslī-net inna: «Lazaræs, ægmæd-du!»

44 Iḡmad-du ænæmmettæn wa nad, ættâlan fassan-net æd daran-net æs tæsəwad, tælsa deḡ tæbdoḡ udæm-net. Inn-asan Ḡaysa: «Ækkæsat-as itul tayyim-tu ad ijæwænkæt.»

Šimarkas šin tanayaḡ æn Ḡaysa

45 Kæl-Ælyæhud aggotnen a d-osânen Maryama, ænayan arāt wa, æzzægzanan æs Ḡaysa.

46 Wiyyad daḡ-san amaran ækkan Farisaytan æmalan-asan awa iga Ḡaysa da.

47 Tæzzar sassagan limaman win zawwarnen, æd Farisaytan æmænøy æn muzaran ænnan: «Ma za nāḡu? Alæs wa itaḡḡu alḡalamaten aggotnen.»

48 As tu-noyya itaḡḡu aratan win, a sær-æs æzzægzænan aytedan kul, tæzzar asin-du sojitan æn Kæl-Ærrum a dana-sitaymarnen, addaḡdagan Ehan wa Zæwwæran n Æḡyibada, æḡrædan deḡ tenayaḡ æn tamattay-nana.

49 Inkar-du iyyan daḡ-san igân esəm Kayif, imosan Ælimam wa Zæwwæran daḡ awatay wen, inn-asan: «Kawanay wær tæḡrem wala.

50 Wær din-tæḡrem as ofa ad ammat awedan iyyanda daḡ adag æn tamattay n Israyil ketnet?»

51 Batu ta iga da wær tat-iga gar-es æd man-net, kalar tišit-net Ælimam wa Zæwwæran daḡ awatay wen, a fæl igraw ælwælayāt n as Ḡaysa kundaba immut daḡ adag æn tamattay ketnet.

⁵² Amaran wərge tamattay n Israyil ɣas as tu-z-iba daɣ adag-net, kalar bararan ən Məššina kul win wazawaznen gər kallan a du-z-iššidəw əqqəlan təxəssa iyyadda.

⁵³ Əzəl wen da daɣ əgan muzaran ən Kəl-Əlyəhud tanat ta n tanaxay-net.

⁵⁴ Awen da fəlas ab'as itallam Ƴaysa dad ira daɣ Kəl-Əlyəhud. Igməd akal wen, ikka əxrəm igân esəm Efrayim inimahazan əd taneray, iqqim daɣ-as ənta əd nəttulab-net.

⁵⁵ Azzaman en amud ən Kəl-Əlyəhud wa n Akkay ihoz-du. A du-gammadan aytedan idaggan aggotnen takkin-du Yerusalem, fəl ad əzzəzdəgan dat əmud.

⁵⁶ Saggadan i Ƴaysa tinəmännin gar-essan daɣ Ahan wa Zəwwəran n Əlyibada: «Kawanay ak ma tənnam, tordâm as a d-asu amud a meɣ?»

⁵⁷ Ənta ilimaman win zawwarnen əd Farisaytan omâran aytedan s âs i issanan edag wa iha Ƴaysa isaffagget-tu fəl ad attarmas.

12

Ətəwənxal n alwardi fəl Ƴaysa daɣ Betanəy

¹ Sədis adan dat Əmud wa n Akkay ikka Ƴaysa Betanəy, s ənta daɣ ixsar Lazarəs wa d-issodar daɣ təmattant.

² As din-osa Ƴaysa tawaggan-as məgura olaynen. A du-tətaway Marta imensewan, Lazarəs amaran iha aytedan win naɣamanen əd Ƴaysa ədrâwan dər-əs.

³ Təzzar tədkal-du Maryama aganna ən litər n alwardi iknan šizada d əzzəwi as itawannu nar, a tu-tənaqqal fəl daran ən Ƴaysa, təmmas-tan əs jəkkad-net, idnay ahan aɣu n alwardi.

⁴ Inkar Yahuza Isxarəyuti wa n iyyan daɣ nəttulab ən Ƴaysa was ənta tu-z-agin daɣ fassan inna:

⁵ «Mafel wər din-nəzzənzə alwardi wa azrəf a z'awədan karadat təmad n əzəl n əššəxəl nakf-ay i tələqqawen?»

⁶ Arat wa wər t-inna fəl təhanint i tələqqawen, kalar abaydag a imos, amaran ənta a ittəfan əssənduq wa itaggaz əzrəf ən nəttulab, idakkal daɣ awa t-ihan.

⁷ Eges ya inna Ƴaysa: «Ayy-et! Alwardi wa kala da togâz-tu y əzəl wad za təwəga daɣ əzəkka.

⁸ Šiləqqawen faw da əllânat ɣur-wan, nak amaran wərgəɣ faw əlle ɣur-wan.»

Assa ən Ƴaysa aɣrəm ən Yerusalem

⁹ Təsla tamattay tagget ən Kəl-Əlyəhud as illa Ƴaysa den təzzar əkkan ehan wen, mišan wərge Ƴaysa ɣas din-əkkan, kalar awnaf a tan-ihan ən Lazarəs wa d-issənkər daɣ təmattant.

¹⁰ Təzzar əkkasan-du limaman win zawwarnen tanat n ad anyin Lazarəs ənta da,

¹¹ fəlas əddəlil-net a fəl dəffər-san əfalan Kəl-Əlyəhud aggotnen əzzəgzanan əs Ƴaysa.

¹² As affaw əslan aytedan aggotnen a d-əkkanen amud, as Ƴaysa iggaz-du aƣrəm wa n Yerusalam.

¹³ Ədkalan-du ilədlad ən tagayt əqlan əssəlkadan-as gannin s afalla:

«Ozana! Təmmal i Məşşina!

Iga Məşşina albaraka daƣ

wa d-osan s esəm n Əməli!

Kay əmənokal n Israyil!»

¹⁴ Igraw Ƴaysa əhulel, iwan-tu, s əmmək wa əmalan Əlkəttaban aş ənnan:

¹⁵ «*Ad wər təşşəwəša ya wələt Səyon, əmənokal-nam əddi a din-izayan əddi, iwân əhulel.*»

¹⁶ Arat wa wər t-əgren nəttulab-net daƣ tizarat, mişan as igraw Ƴaysa adkul-net, əktan-du as aratan win əməlan-tan Əlkəttaban, amaran kul əndan fall-as.

¹⁷ Tamattay ta təmməgnet assaƣa wa daƣ d-iƣra Ƴaysa Lazarəs daƣ əzəkka issənkar-t-idu daƣ təmattant, təgəyyat-as.

¹⁸ Awen da fəl das-du-təssəlkad tamattay, fəlas əslân aƣalamat ta iga.

¹⁹ Təzzar ad tinəmännin Farisaytan gar-essan: «Toggâm-tu? Indar-awan a dər t-in-təkkam, har as aytedan kul əlkaman-as.»

Emel wa iga Ƴaysa təmattant-net

²⁰ Əllan-tu arat ən Kəl-Əlyunan əhanen aytedan win d-əkkanen Yerusalam y a daƣ-as əxbədan Məşşina daƣ adan en da n əmud en.

²¹ Əkkan iyyan daƣ nəttulab ən Ƴaysa igan Filibus wa n təxrəmt ən Betsayda ta n akal ən Galilaya, ənnan-as: «Nəgmay daƣ-ak a dana-tassakna Ƴaysa.»

²² Iglə Filibus imal y Andrawəs, iddew dər-əs Andrawəs əmalan i Ƴaysa.

²³ Inn-asan Ƴaysa: «Alwaq ewad-du əmərədda wa daƣ z'əgrəwa nak Ag Aggadəm adkul-in.

²⁴ Əggəyyeƣ əsilakanax-awan as tablalt n alkama as wər tərtek daƣ amadəl təmmut, ad taglu təmos iyyadda, mişan as təmmut a du-tədwəl, tagu ara aggen.

²⁵ Awedan wa iran iman-net daƣ əddənet ta ad affatu daƣ alaxirat. Amaran wa irdan ad isaffatu iman-net daƣ əddənet ta, wədi wər tu-z-əgmədan, kalar ad igrəw təməddurt ta təxlalat.

26 Awedan kul wa iran a di-işxəl, ilkəmet-i, as iga adi edag wa əheç ənta a z'iggəz, akf-ay deç Abba-nin almaqam.

27 Əmərədda əxşâdan man-in. Ma z'anna? Awak ad anna: "Abba safs-i daç assaxat ta? Mişan wər d-ewedaç alwaç wa, âr y a fall-i agu.

28 Abba, sənnəfiləl təla-nak tanaya." Təzzar igmad-du əməsli ijənnawan inna: «Təla-nin tanaya əsinafalalaç-qat, amaran a tat-ələsaç əsənnəfiləl.»

29 Tamattay ta təllat den, təsla y əməsli wa, a təxil eggag. Ad əgənnin wiyyad: «Angalos das-işşewalan den.»

30 Inn-asan Ƴaysa: «Əməsli wa wərgəç əddəlil-in a fəl d-iga, kalar əddəlil-nawan kawanay.

31 Əmərədda ad za tətəwəxkəm əddənet ta, itəwəstəç əmənokəl-net Iblis.

32 Amaran nak as tawasahake fəl amaçal əwara təgəttawt, a d-açraç aytədan kul əs man-in.»

33 Batu ta isidagan sər-əs təməwit tas tu-z-iba.

34 Tənn-as tamattay: «Nənây daç Awal ən Məşşina as Əlməsix ad agu təməddurt təxlalat. Manəmmək amaran as dana-za-tannaç Ag Aggadəm ad itəwəsəhukət fəl amaçal? Ma imos Ag Aggadəm was təgannaç əddi?»

35 Təzzar inn-asan Ƴaysa: «Ənnur harwa da illa çurwan, har agin arat n azzaman. Jəwənkətət iket di ad t-illa fəl a kawan-wər-əçdərnət şiiyyay, fəlas wa ijawanken daç şiiyyay, adi wər issen sas idag.

36 Zəçzənət s ənnur harwa togazam, fəl ad təççələm kəl ənnur.»

As iğrad Ƴaysa igi ən batu ta igguk-kan, ikka edag wər əssenən.

Təzərəst n əşşəçəl wa iga Ƴaysa dat awedan kul

37 Alçalamaten aggotnen şin iga Ƴaysa dat-san, wər sər-san d ewaynat as sər-əs əzzəçzənən,

38 fəl ad tandu batu ta iga ənnəbi Isayas as inna: «*Əməli, ma imos wa izzəçzənən s arat wa nəmal? Ma imos was tənafalal tarna n Əməli?*»

39 Əddəlil wa fəl wər əfregan ad əzzəçzənən da imal-tu ənnəbi Isayas as inna:

40 «*Məşşina a tan-isaddaryalan, issəyar iwallan-nasan, fəl ad ib'as hannaynat şittawen-nasan, ib'as garrin wallan-nasan, fəl ad wər utaban, izzuzəy-tan.*»

41 Aratan win inn-en Isayas fəlas inây tanaya ən Ƴaysa, immigrad deç daç batu ən Ƴaysa.

42 As iga awen imuzaran iman-nasan da a daç-san aggen əzzigzənən əs Ƴaysa, mişan wər əhelan emel n awen fəl təksəda ən Farisaytan, fəlas wər aren ad təwəkkəsən daç əljəməçat n ahan n əlyibada ən Kəl-İlyəhud.

⁴³ Amaran əssofan saymar wa n aytedan tanaya ta ihakku Məşşina.

⁴⁴ Idkal Ƴaysa əməsli-net inna: «Awedan wa sər-i izzəgzanan, wərge nak ƣas as izzəgzan, kalar wa di-d-izammazalan da izzigzan sər-əs.

⁴⁵ Amaran wa daƣ-i iswadan, adi wa di-d-izammazalan a daƣ iswad.

⁴⁶ Nak zun ənnur a mosa, əkke-du əddənet y âs i sər-i izzəgzanan wər z'aqqam daƣ şiiyyay.

⁴⁷ As isla awedan i batuten-in iqqim wər tanat-ittef, wərge nak a tu-z-awwaddaban, fəlas nak efsan n aytedan a d-əkke s əddənet, wərgeƣ attadib-nasan.

⁴⁸ Daƣ adi awedan kul wa di-olkan, iqqim wər iga tenbay daƣ batuten-in, wədi ill-ay wa tu-z-awwaddaban. Awal iman-net wa da əge da, a das-z-işrəƣan əzəl wa ilkaman.

⁴⁹ Fəlas aratan win dawan-əmala da, wərgeƣ nak a tan-d-inzaman gər-i əd man-in, kalar Abba wa di-d-izammazalan iman-net as di-omar s arat was di-iwar ad t-anna, əd was di-iwar a fall-as ammagrada.

⁵⁰ Əssânaƣ as arat was omar ənta a itawayan əs təməddurt ta təxlalat. Daƣ adi arat was əmməgrada, əmmək wa daƣ as di-t-imal Abba ənta as sər-əs əmməgrada.»

Iba ən Ƴaysa əd tanakra-net daƣ təmattant

13

Əşirəd wa iga Ƴaysa idaran ən nəttulab-net

¹ Ahad wa oggan amud wa n Akkay, issân Ƴaysa as alwaq-net osa-du wa daƣ z'igməd əddənet iqqəl Abba. Ƴaysa faw da isaknu inəttulab-net tara, amaran əmərədda isannahaltan əsəkni ən tara ta dasan-iga.

² Itamansaw Ƴaysa əd nəttulab-net ehad, as itaggu awen da Iblis igâ daƣ əwəl ən Yahuza wa n ag Simƣon Isxarəyuti təkaddilt-net.

³ Issân Ƴaysa as Məşşina di n Abba igâ arat kul daƣ əfus-net, issân deƣ as igmâd-du Məşşina amaran ad t-iqqəl.

⁴ Ibdad fəl mensewan, ikkas takadkat-net ta n afalla, idkal afər igbas-tu,

⁵ təzzar iga aman daƣ əxlal, ad işarad idaran ən nəttulab-net, immas-tan s əfər wa igbas da.

⁶ As d-ewad Ƴaysa Simƣon Butros inn-as: «Əməli, kay, a z'işşirədan idaran-nin?»

⁷ Inn-as Ƴaysa: «Awa tagga da wər təfrega əgərri-net əmərədda mişan a tu-tagra dəffər awa.»

⁸ Inn-as Butros: «Kay, ad təşşirəda idaran-in? Wala ənəmi haz!» Inn-as Yaysa: «As dak-kan-wər-əşşorada nak dər-ək nəmmizzay.»

⁹ Inn-as Simxon Butros: «Dağ adi Əməli, wərge idaran-nin xas, şirəd harkid fassan-in d aɣaf-in.»

¹⁰ Inn-as Yaysa: «Awedan išşoradan, wər iddarar ar əşirəd ən daran fəl ad izdag ketnet, amaran kawanay, təzəddigam, mişan wərge ketnawan.»

¹¹ Yaysa issân wa tu-z-akkaddalan; adi a fəl inna: «Wər təzəddigam ketnawan.»

¹² As iğrad Yaysa əşirəd ən daran-nasan, izlag takadkat-net, iqqal edag-net, inn-asan: «Awak təgrâm awa dawan-əge da?»

¹³ Təgannim-i "Aməsəsəşəri" d "Əməli", təgannim a olağan, fəlas əmosaq-qan.

¹⁴ Dağ adi dad zamas nak imosan Əməli d Əməsəsəşəri, əşşorada idaran-nawan, iwâr-kawan, kawanay da, dağ ilkam a, ad tətimaşiridam idaran.

¹⁵ Əsəknaq-qawan arat wa fəl a tu-tətaggim kawanay da s əmmək was dawan-t-əge.

¹⁶ Əggəyyey silakanax-awan as, akli wər oger məşşis, anammazal dey wər oger wa t-id-izammazalan.

¹⁷ Dad zamas təssânam aratan win, wədi təbbilalam kudis tətamazalam-tan.

¹⁸ Wər dawan-ganna ketnawan; win sannafrana kul əzdâyaq-qan amaran kundaba inda awa imal Awal ən Məşşina as inna: "Wa dər ədrawa, iqqal amaksan-in."

¹⁹ Arat wa, as igâ ad təzzəgzənam as nak a imosan "Wa İllan da." Adi da a fəl dawan-t-ənney əmərədda harwa wər iga.

²⁰ Əggəyyey silakanax-awan as wa iqbalan iyyan dağ nəmmuzal-in, nak iman-in a iqbal. Harwa wa di-iqbalan, wa di-d-izammazalan a iqbal.»

Emel ən Yaysa təkaddilt ta tu-z-əgu Yahuza

²¹ As inna Yaysa awen, əğşadan man-net, təzzar inna: «Əggəyyey əsilakanax-awan as iyyan dağ-wan a di-z-aggin dağ fassan.»

²² Ad tinəməswidan nəttulab-net, əqqânan xafawan-nasan i was igannu.

²³ İyyan dağ nəttulab-net, wa isannahal Yaysa tara, isiɣamar dağ ihəz n ədmaran ən Yaysa.

²⁴ Isaddagan-as Simxon Butros ad issəstən Yaysa əd was igannu.

²⁵ Təzzar inaz-in ənattalib wen fəl ədmaran ən Yaysa, inn-as: «Əməli, ma z'iqqəl?»

²⁶ Ijjəwwab-as Ƴaysa inn-as: «Wa əkfe akarammu ən təgəlla wa z'əssəlməxa dəx ədrəz a.» Təzzar issəlməx akarammu ən təgəlla ikf-ay i Yahuza ag Simxon Isxarəyuti.

²⁷ As igraw Yahuza akarammu wen, iggaz-tu Aššaytan. Təzzar inn-as Ƴaysa: «Tagaxet tarmad awa kay-iwaran.»

²⁸ Awa fəl inna Ƴaysa awen i Yahuza, wər iha inəttulab-net win hadatnen sixamarnen den tattin i t-igrân.

²⁹ Wiyyad ordân as, iduf wa iga Yahuza azrəf ən nəttulab a fəl das-inna Ƴaysa: «Zanza-du arat was za naddarar y əmud; madey akfu šiləqqawen arat iyyan.»

³⁰ Ibaz Yahuza akarammu ən tagəlla, igmad tarmad, as itaggu awen da ehad igâ.

Alwajib wa aynayan

³¹ As igmad Yahuza, inna Ƴaysa: «Əmərədda tanaya-nin nak Ag Aggadəm tənifalal, tənifalal dəx-i dəx tanaya ən Məššina.

³² Dad zamas tanaya ən Məššina tənifalal dəx-i, Məššina da ad isənnəfiləl dəx man-net tanaya-nin nak Ag Aggadəm dəx alwaq ihozan wəllen.

³³ Imaran-in, alwaq wər nəggət a xur-wan z'aga. A di-təgməyam mišan edag wa əkkeş wər təfregam a t-in-tawədam. Kala ad ənnəş adi i Kəl-Əlyəhud, amaran kawanay da əmərədda ənnəş-awan-tu.

³⁴ A kawan-akfaş alwajib aynayan, a t-imosan as namariwat. Namariwat kawanay da s əmmək was kawan-are.

³⁵ As tənəmaram, ad issusən adi aytədan kul as kawanay inəttulab-in.»

Ƴaysa əd Butros

³⁶ Inn-as Simxon Butros: «Əməli, mənid təkke.» Inn-as Ƴaysa: «Edag wa əkke, wər təfrega a di-sər-əs-təlkəma əmərədda, eges a din-təlkəma dəffər awa.»

³⁷ Inn-as Simxon Butros: «Əməli, mafel as wər əfrega a dak sər-əs əlkəma əmərədda. Əgarəş iri y a fall-ak akfa iman-nin.»

³⁸ Inn-as Ƴaysa: «Adis a fall-i takfaş iman-nak? Əggəyyeş silakanəş-ak as wər z'axru əkəji axora wər di-təggəda har karadat təklaten.»

14

Ƴaysa ənta a imosan tarrayt

¹ Inn-asan Ƴaysa: «Ad wər təššəwəšam, zəgzənat əs Məššina, təzzəgzənam sər-i nak da.

² Ehan n Abba-nin ahân-tu daggan aggotnen ən təməxsurt. Awak ənnar wər iga adi manəmmək as dawan-z-anna ad aqla səmmutəgəş-awan edag təzdayam?

³ As tu-sammataga, ad d-əqqala, idaway-in dər-wan fəl ad təggəzam edag wa əhe.

⁴ Edag wa əkke təssânam tarrayt-net.»

⁵ Inn-as Tuma: «Əməli wər nəssen dad təkke, manəmmək as za nəssən tarrayt-net?»

⁶ Inn-as Ƴaysa: «Nak a imosan tarrayt id əmosa tidət əmosa əntada wa ihakkan təməddurt. Awedan waliyyan wər in-z-awəd Abba, ar əs tarrayt-in.

⁷ Ənnar təssânam awa mosa, təssənam awa imos Abba-nin da. Əmərədda təssânam awa imos, amaran tənayam-tu.»

⁸ Inn-as Filibus: «Əməli, susən-anay awa imos Abba, igd-ana adi.»

⁹ Inn-as Ƴaysa: «Filibus, əruway as dər-wan əddewa, eges harwa da wər təssenay awa mosa? Wər təssenay as wa di-inayan inây Abba! Dağ adi manəmmək as təganna: "Susən-anay awa imos Abba?"

¹⁰ Wər təzəgzanay as, nak d Abba arat iyyanda a nəmos? Aratan win dawan-əməla da wərgəx nak a tan-d-inzaman gər-i əd man-in, kalar Abba dər əmosay arat iyyanda a isandan igitan-net.

¹¹ Zəgzanat-i, nak d Abba arat iyyanda a nəmos; kud əzəgzan a wər təgem s awa ənne, zəgzənat fəl əddəlil ən mazalan win as di-tənayam taggaq-qan.

¹² Əggəyyəx əsilakanay-awan as wa sər-i izzəgzanan, ad agu imazalan win tagga. Fadda ad agu win tan-ogarnen, fəlas nak abba a z'akka.

¹³ Amaran a iqqal arat wa təgmayam s esəm-in ad t-aga, fəl ad tətəwənəy tanaya n Abba dağ Barar.

¹⁴ As dağ-i təgmayam arat a iqqal s esəm-in, ad t-aga.

¹⁵ Kud tara a di-təgam, tətəfam alwajiban-in.

¹⁶ Amaran ad əgməya dağ Abba a kawan-akfu əmadhal iyyan a xur-wan z'iməlan har faw.

¹⁷ Ənta a imosan Infas wa isinəfililan tidət, as wər təfreg əddənet əlqəbulat-net, fəlas wər tu-təhənnəy wala da təzday-tu; eges kawanay təzdâyam-tu fəlas ihoz-kawan amaran ad iggəz iwallan-nawan har faw.

¹⁸ Wər kawan-z-ayya dağ əddənet təmosam şilat ən gugelan, a kawan-d-əqqəla.

¹⁹ Dəffər alwaq wər nəggət, əddənet wər di-za-tələs anay; eges kawanay a di-tələsam anay fəlas əddâra, kawanay da ad təddəram.

²⁰ Alwaq wədi ad təssənam as nak d Abba-nin arat iyyanda a nəmos, təssənam dəx as təhâm əwəl-in, nak da aheç win-nawan.

²¹ Wa ittafan alwajiban-in, ənta a di-iran. Wa di-iran ad t-iru Abba-nin, ireq-qu nak da, sənnəfilələx-as iman-in.»

²² Inn-as Yahuza wa wər nəmos ag Isxarəyuti: «Əməli, manəmmək as dana-za-təsənnəfilələx iman-nak nakkanay ɣas, wər tan-təssosana y əddənet?»

²³ Inn-as Ƴaysa: «Awedan wa di-iran, ad ittəf awa ənne, ir-ay Abba-nin, nas-ay-du nəməl ɣur-əs.

²⁴ Wa di-wər-nəra, wədi wər əttef batuten-in; amaran batu tas təsallim da, wərgə nak a tat-igan kala ar šin Abba s ənta a di-d-izammazalan.

²⁵ Əgəx-awan-tat harwa kawan-əhe.

²⁶ Amaran əmadhal imosan Infas wa Zəddigan wa dawan-du-z-assaglu Abba s əsəm-in, a kawan-isassaxru aratan kul, assakt-iwan-du arat kul wa dawan-ənne nak iman-in.

²⁷ Oyyəx-awan-du alxer, əkfeq-qawan alxer wa-nin; nak wər dawan-t-əkfeq əs təməwit tas tu-təhakku əddənet; ad wər təşşəwəşam wala təggəz-kawan tasa.

²⁸ Təsləm-i as dawan-ənne: "Teklay a əgəx", ənney harwa: "A kawan-d-əqqəla." Ənnar ixşâl as di-tərâm, təsəffəliwəset-kawan tənna ta əgəx: "Əqqalay Abba", fəlas Abba ogar-i.

²⁹ Amaran aratan win, əmələx-awan-tan əmərədda harwa wər əgen, fəl a sər-i təzzəgzənam alwaq wad z'agin.

³⁰ Wər dər-wan z'ələsa igi ən batu tagget, fəlas əmənokal n əddənet izay-du. Wər di-in-ikka d arat,

³¹ mišan kundaba əgəx awas di-omar Abba, təssən əddənet dəx as arex Abba.» As iɣrad batu ta inn-asan: «Ənkərat əgmədatana edag a.»

15

Ƴaysa ənta a imosan esab n alyanab wa n tidət

¹ Inna Ƴaysa i nəttulab-net: «Nak a imosan esab n alyanab wa olaɣan, Abba-nin imos məşşis.

² Alədlid-in kul wa wər nətirəw ad t-ixtəs, wa itarawan ad t-ifnəz fəl ad d-inzər agu ara aggen.

³ Zun d adi da, kawanay da eway-du sər-wan awal-in tazdak;

⁴ agiwat dər-i tartəyt šilat ən ta dər-wan əge, azəl wər z'arəw ɣas-net as d-iqqətas daɣ ašək; kawanay da əlmital di da a təham as dər-i wər tərtayam.

⁵ Nak a imosan esab n alyanab, kawanay ilədlad-net. Wa dər-i igan tartəyt ta dər-əs əge, a t-idu-təgməd tənfa tagget fəlas as daɣ-i in-təqqətasam wər təfregam wala.

⁶ Wa dər-i wər nərtay, a din-itəwəgər šilat n ələdlid iqqıtasan, aqqar, itəwəkəmməd-du, itəwəgər dəy təmsay, ibələgləg.

⁷ As dər-i tərtayam, təttafam batuten-in, əgməyat dəy Məşşina di n Abba arat kul wa təram, a tu-təgrawam.

⁸ Ənta da awas tətâwanay tanaya n Abba-nin: a du-tarəwam tənfa tagget, assaknu adi as təmosam inəttulab-in.

⁹ Tara ta di-iga Abba, ənta a dawan-əge; əttəfat-tat.

¹⁰ As imos as təttafam alwajiban-in, wədi təhâm tara-nin zund əmmək as nak da əttafa win Abba, əhe tara-net.

¹¹ Ənnex-awan adi fəl ad tagim təfalawist zun ta əgey, tagim dəy təfalawist təkmâlat.

¹² Ənta da alwajib wa-nin: "Namariwat s əmmək was kawan-are."

¹³ Wər tu-təlla tara togarat ad akfu awedan iman-net fəl midawan-net.

¹⁴ As imos as tətəggim awas kawan-omara, wədi kawanay imidawan-in.

¹⁵ Wər dawan-gannaş eklan, fəlas akli wər itəssən arat wa itag məşşis. Kala kalar a dawan-gannaş imidawan-in, fəlas awas əsleş şur Abba-nin kul əssosanaş-awan-tu.

¹⁶ Wər di-təsannafranam, kawanay amaran, nak a kawan-isannafranam; əssiwaraq-qawan ad taglim, tamazalam awa təha tənfa tagget şur Məşşina. Tənfa di da ta za tahagit. A təgmayam dəy dəy Abba s əsəm-in a dawan-t-əgu.

¹⁷ Omâraq-qawan s ad tənəmərım.

¹⁸ Kud gezzar a kawan-təga əddənet, əssənət as təgzâr-i dat-wan.

¹⁹ Kud kawanay əddənet kawan-tələt, wədi əddənet tərâ wa təla; mişan wər kawan-təla, fəlas nak kawan dəy-as d-isannafranam, adi a fəl kawan-təgzar.

²⁰ Aktiwat-du awa dawan-ənneş, as: "Akli wər oger məşşis." Kud əsəkni a di-əgan alşazab, a dawan-t-assaknin kawanay da; kud tərəddawt a əgan s awal-in, wədi kawanay da, ad ardin əs wa-nawan.

²¹ Adi kul, əddəlil-in a fəl dawan-tu-z-əgin; fəlas wər əssenam wa di-d-izammazalan.

²² Ənnar du-wər-ose, əşşewalaş-asan, wər z'attarmasan əs bakkadan-nasan, eges əmərədda wər t-illa əsarı waliyyan a dasan-z-igdəlän a sər-san attarmasan.

²³ Wa di-igzaran, igzâr Abba-nin ənta da.

²⁴ Ənnar wər əge gar-essan imazalan əs wər t-illa awedan as kala tan-iga, wər z'attarmasan əs bakkadan-nasan. Ənayan-tan eges əglan əgzâran-ana nak d Abba-nin.

²⁵ Mišan adi igâ fêl ad tandu batu ta têtawaktabat day Ettawret, tønnât: "*Ëgzaran-i bannan.*"

²⁶ As d-osa əmadhal wa dawan-du-z-assagla ħur Abba, imosan Infas wa isinəfililan tidət a sər-wan du-z-igmədan Abba, a fall-i aggayyat.

²⁷ Kawanay da, a fall-i taggayyem, fəlas təddewam dər-i harwa ħur tizarat.»

16

¹ «Ëmâlaħ-awan adi fêl a kawan-wər-igməd əzəgzan-nawan.

² Ad tətəwəkkəsam day əljəməyat ən nan n əlyibada ən Kəl-Ëlyəhud, fadda ilkâm alwaq daħ-as wa daħ-wan ikkasan iman, illa ħur-əs as tara ən Məššina a immozal den.

³ Adi a dawan-z-agin aytedan fəlas wərməd a di-əzdayan wala əssânan Abba.

⁴ Ëmâlaħ-awan aratan di əmərədda, fêl a tan-du-taktim as d-ewad alwaq wa daħ z'agin aytedan tara-nasan. Aratan win wər dawan-tan-əmela daħ tizarat n əššəħəl-in ħur-wan, fəlas alwaq wədi harwa da əddewa dər-wan.»

Ëššəħəl n Infas wa Zəddigan

⁵ «Ëmərədda ad əqqəla wa di-d-izammazalan, mišan wər kawan-ihə i di-issistanan əd dad əkke.

⁶ Eges əknân man-nawan aħšud fêl as dawan-ənnəy adi.

⁷ Dər igə adi da ya, a dawan-əmela tidət: of-awan ad agla, fəlas as wər əgle wər kawan-du-z-asu Ëmadhal, as əgle amaran a dawan-t-id-assagla.

⁸ As d-osa ad issusən aytedan n əddənet as əxrâkan daħ batu n awa imosan abakkad, d awa imosan taqqat ən Məššina d awa imosan əššəriħa-net.

⁹ Issusən-tan as əxrâkan daħ batu n awa imos abakkad fəlas tugəyt a əgan a sər-i əzzəgzənan.

¹⁰ Issusən-tan as əxrâkan daħ batu n awa imosan taqqat fəlas tewəħlay a əgeħ Abba amaran wər z'ələsaħ ətəwənaħ.

¹¹ Issusən-tan as əxrâkan daħ batu n awa imosan əššəriħa ən Məššina fəlas əmənokal n əddənet, a t-imosan Iblis, ibâz-tu əššəriħa.

¹² Harwada əle batuten aggotnen as are a dawan-tanat-aga eges wər dasnat-təzmeram əmərədda.

¹³ As d-osa Infas wa Zəddigan isinifililan tidət, a kawan-issəlkəm i tidət kul ta du-təfalət Məššina fəlas batuten-net wərgəy ənta a du-z-əgmədnat, awa as z'aslu ħas a daħ dawan-z-iššiwəl ketnet, iməl-awan aratan win d-əzaynen,

¹⁴ issəħmər-i fəlas awa z'igrəw daħ awa əle a dawan-z-iməl.

15 Awa ila Abba ketnet i-nin nak da; adi a fəl dawan-ənnə, awa igraw Infas wa Zəddigan daɣ awa əle a dawan-z-iməl.»

Təkenzert ən nəttulab təqqal tədəwit

16 «A dawan-əgmədaɣ anay dəffər alwaq wər nəggət, mišan a di-tələsam anay daɣ adan wər nəggət dəffər adi.»

17 Təzzar namannan wiyyad daɣ nəttulab-net: «Ma imos almaɣna n awa danaɣ-inna da: "A dawan-əgmədaɣ anay dəffər alwaq wər nəggət, mišan a di-tələsam anay daɣ adan wər nəggət dəffər adi?" Ma imos deɣ almaɣna n "Abba a əkke"»

18 Ma imos almaɣna ən "daɣ alwaq wər nəggət" wa imal da? Arat wa daɣ işşewal da wər tu-nəgra.»

19 Issan Ƴaysa as ərân ad t-əsəstanan. Inn-asan: «Tətinamasəstinam fəlas ənnə: "A dawan-əgmədaɣ anay dəffər alwaq wər nəggət, mišan a di-tələsam anay daɣ adan wər nəggət dəffər adi."»

20 Əggəyyeɣ silakanax-awan as ad talim, təsəkkələlam mišan aytədan n əddənət əntanay əddəwen. Ad əɣşədan man-nawan eges aɣşud di a tu-təzrəy tədəwit.

21 Tantut as tətəggaz amaɣal, ad əɣşədan man-net fəl aggad wa du-təga alwaq-net; mišan as d-ihu barar-net, ad tamməzəy d əsəmmədrən daɣ arkanay wa tənay, isəddəwat-tat as du-təga awədan daɣ əddənət.

22 Kawanay da zun d adi da, əmərədda əɣşâdan man-nawan, mišan a kawan-ələsaɣ anay, əzəl wədi ad tagim tədəwit as tu-wər-illa i daɣ-wan tat-z-ikkəsan.

23 Wər di-za-təssəstanam d arat waliyyan əzəl wədi. Əggəyyeɣ silakanax-awan as, a təgməyam daɣ Abba s esəm-in a dawan-t-agu.

24 Harwada wər t-illa a təgmâyam s esəm-in. Əgməyat ad təgrəwam fəl ad tagim tədəwit təkmâlat.»

Ƴaysa irza əddənət

25 «Əmâlay-awan adi s əlmital, mišan ilkâm alwaq daɣ awan-wər-z-ələsaɣ emel n arat waliyyan iqqâlan Abba s əlmital, kalar a dawan-t-əməla s awa imos.

26 Alwaq wədi ad təgməyam daɣ Abba s esəm-in. Wər dawan-ənnə a dawan-t-ansəya,

27 fəlas Abba iman-net ir-iwan fəl as di-təram, təzzigzanam deɣ as ɣur-əs d-əgmâda.

28 Abba a ɣur d-əgmada, ose-du əddənət amaran əmərədda a tat-əgməda əqqəlaq-qu.»

29 Təzzar ənnan-as nəttulab-net: «Ənəy, əmərədda təmmalax-anax aratan s awa mosan, wərgə s əlmital.

³⁰ Næssân as tæssâna daḡ arat kul, wər t-illa arat a iqqal a dak-iḡbaran; adi da a fəl nəzzəgzan as Abba a ḡur du-təgmada.»

³¹ Inn-asan ḡaysa: «Adis əmərədda təzzəgzanam?

³² Ənəyat, alwaq ihoz, fadda iga, wa daḡ za tətəwəzəwəziwizam, akkiyyan ikka aḡaywan-net, tayyim-i-d ḡas-in; mišan ya wər əmosa ḡas-in fəlas illa ḡur-i Abba.

³³ Əmâlaḡ-awan arat wa fəl ad təgrəwam alxer daḡ tærtəyt ta dər-i təgam. Ad tənəyam arkanay daḡ əddənet, ad wər tiksadam wala, fəlas əddənet ərzêq-qat.»

17

Təwatray ən ḡaysa i nəttulab-net

¹ As inna ḡaysa awen, idkal asawad-net iggəzzay ijənnawan, ittar inna:

«Abba, alwaq ewad-du, saknu tanaya ən Barar-nak fəl ad assaknu ənta da ta nak,

² id təzzozaraq-qu y aytedan kul fəl ad akfu təməddurt ta təḡlalat i win tu-təkfe.

³ Amaran təməddurt ta təḡlalat awa tat-imosan, ad inəfiləl y aytedan awa təmosa, kay a imosan Məşşina wa n tidət; inəfiləl-asan əntada as ḡaysa Əlməsix a du-təzammazala.

⁴ Əssikna tanaya-nak fəl amaḡal s əsəndi wa əge əşşəḡəl was di-təssəwaray igi-net.

⁵ Amaran əmərədda kay Abba, akf-i ḡur man-nak tanaya ta ḡur-ək ələḡ harwa dat əxluk n əddənet.

⁶ Sinafâlalaḡ awa təmosa y aytedan win du-təsannafrana təkataq-qan-du daḡ əddənet, təgeq-qan daḡ əfus-in əttafan awal-nak.

⁷ Əmərədda əssânan as arat kul wa di-təkfe, kay a ḡur d-igmad.

⁸ Fəlas əmâlaḡ-asan awa di-tənnə, əqbalan-tu, amaran silakanan as kay a ḡur d-əgmada, əzzigzanan dəḡ as di-du-təzimazala.

⁹ Wər kay-tinsəya y aytedan win əddənet, kalar aytedan win di-təkfe as kay-tansayaḡ fəlas əntanay a tələḡ.

¹⁰ Awa əle kul i-nak, kay da awa təle kul i-nu; amaran əntanay en da a daḡ tənafalal tanaya-nin.

¹¹ Nak, ab'as aheḡ əddənet, kay a din-əkke, əntanay amaran əhân-tat. Ya Abba di zəddigan, agəz-tan s esəm-nak wa di-təkfeḡ, fəl ad əqqələn arat iyyanda şilat ən wa dər-ək əmosa.

¹² Harwa tan-əhe, ogâzaq-qan s esəm-nak, a di-təkfe, wər daḡ-san ixrek waliyyan ar wa ixrakan fəl ad andu awa ənnan İlkəttaban.

¹³ Æmæredða kay a din-ække, gannaḡ awa harwa æheḡ æddænet fæl ad agin tæfalawist tændât ta da ægeḡ.

¹⁴ Æmâlaḡ-asan awal-nak tægzar-tan æddænet fêlas wær tan-tæla zun d as nak iman-in da wær di-tæla.

¹⁵ Wær daḡ-ak ægmaya a tan-tækkæsa daḡ æddænet, mišan ægmâya daḡ-ak a tan-tagæza daḡ Iblis.

¹⁶ Wær tan-tæla æddænet, zun d as nak iman-in da wær di-tæla.

¹⁷ Zæzdæg iwallan-nasan s awal-nak imosan tidæt.

¹⁸ Æzæmmizæl wa di-du-tæge s æddænet, ænta a tan-sær-æs-æge nak da.

¹⁹ Amaran ækfeḡ-qay iman-in fæl æddælil-nasan fæl ad akfin win-nasan æntanay da æs tidæt.

²⁰ Wærgæḡ inættulab-in ḡas as kay-tansaya, kalar tansayaḡ-qay y aytedan win sær-i z'æzzægẓænne s æssæbab n as æslan y awal-nasan.

²¹ Ægmâya daḡ-ak a tan-igan ketnasan arat iyyanda s æmmæk was dær-æk t-æmosa; næqqæl-tu dær-san nakkanay da fæl ad tæzzægẓæn æddænet as kay a di-d-izammazalan.

²² Ækfêḡ-qan tanaya ta di-tækfe, fæl ad æqqælan arat iyyanda s æmmæk was tu-næmos nak dær-æk.

²³ Nak ærtâya dær-san, kay tærtâya dær-i. Æqqælanet arat iyyanda æs tæmæwit tændât fæl ad tæssæn æddænet as kay a di-d-izammazalan tægeḡ-asan deḡ tara ta di-tæge.

²⁴ Abba, areḡ as win di-tækfe ad æggæzan æntanay da edag wa æhe fæl ad æhannayan tanaya ta di-tækfe fêlas di-tare harwa dat æxluk n æddænet.

²⁵ Abba, kay a oḡadan, æddænet wær kay-tæssen eges nak æssânaḡ-qay amaran inættulab-in, æssânan as kay a di-d-izammazalan.

²⁶ Æssôsanaḡ-qan awa tæmosa amaran wær z'ammazzaya d igi n adi, fæl a tan-tæggæz tara ta di-tægeḡ, ærtâya dær-san.»

18

Ætærmæs æn ḡaysa

¹ As iga ḡaysa batu ta, ikka tama ta hadat n ægirer wa n Kedron. Iggaz afarag n eškan illân-den ænta æd nættulab-net.

² Edag wen issân-tu Yahuza Isxaræyuti wa z'akkaddalan ḡaysa, fêlas faw da itakk-ay ḡaysa ænta æd nættulab-net.

³ Azzar-du Yahuza y agan æn sojitan æn Kæl-Ærrum, æd magazan n Ahan wa Zæwwæran n Æḡibada a d-æssiglan muzaran æn limaman, æd Farisaytan, ewâyan fætølaten, æd belan, æd tæzoli-nasan.

4 As din-ewadan ihoz-tan-in Ƴaysa issânan day arat kul wa tu-z-igrëwan, issëstan-tan inn-asan: «Ma imos was tësaggadam?»

5 Ennan-as: «Ƴaysa wa n Nazaret as nësaggad.» Inn-asan: «Nak da da.» Ibdâd gar-ëssan Yahuza wa t-ikkëddalan.

6 Amazay wa da day dasan-inna Ƴaysa: «Nak da da» ënta a day ërmaxan ëqqalan dëffer-san har udan.

7 Ilas Ƴaysa inn-asan: «Ma imos was tësaggadam?» Ennan-as: «Ƴaysa wa n Nazaret as nësaggad.»

8 Inn-asan: «Wërgëx ënnëx-awan nak da da. Day adi kud nak as tësaggadam, tayyim aytedan win da ad jëwënkën.»

9 Emmëk wen da as inda awal wa iga dat awen as inna: «Wër day-i z'ixrëk waliyyan day win di-tëkfe.»

10 Ihâd-du Simxon Butros ilbây-du takoba-net iwat sër-ës akli n Elimam wa Zëwwëran, ifras-du tëmëzzuk-net ta n ëxil. Akli wa esëm-net Malxus.

11 Tëzzar inna Ƴaysa i Butros: «Suxël takoba-nak tëtërut! Awak ad aqqama wër ëgëx alxazab wa di-ixkam Abba?»

Ëtëwësëbdad ën Ƴaysa dat limaman

12 Tëzzar obazan Ƴaysa, ëkradan-tu, ëmosan egan ën sojitan ën Kël-Ërrum d ëmuzar-nasan, ëd magazan n Ahan wa Zëwwëran n Ëlxißada a d-ëssiglan muzaran ën Kël-Ëlyëhud.

13 Ewayan-tu azzaran dër-ës s aÿaywan ën Xânan wa n ëdaggal ën Kayif wa imosan Elimam wa Zëwwëran day awatay wen.

14 Amaran Kayif ënta a igan i muzaran ën Kël-Ëlyëhud tanat ta n as ofa ad ammat awedan iyyanda day adag ën tamattay.

15 Ilkam Simxon Butros i Ƴaysa ënta d ënattalib iyyan. Enattalib wa izdây Elimam wa Zëwwëran iman-net, tëzzar iggaz afarag wa iÿlayan aÿaywan n Elimam wa Zëwwëran day amazay wa da daq-q iggaz Ƴaysa.

16 Butros ënta iqqim-du dat ahan, ður ëmi n aÿalla. Irday-du ënattalib wen, igraw ður tëntut ta togazat tësëhërt ad tayyu Butros iggëz aÿaywan.

17 Tëzzar tënna tëmăşşaxalt ta togazat imi n ahan i Butros: «Wërgë kay da iyyan day nëttulab n alës wa a tëmosa?» Inn-as: «Wër t-ëmosa.»

18 Asamed igâ. Ƴilayxalayan eklan ëd magazan n Ahan wa Zëwwëran n Ëlxißada temsay ën tëmakaten ësukusan sër-ës. Ik-en-in Butros ënta da ad isukus.

19 As itaggu awen isastan Elimam wa Zëwwëran Ƴaysa day talxa ën nëttulab-net, d ësëssëÿri wa itaggu.

²⁰ Inn-as Ƴaysa: «Awal wa əge y əddənet, wər imos arat ixbâran. Faw da inan ən taɣaray ən Kəl-Əlyəhud d Ahan wa Zəwwəran n Əlɣibada a daɣ sasaxra dad əddewan Kəl-Əlyəhud kul, daɣ adi wər t-illa awal əge daɣ əssir.

²¹ Mafel as di-təsastana? Səstən aytedan win di-əslanen d aratan win daɣ dasan-əmməgrada; əntanay əssânan daɣ arat wa ənne.»

²² As inna Ƴaysa arat wa, iqqas-as iyyan daɣ magazan n Ahan wa Zəwwəran n Əlɣibada ibdâdan den, inn-as: «Ma kay-issəhalan igi n aljawab wa y Əlimam wa Zəwwəran?»

²³ Ijjəwwab-as Ƴaysa inn-as: «Kud arak batu a əge, əməli edag wa daq qat-əge. Kud amaran əgeɣ batu tolaɣat, ma imos əddəlil wa fəl di-təggata?»

²⁴ Issərdaq-qu Xânan da ikrad, issok-ay Kayif wa n Əlimam wa Zəwwəran.

²⁵ As itaggu awen, Simyon Butros illa den isukus əs təmsay en da. Itawann-as: «Wərgə kay da arat daɣ nəttulab n aləs wa a təmosa?» İlas Butros şigget ən Ƴaysa, inna: «Kala kala wər t-əmosa.»

²⁶ İnkâr-du iyyan daɣ eklan n Əlimam wa Zəwwəran, imosan əşəqqax n aləs was d-ifras Butros təməzzuk-net, inna i Butros: «Wərgəɣ ənâyaq-qay təddewa dər-əs daɣ afarag?»

²⁷ İlas Butros şigget ən Ƴaysa. Amazay wen da daɣ iɣra əkəji aɣora.

Ətəwəsəbdad ən Ƴaysa dat Bilatəs

²⁸ İmmeway Ƴaysa ɣur Kayif s aɣaywan n ənaxkim. İtaggu awen ɣur əfərirəy n anay. Aytedan win dər-əs d-əddewnen wər dər-əs əggezən aɣaywan wa n ənaxkim, fəl ad əttəfan tazdak-nasan har atşin amensay wa n Akkay.

²⁹ Awen da fəl sər-san d-igmad Bilatəs wa n əmuzar n akal ehan-net, ikk-en-du inn-asan: «Ma imos lahan wa fəl təbazam aləs wa?»

³⁰ Ənnan-as: «Ənnar wər imos əməggi ən təkma, wər dak-k-idu-za-nawəy».

³¹ Inn-asan Bilatəs: «Awəyat-tu təxkəmam-as s əşşərixa wa-nawan.» Ənnan-as Kəl-Əlyəhud: «Nakkanay wər nəla turagat ən tanaxay n awedan.»

³² Arat wa igâ fəl ad andu awal wa iga Ƴaysa assaxa wad imal ənnux ən təməttant ta z'agu.

³³ Təzzar iqqal Bilatəs ehan-net iɣr-in Ƴaysa issəstantu inn-as: «Awak kay daɣ a imosan əmənokəl ən Kəl-Əlyəhud?»

³⁴ Inn-as Ƴaysa: «Arat wa kay iman-nak as tu-tənne, meɣ ak aytedan wiyyad a dak-k-ənnanen sər-i?»

³⁵ Inn-as Bilatës: «Un nak iyyan daḡ Kəl-Ēlyəhud a mosa? Tamattay-nak, əd limaman win zawwarnen a kay-d-ewaynen sər-i, ma imos arat wa təḡşada?»

³⁶ Ijjəwwab-as Ƴaysa inn-as: «Taḡmar-in wər tat-təla əddənet ta da. Ēnnar taḡmar-in təll-et əddənet a, ənkərnat-du təḡurad-in əknəsnať fəl ad wər əggəzay ifassan ən Kəl-Ēlyəhud. Kala kala, igmād ašşak as taḡmar-in wər tat-təla əddənet ta da.»

³⁷ Inn-as Bilatës: «Ak tidət as kay a imosan əmənokəl ən Kəl-Ēlyəhud?» Ijjəwwab-as Ƴaysa inn-as: «Kay da tənney adi. Awalla əmənokəl a mosa. Arat da wa fəl d-əhəwa amaran ənta fəl d-əggazay əddənet a t-imosan as assa a d-əge y ad aggayyey i tidət. Awedan wa ilkaman i tidət, kul issisam y awal-in.»

³⁸ Inn-as Bilatës: «Tidət za ma təmos?»

Təzzar iqqal-du Bilatës Kəl-Ēlyəhud inn-asan: «Fəl aganna za wa di-iqqalan nak, wər əhənnəya lahan waliyyan iga aləs wa.

³⁹ Mišan ya, daḡ arat wa imosan alyadat əs id d-iḡlay əmud wa n Akkay a dawan-d-əkkəsay iyyan daḡ məskəsə-nawan. Meqqal tarām a dawan-sassayya əmənokəl ən Kəl-Ēlyəhud?»

⁴⁰ Ēlasan adakal ən maslan-nasan wəllen ketnasan ənnan-as: «Kala, kala, wərgəy ənta! Barḡabbas as nəra danaq-q-idu-təkkəsə.» Barḡabbas wa əjajəb n ənəffelləg a imos.

19

¹ Təzzar omar Bilatës s ad təwəgginat təwit n ələkkud i Ƴaysa; itawagg-as awen da.

² Ēzdān sojitan təkəbbut təgāt əs šənnanan əssəwarantat eyaf-net, əzzəzlagan-tu deḡ əbərnuz zaggayan.

³ Tihazan-t-in gannan-as: «Oyy-ik! Ēmənokəl ən Kəl-Ēlyəhud!» Taqqasan-as sa əd sa.

⁴ Ilas-du Bilatës aradaḡ, inna i Kəl-Ēlyəhud: «Ēnəyat! A dawan-t-id-əssərdəḡa, ad təssənam as wər fall-as ənaya lahan waliyyan fəl iwwəddab.»

⁵ Təzzar irdaḡ-du Ƴaysa təwâr-tu təkəbbut ən šənnanan, izlāg əbərnuz zaggayan, inn-asan Bilatës: «Aləs-nawan əddi.»

⁶ As t-oggan muzaran ən limaman əd magazan n Ahan wa Zəwwəran n Ēlyibada, ədkalan imaslan-nasan gannin: «Taytay-tu fəl təgəttawť! Taytay-tu fəl təgəttawť!» Inn-asan Bilatës: «Abəzat-tu kawanay iman-nawan tattaytayam-tu, nak wər hənnəyay əddəlil waliyyan a t-issiwaran təmattant.»

⁷ Ænnan-as muzaran ən Kəl-Ëlyəhud: «Nakkanay nəla əššərixa, amaran əššərixa wa, ih-ay as aləs wa ihor əd təmattant, fəlas a inna ənta Barar ən Məššina a imos.»

⁸ Batu ta təga tasa wəllen daɣ Bilatəs,

⁹ iqqal ehan-net, iggaz edag wa n əššərixa, inna i Ƴaysa: «Mənis du-təhe?» Mišan wər das-iga Ƴaysa aljawab waliyyan.

¹⁰ Amazay wen da das-inna Bilatəs: «Nak as tugaya s a di-təššiwəla? Wər təssenax as əle fərregat n a kay-sassayya, əleɣ əntada fərregat n a kay-attaytaya fəl təgəttawt?»

¹¹ Inn-as Ƴaysa: «Wər fall-i təle tarna waliyyat ar ta sər-ək du-təfalat Məššina. Adi da fəlas awedan wa di-igan gər fassan-nak, ogar-kay igi n abakkad.»

¹² Amazay wen da daɣ iggaz Bilatəs šin agamay n asaway was z'ayyu Ƴaysa. Mišan ənkaran-du Kəl-Ëlyəhud ad gannin s afalla: «Aləs di as tu-təsassayya, wədi wər təmosax əmidi ən Qaysara, əmənokal ən Kəl-Ërrum, fəlas awedan wa innan imos əmənokal, wədi azangaw ən Qaysara a imos!»

¹³ As isla Bilatəs i batu ta, issərdaɣ-du Ƴaysa, təzzar iqqim daɣ təxawit ta n adag n əššərixa. Edag wa esəm-net «Aɣarɣar ilsân təsəlīt» itawann-as daɣ təlɣibrit «Gabbata».

¹⁴ Itaggu awen ammasnazal n əzəl wa oggan amud wa n Akkay, simutugan aytedan y əmud. Inna Bilatəs i Kəl-Ëlyəhud: «Əmənokal-nawan əddi!»

¹⁵ Iqqal-asan awen as sahhaken imaslan-nasan wəllen gannin: «Ammatet! Ammatet! Taytay-tu fəl təgəttawt!» Inn-asan Bilatəs: «Daɣ adi ad attaytayax əmənokal-nawan fəl təgəttawt?» Ænnan-as muzaran ən limaman: «Əmənokal-nana wər t-imos ar Qaysara.»

¹⁶ Təzzar ikf-en Bilatəs Ƴaysa y ad itəwətəytəy fəl təgəttawt.

Ëtəwətəytay ən Ƴaysa fəl təgəttawt

Ëzzərgazan sojitan Ƴaysa.

¹⁷ Igmad aɣrəm ewây ənta iman-net təgəttawt ta fəl z'itəwətəytəy. Ækkan dər-əs edag as itawannu «Təkəyya», itawann-as deɣ daɣ təlɣibrit «Golgota».

¹⁸ Den da ad əttəytayan sojitan Ƴaysa fəl təgəttawt. Tawataytayan əššin meddan wiyad əntanay da fəl təgəttawen dəgma-net, a daɣ illa Ƴaysa gar-essan.

¹⁹ Omar Bilatəs s ad ammadkal əsəllum itəwəktəb fall-as: «Awa Ƴaysa WA N NAZARET, Əmənokal ən Kəl-Ëlyəhud», itəwətəytəy daɣ afalla ən təgəttawt. Itawagga awen da.

²⁰ Ëɣran Kəl-Ëlyəhud aggotnen əsəllum wa. Ənta edag wa daɣ itawataytay Ƴaysa fəl təgəttawt ihoz aɣrəm, amaran

əsəllum wa iktâb day awal wa n təlyibrit, əd wa n təlatint əd wa n təlyunant.

²¹ Ennan limaman win zawwarnen ən Kəl-Əlyəhud i Bilatəs: «Ad wər tayyağ əsəllum wa təssəltaxa təgəttawt iktâb fall-as âs: "Aləs wa əmənokal ən Kəl-əlyəhud", kalar əktəb fall-as âs: "Aləs da wa innan ənta a imosan əmənokal ən Kəl-Əlyəhud."»

²² Inn-asan Bilatəs: «Arat wa əktaba, wər-tu-za-səmməttəya.»

²³ As əttəytayan sojitan Ƴaysa fəl təgəttawt, ədkalan isəlsa-net, əgan-asan əkkozat təzunen, əkkulluk n iyyan day-san igrâw iyyat. Ədkalan əntada təkadkat-net ta zəwwərat, təgât day təbdoq wər iha a imosan azamay, tosâğ-du Ƴur afalla har eres.

²⁴ Ennan gar-essan: «Ad wər nəzəzzərrət təkadkat ta, ofa ad nagu şışaxeren fəl ad nəssən wa tat-z-ilen.» Arat wa ənnân-tu fəl ad tandu batu təhât Əlkəttaban ta tənnat: «*Əzunan tabdoq-in, təzzar əgan şışaxeren fəl təkadkat-in.*»

Arat wen ənta iman-net a əgan sojitan win den.

²⁵ Təgəttawt ta fəl ittəytay Ƴaysa, əbdâdnat dagma-net tədoden əmosnen anna-net, əd Maryama ta n tamadrayt n anna-net, təmosat tağur Klobas, əd Maryama Madəl.

²⁶ Ogga Ƴaysa anna-net, inay ənattalib-net wa n əməri-net ibdâd dagma-net, inn-as: «Anna, barar-nam əddi.»

²⁷ Təzzar inna y ənattalib-net wen: «Anna-nak əddi.» Amazay wen da day dər-əs iddew ənattalib wen s ağaywan-net issan day-as.

²⁸ Dəffər awen inna Ƴaysa: «Ih-i fad», fəlas issân as arat kul ikmal, amaran arat wa wər t-inna ar fəl ad andu awa ənnan Əlkəttaban.

²⁹ Edag en insa day-as əğəzu iha bənəgər, təmmədkal-du təduft tətawattal d əmi n agabal n əzzənəf n ənnixnağ iyyan idwâlan as itawannu xisof, tətawasalmağ-du day bənəgər wa, tətawazzal-in s əmi-net.

³⁰ As izannalmaz Ƴaysa bənəgər, inna: «Arat kul ikmal.» Təzzar issəras eyaf-net, əgmadan-tu man.

Ətəwəgga ən Ƴaysa day əzəkka

³¹ Əzəl wen simutugan aytedan y əmud wa n Akkay. Wər əren Kəl-Əlyəhud ad aqqaminat alzanazaten n aytedan əwârnat şigəttawen day əzəl wa n təsanfawt-nasan. Ənta əzəl wen, wər ogda əd win hadatnen təzzəwwərt. Əkkan muzaran ən Kəl-Əlyəhud Bilatəs ənnan-as: «Amər s ad tawarzin daran-nasan, fəl a tan-iba tarmad, təssukəsa-du alzanazaten-nasan!»

³² Ækkan-du sojitan meddan win tawataytaynen dagma ən Ƴaysa. Ærzan idaran ən wa azzaran, okayan əs wa n əššin əgan-as awen da.

³³ As d-ewadan Ƴaysa ənayan âs as d-osan da aba-tu. Æqqiman da wər ərzen idaran-net,

³⁴ Mišan idag iyyan daƷ sojitan win tasaga ən Ƴaysa s allax-net, iffay-du daƷ-as əzni d aman.

³⁵ Awedan wa igan isalan win, inay-tan əs šittawen-net, amaran təgəyya-net tidət a təmos. Issân as tidət ta təzdarat as iššewal da, fəl ad təzzəgzənam kawanay da.

³⁶ Ənta aratan win kul wər əgen ar fəl ad tandu batu təhât Ælkəttaban ta tənnat: «*EƷas-net waliyyan wər z'arraz.*»

³⁷ Ælkəttaban ih-en əntada as: «*Ad əssədəgan isawadan-nasan sa sər wa saxxarabben.*»

³⁸ Dəffər adi osa-du Yusəf wa n əxrəm n Arimatay, imosan iyyan daƷ nalkiman ən Ƴaysa, eges daƷ əssir, fəlas iksud Kəl-Ëlyəhud. Ikka Bilatəs igmay daƷ-as ad awəy taƷəssa ən Ƴaysa. Ikf-ay Bilatəs turagat n awen, təzzar igla eway-tat.

³⁹ Osa-du Nikodemos ənta da, s ənta as kala din-osa Ƴaysa ahad iyyan. Eway-du təfaršit daƷ ənƷâlan alwarditan təmosat amađal ən karadat təmərwen ən kilaw.

⁴⁰ Idkal-du Yusəf əd Nikodemos taƷəssa ən Ƴaysa əgantat daƷ šifit təgât daƷ təsəwad, əssəlalan-tat ađutan əzodnen win. Arat wa imos alƷadat ən Kəl-Ëlyəhud daƷ anabal ən nəmməttan.

⁴¹ Edag wa daƷ itawataytay Ƴaysa fəl təgəttawt ih-ay afarag. Amaran afarag wen ih-ay əzəkka imosan akazam as wər kala a daƷ-as itawagga ənəmməttən.

⁴² Əzəl wen ənta daƷ simutugan Kəl-Ëlyəhud y əzəl-nasan wa n təsanfawt, awen da fəl iga Yusəf əd Nikodemos Ƴaysa daƷ əzəkka wa, fəlas ənta a ihozan.

20

Tanakra ən Ƴaysa day təmattant

¹ As affaw əzəl wa n alxad, harwa da wər ifarayray anay, as təkka Maryama Madəl əzəkka. As din-tosa tənay as təhünt ta təharat əzəkka tətawakkas-du.

² Tozal təkka SimƷon Butros d anattalib wa isannahal Ƴaysa tara tənn-asan: «*Əməli itawakkas daƷ əzəkka amaran wər nəssen edag wa daƷ itawagga.*»

³ Irdax-du Butros d anattalib wa hadan əkkan əzəkka.

⁴ Ozalan, azzar-in ənəttalib wa hadan fəlas orna Butros daƷ azzal.

⁵ Iššəgga inay šisəwad šin šifit ənsânat den, mišan wər iggez.

6 As d-ewad Simxon Butros wa das-d-ilkaman, iggaz əzəkka, inay əntada şisəwad şin ənsânat den.

7 Inay asalsaw wa iwaran eɣaf ən Ƴaysa wər irtay əd şifit, ittâl insa s aganna.

8 Təzzar iggaz-du anattalib wa hadan, s ənta a d-azzaran, inay arat wa izzəgzan-tu.

9 Ənta harwa da wər əgren batu ta tənnat day Ʒlkəttaban, Ʒlməsix kundaba inkar-du day təmattant.

10 Təzzar əqqalan nəttulab win den aɣaywan.

Ənəfilal ən Ƴaysa i Maryama Madəl

11 Təqqim-du Maryama təhallu dagma n əzəkka. Təşşəgg-in daɣ-as,

12 tənay əşşin angalosan əssimlalnən, əqqiman daɣ adag was kala a tu-təha təxəssa ən Ƴaysa. Iyyan illa ɣur anamod n aɣaf-net, wa hadan illa ɣur daran-net.

13 Ənnan-as: «Ma kam-isâlan, tantut?» Tənn-asan: «Wər di-isəlu ar as immeway Ʒməli-nin, amaran wər əssena dad itawagga.»

14 As tənna arat wa, təswad dəffər-əs, togga Ƴaysa ibdâd. Mişan wər təssen as ənta awen.

15 Inn-as Ƴaysa: «Ma kam-isâlan tantut? Ma imos was təsaggada?» Tənn-as Maryama: «Ya aləs, kud kay a t-ewayan, təmələɣ-i dad illa, a t-id-awəya.» Arat wa, as das-tu-tənna a təɣil əmagyak n afarag wa iha əzəkka a das-işşewalan den.

16 Inn-as Ƴaysa: «Maryama!» Təzzar təmalallay-t-in tənn-as daɣ awal wa n təlɣibrit: «Rabbuni!» (Almayna n awen Ʒşşex-in.)

17 Inn-as Ƴaysa: «A di-wər-təgdəla teklay, fəlas harwa da wər əggəzzaya s Abba, kalar aglu əməl i mədrayan-in as nak ad aggazzaya s Abba-nin, s ənta a imosan Abba-nawan kawanay da, aggazzaya s Ʒməli-nin s ənta a imosan Ʒməli-nawan kawanay da.»

18 Təgla Maryama Madəl təmal i nəttulab as tənây Ʒməli, təmal-asan deɣ awa das-inna.

Awa d-izdaran daɣ Ʒlkəttab wa

Ənəfilal ən Ƴaysa i nəttulab-net

19 Tadwit n alxad wen da iman-net, əddewan nəttulab, əɣfalan-du ehan fəl man-nasan, fəlas əksudan imuzaran ən Kəl-Ʒlyəhud. Osa-du Ƴaysa ibdad gar-essan inn-asan: «Alxer fall-awan!»

20 As dasan-inna awen issəkn-en ifassan-net, əd tasaganet. Falawasan nəttulab fəl anay wa əgan Ʒməli.

21 İlas inn-asan: «İg-awan Məşşina alxer! Ʒzimazalaq-qawan s əmmək was di-d-izammazal Abba.»

²² As dasan-iga batu ta, issəwad-du fall-asan s əmi-net, inn-asan: «Təgrəwamet Infas wa Zəddigan!

²³ Win as təssorafam ibakkadan-nasan za, a dasan-təwəsurəfan, amaran win as tan-wər-təssorafam, wər z'əgrəwan təsureft-nasan.»

Ənəfilal ən Ƴaysa i Tuma

²⁴ Tuma was təsəmmadəq-net Eknay imosan iyyan dəy nəttulab win maraw d əşšin, wər illa den as ənayan Ƴaysa.

²⁵ As das-ənnan nəttulab win: «Nənây Əməli!» Inn-asan: «Wər z'əzzəgzənaɣ iket wər ənaya şimijar ən nəsmar dəy fassan-net, ədəsaɣ idaggan-nasan s adad-in, ədəsa dəy tasaga-net s əfus-in.»

²⁶ As əgan əttam adan dəffər awen, əddewan-du nəttulab ən Ƴaysa dəy ahan iyyan amaran taklat ten ih-en Tuma. Iggaz-du fall-asan Ƴaysa da əharnat təsəhar n ahan, ibdad gar-essan, inn-asan: «Ig-awan Məşşina alxer!»

²⁷ Dəffər adi inna i Tuma: «Agu adad-nak da, təswəda dəy fassan-in, tədəsa dəy tasaga-nin s əfus-nak, təzzəgzəna taqqama da wər təqqələɣ awedan wər nəssen Məşşina!»

²⁸ Inn-as Tuma: «Ya Məşşina di n Əməli-nin!»

²⁹ Inn-as Ƴaysa: «Kay wər təzzəgzəna har di-tənaya. Əbbilalan aytedan win di-wər-nəny mişan əzzigzənan!»

Əlməxsud n Əlkəttab wa

³⁰ Immozal Ƴaysa alxalamaten şiyvad aggotnen dat nəttulab-net, mişan ya wər sər-əsnat imməgrad əlkəttab wa.

³¹ Eges arat wa t-ihan, itiwaktab fəl ad təzzəgzənam as Ƴaysa ənta a imosan Əlməsix, imos dəy Barar ən Məşşina, amaran, as sər-əs təzzəgzənam ad təgrəwam təməddurt s esəm-net.

21

Ənəfilal ən Ƴaysa i nəttulab-net ɣur tama n agaraw

¹ Dəffər awen ilas Ƴaysa ənəfilal i nəttulab fəl təgadamayt n agaraw wa n Tiberəyad. Əmmək da was dasan-inafalal:

² Simyon Butros, əd Tuma was təsəmmadəq-net Eknay, əd Natanəyel wa n Kâna dəy amadəl ən Galilaya, əd bararan ən Zabaday, d əşšin nəttulab wiyyad, ketnasan əddewan.

³ Inn-asan Simyon Butros: «Nak ad akkaɣ edag n abbaz ən kifitan.» Ənnan-as: «Nakkanay da nəddew dər-ək.» Əglan, əggəzan aɣlal n aman. Ahad wen wər obezan wala.

⁴ As affaw iwar-in Ƴaysa təgadamayt n agaraw, mişan wər əssenən nəttulab-net as ənta awen.

⁵ Inn-asan: «Imaran-in, awak abbaz a wər təgem wala dəy kifitan?» Ənnan-as: «Kala».

⁶ Inn-asan: «Əgərat əməzzezdər-nawan wa n abbaz ən kifitan fəl aganna n əxlal wa n əxil, a tan-təgrəwam.» Əgaran əməzzezdər-nasan dağ agaraw, təzzar indar-asan a t-id-ədkəlan, fəl awa əgan kifitan win t-əhanen dağ igət.

⁷ Inkar ənəttalib wa isannahal Yaysa tara inna i Butros: «Awen Əməli!»

Da dağ ad isla Simxon Butros as Əməli awen, ənta ad iqqan asalsaw-net wa n afalla, fəlas izzâf, təzzar itaraggat dağ agaraw.

⁸ Amađal ən sanatat təmad n əxil a əllanen gar-essan əd təgadamayt n agaraw. Əqqiman-du nəttulab win hadatnen dağ əxlal ərkâban-du dəffər-san əməzzezdər-nasan, idnây kifitan.

⁹ Əzzəbben-du ças oggan temsay ən təkakaten fəl nanın kifitan, tənsa dəx təgəlla den.

¹⁰ Inn-asan Yaysa: «Awəyat-du arat dağ kifitan win du-tobazam əmərədda.»

¹¹ Igməd-du Simxon Butros aman illil-asan s arakab n əməzzezdər wa əhan kifitan. Təmeday əd səmmosat təmərwen ən kifi əd karad əs kul win zawwarnen a t-əhanen mişan wər izzərrat.

¹² Inn-asan Yaysa: «Ayewat tatsim.» Wər iha inəttulab i ihalan ad issəstən Yaysa ann-as: «Ma təmosa?» Fəlas əssânan as Əməli awen.

¹³ Ihoz-tan-in Yaysa, obaz-du tagəlla ikf-asan-tat, ikf-en əntada kifitan.

¹⁴ Taklat ta ənta a təmosat ənəfilal wa n karad a d-iga Yaysa i nəttulab-net dəffər tanakra-net dağ təmattant.

Yaysa əd Butros

¹⁵ As ətşan inna Yaysa i Simxon Butros: «Simxon ag Yaxya, awak tidət as tara ta di-təge togar ta di-əgan nəttulab win hadatnen?» Inn-as Simxon: «Ayew Əməli, təssâna dağ tara ta dak-əge.» Inn-as Yaysa: «Agəz za ijamaran-in.»

¹⁶ Ig-as y əsəstan wa igi wa n əşşin inn-as: «Simxon ag Yaxya, awak tərəx-i?» Inn-as Butros: «Ayew Əməli, təssâna dağ tara ta dak-əge.» Inn-as Yaysa: «Əqqəl za amadan n ayfəd-in.»

¹⁷ Ig-as y əsəstan wa igi wa n karad inn-as: «Simxon ag Yaxya, awak tərəx-i?» Əxşadan man ən Simxon Butros fəlas karad igitan das-iga Yaysa y əsəstan wa. Inn-as: «Əməli, kay a issanan dağ arat kul, təssânaç as əreq-qay.» Inn-as Yaysa: «Əssən za dağ ayfəd-in.»

¹⁸ Əggəyyəç əsilakanay-ak as harwa taynaya, iman-nak as təlassa tabdoç-nak, tətakkay edag was tare, mişan as

təqqalay aymar, ad təzzəlay ifassan-nak, assals-ik awedan iyyan tabdoq-nak, awəy-kay s adag as wər tarex iki-net.»

¹⁹ Batu ta issoka sər-əs Yaysa ənnux ən təmattant ta z'agu Butros s ənta as z'assaknu adkul wa iga i Məşşina. As iga Yaysa batu ta inn-as: «Əlkəm-i»

²⁰ Iswad-in Butros dəffər-əs ogga anattalib wa isan-nahal Yaysa tara ilkâm-asan-du. Anattalib wa ənta a isağxamaran dəx ihəz n ədmaran ən Yaysa ahad wad tattin imensewan n əmud wa n Akkay, ənta dəx as kala ad issəstanan Yaysa inn-as: «Əməli, ma imos wa kay z'akkaddalan.»

²¹ As t-ogga Butros issəstan Yaysa inn-as: «Ənta za Əməli, ma dəx-as ilkaman?»

²² Inn-as Yaysa: «Kud tara a əgeş ad iddər har d-əqqəla, tədi wər kay-təqqel. Kay əlkəm-i şas!»

²³ Wazawazan salan dəx məzzəgzan əs Yaysa as anattalib wa wər tu-z-iba. Ənta Yaysa wərgəş a inna wər tu-z-iba, tənna şas a iga: «Kud tara a əgeş ad iddər har d-əqqəla tədi wər kay-təqqel.»

Zagzal dəx batu ta təmosat əlməxsud n əlkəttab wa

²⁴ Anattalib wa ənta iman-net as iggəyyat fəl igitan win, iktab-tan. Nəssân as təgəyya-net tidət a təmos.

²⁵ Yaysa iga aratan wiyyad aggotnen. As igmay awedan d a sər-san ammagrad s iyyan-iyyan, ordeş as əddənət ketnet da wər za tawəy əlkəttaban win z'iktəb.

Igitan ən Nəmmuzal

Əkkozat tēmərwen n əzəl win dat əmədkəl ən Ƴaysa

Əsənti

¹ Ya Tayofil, əlkəttab-in wa azzaran əktâbağ day-as aratan kul win as issənta Ƴaysa igi-nasan d əsəssəğri-nasan,

² har əzəl wa d immədkal əs jənnawan dəffər as iga ammaran-net əs tarna n Infas wa Zəddigan i nəmmuzal-net win isannafran.

³ Əntanay en da a issəkna iman-net dəffər alyazab-net. Isattad-asan əs tēməwiten aggotnen tanakra-net day tamattant. Əkkozat tēmərwen n əzəl a iga itinəfilil-asan, itagğ-asan isalan ən Tağmar ta n Məşşina.

Arkawal n assa n Infas wa Zəddigan

⁴ Əzəl iyyan idrâw dər-san imensewan as tan-omar, inn-asan: «Ad wər təgmədam əğrəm ən Yerusalam. Əqqələt y arkawal n Abba wa dawan-əmala,

⁵ fəlas Yaxya aman a day issəlməğ aytedan mişan kawanay, ğur adan wər nəğgət, Infas wa Zəddigan a day za tətəwəsəlməğam.»

⁶ Əddəwan ğur-əs nəmmuzal-net as t-əssəstanan, ənnan-as: «Əməli, awak əmərədda ad za təssuğəla təmənukəla y Israyil?»

⁷ Inn-asan: «Wər kawan-təwer masnat n alwağ wala tamert win otas Abba əs tanaya-net.

⁸ Mişan ya a fall-awan d-azzabbat Infas wa Zəddigan, təğrəwam tarna, təqqələm şigəyyawen-in day əğrəm wa n Yerusalam, d akal kul wa n Yahudəyya əd wa n Samarəya, taglim har da d-iraz amağal.»

Əmədkəl ən Ƴaysa

⁹ As inna awen, immədkal əs jənnawan. Əswâdan day-as har dasan-tu-təlsa tagarak.

¹⁰ Harwâda əggizzayan ijənnawan assağa wad itagazzay Ƴaysa as nafalalan əşşin meddan ən samlalan dəğmanasan.

¹¹ Ənnan-asan: «Ya meddan ən Galilaya, mas təbdadam, təswâdam day jənnawan? Ƴaysa wa immədkalan gərəwwan da əs jənnawan, ilkâm a d-iqqəl s əmmək wa da as tu-tənayam ikk-en.»

Ənətti n Əlkənisat - Şigəyyawen day Yerusalam

Awedan wa z'iggəzan edag ən Yahuza

¹² Təzzar əfalan nəmmuzal adyağ was itawannu wa n Eşkan ən Zaytun, əqqalan ayğrəm ən Yerusalam a das-ihân edag ən teklay tas tətawala turagat-net dağ əzəl wa n təsanfawt ən Kəl-Əlyəhud, almağna edag ən kilaw iyyanda ən teklay.

¹³ As din-osan, əggazan ehan wa n afalla dağ suru wa dağ saganan. Əmosnən Butros, Yaxya, Yaqub, Andrawəs, Filibus, Tuma, Bartulamawəs, Matta, Yaqub wa n ag Alfay, Simxon was itawannu wa Isaggatakken əd Yahuza wa n ag Yaqub.

¹⁴ Ketnasan tiddawan-du y igi ən təwatriwen s əwəl iyyanda, əntanay əd mədrayan ən Ƴaysa əd tədoden təha Maryama ta n anna-net.

¹⁵ Adan en da a dağ ibdad Butros gər nəlkiman ən Ƴaysa, əmosnən temeday n awedan əd sanatat təmərwen, innasan:

¹⁶ «Imədrayan-in, əşşil ad andu awa inna Infas wa Zəddigan dağ Əlkəttaban irəw s əmi n ənnəbi Dawəd dağ salan ən Yahuza wa d-issəlalan aytedan win əbaznən Ƴaysa.

¹⁷ Fəlas kala dağ-nağ iddun nakkanay inəmmuzal, amaran igrâw adagar-net dağ əşşəğəl wa dər-nağ isanattaf Ƴaysa Əlməsix.

¹⁸ Aləs za wa, izzənza tawagost dağ azrəf wa igrav dağ abakkad-net, dəffər awen uda dağ-as əs tədüst-net, ibbəqqat, iffəzzat awa ihan tadüst-net kul.

¹⁹ Aytedan kul win əxsarnen dağ Yerusalam əslân awen, har as tawagost ten əgan-as esəm dağ awal-nasan "Akaldama", alamağna tawagost ta n əzni.

²⁰ Amaran iktâb dağ əlkəttab wa n Əzzəbur as: "İqqələt ahan-net əməjir, a tu-wər-iləs awedan iguz." İktâb dağ-as değ as: "İggəzet awedan iyyan edag-net dağ əşşəğəl."

²¹ Dağ adi ilzâm-ana ad nəsənnəfrən iyyan dağ meddan win dər nətidaw faw dağ şikilan n Əməli Ƴaysa,

²² a d-ibazan çur əzəl wa t-issəlmağ Yaxya dağ aman har əzəl wa çur-nağ immədkal əs jənnawan. Aləs wa za nəsənnəfrən da, ad iqqəl təgəyya ən tanakra ən Ƴaysa dağ tamattant.»

²³ Əssəbdadan əşşin meddan əmosnən Yusəf was itawannu Barsabbas, gannin-as değ Yustus, əd Matəyyas.

²⁴ Təzzar əttaran, ənnan: «Ya Əməli, kay a issanan awa ihan iwallan n aytedan kul, sakn-ana wa təsannafrana gər meddan win əşşin a,

²⁵ fəl ad iggəz əşşəğəl n anammazul wa igmad Yahuza ikka edag wa imosan wa-net.»

26 Ǝgan šišaxeren, əbaznat Matəyyas, iddun daɣ nəmmuzal win maraw d iyyan.

2

Assa n Infas wa Zəddigan

1 As d-iɣlay əzəl n əmud ən Kəl-Ǝlyəhud was itawannu Fantəkawt, əddəwan nalkiman ən Ƴaysa ketnasan daɣ adag iyyanda.

2 Wala a ihogan igmad-du əjit iyyan ijənnawan olân d in aɣu issohen, itkar ehan ketnet wa daɣ əqqiman.

3 Nafalalan-asan d ilsawan olanen d in abalagleg ən təmsay, əmməzzayan ilsawan en; əkkulluk n iyyan iwar iyyan daɣ-san,

4 Idnay-tan Infas wa Zəddigan ketnasan, təzzar əssəntan awal daɣ awalan wər nəmos win-nasan, s əmmək was tan-ikfa Infas wa Zəddigan fərregat n awen.

5 As itaggu awen, aɣrəm ən Yerusalam əxsâran daɣ-as Kəl-Ǝlyəhud zizawatnen daɣ əddin a d-əgmâdnen ikallan n əddənet kul.

6 As əslan y awal wen, təddew-du tamattay tagget, təzzar isammaklal sər-san awen fəlas akkiyyan daɣ-san isallu i nalkiman əššewalan daɣ awal n akal wa d-igmad.

7 Iga sər-san awen əsəmməkləl labasan, gannin: «Xa! Aytedan a əššewalnen da, awak wərgəɣ ketnasan Kəl-Galilaya?»

8 Mas za, akkiyyan daɣ-na isall-asan əššewalan awal ən marwan-net?

9 Ǝnta nakkanay əhân-anax aytedan a d-əgmâdnen amaɣal ən Bartəya, d akal wa n Medəya, əd wa n Ałam, d aytedan əxsârnen daɣ akal wa n Mezobotaməya, əd wa n Yahudəyya, əd wa n Kabadokəya, əd wa n Fontəs əd wa n Asəya,

10 əd wa n Frijəya, əd wa n Banfiləya əd wa n Masar. Wiyyad əgmâdan-du akal ən Libəya daɣ ɣələyɣələyan n əɣrəm wa n Qərwan, wiyyad aytedan n Ǝrrum,

11 wiyyad aytedan ən Kəret əd win Arabəya. Gər za win daɣ-na əmosnen Kəl-Ǝlyəhud wala deɣ aytedan a d-əhdânen s əddin wa n Kəl-Ǝlyəhud, ketnana nəsal-asan əmmâlan daɣ awalan-nana igitan ən tarnə ən Məššina.»

12 Ketnasan isimaklal sər-san awen, wər əssenən a ənnan, tinəmənnin: «Ma imos almaɣna n awa?»

13 Mišan ya wiyyad daɣ-san əgan daɣ nəlkiman tamakkakkayt, gannin: «Awen esmad n alɣanab a tan-isammaswadan.»

¹⁴ Təzzar ibdad Butros ənta əd nəmmuzal win maraw d iyyan, idkal əməsli-net išşewal i tamattay, inna: «Meddan ən Yahudəyya əd kawanay ketnawan win əxsarnen day Yerusalam, agriwat awa igan da, təssəsəməm wəllen y awa dawan-z-anna da.

¹⁵ Meddan win wər əmməswadan, arat wa təyilam əddi, fəlas taza alwaqan win aqora awa harwa da.

¹⁶ Kala kalar arat wa imal ənnəbi Yowəl a d-osan, as inna:

¹⁷ "Inna Məşşina: 'Ənta da awa du-z-asin day adan n əddənət win əlkammen: a du-zəzzəbbəy Infas-in fəl i t-illa awedan, əssuxələn maddanəwan d aşşekkawan awa dasan-z-əməla; sənnəfiləlay aratan əttinkalnen i mawadan-nawan, səssuga iymaran-nawan targəten.

¹⁸ Awalla, a du-zəzzəbbəy day adan win den Infas-in fəl nəybidan-in əd tənəybiden-in təzzar əssuxələn awa dasan-z-əməla.

¹⁹ Ad agay təlməxjujaten day jənnawan, agay aratan əmosnən alxalamaten fəl amaḍal: İnqəl əzni, tarqu təmsay, akku əhu ijənnawan.

²⁰ Təfuk ad tamattay, təqqəl şiyay; tizway təllit şilat n əzni; izar-du adi kul y assa n əzəl zəwwəran ilān əlxurma wa issəbdad Əməli.

²¹ Amaran i igmayan day Əməli əlyillas ad t-igrəw."

²² Ya meddan n Israyil, səməmat i salan win: Yaysa wa n Nazaret, aləs a imos as kawan-issikna Məşşina əs təlməxjujaten d aratan əmmittaynen, əd wiyyad əmosnən alxalamaten win as t-ikfa igi-nasan gar-ewwan as ənta a isannafran. Kawanay iman-nawan təssānam day adi.

²³ Aləs di, Məşşina di as tu-wər-illa a das-idrâgan a t-igan day fassan-nawan, imos awen arat ixtâs irəw, təgam iman-net s ətəwəsətəytəy wa tu-təsassagam i nəzzulam fəl təgəttawt.

²⁴ Mişan isənkər-t-idu Məşşina, ikkas-t-idu day tarna ən tamattant fəlas wər t-illa əmmək as t-in-təttəf tamattant.

²⁵ Batu-net a day inna ənnəbi Dawəd irəw: "Hannaya Əməli dat-i faw, iha ayil-in fəl ad wər əxşədan man-in.

²⁶ Adi fəl falawasan man-in, təkna tədəwit iguz n awal-in, wala təyəsə-nin wər nəmos tamaylolt da ad tagu attama,

²⁷ id wər za tayyay iman-in day alaxirat, wala dəy tayyay Əmizdag-nak tarqu təyəsə-net.

²⁸ Kay a di-issəknan tarrayt ta təha təməddurt. A di-təsəffəliwəsa wəllen əs tassaq ta dər-ək əgəx."

²⁹ Imədrayan-in, ələx tarrayt n a dawan-agay isalan day əkkāsəy aşşak n əmaraw-nana Dawəd n as, aba-tu, itawanbal-in. Əzəkka-net, har azalada illa gar-ena.

³⁰ Ənnəbi a imos, issân deḡ fəl arkawal wa fəl das-ihad Məššina n as, ilkâm ad agu daḡ taḡmar-net iyyan daḡ hayawan-net.

³¹ Daḡ adi Dawəd inây dat alwaḡ tanakra n Əlməsix daḡ təmattant, amaran isalan ən tanakra-net a daḡ inna: "Wər din-itawayya daḡ alaxirat, wala deḡ tərḡa təḡəssa-net."

³² ʔaysa za wa, issənkar-t-idu Məššina gər nəmməttan, nakkanay nəggəyat adi.

³³ Idkal-tu Məššina di n Abba-net ig-ay daḡ əḡil-net, ikf-ay Infas wa Zəddigan was iga arkawal-net, ənta amaran izazzabbat-t-idu fall-ana. Adi a imos arat wa təhannayam da, təsallim-as.

³⁴ Wərgəḡ ənnəbi Dawəd a ikkan ijənnawan, kalar ənta iman-net a innan: "Inna Əməli Məššina y Əməli-nin: ʔam daḡ əḡil-in,

³⁵ iket di ad taggaḡ izəngə-nak daw daran-nak."

³⁶ Daḡ adi akninet Kəl-İsrayil kul masnat daḡ as, ʔaysa wa tətəytayam fəl təgəttawt, ənta a iga Məššina Əməli d Əlməsix.»

³⁷ Idas awal wa iga Butros den iwallan n aytedan wəllen, ənnan-as ənta əd nəmmuzal win hadatnen: «Imədrayan-nana mas danəḡ-ilzam igi-net?»

³⁸ Inn-asan Butros: «Utabat. Akkiyyan daḡ-wan itəwəsəlməḡet daḡ aman s esəm ən ʔaysa Əlməsix fəl ad təgrəwam təsurreft ən bakkadan-nawan, təgrəwam təhəkkut ən Məššina təmosat Infas wa Zəddigan,

³⁹ ənta arkawal wa iga Məššina, kawanay as t-iga, kawanay əd hayawan-nawan d aytedan kul win əxsarnen daḡ igəḡ, almayna aytedan kul win du-z-aḡru Əməli-nana Məššina əs man-net.»

⁴⁰ Har irəw Butros itagg-asan təlḡutbat idḡâz wəllen igann-asan: «Aḡəzat iman-nawan daḡ aytedan əxrâknen ən nəllubas win azzaman a.»

Tassaq ta əgan məzzəgzan win azzarnen

⁴¹ Aytedan win əzzəgzannen s awa inna, tawasalməḡan daḡ aman, təzzar tətəy tiddawat ən məzzəgzan əzəl wen s adag ən karad gim n awedan.

⁴² Wər əḡmedan ar əs taḡaray daw nəmmuzal, əmosan arat iyyanda ketnasan, darrawan imensewan-nasan, tuzanan amensay wa n saktan, taggin šiwatriwen.

⁴³ Təkna tasa ən Məššina igguz n awedan kul, inəmmuzal deḡ taggin s əlqudrat ən Məššina təlməḡjujaten aggotnen d aratan əmosnen alḡalamaten.

⁴⁴ Ərtâyan məzzəgzan ketnasan, ədrâwan deḡ arat kul wa əlan.

⁴⁵ Zanzin-in daɣ ərɾəzəɣ-nasan, tuzanan attaman-net, ewal awen s awa dər togdâ addararat n akkiyyan daɣ-san.

⁴⁶ Ʒzəl kul tamanayan daɣ Ahan wa Zəwwəran n Ʒlɣibada, nimannakan s awen. Tuzanan amensay wa n saktan daɣ nan-nasan, darrawan deɣ imensewan-nasan daɣ təfalawist əd tazdāk n əwəl.

⁴⁷ Ʒmmâlan Məššina, əssiɣmaran-tan aytedan kul. Akk əzəl iššota Ʒməli əljəməɣat-nasan s aytedan win iɣlas.

3

Təməzzəyt n anabdon iyyan

¹ Ʒzəl iyyan iggəzzay Butros əd Yaxya s Ahan wa Zəwwəran n Ʒlɣibada y ad agin šiwatriwen šin tazzar.

² Alwaq wen da a daɣ d-immeway aləs iyyan a d-ihəwan əd bəddən s əmi n Ahan wa Zəwwəran n Ʒlɣibada was itawannu: «Imi wa Ihossayan» itawasansa fəl ad igməy takutay daɣ aytedan win tu-tagaznen. Akk əzəl itawasansu den.

³ As inay Butros əd Yaxya əbukan y iguz n Ahan wa Zəwwəran n Ʒlɣibada, a tan-itansay.

⁴ Idak-ku Butros əd Yaxya s asawad, inn-as Butros: «Ʒswəd daɣ-na.»

⁵ Ikna daɣ-san asawad, iga attama n ad t-akfin arat iyyan.

⁶ Təzzar inn-as Butros: «Urəɣ wala azrəf, wər tan-ələɣ, mišan a kay-akfa awa ələɣ: Ʒs tarna n esəm ən Ʒaysa Ʒlməsix wa n əɣrəm ən Nazaret, əbdəd jəwənkət!»

⁷ Təzzar ibaz Butros əfus-net wa n əɣil, issəbdad-tu. Ʒddaran-du daran-net əd təlazzen-net alwaq wen da.

⁸ Innad-du zəllat ibdad, ijawankat. Iddew dər-san, əggazan Ehan wa Zəwwəran n Ʒlɣibada, ijiwankat itaggad fəl tədəwit immâl Məššina.

⁹ Hannayan-tu aytedan kul ijiwankat immâl Məššina.

¹⁰ As din-əgran as, ənta a itaxamin ɣur əmi n Ahan wa Zəwwəran n Ʒlɣibada was itawannu: «Imi wa Ihossayan», itânsay, əhagan, isammaklal sər-san awa t-igrawan.

Emel ən Butros i tamattay almaɣna n əzuzəy wa iga y anabdon

¹¹ Iɣla aləs wa itawazozayan da iltâɣ daɣ Butros əd Yaxya. Jiwanke daɣ tarrayt təfâlat as itawannu «ta n Suliman» as sər-san du-tozal tamattay ketnet. Iɣâ awen s aytedan əsəmməkləl labâsan.

¹² As inay Butros awen, inna y aytedan: «Meddan n Israyil, mafel ikna sər-wan awa əsəmməkləl? Təgâram daɣ-na šittawen, təgâm daɣ-na asawad n as nakkanay a

izzozayan aləs wa əs fərregat-nana nakkanay iman-nana, madex nəzzozay-tu fəl aššaddat ən təksəda-nana Məššina?

¹³ Əməli n Ibrahim d İsəhaq əd Yaqub, Əməli ən marawan-nana, ənta a ikfan akli-net Ƴaysa əlxurma. Kawanay iman-nawan a t-igan daƳ fassan, tənkuram-tu dat Bilatəs s ənta ikus-net a otas.

¹⁴ Awalla tənkuram AlƳadil di n Əmizdag, təgməyam a dawan-d-itəwəkkəs aləs n əməggi ən man.

¹⁵ Təgam iman ən wa ihakkin təməddurt. Ənta a d-issənkar Məššina daƳ tamattant, nakkanay nəggəyat adi.

¹⁶ Əzəgzan-nana əs tarna n esəm ən Ƴaysa a ikfan aləs a təhannayam da, təzdəyam-tu šiƳurad-net. Illikan as əzəgzan əs Ƴaysa a ikfan aləs di šiƳurad-net kul dat-wan ketnawan.

¹⁷ Amaran imədrayan-in, əssənaƳ as əljəhəl a daƳ təgam adi kawanay əd muzaran-nawan.

¹⁸ Mišan əssənət as irəw as imal Məššina daƳ mawan n ənnəbitan kul as Əlməsix ilzâm-tu ad inəy alƳazab, amaran issənda adi əs təməwit tədi da.

¹⁹ DaƳ adi utabat tiksadam Məššina fəl ad iməs ibakkadan-nawan,

²⁰ izəzzəbbət-du fall-awan šimeren ən təsasmit, issuƳəl-du Əlməsix a dawan-isinafran dat alwaq, almayna Ƴaysa.

²¹ Ilzâm-tu ad aqqam daƳ jənnawan har d-asu alwaq wa daƳ z'issuƳəl Məššina arət kul əmmək-net wa azzaran, imâl awen irəw əs mawan n ənnəbitan-net di zaddoggen.

²² Awalla a inna ənnəbi Musa: "Məššina, Əməli-nawan a dawan-d-isənnəfiləl iyyan ənnəbi ən šilat-in daƳ mədrayan-nawan amaran ad təsəsəmam y awa dawan-z-annu kul.

²³ Awedan kul wa wər nəbbərdag y ənnəbi wədi, ad itəwəkkəs daƳ tamattay ən Məššina, ihlək."

²⁴ Ənnəbitan kul win hadatnen, a d-ibazan Ƴur ənnəbi Saməwel əd win t-əzraynen ketnasan, əmâlan arət wa igan daƳ adan win.

²⁵ Kawanay a imosan iməkkusa n ənnəbitan win den, təkkosem deƳ arkawal ən tassaƳ wa idkal Məššina i marawan-nawan as inna y Ibrahim: "Tawšetən n əddənet kul ad əgrəwnat albaraka s əssəbab n əzzurrəyya-nak."

²⁶ Kawanay as d-isannafalal Məššina Akli-net Ƴaysa daƳ tizarat, issok-awan-t-id, fəl a kawan-akfu albaraka-net ikkəs akkiyyan daƳ-wan daƳ tarrayt ta n əššur.»

4

Tebadday ən Butros əd Yaxya dat Asaggawar wa Zəwwəran

¹ Harwada iššewal Butros əd Yaxya i tamattay as fall-asan əhan limaman əddewan d əmuzar n aytedan win tagaznen Ehan wa Zəwwəran n Əlyibada əd Sadusaytan;

² ih-en alham n əsəssəxri wa taggin tamattay, əmmâlan âs dad zamas Ƴaysa inkar-du daƳ təmattant, wədi inəmməttan da a daƳ-as d ənkaran.

³ Sattarmasan-tan əgan-tan daƳ kasaw har ifaw fəlas ehad a igan.

⁴ Mišan ya əzzəgzanan aytedan aggotnen daƳ win əslanen i təlxutbat ten, təzzar əqqalan məzzəgzan edag ən səmmos gim n aləs.

⁵ As affaw əmmənayan muzaran ən Kəl-Əlyəhud, d əmɣaran-nasan əd musanan n Əttawret daƳ Yerusalam.

⁶ Ih-en Xānan wa n Əlimam wa Zəwwəran əd Kayif, əd Yaxya d Alaskandər d aytedan n aɣaywan n Əlimam wa Zəwwəran ketnasan.

⁷ Əssəbdadan Butros əd Yaxya gar-essan, əsəstanan-tan ənnan-asan: «Ma ilan tarna madəx esəm was təgam adi?»

⁸ Təzzar inn-asan Butros idkâran Infas wa Zəddigan: «Ya imuzaran ən tamattay-nana d əmɣaran n Israyil,

⁹ azalada nəbdâd dat asaggawar wa fəlas nəga əmazal olâxan imosan tilalt y awedan ibdânan, amaran ilzâm-ana ad nəməl əmmək was itawazozay.

¹⁰ Əssənət za ketnawan, kawanay d aytedan n Israyil kul as, aləs wa ibdadan dat-wan da wər ila malad waliyyan, tarna n esəm ən Ƴaysa Əlməsix wa n Nazaret a t-izzozayan, wa tətəytayam fəl təgəttawt, issənkər-t-idu Məşşina daƳ təmattant.

¹¹ Ƴaysa, ənta a imosan "təhunt ta din-təgaram kawanay win makrasan, amaran ənta a təqqalat təhunt ta təkbalat ehan."

¹² Ənta xas a iyallasan, amaran wər ikfa Məşşina gər jənnawan d amaɖal esəm n awedan iyyan was za nəxləs ar wa-net.»

¹³ As ənayan taholat ən Butros əd Yaxya awal isammaklal sər-san awen fəlas əgran as aljahilan a əmosan, əssânan dəx as aytedan a əmosan as kala tiddawan əd Ƴaysa,

¹⁴ mišan wər t-illa as əfrâgan a dasan-t-annin fəlas hannayan aləs wa itawazozayan ibdâd den xur-san.

¹⁵ Təzzar əkkasan-tan daƳ ahan wa daƳ immənay asaggawar, amaran ad tinəməggin šinaden.

¹⁶ Gannin: «Ma za nagu y aytedan a? Illikan as ənâyan Kəl-Yerusalam kul təlməxjujat zəwwərat ta əgan, amaran wər nəfreg əsəbbəhəw-net.

¹⁷ Mišan ya fəl ad wər wəziwəzan salan n awen daƳ tamattay kul, daƳ adi aƳiwatana y-asan šisəksədawen fəl

a du-wər-ələsan adakal n esəm ən Ƴaysa dat awedan waliyyan.»

¹⁸ Təzzar sassayran-tan-du, əryaman-asan fəl a du-wər-ələsan adakal n esəm ən Ƴaysa wala deƷ əsəssəƷri n arat a t-iqqâlan.

¹⁹ Mišan inn-asan Butros əd Yaxya: «Kawanay iman-nawan ma tənnam: Məni daƷ aratan win wa oƷadan dat Məššina: awak əbərdəƷ y-awan meƷ əbərdəƷ i Məššina?

²⁰ Nakkanay za, wər nəfreg ad nayyu emel n aratan win nənay əd win as nəsla.»

²¹ İlas-asan asaggawar igi n təsəksədawen, amaran oyyan-tan, id wər əgrewan əsarü fəl tan-əwwəddaban. Əgân awen fəl əddəlil n aytedan, fəlas aytedan en ketnasan taggin i Məššina təmmalen fəl awa igan den.

²² Ənta aləs wa igan təməzzəyt təmosat təlməƷjujat ten, elan-net ogaran əkkozat təmərwen n awatay.

Šiwatriwen ən məzzəƷzan əs Ƴaysa a dasan-olaman fəl man

²³ İtawayya Butros əd Yaxya Ʒas, əkkan imidawan-nasan, əsoƷalan-asan awa dasan-ənnan muzaran ən limaman d əmƷaran ən Kəl-Əlyəhud.

²⁴ As əslan i salan win, jajjayan daƷ təwatray ta, s əwəl iyyanda, ənnan s afalla: «Ya Əməli, kay a d-ixlakan ijənnawan d amadal, əd Ʒərwan d awa tan-ihan kul,

²⁵ kay a innan əs tarna n İnfəs wa Zəddigan s əmi n amaraw-nana akli-nak Dawəd: "Mafel Ʒišašatnat ad-dawlaten n əddənet, tagginat təmattiwen šinaden wər nənfa wala?

²⁶ Əbdadan mənokalan n əddənet, əddewan deƷ muzaran daƷ adag iyyanda, fəl ad ammaddin Əməli d Əlməsix-net."

²⁷ İd illikan as, aƷrəm wa da, a daƷ immənay Herod əd Fons Bilatəs əntanay əd təmattiwen šin nəzzulam əd šin İsrayil, əmməddan Ƴaysa, imosan Akli-nak zəddigan, wa təƷəƷ Əlməsix.

²⁸ İmos awen igi n arat ketnet was təxtasa fəl igi-net dat alwaƷ əs tarna-nak əd tara-nak.

²⁹ Amaran əmərədda Əməli, əswəd daƷ təsəksədawen šin dana-taggin, təzzar təssəhəlay-ana wəllen nakkanay an eklan-nak emel n awal-nak,

³⁰ tilalay-ana əs tarna n əfus-nak fəl ad nəzzuzəy aytedan, nagu təlməƷjujaten d aratan əmosnen alƷalamaten s esəm ən Ƴaysa, Akli-nak Zəddigan.»

³¹ As əḡradan təwatray-nasan inagaynagay adag wa daḡ əddewan, idnay-tan Infas wa Zəddigan ketnasan, təzzar ad əmmâlan awal ən Məššina ši wala tasa.

Tartəyt ta əgan məzzəgzan

³² Əljəməḡat ta n məzzəgzan ketnet tənimmannak təmos arat iyyanda. Wər tan-iha i igannin awa ila, i-net ḡas-net, kalar ədrâwan arat kul wa əlan.

³³ Tagayyen nəmmuzal əs tarna zəwwərat fəl tanakra n Əməli ḡaysa daḡ təmattant, ikf-en deḡ Məššina ketnasan arraxmat-net s igət.

³⁴ Əljəməḡat en wər tat-iha i iddiraran əs wala, fəlas win daḡ-san əlanen inan madeḡ šiwəḡas zanzan-tan-in, tawayan-du attaman-nasan,

³⁵ hakkin-tu i nəmmuzal, amaran itəwizən gər məzzəgzan ewâlan dəgran-nasan s awa dər ogdanat təməḡutar-nasan.

³⁶ Awen da a iga aləs iyyan igân Yusəf imosan iyyan daḡ Kəl-Lebi n akal ən Qibrus. Ənta as əgan nəmmuzal təsəmmadəḡ Barnabas, almaḡna «Ənaləm fəl man»

³⁷ Izzənz-in tawagost təhat təla-net, eway-du attaman-net ikf-ay i nəmmuzal.

5

Bahu wa iga Ananəyâs əd Safira

¹ Ill-ay aləs iyyan igân esəm Ananəyâs a din-izzinzan, ənta əd təntut-net Safira, tawagost-net,

² təzzar inamarda əd təntut-net fəl a din-ittəf arat daḡ əzrəf wa din-tənza, eway-du awa hadan, ikf-ay i nəmmuzal.

³ Inn-as Butros: «Ananəyâs, mafel as toyyəḡ Aššəytan iga y əwəl-nak iguz ogdân d awa, ewad daḡ-ak ad taga y Infas wa Zəddigan bahu s iduf wa din-təḡeḡ arat daḡ əzrəf wa din-tənza tawagost-nak?»

⁴ Harwa tat-in-wər-təzzənza, wərgəḡ təla-nak a təha? As tat-in-təzzənza deḡ, wərgəḡ əzrəf wa tat-in-təzzənza kay a ittafan tanat-net? Daḡ adi, mafel təsamarkasa daḡ əwəl-nak igi n əmazal ogdân d awa? Wərgəḡ aytedan as təḡeḡ bahu, kalar Məššina əs tu-təḡeḡ.»

⁵ As isla Ananəyâs i batu ten, ifataḡḡat, əḡmadan-tu man. Təḡḡaz tasa zəwwərat aytedan kul win əslanen awen.

⁶ Təzzar osan-t-idu meddan ən mawadan, əgan-tu daḡ šifit, əḡlan dər-əs ənbalan-t-in.

⁷ Edag ən karadat assəḡaten dəffər awen, tosa-du təntut n Ananəyâs, wər təssen fəl awa igan.

⁸ Issəstan-tat Butros, inn-as: «Safira, əməl-i, awak tawagost-nawan azrəf wa tat-in-təzzənzam, ənta da da ketnet?» Tənn-as: «Awalla, ənta əddi da.»

⁹ Təzzar inn-as Butros: «Mənəmmək əs tənammannakam fəl igi ən taremt y Infas wa Zəddigan? Səsəm, meddan win din-ənbalnen aləs-nam əllân dat əmi n ahan; a kam-awəyan kam da.»

¹⁰ Təfataqqat tamazayt ten da yur daran ən Butros, əgmadan-tat man. Əggazan-du meddan winad ən mawadan a, osan-tat-du wər tədder, ewayan-tat ənbalan-tat-in dəgma n aləs-net.

¹¹ Eway-du awen as təggaz tasa labasat Əlkənisat ketnet d aytedan kul win əslanen awen.

Inəmmuzal dat Asaggawar wa Zəwwəran

¹² Taggin nəmmuzal təlməxjujaten aggotnen əmosnen alxalamaten d aratan aggotnen simaklalten dağ aytedan. Tamanayan faw məzzəgzan əs Yaysa ketnasan, daw tafala n Ahan wa Zəwwəran n Əlyibada tas itawannu «ta n Suliman».

¹³ Əssiymaran-tan aytedan mişan wər-t-illa i ihalan a tan-in-ihaz.

¹⁴ Dər iga awen da ya, tittəyan s aytedan əknanen igət əgānen dağ meddan əd tədoden win zagzannen s Əməli.

¹⁵ Har as, tamawayan-du miranan tawasansin dağ tesaten madəx şisalaten fəl afay ən tarrayen ən Yerusalam, fəl a din-tawəd kuddeğ telay ən Butros wiyvad dağ-san as d-illam den.

¹⁶ Tazalan-du değ aytedan əknanen igət ən xərman win əhoznen Yerusalam, əs Yerusalam ewāyan imiranan-nasan d aytedan-nasan win əssəranan kələsuf. Ketnasan değ tiwəzuzəyan.

¹⁷ Əggaznat təsmiten labasnen Əlimam wa Zəwwəran ənta d aytedan kul win təyimit-net, ən taggayt ta n Sadusaytan,

¹⁸ təzzar ənkarən sattarmasan inəmmuzal əgan-tan dağ kasaw dat awedan kul.

¹⁹ Mişan osa-du angalos n Əməli ehad, olam şisəhar ən kasaw, ikkas-tan-du, inn-asan:

²⁰ «Akkiwat Ehan wa Zəwwəran n Əlyibada, təməlam y aytedan isalan kul win təməddurt ta taynayət.»

²¹ Əgan nəmmuzal awa dasan-itawannan, ənzayan s Ahan wa Zəwwəran n Əlyibada, a dağ-as sasaxrin aytedan.

As d-osa Əlimam wa Zəwwəran ənta d aytedan win təyimit-net, sassaxran-du Asaggawar wa Zəwwəran almağna iymaran kul win əmosnen şiggətawen ən Kəl-İsrayil, amaran əssəğmayan inəmmuzal əs kasaw.

22 Osan-in maššaxalan win tan-əgmaynen ehan ən kasaw, mišan wər tan-in-ogezan daχ kasaw, təzzar əqqalan əgan isalan,

23 ənnan: «Nos-in kasaw ketnet itimantammat, əbdâdan sojitan win t-ogaznen dat mawan-net, mišan as nolam təsəhərt ən kasaw, wər daχ-as in-nosa awedan waliyyan.»

24 As isla kabtan ən sojitan win tagaznen Ehan wa Zəwwəran n Əlyibada, əd muzaran ən limaman i salan win den, əqqanan xafawan-nasan, ad samadranan daχ awa z'iqqəl awen.

25 Əhân ten da as tan-d-osa awedan, inn-asan: «Səsəmat! Meddan win təgam daχ kasaw, əbdâdan daχ Ahan wa Zəwwəran n Əlyibada, sasaxrin daχ-as tamattay.»

26 Təzzar igla kabtan alwaq wen da iddêw əd sojitan-net əbazan-du inəmmuzal, mišan wər tan-ədesan fəlas əksudan a sər-san du-təggəd tamattay əntanay en da, tanχ-en əs zabaw ən təgur.

27 As tan-d-ewayan, zazzakken-tan dat Asaggawar wa Zəwwəran, təzzar issəstan-tan Əlimam wa Zəwwəran,

28 inn-asan: «Wərgəχ nərğâm-awan wəllen fəl a imosan əsəssəχri n awedan waliyyan daχ batu n esəm di? Mišan ənəyat awa təgam! Təzawwazawazam daχ Yerusalam ketnet əsəssəχri-nawan, tərâm a dana-təssəwaram tamattant n aləs di.»

29 Inn-asan Butros əd nəmmuzal win hadatnen: «Məššina as danax-ilzam a das-nabbardag, wərgəχ aytedan!

30 Məššina, Əməli ən marawan-nana a d-issənkaran Yaysa was təgam iman-net s ətəytəy wa tu-təgam fəl təgəttawt.

31 Ənta a da, a idkal Məššina ig-ay daχ əxil-net, ig-ay Əmuzar d Əmaχlas y ad igrəw i Kəl-İsrayil tarrayt ən tətubt, əgrəwan təsureft ən bakkadan-nasan.

32 Nəmos šigəyyawen n awen, nakkanay d Infas wa Zəddigan ihakku Məššina y aytedan win əlkammen i taranet.»

33 As əslan muzaran n Asaggawar wen i batu ten, iggaztan alham labasan, əran a daχ-san əkkasan iman.

34 Mišan ibdad iyyan daχ-san ən taggayt ta n Fərisaytan igân esəm Gamaləyel imosan əmusan zəwwəran n Əttəwret, əssiχmaran aytedan kul, omar s ad təwəkkəsan nəmmuzal daχ ahan wa daχ iga əmənəy har din-agin arat n amazay,

35 amaran inn-asan: «Kəl-İsrayil, ənkədat y a was təräm a tu-tagim i meddan en.

36 Wər irəw adi as d-inkar aləs igân Tedas inna ənta imos arat, təzzar əlkaman-as meddan ewâdnen əkkozat təmad

n aləs. Ənta za iman-net itawança kərəz, meddan win das-əlkamnen wazawazan, ibənnan awen ketnet.

³⁷ Dəffər-əs, daɣ azzaman win tuddant, inkar-du iyyan aləs igân esəm Yahuza wa n Galilaya, isaffallag aytedan aggotnen, əlkaman-as. Ənta da za, itawança kərəz, təzzar wazawazan aytedan kul win das-əlkamnen.

³⁸ Daɣ adi daɣ talça ta, ənnəsixa wa dawan-z-aga: Əgmədət batu ən meddan en, tayyim-tan ad aglin; fəlas kud arət wa ənnəyən madəɣ wa taggin wər imos ar arət ərân aytedan a, wədi ad ibərəjjət.

³⁹ Mišan kud arət a imos as Məşşina a t-iran, wədi wər təfregam əzərəz-nasan. Ənkədət, a din-wər-tagrim iman-nawan təmosam əllid ən Məşşina.» Təzzar əttafan ənnəsixa-net.

⁴⁰ Sassaxran-du inəmmuzal, sassagan-asan šiwwit labasnen s ələkkud. Dəffər awen ərɣaman-asan fəl a du-wər-ələsan adakal n esəm ən Ƴaysa, amaran oyyan-tan.

⁴¹ Əfalan nəmmuzal ehan wa daɣ itamanay Asaggawar wa Zəwwəran, əknân tədəwit id Məşşina a tan-issəharan d ad tawasaknin məlka fəl əddəlil ən Ƴaysa.

⁴² Akk əzəl, gər za daɣ Ahan wa Zəwwəran n Əlyibada wala deɣ daɣ nan n aytedan, wər kala əmməzzayan d əsəssəxri d igi ən salan n Əlinjil a tan-imosan âs Ƴaysa ənta a imosan Əlməsix.

6

Əssa meddan win tawasanafrannen y ad ilalan i nəmmuzal

¹ Azzaman en, inalkiman ən Ƴaysa tittəyan wəllen. Eway-du awen as gatantanan Kəl-Əlyəhud win əşşewalnen təlyunant fəl Kəl-Əlyəhud win əşşewalnen təlxibrit fəlas wər tətawagga masnat tolâɣat daɣ tədoden-nasan šin as aba meddan-nasnat xur təzunt ta tawaggin mensewan akk əzəl.

² Adi a fəl sassagan nəmmuzal win maraw d əşšin əmənəy təha əljəməɣat ən nalkiman ən Ƴaysa kul, ənnan-asan: «Wər ihor ad nayyu emel n awal ən Məşşina fəl ad nannataf əd təzunt ən mensewan.

³ Daɣ adi imədrayan-nana, sənnəfrənət daɣ-wan əssa meddan as təga masnat fəl əlluɣ-nasan, idkâr-tan Infas wa Zəddigan, əmosan imusanan, a tan-nəsənnəttəf d əşşəɣəl wədi.

⁴ Nakkanay amaran nəgməd s igi ən təwatriwen d əşşəɣəl wa n amel n awal ən Məşşina ɣas.»

⁵ Tanat ten, toggam-tat aljamayət ketnet. Təzzar san-nafranən Ğstefanos imosan aləs izzigzanan wəllen, idkâr-tu deɣ Infas wa Zəddigan, əd Filibus əd Frukurus əd Nikanor əd Timun əd Barmenas əd Nikolayos wa n əɣrəm n Antəyoxəya as kala-net əddin wa n Kəl-Əlyəhud a iha.

⁶ Təzzar əssəbdadan-tan dat nəmmuzal, əssəwaran-tan nəmmuzal ifassan, əttəran-asan.

⁷ Ad itəyttəy ətəwəsəɣmar wa itawaggan y awal ən Məşşina. Təzzar əttəyan nalkiman ən Ƴaysa wəllen daɣ Yerusalām, fadda əhdan-du limaman ən Kəl-Əlyəhud aggotnen əs Ƴaysa, əzzəgzanan as Əlməsix a imos, əlkaman y awas omar.

Ətərməs n Ğstefanos

⁸ Ğstefanos aləs a imos iknân agaraw n arraxmat əd tarna ən Məşşina. Itamazal dat aytedan aratan simaklalnen əd təlməɣjujaten əmosnen aɣalamaten zawwarnen.

⁹ Təzzar ənkaran-du aytedan wiyyad n ahan n əɣibada ən Kəl-Əlyəhud was itawannu «wa n Dərfan» âs wiyyad daɣ-san Kəl-Əlyəhud ən Qərwan, wiyyad in əɣrəm n Alaskandrəya, wiyyad in akal wa n Kilikəya əd wa n Asəya, ad tamazaɣan d Ğstefanos.

¹⁰ Mişan wər t-illa a dər din-əkkân masnat ta t-ikfa Infas wa Zəddigan.

¹¹ Təzzar ərzaman i meddan wiyyad daɣ əssir fəl ad əssəwaran Ğstefanos bahu, ann-in: «Nəsl-âs itaggu batuten əmosnen ikus ən tarna i Məşşina, əmosnat deɣ iba n safrar n ənnəbi Musa.»

¹² Əgan s awen alham daɣ tamattay əd muzaran ən Kəl-Əlyəhud əd musanan n Əttəwret. Wər isla Ğstefanos wala as t-id-osan aytedan, əbazan-tu. Ewayan-tu s Asaggawar wa Zəwwəran ən Kəl-Əlyəhud.

¹³ Təzzar əssəbdadan şigəyyawen ən bahu, ənnanat: «Aləs wa, wər itəməzzəy d abayak n ahan wa zəddigan [wa] d Əttəwret.

¹⁴ Igmâd aşşak as nəsl-âs as inna, ilkâm ad ijəbbərəjjət Ƴaysa di ən Nazaret di ehan wa, isəmməttəy aɣadaten şin dana-d-oyya Ənnəbi Musa.»

¹⁵ Əgaran aytedan ketnasan win asaggawar şittawen daɣ Ğstefanos, iqqal sər-san udəm-net zun in angalos.

7

Təlɣutbat n Ğstefanos dat Asaggawar wa Zəwwəran

¹ Təzzar issəstan Əlimam wa Zəwwəran Ğstefanos, inn-as: «Awak aratan win tidət?»

² Inna Ğstefanos: «Kəwanay imədrayan-in d abbatan-in, səsəmat-i! Məşşina di n əməli ən tanaya, ənta as kala

a d-inafalal y amaraw-nana Ibrahim harwa iha akal wa n Mezobotaməya, dat təməxsurt-net daɣ akal wa n Xaran.

³ Inn-as: *"İgməd akal-nak əd marwan-nak, takkaɣ akal wa kay-z-assakna."*

⁴ Təzzar igmad Ibrahim akal wa n Kasdaytan, ixsar daɣ wa n Xaran. Dəffər iba n abba-net a t-id-isaggalat Məşşina s akal wa da daɣ təxsaram da azalada.

⁵ Akal wa, wər daɣ-as ikfa Məşşina Ibrahim edag as z'iggəzan təkəsīt-net, wala ɣas edag daɣ issənsa adar-net, mişan idkal-as Məşşina arkawal n *a das-t-akfu ənta d əzzurrəyya-net*, kuddeɣ as alwaq wen, wər ila Ibrahim ara waliyyan.

⁶ Ənta da awa inna Məşşina: *"Thayawan-nak ad əxsəran daɣ akal a daɣ əmosan iɣərab, əqqələn daɣ-as eklan, ad tawazaxazzaban har aɣin əkkozat təmad n awatay."*

⁷ Mişan addawlat ta tan-təgat eklan, nak iman-in a tat-z-abəzan s əşşəriɣa, dəffər adi, əkkəsaq-qan-du daɣ-as, əybədan-i daɣ adag wa da."

⁸ Təzzar inamagga Məşşina d Ibrahim arkawal ən tassaɣ s ənta as imos əmənəkəd ejwal-net. Adi a fəlas, as ihəw barar-net Isəhaq isammankad-tu əzəl wa n əttam dəffər təhəwt-net. Iga Isəhaq awen da i barar-net Yaqub, Yaqub deɣ iga awen da i bararan-net əmosnen maraw d əşşin, win əmosnen aljadan-nana.

⁹ Ənkaran meddan win əmosnen aljadan-nana əmmənəzəhan amadray-nasan Yusəf, təzzar əzzənzan-t-in, immeway s akal ən Masar; mişan issan daɣ-as Məşşina.

¹⁰ İkkas-t-idu Məşşina daɣ təməɣutar kul şin iggaz. İkf-ay masnat, d udəm ɣur Firɣawna wa n əmənokal ən Masar, har as ig-ay Firɣawna daw-əs, izzozar-tu y akal ən Masar d aɣaywan-net ketnet.

¹¹ Dəffər awen, iga laz daɣ akal ən Masar ketnet, ənta əd wa n Kanan. Ad taɣazzaban aytedan wəllen, aba i meddan win əmosnen aljadan-nana a ətşan.

¹² As isla Yaqub as Masar tah-et təbzəst, izammazal sər-əs meddan win dana-sahhayawnen, imos awen iki-nasan y-as wa azzaran.

¹³ ɤur iki-nasan Masar wa n əşşin, ad izzəzday Yusəf iman-net i mədrayan-net, əggazan deɣ salan Firɣawna n aɣaywan wa d-igmad Yusəf.

¹⁴ İssəɣmay Yusəf abba-net Yaqub əd marwan-net kul, əmosan əssayat təmərwen n awedan əd səmmos.

¹⁵ Təzzar iras Yaqub akal ən Masar, s ənta a daɣ t-aba, aba daɣ-as deɣ imarawan-nana.

16 Emmewaynat təxəswen-nasan s əxrəm ən Şəkem, tawanbalnat daɣ əzəkka wa izzənza Ibrahim azrəf wa ibalalaxan xur maddanəs ən Xamor daɣ Şəkem, y ad iqqəl tanbəlt-net.

17 As d-ihoz alwaq wa daɣ z'assandu Məşşina arkawal wa fəl ihad y Ibrahim, tamattay-nana təttəy, təmôs taxlək tagget daɣ Masar,

18 har "iggaz iyyan əmənokal wər nəssen fəl Yusəf taxmar [ən Masar]."

19 Ikkərras kəl-tamet-nana, iga i marawan[-nana] əzəxəzzəb labâsan har âs išahhaşşal-tan a din-tayyin bararan-nasan win əs səket əhəwan daɣ əsuf fəl ad wər əddəran.

20 Azzaman en da a daɣ ihəw Musa, imos barar ihossayan, igrâwan arraxmat ən Məşşina. Əttafan-tu marwan-net daɣ ahan-nasan har iga karadat təlil.

21 Oyyan-t-in marwan-net xas fəl afay n Ənnil, tənay-tu tabarart ən Firxawna, tədkal-tu təg-ay barar-net, təg-as əsədwəl wa za tagu i barar ən tədist-net.

22 Itawasasaɣru Musa masnat kul ta n Kəl-Masar, iqqal aləs ilân tənna daɣ awa igannu d awa itaggu.

23 As iga əkkozat təmərwen n awatay əd təhəwt, iggaz-t-id a din-asu imədrayan-net Kəl-İsrayil inəy awa dər t-əllan.

24 Inay iyyan daɣ-san tawagginat-as tarşəxşad, oɣ-as şinaxen, iga iman n aw Masar wa das-itaggin ark aratan.

25 İxil ad agrin mədrayan-net Kəl-İsrayil as Məşşina a t-id-izammazalan sər-san fəl a tan-assafsu, mişan wər əgren awen.

26 Əzəl wa ilkaman i wen, osa-du əşşin daɣ-san əknâsan. İgmay d a tan-aknu, nəməggin alxer, inn-asan: "Meddan, kawanay əmosnen imədrayan, mafel as tətınəmənɣim?"

27 Mişan ibdaq-q-in aləs wa itaggin tarşəxşad y əmidi-net, inn-as: "Ma kay-igan əmuzar-nana wala əmaşray-nana?"

28 Əngəm a tareɣ a di-taga tenaxay ta təgeɣ y aw Masar wa n əndazəl?"

29 İsla Musa i batu ten xas, təggaz-tu tasa, igmad Masar ilxas daɣ akal wa n Midəyan, iqqal daɣ-as əxərib, izlaf daɣ-as igraw əşşin bararan.

30 As əganat əkkozat təmərwen n awatay dəffər awen, "inafalal-as-du angalos daɣ təfsəq təbilaglagat daɣ taneray xur ədɣax" wa n Sinay.

31 Isammaklal əs Musa arat wa das-d-inafalal den. İtihaz-in za təfsəq fəl ad annafay daɣ awen, as isla y əməsli n Əməli Məşşina as das-inna:

³² "Nak a imosan Məşşina ən marawan-nak, Əməli n Ibrahim, d Isəhaq əd Yaqub." Təndaw taysəst Musa ab'as ihal ad iləs asawad daɣ təfsəq en.

³³ Inn-as deɣ Əməli: "Əkkəs iɣateman-nak, fəlas edag wa daɣ təbdadaɣ əddi amaɗal zəddigan a imos.

³⁴ Əɣɣəyyanaɣ aɣazab wa tətəggu tamattay-nin daɣ Masar; əsləy deɣ i hərərrəkitan-nasan. Əzzəbbe-du fəl a tan-assafsa. Əmərədda ihaz-du, a kay-zəmmizəla əs Masar."

³⁵ Musa wen da, a ənkuran əs tənna ta das-əgan: "Ma kay-igan əmuzar-nana wala əmaşray-nana?" Ənta en da za, a d-izammazal Məşşina y ad izar i Kəl-İsrayil, isəddərfət-tan, əs tarna n angalos wa das-d-inafalalan daɣ təfsəq.

³⁶ Ənta en da, a tan-d-ikkasan daɣ Masar s aratan simak-lalnen win itaggu əd təlməxjujaten əmosnen aɣalamaten ən tarna ən Məşşina. Iga aratan wiyyad simaklalten əd təlməxjujaten əmosnen aɣalamaten ɣur aradaɣ wa əgan daɣ Agaraw was itawannu wa Zaggayan, igla itaggu awen da daɣ taneray har iga əkkozat təmərwen n awatay.

³⁷ Musa en da, a innan i Kəl-İsrayil: "Ilkâm a sər-wan d-izəmmizəl Məşşina ənnəbi iyyan ən şilat-in, a kawan-du-z-igmədan."

³⁸ As təddew tamattay n İsrayil daɣ taneray ən Sinay, ənta en da a ibdadan gər marawan-nana win den d angalos wa das-işşewalan fəl ədɣay wa n Sinay, təzzar ikf-ay Məşşina awalan hakkinen təməddurt y a dana-tan-iməl.

³⁹ Mişan ugayan marawan-nana s ad əlkəman y awa inna Musa, ugayan sər-əs, saddaranan ad əqqəlan Masar.

⁴⁰ Ənnan i Harun: "Ag-ana imalan a z'əməlnen dat-na, fəlas Musa wa dana-d-ikkasan daɣ akal ən Masar da, wər nəssen awa daɣ-as in-igan."

⁴¹ Adan en da a daɣ əgan əssənəm igân təməwit a n abarkaw, əkatan fall-as. İsidawat-tan wəllen arat wa əgan əs fassan-nasan.

⁴² Təzzar inamaggag dər-san Məşşina, oyy-en əd man-nasan, əɣbadan təfuk əd təllit d etran, imos awen arat ənnân İlkəttaban, as ənnan: "Ya Kəl-İsrayil, awak nak as tətəggin şizəgzam əd təkutawen daɣ əkkozat təmərwen n awatay şin təgam daɣ teneray?"

⁴³ Wərgəy ahaket n əssənəm wa igan Molox a tewayam, əd şaşşəlan n ətri wa igan Rəmfan wa n əssənəm-nawan, əmosnen əssənəman win təgam" fəl a tan-təɣbədəm! "Adi fəl kawan-z-əstəya har takəyam" Babəylon.

⁴⁴ Amaran imarawan-nana win d-ikkas Məşşina daɣ Masar əggazan teneray, əlân əhaket wa n əmənəy əd Məşşina, was omar Məşşina Musa s ad t-əgu s əmmək wa

t-issəkna.

⁴⁵ Ahaket en, iggaz-du əs marawan-nana win dæffər win den, azzaman win daɣ dasan-azzar Joswe, ewayan-tu s akal wa əbazan, s ənta a daɣ istaɣ Məššina tawšeten dat-san. Iggaz ahaket wen akal en da har azzaman n ənnəbi Dawəd.

⁴⁶ Ənnəbi Dawəd igrâw arraxmat ɣur Məššina. Ənta a igmayan daɣ Məššina turagat n ad ikrəs ehan y Əməli ən Yaqub.

⁴⁷ Mišan ənnəbi Suliman a igrawan turagat ten, ikras ehan y Əməli Məššina.

⁴⁸ Dər iga awen da ya, Məššina di n Amadkol wər ixser daɣ a əkrasan fassan n aytedan. Adi a inna ənnəbi Isayas as inna:

⁴⁹ Inna Əməli Məššina: *"İjənnawan a əmosnen təxawit-in ta n taymar, amaɗal wər imos ar arat illan daw daran-in. Daɣ adi ma imos əzzənəf n ahan wa di-za-təkrəsam? Madex edag wa daɣ z'assanfa?"*

⁵⁰ *Wərgex əfus-in a d-ixlakan adi kul?"*

⁵¹ Harwa inn-asan Əstefanos: «Ya meddan win əqqəssatnen, təxfâlam iwallan-nawan, tədbâɣam šiməzzugen-nawan wər təzlayam d aytedan wər nəksud Məššina, faw tugâyam s Infas wa Zəddigan. Adi da a əgan marawan-nawan.

⁵² Məni daɣ ənnəbitan wa wər zaɣɣazzaban marawan-nawan? Əgan iman ən nəmmuzal ən Məššina win əmalnen dat alwaq assa ən Wa Oɣadan, as kawanay əmərədda a t-ikkəddalan təgam iman-net.

⁵³ Kawanay win d-issoka Məššina angalosan ewâynen əlqanun-net, mišan tugayam s a das-təlkəmam.»

Tamattant n Əstefanos

⁵⁴ As əslan i batu ten, iggaz-tan alham labasan, ad samadadan fəl alham n Əstefanos.

⁵⁵ Mišan ənta idkâran Infas wa Zəddigan, idkal asawad-net sa sər jənnawan, inay tanaya ən Məššina, inay deɣ ɣaysa ibdâd daɣ əɣil ən Məššina.

⁵⁶ Təzzar inn-asan: «Ənəyat, ijənnawan ənnolaman! Hannayaɣ Ag Aggadəm ibdâd daɣ əɣil ən Məššina.»

⁵⁷ Əslan y awen ɣas, ad zayyakan ədbâɣan šiməzzugen-nasan, əggadan-in ketnasan s Əstefanos, əbazan-tu.

⁵⁸ Əkkasan-tu daɣ əɣrəm, ad t-əggaran əs təhun. Aman meddan win fall-as əgəyyatnen, aləs n ammas igân esəm Talut a ɣur əssənsan ibərnaz-nasan.

⁵⁹ Əggâran Əstefanos əs təhun as ittar inna: «Ya Əməli ɣaysa, əqbəl iman-in!»

⁶⁰ Dəffər awen, igaraffat, idkal əməsli-net s afalla, inna: «Ya Əməli, a tan-wər-təssəwarax abakkad wa!» As inna awen, əgmadan-tu man.

8

¹ Amaran Talut ənta, iha win ərdənən s ətəwənxə n Əstefanos.

Təttəyt n Əlkənisat - Şiggəyyawen dəy Yahudəyya əd Samarəya

Ətəwədgaz d əwəziwəz ən məzzəgzan əs Yaysa

Əzəl wen da ad tənta təssust labasat fəl Əlkənisat ta təhat Yerusalam; təzzar wazawazan əlməsixitan ketnasan dəy kallan win Yahudəyya əd Samarəya. Wər d-iqqim dəy Yerusalam ar inəmmuzal.

² Osan-du meddan ən miksadan ən Məşşina, ənbalan-in Əstefanos. Əyyəwanan fall-as tala.

³ Talut ənta, issənta dəy əhluk n Əlkənisat. Irzag inan, ilabbay-du dəy-san meddan əd tədoden, iggar-tan dəy kasaw.

Emel ən Filibus isalan win Əlinjil dəy Samarəya

⁴ Amaran iməzzəgzan əs Yaysa win təwazawaznen den, ərzagan akal ketnet əmmâlan y aytedan isalan win əhanen Əlinjil.

⁵ Awen da a d-ewayan Filibus s əxrəm iyyan n akal ən Samarəya a dəy-as immâl y aytedan isalan n Əlməsix.

⁶ As təsla aljamaxat tagget tənimmannakat y awal ən Filibus, tənay dəy təlməxjujaten şin itaggu əmosnen alxalamaten ən tarna ta igraw, təssoxal-in ənnəyat-net aratan win igannu.

⁷ Fəlas aytedan aggotnen a əgmadan kələsuf. As tan-du-gammadan, takkasan imaslan labasnen. Tawazozayan dəy nəbdan əd məggudal aggotnen.

⁸ Eway-du awen tədəwit agget dəy əxrəm en.

⁹ Amaran əxrəm en, ih-ay aləs iyyan n amassaxar igân esəm Simxon itaggin işaxawan simaklallen s aytedan ən Samarəya. Igannu ənta awedan zəwwəran a imos.

¹⁰ Aytedan kul sasaman-as s əlluğ, gər za win wər nəla almaqam, wala win t-ələnən, gannin: «Aləs wa, tarna n Əməli tas itawannu ta togarat a imos.»

¹¹ Aytedan win sasaman-as s əlluğ, fəlas irəw itagg-asan işaxawan sər-san simaklallen.

¹² Mişan as əzzəgzanan i Filibus a dasan-immâlan isalan ən tağmar ta n Məşşina əd tarna n esəm ən Yaysa Əlməsix, tawasalmağan dəy aman, meddan harkid tədoden.

13 Izzəgzan Simyon ənta da, itawasalmay day aman; itay day Filibus. İqqânnat alğalamaten ən tarna əd təlməxujaten zawwarnen šin itaggu Filibus eɣaf-net.

14 As əslan nəmmuzal day Yerusalam as Kəl-Samarəya əqbalan awal ən Məššina, zammazalan sər-san Butros əd Yaxya.

15 As tan-in-osan, əttaran-asan a fall-asan d-izazzabben Infas wa Zəddigan,

16 fəlas harwa da wər tan-iha i fəl d-izzibbat, ətəwəsəlmay ɣas a tawaggan day aman s esəm n Əməli Ƴaysa.

17 Təzzar a tan-isawar Butros əd Yaxya ifassan-nasan, garrawan Infas wa Zəddigan.

18 As inay Simyon as, Infas wa Zəddigan əsəwər ən fassan ən nəmmuzal as itawagraw, igmay day-san a tan-akfu azrəf, inn-asan:

19 «Akfiwat-i nak da tarna tədi, tas i əssəwara ifassan-in ad igrəw Infas wa Zəddigan.»

20 Inn-as Butros: «Təhləkəɣet kay d əzrəf-nak, zama təxila təfrəgəɣ a tazzanza təhəkkut ən Məššina.

21 Batu ta, wərmad tat-təheɣ za wala tələɣ day-as tanat fəlas əwəl-nak wər oɣed dat Məššina.

22 Day adi utab day əššur-nak, tansəya Məššina a dak-issurəf ark ənnəyat ta təhat əwəl-nak, kud immikkan adi.

23 Fəlas hannayaɣ as, əwəl-nak wər idker ar tara n əddənət labasat d iba n aqqad.»

24 Təzzar inn-asan Simyon: «Ansəyat-i Əməli kawanay iman-nawan fəl a di-wər-abəz s awa tənnam.»

25 Butros əd Yaxya win nəmmuzal, as əmalan y aytedan awa əggəyyen fəl Ƴaysa Əlməsix, əməlan-asan deɣ awal n Əməli, əqqalan Yerusalam. Əmalan isalan n Əlinjil day təɣarmaten aggotnen ən Samarəya šin əhanen tarrayt-nasan.

Filibus d aləs iyyan n Etəyofəya

26 Dəffər awen iššewal angalos n Əməli i Filibus, inn-as: «Ənkər tawəya əd tarrayt təkkât agala ta təgmadat Yerusalam təras təkka Gaza.» Tarrayt ten, təssuf.

27 Inkar Filibus, igla. İjiwankat day tarrayt as immənay d aləs n ənazum n akal n Etəyofəya imosan awedan zəwwəran day təɣmar ən Kandas ta n təmənokalt n Etəyofəya s ənta a innəttafan d ərrəzəɣ kul wa n təmənokalt en. Osâ-du Yerusalam fəl a day-as iɣbəd Məššina.

28 İqqâl akal-net, iqqîm day amalankay-net, iɣarru əlkəttab n ənnəbi İsayas.

²⁹ Inna Infas wa Zəddigan i Filibus: «Ihaz-in amalankay en, təmmudəxay i məššis»

³⁰ Ozal-in sər-əs Filibus. Isl-as iğarru əlkəttab n ənnəbi Isayas, inn-as: «Awak təgreq almaɣna n awa təxarra əddi?»

³¹ Inn-as aləs wen: «Manəmmək as tu-z-agra, wər t-illa awedan a di-t-iffəssaran?» Təzzar iğmay daɣ Filibus a d-iwən, aqqam dəgma-net.

³² Edag wa iğarru daɣ əlkəttab en, ənta da awa inna: «*Ittilway zun tilay s adag n agazam, təfastit a itaggu əjaɣol y aytedan lazzinen təduft-net a iga, wər d-igmed əlxərəf iminet.*»

³³ *Itiwasaras, wər das-əgen əššəriya wa dər ihor. Ma ifragan igi ən salan kul ən hayawan-net, id tətihazaraz təyrəst-net daɣ əddənet?»*

³⁴ Təzzar issəstan aləs wa n Etəyofəya Filibus, inn-as: «Kay ak əməl-i, was iha ənnəbi šin-net da. Ənta iman-net meɣ awedan iyyan?»

³⁵ İbaz Filibus ɣur batu ten da, imal-as isalan n Əlinjil ən Ƴaysa.

³⁶ Əglân za, as d-osan edag əhân aman, təzzar inna aləs wa n Etəyofəya: «Aman da, ma di-z-igdəlan ad təwəsəlməɣ?»

³⁷ [Inn-as Filibus: «wər t-illa, kud təzzigzana s əwəl iyyanda.» Inn-as aləs wen: «Əzzigzanaɣ as Ƴaysa Əlməsix Barar ən Məššina a imos.»]

³⁸ Omar alwaq wen da s ad itəwəsəbdəd amalankay, əzzəbben ənta əd Filibus, əggazan aman, issəlmaq-qu Filibus.

³⁹ Da da ɣas a d-əgmadan aman, ənta ad idkal Infas n Əməli Filibus, ab'as t-ihannay aləs wen, mišan igla daɣ tarrayt-net, ikna tədəwit.

⁴⁰ Filibus ənta, as din-igra iman-net iha aɣrəm n Azot. As t-igmad illil akal en itaggu daɣ ɣərman kul win əhanen tarrayt isalan n Əlinjil har osa aɣrəm ən Qaysarəya.

9

Talut ihdad-du

¹ As itaggu awen, Talut harwada isamahad fəl igi ən man ən nəttulab n Əməli Ƴaysa. İkka Əlimam wa Zəwəwəran,

² iğmay daɣ-as a das-əgu šira əs nan n əlxibada ən Kəl-Əlyəhud win aɣrəm ən Damas əmosnen šira a t-əkfânen turagat s as, as igraw aytedan, gər za meddan wala šidoden, win əhanen tarrayt ta n Ƴaysa, a tan-ikrəd ilwəy-tan-du əs Yerusalam.

³ İkkâ za aɣrəm ən Damas, as t-in-ihoz, wər isla a igan as fall-as ibalazzat ənnur a d-igmâdan ijənnawan.

⁴ Ifataqqat, isla y əməsli wa das-innan: «Talut, Talut mafel as di-təzağazzaba?»

⁵ Inn-as Talut: «Ma təmosağ, Əməli?» Isla i wa das-innan: «Nak Ҳaysa wa təzağazzaba.

⁶ Əbdəd əggəz aғrəm a dak-attamal awas kay-iwar igitnet.»

⁷ Meddan win əddewnen əd Talut əbdâdan, təgdal-asan tərəmməq awal, sallan y əməsli mişan wər hənnəyan awedan waliyyan.

⁸ İbdad-du Talut, ora şittawen-net, mişan indar-as anay ən wala. Kundaba as əbazan midawan-net əfus-net, əlwayan-tu har dər-əs əggazan Damas.

⁹ Har iga karad adan wər ihənnəy arat, wər itša za wər işwa.

¹⁰ Amaran Damas ih-êt ənalkim ən Ҳaysa igân esəm Ananəyâs. Iғr-ay Əməli daғ tərgət inn-as: «Ananəyâs!» İkkəwan-as inn-as: «Nak da, Əməli!»

¹¹ Inn-as Əməli: «Ənkər, təssəwəla əd tarrayt tas itawannu "ta toғadat", takkağ ehan ən Yahuza, təssəstənağ d aləs n əғrəm ən Tarsa igân esəm Talut, id itansay-i daғ alwaq wa da.

¹² Amaran inay [daғ tərgət] aləs igân esəm Ananəyâs as t-id-osa, issəwar-tu ifassan-net fəl a t-id-iqqal asawad-net.»

¹³ Təzzar inn-as Ananəyâs: «Ya Əməli, aytedan aggotnen əgân-i isalan n aləs di, əd talbast tagget ta issəkna imizdagan-nak win əhanen Yerusalam.

¹⁴ Da da ila turagat n abbaz n aytedan kul win tattarnen s esəm-nak, amaran imuzaran ən limaman a t-əkfanen turagat ten.»

¹⁵ Mişan inn-as Əməli: «Aglu, aləs di nak a t-isannafran fəl a di-iməl y aytedan wər nəmos Kəl-Əlyəhud əd mənokalan-nasan, iməl-i değ i Kəl-İsrayil.

¹⁶ Nak iman-in as das-z-ağay əzəğğəzzəb kul wa t-iwaran fəl əddəlil-in.»

¹⁷ Təzzar igla Ananəyâs har din-osa ehan, iggaz-tu, inay Talut, issəwar-tu ifassan-net, inn-as: «Amadray-nin Talut, Əməli Ҳaysa wa dak-inafalalan daғ tarrayt ta du-təgeğ, ənta a di-d-izammazalan fəl a kay-d-iqqəl asawad-nak, idnəy-kay Infas wa Zəddigan.»

¹⁸ Tamazayt ten da a daғ d-ərtakan aratan olanen əd tərərənkawen daғ şittawen ən Talut, təzzar iqqal-t-id asawad-net. İbdad, itawasalmağ daғ aman.

¹⁹ Dəffər awen itša, əqqalnat-t-idu təğurad-net.

Tewaylay ta iga Talut təğəyya ən Ҳaysa Əlməsix

Talut iha Damas

Iga arat n adan ħur nalkiman ən Ƴaysa win əhanen Damas.

²⁰ Tarmâd as ikka Talut inan n əlġibada win Kəl-Əlyəhud a daġ-san immâl as Ƴaysa Barar ən Məššina a imos.

²¹ Isammaklal awen s aytedan ad gannin: «Ak wərgex ənta, as kala ibbənbay daġ aytedan win tattarnen s esəm ən Ƴaysa daġ Yerusalem ihallak-kan? Wərgex wər t-id-eway s əħrəm wa, ar a tan-abəz, ilwəy-tan əs muzaran ən limaman?»

²² Mišan Talut ənta itisuhit əzəzgzan-net. Wər əssenən Kəl-Əlyəhud win Damas a das-ənnan daġ əsəkni wa tan-itaggu as Ƴaysa ənta a imosan Əlməsix.

²³ As irəw Talut daġ Damas, namaggan Kəl-Əlyəhud eġaf fəl ad agin iman-net,

²⁴ mišan ittəmal-as awen. Ewadan daġ tara ən tənəġay-net as das-ənkadan ehad ezal ħur mawan n əħrəm.

²⁵ As ahad iyyan, ənkarən nəttulab-net əgan-tu daġ əzmam zəwwəran, ərdafan daġ-as aġan, zazzabben-tu fəl aganna wa hadan n aġalla wa iġlayan aġrəm.

Talut iha Yerusalem

²⁶ As osa Talut Yerusalem, igmay d ad irtəy əd nalkiman ən Ƴaysa, mišan əwafan-tu ketnasan fəlas harwa da wər əzzəgzanan as iyyan daġ-san a imos.

²⁷ Ibaz-t-idu Barnabas əs man-net, iddew dər-əs əs nəmmuzal, təzzar ig-asan isalan kul n əmmək was inay Talut Əməli Ƴaysa daġ tarrayt ən Damas d awal wa das-iga, imal-asan deġ igi wa iga isalan n Əməli Ƴaysa daġ Damas wər t-illa i as tu-təha tasa-net.

²⁸ Alwaq wədi a dər-san irtay, itidaw dər-san daġ Yerusalem. Itaggu isalan n Əməli Ƴaysa ši wala tasa ən waliyyan.

²⁹ Itiməšiwil Talut əd Kəl-Əlyəhud win əššewalnen təlyunant, itamazax deġ dər-san; ad gammayan d igi ən man-net.

³⁰ As əslan mədrayan-net daġ əzəgzan awen, əddewan dər-əs wiyyad daġ-san s əħrəm ən Qaysarəya, amaran əssokan-tu wa n Tarsa.

Tagadezt ta n Butros iməzzəgzan win Yahudəyya

³¹ Azzaman en, əgrāwan daġ-san nalkiman ən Ƴaysa d Əlkənisaten alxer daġ akal kul wa n Yahudəyya əd wa n Galilaya əd wa n Samarəya. Itasahat əzəgzan n Əlkənisaten, tagginat imazalan əssiġmarnen Əməli, tittəynat deġ əs tilalt n Infas wa Zəddigan.

³² Illil za Butros akal ketnet har iras təxrəmt ta n Ludda fəl ad inəy imizdagan win daḡ-as əxsarnen.

³³ Inay daḡ-as aləs igân esəm Enəyas, igân əttram elan əd bəddən, wər kala igmad təssut-net.

³⁴ Inn-as Butros: «Enəyas, əbdəd tada təssut-nak, Ƴaysa Əlməsix izzozay-kay.» İbdad Enəyas tamazayt ten da.

³⁵ Ənayan-tu aytedan kul win təxrəmt ən Ludda əd win azawaḡ wa n Šaron, təzzar əhdan-du s Əməli.

Ətəwəsənkər ən Tabita daḡ tamattant

³⁶ As itaggu awen aḡrəm ən Yaffa təxsâr daḡ-as tənalkimt ən Ƴaysa təgât esəm Tabita, almaḡna n esəm wa daḡ təlyunant Dorkas, almaḡna «Tenert». Wər təgmed ar s igi ən mazalan olaynen əd təkutawen i maddararan.

³⁷ Adan en da a daḡ tərîn, aba-tat. Tətawašarad, tətawasansa daḡ ahan wa n afalla ən suru.

³⁸ Dad imos as Ludda wər təggug Yaffa, as əslan nalkiman ən Ƴaysa win əhanen Yaffa as Butros iha Ludda, zam-mazalan sər-əs əššin meddan fəl ad t-ansəyan a tan-d-akku tarmâd.

³⁹ Inkar Butros iddew dər-san. As din-osa, ewayan-tu əs suru wa təha təḡəssa ən təntut, əkkanat-idu tədoden šin as wər ədderan meddan-nasnat hallinat, sakninat-tu šikadkaden əd səlsa wiyyad a dasnat-təga Dorkas harwa təddâr.

⁴⁰ İssərdaḡ Butros awedan kul, igaraffat ad itattar. As issənda təwatray-net, imalallay-du təḡəssa ən təntut ta aba, inna: «Tabita, ənkər-du», təzzar tora šittawen-net, tənay Butros, təqqim-du.

⁴¹ İzzal-as-in əfus-net, illil-as əs tēbadday, amaran iḡra-du imizdagan əd tədoden šin as wər ədderan meddan-nasnat, issəkn-asan-tat təddâr.

⁴² İtawasla awen daḡ əḡrəm ən Yaffa ketnet, təzzar əzzəgzanan aytedan aggotnen s Əməli.

⁴³ İha Butros Yaffa har irəw, illa ḡur aləs iyyan igân esəm Simḡon as imos əššəḡəl-net əšifəl ən gəškan.

İlkənisat əd təgəyya dat aytedan wər nəmos Kəl-Əlyəhud

10

Butros əd Korniləyas

¹ Aḡrəm ən Qaysarəya ih-ay aləs iyyan ən Kəl-Ərrum igân esəm Korniləyas, imos iyyan daḡ kabtanatan win azzarnen y ağan ən sojitan was itawannu «İtaləya».

² Imos aləs iksudan Məššina, ixbâd-tu ənta d aytedan n ahan-net ketnasan, itaggu šikutawen aggotnen i Kəl-Əlyəhud, faw deḡ itattar əs Məššina.

³ As əzəl iyyan ḡur amaḡal ən karad alwaḡan win tazzar, inafalal-as-du angalos ən Məššina, inay-tu as d-iggaz ehan-net, inn-as: «Korniləyas!»

⁴ Irmaḡ Korniləyas, igar šittawen daḡ angalos, inn-as: «Ya Məšši, ma tareḡ?» Inn-as angalos: «Šiwatriwen-nak əd təkutawen-nak əggəzzaynat əs Məššina, iqbâl-tanat.

⁵ Daḡ adi əmərədda, zəmmizəl meddan s əḡrəm ən Yaffa a dak-d-idawan d aləs iyyan igân esəm Simḡon as itawannu Butros,

⁶ inniftaḡan i Simḡon wa išafalan igəškan s ehan-net ihâ tagadamayt n agaraw.»

⁷ Ifal-tu angalos wa das-iššewalan ḡas, iḡra-du imaššaḡalan-net əššin d iyyan daḡ sojitan win išaḡal imosan awedan iksudan Məššina,

⁸ issoḡal-asan awa igan kul, amaran izammazal-tan əs Yaffa.

⁹ Əhōzan-in aḡrəm əzəl wa hadan, as iwar Butros afalla ən taḡazamt attayan n ammas n azal fəl ad agu šiwatriwen.

¹⁰ Itattar den da as t-iggaz gələk, isaddaran a itša. Tawaggin-as-du mensewan as tu-tobaz tarna n Infas wa Zəddigan.

¹¹ Ogga ijənnawan as əmmoran, itawasaras-du daḡ-san arat olân d əfər zəwwəran itiwattafan s əkkozat təsəlkad-net, har dat-əs imal.

¹² Əhân-tu əzzənəfan ən mudaran kul win jawankatnen fəl amaḡal əd dəmərdəmaran əd gəḡad.

¹³ Təzzar isla y əməsli iyyan as das-inna: «Butros, ənkər, təḡzəma, tatša!»

¹⁴ Mišan inn-as Butros: «Kala kala Əməli, id wər kala ad ətšəḡ a xaraman wala a immidasan.»

¹⁵ İlas tesalay y əməsli en as inna: «Awa issəxlal Məššina, wərgəḡ kay a tu-z-agin i xaraman!»

¹⁶ Har iga əməsli en y awen karadat tənnawen, amaran immədkal əfər en əs jənnawan.

¹⁷ Harwada iqqân awen eḡaf ən Butros, isamadran daḡ awa z'iqqəl almaḡna-net n awa das-d-inafalalan den, as d-əbdadan meddan win d-izammazal Korniləyas daḡ əmi n ahan ən Simḡon, dəffər as əssistanan əd dad illa.

¹⁸ Əḡran-du məssawəs n ahan, əssəstanan-tan kud den da ad izzəbbat Simḡon was itawannu Butros.

¹⁹ Harwada isamadran Butros daḡ awa z'iqqəl almaḡna n arat wa das-d-inafalalan as [das]-inna Infas wa Zəddigan: «Ənəy! Meddan den karad a dər-ək sastannen.

20 Ad wər təzləyax aytedan, əbdəd, tazzabbəx, tidawa dər-san; id nak a tan-d-izammazalan.»

21 Təzzar izzəbbat-du sər-san Butros inn-asan: «Nak da as təsəggadam. Ma imos əddəlil wa kawan-d-ewayan da?»

22 Ənnan-as: «Korniləyas wa n kabtan ən Kəl-Ərrum a dana-d-izammazalan, imosan aləs oɣâdan, n əmiksad ən Məşşina, əssiɣmaran-tu Kəl-Əlyəhud ketnasan. Ənta as inafalal angalos zəddigan ən Məşşina omar-tu s a kay-issəgməy, tasax-in ehan-net fəl ad aslu y awa za tanna.»

23 Amaran izzogaz-tan-du Butros, isammagarat-tan. As affaw, iddew dər-san. Əddewan dər-əs arat dəx nalkiman ən ɣaysa win n əyrəm ən Yaffa.

24 As əzəl wa hadan ewadan aɣrəm wa n Qaysarəya. As din-osan da, iqqâl-asan Korniləyas ənta əd marwan-net d aytedan win dər ikna təmmidwa s ənta a tan-d-iɣran.

25 As zama din-iggâz Butros ehan, issəlkad-as-du Korniləyas, igaraffat ɣur daran-net, issəjad-as.

26 Mişan issəbdad-tu Butros, inn-as: «Əbdəd! Nak əggadəm ɣas a əmosa.»

27 Əggazan ehan mişawalan, os-in dəx-as Butros al-jaməyat tagget.

28 Təzzar inn-asan: «Təssânam kawanay iman-nawan as issixram əlqanun ən Kəl-Əlyəhud y iyyan dəx-san tassağ madeɣ iguz n ahan n awedan wər nəmos iyyan dəx Kəl-Əlyəhud. Mişan nak issosan-i Məşşina dəx as ad wər aɣay y awedan waliyyan iduf n as i xaraman wala immidas.

29 Adi da fəlas, as di-təssəgməyam, əkkeq-qawan-du əddi da wər əgeɣ asarəw waliyyan. Amaran əmərədda əməlat-i əddəlil wa fəl di-təssəgməyam.»

30 Inn-as Korniləyas: «Əzəl iyyan tattara dəx ahan-in, ila adi əmərədda karad adan, wər əsleɣ a igan as dat-i ibdad aləs ilsân isəlsa bilazlaznen.

31 Təzzar inn-i: "Korniləyas! Təwatray-nak təqbâl, şikutawen-nak dəx iqbâl-tanat Məşşina.

32 Dəx adi, zəmmizəl əs Yaffa, təssəgməya Simɣon was itawannu Butros. Inniftax y aləs igân Simɣon wa işafalan igəşkan ihân tagadamayt n agaraw."

33 Təzzar əssəgməyaq-qay tamazayt tədi da, olâx dəx as du-toseɣ. Amaran əmərədda ketnana nəlla da dat Məşşina, fəl ad nəssəsəm y arat kul was kay-omar Əməli s a danaq-qu-tanna.»

Talxutbat ən Butros dəx ahan ən Korniləyas

34 İşşewal Butros inna: «Əmərədda əgreɣ as, tidət dəx a imos as Məşşina wər izlay aytedan.

³⁵ Kalar awedan kul wa t-iksudan, itaggu awa oɣadan, awedan wədi, ad t-iqbəl Məššina, a təqqal tawšet-net.

³⁶ Issoka-du Kəl-Israyil awal-net imosan isalan n Əlinjil, əmmâlnen isalan n alxer wa ihakku Ƴaysa Əlməsix, ənta wa n Əməli n awedan kul.

³⁷ Təssânam daɣ awa igan daɣ akal kul ən Yahudəyya, intâ-du adi daɣ wa n Galilaya dəffər təlxutbat ta iga Yaxya y aytedan daɣ batu n alamaɣ daɣ aman;

³⁸ d əmmək was issəkna Məššina aytedan as Ƴaysa wa n Nazaret a issannafran əs tahakkay ta t-iga Infas wa Zəddigan əd tarna. Təssânam deɣ daɣ tilalt ta iga akal itamazal əlluɣ, izuzəy aytedan kul win daɣ innoda Iblis, id tarna ən Məššina a igraw.

³⁹ Nakkanay inəmmuzal nəggəyat awa iga ketnet daɣ əɣrəm wa n Yerusalam d akal sa hadan wa n Kəl-Əlyəhud. Ənta wa itawataytayan fəl təgəttawt, aba-tu;

⁴⁰ issənkar-t-idu Məššina əzəl wa n karad dəffər iba-net, ikf-ay turagat n ad itəwənəy iddâr.

⁴¹ Wərgex aytedan kul a t-ənaynen, kalar wər t-inay ar šigəyyawen šin isannafran Məššina harwa dat alwaq, a tanat-imosan nakkanay win dər-əs ədrawnnen tettay əd tassay dəffər tanakra ta d-iga daɣ tamattant.

⁴² Təzzar omar-ana Ƴaysa s ad nəməl Əlinjil y aytedan, naggayyat-asan as, ənta da, a isannafran Məššina ig-ay əmaşray n id t-illa awedan, gər za win əddarnen wala win aba.

⁴³ Ənta en da as əggəyyen ənnəbitan kul as, i sər-əs izzəgzanan ad igrəw təsureft ən bakkadan-net s esəm-net.»

Agaraw wa əgan aytedan wər nəmos Kəl-Əlyəhud Infas wa Zəddigan

⁴⁴ Harwada išşewal Butros as d-izzəbbat Infas wa Zəddigan fəl aljamaɣat ketnet ta təssəsamat i təlxutbat-net.

⁴⁵ Ikna awen əsəmməkləl əs nalkiman ən Ƴaysa win Kəl-Əlyəhud win d-əddewnen əd Butros, âs, wala aytedan win wər nəmos Kəl-Əlyəhud da garrawan s igət təhəkkut ta n Infas wa Zəddigan.

⁴⁶ Fəlas sallan-asan əşşewalan awalan wər nətawazday, əmmâlan adkul ən Məššina. Təzzar inna Butros:

⁴⁷ «Awak ma z'igdəlan y aytedan əgânen y Infas wa Zəddigan agaraw wa das-nəga ad təwəsəlməɣan daɣ aman?»

⁴⁸ Amaran omar s ad təwəsəlməɣan daɣ aman s esəm ən Ƴaysa Əlməsix. Dəffər awen əgməyan daɣ Butros a ɣur-san agu adan.

11

Isalan win iga Butros dat nalkiman ən Үaysa win Yerusalam

¹ Ёslan nəmmuzal əd mədrayan daҗ əzəgzan win əhanen akal wa n Yahudəyya as, əllân-tu aytedan wər nəmos Kəl-Əlyəhud əzzigzannen əntanay da s awal ən Məşşina.

² Alwaq wad iggəzzay Butros əs Yerusalam, əşşewalan fall-as inalkiman ən Үaysa win Kəl-Əlyəhud win əttafnen alҗadat-nasan ta n əmənkəd.

³ Ёnnan-as: «Manəmmək as tətəggaza ehan n aytedan wər nəmmənkəd, wala tədarraw dər-san imensewan.»

⁴ Təzzar issoҗal-asan Butros awa igan kul, wa n ənətti, inn-asan:

⁵ «Tattara daҗ əҗrəm ən Yaffa as di-tobaz tarna n Infas wa Zəddigan, inafalal-i arət iyyan. Arat wa, itawasaras-du daҗ jənnawan, olâ d əfər zəwwəran itiwattafan s əkkozat təsəlkad-net, har dat-i d-imal.

⁶ Ёswada daҗ-as, zəggazdaq-қu, ənayəҗ daҗ-as eharay, əd təwaqqast əd dəmərdəmaran əd gəḗad.

⁷ Təzzar əsleҗ y əməsli wa di-innan: "Butros, ənkər, təgzəma, tatşa!"

⁸ Mişan ənneҗ-as: "Kala kala Ёməli, id imi-nin wər kala t-iggaz arət xaraman wala iyyan immidasan."

⁹ Ёlasa tesalay y əməsli en as inna daҗ jənnawan: "Awa issəxlal Məşşina, wərgəҗ kay a tu-z-agin i xaraman!"

¹⁰ Har iga əməsli en y awen karadat tənnawen, amaran itawarkab-in awen ketnet əs jənnawan.

¹¹ Tamazayt ten da a d-əbdadan karad meddan s ahan wa daҗ əssəgana, sər-i d-əmmozaInnen daҗ əҗrəm ən Qaysarəya.

¹² Təzzar inn-i Infas wa Zəddigan a dər-san idawa əddi da. Ad wər əzləyəҗ aytedan. Ёddewa deҗ əd mədrayan-nana sədis win, har nəggaz ehan n aləs wa di-d-issəgməyan.

¹³ Issoҗal-ana əmmək was das-inafalal angalos daҗ ahan-net, ibdad dat-əs inn-as: "Zəmmizəl awedan s əҗrəm ən Yaffa y a dak-d-idaw əd Simҗon was itawannu Butros.

¹⁴ A dak-agu amagrad a sər-ək du-z-awəyan efsan kay d aҗaywan-nak ketnet."

¹⁵ Harwada wər əhoga əşşewala as fall-asan d-iga Infas wa Zəddigan əzəbbi wa fall-ana d-iga nakkanay daҗ tizarat.

¹⁶ Təzzar əkteҗ-du tənna ta iga Ёməli: "Yaxya, aman a daҗ issəlməҗ aytedan, mişan kawanay, Infas wa Zəddigan a daҗ za tətəwəsəlməҗam."

17 Dağ adi, dad zamas ig-asan Məşşina təhəkkut zun ta danax-iga as nəzzəgzan s Əməli Ҳaysa Əlməsix, ma əmosa nak as gaddala i Məşşina igi n awa ira?»

18 As təsla aljamağat i salan win, təffəsta, təzzar ad təmmal Məşşina təgannu: «Dağ adi aytedan win wər nəmos Kəl-Əlyəhud, da issəfrak-kan Məşşina ad utaban, əgrəwan təməddurt ta təylalat.»

Ətaməl n Əlinjil i Kəl-Əlyəhud dağ Antəyoxəya ta n Surəya

19 Inalkiman ən Ҳaysa win izawwazawaz alyazab wa d-izrayan ətəwənxə n Əstefanos, əqlan wiyyad har osan akal wa n Fenisəya, wiyyad osan akal imosan gərwətlan as itawannu Qibrus, wiyyad osan aхrəm wa n Antəyoxəya. Emmâlan awal ən Məşşina, eges i Kəl-Əlyəhud Ҳas.

20 Dər iga awen da ya, wiyyad dağ-san n akal wa n Qibrus əd wa n Qərwan, as din-osan aхrəm wa n Antəyoxəya əşşewalan y aytedan win wər nəmos Kəl-Əlyəhud win əşşewalnen təlyunant, əmmâlan-asan isalan n Əlinjil n Əməli Ҳaysa.

21 Tədhal-tan tarna ən Məşşina dağ awa taggin, təzzar əzzəgzanan aytedan aggotnen əs Ҳaysa Əlməsix, ətuban, əlkaman y Əməli imosan əmənokal-nasan.

22 Isalan n awen ewadan-in Əlkənisat ta təhat Yerusalam, təzzar təzammazal Barnabas s əхrəm n Antəyoxəya.

23 As din-osa inay arraxmat ən Məşşina ta du-təzzəbbet den, iddəwat. Təzzar ig-asan ketnasan ənnəsixa imosan ad əlkəman y Əməli.

24 Ənta iman-net Barnabas, aləs olâxan a imos, itkâran Infas wa Zəddigan, issohat deх əzəgzan-net. Əzzəgzanan aytedan wiyyad aggotnen s Əməli Ҳaysa.

25 Amaran ikka Barnabas aхrəm ən Tarsa, isaggad i Talut.

26 As t-igraw, iddew-du dər-əs s Antəyoxəya. Əgan dağ-as awatay iхrâdan osâxan əd nalkiman ən Ҳaysa win əhanen Əlkənisat ten, sasахrin aytedan aggotnen. Aхrəm wen da n Antəyoxəya en a dağ əssəntan aytedan teхaray nalkiman ən Ҳaysa s esəm wa n «əlməsixitan».

27 Adan en da a dağ əgmadan ənnəbitan wiyyad Yerusalam, ərasan s əхrəm wa n Antəyoxəya.

28 Ibdad iyyan dağ-san igân esəm Agabus, imal dat alwaq əs tarna n Infas wa Zəddigan as, ilkâm ad agu laz labasan dağ əddənet ketnet. Laz en da deх osa-du s əmmək was t-imal dağ azzaman n əmənokal Klawdəyus Qaysara.

29 Təzzar namardan nalkiman ən Ҳaysa win Antəyoxəya fəl tanat təmosat ad irəg akkiyyan dağ-san awa ifrag səssiwəyan tadhəlt ta i mədrayan-nasan dağ əzəgzan win əhanen akal ən Yahudəyya.

³⁰ Ʒgan awen da, Ʒgan širgitan-nasan daƷ Ʒfus ən Barnabas Ʒd Talut y a tanat-awəyan i muzaran n Ʒlkənisat ta təhat Yahudəyya.

12

Tamattant ən Yaqub d iguz ən Butros kasaw

¹ Azzaman en da a daƷ issənta əmənokəl Herod əzəƷƷəzzəb n arat daƷ aytedan n Ʒlkənisat.

² IsassanƷa Ʒs takoba Yaqub wa n amadray ən Yaxya.

³ As inay as oggaman Kəl-Ʒlyəhud awen, isattarmas Butros. Itaggu awen adan n əmud wa daƷ tattin aytedan šigəlwen šin wər iha xamira.

⁴ Isassag-ay daƷ kasaw, issəwəq-qu i maraw sojitan Ʒd sədis a tu-tinəməzrəynen s əkkoz əkkoz. Otās a das-išrəƷ dat awedan kul dəffər əmud wa n Akkay.

⁵ A iha Butros kasaw den, Ʒlkənisat ənta tədgāz wəllen tətansay-as Məššina.

⁶ As ahad wad z'ifaw išrəƷ-as Herod, insā Butros gər əššin sojitan a t-əttāfnen s əššin sassaran, əbdādan deƷ magazan wiyyad dat əmi ən kasaw.

⁷ Wala a ihogan inafalal-du angalos iyyan n Ʒməli, imalawlaw adag wa daƷ insa Butros daƷ ammas ən kasaw. Təzzar idas angalos tasaga ən Butros, issənkərtu inn-as: «Ʒbdəd tarmād!» Ʒrtakan sassaran win as əkradan fassan-net daƷ tamazayt ten.

⁸ Harwa inn-as: «Ʒzləg isəlsa-nak, təsələƷ iƷateman-nak.» Iga Butros awen da. «Ʒmərəddə əzləg əbərnuz-nak, təlkəməƷ-i-du.»

⁹ Igməd-du Butros ilkâm y angalos, wər issen as awa itaggu angalos den tidət a imos, iƷil targət awen.

¹⁰ Okayan fəl magazan win azzarnen Ʒd win əllanen dənnəg-san, amaran osan-du təsəhərt ən təzoli təswādat sa sər əƷrəm. Tənnolam dat-san šin man-net, ərdaƷan. Ʒssəwalan Ʒd tarrayt iyyat, wala a ihogan ifal-tu angalos.

¹¹ Təzzar iggaz Butros annawalat n aƷaf-net, inna: «Ʒmərəddə əkkasəƷ aššak daƷ-as, Ʒməli Məššina a d-izammazalan angalos-net, ikkas-i-du daƷ fassan n əmənokəl Herod Ʒd talbast kul tas ərən Kəl-Ʒlyəhud a di-təgrəw.»

¹² Amaran igra taƷara-net, ikka ehan ən Maryama ta n anna ən Yaxya was itawannu Markus. Ʒmminayan Ʒur-əs aytedan aggotnen tansayan Məššina.

¹³ Ikawkaw imi n aƷalla, təgla-du tamaššəƷalt təgāt esəm Ʒoda y ad təssən awa imos awedan.

¹⁴ As təzday əməsli ən Butros, awa təga daɣ tədəwit, edag n a das-taləm, tozal təqqal ammas n ahan, təmal as Butros illa dat əmi n aɣalla.

¹⁵ Ənnan-as: «Kam, əmməskəl a təgeɣ!» Mišan təzazzayyar-asan daɣ-as ənta daɣ awen. Amaran ənnan-as: «Daɣ adi angalos-net adi.»

¹⁶ A əgannin awen, Butros ənta itakawkaw-asan imi n aɣalla. As olaman, ənayan-tu, iga sər-san awen əsəmməkləl labasan.

¹⁷ Isaddagan-asan s əfus-net ad affastin, təzzar imal-asan təməwit kul tas t-id-ikkas Əməli Məşşina daɣ kasaw. Inn-asan deɣ: «Əmələt adi i Yaɣub əd mədrayan-nana win hadatnen.» Amaran ifal-tan, ikka edag iyyan.

¹⁸ As affaw, təga tənajarwayat labasat daɣ sojitan; akk iyyan isastan əmidi-net d awa iga Butros.

¹⁹ As t-id-aba y aytedan win as t-issəsəwad Herod, issəstan sojitan win t-ogaznen, amaran omar s ad tawanɣin kərəz. Dəffər awen igmad Herod akal wa n Yahudəyya, izagaday ikka aɣrəm ən Qaysarəya y a daɣ-as agu tamert.

Iba ən Herod

²⁰ Awen as itaggu, Herod ih-ay alham labasan n aytedan n əɣrəm wa n Tir əd wa n Sidon. Idhal-tan Blastus wa n əməşşewwər ən Herod, namannakan zammazalan əs Herod almawakkilan-nasan, fəl a dər-əs aknin, fəlas akal-net a du-gammadan sudar-nasan.

²¹ As d-osa əzəl wa itawasanafranan, izlag Herod isəlsanet win taɣmar təzzar iqqim fəl təxawit-net ta n taɣmar, amaran išşewal i tamattay.

²² Ad saɣaren aytedan, gannin: «Əməsli wa in əməli iyyan, wərgəɣ in awedan!»

²³ Wala a ihogan iwat-tu angalos n Əməli fəlas igi a iga iman-net daɣ adag ən Məşşina, wər iga y Əməli adkul wa dər ihor; təzzar ətşanat-tu təwakkawen, aba-tu.

²⁴ Awal ən Məşşina ənta, igla itiwəzəwiz, tigatan aytedan win sər əzzəgzannen.

²⁵ Amaran Barnabas əd Talut as əɣradan əşşəɣəl wa tand-ewayan s əɣrəm ən Yerusalam, əqqalan s as d-əhan, əddewan əd Yaxya was itawannu Markus.

Şigəyyawen daɣ Asəya əd daɣ akal ən Kəl-İlyunan

13

Ətəwəsənnəfrən ən Barnabas əd Talut y ad əşşikəlan

¹ Ælkənisat ta təhat aɣrəm n Antəyoxəya əhân-tat ənnəbitan əd məsəssəɣra əmosnen Barnabas əd Simyon was itawannu "Akawel" əd Luqəyus wa n akal ən Qərwan əd Manahin wa inamadwalan d əmənokal Herod daɣ ahan iyyanda amaran əd Talut.

² Æzəl iyyan ad əmminayan əɣbâdan Æməli əzuman deɣ, inn-asan Infas wa Zəddigan: «Səwərat-i Barnabas əd Talut aganna fəl ad agin əššəɣəl was tan-d-əɣreɣ.»

³ Æzuman əgan šiwatriwen təzzar, amaran əssəwaran Barnabas əd Talut ifassan-nasan əgan-asan šiwatriwen, dəffər adi əssəɣlan-tan.

⁴ Issoka Infas wa Zəddigan Barnabas əd Talut aɣrəm ən Salukəya. Æggazan daɣ-as aɣlal n aman əkkan akal imosan gərwətlan as itawannu Qibrus.

⁵ As osan aɣrəm ən Salamin, ad əmmâlan awal ən Məššina daɣ nan n əɣibada win Kəl-Əlyəhud. Iddew dər-san Yaxya was itawannu Markus. Illil-asan idhâl-tan.

Æmənəy d Eləymas wa n amaššaxaw daɣ Qibrus

⁶ Erzagan Qibrus, sannaqçaban-tu har osan aɣrəm ən Bafus. Den da ad əmmənayan d aləs iyyan ən Kəl-Əlyəhud igân esəm Bar-Ûaysa n amaššaxaw, igannin ənta ənnəbi.

⁷ Amaran osâɣ əd Sarjəyus Buləs wa n ənaxkim n akal, imosan awedan ilân əgərri. Issəgməy əmuzar wa Barnabas əd Talut fəlas ikna əsənnəhəl ən tara n ad aslu y awal ən Məššina.

⁸ Mišan inkar Eləymas wa n amaššaxaw – awen da a imosan almayna n esəm-net daɣ təlyunant – iqqal əllid-nasan, ad igammay d ad igdəl y ənaxkim wen əzəgzan.

⁹ Təzzar ijajjanɣal daɣ-as Talut, as itawannu deɣ Buləs, igrâwan s igət Infas wa Zəddigan,

¹⁰ inn-as: «Agg Aššaytan, azangaw n arat kul wa oɣadan. Wər t-illa əzzənəf ən təkərras a kay-wər-nəha, əməkkərrəs n ənallabus a təmosaɣ. Æmmay ad za tammazzayaɣ d agamay n əsəfrəɣ ən tarrayt toɣâdat n Æməli Məššina?»

¹¹ Æmərədda ənəy, a fall-ak assansu Æməli əfus-net, taddarɣala. Ad tagaɣ azzaman wər təlesəɣ anay n ənnur ən təfuk.» Tamazayt ten da a fall-as əganat šiyyay, idalammat fall-as amaɖal, təzzar ad iddâz, igammay i t-ilwayan.

¹² As inay ənaxkim wen awa igan den, izzəgzan. Isimak-lal sər-əs əsəssəɣri was isla daɣ batu n Æməli.

Təlxutbat ta iga Buləs daɣ əɣrəm wa n Antəyoxəya wa n Bissidəya

¹³ Iggaz Buləs aɣlal n aman ənta əd midawan-net daɣ Bafus, əkkan aɣrəm ən Bərge ihân akal ən Banfiləya. Den

da a dər-san imməzzay Yaxya was itawannu Markus, iqqal Yerusalam.

¹⁴ Entanay amaran əgmadan Bərge, əkkan ayxəm n Antəyoxəya wa n akal ən Bissidəya. As iga əzəl wa n təsanfawt, əggazan ehan n əlxibada ən Kəl-Əlyəhud, əqqiman.

¹⁵ As tawaxran daggan dağ Əttəwret d Əlkəttaban win Ənnəbitan sa hadan, ənnan-asan-in muzaran n ahan n əlxibada wen: «Imədrayan-nana, kud təll-ay batu as za təsəssuhet əzəgzan n aytedan, tagim-tat.»

¹⁶ İbdad Buləs, isaddagan-asan s əfus-net ad affastin, amaran inna: «Məddan win Kəl-İsrayil əd kawanay win miksadan ən Məşşina, səsəmat-i!

¹⁷ Məşşina di n Əməli ən tamattay ta da n İsrayil a isannafranan imarawan-nana, təzzar issəgat-tan dağ elan win dağ əmosan inaftayən dağ akal ən Masar, dəffər adi ikkas-tan-du dağ-as əs tarna n əfus-net.

¹⁸ Iga edag n əkkozat təmərwen n awatay, şin əgan dağ taneray, izizaydar dər-san.

¹⁹ İkf-en as ərzan əssayat tawşetən dağ akal ən Kanan, ikf-en akal-nasan, iggaz təkəsət-nasan.

²⁰ Awen ketnet, edag n əkkozat təmad n awatay əd səmmosat təmərwen a dağ iga. Dəffər awen a dasan-izuzir əlqalitan taqqalan-asan imənokalan har azzaman n ənnəbi Saməwel.

²¹ Azzaman en da a dağ əgməyan əmənokəl, təzzar ikf-en Məşşina Talut ag Kiş wa n tawşet ta n Benyamin. Iga əkkozat təmərwen n awatay ixkâm fall-asan.

²² Dəffər adi ikkas-tu Məşşina da taxmar, iga Dawəd dağ adag-net s ənta a fəl inna Məşşina: "Əgrawa Dawəd ag Yasay, imosan aləs ilkâman i tara-nin, wa z'ammazalan əs tara-nin ketnet."

²³ İhayawan-net a dağ d-ikkas Məşşina Yaysa s ənta a imosan Əməxlas was iga arkawal-net i Kəl-İsrayil.

²⁴ Dat assa-net ad iga Yaxya i tamattay n İsrayil ketnet isalan əmosnən ad utaban, təwəsəlməxan dağ aman, as-saknu adi tətubt-nasan.

²⁵ As ibuk Yaxya y əsəndi n əşşəxəl-net, ad igannu: "Ma təxilam, ma əmosax? Wər əmosax za awedan was təxilam. Kala, kala! İlkâm-i-du, nak wər əweda wala arra ən suxan ən xateman-net."

²⁶ İmədrayan-in kawanay win hayawan n İbrahim əd kawanay win wər nəmos Kəl-Əlyəhud təksudam Məşşina, isalan n əlxillas wa, nakkanay as tan-d-issoka Məşşina.

²⁷ Amaran aytedan ən Yerusalam əd muzaran-nasan wər əgren awa imos Yaysa, wər əgren değ wala dağ awa ənnan

ənnəbitan daɣ Əlkəttaban win tawaɣrinen akk əzəl wa n təsənfawt daɣ nan n əlɣibada, əssəndan awa ənnan ənnəbitan win di s abbaz wa t-əgan s əššəriɣa.

²⁸ Wər əgrewan arət waliyyan a t-issiwaran tamattant, mišan harkid awen, əgməyan daɣ Bilatəs a daɣ-as təwəkkəsən man.

²⁹ As əssəndan arət kul awa fall-as ənnan Əlkəttaban, əkkasan-t-idu fəl təgəttawt, əgan-tu daɣ əzəkka.

³⁰ Mišan issənkar-t-idu Məššina daɣ tamattant.

³¹ Iga adan aggotnen itinəfilil y aytedan win dər-əs d-əddawnen daɣ akal ən Galilaya əgəzzayyan s əɣrəm ən Yerusalam. Əntanay a əmosnen əmərədda šigəyyawen-net ɣur tamattay n Israyil.

³² Amaran nakkanay da, nətagg-awan isalan n Əlinjil, əmosnen isalan win as itawagga arkawal-nasan i marawan-nana.

³³ Arkawal wen issənd-anaq-qu Məššina nakkanay win hayawan-nasan s əsənkər wa d-iga ɣaysa s əmmək was iktab daɣ təsarnat ta n sanatat n Azzabur, as inna daɣ salan ən ɣaysa: "*Kay Barar-in, əqqalax azalada Abba-nak.*"

³⁴ Əsənkər wa t-id-iga Məššina daɣ tamattant, da wər tərka təxəssa-net daɣ əzəkka imâl-tu Məššina daɣ Əlkəttaban əs təməwit ta, as inna: "*A kawan-akfa arraxmaten zaddognen, ətiddanen šin as əgeɣ arkawal-nasnat i Dawəd.*"

³⁵ Iktâb deɣ as: "*Wər za təyya Əmizdag-nak arku daɣ əzəkka.*"

³⁶ Dawəd amaran, dəffər as immozal daɣ azzaman-net s aratan win ixtas Məššina, aba-tu, itawanbal dəgma ən marawan-net, tərka təxəssa-net;

³⁷ mišan ɣaysa, ənta a d-issənkar Məššina daɣ tamattant, wər tərka təxəssa-net.

³⁸⁻³⁹ Daɣ adi imədrayan-in əssənət as təsureft ən bakkadan, təttilal-awan əs tarrayt-net; amaran i sər-əs izzəgzanan ad igrəw tədarfit daɣ aratan kul win as wər ifreg tədarfit daɣ-san əs tarrayt ta n ləkkum y əššəriɣa wa d-izzəbben fəl ənnəbi Musa.

⁴⁰ Adi a fəl za tənəkədam y a kawan-igrəw awa əmalan ənnəbitan, as ənnan:

⁴¹ "*Ənəyat kawanay win nujaban; səmməkləlat, təhləkam; fəlas ad ammazala arət daɣ azzaman-nawan, as kud dawan-iga awedan isalan-net kul da, wər das-za-təzzəgzənam.*"»

⁴² Igammad Buləs əd Barnabas as daɣ-san əgməyan aytedan ad d-ələsan tewaɣlay əzəl ən təsənfawt wa d-izayan fəl a dasan-əššitin daɣ igi ən salan win den.

⁴³ As təwazawaz əljəməyət, əddewan Kəl-Əlyəhud aggotnen d aytedan wiyyad ad d-əhdânen s əddin wa n Kəl-Əlyəhud əd Buləs əd Barnabas. Maşawalan dər-san, gammayan dağ-san ad zəzzəwen dağ arraxmat ən Məşşina ta əgrawan.

⁴⁴ As d-iğlay əzəl wa n təsanfawt, təddew-du taşşam n əyrəm ketnet y ad issəsəm y awal n Əməli.

⁴⁵ As ənayan Kəl-Əlyəhud igət ən tamattay, əggaznat-tan təsmiten labasnen, ad sabahawan Buləs, rabbadan-tu.

⁴⁶ Təzzar inn-asan Buləs əd Barnabas wər təha tasa ən wala: «Kawanay a iddəraran s a dawan-attamal awal ən Məşşina əs tizarat, mişan dad zamas tugayam sər-əs, wər təssəharam iman-nawan əd təməddurt ta təylalat, wədi ad nəmələlləy s aytedan win wər nəmos Kəl-Əlyəhud.

⁴⁷ Fəlas awen da as danax-omar Əməli Məşşina s əmmək was inna dağ Əlkəttaban as ənnan: *"İgeq-qay ənnur i tawşeten šin wər nəmos Kəl-Əlyəhud fəl ad tawəyax isalan n əlyillas har d a du-təraz əddənet."*»

⁴⁸ As əslan aytedan win wər nəmos Kəl-Əlyəhud y awen, əddəwen, əzzəzwəran awal n Əməli Məşşina, əzzəgzanan aytedan kul win as itawatas ad əgrəwan təməddurt ta təylalat.

⁴⁹ Ad itiwəziwiz awal n Əməli dağ akal ketnet.

⁵⁰ Mişan ənkaran Kəl-Əlyəhud əgan ark-man dağ tədoden šiyyad tiwasaymarnen əhânen əddin ən Kəl-Əlyəhud əd muzaran n əyrəm, ewayan-du əs Buləs əd Barnabas ətəwədgaz labasan, təzzar əstəyan-tan, əkkasan-tan dağ akal-nasan.

⁵¹ Əbbəkbakan aboqqa ən daran-nasan dağ batu n əyrəm wen, təzzar əkkan əyrəm wa n İkonəyum.

⁵² İnalkiman ən Ҳaysa win d-oyyan dəffər-san dağ Antəyoxəya amaran, əknân təfalawist, idnay-tan deх Infas wa Zəddigan.

14

Buləs əd Barnabas dağ İkonəyum

¹ Iga Buləs əd Barnabas dağ əyrəm n İkonəyum arat wa da taggin fawda, a t-imosan iguz n ahan n əlyibada ən Kəl-Əlyəhud; təzzar əgan dağ-as awal a d-ewayan əs əzzəgzanan aytedan aggotnen dağ Kəl-Əlyəhud əd Kəl-Əlyunan əs Ҳaysa.

² Mişan ənkaran Kəl-Əlyəhud win ugaynen s əzəgzan əs Ҳaysa, əgan dağ aytedan win hadatnen wər nəmos Kəl-Əlyəhud ark-man əs məzzəgzan əs Ҳaysa.

³ Harkid awen iga Buləs əd Barnabas tamert tagget daɣ Ikonəyüm. Taggin awal a daq-qan wər təha tasa, tagayyen fəl Əməli. İkf-en Əməli fərregat n igi ən təlməxjujaten əmosnen alɣalamaten d aratan simaklalnen sataddinen tidət a mosan salan win əqqalnen arraxmat-net.

⁴ Mišan təzun tamattay n əxrəm. Wiyyad əwaran aganna wa n Kəl-Əlyəhud, wiyyad aganna wa n nəmmuzal.

⁵ Ənkaran aytedan win wər nəmos Kəl-Əlyəhud əd Kəl-Əlyəhud əd muzaran-nasan sammarkasan ad agin taršəxšad labasnen i Buləs əd Barnabas, anɣin-tan kərəz əs təgur ən təhun.

⁶ As isla Buləs əd Barnabas awen, əgmadan əxrəm wen, əkkan Lustra əd Derbe əmosnen iɣərman n akal wa n Lukawnəya əd kallan win tan-əɣlaynen,

⁷ a daɣ-san əmmalan isalan n Əlinjil.

Buləs əd Barnabas daɣ Lustra

⁸ Əxrəm ən Lustra ih-ay aləs n anabdon s as d-ihəw da, əmmutan daran-net, wər kala təwer takkolt-net amaɗal.

⁹ As əzəl iyyan ad issisam i Buləs iššewal, idak-ku Buləs s asawad, inay daɣ-as as, ila əzəgzan a t-izzozayan;

¹⁰ təzzar inn-as s afalla: «Ənkər, taɣəda tebadday-nak!» İggad aləs, iggaz šin teklay.

¹¹ As tənay tamattay təgget awa iga Buləs den, ad gannin aytedan s afalla daɣ awal wa n təlukawnəysat: «İmalan əhânen šaššelan an aytedan, a fall-ana d-əzzəbbatnen.»

¹² Əgan i Barnabas esəm n iyyan daɣ əssənəman-nasan as gannin «Zus», Buləs əgan-as esəm n iyyan as gannin «Hərmes» fəlas ənta a imosan əməššewəl.

¹³ İnkər əlimam n əssənəm wa igan «Zus» âs ehan n əlɣibada-net iha imi n əxrəm, isassalway-du əs mawan n əxrəm izəgran əd tətəltəla ən təjigay, ira ənta əd tamattay tagget a tan-agin šizəgzam i Buləs əd Barnabas.

¹⁴ Mišan as əslan nəmmuzal win əganen Barnabas əd Buləs awen, zazzarren šikadkaden-nasan fəl man-nasan, ozalan əs tamattay təgget ədkâlan imaslan-nasan s afalla gannin:

¹⁵ «Xa meddan! Ma tətəggim da? Nakkanay wər nəmos ar aytedan ən šilaten-nəwan. Isalan n Əlinjil a dawan-du-neway fəl ad tammazzayam d əlɣibada n əssənəman, tutabam əs Məššina di n Aməɣlöl a d-ixlakən ijənnawan d amaɗal əd gərwan d awa tan-ihan kul.

¹⁶ Daɣ elan win ərəwnen, oyya šimattiwen kul, əlkamnat i tara ən man-nasnat.

¹⁷ Mišan dər iga awen da ya, iga i man-net təgəyya id issəkna əlluɣ-net imosan: əsufəy wa dawan-d-itaggu

akonak daɣ jənnawan, ihakk-iwan šimeren olaynen əd sudar, isifəliwis-kawan.»

¹⁸ Gərrid as sahhadarren aytedan əs batu ta əgan den, əgdalan-asan a dasan-agin šinagzamen.

¹⁹ Osan-du Kəl-Əlyəhud wiyyad a d-əfalnen aɣrəm n Antəyoxəya əd wa n Ikonəyum, əššewalan y aytedan har tan-əssəwaran aganna wa-nasan. Ad əggaran Buləs əs təhun, dəffər adi zarorawan-tu har dər-əs əgmadan aɣrəm, əxilan aba-tu.

²⁰ Mišan as sər-əs d-əddewan nalkiman ən Ƴaysa, ɣalayɣalayan-tu, ibdad-du iqqal aɣrəm. As affaw, iddew əd Barnabas əkkan aɣrəm ən Derbe.

Tewaylay ən Buləs əd Barnabas Antəyoxəya

²¹ As əmalan isalan n Əlinjil daɣ əɣrəm wen, əlkaman aytedan aggotnen i Ƴaysa; iqqal Buləs əd Barnabas aɣrəm ən Lustra əd wa n Ikonəyum əd wa n Antəyoxəya,

²² ad gammayan daɣ nalkiman ən Ƴaysa win ɣərman win ad zəzzəwen daɣ tarrayt-nasan. Šəwalan-asan, talaman-asan fəl man s ad zəzzəwen daɣ əzəgzan-nasan, gannin-asan: «Illikan as, iguz ən Taɣmar ta n Məššina, iddew əd təssust tagget.»

²³ Əkkulluk n Əlkənisat sinafranan-as imuzaran, əššedawan awen əd təwatriwen d əzum, amaran agintan daɣ təxlift ən Məššina di as əzzəgzanan.

²⁴ Dəffər awen ərzagan akal wa n Bissidəya, okayan əs wa n Banfiləya.

²⁵ Əmalan isalan n Əlinjil daɣ əɣrəm wa n Bərge, amaran ərasan əs wa n Attaləya.

²⁶ Əggazan aɣlal n aman daɣ Attaləya, ənnəmadan Antəyoxəya, aɣrəm was ənta as kala daɣ-as tawaggan daɣ təxlift ən Məššina y əššəxəl wa əssəndan den.

²⁷ As din-osan, sassaxran-du aytedan kul n Əlkənisat, təzzar əsoɣalan-asan isalan n arat kul was tan-ikfa Məššina turagat n igi-net, d əmmək was olam Məššina tarrayt n əzəgzan i təmattiwen šin wər nəmos Kəl-Əlyəhud.

²⁸ Dəffər awen əmalan ɣur nalkiman win den har əgan tamert tagget.

15

Əmənəy ən məzzəgzan əs Ƴaysa daɣ Yerusalam

¹ Osan-du meddan wiyyad a d-əgmadnen akal ən Yahudəyya aɣrəm n Antəyoxəya ad sasaxrin inalkiman ən Ƴaysa, gannin-asan: «As wər təlkemam y alɣadat n əmənəkəd ta d-oyya ənnəbi Musa, wər za təgrəwam əlxillas.»

² Wər irða Buləs əd Barnabas əs batu ten, eway-du awen tamazaq labasat gar-essan əd Buləs əd Barnabas. Təzzar tətawagga tanat n ad aggazzay Buləs əd Barnabas əd nalkiman ən Ƴaysa wiyyad əs Yerusalam fəl ad ənəyan inəmmuzal əd muzaran n Ǝlkənisat daɣ batu ten.

³ Təkf-en Ǝlkənisat ta n Antəyoxəya arat kul was əddəraran, amaran əqlan. Ǝrzagan akal wa n Fenisəya əd wa n Samarəya suɣulan isalan kul ən tətubt ta d-əganat təmattiwen šin wər nəmos Kəl-Ǝlyəhud əs Məššina. Isifilawas awen wəllen inalkiman kul win kallan en.

⁴ As osan Yerusalam təg-asan Ǝlkənisat ketnet marxaba əd nəmmuzal əd muzaran. Təzzar əgan daɣ-san isalan n arat kul was tan-ikfa Məššina igi-net.

⁵ Mišan əggadan-du meddan wiyyad ən nalkiman ən Ƴaysa əhanen taggayt ta n Fərisaytan ənnan: «Ǝmənəkəd əd ləkkum y əlqanun wa n ənnəbi Musa fərəd a imos fəl aytedan win wər nəmos Kəl-Ǝlyəhud.»

⁶ Təzzar əmmənəyan nəmmuzal əd muzaran n Ǝlkənisat fəl ad əssənan awa z'əgin daɣ batu ten.

⁷ As ərəwan əmmizaxan, ibdad Butros inn-asan: «Imədrayan-in, təssānam as irəw as di-isannafran daɣ-wan Məššina fəl ad aslin aytedan win wər nəmos Kəl-Ǝlyəhud isalan n Ǝlinjil daɣ imi-nin, əzzəgzənan əs Məššina.

⁸ Məššina issānan awa ihan əwəl n awedan kul, issikna tərəddawt ta sər-san iga əs təhakkay ta tan-iga Infas wa Zəddigan əs təməwit tas dana-t-ikfa nakkanay win Kəl-Ǝlyəhud.

⁹ Wər danaɣ-izannamazlay dər-san fəlas Məššina a iza-zdagan iwallan s əzəgzan sər-əs.

¹⁰ Daɣ adi əmərədda ma fel tətəggim tənəgmayt i Məššina s igi wa tətəggim fəl rawan ən nalkiman əzuk əs wərmad əfrāgan marawan-nana adakal-net wala deɣ nəfrāk-ku nakkanay?

¹¹ Wərgəɣ arraxmat n Ǝməli Ƴaysa as nəzzəgzan, təssəfs-ana? Ǝntanay da za, əntanay win wər nəmos Kəl-Ǝlyəhud, təməwit ta da as əfsan!»

¹² Təzzar təffəsta tamattay ketnet, əssəsaman aytedan i Barnabas əd Buləs suɣulan isalan kul ən təlməxjujaten əmosnən alɣalamaten d aratan simaklalnən win as tan-ikfa Məššina igi-nasan daɣ təmattiwen šin wər nəmos Kəl-Ǝlyəhud.

¹³ As iffəsta Barnabas əd Buləs, iššəwal Yaquub, inna: «Imədrayan-in, səsəmat-i.

¹⁴ Simɣon Butros issəɣal-ana təməwit tas issənta Məššina harwa daɣ tizarat əsəkni ən tara ta iga i təmattiwen šin wər

nəmos Kəl-Əlyəhud s əsənnəfrən wa daɣ-asnat iga aytedan as z'əqqəlne tamattay-net.

¹⁵ Amaran inimannak awen d awa ənnan ənnəbitan daɣ Əlkəttaban as ənnan:

¹⁶ *"Ad d-əqqəla dəffər awa, ələsaɣ i Dawəd akaras n ahan-net ibirajjen, əkrəsəɣ iməggulaz-net, əssəbdədəq-qu,*

¹⁷ *fəl ad əgməyan aytedan win d-əqqimnen Əməli. Awalla şimattiwen kul şin wər nəmos Kəl-Əlyəhud, ad əqqəlnat tamattay-nin, əybadnat-i. Adi a inna Əməli wa igan aratan di kul",*

¹⁸ fəl təga masnat harwa irəw.

¹⁹ Awen da fəlas nak Yaquub, ərdəɣ s ad nayyu əsəmməxitər n aytedan win wər nəmos Kəl-Əlyəhud win du-tutabnen əs Məşşina.

²⁰ Mişan əktəbatana y-asan şirawt, nann-asan ad ammaz-zayan d əsəmmədəs ən man-nasan s arat ad d-immâran əssənəm, ammazzayan d igi n əzzəna əd tattay ən şan n əmudar tənɣa tarzam əd təssay n əzni.

²¹ Fəlas irəw ad t-əmalan əlfəqqitan sasəyrinen Əttawret daɣ əkkulluk n əɣrəm, itawaɣru deɣ akk əzəl ən təsanfawt daɣ nan ən Kəl-Əlyəhud win əlɣibada.»

Şirawt ta tətawasokat i nalkiman ən Ƴaysa win wər nəmos Kəl-Əlyəhud

²² Təzzar ərdən nəmmuzal əd muzaran d Əlkənisat ketnet s ad sənnəfrənan wiyyad daɣ-san, zəmmizəlan-tan s əɣrəm n Antəyoxəya, idawan əd Buləs əd Barnabas. Sannafranən Yahuza was itawannu Barsabbas əd Silas, əmosnen imuzaran daɣ məzzəgzan əs Ƴaysa.

²³ Əssəwaran-tan ad awəyan şirawt s ənta da awa daɣ-as əktaban: «Awa nakkanay inəmmuzal əd muzaran ən nalkiman ən Ƴaysa win mədrayan-nawan. Nəhul-in imədrayan-nana win wər nəmos Kəl-Əlyəhud, win əhanen aɣrəm n Antəyoxəya əd win əhanen akal ən Surəya əd wa n Kilikəya.

²⁴ Nəslâ assa wa kawan-in-əgan meddan danəɣ-in-əfalnen ši wala turagat-nana, əɣşadan iman-nawan, əşşəwaşan-kawan s awa gannin.

²⁵ Adi a fəl nənamannak ketnana, nəga tanat ad nəsənnəfrən meddan, nəzəmmizəl-tan-in sər-wan, idawan-in əd maran-nana Barnabas əd Buləs,

²⁶ əmosnen meddan əgānen iman-nasan daɣ aɣarar fəl əddəlil n esəm n Əməli-nana Ƴaysa Əlməsix.

²⁷ Adi da fəl din-nəzammazal Yahuza əd Silas fəl a dawan-ələsan əsuxəl ən salan win imi s imi.

28 Fəlas issıbdad Infas wa Zəddigan əd nəkkənay iman-nana tanat n as wər kawan-za-nəssəwər əzuk waliyyan ar wa n aratan win əwwəjjabnen,

29 əmosnen: ad tammazzayam əd tattay n amensay itiwakfan y əssənəman əd tassay n əzni əd tattay ən şan n əmudar tənxa tarzam d igi n əzzəna. As təttafam iman-nawan fəl igi n aratan win di, ad tagim a olâxan. Nəhul-kawan-in wəllen.»

30 Dəffər awen tawasallaman, əzagadayyan, əqqalan Antəyoxəya, ewâyan şirawt. As din-ewadan əşşədawan-du inalkiman ən Ƴaysa, əkfan-tan şirawt ten.

31 Tətawayra, təzzar saddawen-tan salan talamnen fəl man win əgrawen den.

32 Amaran işşewal Yahuza əd Silas əmosnen əntanay iman-nasan ənnəbitan ad taggin ənnəsixa aggen i mədrayan talaman-asan fəl man, sisuhen əzəgzan-nasan.

33 As iga Yahuza əd Silas tamert den, əsellaman-tan mədrayan win Antəyoxəya fəl ad əqqalan Elkənisat ta tandu-təzammazalat. [

34 Mişan issof Silas ad aqqam den da, iqqal âs Yahuza Ƴas a iqqalan Yerusalam.]

35 Ixsar Buləs əd Barnabas daƳ Antəyoxəya, xattaban əntanay əd wiyyad imədrayan aggotnen y aytedan Əlinjil n Əməli, sasayrin-asan-tu deƳ.

Əməzzəy ən Buləs əd Barnabas

36 As əgan tamert dəffər awen, inna Buləs i Barnabas: «Əqqələna imədrayan-nana daƳ əzəgzan win əhanen iƳərman kul win daƳ nəmal awal n Əməli, ad nəssən awa daƳ-san in-igan.»

37 Ira Barnabas ad idawan əd Yaxya was itawannu Markus.

38 Mişan inna Buləs wər ihor ad idawan d aləs as dat awen a daƳ-san ixtas iman-net daƳ Banfiləya, wər Ƴur-san iqqim har səkkəsəwan əşşəƳəl-nasan.

39 Təkkus talxa gar-essan har d-eway awen as əmməzzayan. Iddew Barnabas əd Markus əggazan aƳlal n aman əkkan Qibrus.

40 Buləs ənta isannafran Silas, iddew dər-əs. As t-əgan mədrayan daƳ təylift ən Məşşina, igla.

41 Illil Buləs akal wa n Surəya əd wa n Kilikəya isisuhit əzəgzan n Elkənisaten.

16

Tidawt ən Timotay əd Buləs əd Silas

¹ Osa Buləs aɣrəm ən Derbe, as t-ifal ikka wa n Lustra. Amaran Lustra ih-et ənalkim ən Ƴaysa igân Timotay s anna-net iyyat daɣ Kəl-Əlyəhud təzzigzanat əs Ƴaysa, mišan abba-net iyyan daɣ Kəl-Əlyunan.

² Əmmâlan-tu mədrayan daɣ əzəgzan win Lustra d Ikonəyüm əllux.

³ Ira Buləs tidawt-net, inkar isammankad-tu fəl əddəlil ən Kəl-Əlyəhud win əhanen akal wen, fəlas əssânan ketnasan as abba-net iyyan daɣ Kəl-Əlyunan a imos.

⁴ Aɣrəm a d-osa Buləs əd Silas a daɣ-as əməlan i nalkiman win t-əhanen šinaden šin əgan nəmmuzal əd muzaran n Əlkənisat ta n Yerusalam, əgməyan daɣ-san a dasnat-əlkəman.

⁵ Ad itasahat əzəgzan n Əlkənisen, təyttəynat akk əzəl.

Ətawəɣra ən Buləs əs Masedonəya

⁶ Irzag Buləs əd Silas akal wa n Frijəya əd wa n Galatəya əqlan okâyan, fəlas Infas wa Zəddigan a dasan-igdalan emel n awal ən Məşşina daɣ akal wa Asəya.

⁷ As osan əgogas n akal wa n Məsəya, əgməyan d iguz n akal wa n Bitinəya, mišan igdal-asan-tu Infas wa Zəddigan.

⁸ Təzzar ərzagan Məsəya, əzagadayyan s əɣrəm wa n Trowas.

⁹ As iga ahad orga Buləs: Inay aləs iyyan n akal ən Masedonəya ibdâd dännəg-əs, itansay-tu, igann-as: «Akka-du Masedonəya, tədhələɣ-ana.»

¹⁰ Iga Buləs targət ten ɣas, nəsammatag y iki ən Masedonəya fəlas nəkkâs aşşak as Məşşina a danax-ıxran fəl a daɣ-as nəməl isalan n Əlinjil.

Əzəgzan ən Lidəya s Əməli daɣ Filib

¹¹ Nəggaz aɣlal n aman daɣ Trowas, nənnəmad akal imosan gərwətlan as itawannu Samotras. As affaw nəkka aɣrəm ən Neyabolis.

¹² Ənta nəgmad-tu əs wa n Filib imosan aɣrəm fəl təxkâm Ərrum; imos deɣ aɣrəm wa azzaran daɣ akal ən Masedonəya. Nəga daɣ-as adan.

¹³ As d-ewad əzəl wa n əssəbət, əzəl wa n təsanfawt ən Kəl-Əlyəhud, nəgmad-in aɣrəm əs təgadamayt ən təsəssəngəyt iyyat as norda as, ih-et adag a daɣ taggin Kəl-Əlyəhud šiwatriwen. Nogaz-in šidoden əmminaynen den, təzzar nəqqim, nəşşewal-asnat, nəg-asnat deɣ təlxutbat.

¹⁴ Təssəsam-ana iyyat daɣ-asnat ən təmiksət ən Məşşina təgât esəm Lidəya n əɣrəm ən Təyatir tətaggit jola ən təbəddax zaggaynen hossaynen. Ora Əməli əwəl-net, təga əsəsəm olâɣan y awa igannu Buləs, təzzar təzzəgzan əs Ƴaysa.

15 As tətawasalmay day aman ənta d aytedan n aḡaywan-net, tonsay-ana, tənn-ana: «Zama təhannayam as əzzigzana s Əməli, wədi akkiwat-du ehan-in tazzabbem daḡ-as.» Təgraw-du daḡ-na as nərḡa.

16 Əzəl iyyan nəkkâ edag ən təwatriwen wen as nəmmənay əd təmawat iyyat ən təkliit iha aggəsuf a das-immalan awa d-izayan, garrawan sər-əs məssawəs tənfa tagget daḡ awen.

17 Təlkam-ana nakkanay əd Buləs təsiḡarat təgannu: «Meddan win, eklan ən Məššina di n Amadkol a əmosan. Isalan ən tarrayt ta n əlḡillas as d-osan y a dawan-tan-agin.»

18 Təga adan aggotnen tətəggu awen. Iгла Buləs har t-iṣaḡaššaṣat awen, imalallay-tat-in inna y aggəsuf wa tat-ihan: «Omaraq-qay əs tarna ta təhat esəm ən Үaysa Əlməsix, əgməd-tat!» Təzzar igmad-tat aggəsuf daḡ tamazayt ten da.

19 As ənayan məssawəs as ab-as sər-san tat-du-təgammad tənfa, əbazan Buləs əd Silas, əlwayan-tan s asammanay n əḡrəm, əssəbdadan-tan dat naxkiman.

20 Ənnan i naxkiman: «Meddan win jannajarwayan aḡrəm-nana. Kəl-Əlyəhud a əmosan,

21 sasaxrinen aytedan alyadaten as nakkanay Kəl-Ərrum wər nəla turagat ən tərəddawt sər-əsnat wala ləkkum y-asnat.»

22 Tənkar tamattay ənta da təzzan əs Buləs əd Silas. Ənnan naxkiman a fall-asan təwəzəzərren səlsa, omaran s a dasan-təwəgginat təwit.

23 As tan-əyyəwanan šiwwit, əgaran-tan daḡ kasaw, omaran əmuzar ən kasaw s a dasan-əgu aggaz olāḡan.

24 Əmuzar ən kasaw deḡ as das-itawanna awen, inkar igen daḡ adangaya ən kasaw, inday idaran-nasan daḡ šiləlt.

25 As isaggaraygaray ahad, ad itattar Buləs əd Silas sihaken imaslan-nasan taggin deḡ təmmalen i Məššina, əssisaman-asan məskəsa win hadatnen.

26 Wala a ihogan iga amaḡal ənəgəynəgəy s awa iga daḡ assahat har inəgəynəgəy ahan ən kasaw ketnet, ənnolamnətt təsəhar ən kasaw kul tamazayt ten da, zal-abben sassaran daḡ məskəsa kul.

27 Inkar-du əmuzar n ahan ən kasaw daḡ etəs. As inay šisəhar ən kasaw ənnolamnətt, ilbay-du takoba-net y sər-əs anḡu iman-net fəlas a iḡil iməskəsa əddəggəgan.

28 Mišan isaxarat-as Buləs inn-as: «Ad wər tanḡax iman-nak, ketnana nəlla da.»

29 Inna əmuzar ən kasaw ad d-ammawaynat fətəlaten, iggaz ammas ən kasaw tarmad igla har ewad adangaya-net təndaw-tu taysəst har issəjad i Buləs əd Silas.

³⁰ Təzzar ikkas-tan-du inn-asan: «Meddan, mas di-iwar igi-net əgrəwax əlyillas?»

³¹ Ənnan-as: «Zəgzən s Əməli Ƴaysa ad təxləsa kay d aƳaywan-nak.»

³² Amaran əmalan-as awal n Əməli ənta d aytedan kul n aƳaywan-net.

³³ Eway-tan alwaq wen da adawannay n ahad, išşorad ibusan-nasan. Den da ad itawasalmaƳ daƳ aman, ənta d aytedan n aƳaywan-net ketnasan.

³⁴ Təzzar iddew əmuzar ən kasaw əd Buləs əd Silas s ahan-net, isammagarat-tan. Isidawat-tu wəllen ənta d aƳaywan-net ketnet əzəgzan wa əgan əs Məşşina.

³⁵ As affaw, zammazalan naxkiman sojitan s əmuzar ən kasaw y a das-annin ad ikkəs Buləs əd Silas.

³⁶ İmal əmuzar ən kasaw əmazal wen i Buləs, inn-as: «Inaxkiman n əyrəm ənnan-du ad tətəwəkkəsam. DaƳ adi əgmədat, taglim daƳ alxer.»

³⁷ Mişan inna Buləs i sojitan: «A danaƳ-agin šiwwit dat awedan kul da wala əşşəriƳa, ənta nakkanay nəmos Kəl-Ərrum; əgəran-ana daƳ kasaw, amaran əmərədda iren a danaƳ-əkkəsən wər t-illa i issanan! Kala kala! Asinet-du iman-nasan, əkkəsən-ana.»

³⁸ Əqqalan sojitan əsoƳalan batu ten i naxkiman. As əslan as Buləs əd Silas Kəl-Ərrum a əmosan, ərməyan.

³⁹ Osan-tan-du a tan-talaƳden, təzzar əkkasan-tan daƳ kasaw, a daƳ-san gammayan ad əgmədan aƳrəm-nasan.

⁴⁰ İfal Buləs əd Silas kasaw, əkkan ehan ən Lidəya. As əmmənayan əd mədrayan daƳ əzəgzan, əşşewalan-asan, olaman-asan fəl man, amaran əqlan.

17

Tugəyt ən Kəl-Əlyəhud win Tesalonik s ad əqbəlan əsəssəyri ən Buləs əd Silas

¹ İga Buləs əd Silas tarrayt ta tərzagat Anfibolis d Abollonəya har din-osan aƳrəm ən Tesalonik a daƳ əlân Kəl-Əlyəhud ehan n əlyibada.

² Os-en-in Buləs, awa da itaggu fawda. İga den karadat əssəbəten itiməşiwil əd Kəl-Əlyəhud daƳ salan n awa ənnan Əlkəttaban.

³ Isassagr-asan-tan, issosan-tan âs, Əlməsix ilzâm-tu ad aƳƳazzab iba-tu, təzzar inkər-du daƳ təmattant. İgann-asan deƳ: «Ƴaysa wa dawan-əmmala da, ənta Əlməsix.»

⁴ Əzzəgzanan wiyyad daƳ-san s awa igannu, təzzar əwaran aganna ən Buləs əd Silas, əntanay əd Kəl-Əlyunan əknanen igət ən miksadan ən Məşşina əd tədoden aggotnen əlânen esəm daƳ əyrəm.

⁵ Mišan əggaznat təsmiten labasnen tašsam ən Kəl-Əlyəhud, əššedawan-du ark aytedan win əssuk, əqqalan tiddawat təzzar jannajarwayan aɣrəm. Əstabən y ahan ən Yason gammayan Buləs əd Silas fəl a tan-əssəbdədan dat aljamayət təšrəx-asan.

⁶ Wər ɣur-əs tan-əgrewan, təzzar əlwayan Yason ənta d arət daɣ mədrayan daɣ əzəgzan har tan-əssəbdədan dat naxkiman n əɣrəm, ad gannin s afalla: «Aytedan win, əddənət ketnet as sər-əs d-ewayan iba n alxer, əməərədda əntanay da.

⁷ Amaran Yason a tan-igan daɣ aɣaywan-net. Ketnasan tamazrayan əlqanun n əmənokəl-nana Qaysara fəlas tənna a taggin ill-ay iyyan əmənokəl igân esəm Ƴaysa.»

⁸ Isalan win den as dasan-təsla tamattay əd naxkiman n əɣrəm əgan əššawaša labasan.

⁹ Əgan azrəf daɣ Yason d aytedan win ɣur-əs əllanen, har t-ərzaman as tawayyan.

Buləs əd Silas daɣ Berawya

¹⁰ Tarmad as əssokan mədrayan daɣ əzəgzan Buləs əd Silas aɣrəm ən Berawya ahad wenda. As t-in-osan, əggazan ehan ən Kəl-Əlyəhud wa n əlɣibada.

¹¹ Əssəknan-tan Kəl-Əlyəhud win Berawya əlləllu ogaran wa tawasaknan daɣ Tesalonik. Əntanay əknân əlqəbulat n awal ən Məššina. Əzəl kul ɣarran Əlkəttaban, tašaggaran kud awa igannu Buləs tidət a imos wala.

¹² Eway-du awen as əzzəgzanan wiyyad daɣ-san aggotnen, əntanay əd tədoden ən Kəl-Əlyunan tiwasaxmarnen əd meddan aggotnen ən Kəl-Əlyunan.

¹³ Mišan as əslan Kəl-Əlyəhud win Tesalonik as aɣrəm wa n Berawya ənta da immâl daɣ-as Buləs awal ən Məššina, əkkan-tu ənta da, əgan arak man daɣ aytedan, jannajarwayan aɣrəm.

¹⁴ Den da ad ənkarən nalkiman ən Ƴaysa əssəgłan Buləs, əssokan-tu tama n agaraw. Silas əd Timotay əntanay əqqiman-du daɣ Berawya.

¹⁵ Aytedan win məššidaw ən Buləs, əddewan dər-əs har tu-šəššawadan aɣrəm n Atena, amaran əqqalan ewâyan əmazal ən Buləs i Silas əd Timotay n as, a das-d-əlkəman tarmâd.

Buləs daɣ Atena

¹⁶ A iqqal Buləs i midawan-net daɣ əɣrəm n Atena, tamatšin man-net fəl alham n igət wa əgan əssənəman daɣ əɣrəm wen.

¹⁷ Təzzar ad itakku ehan ən Kəl-Əlyəhud wa n əlɣibada itiməšiwil dər-san əntanay d aytedan wiyyad ən miksadan

ən Məššina, itakku dey akk əzəl asammanay n əxrəm, itiməšiwil əd win dər itamanay.

¹⁸ Itiməšiwil dey Buləs əd meddan wiyyad ən musanan ən taggayt ta n Efikurəyan d Əstoyisəyan. Tamazağan dər-əs wiyyad dağ-san gannin: «Wa akk tawalaqqat, ma igannu?» Wiyyad gannin: «Əs tanna imalan wiyyad wər nəzday as immâl isalan-nasan.» Wər tan-isassanna awen ar, a fəl dasan-immâl Buləs isalan n Əlinjil, itagg-asan isalan ən Ƴaysa əd tanakra-net dağ təmattant.

¹⁹ Təzzar əkkan dər-əs s asaggawar n əxrəm n Atena as itawannu Aryofagəs, ənnan-as: «Ag-ana isalan ən masnat təzrâyat ta dər du-toseğ da,

²⁰ fəlas təssislağ-ana aratan wər nəzday, as nərə ad nəssən almağna-nasan.»

²¹ Əntanay Kəl-Atena kul əd naftağan win tan-əhanen, wər əgmedan ar s awal d əsəsəm i salan win d-əzraynen.

²² İbdad Buləs dağ ammas n Aryofagəs inna: «Hannaya wəllen as, kawanay Kəl-Atena təddinam wəllen,

²³ fəlas əssiğlaya dağ əxrəm-nawan, zigazdağ idaggan win dağ təğabbadam imalan-nawan, əssiha fadda fəl adag a dağ tawakfınat təkutawen fəl iktâb: "Edag n əlğibada n əməli wər nətawassan". Əməli wa təğbadam da wər tu-təssenam, ənta as dawan-əmmâla isalan-net da.

²⁴ Məššina wa d-ixlakan əddənet d arat kul wa tat-ihan, ənta a imosan Əməli ən jənnawan d amağdal, wər ixser dağ nan n əlğibada əkrâsan fassan n aggadəm,

²⁵ wala iddirar s a ikna aggadəm fəlas wər iddərər əs wala. Ənta a isuduran, ihakku infas, ihakku arat kul.

²⁶ İxlak-du tawšeten n əddənet kul dağ awedan iyyanda, y ad əxsərnat fəl əruru n amağdal ketnet. İxtas-asnat azzaman, iga dey šizəraz i kallan win dağ əxsaran.

²⁷ Igâ Məššina awen fəl ad t-əgməyan aytedan kuddeğ s adez, mijas a t-əgrəwan; kuddeğ as wər danağ-ihə i iggug,

²⁸ fəlas ənta a ittafan təməddurt-nana d əmətəkwəy n akk iyyan dağ-na d awa nəmos. Adi da a ənnan arat dağ məssiway-nawan wiyyad əs tənna ta əgan: "Awalla, nakkanay da nəmos bararan-net."

²⁹ Dağ adi dad zamas nəmos bararan ən Məššina, wər imməkkan ad narđu as ihə šaššelan n əssənam igân dağ urəğ, wala azrəf, wala təhunt, a d-inzâm awedan gar-es əd man-net.

³⁰ Əljəhəl wa əgan aytedan dağ aratan win di, wər fall-asan t-ixseb Məššina dağ elan win təljuhəla, mišan əmərədda omar aytedan kul, edag əhan, əs tətubt,

³¹ fəlas ilkâm əzəl igâ təmastant, wa dağ z'agu y əddənet ketnet əššəriğa oğadan. İsinafran aləs wa z'agu dağ

əššəxəl wədi. Issikna adi y awedan kul s əsənkər wa t-id-iga daɣ təmattant.»

³² As əslan i Buləs iššewal daɣ batu ən tanakra daɣ tamattant, əgan daɣ-as wiyyad tamakkakkayt, wiyyad amaran ənnan-as: «Nəra a dak-nələs əsəsəm daɣ batu tədi əzəl iyyan.»

³³ Den da a tan-ifal Buləs, igla.

³⁴ Dər iga awen da osayən dər-əs wiyyad daɣ-san təzzar əzzəgzanan. Aytedan win, ih-en Dəyonusəyəs ihân asagawar wa n Aryofagəs əd təntut təgât Damaris əd wiyyad aytedan.

18

Buləs daɣ Korent

¹ Dəffər awen igmad Buləs aɣrəm n Atena, ikka wa n Korent.

² Den da ad immənay d aləs ən Kəl-Əlyəhud igân esəm Akilas n akal ən Fontəs, a d-osân səket ifâl-du akal wa n Italəya ənta əd hannes Friska; fələs əmənokal Klawdəyus Qaysara a omaran s ad təwəstəxan Kəl-Əlyəhud kul daɣ aɣrəm n Ərrum. Osay dər-san Buləs.

³ Amaran dad imos as ola dər-san əššəxəl – ketnasan əššəxəl-nasan igi ən həktan – imal ɣur-san Buləs, išxal.

⁴ Akk əzəl ən təsanfawt, itaggu Buləs isalan daɣ ahan ən Kəl-Əlyəhud wa n əlxibada, igamma d ad əzzəgzanan Kəl-Əlyəhud əd Kəl-Əlyunan.

⁵ As d-osa Silas əd Timotay Buləs əfâlan-du Masedonəya, igmad Buləs ənta s amel n awal ən Məššina ɣas, itagayyat i Kəl-Əlyəhud as ɣaysa a imosan Əlməsix.

⁶ Mišan ugayan sər-əs Kəl-Əlyəhud, a tu-rabbadan. İbbəkbak Buləs isəlsa-net, almaɣna ab'as dər-san idraw wala. Inn-asan: «Təlmanam iman-nawan; iwəret alxaq-nawan iɣafawan-nawan, nak ab'as di-iwar alxaq n iba n əlxillas-nawan. A obazan ɣur əmərədda aytedan win wər nəmos Kəl-Əlyəhud a z'akkaɣ.»

⁷ Təzzar ifal-tan, iggaz ehan n aləs igân esəm Titəyus Yustus imosan əmiksad ən Məššina as illa ahan-net dəgma n ahan wa n əlxibada ən Kəl-Əlyəhud.

⁸ Krisbəs wa n əmuzar n ahan ən Kəl-Əlyəhud wa n əlxibada ənta izzigzan s Əməli, ənta harkid aytedan n aɣaywan-net kul. Əslan Kəl-Korent aggotnen i salan win itaggu Buləs, əzzəgzanan əntanay da, təzzar tawasalmaɣan daɣ aman.

⁹ As ahad iyyan iga Buləs targət a daɣ das-inna Əməli: «A kay wər təggəz tasa, kalar šawal ad wər taffasta,

¹⁰ əlleq-qu dər-ək, wər t-illa i z'ifrəgan a dak-ixšəd arat, fəlas ələx aytedan aggotnen daḡ əḡrəm wa.»

¹¹ Ixsar Buləs daḡ əḡrəm ən Korent har iga awatay d aganna, isasaḡru aytedan awal ən Məššina.

¹² Azzaman win daḡ imos Galləyyun ənaxkim n akal wa n Akayya, ənkaran Kəl-Əlyəhud əgan eḡaf fəl Buləs, əbazan-tu, ewayan-tu s adag n əššəriḡa,

¹³ ənnan: «Aləs wa, igammay d ad əḡbədan aytedan Məššina əs təməwit təmmizrayat əššəriḡa.»

¹⁴ As zama issinta Buləs daḡ awal, inna Galləyyun i Kəl-Əlyəhud: «Kawanay Kəl-Əlyəhud, ənna assa a di-du-təgam daḡ batu n arat immizrayan əššəriḡa madəḡ ark amazal labasan, iməl-tu əddəlil wa fəl dawan-z-əssəsəmaḡ;

¹⁵ mišan zama awa tamazaq təgât fəl təfir d əsmawan d əššəriḡa-nawan, əsrəḡat-tan kawanay iman-nawan, nak wər areḡ ad əqqəla əmašraḡ n aratan zun win di.»

¹⁶ Amaran isassardaḡ-ḡan ehan wa n əššəriḡa.

¹⁷ Təzzar ənkaran ketnasan, əbazan Sustinəs wa n əmuzar n ahan ən Kəl-Əlyəhud wa n əlyibada, ad t-əggatan da da dat ahan wa n əššəriḡa; mišan wər izlay Galləyyun daḡ awen.

Iqqal Buləs aḡrəm n Antəyoxəya

¹⁸ Iгла Buləs ixšâr daḡ əḡrəm ən Korent har irəw. Dəffər adi inamagga əd nalkiman ən Ҳaysa šiwatriwen, iggaz aḡlal n aman ikka Surəya, iddew əd Friska d Akilas. Harwada wər iggez aḡlal n aman daḡ Qankrəya inimahazan əd Korent akku Surəya ad ilza eḡaf-net y ad assaknu s awen adḡawal wa iga.

¹⁹ As osan aḡrəm n Efez, imməzzay dər-san Buləs. Iгла ənta iggaz ehan ən Kəl-Əlyəhud wa n əlyibada imašawal dər-san.

²⁰ Əgməyan daḡ-as a ḡur-san ihag, ugay-asan.

²¹ Mišan as tan-ifal inn-asan: «[Wər imməkkan a di-wər-iga əmud wa d-izayan daḡ Yerusalām.] A kawan-d-əqqəla kud Məššina irḡa.» Igməd Efez iha aḡlal n aman.

²² As izzəbbat daḡ əḡrəm wa n Qaysarəya, iggəzzay, ikka Yerusalām issəslām Əlkənīsat, dəffər adi izagaday, ikka aḡrəm n Antəyoxəya.

²³ As daḡ-as iga tamert, igmad-tu, illil akal wa n Galatəya əd wa n Frijəya, isisuhit əzəḡzan ən nalkiman ən Ҳaysa kul.

Assa n Abbolos Efez d əššəḡəl ən Buləs daḡ Akayya

²⁴ As itaggu awen, aḡrəm n Efez os-ay-du aləs ən Kəl-Əlyəhud igân esəm Abbolos n əḡrəm n Alaskandrəya, imosan aləs issānan awal wəllen, igân masnat tagget y Əlkəttaban.

²⁵ Itiwasasağra tarrayt ta n Əməli, amaran ikf-ay Infas wa Zəddigan gəllejat dağ igi ən təlxtutbat, isasağru deş s əlluş dağ batu ən Ƴaysa; dər iga awen da ya, isalan n əsəlməş wa itaggu Yaxya aytedan dağ aman şas a t-əhanen.

²⁶ Ad itaggu awal daq-qu wər təha tasa dağ ahan ən Kəl-Əlyəhud wa n əlşibada. As das-təsla Friska d Akilas, əddewan dər-əs, sassaqran-tu s əlluş, əşşotan-as masnat ta iga tarrayt ta n Məşşina.

²⁷ Dəffər awen isammarkas Abbolos iki n akal wa n Akayya, təzzar ədhalan-tu mədrayan-net dağ əzəgzan s awen. Əktaban şirawt i nalkiman ən Ƴaysa win t-əhanen fəl a das-agin təməwit toləşat as tan-in-osa. As din-osa, təggaz-tu tənfa zəwwərat a du-təfəllat arraxmat ən Məşşina y aytedan win əzzəgzannen,

²⁸ fəlas isabbahaw s assahat dat tamattay iduf wa əgan Kəl-Əlyəhud. Issəkn-en dağ Əlkəttaban as, Ƴaysa a imosan Əlməsix.

19

Buləs dağ Efez

¹ Azzaman win dağ iha Abbolos Korent, ad irzag Buləs akal n ədşaqan har iras fəl aşrəm n Efez. Inay dağ-as inalkiman ən Ƴaysa wiyyad,

² inn-asan: «Awak kawanay, as təzzəgzanam təgrəwam Infas wa Zəddigan?» Ənnan-as: «Wər nəsla fadda as t-illa Infas wa Zəddigan.»

³ Inn-asan Buləs: «Dağ adi ma imos əzzənəf n əsəlməş wa tətawaggam dağ aman?» Ənnan-as: «Əsəlməş wa n Yaxya.»

⁴ Amaran inn-asan Buləs: «Yaxya, aytedan win ətubnen dağ bakkadan a isalmaş dağ aman, assaknu adi tətubtnasan, imməl-asan ad əzzəgzənan əs wa du-z-asin dəffər-əs, almaşna Ƴaysa.»

⁵ As əslan y awen, tawasalmaşan dağ aman dağ esəm n Əməli Ƴaysa.

⁶ Təzzar issəwar Buləs akk iyyan dağ-san ifassan-net, əgrawan deş Infas wa Zəddigan, əşşewalan dağ awalan wər nətawazday, əgrawan emel ən salan a d-izizabbat Məşşina.

⁷ Meddan en, marawessan d əşşin.

⁸ Amaran ad itakku Buləs ehan wa n əlşibada ən Kəl-Əlyəhud, itaggu dağ-as təlxtutbat wər t-illa is tu-təha tasenet har iga karadat təlil. Igammay d ad isəttəddu i Kəl-Əlyəhud isalan win itaggu dağ batu ən Taşmar ta n Məşşina.

⁹ Mišan saggarmaman wiyyad daχ-san iwallan-nasan, ugayan s ad əzzəgzənan s awa igannu, fadda ad gannin dat tiddawat aratan wər noleχ əs tarrayt ta n Əməli. Imməzzay dər-san Buləs, iddew əd nalkiman ən Υaysa; a tan-isasaχru akk əzəl daχ ahan ən taχaray n aləs iyyan igâ esəm Turanus,

¹⁰ har iga əşšin elan; har as aytedan win akal n Asəya, gər za win Kəl-Əlyəhud wala win Kəl-Əlyunan, ketnasan əslan y awal n Əməli.

¹¹ Isisugu Məşşina Buləs təlməχjujaten wər nətawazday,

¹² har as, tamawayan əlkəşifatan əd təsəwad ən təbdoq ədasnen Buləs fəl a sər-san təwədəsan miranan. Tazzayan aytedan en daχ təwərnawen-nasan; win daχ-san əhan kələsuf deχ gammadan-tan.

¹³ Ənkaran Kəl-Əlyəhud wiyyad əllâmnən gər kallan, takkasan kələsuf daχ aytedan, ad gammayan əntanay da d-ikus ən kələsuf daχ aytedan s esəm ən Υaysa, gannin daχ təməgraw-nasan: «Əhâdaχ-awan əs Υaysa, was itaggu Buləs isalan-net ar, ad təgmədəm awedan a!»

¹⁴ Əssa meddan ən mədrayan əmosnen maddanəs n əmuzar iyyan n əlimam igân esəm Sewa a tagginen awen.

¹⁵ As ənnan awen y aggəsuf, a dasan-annu: «Əzdâyaχ Υaysa, Buləs deχ əşşânaχ awa imos, kawanay amaran, ma təmosam?»

¹⁶ Təzzar ifətəqqət daχ-san awedan wa əhan kələsuf da, əggəznat-tu təχurad a tu-sisarnanen meddan en ketnasan, iχləb-tan əs təwit, har as, as gammadan ehan wen, ozâlan, əzzâfan, əbbôsən.

¹⁷ Əslan aytedan n Efez kul awen, gər za win Kəl-Əlyəhud wala win Kəl-Əlyunan. Təggaz-tan tasa ketnasan, təzzar əzzəzwaran wəllen esəm n Əməli Υaysa.

¹⁸ A du-tasin aytedan aggotnen əzzigzannen əs Məşşina, suχulan ark mazalan win as kala tan-taggin.

¹⁹ Ewayan-du massaxaran aggotnen əlkəttaban-nasan, əssəqqadan-tan dat awedan kul. Itawaxsab awa d-ənzən, iqqal səmmosat təmərwən n əgim ən tamma n əzrəf.

²⁰ Əmmək en da as təzawwazawaz tarna n Əməli awal ən Məşşina, təssəkna assahat ta təhat awal ən Məşşina.

²¹ Dəffər awen, isammarkas Buləs daχ man-net iki ən Yerusalam, immər akal wa n Masedonəya əd wa n Akayya. Igannu daχ man-net: «Dəffər as oseχ Yerusalam, kundaba əkkeχ aχrəm wa n Ərrum ənta da.»

²² Təzzar izammazal Timotay d Erastus win madhalan-net s akal ən Masedonəya, mišan ənta iman-net igla iha akal wa n Asəya har daχ-as ihog.

Şiməχutar šin d-eway əlyibada n əssənəman daχ Efez

²³ Azzaman en inijarway daɣ-san aɣrəm n Efez wəllen fəl əddəlil ən tarrayt ta n Əməli.

²⁴ Ill-ay anad iyyan igân esəm Demetrəyəs, itaggin daɣ əzrəf fototan n ahan n əssənəm iyyan imosan tantut təgât esəm Artemis. Igarraw daɣ awen tənfa təknât igət i nadan win midawan-net.

²⁵ İşşedaw-tan-du ketnasan, əntanay əd nadan wiyyad win əddarnen daɣ awen, inn-asan: «Ya meddan, təssânam as təgərgist-nana, təqqân daɣ əşşəxəl wa da.

²⁶ Mişan təhannayam kawanay iman-nawan, təslâm dey awa itaggu aləs wədi as itawannu əddi Buləs. A igannu: "Imalan win əgan fassan n aytedan, wər əmosan fadda imalan." Izazzagzan awen y aytedan aggotnen, wərge da da daɣ Efez ɣas ad issəxrak aytedan, kalar harkid taşşam n aytedan win akal n Asəya kul.

²⁷ Arat wa, wərgex əşşəxəl-nana ɣas as du-z-awəy iguz ən tazak n ad itəwəlku, kalar ehan n əlxibada wa n Artemis di maqqarat, ta təmosat təməlit-nana ənta da ad irtək almaqam-net, tammazzay fadda d ətəwəsəxmar, ənta əxbâdan aytedan kul win akal n Asəya, d əddənət ketnet.»

²⁸ As əslan aytedan win das-əssəsammen y awen, iggaz-tan alham labasan, əssokan imaslan-nasan ijənnawan gannin: «Artemis ta n Kəl-Efez di maqqarat!»

²⁹ Təga tənajarwayat daɣ əɣrəm ketnet. Tənkar tamattay təggag s ahan zəwwəran wa n əmənəy, təlwây Gayəs d Aristarxus win akal ən Masedonəya əmosnen imidawan ən Buləs dər iddew daɣ əşikəl.

³⁰ Təzzar ira Buləs ad akku tamattay ten, mişan əgdalan-as-tu nalkiman ən Ƴaysa.

³¹ Wala arat daɣ muzaran n akal n Asəya ən midawan-net da, zammazalan sər-əs aytedan y a daɣ-as əgməyan ad wər ikka ehan en.

³² As itaggu awen, tamattay ta təddewat daɣ ahan en, ketnet tənijarway. Siɣaren aytedan daɣ jənnawan gannin aratan wər nola, fəlas taşşam-nasan wər əssenən fadda əddəlil wa fəl əddewan den.

³³ Əbdəyan-in Kəl-Əlyəhud aləs igân esəm Alaskandər əs tiddawat, ittəmal-as awa igan den. Təzzar ad isidugin s əfus-net i tamattay təfastit, y a dasan-işşiwəl s esəm ən Kəl-Əlyəhud.

³⁴ Mişan as əgran as awedan ən Kəl-Əlyəhud a imos əssokan imaslan-nasan ijənnawan jajjayan gannin: «Artemis ta n Kəl-Efez di maqqarat!» Har din-əkkan edag ən sanatat assaxaten gannin awen.

³⁵ Aləs wa imosan ənaktab n əɣrəm en, ənta a isahhadar-ren tamattay en, inn-as: «Ya meddan n Efez, awak ill-ay

awedan wər nəssen as, aɣrəm wa n Efez ənta a imosan əmagaz n ahan wa daɣ tətawaybad Artemis di maqqarat əd šaššelan-net igân daɣ təhunt as jənnawan a daɣ du-tərtak?

³⁶ Zama wər t-illa awedan as ijhâl awen, wədi ihôr ad təhədərrem, ad wər tagim arat waliyyan daɣ tararada,

³⁷ fəlas meddan win du-təlwayam da, wərmâd əmôsan ibaydagan ən nan win əlɣibada, wala deɣ ənnan a labasan əs təməlit-nana.

³⁸ Amaran kud Demetrəyəs əd nadan win midawan-net ill-ay a dasan-iɣšâd awedan, wədi əllân-tu jilan win daɣ itaggu əššəriɣa, əllân-tu deɣ naxkiman win tu-tagginen. Akkinet-tan.

³⁹ Kud deɣ wiyyad aratan a dər təssəstanam, ad tətəwəknu taɣawšay tədi daɣ asaggawar wa iskatan s awen.

⁴⁰ Nakkanay da əmərədda əhanen tazak n ad itiwənnu əfəlləg a nəga fəl əddəlil n awa igan azalada; fəlas wər t-illa əsarə nəga as nənna ənta a fəl təga tənajarwayat ta.» Iɣrad ənaktab n əɣrəm awal wen ɣas, inna i tamattay ad təwəziwəz.

20

Əššəɣəl ən Buləs daɣ Masedonəya d akal ən Kəl-Əlyunan

¹ As ədraran aytedan, isassaɣra-du Buləs inalkiman ən ɣaysa ig-asan ənnəsixa issəsmad iwallan-nasan, amaran inamagga dər-san šiwatriwen, igla ikka akal ən Masedonəya.

² Irzag akal en itaggu ənnəsixatan aggotnen i nalkiman ən ɣaysa, italam-asan fəl man, dəffər awen ikka akal wa n Kəl-Əlyunan.

³ Iga daɣ-as karadat təlil. Isimutug y iguz n əɣlal n aman s akal ən Surəya as t-əggazan salan n as əgân Kəl-Əlyəhud eɣaf fəl a t-anɣin, təzzar iga tanat n ad iqqəl dəffər-əs, agu tarrayt ta n Masedonəya.

⁴ Iddew əd Sofatrəs ag Fərəs wa n əɣrəm ən Berawya, d Aristarxus əd Səkəndus win n əɣrəm ən Tesalonik, əd Gayəs wa n əɣrəm ən Derbe, əd Tişik əd Trofiməs win n akal n Asəya amaran əd Timotay.

⁵ Əgla meddan win, azzaran-anaɣ, əqqalan-anaɣ daɣ əɣrəm ən Trowas.

⁶ Amaran nakkanay as fall-anaɣ okay əmud wa daɣ tattin aytedan šigəlwen šin wər iha xamira, nəggaz aɣlal n aman daɣ Filib nəkka Trowas. As nəga səmmos adan fəl agaraw nos-en-in, nəga den əssa adan.

⁷ As əzəl wa n alxad imosan əzəl wa azzaran daɣ jilan, nəmmənay daɣ adag iyyanda y ad nədrəw imensewan win saktan. İşşewal Buləs i nalkiman ən Ƴaysa win əllanen den har isiggaraygaray ahad fəlas əşikəl a fəl insa.

⁸ Əhanat fətəlaten aggotnen ehan imosan suru wa daɣ nəmmənay.

⁹ A işşewal Buləs den, iqqim aləs iyyan n əmawad igân esəm Yutəxos fəl fənətər. İlla den har t-iggaz etəs ad itanaddam. İgla har daɣ-as igla etəs wəllen, ifataqqat, ikka amaɖal. Fənətər ən suru wa n karad a fəl d-ifataqqat den. As d-immədkal, wər idder.

¹⁰ İzzəbbat-du sər-əs Buləs ənta da, ifataqqat fall-as, izalammat-tu, inna: «Ad wər təşşəwəşam, iddâr.»

¹¹ Təzzar iqqal Buləs ehan wa d-izzəbbat, izun imensewan win saktan, as ətšan, ilas Buləs işşewal-asan har du-təgmad təfuk, əddi amaran ad igla.

¹² Əmawad ənta, əddewan dər-əs aytedan s aɣaywan iddâr, wər ila əxəli. Ketnasan olam-asan awen wəllen fəl man.

Şiwatriwen şin əlkamnen inamagga Buləs əd muzaran n Əlkənisat n Efez

¹³ Nakkanay nəgla nəggaz aɣlal n aman nəkka aɣrəm n Assos, nazzar i Buləs. Den da a fall-ana du-z-iggəz aɣlal, imos as awen da as otas igi-net. Ənta iman-net a ira a din-ijəwənkət.

¹⁴ As dana-d-osa daɣ Assos, nənamaggaz dər-əs aɣlal n aman, nəkka aɣrəm ən Mitilenəs.

¹⁵ Nəgmad Mitilenəs nəhâ aɣlal n aman, as əzəl wa hadan nəmmodaɣ y akal imosan gər wətlan as itawannu Xəyyaw, əzəl wa dəffər wədi newad wa n Samos, əzəl wa dəffər wədi nosa aɣrəm ən Miletəs.

¹⁶ İgâ Buləs tanat n as, wər z'immər Efez fəl ad wər aɣlalat daɣ akal n Asəya, fəlas irrorad Yerusalam fəl a daɣ-as t-agu əmud wa n Fantəkawt, kud adi ifrâg igi.

¹⁷ Əzəbbi wa nəga daɣ Miletəs a ɣur izammazal Buləs awedan, issəgməy imuzaran n Əlkənisat n Efez.

¹⁸ As t-id-osan inn-asan: «Kawanay iman-nawan əhân-kawan salan ən tassaɣ ta dər-wan əgeɣ, wa d-əggazaɣ akal n Asəya əzəl w'azzaran, har awas kawan-əfala;

¹⁹ d əmmək was tagga əşşəxəl n Əməli əssirasax iman-in daɣ arat kul, iddew-i awen əd məttawan əd təməxutar şin sər-i du-tawaynat ark tənagmayen şin di-taggin Kəl-Əlyəhud.

²⁰ Təssânam deɣ as, wər kala a dawan-əxbara arat waliyyan a dawan-təha tənfa, aqqama wər dawan-t-əmela,

sassaɣr-awan-tu, gər za dat aytedan wala deɣ day nan-nawan.

²¹ Wər kala əmməzzaya d agamay daɣ Kəl-Əlyəhud əd win tan-wər-nəmos ad utaban əs Məššina, əzzəgzənan s Əməli-nana Ƴaysa.

²² Amaran əmərədda nak da izzəlzam Infas wa Zəddigan iki n Yerusalām, wər əssenay awa di-iqqalan daɣ-as.

²³ Arat iyyanda ɣas a daɣ əssanaɣ as, ig-i Infas wa Zəddigan ta daw aɣaf as, aɣrəm oseɣ da ilkâm daɣ-i kasaw d alɣazab.

²⁴ Wər ɣur-i təmos təməddurt-in fadda wala, arat wa ɣur-i t-imosan a d-əssəxsəla arat wa dəffər ozala, əɣrəda əššəɣəl wa daɣ-i iga Əməli Ƴaysa, imosan emel n Əlinjil a əhan salan n arraxmat ən Məššina.

²⁵ Amaran əmərədda əssâna daɣ-as, kawanay win gər əllama da, əmmâla Taɣmar ta n Məššina, wər di-za-tələsam anay.

²⁶ Adi a fəl kawan-əgeɣ azalada šigəyyawen n as, ab'as di-iwar alxaq n əzni ən waliyyan daɣ-wan.

²⁷ Fəlas wər kala a dawan-əɣbaraɣ arat waliyyan, əmâlaɣ-awan tarrayt kul ta d-iktab Məššina.

²⁸ Daɣ adi ənkədat əd man-nawan, təssənam deɣ day tamattay ketnet tas kawan-iga Infas wa Zəddigan imagazan-net, tagim y Əlkənisat ən Məššina təmədint tolâɣat, ənta di da a d-izzənza Əlməsix s əzni wa-net iman-net.

²⁹ Əssânaɣ as, nak as əgleɣ a kawan-d-əggəzan aytedan wər nəzlay əd təzoriyawen labasnen, wər za nayyu Əlkənisat-nawan wər tat-ədesan.

³⁰ Kawanay iman-nawan da, əhân-kawan aytedan as za safraxnen tidət fəl ad əssəxrəkan inalkiman ən Ƴaysa.

³¹ Daɣ adi agat ənnəyat, a du-təkattim as karad elan a əgeɣ sasaxraq-qawan s iyyan iyyan ehad ezal, əssirtayax awen əd məttawan.

³² Amaran əmərədda əssiɣlafaq-qawan i Məššina əd salan win əmmalnen arraxmat-net. Məššina ifrâg əsəssuhi n əzəgzan-nawan d əsəttəddi n agaraw wa za tagim daɣ təkəsit ta issənsa y aytedan kul win zaddognen.

³³ Wər di-ides as əgêɣ attama-nin daɣ əzrəf wala urəɣ wala isəlsa n awedan waliyyan.

³⁴ Kawanay iman-nawan təssânam as, ifassan win-danin as əşɣala, əkneɣ s əššəɣəl-nasan tuməɣlaten-in əd šin miɗawan-in win dər əddewa.

³⁵ Faw saknaq-qawan as, əmmək en da as kawan-iwar kawanay da, ad təşɣəlam fəl ad tilalam i maddararan, a du-təkattim batu ta iga Əməli Ƴaysa ənta iman-net, as inna: "Əbbələl wa itaggu awedan wa ikfan, ogar wa itaggu awedan wa igrawan."»

³⁶ As inna Buləs awen, igaraffat ənta dər-san ad itattar.

³⁷ Ketnasan hallin, tizələmmen Buləs, tamallen-as.

³⁸ Arat wa iḡsadan iman-nasan wəllen, tənna ta dasan-iga, wər tu-z-ələsan anay. Amaran əntagan-tu har osa aḡlal n aman.

Şigəyyawen daḡ Ǝrrum

21

Iki ən Buləs əd midiwan-net Yerusalam

¹ As dər-san nəmməzzay gərrid, nəggaz aḡlal n aman, izzal dər-na s akal imosan gər wətlan as itawannu Kos. As əzəl wa dəffər wen, nəgmad-tu s akal imosan gər wətlan as itawannu Rodəs. Nəgmad Rodəs nəkka aḡrəm ən Fatara.

² Nogaz-in daḡ-as aḡlal n aman itakkin akal wa n Fenisəya, təzzar nəggaz-tu, nəgla.

³ As nogga akal imosan gər wətlan as itawannu Qibrus, nəḡlay-tu fəl aganna wa n agala, nədag sa sər akal wa n Surəya har nəzzəbbat daḡ əḡrəm ən Tir s ənta a daḡ za təwəzəzəbben lalan win eway aḡlal.

⁴ Nəgmay inalkiman ən Ǝaysa har tan-nəgraw, nəzzəbbat ḡur-san har nəga əssa adan. Nəlla ḡur-san as tan-issosan Infas wa Zəddigan daḡ ad annin i Buləs, ad wər akku Yerusalam.

⁵ Dər iga awen da ya, as əndan adan win den, nəmatakway nəgla. Ǝntagan-ana ketnasan, harkid tədoden-nasan əd bararan-nasan har nəgmad aḡrəm, amaran nəgaraffat daḡ tama n agaraw, nəttar.

⁶ As dər-san nənamagga şiwatriwen, nəggaz aḡlal n aman; əntanay eqqalan iḡawnatan-nasan.

⁷ Nəgla daḡ əşşikəl-nana, nəgmad Tir nəkka Bətolemayəs. As daḡ-as nəzzəbbat, nəkka imədrayan-nana win t-əhanen y a tan-nəssəsləm, nəga ḡur-san əzəl.

⁸ As əzəl wa dəffər wen nəkka aḡrəm ən Qaysarəya. As t-in-nosa nəzzəbbat daḡ ahan ən Filibus wa n əməggi ən salan n Ǝlinjil imosan iyyan daḡ meddan win əssa, win as kala tawasanafranan fəl ad tilalan y Ǝlkənisat ta n Yerusalam.

⁹ İla əkkozat təbararen wər nəzday meddan. Şibararen şin əmosnat tənəbiten.

¹⁰ As nəga adan aggotnen den, osa-du ənnəbi iyyan igân esəm Agabus, a d-ifalan akal ən Yahudəyya.

¹¹ Os-ana-du, idkal əsatəb ən Buləs, ikrad sər-əs idaran win-net iman-net əd fassan-net, amaran inna: «Ənta da awa inna Infas wa Zəddigan: "Aləs wa ilan əsatəb wa, əmmək wa da as tu-z-əkrədan Kəl-Ǝlyəhud daḡ Yerusalam, agin-tu daḡ fassan n aytedan wər nəmos Kəl-Ǝlyəhud."»

12 As nəsla y awen, ad nətansay Buləs, nakkanay əd nalkiman ən Ҷaysa win əxrəm en fəl ad wər aggazzay akku Yerusalam.

13 Mišan inn-ana Buləs: «Ma fəl təhallim, təsimələşsem əwəl-in? Nak, wərgəx kerrad xas as sammataga, kalar tamattant da simataga-x-as da-x əxrəm ən Yerusalam fəl əddəlil n esəm n Əməli Ҷaysa.»

14 As nənay as wər t-idu-za-nəssuxəl da-x awas ira igi-net, noyy-ay, nənna: «Aget Əməli tara-net!»

15 Dəffər adan win den ad nasammatag i teklay, nəgla nəggəzzay əs Yerusalam.

16 Eddewan dər-na arat da-x nalkiman ən Ҷaysa win əxrəm ən Qaysarəya. Ewayan-ana s ahan n aləs igân esəm Mənason n akal imosan gərwətlan as itawannu Qibrus, irəwan imos analkim ən Ҷaysa, nəzzəbbat xur-əs.

Əmənəy ən Buləs əd muzaran n Əlkənisat ən Yerusalam

17 As din-nəggaz Yerusalam, əgan-ana mədrayan-nana da-x əzəgzan win əllanen den marxaba, əddəwen.

18 As affaw iddew dər-na Buləs s ahan ən Yaqub xur əddəwan əm-xaran n Əlkənisat ketnasan.

19 Issəslam-tan Buləs, təzzar i-xrad-asan əsuxəl n aratan kul win iga Məşşina əs tarrayt n əşşəxəl wa itaggu Buləs da-x aytedan win wər nəmos Kəl-Əlyəhud.

20 As əslan y aratan win inna, ad əmmâlan Məşşina. Dər iga awen da ya ənnan i Buləs: «Amadray-nana, ənəy igiman əs giman n aytedan win əzzəgzannen əs Ҷaysa da-x Kəl-Əlyəhud, ketnasan zizawen wəllen da-x iduf n əşşərixa wa n Əttəwret.

21 Ewâdan-tan-du za salan wizawaznen da-x batu-nak, əmosnen as: əsəssəxri wa tətəgga, itaway-du əs Kəl-Əlyəhud kul win əhanen şimattiwen şin wər nəmos Kəl-Əlyəhud əməzzəy d əşşərixa wa n Əttəwret, təganna-x-asan ad ammazzayan d əsəmmənkəd ən bararan-nasan əd ləkkum y alxadaten ən Kəl-Əlyəhud.

22 Da-x adi ma za nugu? Fəlas igmâd aşşak as ad aslin as tosêx-du.

23 Əddəlil wədi a fəl za taga a wa dak-za-nannu da: Əhân-anax əkkoz meddan ədkâlnen aqđawal.

24 Idaw dər-san s adag wa da-x zazdagan aytedan, təzzəzdəga iman-nak kay dər-san, tərzəməx fall-asan arat wa tan-ihan, fəl a dasan-təwəlzın xafawan-nasan. Əddi ad z'əssənan aytedan kul as, awa sər-ək itawannin wər t-ihə a igân, kalar kay da təlkâməx y əşşərixa wa n Əttəwret.

25 Amaran aytedan win wər nəmos Kəl-Əlyəhud win əlkammen i Ҷaysa, nəktâb-asan şirawt əhânat tənaden şin

nəga əmosnen as, ad wər atšin isan əmosnen takutay y əssənam, wala ašwin azni, wala atšin isan n əmudar tənxa tarzam, wala agin əzzəna.»

²⁶ Təzzar iddew Buləs əd meddan win əkkoz en. As əzəl wa dəffər wen izzəzdağ iman-net ənta dər-san, amaran iggaz Ehan wa Zəwwəran n Əlxiyada, imal i limaman əzəl wa dağ za tandu tazdak-nasan, əzəl wa dağ za tətəwəkfu təkutay fəl akk iyyan dağ-san.

Ətərməs ən Buləs dağ Ahan wa Zəwwəran n Əlxiyada

²⁷ As zama dağ-san əkməlan əssa adan, tandu tazdak-nasan, ənayan Kəl-Əlyəhud wiyyad n akal n Asəya Buləs dağ Ahan wa Zəwwəran n Əlxiyada; təzzar jannajarwayan tamattay, əgan dağ-as arak man əs Buləs, əbazan-tu.

²⁸ Gannin s afalla: «Ya Kəl-İsrayil, agəzat! Ənta da aləs wa itaggin dağ təlxiutbaten šin itaggu y aytedan kul dağ adag kul ark awalan fəl tamattay-nana, d əššərixa wa n Əttəwret d Ahan wa Zəwwəran n Əlxiyada wa. Iгла har as, iga-du Kəl-Əlyunan dağ Ahan wa Zəwwəran n Əlxiyada, isammadas edag zəddigan wa.»

²⁹ Gannin awen fəlas dat awen ənəyan Trofiməs wa n Efez dağ əxrəm iddew əd Buləs; təzzar ordan as izzogaz-tu Buləs Ehan wa Zəwwəran n Əlxiyada.

³⁰ Inajarway əxrəm ketnet, ozalan-du aytedan dağ təsədağ kul. Əbazan Buləs, əlwayan-tu əgmadan dər-əs Ehan wa Zəwwəran n Əlxiyada, təzzar tawaharan mawan-net dəffər-san tamazayt ten da.

³¹ Gammayan ad agin iman ən Buləs as din-ewadan salan kumanda ən sojitan n Ərrum n as, əxrəm ən Yerusalam ketnet inijarway.

³² Ixra-du sojitan əd kabtanatan-nasan dağ tamazayt ten da, ozalan sər-san. As togga tamattay kumanda əd sojitan, təraz dağ təwit ən Buləs.

³³ Təzzar ikka-du kumanda Buləs, ibaz-tu, omar s ad itəwəkrəd s əššin sassaran, amaran issəstan d awa imos, d awa ixšad.

³⁴ Təsəxarat tamattay ketnet, gannin aratan əmmizraynen. Indar i kumanda ad issən awa imosan tidət dağ takat ten, təzzar omar s ad ammayay Buləs əs barəki wa n sojitan.

³⁵ As ewad Buləs šisəffəttan n ahan wa n barəki, awa sər-əs təga tamattay dağ əwəjjən, kundaba as t-ədkalan sojitan s afalla.

³⁶ Təlkâm-as tamattay ketnet, təsixarat təgannu: «Am-matet, ammatet!»

Aljawab wa iga Buləs dat əljəmayat

37 As zama dər-əs əggâzan sojitan barəki, inna Buləs i kumanda: «Awak ələx tarrayt n a dak-annaş arat?» Inn-as kumanda: «Ko! Kay təssana təlyunant?»

38 Daş adi wər təmosaş aw Masar was kala isaffallag aytedan, təzzar iggaz teneray ənta d əkkoz gim n awedan ən maggan ən man?»

39 Inn-as Buləs: «Nak, Ag-Əlyəhud a əmosaş, ihəwan daş əxrəm ən Tarsa daş akal ən Kilikəya imosan əxrəm fəl təga masnat. Onsayaq-qay a di-takfa turagat n ad əşşiwəla i tamattay ta.»

40 İkf-as-tat kumanda, ibdad Buləs fəl təsəffəttan, isaddagan s əfus-net i tamattay ad təssəsəm. Təffəsta tamattay ketnet, təzzar işşewal-asan Buləs daş təlxibrit, awal wa-da-nasan, inn-asan:

22

1 «Imədrayan-in d abbatan-in, səsəmat əmərəddə a kawan-sassagra tādłəmt ta tawagga.»

2 As das-əslan işşewal-asan daş təlxibrit, əşşotan daş əsəsəm y-as; təzzar inn-asan:

3 «Nak Ag-Əlyəhud a əmosa, ihəwan daş əxrəm ən Tarsa ihân akal ən Kilikəya, mişan əxrəm wa daş a daş ədwala, əxreş daw Gamaləyel. Isassayr-i s əlluş ləkkum y əlqanun n aljad-nana. Əgeş gəllejat daş ləkkum i Məşşina şilat ən ta təgam azalada.

4 Əzağazzabaş aytedan win əhanen tarrayt ta da ən Ƴaysa, har əgmadan man wiyyad, karrada meddan əd tədoden, əggaraq-qan daş kasaw.

5 Əlimam wa Zəwwəran d Asaggawar wa n əymaran əggəyyen fəl adi. Əntanay fadda a di-əkfanen şira əkkanen imədrayan-nana, Kəl-Əlyəhud win Damas, fəl ad əgrəwa as din-oseş tarrayt n abbaz ən nalkiman ən Ƴaysa kul win t-əhanen, awəyaq-qan-du əs Yerusalam əkrâdan fəl ad awwaddaban.

6 Əşşokala za daş awen da, as din-əhozaş əxrəm ən Damas attayan n ammas n azal, wala a ihogan, ibalazzat ənnur labasan a d-igmâdan ijənnawan daş şələyşələyan-in.

7 Udeş, əsleş y əməsli iyyan as di-inna: "Talut, Talut ma fel as di-təzağazzaba?"

8 Ənneş: "Əməli, ma təmosaş?" Inn-i: "Nak awa, Ƴaysa wa n Nazaret, wa təzağazzaba."

9 Ənâyan aytedan win dər əddewəş ənnur wen, mişan wər əslən y əməsli wa di-işşewalan.

¹⁰ Təzzar ənney: "Əməli, mas di-iwar igi-net?" Inn-i Əməli: "Əbdəd, takkağ ayxəm ən Damas, a dak-day-as-attamal arat kul was kay iwar igi-net."

¹¹ Əddərğala fəl təllabəst n ənnur en, təzzar əbazan aytedan win dər əddewa əfus-in, əlwayan-i əs Damas.

¹² Amaran Damas ih-et aləs iyyan igân esəm Ananəyâs iksudan Məşşina wəllen, ilkâm y əlqanun-nana, as Kəl-Əlyəhud kul win Damas əssiğmaran-tu.

¹³ Os-i-du, ibdad dəğma-nin, inn-i: "Amadray-nin Talut, iqqələt-kay-du asawad-nak." Iqqal-i-du asawad-in tamazayt ten da, ənayaq-qu.

¹⁴ Inn-i dey: "Məşşina wa əğbadan marawan-nana a kay-isannafranan harwa dat alwaq, y a kay-issusən tara-net, tənəyağ Alxadil-net, tasla dey y əməsli wa-net iman-net,

¹⁵ id ad təqqəla təğəyya-net dat aytedan kul, təməlağ-asan awa tənayağ d awas təsleğ.

¹⁶ Əmərədda mas təqqala? Əbdəd, tətəwəsəlməğa day aman, tansəyağ Əməli a kay-izzəzdəğ day bakkadan-nak."

¹⁷ Dəffər awen əqqala Yerusalam. Tattara əzəl iyyan day Ahan wa Zəwwəran n Əlyibada as di-tobaz tarna n Infas wa Zəddigan.

¹⁸ Ənayağ Əməli, inn-i: "Ətrəb, təgməda Yerusalam tarmâd, fəlas wər z'əqbəlan aytedan-net təğəyya ta fall-i tətəgga."

¹⁹ Təzzar ənney-as: "Ya Əməli, wərgəğ əntanay iman-nasan əssânan day əmmək was kala ad tilala inan n əlyibada s iyyan iyyan, sağfalağ aytedan win sər-ək əzzəgzannen, əggataq-qan?"

²⁰ As itawənğal dey əzni n Əstefanos imosan təğəyya-nak, nak iman-in əlley den, ərdəğ s ətəwənğa-net, nak a oğazan ibərnaz n aytedan win əganen iman-net."

²¹ Amaran inn-i: "Aglu, nak a kay-z-izəmmizəlan s igəğ, əssukaq-qay aytedan win wər nəmos Kəl-Əlyəhud."»

Buləs əd kumanda ən sojitan win Ərrum

²² Əssisaman-as aytedan har d-idkal batu n aytedan win wər nəmos Kəl-Əlyəhud, təzzar sağaren day jənnawan gannin: «İtəwəkkəset awedan wa fəl amağal! Awedan şilat ən wa, wər immək ad iləs təməddurt.»

²³ Takkasan imaslan saksodnen, əggaran-in ibərnaz-nasan, əggaran aboqqa day alhawa.

²⁴ Omar kumanda s ad itəwəzugəz Buləs ammas ən barəki, təwəgginat-as təwit s ələkkud fəl a dasan-iməl əddəlil wa fall-as təsəğarat tamattay.

²⁵ Mišan as t-əkradan y a das-agin šiwwit, inna i kabtan wa illan den: «Awak təlâm tarrayt ən təwit n iyyan daɣ Kəl-Ərrum wər ibez əššəriɣa harwada?»

²⁶ As isla kabtan en y awen, igla imal i kumanda, inn-as: «Ma tətagga da? Aləs a, in Ərrum!»

²⁷ Ikka-du kumanda Buləs, inn-as: «Tidət as kay in Ərrum?» Inn-as Buləs: «Awalla!»

²⁸ Təzzar inna kumanda: «Nak, azrəf aggen a əzzənza tišit n iyyan daɣ Kəl-Ərrum.» Inn-as Buləs: «Nak ələsəl-in a təmos.»

²⁹ Tarmâd as fall-as əzzənkanan sojitan win as zama a t-əggazan šin tanaɣay y a tu-šəššiwəlan. Kumanda iman-net as issan as iyyan daɣ Kəl-Ərrum a isassakrad den əs sassaran, təggaz-tu tasa.

Tebadday ən Buləs dat Asaggawar wa Zəwwəran

³⁰ As əzəl wa dəffər wen, omar kumanda imuzaran ən limaman d Asaggawar wa Zəwwəran ən Kəl-Əlyəhud ketnet s ad ammanay, fəlas ira ad ikkəs aššak daɣ əddəlil wa fəl sattarmasan Kəl-Əlyəhud Buləs. Təzzar issokas-du Buləs, issəbdad-tu dat-san.

23

¹ Idag Buləs Asaggawar s asawad-net, inna: «Imədrayan-in, wər di-təha tərək waliyyat n as ill-ay arat a iqqal wər ira Məššina as kala ad t-əmmozaala har awas əbdada da.»

² Mišan omar Ananəyās wa n Əlimam wa Zəwwəran iyyan daɣ aytedan win əllanen dəgma ən Buləs s a das-infəz.

³ Təzzar inn-as Buləs: «Məššina a dak-z-infəzan, əlmunafiq! Wər təqqimaɣ əddi ar y a di-təsrəɣa s awa inna əššəriɣa, kay təmməzrayaq-qu ad təsawataɣ imi-nin.»

⁴ Ənnan-as aytedan win əllanen dəgma-net: «Kay, Əlimam wa Zəwwəran ən Məššina a tərabbada?»

⁵ Inn-asan Buləs: «Wər əssenay imədrayan-in as ənta a imosan Əlimam wa Zəwwəran; tidət daɣ as iktâb as: "Ad wər tannaɣ a labasan s əmənokal ən tamattay-nak."»

⁶ Issân Buləs as təzunt n Asaggawar en iyyat Sadusaytan a daɣ təga, ta hadat Fərisaytan; adi a fəl idkal əməsli-net wəllen dat Asaggawar, inna: «Imədrayan-in, nak Fərisay a əmosa, erâwan wiyyad Fərisaytan, wər d-əmmewaya s adag n əššəriɣa wa, ar fəlas əgeɣ attama daɣ as inəməttan ilkâm a d-ənkəran daɣ tamattant.»

⁷ Inna awen ɣas tənkar tamazaq gər Fərisaytan əd Sadusaytan, təzun tiddawat,

⁸ fəlas Sadusaytan əttâfan as wər tu-təlla tanakra daɣ tamattant, wala əllân-tu angalosan, wala kələsuf. Farisaytan amaran əntanay əzzigzanan as awen kul ill-ay.

⁹ Təkkus tamazaq wəllen. Inkar arat daɣ musanan win Farisaytan əbbəllanan fəl awen, əwaran aganna ən Buləs, ad gannin: «Aləs wa, wər fall-as nəhənnəy lahan waliyyan! Mijas tidət daɣ as iššəwal-as aggəsuf madəɣ angalos.»

¹⁰ Awa təga tamazaq-nasan daɣ tuksay, təggəz tasa kumanda n ad agin Buləs tankət-tankət. Adi a fəl omar sojitan s ad azzabben fəl a daɣ-san d-əxtəsan Buləs, awəyan-tu əs barəki-nasan.

¹¹ As iga ahad, inafalal Əməli i Buləs, inn-as: «Buləs, a kay-wər-təggəz tasa! Əmmək wa daɣ as fall-i təggəyyey daɣ əxrəm ən Yerusalam, əmmək di da as kay-iwar a fall-i taggayyey daɣ wa n Ərrum ənta da.»

Əgan Kəl-Əlyəhud eyaf fəl ad anɣin Buləs

¹² As affaw, namaggan Kəl-Əlyəhud eyaf, əhadan as wər z'atşin, wala aşwin iket wər əgen iman ən Buləs.

¹³ Aytədan win əhadnen den, ogaran əkkozat təmərwen.

¹⁴ Əkkan imuzaran ən limaman d əmɣaran ən tamattay, ənnan-asan: «Nəhâd as, wər z'iggəz arat imawan-nana iket wər nəga iman ən Buləs.

¹⁵ Daɣ adi əmərədda kawanay d Asaggawar wa Zəwwəran əgməyat daɣ kumanda a dat-wan issəbdəd Buləs, tassaknim as, a təräm ad taşşaggaram taɣara-net s əlluɣ. Amaran nakkanay, nasimatag y igi ən man-net harwa du-wər-ewed da.»

¹⁶ Mişan isla tagazay ən Buləs i taftaw ten, ikka barəki ən sojitan, iggaz-tu, imal i Buləs.

¹⁷ Təzzar iɣra-du Buləs iyyan daɣ kabtanatan, inn-as: «Əlwəy abi di əs kumanda, ila isalan a das-z-əgu.»

¹⁸ Iddew dər-əs kabtan, eway-tu əs kumanda, inn-as: «Amaskasaw wa igan Buləs a di-d-iɣran, igmay daɣ-i a sərək d-əlwəya abi a, ilân isalan a dak-z-iməl.»

¹⁹ İbaz kumanda əfus n əbi, igmad dər-əs aytədan, issəstan-tu, inn-as: «Mas tareɣ a di-tu-təməla?»

²⁰ Inn-as əbi: «Kəl-Əlyəhud əgân eyaf fəl a daɣ-ak əgməyan tufat ad təssəbdəda Buləs dat Asaggawar-nasan wa Zəwwəran, almat ərân ad aşşaggaran taɣara-net s əlluɣ.

²¹ A dasan-wər-tarɗa fəlas wiyyad daɣ-san ogarnen əkkozat təmərwen n aləs a das-za-bəkəmmətən y ad agin iman-net. Əhâdan as wər z'atşin za wər z'aşwin iket wər əgen adi. Simatagan əmərədda, wər əqqəlan ar y a t-id-tayya sər-san.»

²² Irygam kumanda y əbi wen fəl amel y awedan waliyyan isalan win das-iga den, amaran issəgl-ay.

Əməway ən Buləs s əmuzar ən Qaysarəya

²³ Dəffər awen iyra-du kumanda əşšin kabtanatan, innasan: «Səmmutəgat sanatat təmad ən soji d əssayat təmərwen ən soji dağ win əggannen əggəsan əd sanatat təmad dağ win əttafnen allayan; y ad akkin Qaysarəya dəffər təsudəsen.

²⁴ Təsəmmutəgam deç şisənay šin z'iwən Buləs, təşəşiwədam-t-in Felikəs wa n ənaxkim dağ alxer.»

²⁵ Amaran iktab-as-in kumanda širawt inn-as-in:

²⁶ «Awa nak Klawdəyus Lusəyas din-ihulan ənaxkim Felikəs əknêç saçmar.

²⁷ Aləs di, a əbazan Kəl-Əlyəhud, as zama əgân iman-net as tan-in-oseç əddewəç əd sojitan. As di-əggazan salan n as awedan n Ərrum a imos, əgeq-qu dağ adag a daq-q-in wər ikka arat.

²⁸ Dəffər awen ewayaq-qu s Asaggawar-nasan wa Zəwwəran fəl ad əssənəç lahan wa t-əssəwaran.

²⁹ Ənayəç as, arat iqqâlan əşşəriçə wa-nasan ças a fəl tuçattasan, wərgəç arat a t-issiwaran tamattant wala iguz ən kasaw.

³⁰ Mišan as əsleç as əgân Kəl-Əlyəhud eçaf fəl ad agin iman-net, əssokəç-ak-in əddi da, əntanay amaran ənneçasan a sər-ək in-awəyan kay šixəttas šin t-əgan.»

³¹ Əgan sojitan awas tawamaran. Əçlan ahad wen da, əddewan əd Buləs har osan açrəm n Antifatris.

³² As əzəl wa dəffər wen əqqalan-du sojitan win jawankatnen barəki-nasan, əçlan win əwannen əggəsan əd Buləs.

³³ As din-osan açrəm ən Qaysarəya, əgan širawt tanad dağ əfus n ənaxkim, əssəbdadan dat-əs deç Buləs.

³⁴ Içr-et, amaran issəstan Buləs d akal wa t-ilan. As issan as akal ən Kilikəya a t-ilan,

³⁵ inn-as: «As d-osan aytedan win kay-əçtasnen, a kay-du-sassaçra.» Təzzar omar s ad itəwəttəf Buləs dağ ahan ən təmənukəla was kala t-issəkraç əmənokal Herod.

24

Ətəwəsəbdad ən Buləs dat ənaxkim Felikəs

¹ Səmmos adan dəffər awen, osa-du Ananəyâs wa n Əlimam wa Zəwwəran, iddew-du d arat dağ əmçaran ən Kəl-Əlyəhud d aləs a d-əwwikkalan Kəl-Əlyəhud igân esəm Tertuləs. Əçtasan Buləs çur ənaxkim n akal Felikəs.

² Təzzar itawaçra-du Buləs, amaran issənta Tertuləs dağ amel n aratan win as ənnan Kəl-Əlyəhud içşâd-tan, inna:

«Ya əmizwar Felikəs, əddəlil-nak d əddəlil n aratan win təgey a fəl igraw akal wa alxer aggen, amaran təgey ənnizam olayan i tamattay-nana fəl aššaddat ən təla-nak əgərri.

³ Nətigudəy-ak wəllen dağ adag kul aratan olaynen kul win təgey, ya əmizwar Felikəs!

⁴ Wər arey a kay-səlluley, batu-nana ši gəzzulat, mišan əgmāya dağ-ak fəl əddəlil n əlluğ-nak a dər kay-nəzdāy a dana-təssəsəma.

⁵ Nənāy as aləs a, əlməssibat a imos, igammayan d əsəffəlləg ən Kəl-Əlyəhud edag əhan dağ əddənət, imos dəy əmuzar ən taggayt n arat n aytedan as itawannu Nazaritan.

⁶ Wala Ehan wa Zəwwəran n Əlyibada da, igmāy d əsəmmədəs-net; nəbaz-tu. [Nərā a das-nagu əššəriya wana,

⁷ mišan os-ana-du kumanda Lusəyas, ibaz-tu dağ-na s assahat,

⁸ omar dəy a dat-ək əbdədan aytedan win əxtasnen Buləs.] Kay iman-nak as tu-təssəstana, ad tənəya tidət ən təxəttas kul šin das-nəga.»

⁹ Təzzar ərđan Kəl-Əlyəhud əd batu ən Tertuləs, ənnan tidət a təmos.

¹⁰ Isaddagan ənaxkim i Buləs ad iššiwil. Inna Buləs: «Isidawat-i a dat-ək aga batu tas əgməyay aggaz ən man-in, fəlas əssānay əmənokal-in as, irəw təmosay amaşray ən tamattay n akal wa.

¹¹ Kay iman-nak təfrāgəy ad təssənay kud tidət wala bahu as, a ilān maraw adan d əššin ad əggəzzayay əs Yerusalam y a dağ-as əxbəda Məššina.

¹² Wərmād a di-ənāyan dağ Ahan wa Zəwwəran n Əlyibada, wala dağ nan win əlyibada, wala dəy dağ əxrəm, mişawala d awedan waliyyan za wala jinajarwayay tamattay.

¹³ Aytedan win, wər əfregan əsəbdəd ən təxəttas šin di-əgan da.

¹⁴ Mišan ya ərđey s arat iyyanda, amaran ad t-anna dat-ək, a t-imosan as: Məššina di n Əməli ən marawan-nana as əlkama əs təməwit tas tu-tənna tarrayt ta n Əlməsix Yaysa, tas gannin əntanay taggayt. Əzzigzanay s arat kul wa iktaban dağ Əttəwret d Əlkəttaban n Ənnəbitan.

¹⁵ Egəy attama wa dağ Məššina, amaran əntanay da əgān-tu, a t-imos as təll-ay tanakra dağ tamattant, gər za y aytedan win oxadnen wala win wər noxed.

¹⁶ Adi a fəlas faw da gammaya nak da wəllen a di-wər-təggəz tərək n a labasan dat Məššina wala dəy dat aytedan.

17 A ilan elan ad əgmadax Yerusalam, as əmərədda əqqala-du y a d-awəyax i tamattay-nin şirgiten, aga dəx şikutawen şin izzəlzam Məşşina.

18-19 Awa da a əhey as di-d-osan Kəl-Əlyəhud win Asəya dağ Ahan wa Zəwwəran n Əlxibada, əssindəx arat wa di-issəwar əşşərixa dağ salan n əzəzdəg-in; wərmad xur-i təlla tamattay za wala əssinkara ajeqqax n aytedan. Əntanay as ihor a dat-ək əbdədan, əxtəsan-i xur-ək, kud ənta ələn əddəlil waliyyan,

20 madəx əməlan aytedan win əllanən da lahan was inna Asaggawar wa Zəwwəran əgəq-qu alwaq wa dat-əs əbdada,

21 a wər nəmos as ənnəx gar-essan s afalla: "Wər di-issəbdad dat-wan azalada y a di-təşrəxam ar fəl as əzzəgzanax as ilkâm a d-ənkəran nəmməttan."»

22 Felikəs əhân salan wəllən ən tarrayt ta n Əlməsix Yaysa, as isla i batu ten, izzərəz əşşərixa har iyyan əzəl, inna: «As d-osa Lusəyas wa n kumanda ad əxtəsa əşşərixa-nawan.»

23 Təzzar omar Felikəs kabtan s ad agəz Buləs, mişan ad wər itəwədgəz, wala itəwəgdəl y aytedan-net a dağ-as əssənan.

24 Arat n adan dəffər awen, osa-du Felikəs iddew əd təntut-net Drusilla, təmosat wələt əlyəhud; təzzar isassaxra-du Buləs, issəsam i salan win itaggu dağ batu n əzəgzan s Əlməsix Yaysa.

25 Mişan as d-ewad Buləs isalan win əqqalnen taqqat d ənudi dağ man d əşşərixa ən Məşşina wa d-izayan, təggaz tasa Felikəs, inn-as: «Əmərədda aglu, as əgrawa təmazayyat n a dər-ək məşiwala, a kay-d-ələsax əsəssəxri.»

26 A itaggu Felikəs awen, igâ attama dağ ad t-akfu Buləs azrəf, adi fəl t-id-isasaxru itaggu dər-əs takkayt.

27 Awen da a igan har əgan əşşin elan. Igmad Felikəs tizart, iggaz Borkəyəs Festus edag-net. Oyya-du Buləs dağ kasaw fəl ad agu tənəfust i Kəl-Əlyəhud.

25

Təbadday ən Buləs dat Festus – Buləs issof a das-işrəx Qaysara wa n əmənokal wa zəwwəran

1 As iga Festus karad adan d iguz ən tizart ən Yahudəyya, igmad axrəm ən Qaysarəya, iggəzzay əs Yerusalam.

2 As din-osa, əmmənəyan dər-əs muzaran ən limaman əd muzaran ən Kəl-Əlyəhud, əxtəsan xur-əs Buləs. A tütansayan,

3 a dasan-agu tənəfust n ad d-issuku Buləs Yerusalam y a dağ-as işrəx. A gannin awen, əntanay əgân əxaf fəl a das-bəkəmən dağ tarrayt, agin iman-net.

⁴ Mišan inn-asan Festus: «Buləs kasaw wa n Qaysarəya a dağ itawattaf, amaran ənta iman-net ad iqqəl tarmâd.

⁵ Dağ adi idawanet dər-i muzaran-nawan əs Qaysarəya, əxətəsanet-tu den da kud ill-ay a iğşâd.»

⁶ Iga Festus dağ Yerusalam adan əllanen gər əttam əd maraw, amaran iqqal Qaysarəya. As əzəl wa dəffər wen, iqqim dağ adag wa dağ işşarrağ, təzzar omar s a dat-əs itəwəsəbdəd Buləs.

⁷ As d-osa Buləs ɣalayɣalayan-tu Kəl-Əlyəhud win d-əgmadnen Yerusalam, a tu-ɣattasan sawaran-tu igi n aratan aggotnen labasnen as wər əfregan əsəttəddi-nasan.

⁸ İşşewal Buləs y ad agəz iman-net, inna: «Nak wər əgeɣ ark amazal waliyyan immâran əşşəriɣa ən Kəl-Əlyəhud, za wala Ehan wa Zəwwəran n Əlyibada wala deɣ əgeq-qu i Qaysara əmənokal wa zəwwəran.»

⁹ Festus irân igi ən tənəfust i Kəl-Əlyəhud, inna i Buləs: «Awak tərdeɣ s ad taggazayəɣ əs Yerusalam dak-dağ-as-əşrəɣa aratan win di?»

¹⁰ Inn-as Buləs: «Kala, kala! Edag n əşşəriɣa wa, in Ərrum; dağ adi da da ad za təwəşrəɣa. Wər əğşədəɣ arat waliyyan i Kəl-Əlyəhud, kay iman-nak təssânaɣ wəllen dağ adi.

¹¹ Kud əşşəriɣa a əmməzraya, madeɣ əgeɣ arat a di-issiwaran tamattant, ərddeɣ əs tamattant. Mišan kud aratan win as itawanna əğşâdaq-qan bahu a əmosan, wədi wər t-illa awedan ilân tarrayt n a di-agu dağ fassan-nasan. Amaran, dad zamas adi a igan, wədi əmənokal Qaysara as areɣ a di-ışrəɣ.»

¹² İmaşşawwar Festus əd məşşewwar-net, amaran inna i Buləs: «Əmənokal Qaysara as tereɣ a dak-ışrəɣ, a tu-takka za.»

Tebadday ən Buləs dat Agriffa əd Bernikəs

¹³ Arat n adan dəffər awen, osa-du əmənokal Agriffa aɣrəm ən Qaysarəya, iddew əd tamadrəyt-net təgât Bernikəs fəl ad əssəsləman Festus agin-as alafəyet d assa.

¹⁴ Adan aggotnen win əgan den, idkal-du dağ-san Festus y əmənokal Agriffa isalan ən Buləs, inn-as: «İlla aləs da, a d-oyya ənaxkim Felikəs dağ kasaw.

¹⁵ Alwaq wa d-əkkeɣ Yerusalam, əxtasan-tu ɣur-i muzaran ən limaman d əmɣaran ən Kəl-Əlyəhud, əgmayan dağ-i a t-əzzəbəza s əşşəriɣa.

¹⁶ Mišan ənney-asan, əşşəriɣa wa n Kəl-Ərrum wər itibəz awedan ar s ad işrâɣ. Kundaba innəbdəd awedan d aytedan win t-əxtasnen, agəz iman-net dağ arat wa itawasawar.

17 Adi a fəl dər-i d-əddewan əs Qaysarəya. Ose-du ɣas, as əzəl wa dəffər wen əqqima daɣ adag wa n əššəriɣa omara s a d-ammaway aləs wen.

18 Əbdadan meddan win t-əɣtasnen, mišan wər t-əssəwaran arak əmazal labasan waliyyan daɣ win əɣila.

19 Awa zaɣnin təmazaq ɣas təgât daɣ batu n əddin-nasan əd salan n aləs iyyan igân esəm Ƴaysa abâ, mišan igla Buləs immâl as iddâr.

20 Nak iman-in wər əssenay əmmək was z'əšrəɣa əzzənəf n aratan win den, adi a fəl əssəstanay Buləs kud irɗa s ad akku Yerusalām isrəɣ daɣ-as.

21 Mišan issof a das-isrəɣ Qaysara s ənta əmənokal wa dännəg mənokalan. Adi a fəl omara s ad itəwigəz har t-itəwəsuku.»

22 Amaran inna Agriffa i Festus: «Nak da areɣ ad asla y aləs wədi.» Inn-as Festus: «Tufat a das-taslay.»

23 Əzəl wa dəffər wen iga-du əmənokal Agriffa assa wa n mənokalan ənta əd tamadrəyt-net Bernikəs. Əggazan ehan wa n əššəriɣa əddewan əd kumandatan ən sojitan əd mizwaran n əɣrəm. Omar Festus s a d-ammaway Buləs, təzzar immeway-du.

24 Amaran inna Festus: «Əmənokal Agriffa, əd kawanay ketnawan win əmmənəynen da, ənta da aləs was əddəlil-net a fəl di-d-osan Kəl-Əlyəhud kul, daɣ Yerusalām harkid deɣ da da, gannin s afalla wər imməkkan ad iləs təməddurt.

25 Amaran nak za, wər ənayay as iga əmazal waliyyan a t-issiwaran tamattant, mišan dad zamas ənta iman-net a igmayan a das-isrəɣ əmənokal wa dännəg mənokalan, wədi əge tanat təmosat a das-t-əssuka.

26 Dər iga awen da ya, wər əssenay fəl arat waliyyan igmâd aššak daɣ talɣa-net a din-z-əktəba y əmənokal wa dännəg mənokalan. Adi a fəl t-əssəbdada dat-wan, wəllen kay əmənokal Agriffa, fəl a tu-nəssəstən, əssənay awa z'əktəba daɣ talɣa-net;

27 fəlas wər sər-i ila almayna ad əssuka Qaysara amaska-saw as din-wər-əmelay əddəlil wa fəl itawattaf.»

26

Aljawab wa iga Buləs dat Agriffa

1 Inna Agriffa i Buləs: «Təgrawa turagat n awal, tagəzay iman-nak.» Təzzar izzal Buləs əfus-net y a das-təssəsəm tamattay, inna:

2 «Ya əmənokal Agriffa, əbbələl zəwwəran a di-təmos tahakkay ta di-təgeɣ azalada turagat n aggaz ən man-in daɣ aratan kul win as ənnan Kəl-Əlyəhud əɣšadaq-qan,

³ wəllen as əhân-kay salan wəllen n alyadaten-nasan kul d aratan kul win fəl tamazağan. Dağ adi, onsayaq-qay ad taga tazaydart, təssəsəmaç-i.

⁴ Kəl-Əlyəhud kul əzdâyan-i harwa çur təmmədrəyt-in. Əssânan dağ awa əgeç kul dağ tamattay-nin harkid deç dağ Yerusalam.

⁵ Irəw as di-əzdayan, amaran as imos as ərdân, əfrâgan a dak-aggayyen as, taggayt ta n Farisaytan a əheç, s ənta a togarat əzəzzəwi dağ əddin-nana.

⁶ Əmərədda nak da ibdadan da şarraça fəlas əgeç attama dağ arkawal wa iga Məşşina i marawan-nana.

⁷ Attama en da a əganat tawşeten-nana an marawat əd sanatat, eway-du sər-əsnat awen əlxibada ən Məşşina əs gəlleyat ehad ezal, əqqâlnat y ad andu. Ya əmənokal-in, Agriffa, attama en da za, a fəl di-əxtasan Kəl-Əlyəhud.

⁸ Ma fel as dawan-orna kawanay Kəl-Əlyəhud əzəgzan âs Məşşina ilkâm ad d-issənkər inəmməttan?

⁹ Nak iman-in, kala a çur-i illa as, iwâr-i igi n arat kul wa əfraga fəl a din-ança esəm ən Çaysa wa n Nazaret.

¹⁰ Arat wen iman-net a əgeç dağ əçrəm ən Yerusalam. Əkfan-i dağ-as muzaran ən limaman turagat, təzzar əbazay inalkiman ən Çaysa aggotnen əgeç-qan dağ kasaw. Əwâraç aganna ən win tan-əbaznen s əşşəriça wa n tamattant ta n kərəz.

¹¹ Əyyəwanay ilum gər nan ən Kəl-Əlyəhud win əlxibada tawaddabaç-qan, şahaşşalaç-qan əbudər ən Çaysa. Awa dasan-əge dağ gezzar, lakkamaç-asan əs çərman ən kallan win tamawen.

¹² Əzəl iyyan əşşokala dağ awen da əkkeç Damas, əgrâwa turagat çur muzaran ən limaman n igi n awen imos as əntanay a di-əganen dağ əşşəçəl wen.

¹³ Ya əmənokal-in, ewâyaç əd tarrayt ammas n azal wala a ihogan ənayaç ənnur a d-igmâdan ijənnawan ogaran wa n təfuk əmələwləw as ibalazzat dağ çələyçələyan-nana, nak d aytedan win dər əddewa.

¹⁴ Nuda ketnana, təzzar əsleç i wa di-innan dağ təlxibrit: "Talut! Talut! Mas di-təzaçazzaba? Tugəyt-nak əs ləkkum i tara-nin, wər tənfa wala; wər təzlay əd ta n ays iddag məşşis əs çayman."

¹⁵ Ənneç-as: "Əməli, ma təmosaç?" Təzzar inn-i Əməli: "Nak awa, Çaysa wa təzaçazzaba.

¹⁶ Mişan ənkər, təbdədaç, fəlas ənifalalay-ak fəl a kay-aggayç amaşşaxal-in əd təgəyya-nin a za taggayyet y aytedan anay wa [di-]təgeç, taggayyeç-asan deç awa kay-z-assakna dəffər awa.

17 A kay-aggaza daɣ Kəl-Əlyəhud, əd təmattiwen šin tan-wər-nəmos, əzəmmizəlaq-qay sər-san,

18 fəl ad tara šittawen-nasan, təkəkəsaq-qan-du daɣ šiyay s ənnur, əgmədan-du tarna ta n İblis əlkəman i Məššina, fəl ad əgrəwan təsureft ən bakkadan-nasan, əgrəwan deɣ tadagart daɣ mizdagan əs tarrayt n əzəgzan sər-i."

19 Ya əmənokal Agriffa, əddəlil wədi a fəl wər əmməzrayaɣ awa di-d-inafalalan, igmād-du ijənnawan. Igi ən Məššina a imos.

20 Kalar azzaraɣ əs Kəl-Əlyəhud win Damas əd win Yerusalam, d aytedan win Yahudəyya ketnet, d aytedan win wər nəmos Kəl-Əlyəhud, taggaɣ-asan təlxutbat gannaɣ-asan, iwâr-tan ad utaban, əhdin-du əs Məššina, agin imazalan əssiknanen tətub-nasan.

21 Əddəlil n awen da a fəl di-əbazan Kəl-Əlyəhud daɣ Ahan wa Zəwwəran n Əlyibada, əgmayan əd tanaɣay-nin.

22 Tadhəlt ta di-iga Məššina a di-du-təšaššawadat əzəl wa n azalada, tebadday ta əge da taggaɣ isalan-net y aytedan gər win wər nəla almaqam, wala win t-əlanen, wər d-əššotaɣ wala daɣ salan ən was əmalan ənnəbitan sa hadan d ənnəbi Musa əs a d-asu;

23 a t-imosan as, Əlməsix ilkâm ad inəy alyazab, iba-tu, izar-du deɣ i nəmməttan tanakra, iməl ənnur wa ihakku Məššina, imosan isalan n əlyillas, i Kəl-Əlyəhud d aytedan win tan-wər-nəmos.»

24 Harwada iššewal Buləs, išarray fəl man-net, as idkal Festus əməsli-net, inna: «Kay Buləs əmməkəl a təgeɣ, igət ən taɣaray ta təgeɣ isammaskal-kay.»

25 Inn-as Buləs: «Əmizwar Festus, nak wər əmməskala. Kalar awa ganna da, tidət a imos, təkfât əs tayttay.

26 Amaran əmənokal Agriffa əhân-tu salan win di. Adi a fəl wər əksudaɣ igi-nasan dat-əs, fəlas əkkâsaɣ aššak as, wər tan-iha waliyyan a das-ijhâlan, id wər tawaggan daɣ əssir.

27 Əmənokal-in Agriffa awak təzzigzanaɣ s awa ənnan ənnəbitan? Əssânaɣ as təzzigzanaɣ sər-əs.»

28 Təzzar inna Agriffa i Buləs: «Torda-nak a di-taga əlməsixi fəl arat n amazay!»

29 Inn-as Buləs: «Gər za fəl arat n amazay wala, əgmâya daɣ Məššina a kay dər-i išaššalan, kay harkid aytedan kul win di-əssəsammen da azalada, as wər əhen sassaran win.»

30 Təzzar inkar əmənokal Agriffa əd Festus wa n ənaxkim əd Bernikəs d aytedan kul win dər naɣaman,

31 əgmədan tinəmənnin gar-essan: «Aləs wen wər iga arat waliyyan as ihor a fall-as ammat wala deɣ iggəz fall-as

kaşaw.»

³² Amaran inna Agriffa i Festus: «Aləs wen ənnar wər igmay a das-işrəx Qaysara əmənokal wa zəwwəran, itəwəyyu.»

27

Əmiwəy ən Buləs s əxrəm n Ərrum

¹ As itawanna ad nəggəz aɣlal n aman nakku akal n Italəya, itawagga Buləs ənta əd wiyyad iməskəsa daɣ əfus ən kabtan iyyan igân esəm Yuləyus ihân egan ən sojitan as itawannu «Wa n Qaysara».

² Təzzar nəggaz aɣlal n aman n əxrəm n Adramutenəs ikkân ikallan n Asəya win əwarnen efay n agaraw. Ih-âna Aristarxus imosan awedan n əxrəm ən Tesalonik n akal wa n Masedonəya.

³ As əzəl wa dəffər wen, nəzzəbbat daɣ əxrəm ən Sidon. Yuləyus imosan awedan isâknin Buləs əlluɣ, ikf-ay turagat n ad akku imidawan-net win əhanen aɣrəm wen fəl a daɣ-as əssənan.

⁴ As dər-naɣ igmad əɣlal n aman Sidon, nəllil əsəlīm n agaraw daɣ nəha ifi n akal imosan gərwətlan as itawannu Qıbrus fəlas aɣu dər nəmməqqas.

⁵ Dəffər awen, nəşşokal fəl agaraw was iwar akal ən Kilikəya əd wa n Banfiləya tama-net, newad-in aɣrəm ən Mira ihân akal wa n Lukəya, nəzzəbbat daɣ-as.

⁶ Igraw daɣ-as kabtan wa dər nəddew iyyan aɣlal n əxrəm n Alaskandrəya, itakkin akal n Italəya, ig-ana daɣ-as.

⁷ Nəga adan aggotnen nəsilalam fəl aman sollan, gərrid as din-nəhoz aɣrəm ən Kənidos. Təgdal-ana assahat n aɣu ad naglu daɣ anamod wen, təzzar nənnamad akal imosan gərwətlan as itawannu Kəret. As nokay fəl Salmone, nəmmoday i Kəret, nəggaz ifi-net.

⁸ Gərrid as nəllil əsəlīm n agaraw har newad edag igân esəm «İzəzzəbba win Hossaynen n əɣlalan» inimahazan d əxrəm ən Lasaya.

Tazafa d alamaz n aman aɣlal

⁹ Isilalat-ana əşikəl wen wəllen, əşikəl daɣ əɣlal n aman deɣ əmərədda iggaz-tu aɣarar, fəlas wala əzum ən Kəl-Əlyəhud wa n ɣarat okay. Adı a fəl iga Buləs y aytedan win ənnodanən daɣ əɣlal n aman ənnəsixa, inn-asan:

¹⁰ «Meddan, hannayaɣ as əşikəl-nana ad t-iggəz iba ən taɣara d əɣşud zəwwəran. Wərgəy aɣlal n aman ɣas əd lalan-net a z'əhləknen, kalar nakkanay da, ad nəggəz tazak ten.»

11 Mišan issof kabtan iduf ən batu ta dasan-iga aləs wa ewayan aɣlal n aman əd wa t-ilan, iduf n ənnəsixa wa dasan-iga Buləs.

12 Dad imos as azazzabbaw n əɣlalan n aman wen wər daɣ-as oley ikus ən təgrəst, tənkar taššam n aytedan win maššaxalan n əɣlal əgan tanat ad aglin, əgməyan d aggad n iyyan aɣrəm imosan azazzabbaw n əɣlalan n aman igân esəm Fenikəs ihân akal imosan gərwətlan as itawannu Kəret, əkkəsan tagrəst daɣ ɣayanɣayan-net s iyyan iswâd sa sər agala daɣ ataram, wa hadan sa sər tamasna daɣ ataram.

13 Əllan den da as d-igar arat n aɣu wa n agala, təzzar əkkasan y əɣlal anaday, əqlan, sammaɣaxan y akal imosan gərwətlan ən Kəret daɣ əhazan təšəšwit-net, əɣilan ad əfrəgan əmərədda igi n awa əran.

14 Mišan wər əhogan əd teklay as fall-asan du-təgar tazafa təssohet as itawannu ta n tamasna daɣ dənnəg, təgât esəm Yurakilon, a dasan-du-təgât iguz wa n akal ən Kəret.

15 Təzzar ibat aɣu aɣlal n aman, indar-ana iduf-net, igla dər-naɣ ibât-tu aɣu.

16 As nəggaz ifi n arat n akal imosan gərwətlan, igân esəm Kawda, nəga y arat ən təɣlalt n aman ilwây aɣlal wa nəha, təməwit ta nəra gərrid.

17 Ədkalan-tat-du maššaxalan n əɣlal, əgan-tat daɣ ammas n əɣlal, təzzar əssəɣlayan-du aɣlal n aman ket-net iɣunan zawwarnen otaban-as sər-san fəl a tu-wər-zəmməzzəyan aman. Əssərasan afər wa isakaf aɣu isəluləm fəl aman fəl ad agu sollan, fəlas əksudan ad istəb əɣlal y amaɣdal daɣ adag igân esəm Surtis a daɣ gəzzul agaraw, igla əɣlal ibât-tu dər-naɣ aɣu.

18 Awa təga tazafa en daɣ assahat, as əzəl wa hadan a din-əggaran maššaxalan n əɣlal ilalan daɣ agaraw fəl ad ifsas əɣlal.

19 As əzəl wa n karad, əgaran-in daɣ aman əs fassan win-da-nasan isəssəkna n əɣlal.

20 Təfuk wala etran nəgâ adan aggotnen wər tan-nənaɣ. Awa təga tazafa en daɣ assahat, nəkkas fadda attama ən man-nana.

21 Adan en nəg-en wər t-illa i itsan arat, təzzar ibdad Buləs daɣ ammas n aytedan, inna: «Meddan, ənnar tətâtəfam ənnəsixa wa dawan-əgeɣ, taqqamim da wər du-təgmedam akal wa n Kəret; əddi wər kawan-z-igrəw iba n taɣara wa d əhluk wa.

22 Amaran əmərədda əgmâya daɣ-wan ad wər təkkesam attama, fəlas wər kawan-iha i z'əgmədan man-net, mišan ya aɣlal n aman ənta a danax-igməd.

23 Ǝndod a di-inafalal angalos ən Məşşina wa di-ilan, əhey əşşəxəl-net,

24 inn-i: "Buləs, a kay-wər-təggəz tasa, Qaysara wa n əmənokal wa zəwwəran, kundaba təbdəda dat-əs işrəx-ak. Amaran ənəy, Məşşina ig-ak arraxmat təmosat aggaz n aytedan kul win dər tənamaha əxlal n aman da."

25 Day adi meddan ad wər təkkəsam attama, fəlas əzzigzanax əs Məşşina. Awa di-inna den, ad agu s əmmək en da.

26 Amaran kundaba istab dər-nax əxlal n aman i təşəşwit n akal iyyan imosan gərwətlan.»

27 As iga adawannay n ahad n əzəl-nana wa n maraw d əkkoz təgâr fall-ana tazafa, ibât dər-nax ađu əxlal fəl agaraw igân esəm Adrəyatik, ənnəfrayan maşşaxalan n əxlal n aman d as amađal wər iggug.

28 Təzzar əgaran day aman axan y sər-əs əqətan təzzəgrət n agaraw. Təqqal təzzəgrət n aman day adag wen əssayat təmərwen n əxil d əkkoz. As əgan amazay, əlasan taqqot, osan-in edag wen təmos təzzəgrət-net səmmosat təmərwen n əxil əd sədis.

29 Təggaz-tan tasa n ad infəl əxlal n aman i təhun, təzzar əgaran day aman day ələqqam n əxlal əkkozat təzoliyawen şin as tu-naddayan, amaran ad tattaran a tan-issəknan ezal.

30 Ad gammayan maşşaxalan n əxlal n aman ad addag-gagan. Təzzar əssərasan təxlalt n aman ta əndərrat day agaraw, əgan əsarü âs a ərən ad əndəyan eɣaf n əxlal əs şiyad şizoliyawen.

31 Mişan inna Buləs i kabtan əd sojitan: «Meddan en, as əgmadan əxlal wa, wədi wər dawan-t-illa agamad əd man-nawan.»

32 Təzzar olayan sojitan iyunan win əqqannen təxlalt, əqlan dər-əs aman.

33 As ibuk azal y igi, igmay Buləs day awedan kul ad atşu, inn-asan: «Azalada, əzəl-nawan wa n maraw d əkkoz d aşşawaşa labasan, wər t-illa arat as tərâm tettay-net, wala iyyan iggâzan imawan-nawan.

34 Day adi əgmâya day-wan ad tatşim fəl ad tərəgam, fəlas wər kawan-iha i day in-z-iba wala anzađ iyyanda n aɣaf-net.»

35 As inna Buləs awen, idkal-du tagəlla iga igodan i Məşşina dat-san ketnasan, amaran ikarammat day-as, ad itattu.

36 Təgmad-tan tasa ketnasan, ətşan əntanay da.

37 Awa nəmos day əxlal en ketnana, sanatat təmad n awedan d əssayat təmərwen əd sədis.

³⁸ As əyyəwanan a din-naqqalan alkama dağ agaraw fəl ad əssəfsəsan aɣlal n aman.

³⁹ As iga azal, ənayan maşşaxalan n əɣlal as akal wa din-əhozan den wər t-əzdayan. Oggan əzazəl dağ təşşəwit, ənnan ad əgməyan d a sər-əs awəyan aɣlal har das-t-əssəstəban kud ad əfrəgan awen.

⁴⁰ Əkkasan şizoliyawen şin əndaynen aɣlal, oyyan-tanat-in s aman, oran deɣ iɣunan ən katakawtan win sanamad-nen aɣlal. Dəffər adi əkkasan aqda y əfər wa ihan dat əɣlal fəl ad t-issəkəf aɣu, amaran sannamawalan-tu əd təgadamayt iha əzazəl.

⁴¹ Mişan ənfalan i tageft n əzazəl təhât agaraw, ittityay dağ-as aɣaf n əɣlal, iməzzay d əmətəkwəy; təzzar ad tərəzzu assahat [n tənazzamaren] ələqqam-net.

⁴² Ənayan sojitan awen ɣas, namannakan fəl ad əkkəsan iman dağ məskəsa fəl ad wər işşəf waliyyan dağ-san, addaggag.

⁴³ Mişan igdal-asan kabtan-nasan igi n awen, fəlas a ira ad aɣəz Buləs. Təzzar omar kabtan aytedan win əsannen ewet n aman, ad tərəggen dağ agaraw izaran-in əs təgadamayt.

⁴⁴ Amaran aytedan win hadatnen, əntanay omar-tan s ad əwəran katakawtan əd gannatan n əɣlal win du-nassarnen. Əmmək en da as ewadan ketnasan tagadamayt n agaraw əragan-du.

28

Buləs iha akal imosan gərwətlan as itawannu Malta

¹ As du-nərag dağ awen, nəgmad-du aman, itawann-ana akal wen imosan gərwətlan, esəm-net Malta.

² Əssəknan-anax aytedan n akal wen əlluɣ wər nəla tulat. Əgan-ana ketnana marhaba, əssərxan-ana temsay, fəlas akonak a iffayan, iga deɣ asamed.

³ İşşədaw-du Buləs eɣaf n eşkan, ig-en dağ təmsay, təkkas-du dağ-san tuksay taşşolt, tədad əfus-net, təkarayray dağ-as.

⁴ As ənayan kəl akal wen taşşolt təkirayray dağ əfus ən Buləs, ad tinəmənnin: «İgmâd aşşak as aləs wen əməggi ən man a imos. Irag-du dağ agaraw, mişan harwa da ilkâm-as əşşəriɣa, wər ira ad iddər.»

⁵ Irsak-in Buləs taşşolt, tərtak dağ təmsay, wər t-illa a t-igrâwan.

⁶ Əqqalan aytedan y ad ihədədəy Buləs, madəɣ ifətəqqət iba-tu tamazayt ten da; mişan as ərəwan wər hənnəyan a t-igrâwan, əqqalan-du dağ awa ənnan, ad gannin amaran: «Əməli iyyan awa!»

⁷ Edag en əhoznat-tu təwəgas ən Bubləyəs, aləs wa n əmuzar n akal wen. Izazzabbat-ana daɣ ahan-net, nəga karad adan nənniftaɣ-as. Ig-ana marhaba əd məgura əknanen əlluɣ.

⁸ As itaggu awen, təzizalallat tanaday abba ən Bubləyəs, tərtaɣ-as əd tədist. Os-ay-in Buləs issəwar-tu ifassan-net, onsay-as Məššina. Izzozay-tu.

⁹ Dəffər awen a du-tasin miranan n akal wen win hadatnen, ətiwəzuzəyan.

¹⁰ Əssəknan-anay aytedan n akal wen saymar aggen, as nəggaz šin teklay daɣ əɣlal n aman iyyan. Əkfan-anay arat was nəddərar y əšikəl.

Assa ən Buləs aɣrəm n Ərrum

¹¹ As nəga karadat təlil daɣ Malta, nəggaz aɣlal n aman a d-igmâdan aɣrəm n Alaskandrəya, as əwâran əssənəman as itawannu "win əknewan" eɣaf-net, s ənta da akal wen da imosan gərwətlan a daɣ ikkas tagrəst, nəgla.

¹² As nosa aɣrəm ən Surakusa, nəga daɣ-as karad adan.

¹³ Nəgmad Surakusa nəgla har nosa aɣrəm ən Regəyon. As əzəl wa dəffər wen, igar-du aɣu wa n agala, nəgla. As əzəl wa hadan newad aɣrəm ən Batəyoləs.

¹⁴ Den da ad nəssəha fəl arat daɣ nalkiman ən Ƴaysa, əgməyan daɣ-na a ɣur-san nagu əssa adan. Dəffər awen nənnəmad aɣrəm n Ərrum.

¹⁵ As danaɣ-əslan mədrəyan-nana daɣ əzəgzan win əɣrəm n Ərrum, əssəlkadan-ana-du əs təɣrəmt ta n Əssuk n Affəyus, wiyyad əssəlkadan-ana-du əs təɣrəmt as itawannu Ta n Karad Zəzzəbba. As tan-inay Buləs iga igodan i Məššina, ikna awen iman-net.

¹⁶ As din-nəggaz aɣrəm n Ərrum, irɗa əlxəkum i Buləs s ad iɣsər daɣ ahan wər inamaha ar əd soji wa t-ogazan.

Təlxutbat ən Buləs daɣ batu ən Ƴaysa Əlməsix daɣ Ərrum

¹⁷ Karad adan dəffər awen, isassaɣra-du Buləs imuzaran ən Kəl-Əlyəhud win əɣrəm n Ərrum. As d-əddəwan inn-asan: «Imədrəyan-in, nak wər nəɣšəd arat waliyyan i tamattay-nana wala deɣ əmmizraya aɣadaten šin du-nogaz ɣur marawan-nana, mišan əttərmasay daɣ Yerusalam, tawagga daɣ fassan ən Kəl-Ərrum.

¹⁸ As di-əšraɣan, əran di-ayyin fəlas wər əgeɣ arat waliyyan a di-issiwaran tamattant.

¹⁹ Mišan ənkarən Kəl-Əlyəhud ugəyan s ad tawayya, iqqal-i əššil agamay n a di-išrəɣ Qaysara əmənokəl wa zəwwəran, dər iga awen da ya wər əgeɣ ənnəyat n ad aga i tamattay-nana taytəst waliyyat.

²⁰ Adi a fəl kawan-əssəgmaya, a kawan-ənəya, məšiwəla dər-wan. Isassaran win, wər sər-i tan-d-eway ar as əgey attama-nin daɣ was əqqalan Kəl-Israyil.»

²¹ Ənnan-as: «Nakkanay za, wər nəgrew širawt waliyyat a du-təfəlat akal ən Yahudəyya daɣ talxa-nak wala deɣ os-əna-du iyyan daɣ mədrayan-nana daɣ əddin, ag-ana isalan-nak madəɣ annu sər-ək ark arat.

²² Amaran nəra a dana-təməla kay iman-nak awa təsamədranaɣ, fəlas arat iyyanda as danax-əhan salan-net as, taggayt ta n tarrayt n Əlməsix Ƴaysa, wər t-illa adag a tat-wər-nəššek.»

²³ Təzzar namaggan dər-əs təmastant əzəl iyyan. As d-ixlay əzəl wen, osan-t-idu s igət daɣ ahan wa iha. İššewal-asan əs gəllejat daɣ salan ən Taymar ta n Məššina wa n aɣora har iga ahad, isasagr-asan-tat. Isakn-en əs təməwit təsisagrat daɣ Əttawret ən Musa d Əlkəttaban n Ənnəbitan win hadatnen as, awa igannu əs Ƴaysa tidət daɣ a imos.

²⁴ Wiyyad əssokasan daɣ-san aratan win inna Buləs aššak, əzzəgzanan; win hadatnen ugayan s əzəgzan.

²⁵ Təzzar əmməzaɣan gar-essan. As əggazan šin teklay, inna Buləs: «Tidət da a inna Infas wa Zəddigan i marawan-nana daɣ əmi n ənnəbi Isayas, as inna:

²⁶ *"Aglu, akku tamattay en, tannay-as: 'Ad tayyawan əsəsəm, mišan wər ilkem ad təgra wala, tayyawan asawad, mišan wər ilkem ad tənay wala';*

²⁷ *fəlas tamattay di, əsəxər a təga əwəl-net, gərrid as sallinat təməzzugen-net, təqqân šittawen-net; fəl ad wər tənəy za wala taslu, taqqam da wər təgra s əwəl-net, əngəm tutab, əzzuzəyaq-qat!"*»

²⁸ Dəffər awen, inn-asan Buləs: «Əssənət za as, šimattiwen šin wər nəmos Kəl-Əlyəhud əntanatay da issokenat-du Məššina isalan n efsan-net. Əntanatay a dasan-z-əssəsəmnən.»

²⁹ [As inna Buləs awen, əfalan-tu Kəl-Əlyəhud, əmmizəɣan wəllen gar-essan.]

³⁰ Iga Buləs əššin elan əxrâdnen daɣ ahan ixfâr ənta iman-net, itaggu marhaba y aytedan kul win əranen anay-net.

³¹ Itagg-asan isalan ən Taymar ta n Məššina, isasaxr-en deɣ arat kul wa iqqalan Əməli Ƴaysa Əlməsix ši wala tasa, wər t-illa deɣ awedan a das-igdâlan awen.

Şirawt ta iktab Buləs i Kəl-Ərrum Əsənti

Assalam

¹ Awa nak Buləs akli n Əlməsix Ƴaysa, itiwaxran əs tişit n anammazul itiwaskat dəx y igi ən salan n Əlinjil ən Məşşina.

² Əlinjil wen irəw Məşşina as iga arkawal-net y ənnəbitan dəx Əlkəttaban win zaddoggen.

³ Isalan n Əlinjil win den əmmigradan dəx batu ən Barar ən Məşşina a d-ihəwan dəx əzzurrəyya n ənnəbi Dawəd dəx batu ta təqqalat tişit-net aggadəm.

⁴ Dəx batu amaran ta təqqalat Infas wa Zəddigan ən Məşşina itawaxsab Barar ən Məşşina əs tarna s əssəbab ən tanakra-net dəx təmattant. Ənta a imosan Ƴaysa Əlməsix Əməli-nana.

⁵ Tarrayt-net as nəgraw arraxmat ən tişit ən nəmmuzal fəl a du-nawəy şimattiwen kul şin wər nəmos Kəl-Əlyəhud s əbərdəg wa d-itaway əzəgzan, fəl saxmar n esəm-net.

⁶ Şimattiwen şin kawanay da təhəm-tanat, kawanay a iğra Ƴaysa Əlməsix.

⁷ Katabax-awan-in ketnawan kawanay a əhanen ağrəm n Ərrum təmosam win ikna Məşşina tara tətiwaxram s ad tizdagam. Əgmaya dəx Məşşina di n Abba-nana d Əməli Ƴaysa Əlməsix a dawan-igan arraxmat d alxer.

Igodan əd səsəgritan

⁸ Dəx tizarat əgğodayax i Məşşina əs tarrayt ən Ƴaysa Əlməsix dəx batu-nawan ketnawan id əzəgzan-nawan itiwasla dəx əddənet ketnet.

⁹ Iğgiyyat-i Məşşina a əxbada s əwəl iyyanda s amel wa taggax isalan n Əlinjil ən Barar-net əs faw tahəm şiwatriwen-in.

¹⁰ Faw da gammaya dəx təwatriwen-in ad əgrəwax təməwit n a kawan-in-asa, as irda Məşşina.

¹¹ Tidət as əknəx tara n a kawan-ənəya fəl a dər-wan ədrəwax arat ən təhəkkuten şiiyyad a d-əfalnen Infas wa Zəddigan fəl ad təgrəwam əzəzzəwi dəx əzəgzan-nawan.

¹² Almaxna as dər-wan namaggazax edag, əzəgzan wa nəla nak dər-wan a danax-isəssuhət ketnana dəx tarrayt ta nəha, inəməsəsuhat dəx əzəgzan wa-nawan əd wa-nin.

¹³ Ya imədrayan-in, arex ad təssənam as əyyəwanax tara n a kawan-in-asa fəl ad əgrəwa xur-wan tənfa n əşşəxəl-in wa n anammazul zun ta əgrəwa xur təmattiwen şin

hadatnen wər nəmos Kəl-Əlyəhud. Mišan indar-i awen har harwa.

¹⁴ Tišit-in anammazul təsiwar-i əşşəxəl dağ aytedan kul gər Kəl-Əlyunan as əmoranat šittawen-nasan wala win tan-wər-nəmos, gər win musanan wala win aljahilan.

¹⁵ Awen dağ a fəlas sidaranax wəllen a dawən-agağ isalan n Əlinjil kawanay da a əhanen ağrəm n Ərrum.

Awa dağ təşşewal širawt ta

¹⁶ Fəlas wər di-imos Əlinjil təkarakit id tarna ən Məşšina a imos, itaway-du efsan s aytedan kul win əzzəgzannen a obazan ħur Kəl-Əlyəhud ikka aytedan win tan-wər-nəmos.

¹⁷ Illikan as taqqat ta n Məşšina tənifalal dağ Əlinjil s əzəgzan, amaran s əzəgzan ħas, id ənnan Əlkəttaban: «*Awedan wa oɣadan dağ tarrayt ta n əzəgzan a igarrawan təməddurt taynayət.*»

Əlinjil ənta immalan taqqat ən Məşšina

Aytedan kul ibaz-tan əşşəriɣa ən Məşšina

Inəmməzray kul obâz-tan əşşəriɣa ən Məşšina

¹⁸ Alham ən Məşšina iffal-du ijənnawan itakka-du aytedan kul win wər nəksud Məşšina d aytedan kul win wər noɣed, əwâɣan tidət əgdâlan-as ənəfilal s iba n taqqat-nasan.

¹⁹ Fəlas arat wa ifragan ətəwəssan dağ batu ən Məşšina ibbiyyan-asan id Məşšina iman-net a dasan-t-isannafalalan.

²⁰ Awalla, harwa ħur əxluk ən Məşšina əddənet da assayfaten-net šin wər nətəwənəy, əmosnen tarna-net təxlâlat əd tišit-net Əməli, tawahannaynat, əmmunnat dağ igitan-net. Dağ adi wər əlen əsarə waliyyan a tan-ikkasan,

²¹ id əssânan Məşšina mišan wər das-əgen saɣmar wa dər ihor za wər das-əgen igodan. Kalar oyyan iman-nasan əssəxrakan-tan medranan wər nənfa wala, əjawanken deɣ dağ šiyyay id iwəllan-nasan a əɣfalnen.

²² Əgân iduf n as əmosan imalan ən tayttay, əntanay amaran imeskelan a əmosan.

²³ Ənkaran əs tanaya ən Məşšina di n Amaylol əgan dağ adag-net šaššelanan n aggadəm wər nəɣlel əd gəɣad əd hərwan əd wəxsan əd dəmərdəmaran.

²⁴ Awen dağ a fəl tan-oyya Məşšina əlkaman y arak deranan-nasan. Əmmək en dağ as samadasan iman-nasan əs təməwit təsifallasat aggadəm.

²⁵ Əntanay a sammattaynen tidət ən Məşšina əgan bahu dağ adag-net, əɣbâdan əməttəwəxlək oyyan Wa d-ixallakan. Attamalet esəm-net har faw! Amin!

²⁶ Awen daḡ a fəl tan-oyya Məššina əggâzan tara ən man-nasan eway-du sər-san awen šifəllas, har âs šidoden-nasan ab-as tinəmənsinat əd meddan, kalar šidoden a dər tinəmənsinat, imos awen arat immizrayan əttəbiḡat n aggadəm.

²⁷ Meddan deḡ əgan awen da. Ab-as tinəmənsin əd tədoden-nasan, ad tinəməggin əzzəna gar-essan, əknân tara n awen. Aytedan win əxraknen en, a tan-abəz əššəriḡa ən Məššina s attadib wa dər əhoran mazalan wər nətəwəggu win taggin den.

²⁸ Dad zamas ugayan s ad əssənan Məššina, oyy-en Məššina əlkaman y arak tayttay-nasan ad taggin imazalan wər nəmməkkan.

²⁹ Taggin əzzənəfan kul ən mazalan wər noḡed, d aššar, d attama daḡ a wər əlen, d əzzəngu əd manzaḡ, d igi ən man, əd kənnasan, əd təkərras, əd tišit ən maksanan. Sawaran aytedan bahu,

³⁰ akkiyyan igannu ark aratan əs wa hadan. Ēmosan izənga ən Məššina, wər əlen aladab, tanarbadan, ih-en zazwar ən man, gammayan tarrayen kul šin igi ən təkma. Wər əbbərdagan i marwan-nasan.

³¹ Wər əlen tayttay, wər əḡdelan, wər əlen tafrəyt za wər tan-təha tahanint.

³² Ēknân masnat n əššəriḡa imosan tamattant təḡlalət wa issənsa Məššina i win tagganen imazalan win den. Mišan dər iga awen da, əssərtayan as tamazalan ark aratan win den, d as əqbâlan aytedan win tan-tamazalnen.

2

Aytedan win əganen iduf n as olaḡan obaz-tan əššəriḡa ən Məššina

¹ Daḡ adi kay wa ixakkaman y aytedan, əssən as wər daktu-təlla təsureft a təqqala da, fəlas as təxakkama y aytedan, wədi iman-nak a tətəbaza s əššəriḡa, id kay iman-nak da tətəgḡaḡ arak mazalan win taggin aytedan win den.

² Amaran nəssân as əššəriḡa ən Məššina was obaz aytedan win tagginen imazalan win den oḡâd.

³ Ēnzər-in daḡ as kay wa ixakkaman aytedan a dər-ək olanen alxal, wər t-illa əmmək as du-za-tərəga daḡ əššəriḡa wa n Məššina.

⁴ Meḡ ak əsəttəlkək a təgəḡ əlluḡ ən Məššina, d əlləllu-net, əd təzaydart-net, təqqima wər din-təgḡeḡ as ira a kayisəmməttəy s əlluḡ-net tutaba?

⁵ Ēqqəssu-nak əd tugəyt-nak əs tətubt a d-ewaynen as itiwəsəmutig-ak alḡazab zəwwəran əzəl wad z'izəmmizəl Məššina alham-net inəfiləl əššəriḡa-net oḡâdan.

⁶ Ʒzəl wen, awedan kul ad t-akfu Məššina awa dər ahoran mazalan-net.

⁷ Win əganen təzaydart za dəx əmazal n awa olağan, gammayan s awen ətəwəsəxmər xur Məššina, d ədkul, gammayan təməddurt ta wər nəxərrəd, win di ad tan-akfu Məššina təməddurt ta təxlalat.

⁸ Amaran win wər nəgəmmay ar tənfa ən man-nasan, əmosan əllid ən tidət, tamazalan dəx aratan wər noxed, win di a tan-assaknu Məššina aššar n alham-net.

⁹ Awalla, təssust əd təməxutar əllânat-tu y aytedan win tamazalnen talbast a obazan xur Kəl-Ʒlyəhud ikka win wər nəmos Kəl-Ʒlyəhud.

¹⁰ Amaran awedan kul wa itamazalan awa olağan, wədi ill-as-tu ətkul d ətəwəsəxmər d alxer a obazan xur Kəl-Ʒlyəhud ikka win wər nəmos Kəl-Ʒlyəhud,

¹¹ fəlas Məššina wər itəggu təmərit.

¹² Adi a fəlas aytedan kul win tagginen ibakkadan imos as ijhal-asan əššərixa wa n Ʒttawret, win di wər z'attarmasan s əššərixa wen. Amaran win əssannen əššərixa wa n Ʒttawret taggin ibakkadan, win di ketnasan a dasan-itəwəxkəm s əššərixa wədi da.

¹³ Wərgex win sasammen y əššərixa a oğadnen dat Məššina, kalar win sər-əs tamazalnen əntanay a z'əgrəwnen ətəwəqbal əd taqqat xur Məššina.

¹⁴ Aytedan win wər nəmos Kəl-Ʒlyəhud amaran wər əssenən fəl əššərixa wa n Ʒttawret mišan imazalan win əttəbiğat-nasan nimannakan d əššərixa wa, win di əntanay a əmosnen əššərixa i man-nasan.

¹⁵ Saknin s awen as imazalan win as omar əššərixa əktâban dəx wallan-nasan. Ʒnnəyatən-nasan dəx tagayyatnat awen. Amaran iduf wa namaggan gar-essan assaxat iyyat tinəməsəwiran sər-əs lahan assaxat iyyat dəx gammayan sər-əs ənəməsuraɸ.

¹⁶ Ʒnta da da awa z'əgin əzəl wad z'išrəx Məššina əs tarrayt ən Ʒaysa Ʒlməsix imazalan n aggadəm win əğbarnen, s əmmək was t-inna Ʒlinjil wa əmmala.

Kəl-Ʒlyəhud obâz-tan əššərixa ən Məššina

¹⁷ Kay wa igannin təmosax Ag Ʒlyəhud təffilla fəl əššərixa wa n Ʒttawret, tətəggağ ibaragan as kay təmosax əmaray əs Məššina,

¹⁸ təssânağ awa ira Məššina, təssânağ arat wa imosan əlməxsud id tətivasasağra əššərixa wen.

¹⁹ Kay wa ikkasan aššak as təmosax əmalway ən win əddərxalnen, təmosax ənnur i win əhanen šiyyay,

²⁰ təmosay əməsəsseyri n aytedan win nəbbənnan, d əməsəsseyri ən bararan, təgêx awen fəlas tənâya day Əttawret masnat əd tidət əkmâlnen.

²¹ Xasil kay wa isasayrin aytedan amaran wər təsəsəyray iman-nak! Kay wa itamaran aytedan s ad wər akəran, mafel tətakara?

²² Kay wa itamaran aytedan s ad wər agin əzzəna, mafel tətəggaq-qu? Kay wa ikəyađan əssənəman, mafel təgalla tətakarax awa ihan idaggan n əlyibada-nasan?

²³ Kay wa isabaragan fəl əşşərixa n Əttawret amaran tətamazrayaq-qu imos awen iba n safrar n esəm ən Məşşina.

²⁴ «*Fəlas esəm ən Məşşina sammadrayan-tu aytedan win wər nəmos Kəl-Əlyəhud amaran imazalan-nawan a d-əwaynen awen*», s əmmək was t-əmalan Əlkəttaban.

²⁵ Illikan as əmənəkəd təh-ay tənfa as imos as təbbirdaga y əşşərixa wa n Əttawret, mişan as tətamazrayax əşşərixa wen, wədi əmənəkəd-nak wər izlay d iba-net.

²⁶ As imos as awedan wa wər nəmmənəkəd ilkâm y alwajiban n əşşərixa ibbirdag-asan, awak wərgex a das-itəwəxsəb as imminkəd?

²⁷ Awedan wa wər nəmmənəkəd amaran ibbirdag y əşşərixa wa n Əttawret, ənta dak-z-işrəxan kay wa ittəfan Əttawret təmminkada tətamazrayaq-qu.

²⁸ Arat wa imosan tidət as tişit n Ag Əlyəhud wər təmos arat iwaran azzahir xas, wala əmənəkəd xas.

²⁹ Kalar awa ihan əwəl ənta a itaggin awedan Ag Əlyəhud amaran əmənəkəd wa itaggin awedan Ag Əlyəhud əwəl a day itaggu imos arat a d-ifalan Infas ən Məşşina, wərgex arat iktaban xas day Əttawret. Ənta di da Ag Əlyəhud wa igarrawan təmmalen şin d-əfalnen Məşşina, wərgex şin d-əfalnen aggadəm.

3

¹ Day adi məni tat əlfaydat ən tişit n Ag Əlyəhud, madex məni tənfa n əmənəkəd?

² Tənfa-net ši agget day anamod kul, amaran ta zəwwərat âs Kəl-Əlyəhud əntanay as d-iga Məşşina awal-net day fassan-nasan.

³ Tidət as wiyyad day-san əmmizrayan Məşşina. Awak immikkan iba n təlxudəla-nasan ad təsəmməttəy arat day təlxudəla ən Məşşina?

⁴ Kala kala! Itəwəqbəlet as Məşşina ənta a imosan tidət, aggadəm anasbahu. Tişit ən Məşşina tidət ənta a fəl ənnan Əlkəttaban: «*Təgrawa taqqat day awal-nak, təgrawa tidət day əşşərixa-nak.*»

⁵ Mišan ma za nannu as imos as iba n aqqad-nana isannafalal-du aqqad ən Məššina? Awak Məššina imos fall-as iba n aqqad ad izəmmizəl alham-net? Illikan as awal wa tagga da taggaq-qu əs tayttay ta n aggadəm.

⁶ Kala, kala! Məššina inimaggag d ad imos as wər oxed. Kundaba adi, manəmmək as z'isrəx y əddənet?

⁷ Amaran as imos as bahu-nin isannahal əsənəfiləl ən tidət ən Məššina, eway-du awen əs təbbəyyan tanaya-net, wədi mafel tətawaxkam-i tišit n anasbakkad?

⁸ Ma ikma fadda nənna: «Mazalatana talbast fəl a tat-du-təgmad tənfa?» Arat s ənta a sər-na gannin arat n aytedan gammaynen a danaχ-əχšədan esəm. Aytedan win di əhoran d ad attarmasan s əššərixa ən Məššina.

Aytedan kul obâz-tan əššərixa ən Məššina

⁹ Ma za? Awak nakkanay an Kəl-Əlyəhud təll-ay alfaydat nəgrâw dənnəg aytedan harwa da? Kala kala, fəlas nəjwər nəsattadda as ketnana gər za Kəl-Əlyəhud wala aytedan win tan-wər-nəmos, as nəha təla n abakkad,

¹⁰ s əmmək was ənnan Əlkəttaban:
«Wər t-illa i oγadan, wala χas iyyanda,

¹¹ wər t-illa i igarrin,

wər t-illa i igammayan masnat ən Məššina

¹² Kul əxrâkan əmmək a mosan,

ketnasan əknân aššar,

wər tan-iha i itaggan awa olaχan,

[wala] χas iyyanda.

¹³ Šigarsaten-nasan əmosnat zun təsəska ənnolammen,

ilsawan-nasan takarrasan sər-san aytedan,

idəlay-nasan wər əχberan ar assam ən taššolt.

¹⁴ Imawan-nasan ədnâyan batuten samommen əd tulχant,

¹⁵ idaran-nasan təh-en tadasayt ən tanaχla n əzni,

¹⁶ ahluk d əlməssibat əwâran tarrayt-nasan,

¹⁷ wər əzdayan tarrayt ta n alxer.

¹⁸ Təksəda ən Məššina wər təha wallan-nasan.»

¹⁹ Ənta nəssân as arat kul wa inna əššərixa wa n Əttawret, inn-ay y aytedan win əllanen daw əlxəkum wa n Əttawret fəl ad affastin mawan kul itəwəqbəl as əddənet kul obâz-tat əššərixa wa n Məššina.

²⁰ Fəlas wər t-illa awedan as za tətəwəqbəl taqqat-net dat Məššina əs tarrayt ən mazal n awa ihan əššərixa, fəlas əššərixa ənta a danaχ-isusunan awa imos abakkad.

Aytedan əgrâwan taqqat əs tarrayt n əzəgzan

Əsəssəgri ən taqqat ta ihakku əzəgzan

²¹ Mišan əmərədda, Məşşina isinafalal əmmək was z'iqbəl taqqat-nanay da wala tarrayt ta n Əşşəriya ittiddan dağ Əlkəttaban.

²² Məşşina iqabbal taqqat əs tarrayt n əzəgzan əs Ƴaysa Əlməsix. Amaran aytedan win əzzəgzannen kul iqabbal taqqat-nasan, fəlas aytedan wər əzlayan:

²³ Ketnasan əgân ibakkadan aba fall-asan tanaya ən Məşşina.

²⁴ Amaran əgrâwan taqqat təmosat təhəkkut n arraxmat ən Məşşina əs tarrayt ən tədarfit ta du-teway tassağ d Əlməsix Ƴaysa.

²⁵ Ənta a d-issəgla Məşşina ixkâm-as ad iqqəl takutay ta təmmasat ibakkadan n aytedan əs tarrayt n əzəgzan s əzni-net. Əmmək en dağ as issəkna Məşşina taqqat-net. Fəlas Məşşina oyya ibakkadan da wər tan-iwwəddab dağ azzaman win ərəwnen,

²⁶ ən təzaydart-net, amaran azzaman win əmərədda, ira ad assaknu taqqat-net əs təməwit a dağ z'itəwəqbəl as oğâd, fəl ad iqbəl taqqat n awedan kul wa izzəgzanan əs Ƴaysa.

²⁷ Dağ adi, awak ill-ay əddəlil a fəl nəga ibaragan? Kala wər t-illa, fəlas wərgex əbərdəg y əşşəriya a işxalan əmərədda, kalar əzəgzan.

²⁸ Fəlas nakkanay nəga iduf n as awedan igarraw taqqat əs tarrayt n əzəgzan, wərgex ləkkum y əşşəriya.

²⁹ Məx ak nəga iduf n as Məşşina Kəl-Əlyəhud Ƴas as imos Əməli-nasan? Awak Məşşina wər imos Əməli n aytedan win wər nəmos Kəl-Əlyəhud? Awalla Əməli n aytedan kul a imos, harkid win wər nəmos Kəl-Əlyəhud.

³⁰ Dad zamas Məşşina iyyanda Ƴas, wədi ad iqbəl taqqat ən Kəl-Əlyəhud s əssəbab n əzəgzan, iqbəl dəx taqqat ən win wər nəmos Kəl-Əlyəhud əs tarrayt n əzəgzan wa.

³¹ Dağ adi wərgex emes a din-nətaggu əşşəriya nətaggu əzəgzan dağ adag-net. Kalar əsəttəddi a nətaggu əşşəriya.

4

Ibrahim imos almasal n agaraw ən taqqat s əzəgzan

¹ Ma za nannu dağ adi s Ibrahim imosan əmâraw-nanay dağ batu ta təqqalat tişit n aggadəm? Ma igraw?

² Ənnar imos as Ibrahim tarrayt ən mazalan-net as igraw taqqat Ƴur Məşşina, wədi ila əddəlil n igi ən baragan. Mišan wərgex awen a igan Ƴur Məşşina.

³ Fəlas ənnan Əlkəttaban: *Izzəgzan Abram əs Məşşina, awen dağ a fəl t-ikfa Məşşina taqqat.*

4 Awedan wa itaggan imazalan olaynen, wədi alak-net wər das-imos tənəfust, kalar alxaq-net a imos.

5 Awedan amaran wa wər nəga imazalan olaynen, mišan izzigzan əs Məşşina s ənta ihakkin taqqat i nasbakkadan, wədi ad igrəw taqqat s əssəbab n əzəgzan-net.

6 Emmək en dağ as inna ənnəbi Dawəd dağ batu n əbbələl n awedan wa ikfa Məşşina taqqat da wala imazalan-net, inna:

7 «Əbbilalan win as tawasarafan arak mazalan-nasan, Tawamasan bakkadan-nasan!

8 İbbilal aləs wa fəl wər ixəssəb Məşşina ibakkadan-net!»

9 Awak əbbələl wa in Kəl-Əlyəhud ɣas, meɣ ak in aytedan kul harkid win wər nəmos Kəl-Əlyəhud? Fəlas nəgannu: *Əzəgzan n İbrahim igraw sər-əs taqqat dat Məşşina.*

10 Awak ma dər ola İbrahim as igraw ətəwəqbal wen ɣur Məşşina? Awak imminkad meɣ wər immənkad harwa? Kalar harwa da dat əmənkəd-net ad igraw ətəwəqbal wen.

11 Dəffər awen ad igraw İbrahim ɣur Məşşina asannal wa n əmənkəd imosan əsətəddi ən taqqat ta igraw s əzəgzan harwa dat əmənkəd-net. Arat wen igâ fəl ad iqqəl İbrahim əmâraw n aytedan kul win əzzəgzannen əs Məşşina da wər əmmənkadan, fəl ad əgrəwan əntanay da taqqat ɣur Məşşina.

12 İbrahim imos harwa da abba n aytedan win əmmənkadnen, mišan wərgəɣ əmənkəd-nasan ɣas a fəl əffəllan, kalar tilalt a əgan tarrayt n əzəgzan ta iga əmaraw-nanay İbrahim harwa da wər immənkad.

13 Məşşina iga arkawal y İbrahim əd hayawan-net as ad əgrəwan əddənət. Arkawal wen wər itawagga y İbrahim fəl ləkkum-net y əşşəriɣa, kalar ig-as-tu Məşşina əs tarrayt ən taqqat tat-t-ikfat əzəgzan-net.

14 As imos as tarrayt ən ləkkum y əşşəriɣa as z'əgrəwan aytedan arkawal wen, wədi əzəgzan wər ila tarna waliyyat, arkawal wen deɣ ad ib'as t-illa.

15 Fəlas əşşəriɣa itaway-du təmazrəyt id wər nəfreg a t-idu-nəsandu, təmazrəyt amaran tətaway-du alham. Amaran edag wa wər iha əşşəriɣa, wədi wər tu-za-təggəz təmazrəyt.

16 Ənta den dağ əddəlil wa fəlas arkawal wen ad itəwəgrəw əs tarrayt n əzəgzan, fəl ad iqqəl təhəkkut təmosat arraxmat. Emmək en dağ as arkawal wen ittidda y əzzurrəyya n İbrahim ketnet, almaɣna wərgəɣ win əlkamnen y əşşəriɣa ɣas, kalar harkid win obaznen tarrayt n əzəgzan ta n İbrahim imosan abba-nana ketnana.

17 Awen da a ihan Əlkəttaban id ənnan: «*Əgeq-qay amaraw ən təmattiwen əknānen igət.*» Imos abba-nana

ketnana dat Məşşina s ənta as izzəgzan, Məşşina s ənta a ihakkin tēməddurt i win aba, ixallak-du awa tu-wər-nəlla.

¹⁸ Ibrahim iggaz alxalat a dağ-as tu-wər-illa attama waliyyan, mişan izzəgzan iga attama-net dağ Məşşina. Emmək en dağ as iqqal *abba ən təmattiwen əknânen igət*, s əmmək was das-itawanna: «*Awen dağ a dər z'agdin hayawan-nak*».

¹⁹ Wər ides wala əzəgzan n Ibrahim kuddeğ as issân as tağəssa-net [zun as] tēm̄mût fəlas izay-in temeday n awatay, Sarata değ təwaşşar təggigra.

²⁰ Ibrahim wər iga aşşak dağ arkawal ən Məşşina zun awedan wər nəzzəgzan, kalar isassahat-tu əzəgzan-net issəğmar tanaya ən Məşşina.

²¹ Isannahal ikus n aşşak as Məşşina ila tarna n ad assandu arat was iga arkawal-net.

²² Awen dağ a fəl «*das-itawaxsab awen əs tişit n awedan oyâdan.*»

²³ Mişan wərgəğ əddəlil-net ənta ɣas a fəl itawaktab as: «*Itawaxsab-as awen*»,

²⁴ kalar nakkanay da itiwaktab fəl əddəlil-nana, amaran Məşşina nakkanay da ad ixsəb taqqat-nana. Nakkanay əzəgzan a sər-əs nəğa, ənta a d-issənkaran Əməli-nana Ƴaysa dağ təmattant

²⁵ s ənta a itawakfan fəl əddəlil ən bakkadan-nana, itawasankar-du fəl ad nəgrəw taqqat dat Məşşina.

5

Agaraw ən taqqat əs tarrayt n əzəgzan d əlyillas

¹ Dağ adi as nəgrəw taqqat dat Məşşina s əzəgzan-nana, wədi nəgrâw alxer gar-enay əd Məşşina əs tarrayt n Əməli-nana Ƴaysa Əlməsix.

² Tarrayt n Əlməsix as nəgrəw arraxmat [s əssəbab n əzəgzan-nana]. Arraxmat en ənta fella-nana. Nəddəwat amaran attama wa nəğa dağ tanaya ən Məşşina, ənta a imosan abarag-nana.

³ Dənnəğ awen fadda, nəsabarag kudde nəha təssust, fəlas nəssân as təssust ənta a du-tətawayat zəmmerat.

⁴ Zəmmerat ten amaran ənta a dana-təhakkıt tişit n aytedan əlânen almağna, amaran as nəqqal aytedan əlânen almağna wər za nammazzay d igi n attama dağ Məşşina.

⁵ Məşşina amaran wər isərmig i dağ-as igân attama, id tara-net a tədnayat iwallan-nana əs tarrayt n Infas wa Zəddigan wa danay-itawakfan.

⁶ Fēlas harwa danaḡ-wēr-təqqel alfaydat waliyyat ad immut Elməsix fəl əddəlil n aytedan wēr nəzəgzan əs Məššina daḡ alwaq wa iskat Məššina y awen.

⁷ Izzəwat i z'iqbəlän ad t-iba kuddeḡ fəl əddəlil n awedan oḡadan. Mijas ifrâḡ awedan ad iqbəl təmattant fəl awedan olaḡan.

⁸ Mišan əmmək da was danaḡ-issəkna Məššina tara ta danaḡ-iga: Harwada nəmos inasbakkadan ad aba Elməsix fəl əddəlil-nana.

⁹ Dad zamas əmərədda nəgraw taqqat əs tarrayt n əzni n Elməsix, manəmmək as danaḡ wēr z'assafsu daḡ alham ən Məššina?

¹⁰ Fēlas, dad zamas harwa nəmos izənga ən Məššina da nəḡa dər-əs alxer əs tarrayt ən təmattant ən Barar-net, manəmmək as wēr za nəgrəw efsan s əssəbab ən təməddurt ən Barar-net əmərədda a dər-əs nəḡa alxer.

¹¹ Amaran iyyan arat as Məššina a fəl nəsaffalla əs tarrayt n Əməli-nana Ḡaysa Elməsix s ənta a danaḡ-igan əmərədda alxer əd Məššina. Ənta den daḡ abarag-nana.

Abakkad n Adəm d arraxmat ən Ḡaysa Elməsix

¹² Ma təssoka za batu ten? Adi za as tarrayt n awedan iyyanda as d-iggaz abakkad əddənet, abakkad amaran ənta a d-ewayan təmattant. Əmmək en daḡ as təmattant təll-ay y aytedan kul fēlas ketnasan əḡân ibakkadan.

¹³ Ənta abakkad ill-ay harwa da wēr d-izazzabbat Məššina əššəriḡa-net fəl ənnəbi Musa, amaran abakkad wēr ixəssəb, as tu-wēr-illa əššəriḡa.

¹⁴ Dər iga awen da ya təmattant təll-ay təxkâm daḡ əddənet a d-obazan ḡur Adəm har Musa. Təll-ay harkid y aytedan win wēr nəḡa abakkad olân əd wa n Adəm s ənta a ihan əlmital ən wa du-z-asin.

¹⁵ Mišan təmazrəyt n Adəm wēr tola əd təhəkkut ta danaḡ-iga Məššina s arraxmat-net. Tidət as aytedan aggotnen aba-tan fəl əddəlil ən təmazrəyt n awedan iyyanda a t-imosan Adəm. Ma dər ogda igət n arraxmat ən Məššina, təmosat təhəkkut-net ta du-tosat əs tarrayt n awedan iyyanda a t-imosan Ḡaysa Elməsix? Arraxmat ten əd təhəkkut ten wēr əlenat əddukad, amaran ewâdnat-in aytedan əknânen igət.

¹⁶ Awa du-tətaway təhəkkut ən Məššina wēr ola d awa d-eway abakkad n awedan iyyanda. Dəffər abakkad wa iga Adəm, Məššina iwwiddab s əššəriḡa-net aytedan kul. Təhəkkut amaran ta d-iga Məššina taqqat as tətaway aytedan, amaran tosâ-du dəffər as əḡân aytedan təmazrəyt təgget.

¹⁷ Illikan as təmazrəyt n awedan iyyanda a du-tewayat as təxkam təmattant əddənet əs tarrayt n awedan iyyanda wen. Mişan əs tarrayt ən Үaysa Əlməsix җas-net, əgrâwan aytedan a ogaran awen wəllen. Aytedan win əgrawnen arraxmat wər nəla əddukad əd təhəkkut-net təhakkit taqqat, win di ad əddəran əxkəman deḡ əs tarrayt n awedan iyyanda a t-imosan Үaysa Əlməsix.

¹⁸ Daḡ adi, kud təmazrəyt n awedan iyyanda teway-du attadib s aytedan kul, wədi aytedan kul ad əgrəwan taqqat təhakkit təməddurt əs tarrayt n əmazal oḡadan n awedan iyyanda. Əmazal wen tamattant ən Үaysa Əlməsix a t-imosan.

¹⁹ Zund əmmək as təmazrəyt n awedan iyyanda teway-du as əqqalan aytedan aggotnen inasbakkadan, əmmək en daḡ as əbərdəḡ n awedan iyyanda a du-z-awəyan s aytedan aggotnen ad əgrəwan taqqat dat Məşşina.

²⁰ Əşşəriḡa amaran osâ-du fəl ad təttəy təmazrəyt wəllen. Mişan ibakkadan as əggətan daḡ adag a dənnəḡ-san du-təssəfəl arraxmat ən Məşşina.

²¹ Daḡ adi dad zamas abakkad ixkâm fəl əddənet iddew əd təmattant, wədi arraxmat ən Məşşina da ad təxkam tidaw əd taqqat fəl a danax-takfu təməddurt ta təḡlalat əs tarrayt n Əməli-nana Үaysa Əlməsix.

Tarna n Əlinjil: Awa du-tətaway taqqat ta ihakku əzəḡzan

6

Nəddirfa daḡ əkkəlu n abakkad

Ab-ana daḡ batu ta təqqalat abakkad nəddar əs tərtəyt d Əlməsix

¹ Ma za nannu daḡ adi? Awak ad naglu daḡ igi ən bakkadan fəl ad təttəy arraxmat ən Məşşina?

² Kala kala! Nakkanay win əḡanen təmattant ta dana-təzammazzayat əd bakkadan, manəmmək as za naglu daḡ igi-nasan?

³ Nakkanay ketnanax əmmək a nəmos as nətawasalmay daḡ aman s esəm ən Үaysa Əlməsix, awak tatawt a din-təgam as nərtây dər-əs daḡ təmattant-net?

⁴ Daḡ adi tamattant a nəḡa, nətawanbal-in, nərtây d Əlməsix s alamaḡ wa nəḡa daḡ aman s esəm-net. Awen daḡ as zund əmmək as d-inkar Əlməsix daḡ təmattant əs tarrayt ən tanaya n Abba-nana, əmmək en daḡ as nakkanay da ad nagu təməddurt taynayat.

⁵ Dad zamas nərtây dər-əs day təmattant tolat əd ta-net, wədi a dər-əs nərtây əs tanakra day təmattant tolat əd ta-net.

⁶ Nəssân day adi âs aggadəm was kala a tu-nəmos, wədi itawataytay fəl təgəttawt iddew d Əlməsix. Emmək en day as təmust-nana ta tərəwat ən tişit ən nasbakkadan təhlak, ab-as tu-təlla, nakkanay dey nəmməzzay d əkkəlu, a t-iṃosan tişit ən nasbakkadan.

⁷ Fəlas awedan wa aba, wədi iddirfa day abakkad.

⁸ Nakkanay amaran, dad zamas ab-ana nəddew d Əlməsix wədi nəzzigzan as a dər-əs nidaw day təməddurt da,

⁹ id nəssân as Əlməsix wər tu-z-iba dəffər tanakra ta d-iga day təmattant. Ab-as fall-as təla təmattant tarna waliyyat.

¹⁰ Fəlas aba-tu, amaran əddəlil n abakkad a fəl t-aba day taklat iyyadda. Əmərədda təməddurt ta iga, Məşşina as tat-iga.

¹¹ Day adi kawanay da agiwat i man-nawan iduf n as abakawan day batu ta n abakkad, tagim dey iduf n as təddâram i Məşşina day tassaq d Əlməsix Ƴaysa.

¹² Day adi ad wər iləs abakkad axakam fəl təxəswen-nawan əmosnen arat itamattin, wala təlkəmam y arak deranan-net.

¹³ Ad wər tətəyyim şisəllad-nawan y abakkad, əqqəlnat zun təzoli as tətawamazal təkma; kalar akfiwat iman-nawan i Məşşina, təqqəlam zun aytedan aba a d-ənkarnen day təmattant, takfim şisəllad-nawan i Məşşina ad əqqəlnat təzoli tətamazalat awa oşadan.

¹⁴ Fəlas ab-aş təham təla n abakkad id ab-as təham taymar ta n əşşəriya wa n Əttawret, kalar təggazam taymar ta n arraxmat ən Məşşina.

Nəddirfa day bakkadan fəl ad nəybəd Məşşina

¹⁵ Ma za nagu za? Awak ad nagu ibakkadan fəlas nokay-du azzaman win əşşəriya nəggaz win arraxmat? Kala kala!

¹⁶ Awak wər təssenax âs as təgex iman-nak akli n awedan təbbərdagax-as, wədi kay təqqalax akli n awedan wen? Day adi wa xas təqqalax akli n abakkad itawayan əs təmattant, wa təqqalax akli ən tarrayt ta n əbərdəg i Məşşina tətawayat əs taqqat?

¹⁷ Mişan təmmalen i Məşşina! Dəffər as kala təmosam eklan n abakkad, əmərədda təbbərdagam day wallan-nawan y əşşərədan n əsəssəyri wa tətawaggam.

¹⁸ Təddərfam day bakkadan, təqqalam əmərədda eklan n awa oşadan.

¹⁹ Əlmital wa taggaq-qu s anamod wa n aggadəm fəl əddəlil ən rəkkəm-nawan a dər du-təxlâkam. Zund əmmək as kala ad təsammalkawam şisəllad-nawan təmosam eklan

n awa immədasan d awa xaraman fəl ad tawədam taxxaramt ketnet, əmmək di day as əmərədda akfiwat şisəllad-nawan y ad təqqələm eklan n awa oğadan fəl ad tawədam tazdak.

²⁰ Fəlas assaxa wad təmosam eklan n abakkad, əddi təddirfam day anamod wa n taqqat.

²¹ Ma dər ola awa du-təsaxsalam day azzaman win di? Əngəm aratan as əmərədda sikarakadan-kawan, fəlas təsəlkamt-nasan təməttant?

²² Mişan əmərədda dad zamas təddərfam day bakkadan təqqalam eklan ən Məşşina wədi tazdak a du-za-təssəxsəlam, amaran təsəlkamt-nawan təməddurt ta təxlalat.

²³ Fəlas ərruzmatan n abakkad təməttant, mişan təhəkkut ta danağ-issənsə Məşşina təmos arraxmat-net, təməddurt a tat-imosan ta təxlalat day tassağ d Əməli-nana Əlməsix Yaysa.

7

Nəddirfa day əşşəriya wa danağ-obazan

Nəddirfa day awa danağ-issəwar əşşəriya

¹ Awak masnat a wər təgəm ya imədrayan-in as əşşəriya wər ilzem ar aytedan win əddarnen? Əssənağ as əhân-kawan salan n əşşəriya.

² Əmmək en day as tantut təzlâfat iket iddar aləs-net osağ-qat dər-əs əşşəriya. Mişan as aba aləs-net ad taddafart day əşşəriya was kala a tan-osağ.

³ Day adi as imos as harwa ad iddar aləs-net a tat-izlaf aləs iyyan, wədi əzzəna a təga, mişan as aba aləs-net wədi təddərfa day əşşəriya. Əddi kud tat-izlaf aləs iyyan da wər z'itəwənnu təga əzzəna.

⁴ Əmmək en da a təmosam kawanay da ya imədrayan-in: kawanay da aba-kawan day batu ta n əşşəriya wa n Əttawret əs tarrayt ta n tağəssa n Əlməsix. Əmərədda təhâm təla iyyat taynayət a tat-imosan ta n Wa d-inkaran day nəmməttan fəl a du-nəsaxsal tənfa day tarrayt ta n Məşşina.

⁵ Harwa ad nəlkâm i deranan ən wallan-nana, əhân-anax arak deranan win d-itaway əşşəriya, əttâfan tanat ən təsəllad-nana fəl a du-nəsaxsal aratan win tawaynen əs təməttant.

⁶ Mişan əmərədda, nəddirfa day əlxəkum wa n Əşşəriya, ab-ana day batu n aratan win danağ-əganen day təla. Day adi nəfrâğ ad nəxbəd Məşşina əs təməddurt taynayət əs tarrayt n İnfəs wa Zəddigan, wərgəç s anamod wa irəwan n əşşəriya wa n Əttawret imosan arət igmâdan.

Assa n əşşəriya d ənəfilal n abakkad

⁷ Ma za nannu daɣ adi? Awak əşşəriya imitalla d abakkad? Kala kala! Mišan ya əşşəriya ənta a di-izzəzdayan abakkad, id ənnar wər inna əşşəriya: «*Ad wər tagay attama-nak day ares n awedan.*» Wər z'əssənəy awa imos almaɣna n igi n attama daɣ ares n awedan.

⁸ Əmmək en daɣ as issolam abakkad daw alwajiban, təzzar iga-du daɣ əwəl-in arak deranan as tu-wər-illa a daɣ wər əgen. Fəlas as tu-wər-illa əşşəriya, wədi abakkad da zun as immut.

⁹ Dat awa harwa a tu-wər-illa əşşəriya nak əddâra. Mišan assaya wa d-osan alwajiban ənta ad iqqal abakkad arat iddâran,

¹⁰ nak amaran ab-i. Alwajiban win as a ihoran âs təməddurt as ətawayan, nak təmattant as di-ewayan

¹¹ fəlas abakkad a issolaman daw alwajib n əşşəriya, issəxrak-i inɣ-i sər-əs.

¹² Daɣ adi əşşəriya i zəddigan, alwajib deɣ zəddîg oɣâd olâɣ.

Təməddurt ta n ləkkum y əşşəriya

¹³ Awak nak arat olaɣan a di-iqqalan təmattant? Kala kala! Abakkad a imosan əssəbab n awen kul. Daɣ adi abakkad isannafalal-du awa imos əs tidət. İşşəɣal awa olaɣan fəl a sər-i d-awəy təmattant. Əmmək en daɣ âs tarrayt n alwajib as tənafalal tallabəst wər nəla əddukad ta təhat abakkad.

¹⁴ Nəssân as əşşəriya Infas ən Məşşina a d-ifal. Mišan nak awedan a əmosa wər nəlkem ar i deranan-net. Ənzəɣ-in əmosa zun akli n abakkad.

¹⁵ Fəlas awa tagga wər t-əgre. Arat wa areɣ wər tu-təgga, amaran arat wa əkyada ənta a tagga.

¹⁶ Amaran as imos as taggaɣ awa wər əre, wədi əqbâlay as əşşəriya olâɣ.

¹⁷ Əmərədda wərgəɣ nak a itaggin awen, kalar abakkad wa daɣ-i iɣsaran a t-itaggin.

¹⁸ Fəlas əssânəy as arat wa olaɣan wər daɣ-i iɣser, almaɣna wər iha taɣəssa-nin. Əfrâga tara n awa olaɣan, mišan wər əfregəɣ əmazal-net.

¹⁹ Wər təmiziləy awa olaɣan s ənta a areɣ, kalar awa wər noleɣ a tamazala s ənta a wər areɣ.

²⁰ As imos as tamazaləy awa wər areɣ, wədi wərgəɣ nak a t-itamazalan, kalar abakkad wa di-izdayan.

²¹ Əmmək en daɣ as d-əgreɣ as: Id areɣ igi n awa olaɣan, a dat-i d-iməl awa wər noleɣ.

²² Əfrâya daɣ əwəl-in y as areɣ əşşəriya ən Məşşina,

²³ mišan əfrâya dağ təsəllad-in y əşşəriya iyyan ibbil-lanan d əşşəriya wa əqbalan man-in. Emmək en dağ as əqqalağ akli n əşşəriya wa n abakkad ihân şisəllad-in.

²⁴ İket ağşud ən man igrav-i! Ma di-za-assafsin dağ təxəssa tas təsəlkamt-net təmattant?

²⁵ Təmmalen i Məşşina əs tarrayt n Əməli-nana Yaysa Əlməsix! Dağ adi əs tayttay-nin za əmosağ akli n əşşəriya ən Məşşina, əs təxəssa-nin amaran əmosağ akli n əşşəriya wa n abakkad.

8

İnfəs ən Məşşina ihakk-ana təməddurt taynayət

Təməddurt ta danay-ihakku İnfəs ən Məşşina

¹ Adi a fəlas əmərədda ab'as t-illa attadib i win ərtaynen d Əlməsix Yaysa.

² Fəlas tarna ta n İnfəs wa ihakkin təməddurt ihân Yaysa Əlməsix təsiddarfət-kay dağ tarna ta n abakkad əd təmattant.

³ Əşşəriya wa n Əttawret wər ifreg igi n awen, fəlas igdal-as-tu rəkkəm ən təxəssa n aggadəm. Adi a fəl d-issəgla Məşşina Barar-net iman-net iha təxəssa zun ta n nasbakkadan a nəmos, iqqal takutay ta təmmasat ibakkadan id Məşşina a t-itəwwəddaban dağ adag-nana. Emmək en dağ as z'izzərəz tarna ta fall-anay ila abakkad.

⁴ Arat wen ig-ay fəl ad nəfrəg əmazal n Əşşəriya wa n Əttawret əs təməwit toxadat nakkanay win əlkamnen i tara ta n İnfəs wa Zəddigan, wərgex ta n aggadəm.

⁵ Aytədan win əlkamnen i tara ta n aggadəm, win di imedranan əd deranan win aggadəm a taggin, amaran win əlkamnen i tara ta n İnfəs wa Zəddigan, win di imedranan əd deranan win İnfəs wa Zəddigan a taggin.

⁶ Ləkkum i medranan əd deranan win aggadəm təmattant as itaway, amaran ləkkum i medranan əd deranan win İnfəs wa Zəddigan, təməddurt taynayət as itaway d agaraw n alxer xur Məşşina.

⁷ Fəlas imedranan əd deranan win aggadəm əzzingen Məşşina id aggadəm wər ibbərdağ y əşşəriya wa n Məşşina, amaran wər t-ifreg.

⁸ Aytədan win əlkamnen i deranan ən təxəssa-nasan wər əfregan gərrezat i Məşşina.

⁹ Kawanay, as imos as izdâğ-kawan İnfəs ən Məşşina wədi ab-as təlkamam i medranan əd deranan n aggadəm, kalar win İnfəs wa Zəddigan as təlkamam. Awədan wa wər iha İnfəs wa n Əlməsix, wədi wərgex i n Əlməsix.

¹⁰ Mišan as imos as tərtaşyam d Əlməsix, wədi kud imos as tayəssa-nawan təsəlkaht-net tēmattant fəl əddəlil n abakkad, da Infas wa Zəddigan ikfiwan tēməddurt taynayət fəlas aytedan oğadnen a təmosam dat Məşşina.

¹¹ Şixəswen-nawan təsəlkaht-nasnat tēmattant; dər iga awen da ya as imos as ih-iwan Infas ən Wa d-issənkaran Ƴaysa Əlməsix day tēmattant, wədi Wa d-issənkaran Ƴaysa Əlməsix day tēmattant ad agu tēməddurt taynayət day təxəswen-nawan s Infas-net Zəddigan a kawan-ihân.

¹² Day adi, imədrayan-in, əllan-tu aratan a danağ-əhhişşalnen, mišan wərgex day anamod wa n deranan n aggadəm əranen ad nəlkəm y awa əran man-nana.

¹³ Fəlas as təgam tēməddurt təlkahtmam y awa əran man-nawan, wədi a kawan-iba təggəzam Jahannama. Mišan as toyam imazalan win əran man n aggadəm, təlkahtmam i win ira Infas wa Zəddigan a kawan-ihân, wədi ad təddəram har faw.

Məşşina ig-anay bararan-net əs tahakkay ta danağ-iga Infas-net di Zəddigan

¹⁴ Fəlas aytedan kul win day innoda Infas ən Məşşina, win di bararan ən Məşşina a mosan.

¹⁵ Infas wa təgrawam əddi, wər kawan-iga eklan, wər tu-təgrewam fəl a taglim tah-iwan tasa, kalar təgrāwam-tu fəl a təqqəlam bararan ən Məşşina. Infas en day a sər-na d-ewayan as nədkâl imaslan-nana nəgannu i Məşşina: «Abba! Abba!»

¹⁶ Infas wa Zəddigan əd nakkanay iman-nana a tagayyat-nen as nəmos bararan ən Məşşina.

¹⁷ Amaran, dad zamas bararan ən Məşşina a nəmos, wədi iməkkusa n arraxmaten-net a nəmos, amaran nədrāw təkəsit ten d Əlməsix dad zamas nəddew dər-əs day alğazab fəl ad nəgrəw tədagart-nana day tanaya-net.

Infas əd tanaya win d-əzaynen

¹⁸ Iga Ƴur-i âs alğazab wa nətaggu əmərədda wər ewed wala day tanaya ta dana-du-z-isənnəfiləl Məşşina.

¹⁹ Awa d-ixlakan kul ikna əddəguz day anay n alwaq wad z'isənnəfiləl Məşşina bararan-net.

²⁰ Fəlas awa d-ixlakan kul iggâz təla ən taymar ta n tərbənnan. Wərgex əntanay a əranen awen, kalar Məşşina a tan-igan day fassan ən taymar ten. Ill-ay attama n

²¹ as taxlək ten ənta iman-net da ketnet ad taddarfət day əhluk wa təga imosan əkkəlu, fəl ad əgrəwan əntanay da əlləllu igân day tanaya ta z'əgrəwan bararan ən Məşşina.

²² Amaran nəssân wəllen as har harwa da taxlək ketnet təddew day təhənəffa əd təlawayt zun təntut tətəggəzət amzur.

²³ Mišan wərgex əntanay ɣas a tihənəffitnen, nakkanay a əgrawnen Infas wa Zəddigan imosan tədəgart ta tazzarat daɣ təhək ən Məššina, da nətihənəffit daɣ man-nana nəkna əddəguz daɣ a danax-agu Məššina bararan-net akf-anax tədarfit təkmâlat.

²⁴ Fəlas nəgrâw efsan, s attama wa nəga. As nəhannay awas nəga attama-net, wədi ab'as imos attama. Ma imos wa z'agin attama n arat ihannay?

²⁵ Mišan as nəga attama-nana daɣ awa wər nəhənnəy, wədi a das-nəqqəl əs zəmmerat.

²⁶ As nəga awen a d-asu Infas wa Zəddigan idhəl-ana daɣ rəkkəm-nana fəlas nakkanay wər nəssen arat was ihor a tu-nansəy daɣ təwatriwen-nana. Mišan Infas wa Zəddigan iman-net itaggu šihənəffa as wər ifreg awedan emel-nasnat.

²⁷ Amaran wa itamayyan iwəllan, issân awa təmos ənnəyat n Infas wa Zəddigan id ənta agna wa n Məššina as itattar s esəm ən məzzəgzan.

²⁸ Amaran nəssân âs aratan kul əmosan tənfa n aytedan win əranen Məššina tiwaxran-du deɣ əs tarrayt-net.

²⁹ Fəlas win isannafran harwa daɣ tizarat win di otâs-asan ad əqqələn əlmital ən Barar-net, fəl ad iqqəl Barar-net en ayafadday daɣ bararan aggotnen.

³⁰ Amaran win as otas Məššina teɣaray-nasan kala da, win di iɣr-ên, amaran ig-en aytedan oɣâdnen, ikf-en deɣ tanaya.

Ikus n aššak daɣ tara ta danax-iga Məššina

³¹ Daɣ adi ma za nannu daɣ batu ta? As imos as Məššina iwâr aganna-nana, ma ifragan ad iqqəl əllid-nana?

³² Məššina as Barar-net an iyyanda da wər t-oyya, kalar ikf-ay fəl əddəlil-nana ketnana, manəmmək as dana-wər-z-akfu arat kul s arraxmat-net, nədrâw awen əd Barar-net?

³³ Ma z'abəzan s əššəriɣa aytedan win isannafran Məššina? Awak aytedan win, wərgex Məššina a tan-ikfan taqqat.

³⁴ Ma imos za wa tan-z-abəzan s əššəriɣa? Əlməsix [Yaysa] iman-net as t-aba, amaran wərgex awen ɣas, kalar itawasankar-du daɣ təmattant. Iha əmərədda ayil ən Məššina imos almawakkil-nanax a danax-itaggin šiwatriwen.

³⁵ Ma ifragan a danax-izəmməzzəy əd tara n Əlməsix? Awak təssust? Məx təməxatirt, məx ətəwədgaz, məx gələk, məx zəlləm, məx igguz n alɣarar ən tamattant, məx takoba?

³⁶ Ənnan Əlkəttaban: «Tâwakkasan daɣ-na man əzəl kul fəl əddəlil-nak. Nətiwaxsab zun ayfəd tawagzammen.»

³⁷ Mišan dağ awen ketnet nəğarraw tarna ta toğarat əs tarrayt ən wa danağ-iran.

³⁸ Fəlas əkkasağ aşşak as gər za təmattant, wala təməddurt, wala angalosan win əmməzraynen Məşşina, wala tağmaren n əşşur şin əhanen ətənkul, wala azzaman win nəha əmərədda, wala azzaman win d-əzaynen, wala şığurad,

³⁹ wala awa ihan afalla, wala wa ihan eres, wala arat waliyyan a d-ixlâkan, xasil wər t-illa a ifragan a danağ-izəmməzzəy əd tara ta danağ-isannafalal Məşşina əs tarayt n Əməli-nana Əlməsix Ƴaysa.

Əlinjil d Israyil: Edag wa ittaf Israyil dağ attarix n əlxillas

9

Tarna ən Məşşina tosâ-du əs tarrayt n Israyil

Iduf wa iga Buləs i Kəl-Israyil dağ əwəl-net

¹ Tidət a əmmala s esəm n Əlməsix, wər tægga bahu, iman-in əggəyyen-i fəl awen əs tarrayt n Infas wa Zəddigan.

² Əğşâdan man-in wəllen, əşşiwaşa değ wəllen.

³ Awalla wər di-ikma ilğan-i Məşşina ammazzaya d Əlməsix fəl əlxillas ən kəl tamet-in d aytedan win di-erawnen,

⁴ a tan-imosan Kəl-Israyil. Əntanay a əlanen almaqam ən tişit ən bararan ən Məşşina win d-iskat i man-net. Əntanay değ a mosnen aytedan win dağ du-tənafalal təmüst ən Məşşina əs tanaya, nafalalan-du değ dağ-san arkawalan ən tassağ, əd təhəkkut ta n Əşşəriğa, d əlxibada, d arkawalan.

⁵ Əntanay değ a mosnen əzzurrəyya ən marawan-nana win ərəwnen, Əlməsix değ imos iyyan dağ-san əs tişit-net aggadəm. Əlməsix s ənta a illan dənnəg əkkulluk n arat, imos Məşşina. Attamalet esəm-net har faw! Amin!

Awa imos akal wa n Israyil

⁶ Arat wen wər imos almağna-net as awal ən Məşşina abas ila almaqam. Kala kala! Ənta ya wərgəğ aytedan kul win d-əğmadnen Israyil a mosnen Israyil.

⁷ Win d-əğmadnen İbrahim değ wərgəğ kul əmosan bararan-net, kalar a inna Məşşina y İbrahim dağ Əlkəttaban: «Aytedan win d-əğmadnen İsəhaq a z'iqqələn əzzurrəyya-nak.»

⁸ Almağna n awen as wərgəğ bararan win əhəwnen əs təməwit ta n aggadəm a mosnen bararan ən Məşşina. Kalar bararan win əhəwnen əs təməwit ta tənəmännakat

d arkawal ən Məššina, əntanay a ixsab Məššina dağ əzzurrəyya n Ibrahim.

⁹ Ənta da awa inna arkawal: «*A kay-d-əqqəla adan a da əznin, əddi da tamahharak-nak Sarata təla barar.*»

¹⁰ Amaran wərgəx awen xas. Awen dağ a təğa Raqqiyetu, ənta da əššin bararan ən yayyan n eknewan a təla, amaran ketnasan aljad-nanağ Isəhaq a dər tan-təla.

¹¹⁻¹² Məššina ila tarrayt-net tas isanafran aytedan. Əsənnəfrən-net aytedan ilkâm i tağaray ta tan-iga əs tarrayt-net, wərgəx imazalan-nasan. Fəl ad isattaddu tarrayt ta d-iga den, təmosat arat isinafran, inna i Raqqiyetu harwa da wər əhəwan bararan-net, wər əknen wala za wər t-əğşedan: «*Wa waššaran ad iqqəl akli ən wa əndarran.*»

¹³ Inimannak awen d awa ihan Əlkəttaban as ənnan: «*Arex Yaqub, əkyâdağ Esaw.*»

Məššina ənta məššis ən tarna oğâdan

¹⁴ Dağ adi ma za nannu y awen? Awak Məššina wər oğed? Kala kala!

¹⁵ Fəlas a inna i Musa: «*Ad hənəttəy i was arex a das-hanəttəy, ilalay i was arex a das-ilala.*»

¹⁶ Emmək en dağ as arat wen wərməd iqqân dağ wa ira awedan, wala aratan win as ozal dağ agamay-nasan. Kalar wər iqqen ar dağ Məššina di n əməhhenən,

¹⁷ s ənta a innan i Firxawna dağ Əlkəttaban: «*Ənəy! Əkfeq-qay almaqam fəl ad assakna tarna-nin əs tarrayt-nak, tagu masnat fəl esəm-in dağ əddənət ketnet.*»

¹⁸ Dağ adi Məššina itihənəttit i was ira, isagarmam əwəl ən was ira.

¹⁹ Amaran əssânağ as a di-tanna: «*Mafel [dağ adi] Məššina harwada itabaz aytedan əs mazalan-nasan, dad zamas wər t-illa i ifrâgan əməzrəy ən tara-net?*»

²⁰ Fadda, kay aggadəm, ma təmosağ as təşarraya əd Məššina? Awak talaq təfrâg ad tannu i wa sər-əs işaqqalan: «*Mafel tətəggağ-i əmmək wa?*»

²¹ Awak akanaw wərgəx ənta a ilân talaq itaggu sər-əs ikassan âs wiyyad za tiwasansan y əzəl a sər-san iskâtan, win hadatnen amaran tiwasataymalan əzəl kul?

²²⁻²³ Emmək en dağ a əgan aratan win isammatag Məššina. Iga dər-na təzaydart tagget nakkanay a əhornen d əhluk fəlas ira ad isənnəfiləl alham-net əd tarna-net. Ira değ ad isənnəfiləl y aytedan wiyyad tanaya-net wər nəla əddukad. Aytedan win den əntanay as ihanattat, əntanay değ a isammatag kala da, y a dər-əs ərtəyan dağ tanaya-net.

Məššina iyra Kəl-Əlyəhud d aytedan win tan-wər-nəmos

²⁴ Aytedan win den nakkanay a tan-imosan. Ixr-ana-du Məššina day Kəl-Əlyəhud, ixr-ana-du dey day win wər nəmos Kəl-Əlyəhud.

²⁵ Awen day a ihan əlkəttab wa n ənnəbi Osay as inna: «Win wər nəmos tamattay-nin, a tan-d-ayrayx aga-qan "tamattay-nin". Win wər nəmos win əkney tara, a tan-aga "win əkney tara".

²⁶ Amaran idaggan win day dasan-itawannu: "Wər təmosam tamattay ən Məššina!" Idaggan win di da a day dasan-z-itawannu "bararan ən Məššina di iddaran".»

²⁷ Ənnəbi Isayas dey iktâb day batu n Israyil as: «As əgan maddanəs n Israyil igət wa n təblalen n amaḍal, arat day-san yas a z'afsin.

²⁸ Fəlas Amaylol ad assandu awal-net fəl əddənet əs təməwit təkmâlat tətrabat.»

²⁹ Zun batu ta iga ənnəbi Isayas dat awen as inna: «Kundaba as Əməli di ilan tarna a day-na d-iglazan amasa, wədi ad nəqqəl zun Sədom, nalu əd Gamora.»

Awa iwaran aggadəm d awa iqqalan Israyil day azzaman win əmərədda

Agaraw ən taqqat s əzəgzan wərgex əs mazalan

³⁰ Ma za nannu day adi? Aytedan win wər nəmos Kəl-Əlyəhud wər əglayan day agamay ən taqqat mišan əgrawan-tat əs tarrayt n əzəgzan-nasan.

³¹ Kəl-Israyil amaran a gammaynen a d-əssəkməlan ləkkum y əššəriya fəl ad əgrəwan taqqat, indar-asan.

³² Ma d-ewayan za awen? Adi za iba n agamay-nasan taqqat ten əs tarrayt ta n əzəgzan, əgmayan-tat əs mazalan-nasan. Tənkaf-asan təhunt ta təsagadlit.

³³ Təhunt ten təmmittal Elməsix, amaran ənnan Əlkəttaban day batu-net: «Ənəyat, əssinsa day Səyon təhunt təmosat təsənkəft, təmos dey təsəlit tətagadlit aytedan. Mišan awedan wa sər-əs izzəgzanan wər z'ikərukəd.»

10

¹ Imədrayan-in, əkney deren n ad əgrəwan Kəl-Israyil efsan, amaran awen day a tansaya Məššina faw day təwatriwen-in.

² Fəlas əggəyyey əs əglāyan day batu ta n Məššina mišan wər əssərtayan awen əd masnat.

³ Wər əgren təməwit tas ihakku Məššina aytedan taqqat, a tat-gammayan əs mazalan-nasan. Əmmək di day əs wər əbbərdəgan i Məššina, ugayan əs ləkkum i tarrayt tas ihakku Məššina taqqat.

4 Əlməsix ənta a imosan təsəxtəmt n əşşəriya y ad iqqəl as aytedan kul win sər-əs əzzəgzannen ad əgrəwan taqqat dat Məşşina.

Efsan s əzəgzan, wərgex əs ləkkum y əşşəriya

5 Arat da wa iktab ənnəbi Musa dağ batu ən taqqat ta tətawagrawat əs ləkkum y Əşşəriya wa n Əttawret: «Awedan kul wa d-issəndan əşşəriya, wədi ad igrəw təməddurt s əssəbab n əşşəriya.»

6 Mişan ənta da əmmək was tətawagraw taqqat əs tarrayt ta n əzəgzan: «Ad wər təganna dağ man-nak: "Ma z'əggəzayan əs jənnawan?"» Awak Əlməsix wərgex izzibbat-du?

7 Madex tanna: «Ma z'əzzabben iggəz imawetan n amadal?» Awak Əlməsix wərgex inkar-du dağ təmattant?

8 Awak ma inna Awal ən Məşşina dağ batu ta? A inna: «Awal ihoz-kay, iha imi-nak, iha əwəl-nak,» amaran awal wa batu n əzəgzan a dağ işşewal, ənta deş as nətaggu təlxutbat.

9 As təşşewala təqbalay as Ƴaysa imos Əməli, təzzəgzana dağ əwəl-nak as issinkar-t-idu Məşşina dağ təmattant, wədi kay təgrəwax efsan.

10 Fəlas awedan wa izzəgzanan dağ əwəl-net, wədi ad t-akfu Məşşina taqqat. Amaran wa işşewalan imal əzəgzan-net, wədi ad t-akfu Məşşina efsan.

11 Ənnan Əlkəttaban: Awedan kul wa «fall-as iffəllan iga dağ-as attama-net, wər ilkem ad ikirakad.»

12 Wər izlay wa imosan Ag Əlyəhud wala wa tu-wər-nəmos. Ketnasan Əməli-nasan iyyanda, ihakkin s əlləllu-net taggast y aytedan kul win dağ-as tat-əgməynen.

13 «Fəlas awedan kul wa igməyan taggast dağ Əməli, wədi ad igrəw efsan.»

Kəl-İsrayil wər əzzəgzanan s Əlinjil

14 Məni za əmmək was z'əgməyan taggast dağ was wər əzzəgzanan? Məni əmmək was sər-əs z'əzzəgzənan wər əslən y awal-net? Məni əmmək was das-z-aslin da wər t-illa i dasan-t-imalan?

15 Məni əmmək was tu-z-əməlan aytedan a dasan-t-əmalnən as imos as wər t-illa i tan-issiglan? Ənnan Əlkəttaban: «Iket šihussay əganat-tanat takkolen n aytedan win əmmalnən isalan n alxer a imos Əlinjil!»

16 Mişan wərgex Kəl-Əlyəhud kul əbbirdagan y Əlinjil. Inna Ənnəbi Isayas: «Əməli, məni wa izzəgzanan s awa nanna?»

17 Dağ adi, isalan win as nəsla, əntanay a du-tawaynən əzəgzan, amaran awal n Əlməsix a əmosan.

18 Mišan əsəstan da wa tagga: Awak Kəl-Əlyəhud wər əslen y awal wen? Wəllen za as əslân-as. Ənnan Əlkəttaban: «*Əməsli-nasan təsl-as əddənet ketnet, awal-nasan əruru n amaǰal ketnet ewâd-tu.*»

19 Əlasax əsəstan harwa da ənne: Awak tamattay n İsrayil masnat a wər təga daǰ awen? Ənnəbi Musa a dasan-timalan əs tizarat. Inn-asan: «*Inna Məşşina, a kawan-agay inəmmənzax ən win âs tamattay da wər tat-əmosan, aknay daǰ-wan igi n alham ən tamattay wər nəla tayttay.*»

20 Ənnəbi İsayas fadda a dasan-innan əs təholat: «*Əgrawan-i win di-wər-nəgəmməy, sannafalalay iman-in i win di-wər-nonsay wala.*»

21 Mišan daǰ batu ta n Kəl-İsrayil inna: «*Əzəl kul əzzâlay əfus-in ǰarra tamattay təmosat inəmməzray ən nəffəllag.*»

11

Tarrayt ta d-iga Məşşina d awa d-izayan İsrayil

Məşşina isinafran i man-net aytedan win d-əggolaznen

1 Ənne daǰ adi: Awak Məşşina agamad a iga batu ən tamattay-net? Kala kala! Fəlas nak iman-in iyyan daǰ Kəl-İsrayil a mosa, əmosax ahaya n İbrahim, əgmâda-du tawşet ta n Benyamin.

2 Məşşina wər igmed batu ən tamattay-net as irəw as tat-isannafran. Əngəm təkittəwam awa ənnan Əlkəttaban daǰ batu n ənnəbi İlyas assaxa wad eway tala-net əs Məşşina daǰ batu ən Kəl-İsrayil?

3 Inna i Məşşina: «*Əməli, ənyan ənnəbitan-nak, jabbaraj-jen idaggan-nak win təkutawen, wər d-iqqim ar nak, amaran gammayan d a daǰ-i əkkəsan iman.*»

4 Təssânam za awa das-ijjəwwab Məşşina? Inn-as: «*Əsinafranax i man-in əssa gim n aləs wər nəssəjad dat əssənəm wa igan Baxal.*»

5 Zund əmmək en daǰ as daǰ azzaman win nəha əmərədda əggolazan-du aytedan isinafran Məşşina s arraxmat-net.

6 Daǰ adi, dad zamas arraxmat-net as tan-isannafran, wədi wərgəǰ fəl əddəlil ən mazalan-nasan, madəǰ amaran iqqəl as arraxmat ab-as təmos arraxmat.

7 Ma igan daǰ adi? Kəl-İsrayil wər əgrewan awa gammayan. Wər daǰ-san t-igrew ar win isannafran Məşşina. Win hadatnen amaran tawaggan aytedan as garmoman wallan-nasan,

8 inimannak awen d awa ənnan Əlkəttaban as ənnan: «*Ikkas-tan Məşşina daǰ əlxəyyar ən man-nasan, ikf-en*

šittawen wər nəhənnəy wala, ad təməzzugen wər nəsalu har azalada.»

⁹ *Ənnəbi Dawəd dey inna: «Əqqəlānet-asan mensewan-nasan taftaw, əqqəlān sangay a tan-z-ibəzan. Əqqəlānet-asan aḡadal, əḡrəwanet attadib wa dər əhoran.*

¹⁰ *Alsinet šiyyay šittawen-nasan, igmədet-tan asawad-nasan. Kərənbəwanet roran-nasan har faw!»*

Edag wa əhan Kəl-Əlyəhud d aytedan win tan-wər-nəmos daḡ tarrayt ta d-iga Məššina

¹¹ *Ənne daḡ adi: Awak Kəl-İsrayil nigartattafan y ad uden har faw? İgməd aššak as wərgəy awen. Mišan təmazrəyt-nasan a du-tewayat as əḡrawan aytedan win wər nəmos Kəl-Əlyəhud efsan fəl ad əḡḡəznat təsmiten Kəl-İsrayil.*

¹² *Wala təmazrəyt-nasan təqqal tənəfləyt y əddənət, ətəwərna-nasan dəy iqqal tənəfləyt i win wər nəmos Kəl-Əlyəhud, əngəm in za as d-əḡradan əsənəd əbdadan-du?*

¹³ *Əmərədda kəwanay win wər nəmos Kəl-Əlyəhud as əššəwala: Nak anammazul a mosa s aytedan win wər nəmos Kəl-Əlyəhud amaran əssiḡmaray əššəḡəl wen,*

¹⁴ *har əs as imməkkan awen a d-awəya šismiten s aytedan win tawšət-in əfsin daḡ-san wiyyad.*

¹⁵ *Fəlas as iqqal as ətəwəkkas-nasan əs tama eway-du amaknaw daḡ əddənət, əngəm in za ətəwəsuyal-nasan? Wər t-illa a dər z'alu ar tanakra daḡ təmattant.*

¹⁶ *Amaran as imos as tadagart ta tazzarat daḡ təḡəlla təkāt i Məššina, wədi awa daḡ-as in-iqqiman ketnet da in Məššina. As imos as dəy ikewan tiwaskatan i Məššina, wədi ilədlad da tiwaskatan-as.*

¹⁷ *Əlmital en daḡ a əhan Kəl-İsrayil: İlədlad wiyyad a dintawakarammatnen daḡ ašək. Kay amaran wa wər nəmos iyyan daḡ Kəl-İsrayil, təmosa zun ələdlid ən zaytun n əsuf, təzzar tətawagga daḡ adag-nasan. Daḡ adi kay da tədrāwa dər-san isudar olāḡnen win du-nakkasan kewan n azzaytun wa itawanbalan den.*

¹⁸ *Dər iga awen da ya, ad wər talkay ilədlad win dintawakarammatnen. Amaran as kay du-təḡḡaz ənnəyat ən zazwar ən man-nak, takta-du as wərgəy kay a ilan ikewan, kalar ikewan a kay-ewaynen əkbālan-kay.*

¹⁹ *Ad tanna daḡ adi: İlədlad tawakarammen-in fəl ad əḡḡəzay edag-nasan.*

²⁰ *Tidət as ətəwəkərəmma a din-əgan lədlad win den fəl iba n əzəḡzan. Kay amaran təddara s əzəḡzan-nak. Ad wər tagay imedranan əmosnen zazwar ən man, kalar əqqəl əmiksad ən Məššina.*

²¹ Fəlas dad zamas Məššina wər oyya ilədlad win dər d-ixlak ašək, wədi kay da wər kay-z-ayyu.

²² Dağ adi əssən fəl əlluğ ən Məššina, əd tallabast n alham-net. Tallabast n alham-net isakn-et i win nəmməzray, əlluğ-net amaran isakn-ak-ku, iket təzizawe dağ tarrayt n əlluğ wen. As wər təgeğ adi, wədi kay da a din-tətəwəkərəmme.

²³ Kəl-Əlyəhud da as oyyan tarrayt ta n iba n əzəgzan a du-təwəsuyəlan ašək, fəlas Məššina ila tarna n a tan-d-iləs əsuyəl n ašək wen.

²⁴ Dad zamas kay tətawakaramme-du dağ ašək ən zaytun n əsuf, tətawaggay ələdlid ən zaytun wa n ənebəl olāyan, manəmmək as du-wər-za-təwəsuyəlan əntanay da təwəggin dağ azzaytun wa dağ d-əxlakan?

Əlyillas wa d-izayan Kəl-İsrayil

²⁵ Imədrayan-in, wər areğ a dawan-ijhâl əssir wa, fəl ad wər təxilam təlâm masnat iyyat zəwwərat. Edes ən Kəl-İsrayil wər z'ammazzayan ad əffillagan iket wər d-əxsəlan aytedan kul win wər nəmos Kəl-Əlyəhud əs Tağmar ən Məššina.

²⁶ Əmmək en dağ as z'igrəw İsrayil ketnet efsan id ənnan Əlkəttaban: «*Wa iğallasan a d-igməd Səyon, ikkəs inəmməzray dağ əzzurrəyya ən Yaqub.*

²⁷ *Ənta da da arkawal wa dər-san z'aga, assaya wa fallasan z'əkkəsəy ibakkadan-nasan.*»

²⁸ Dağ batu ta təqqalat tugəyt-nasan s Əlinjil, wədi Kəl-Əlyəhud əntanay a mosnen izənga ən Məššina fəl ad təgrəwam tənfa n awen. Mišan dağ batu ta təqqalat anafran wa n Məššina, wədi əntanay a mosnen aytedan win ikna Məššina tara fəl əddəlil ən marawan-nasan.

²⁹ Fəlas Məššina wər d-itəqqəl dağ təhəkkuten-net, za wər isəmməttəy anafran-net.

³⁰ Kawanay iman-nawan dat awa təmmizrayam Məššina mišan əmərədda ihanattat-awan s əssəbab ən təmazrəyt-nasan.

³¹ Zund əmmək en dağ as, dad zamas təmazrəyt-nasan ta n əmərədda teway-du as təgrawam əhənəttə, arət wədi iga fəl a dasan-ihənəttət Məššina əntanay da [əməərədda].

³² Fəlas Məššina ittâf aytedan kul dağ təmazrəyt fəl a tan-assaknu ketnasan təhanint-net.

Təmmalen i Məššina fəl masnat-net

³³ Ya Məššina! Təgərgist-nak, əd tayttay-nak əd masnat-nak wər əlenat əddukad. Əlxəkuman-nak wər t-illa i ifragan əsəggər-nasan, tarrayen-nak wər t-illa i ifragan əğərri-nasnat.

³⁴ «Məni wa issanan awa day isamadran Əməli? Məni was kala ad iqqal əməşşewwər-net?»

³⁵ Məni was kala ad iga i Məşşina tənəfust, əngəm iqqal as irwâs-tu tənəfust?»

³⁶ Arat kul ənta a d-ifal, ənta a d-ewayan as t-imal arat kul, ənta dəx a ilan arat kul. Igrəwet Məşşina adkul day azzaman kul har faw! Amin.

Əzəmmizəl n Əlinjil: Awa dər tətalu təməddurt n əlməsixi

12

Ammar s igi ən təməddurt ta n əlməsixi

Təməddurt təmmittayat fəl ta tərəwat

¹ Dağ adi əgmâya dağ-wan, ya imədrayan-in, fəl tişit ta iga Məşşina əməhhenən, ad takfim şixəswen-nawan əqqəlnat takutay təddarat, zəddigat, təgrəzat i Məşşina. Əmmək en dağ as za tagim i Məşşina əlxibada wa n tidət.

² Ad wər tayyim iman-nawan səmməttəyan-kawan azzaman win nəha da əmərədda, kalar ayyiwat iman-nawan a kawan-təşşinəy tayttay-nawan ta taynayət, fəl ad tagrim, tardim dəx s arat wa imosan tara ən Məşşina, a t-imosan: Awa olağan, d awa igrazan i Məşşina, d awa ikmalan.

Agiwat təməddurt âs akkiyyan dağ-wan imos aməşşayal ən win hadatnen, təşxəlam əs təhəkkuten ən Məşşina

³ Arat da wa ganna y akkiyyan dağ-wan s əssəbab n arraxmat ta di-iga Məşşina: Ad wər təqqəlam aytedan əzzizwarnen iman-nasan, kalar agiwat i man-nawan iduf igân s ənnəyat tolağât, ewâl awen s əzəgzan wa ikfa Məşşina y akkiyyan dağ-wan.

⁴ Akkiyyan dağ-na tağəssa iyyadda a ila, mişan təga dağ təsəllad aggotnen, amaran şisəllad şin den akkiyyat d əşşəxəl-net.

⁵ Əmmək en dağ as nakkanay nəggət, mişan tağəssa iyyadda a nəmos dağ tərətəyt d Əlməsix, amaran akkiyyan dağ-na imôs taslət dağ əljəməyat-nana.

⁶ Mişan nəgrâw şihəkkuten wər nola ewalnen s arraxmat ta tətawakfat akkiyyan dağ-na. As imos as igray iyyan dağ-na təhəkkut n emel y aytedan isalan a fall-as d-izazabbat Məşşina, işşəşəxəlet-tat ewâl awen s awa dər ogda əzəgzan-net.

⁷ Was təhəkkut-net tadhəlt n aytedan, idhəlet-tan. Wa igrawan təhəkkut n əsəssəxri, issasaxriwet.

⁸ Wa igrawan tişit n awedan italaman y aytedan fəl man, amazalet s awen. Wa igrawan tişit n awedan təha tahakkay,

akfet s əwəl iyyanda. Wa igrawan tizart agiwet tizart n əlməxsud. Wa itassanan dağ aytedan win mağatarnen, issənet dağ-san əs man filawasnen.

Agiwat təməddurt taha tara d əsəmmədrəy ən man əd tugəyt s a imosan təkma

⁹ Tara a tat-wər-təggəz təlmənufəqa. Əkəydat arat kul wa imosan təkma. Zəzzəwətat wəllen dağ əmazal n awa olağan.

¹⁰ Dağ batu ta təqqalat tara ta gər mədrayan, akkiyyan dağ-wan akniwet tara ən win hadatnen.

Dağ batu ta təqqalat sağmar, zuzərat tənfa ta n mədrayan-nawan i ta-nawan.

¹¹ Dağ batu ta təqqalat əşşəxəl, əqqəlat imaşşaxalan, wərgəx iməssəndad, təməhəndəret dağ-wan tamse ta tətakkasat sandad, a tat-imosan ta n Infas ən Məşşina, təxbədam Əməli.

¹² Dağ batu ta təqqalat igi n attama, fəliwəsət. Dağ batu ta təqqalat təssust, əqqəlat iməzəzzəydar. Dağ batu ta təqqalat şiwatriwen, ad wər tammazzayam d igi-nasnat.

¹³ Dahhalat imizdagan dağ addararaten-nasan, təqqələm aytedan iha aməgaru fawda.

¹⁴ Tattarat a igan albaraka y aytedan win [kawan]-ədgaznen. Ad wər tələxənam awedan waliyyan, kalar tattarat y aytedan.

¹⁵ As təggəzəm aytedan filawasnen, təfəliwəsəm kawanay da, as təggəzəm win hallinen, talim kawanay da.

¹⁶ Nəməggiwat iduf iyyanda gar-ewwan. Ad wər təgəmməyam almaqam i man-nawan, kalar gəmməyat awa wər nəla anay. Ad wər tagim iduf n as təməsəm imalan ən təyttay.

¹⁷ Ad wər təzzalam təkma əs təkma y awedan waliyyan. Gəmməyat awa olağan xur aytedan kul, a sər-əs tətəmazalam.

¹⁸ As immikkan awen, iket iqqan dağ-wan adi, iməlet-tu alxer gar-ewwan d awedan kul.

¹⁹ Ad wər təzəzalam i man-nawan, imaran-in, kalar ayyi-wat alham wa n Məşşina ad işxəl, fəlas ənnan Əlkəttaban: «*Nak a itabazan s əşşərixa, nak a z'ixkəman y awedan kul awa dər ihor; inna Əməli.*»

²⁰ Kawanay amaran arat da wa kawan-iwaran: «*As tənəyax azangaw-nak ih-ay gələk, taşşatşaq-qu; as t-iha fad dəx taşşaswaq-qu; fəlas as das-təgəx adi, zun as təssinsa fəl ayaq-net şiməkaten əryânen.*»

²¹ A dak-wər-ilkəm ad toyvey əşşur issəfəl-du dənnəg-ək, kalar əxləb əşşur s əmazal n awa olağan.

13

Əqqəlat kəl akal olâynen

¹ Awedan kul ilzâm-tu əbərdəg i muzaran n akal fəlas taymar kul Məşşina a du-təfal. Taymaren kul šin t-əllanen, Məşşina a tanat-issəbdadan.

² Awen dağ a fəlas awedan kul wa iffəllagan fəl əlxəkum n akal-net, awedan wədi ənnizam ən Məşşina a fəl iffəllag. Win əffəllagnen deγ a d-awəyan attadib əs man-nasan.

³ Imuzaran wər tan-iksud awedan wa itaggin awa olağan, kalar wər tan-iksud ar wa itaggin təkma. As tareγ a kay-təgməd tasa ən muzaran ad tətamazalaγ awa olağan, əddi a γur-san təgrəwaγ əlqəbulat.

⁴ Fəlas imuzaran n akal əşşəxəl ən Məşşina a əhan imosan tənfa-nak. Mišan as tətəggaγ awa wər noleγ, wədi iksad imuzaran fəlas wərgəγ bannan əlân fərregat n attadib əs təmattant. Məşşina a işşəşxalan imuzaran fəl ad tawaddaban aytedan win tamazalnen təkma, ewayan-du əs man-nasan alham n Əməli.

⁵ Awen dağ a fəlas təga addararat s ad abbardagan aytedan i muzaran. Wərgəγ təksəda n attadib γas a fəl danaγ-ilzam awen, kalar ənnəyat-nanaγ a dana-tu-təzəlzamat.

⁶ Əddəlil n awen dağ a fəl tərəzzamam amana fəlas win tu-garrawnen den Məşşina a tan-işşəşxalan fəl ad sənnəhəlan amaknaw n əşşəxəl wen.

⁷ Ərzəmat y awedan kul awa dağ-wan ila. Ərzəmat amana i wa dağ-wan t-ilan, tərəzəmam takəs i wa dağ-wan tat-iran, tiksadam was kawan-təwar təksəda-net, təssəxməram was kawan-iwar saγmar-net.

Tara n əşşəqqay-nak, ənta a təmosat əsəkməl ən ləkkum y əşşərixa

⁸ A tu-wər-iməl waliyyan dağ-wan itiwarwasan arat a iqqal. A tu-wər-iməl gar-ewwan ar ənəmərə, id awedan wa iran aytedan, wədi issinda-du əşşərixa ən Məşşina.

⁹ Fəlas alwajiban zun win ənnanen: «*Ad wər tagay əzzəna, wala tagay iman, wala takəra, wala tagay attamanak day ares n awedan*», d alwajiban kul win hadatnen, əxsəlan-du dağ alwajib iyyanda, wa innan: «*Agu y əşşəqqay-nak tara ta təgeγ i man-nak.*»

¹⁰ Awedan irān əşşəqqay-net wər ilkem a das-iga təkma waliyyat. Dağ adi tara, təssinda-du əşşərixa.

Agiwat təməddurt a daḡ təhâm ənnur fəlas tewaxlay n Əməli təhōz

¹¹ Daḡ adi, alwaq ewad-du əmərədda wa daq-qawan iwar ad tənkrəm daḡ etəs, fəlas efsan oḡar ihəz wa dana-d-əḡan əmərədda i wa dana-d-əḡan assaxa wa du-nəzzəḡzan.

¹² Ehad iglâ, ezal ihoz-du. Mazzayatana daḡ adi əd mazalan win šiyyay. Ettəfatana təzoli ta n ənnur.

¹³ Šikəlatana daḡ əzzəbun, zun as nəjiwankat ezal a mallan. Ad wər nəsasakay daḡ tattay wala tessay n esmad. Ad wər nətaggu əzzəna əd mazalan zizallatnen aggadəm, nənəməḡḡəḡ əd təmazaḡen əd manzaḡ.

¹⁴ Kalar təqqəlet təbdoq-nawan alxal wa n Əməli Ḡaysa Əlməsix. Ad wər tayyim tarrayt waliyyat y arak deranan win aggadəm annadin daḡ-wan.

14

Tara d ənəmənnak gər aytedan win ədrawnen əzəḡzan

Ad wər təxakkamaḡ y aytedan win dər tədrawax əzəḡzan

¹ Qabbalat aytedan win as irkam əzəḡzan-nasan. A dər-san wər tətamazaxam daḡ batu n idufan-nasan.

² Awedan iyyan iga iduf n âs təxalal-as tattay n arat kul. Iyyan as irkam əzəḡzan-net wər das-xalal âr tettay n annabatan win fərgan.

³ Wa itattin amensay, ad wər alku wa tu-wər-nətəttu. Wa wər nətəttu amensay deḡ ad wər issəwər lahan i wa t-itattin fəlas ənta da iqbâl-tu Məššina.

⁴ Ma təmosax as təxakkama y əkli ən wiyyad? Gər ibdâd wala uda, da məššis a təqqal batu ten. Mišan wər z'udu, kalar ad ibdəd, fəlas Əməli ila fərregat n akabal-net.

⁵ Awedan iyyan iga iduf n as əzəl iyyan oḡar ijilan win hadatnen, iyyan iga iduf n as ijilan kul olân ogdân. Awedan kul iwâr-tu ikus n aššak daḡ iduf wa iga.

⁶ Awedan wa izlayan ijilan, Əməli a fəl iga awen. Wa itattin amensay was ira deḡ Əməli a fəl iga awen, fəlas igḡoday i Məššina amensay wa itattu. Wa issəban fəl man-net imensewan wiyyad deḡ Əməli a fəl iga awen id ənta da igḡoday i Məššina.

⁷ Əssənət as wər danaḡ-iha i iddaran fəl əddəlil ən man-net wala deḡ i itiba fəl əddəlil ən man-net,

⁸ fəlas as nəddâr, wədi Əməli a fəl nəddar, as danaḡ-aba deḡ Əməli a fəl danaḡ-aba. Gər za nəddar wala deḡ ab-ana, Əməli a danaḡ-ilan.

⁹ Fəlas Əlməsix aba-tu, iqḡal-du təməddurt fəl ad iqḡəl Əməli ən win aba əd win əddarnen.

10 Amaran kay, mafel təxakkama y amadray-nak madey tolkeq-qu? Awak wərgəy ketnana kundaba nəbdad dat adag n əşşəriya ən Məşşina?

11 Fəlas ənnan Əlkəttaban: «*Inna Məşşina: "Nak əddâra, i d-ixlâkan kul kundaba issəjad dat-i, iləs dey kul kundaba iga təmmalen i Məşşina."*»

12 Emmək en dağ as akkiyyan dağ-na kundaba ibdad fəl mazalan-net [dat Məşşina].

Ədgəz day awa infan aytedan win dər tədraway əzəgzan

13 Dağ adi mazzayatana d ad nəxakkam imidawan-nana. Kalar akkiyyan dağ-wan idgəzet dağ ad inkəd y arət a z'isənnəgərtəffətan əmidi-net madey əggadl-ay dağ alxata.

14 Əssânağ, amaran əkkasağ aşşak dağ esəm n Əməli Ƴaysa as wər t-illa arət xaraman. Mişan as iga awedan iduf n as xaram fall-as arət iyyan, wədi a fall-as ixram.

15 As imos as təxşâda iman n amadray-nak dağ batu n amensay, wədi kay wər təşşokala dağ tara. Ad wər-təhləka imədrayan-nak dağ əzəgzan dağ batu ən mensewan fəlas Əlməsix iman-net as t-aba fəl əddəlil-nasan.

16 Dağ adi ad wər itəwənnu ark arət s aratan win as təgam iduf n âs olâğan.

17 Fəlas Tağmar ta n Məşşina wər təmos tettay wala tessay. Kalar taqqat a təmos d alxer əd təfalawist əs tarrayt n Infas wa Zəddigan.

18 Wa iğbadan Əlməsix s əmmək wədi, ad igrəz i Məşşina igrəw dey ətəwəsəğmar ħur aytedan.

19 Dağ adi gammayatana wəllen aratan win du-tawaynen alxer əd win dana-z-ilalnen s ad issuhət əzəgzan-nana ketnana.

20 Ad wər təcəbbərəjjeğ əşşəğəl ən Məşşina fəl batu ən mensewan. Tidət as amensay kul təxalal tattay-net, mişan təxaram tattay n amensay a du-za-tawəyat ad inəgərtəttəf awedan iyyan dağ əzəgzan-net.

21 Olâğ ad ayyu awedan tettay ən şan, ayyu tessay n esmad n alğanab, ammazzay d arət kul wa z'arzin əzəgzan n amadray-net.

22 Iduf wa dağ təkkaşağ aşşak dağ əwəl-nak, wədi ag-ay gar-ek əd Məşşina. Ibbilal wa ikkasan aşşak as wər t-obez əşşəriya s arət was iga iduf n âs ənta a oğadan!

23 Mişan awedan wa igan aşşak dağ awa itattu, wədi ibâz-tu əşşəriya id awa itaggu wər inamannak d əzəgzan-net. Amaran arət kul wa wər nənammannak d əzəgzan-nak wədi abakkad.

15

Edgəz daɣ tədhəlt n aytedan win dər tədrawəɣ əzəgzan

¹ Nakkanay as issohat əzəgzan-nanaɣ təwâr-ana zəmmerat i win as wər issohat əzəgzan-nasan, nayyu agamay n arat wa ərən man-nana.

² Akkiyyan daɣ-na iwar-tu ad igammay d ad igrəz y aytedan win dər idraw əzəgzan daɣ anamod n awa olaɣan imos awen agamay n awa tan-z-iššitin.

³ Fəlas Əlməsix da wər igmay awa das-igrazan, kalar ənnan Əlkəttaban: «*Ərrəbdan win dak-tawagginen əqqalan fall-i.*»

⁴ Amaran aratan win ənnan Əlkəttaban dāt əzəl, kul tiwaktaban fəl ad nəgrəw attama wa itawayan əs tarrayt ən zəmmerat əd təsasmit ən wallan-nana šin danax-əhakkin Əlkəttaban.

⁵ Əgmâya daɣ Məššina s ənta a du-təfal zəmmerat d allam fəl man a kawan-akfu təməddurt a daɣ tənimardam gar-ewwan daɣ təlkâmam y almasal n Əlməsix Ƴaysa.

⁶ Əmmək en daɣ as za tagim təmmalen ən tanaya ən Məššina di n Abba n Əməli-nana Ƴaysa Əlməsix, təgâm awen s ənəmənnak ən wallan d əməsli iyyanda.

Tinəməqbilat gar-ewwan zund əmmək âs Əlməsix osâ-du fəl əddəlil ən Kəl-Əlyəhud d aytedan win tan-wər-nəmos

⁷ Tinəməqbilat gar-ewwan zund əmmək as kawan-iqbal Əlməsix, tagim awen fəl saɣmar ən tanaya ən Məššina.

⁸ Illikan as Əlməsix iqqal amaššaɣal ən Kəl-Əlyəhud fəl ad isattaddu arkawalan win iga Məššina y aljadan-nasan, assaknu s awen as Məššina tidət a imos.

⁹ Osâ-du əntada fəl ad igrəw Məššina təmmalen ən tanaya-net ɣur aytedan win wər nəmos Kəl-Əlyəhud fəl əddəlil ən təhanint-net, zun awa ihan Əlkəttaban, as ənnan: «*Awen daɣ a fəl kay-z-əməla daɣ aytedan wər nəmos Kəl-Əlyəhud, agaɣ šigaytalen ən saɣmar-nak.*»

¹⁰ Ənnan dey Əlkəttaban: «*Tawšeten šin wər nəmos Kəl-Əlyəhud, agimat təfalawist ta təga tamattay ən Məššina.*»

¹¹ Ənnân dey: «*Agimat təmmalen y Əməli ketnakmat tawšeten šin wər nəmos Kəl-Əlyəhud, šimattiwen kul əməlnatet-tu!*»

¹² Ənnəbi Isayas da innâ: «*Ahaya ən Yasay a d-asu, ibdəd ixkəm fəl tawšeten šin wər nəmos Kəl-Əlyəhud, amaran ketnasnat a daɣ-as aginat attama-nasnat.*»

¹³ Əgmâya daɣ Məššina s ənta a ɣur d-iffal attama ketnet a kawan-akfu təfalawist d alxer əkmâlne əs tarrayt n əzəgzan-nawan fəl ad təsənnəhəlam agaraw n attama əs tarna n Infas wa Zəddigan.

Təsəxtəmt

Əşşəxəl wa iwaran Buləs əd šikilan win as otas igi-nasan

Əşşəxəl wa iwaran Buləs dağ batu n aytedan win wər nəmos Kəl-Əlyəhud

¹⁴ Dağ batu ta kawan-təqqalat kawanay, nak iman-in əkkasax aššak imədrayan-in, as təknam əlluğ təknam agaraw ən masnat, təfrâgam ad tətınəməsəsəxrim garəwan.

¹⁵ Dər iga awen da ya, kud ira annax əktabağ-awan-in əs taholat, fəl a kawan-d-asakta, əs tarrayt n arraxmat ta di-iga Məššina, arat əs kala da təssanam dağ-as.

¹⁶ Arraxmat ten təmos as di-iga amašşaxal n Əlməsix Ƴaysa dağ aytedan win wər nəmos Kəl-Əlyəhud. Taggağ əšşəxəl zəddigan s amel wa taggağ Əlinjil ən Məššina. Awen əgêq-qu fəl ad əqqəlan aytedan win wər nəmos Kəl Əlyəhud takutay təgrâzat i Məššina, təmosat arat a dər inihagga əs tarrayt n Infas wa Zəddigan.

¹⁷ Dağ adi əley s ad səbbərəğa dağ tassağ n Əlməsix Ƴaysa dağ batu n əšşəxəl wa əgeğ i Məššina.

¹⁸ Wər əhelağ awal dağ aratan ar win issənda Əlməsix əs tarrayt-in əmosnen as d-ewayax aytedan win wər nəmos Kəl-Əlyəhud s əbərdəğ i Məššina. Arat wen iga s awal əd mazalan,

¹⁹ igâ değ əs tarna ən təlməxjujaten əmosnen aɣalamaten, d aratan simaklalten, əgânen əs tarrayt ən tarna n Infas ən Məššina. Emmək en dağ as a d-obazan ɣur Yerusalem harkid Əlurəya, akal wədi kul sinahalağ dağ-as emel ən salan n Əlinjil n Əlməsix.

²⁰ Amaran əšşəxəl-in wa dağ ədgaza wəllen imos emel n Əlinjil y aytedan win âs wər kala ad əslan y esəm n Əlməsix. Arat wen əgeq-qu fəl ad wər iqqəl əšşəxəl-in arat intân fəl əšşəxəl n iyyan awedan.

²¹ Əşşəxəl wen əgeq-qu s əmmək wa əmalan Əlkəttaban as ənnan: «*Win as wər ittəmal ad t-ənəyan, amaran win wər nəsla isalan-net a tan-aslin agrin-tan.*»

Išikilan win otas Buləs

²² Arat wa dağ a di-igaddalan fawda a kawan-in-asa.

²³ Mišan əmərədda əğradağ əšşəxəl-in dağ kallan win den. A ilan elan ad əkneğ tara n a kawan-in-azzayyara,

²⁴ amaran areğ igi n adi assaxa wa din-z-asax Esbanəya. Fəlas əgeğ attama n a kawan-ənəyağ as din-əmmarağ əddi, amaran əffilla fall-awan y a di-tilalam s iki n akal wen dəffər as ɣur-wan əgeğ azzaman.

²⁵ Əmərədda ad akka Yerusalem y ad əşxəlağ i tamattay ən Məššina ta təllat den.

²⁶ Fəlas Əlkənisaten šin Masedonəya d Akayya əknânat tara n igi ən širgiten fəl ad ədhəlnat šiləqqawen əhanen imizdagan win Yerusalam.

²⁷ Əlkənisaten šin əknanat tara n awen, amaran iwâr-tanat igi-net, fəlas dad zamas əlməsixitan win əmosnen Kəl-Əlyəhud ədhâlan win wər nəmos Kəl Əlyəhud fəl aganna wa n əzəgzan-nasan, wədi əlməsixitan win wər nəmos Kəl Əlyəhud iwâr-tan əntanay da ad ədhəlan s ərrəzəxan-nasan win əmosnen Kəl Əlyəhud.

²⁸ Dağ adi as əğradağ əşşəğəl wa, şaşşawada širgiten šin i məssawəsnat, ad akkağ Esbanəya əmməraq-qawan-in.

²⁹ Amaran əssânay as albaraka ikmâlan n Əlməsix a imos asa wa kawan-in-z-aga.

Agamay ən Buləs šiwatriwen ən məzzəgzan s Əlməsix

³⁰ Ya imədrayan-in, əgmaya dağ-wan wəllen əs tarrayt n Əməli-nana Ƴaysa Əlməsix əd tara ta ihakku Infas wa Zəddigan a di-tilalam dağ təbəllant ta əgeğ s a di-tətansayam Məşşina dağ təwatriwen-nawan.

³¹ Tattarat-in a di-iğlasan dağ aytedan win ugaynen s əbərdəğ i Məşşina əhanen Yahudəyya, tətərəm-i değ a fəl əqbalan mizdagan win Yerusalam širgiten šin dasan-z-awəya.

³² As iga adi a kawan-in-asa əkneğ təfalawist, kud ira Məşşina adi, aga çur-wan azzaman ən təsanfawt.

³³ Əgmâya dağ Məşşina a ihakkin alxer a kawan-agəz ketnawan. Amin!

16

Assalaman d ənnəsixatan əd təwatriwen

¹ Əssiflasaq-qawan təmadrayt-nana Fəbay təmosat təmadhalt n Əlkənisat ta n Qankrəya

² fəl a tat-təqbəlam s esəm n Əməli, igâ awen s əmmək wa dər əhoran mizdagan. İlalat-as dağ arat kul wa dağ təddərar tilalt-nawan fəlas ənta da təllil y aytedan aggotnen as nak iman-in aheq-qan.

³ Təhulam-in Friska d Akilas əmosnen imidawan-in dağ əşşəğəl y Əlməsix Ƴaysa.

⁴ Əntanay a əganen iman-nasan dağ alyarar ən tamattant fəl a di-agəzan dağ win əranen tenayay-nin. Wərgəğ nak ças a dasan-iggodayan awen. Kalar Əlkənisaten kul šin aytedan win wər nəmos Kəl-Əlyəhud, da əggodaynat-asan.

⁵ Təhulam-in değ Əlkənisat ta təhat ağaywan-nasan.

Təhulam-in əməri-nin Efaynet s ənta a azzaran əzəgzan s Əlməsix dağ akal n Asəya.

⁶ Təhulam-in Maryama təyyəwanat əşşəxəl aggen imosan tilalt y-awan.

⁷ Təhulam-in Andronikus əd Yunəya, əmosnen kəl tamet-in a dər nimaggaza kasaw, əmosan dəx aytedan a fəl təga masnat dəx nəmmuzal amaran azzaran-i əzəgzan s Əlməsix.

⁸ Təhulam-in dəx Anfləyatus əknex tara fəl tərtəyt a nəga dəx əzəgzan s Əlməsix.

⁹ Təhulam-in Urbanus imosan əmidi-nana dəx əşşəxəl y Əlməsix, təhulam-in dəx əməri-nin Əstaxus.

¹⁰ Təhulam-in Abalus imosan awedan isitaddan əzəgzan-net s Əlməsix. Təhulam-in dəx kəl aɣaywan n Aristabul.

¹¹ Təhulam-in Herodəyon s ənta da iyyan dəx kəl tamet-in. Təhulam-in kəl aɣaywan ən Narsisos win əzzəgzannen s Əlməsix.

¹² Təhulam-in Trifina əd Trifoza əgānen əşşəxəl aggen dəx tarrayt n Əməli. Təhulam-in təmər-it-nana Fərsida təgāt əntada əşşəxəl aggen dəx tarrayt n Əməli.

¹³ Təhulam-in Rufus imosan anafron ən Məşşina d anna-net as nak da təmos-i zun anna.

¹⁴ Təhulam-in Asinkrit əd Flegon əd Ƴermes, əd Fatrobas əd Ƴermas əd mədrayan-nana win ɣur-san əllanen.

¹⁵ Təhulam-in Filologos əd Yuləya, əd Neray əd tamadrəyt-net, əntanay harkid Olinbas əd məzzəgzan kul win ɣur-san əllanen.

¹⁶ Tinəməggat assalam zəddigan. Əhulnat-kawan-in Əlkənīsaten n Əlməsix ketnasnat.

Ənnəsixa wa ilkaman

¹⁷ Ya imədrayan-in, əgmāya dəx-wan ad tənəkədam y aytedan win du-tawaynen iməzzəyan ɣar-ewwan əd təsənkaf sikarakadnen əmosnen əllid n əsəssəɣri wa tətawaggam. Nəməggəgat d aytedan win di

¹⁸ fəlas wər əɣbedan Əməli-nanəx Əlməsix, kalar wər ɣəmməyan ar a əgan dəx tədusen-nasan. Awalān-nasan hossaynen əd şizada n iləs-nasan as takarrasan aytedan win wər nəla arak man.

¹⁹ Əbərdəg-nawan i Məşşina awedan kul issān dəx-as, adi a fəl as isifalawas-i awen dəx batu-nawan. Mişan arex ad tilem tayttay dəx batu ta təqqalat əmazal n awa olaɣan, tizdagam dəy dəy i tu-təlla talbast.

²⁰ Məşşina s ənta a d-iffal alxer kul, tarmad as z'addagdag Aşşaytan daw daran-nawan. Tidawet dər-wan arraxmat n Əməli-nana Ƴaysa.

²¹ Ihul-kawan-in əmidi-nin dəx əşşəxəl a t-imosan Timotay ənta harkid Luqəyus əd Yason əd Sosifater əmosnen kəl tamet-in.

²² Nak iman-in Tertəyus a itawasaktaban širawt ta, da əhulaq-çawan s esəm n Əməli.

²³ Ihul-kawan-in Gayəs s ənta a çur əssəgana nak d Əlkənisat ketnet. Ihul-kawan-in Erastus imosan aləs wa innəttafan d ərrezəyan n əyrəm wa, ihul-kawan-in deç amadray-nana Kartus.

²⁴ [Tidawet dər-wan arraxmat n Əməli-nana Çaysa Əlməsix ketnawan! Amin!]

²⁵ Təmmalən i Məşşina s ənta a ilan tarna n ad isəssuhət əzəgzan-nawan daç anamod inimannakan d Əlinjil-net wa əmala imos təlxutbat ta əge daç batu ən Çaysa Əlməsix. Inimannak deç awen d əssir ən Məşşina wa danaç-inafalalan. Əssir wen, ixbâr daç azzaman win okaynen.

²⁶ Mišan əmərədda sannafalalaç-tu Əlkəttaban win d-əzzəbbatnen fəl ənnəbitan. Məşşina di n Amaçlöl a omaran s ad inəfiləl awen i tawşeten n əddənet ketnasnat fəl a sər-əs əzzəgzənat abbardagnat-as.

²⁷ Məşşina ənta məşşis ən masnat kul! Tanaya kul šin-net. Attamalet har faw, əs tarrayt ən Çaysa Əlməsix! Amin!

Şirawt ta tazzarat iktab Buləs i Kəl-Korent Əsənti

Təhult

¹ Awa nak Buləs, iyrâ Məşşina day tara-net əs tişit n ənammazul ən Elməsix Үaysa. Nak d amadray-nana Sustinəs

² nəhul-in İlkənisat ən Məşşina ta təhat ayğrəm ən Korent. Iyr-et y ad təqqəl tamattay-net zəddigat, təhât təla-net s əssəbab ən tassağ-nasan d Elməsix Үaysa; ənta d aytedan kul win hadatnen edag əhan, əxbâdan Əməli-nana Үaysa Elməsix, imosan Əməli-nasan, imos deḡ wa-nana.

³ Məşşina di n Abba-nana, d Əməli-nana Үaysa Elməsix təkfeq-qawan arraxmat d alxer.

Igodan

⁴ Faw tigudəyaḡ i Məşşina di n Əməli-nin day talḡa-nawan, tehakkay ta kawan-iga arraxmat-net s əssəbab ən tassağ-nawan d Elməsix Үaysa.

⁵ Fəlas tassağ-nawan dər-əs a sər-wan d-ewayan as kawan-isabbalal day arat kul, wəllen day awa təgannim kul d awa təssanam kul.

⁶ Isalan ən Үaysa win nəga əttiddan ḡur-wan wəllen.

⁷ Adi as wər tu-təlla təhəkkut ən Məşşina wər təgrewam, kawanay win waraḡwaraḡnen i tawaḡlay n Əməli-nana Үaysa Elməsix;

⁸ s ənta a z'isəssuhen əzəḡzan-nawan har təzərəst, awəd-du fall-awan əzəl wa du-z-asu wər kawan-iwer lahan waliyyan.

⁹ Məşşina di kawan-d-iḡran y ad tərtəyam əd Barar-net Əməli-nana Үaysa Elməsix, wər d-itəqqəl day tənna-net.

Ətəwətəytay n Elməsix d ənəmənnak n əlməsixitan

Iba n ənəmənnak day İlkənisat

¹⁰ Imədrayan-in, əgmâya day-wan fəl udəm n Əməli-nana Үaysa Elməsix ad tənəmənnəkam ketnawan day awa təgannim, taqqamim wər təqqelam təzunen. Kalar nəmənnəkət day awa təsamadranam d awa tənnəyem.

¹¹ Fəlas imədrayan-in, əḡân day-i aytedan n aḡaywan ən Kələway isalan n as, təlla gar-ewwan tamazaq.

¹² Ənnəḡ adi fəlas wiyyad day-wan gannin: «Nakkanay Buləs as nəlkam», wiyyad gannin «Nakkanay Abbolos as

nəlkam», wiyyad gannin «Nakkanay Butros as nəlkam», wiyyad gannin: «Nakkanay Elməsix as nəlkam».

¹³ Awak Elməsix tēzunt a iga? A təxilam nak Buləs, a itawənyan fəl tēgəttawt fəl əddəlil ən bakkadan-nawan? Məx ak esəm wa-nin Buləs as tətawasalməxam daɣ aman?

¹⁴ Eɡgodayax i Məššina âs wər daɣ-wan əssəlməxax awedan waliyyan daɣ aman, ar Krisbəs əd Gayəs.

¹⁵ Daɣ adi wər t-illa awedan ifrâgan ad annu itiwasalmaɣ daɣ aman s esəm-in fəl ad iqqəl ənalkim-in.

¹⁶ Awalla, əkte-du as əssilməxax daɣ aman aytedan n ahan n Ğstefanos əntanay da. A wər nəmos aytedan win, wər kəttəwax id əssilməxax daɣ aman awedan iyyan.

Ğtəwətəytay n Elməsix issikna tarna əd masnat šin Məššina

¹⁷ Fəlas wər di-d-izammazal Elməsix fəl ad əssəlməxax aytedan daɣ aman, kalar izimazal-i-du fəl a dasan-əmələx isalan n Ğlinjil, aɣax-asan dəx emel wər nəga əs masnat n awal, fəl ad wər tabbannan tamattant n Elməsix fəl tēgəttawt, tēqqəl arat wər nəla almaɣna.

¹⁸ Tidət as, isalan ən tamattant ən Ƴaysa fəl tēgəttawt, ɣur aytedan win əhanen tarrayt n əhluk, isalan wər nəla almaɣna a əmosan; mišan nakkanay win əhanen tarrayt n əɣillas, nəssân as tarna ən Məššina a əmosan.

¹⁹ Isalan n awen da a daɣ ənnan Ğlkəttaban: «Ad səbbənnana masnat ən musanan, səbbənnana dəx tayttay ən malan ən tayttay.»

²⁰ Daɣ adi ma din-igan daɣ musanan? Ma din-igan za daɣ musanan n Ğttawret? Imusanan n awal n azzaman win den, əntanay ma daɣ-san in-igan? Wərgəx Məššina issəkna as, masnat ta əlan aytedan n əddənet ta, əmməskəl a təmos?

²¹ Fəlas Məššina a igan əs masnat-net as aytedan wər əfregan a t-əssənan əs masnat ta-nasan iman-nasan, adi a fəl igrax i Məššina ad iɣləs aytedan win sər-əs əzzəgzannen əs tarrayt ən salan n Ğlinjil əmosnen əmməskəl s aytedan win sər-əs wər nəzzəgzan.

²² Kəl-Ğlyəhud za əntanay gammayan a dasan-ətəwəgginat təlməxujatən əmosnen alɣalamaten, Kəl-Ğlyunan amaran gammayan masnat.

²³ Adi a fəlas nakkanay emel wa nətaggu tamattant n Elməsix fəl tēgəttawt, təsənkəft a imos i Kəl-Ğlyəhud a dasan-təgdâlat əzəgzan, aytedan amaran win wər nəmos Kəl-Ğlyəhud əntanay imos ɣur-san əmməskəl.

²⁴ Mišan ħur aytedan win iħra Məššina, ġer za Kəl-Əlyəhud wala deħ Kəl-Əlyunan, Əlməsix tarnə əd masnat ən Məššina a imos.

²⁵ Fəlas igi ən Məššina wədi imosan s aytedan əddi əmmiskəl, wər tu-tewed masnat n aggadəm. Igi-net deħ wədi imosan s aytedan iba ən tələ ən tanaya, wər tu-təllə tarnə n aggadəm wər oger.

²⁶ Ya imədrayan-in, aktiwat-du awa təmosam as kawan-d-iħra Məššina. Wər daħ-wan əggətan aytedan as itiwagga iduf n as əmosan imusanan, wala wiyyad əlanen fərregat, wala wiyyad əmosnen kəl əket.

²⁷ Kalar Məššina isannafran aratan win wər nələ almaħna ħur aytedan n əddənet ta fəl ad izzəbəz imusanan təkarakit. Isannafran deħ win wər nələ farregat daħ əddənet ta fəl ad izzəbəz təkarakit aytedan win əlanen farregat.

²⁸ Awa itawalkan daħ əddənet ta, d awa itawakyadan, əd wa wər nətəwagga wala a isannafran Məššina y a sər-san assabu tamayyamayt ən win əmosnen arət ħur aytedan.

²⁹ Arat wen kul, ig-ay Məššina fəl ad dat-əs wər idkəl awedan waliyyan iman-net.

³⁰ Kawanay amaran Məššina a kawan-osaxan əd Ƴaysa Əlməsix, s ənta a danaħ-iqqalan masnat a du-təfəlat Məššina – almaħna ikf-ana sər-əs taqqat, əd tazdak, əd tədarfit.

³¹ Adi a fəl ənnan Əlkəttaban: «Awedan wa iran adkul ən man-net, idkəlet-tan fəl aššaddat n awa igə Məššina.»

2

¹ Nak iman-nin, imədrayan-in, as kawan-in-oseħ y a dawən-əmələ tidət ta du-təfəlat Məššina təmosat əssir, wər kawan-əssəkna masnat n awal wala igət ən masnat.

² Fəlas əgeħ tanat n as, iket əheq-qawan, wər dawən-z-agax isalan wər nəmos win Ƴaysa Əlməsix, d ətəwənxə wa itawagga fəl təğəttawt.

Masnat ta n Məššina isannafalal-tat Infas wa Zəddigan

³ Nak azzaman win ħur-wan əge, əgeq-qan d iba n assahat əd tasa di-təssindawat taysəst labasat.

⁴ Amaran isəssəħritan-in əd təlxutbaten-in wər əgen əs masnat n awal wala tələ ən tayttay, kalar isəssəħritan a əmosan as issikna Infas wa Zəddigan əs tarnə-net as tidət a əmosan,

⁵ fəl ad iqqəl əzəgzan-nawan arət a sər-wan du-teway tarnə ən Məššina wərgəħ masnat n aggadəm.

⁶ Dər igə awən da ya, tidət as, təll-ay masnat nəsasaxru aytedan win saggatakkannen daħ əzəgzan; mišan masnat

ten, wər tat-təla əddənet ta, za wər tat-əlen muzaran-net as ilkâm ad iba tamayyamayt-nasan.

⁷ Kalar masnat ta du-təfalat Məşşina a nəsassağru, təmosat əssir irəwan ixbâr y aytedan. Masnat ta, harwa dat əxluk n əddənet ad otas Məşşina a dana-sər-əs-akfu adkul.

⁸ Wər t-illa dağ muzaran n əddənet ta da, i igrâwan əgərri ən ta da masnat; fəlas ənnar tat-əgrân, wər z'attaytayan Əməli ən tanaya.

⁹ Dər iga awen da ya ənnan Əlkəttaban: «*Awa issənsa Məşşina i win t-əranen, wər kala tu-tənay şat, wər kala tu-təsla təməzzuk, wər kala dəx ad t-isammadran awedan.*»

¹⁰ Nakkanay amaran isannafalal-anaq-qu Məşşina əs tarrayt n Infas wa Zəddigan; fəlas Infas wa Zəddigan wər t-illa a dağ wər issen, wala ɣas aratan win as otas Məşşina igi-nasan da issân dağ-san.

¹¹ Id wər t-illa awedan issânan awa ihan iman n iyyan awedan, ar iman n awedan wədi da ɣas. Əmmək di dağ as, wər t-illa awedan issânan awa otas Məşşina. Infas-net di Zəddigan ɣas a t-issanan.

¹² Amaran nakkanay, wərgəɣ infas şilat ən wa n əddənet a nəgraw, kalar infas wa d-ifalan Məşşina a nəgraw, fəl ad nagru arraxmaten şin fall-ana d-izazzabbat Məşşina.

¹³ Adi a fəlas, aratan win nəsassağru, wər tan-nəsəsəğru əs masnat ta n aggadəm, kalar masnat ta danax-ihakku Infas wa Zəddigan as tan-nəsasağru. Nəsasağru tidət ta du-təfalat Məşşina y aytedan win iha Infas di Zəddigan ən Məşşina.

¹⁴ Mişan awedan wa wər nəlkem ar i masnat ta n aggadəm, wədi wər ifreg ad iqbəl arat wa d-ifalan Infas di Zəddigan ən Məşşina, id ɣur-əs əmməskəl a imos awen, wər ifreg ad t-agru fəlas Infas di Zəddigan ən Məşşina a ihakkan əgərri-nnet.

¹⁵ Awedan wa iha Infas wa Zəddigan, wər t-illa arat a d-ifalan Məşşina as wər ifreg əgərri-nnet, amaran ənta iman-net, wər t-illa awedan wər iha Infas wa Zəddigan ifrâgan a sər-əs annu arat.

¹⁶ Adi a fəl ənnan Əlkəttaban: «*Ma issanan dağ awa otas Əməli Məşşina, wala ifrâg a das-əgu ənnəsixa?*» Nakkanay za a igrawan Infas di Zəddigan ən Məşşina nəssân dağ awa otas Əlməsix.

3

Buləs d Abbolos, imaşşaxalan ən Məşşina

¹ Nak amaran, imədrayan-in, harwa ɣur-wan əlle, wər dawan-təggəɣ awal wa tagga y aytedan win iha Infas wa

Zəddigan. Kalar əgeç-awan awal zun wa itaggu awedan y aytedan win wər nəlکم ar i tara ən man-nasan, zun əşşewala y aytedan as səket əlkaman y Əlməsix.

² Zun as ax a kawan-əşşəşwa, wər kawan-əssətša imensewan win əqqurnen, fəlas harwa da wər dasan-təfregam. Wala əmərədda da, wər dasan-təfregam,

³ id harwa da wər t-illa a kawan-izlâyan d aytedan win wər nəlکم ar i tara ən man-nasan. Şismiten şin tətəggim fəl midawan-nawan əd təmazaq ta təmmalat gar-ewwan wərgəç sitaddanat as harwa da kəl əddənət a tətəlalam, təlkâmam i tarrayt-nasan?

⁴ As inna iyyan daç-wan: «Nak Buləs as əlkama», inna iyyan: «Nak Abbolos as əlkama», wədi wərgəç alxal n aytedan n əddənət ta da a təgam?

⁵ Abbolos a da, ənta wala Buləs, awak ma əmosan? Wər nəmos ar imaşşaxalan ən Məşşina, win sər-wan d-ewaynen əzəgzan sər-əs, nak harkid ənta, wər nəga ar əşşəçəl wa danax-ikfa Əməli.

⁶ Nak awa əmmozała, iha şaşşelan n amasa as nak a t-inbalan, təzzar işşəşw-ay Abbolos, mişan Məşşina ənta a t-id-issədwalan.

⁷ Daç adi, wərgəç awedan wa inbalan amasa wala wa t-işşaşwin a imosan arət; kalar Məşşina a t-id-issədwalan a t-imosan.

⁸ Awedan wa inbalan amasa əd wa t-işşaşwin arət iyyanda a əmosan, akkiyyan daç-san ad t-akfu Məşşina alxaq n əşşəçəl-net.

⁹ Nak d Abbolos nədrâw əşşəçəl wa danax-ikfa Məşşina, amaran kawanay a mosnen şilat ən tawagost-net, təmosam dəç əkərrus-net.

¹⁰ Nak, əgeç s arraxmat ta di-ikfa Məşşina, əşşəçəl zun wa itaggu əmakras ən nan issânan əşşəçəl-net, əssəçta təsəkbəlt ta təmosat şixurad ən taçazamt, dəffər adi osa-du awedan iyyan a fall-as ikarras; mişan akk awedan inkədet d əmmək was işatu əkərrus ən taçazamt tədi.

¹¹ Wər t-illa awedan ifrâgan əsəçti n iyyat təsəkbəlt wər nəmos ta təçtat kala da, ad tat-imosan Çaysa Əlməsix.

¹² Wiyyad aytedan əkarrasan fəl təsəkbəlt ən taçazamt ta, s urəç, wiyyad s azrəf, wiyyad əs təhun əknânen şihussay, wiyyad s eşkan, wiyyad s ələmmuz, wiyyad s agabal.

¹³ Akk awedan ilkâm ad itəwənəy əşşəçəl-net, id ad itəwəsəknu əzəl wa ilkaman, itəwəjərrəb əs təmsay, fəlas təmsay ta ənta a za təsənnəfiləlat əzzənəf n əşşəçəl wa iga akk awedan.

14 Kud tēməkrust ta fall-as iga awedan wər tat-tətša təmsay, awedan wədi ad igrəw alxaq-net.

15 Mišan as imos as tətš-et təmsay, awedan wədi ad affatu. Dər iga awen da ya, ənta iman-net ad ixləs, mišan ad alu əlxillas-net d in awedan ad d-ittirkaban daɣ təmsay.

16 Awak masnat a wər təgema as, kawanay iman-nawan a imosan ehan ən Məššina, iha deɣ Infas wa Zəddigan iwallan-nawan?

17 Amaran awedan kul wa ihallakan ehan ən Məššina, a t-ihlək Məššina; fəlas ehan ən Məššina i zəddigan, amaran kawanay a t-imosan.

18 Ad wər issudəf awedan waliyyan iman-net alxata. Wa daɣ-wan ixlilan ila masnat ta fəl təgla əddənet, wədi aget iman-net əmeskel, ad t-akfu Məššina masnat ta n tidət.

19 Fəlas masnat ta n əddənet ta, əmməskəl a təmos ɣur Məššina, id a ənnan Əlkəttaban: «*Imusanan n əddənet ta, šimərkas šin-nasan as tan-ibaz Məššina.*»

20 Ənnən deɣ: «*İssân Əməli əs, imedranan ən musanan n əddənet ta, wər əzlayan əd bannan.*»

21 Daɣ adi, ad wər tədakkalam iman-nawan fəlas təkamam y awedan, fəlas arat kul i-nawan,

22 gər za nak Buləs wala Abbolos, wala Butros, wala əddənet, wala təməddurt əd tamattant, gər za aratan win əmərədda wala win əlkamnen, awa ketnet i-nawan.

23 Kawanay iman-nawan, Əlməsix a kawan-ilan; Əlməsix amaran, Məššina a t-ilan.

4

1 Daɣ adi, nak d Abbolos a dana-wər-itəwəggu iduf wər nəmos ar wa n maššayalan n Əlməsix, d almawakkilan-net as imos əššəxəl-nasan emel y aytedan igitan ən Məššina win dasan-əhanen ətənkul.

2 Amaran ma itawaran daɣ awedan imosan almawakkil, ar ad imos awedan n alɣadil.

3 Nak əs man-in, wər əzləya daɣ iduf wa daɣ-i təgam wala wa daɣ-i əgan aytedan wiyyad. Nak əs man-in, wər əgeɣ iduf waliyyan daɣ man-in.

4 Wər di-təha tərək n ark əmazal waliyyan, mišan wərgex adi a di-z-ikkəsan. Əməli, ənta a di-z-išrəxan.

5 Daɣ adi ad wər təssəwəram awedan waliyyan lahan dat tawaɣlay n Əməli s ənta a z'assaknin ezal a mallan arat kul wa itawaggan daɣ əssir, isəffəggu awa ihan iwallan n aytedan. Alwaq wədi, awedan kul ad igrəw ɣur Məššina təmmal ta dər ihor.

6 Amaran imədrayan-in, ədkələɣ-awan-du isalan-in nak d Abbolos fəl ad iqqəl awen almasal a kawan-z-isassagrin batu ta tənnat: «Ad wər takəyam awa ənnan Əlkəttaban».

Əgəy adi ənta da fəl a kawan-wər-iggəz awedan waliyyan isifaxaran s awedan iyyan alku wa hadan.

⁷ Kay wa itaggan ibaragan, ma kay-izlayan d iyyan awedan? Ma tələx, as wərgəy Məşşina a dak-k-ikfan? Dad zamas awa tələx kul ətəwəkfa a kay-itawagga bannan, ma əmosan baragan win tətəgga?

⁸ Kawanay əmərədda təlâm arat kul wa taram, har as təgərgəsam! Təqqalam fadda imənokalan ənta nakkanay wər tan nəmos! Nəsidadan a tan-təqqəlam əs tidət, fəl a dər-wan nədrəw təxmar nakkanay da.

⁹ Mişan əs tannaş sər-i nakkanay inəmmuzal, ig-ana Məşşina daş ələqqam n aytedan, nola d aytedan issiwar əşşəriğa tamattant, nətawagga ares n awnaf y əddənet ketnet, gər za aytedan wala angalosan.

¹⁰ Nakkanay za nəqqal s aytedan imeskelan fəl əddəlil n əşşəxəl wa nətagg y Əlməsix, kawanay amaran təqqalam imalan ən tayttay fəl əddəlil ən tassağ-nawan dər-əs. Nakkanay nərkam, kawanay amaran təssohem. Nətiwakyad, mişan kawanay tətivasaxmaram.

¹¹ Nakkanay wala ғаs əmərədda da ih-âna laz, nəffûd, nəzlâm, nətatawat, wər nəla id nəxsar;

¹² izayazzab-ana əşşəxəl ən fassan-nana. Nətattar a igan arraxmat y aytedan win dana-tagginen ark awalan, nəzmâr i win dana-sakninen arkanay.

¹³ Aytedan win ғаşşadnen ismawan-nana, nəgammay daş-san əs man mallolnen ad ammazzayan d adi. Har harwa da əgân-anax aytedan şilat ən ferədan n əddənet əd səfrağ-net.

¹⁴ Wər dawan-in-əktebaş aratan win fəl a kawan-əzzəbəza təkarakit, kalar əktabaş-awan-tan-in fəl a dawan-aga ənnəsixa, wa z'aga i bararan-in əkne tara.

¹⁵ Amaran kud təlâm maraw gim n əlfəqqi a kawan-sasaxren tarrayt n Əlməsix, da wər təlem ar abba iyyanda, fəlas əzəl wa dawan-əgəy isalan ən Үaysa Əlməsix, təlkamam-as, ənta ad əqqala şilat n abba-nawan.

¹⁶ Adi a fəl ədgaza gammaya daş-wan a di-tattalalam.

Əzzəna daş Əlkənisat

Ədərrəg y əzzəna

Ark aratan wər nəmməkkən win ətawagginen daş Əlkənisat

¹⁷ Əddəlil n adi da a fəl sər-wan in-zammazala Timotay ən ruray əkney tara, issiflasan wəllen daş ləkkum-net y Əməli. Əssokax-awan-t-in fəl a kawan-d-assaktu əzzənəf

ən ləkkum wa əgey y Əlməsix, s ənta a sassayra day əlkənisaten kul day adag kul.

¹⁸ Wiyyad day-wan taggin ibaragan, fəlas əxilan wər kawan-in-z-ələsağ assa.

¹⁹ Mişan əs turagat n Əməli, a kawan-in-asa day alwaq wər nəggug. Alwaq wədi, aytedan win tagginen ibaragan əddi, ad ənəyağ awa əfragan, wərgəy awa gannin ƣas.

²⁰ Fəlas Taymar ta n Məşşina, imazalan win taggin aytedan əs tarna-net a day tətawanay wərgəy awa əgannin əs mawan-nasan.

²¹ Awak məni day aratan win wa təssofam? A kawan-in-asa ewəyağ ələkkud, meƣ a kawan-in-asay əd tara əd man lammodnen?

5

¹ Aytedan kul gannin ih-iwan awedan itaggin əzzəna, iƣân təllabəst ta day əs wala aytedan win wər nəssen Məşşina da wər tu-təggin; imosan as ih-îwan aləs itinəmənsin əd tətut n abba-net!

² Eges harwa da tətəggim ibaragan, edag n a kawan-assakmu adi iman, təzəmməzzəyam iman-nawan d awedan wa itamazalan adi.

³ Kud nak wər ƣur-wan əlley s azzat-in, da iman-in əllân ƣur-wan. Amaran awedan wa iƣan əmazal labasan wədi, obāzaq-qu s əşşəriƣa şilat n as əlley ƣur-wan.

⁴ As təmmənəyam gar-ewwan fəl əddəlil n Əməli-nana Ƴaysa, əggəzaq-qawan-in əs man-in wərgəy s azzat-in, a fall-awan d-izəzzəbbət Əməli-nana Ƴaysa tarna-net;

⁵ tayyim awedan wədi y Aşşaytan ad təhlək təxəssa-net, fəl ad iƣrəw efsan əzəl wa n tabadday.

Əşşəriƣa ƣər əlməsixitan

⁶ Wər təlem əddəlil waliyyan fadda s igi ən baragan. Awak wər təssenam as, «arat ən xamira a isakafan təbəluləq n agel irwayan ketnet?»

⁷ Əkkəsət day man-nawan xamira wa waşşaran a t-imosan abakkad, tizdagam fəl ad təqqələm şilat ən təbəluləq n agel irwayan wər iha xamira, s ənta a təmosam kala da, fəlas Əlməsix, imos təfaskay-nana ta n amud wa n Akkay, immut day adag-nana.

⁸ Day adi nəssəxməret amud wa n Akkay, wərgəy əs xamira wa waşşaran, a t-imosan iwallan iha əşşur əd talbast; kalar nəssəxməret-tu əs təgəlla ta wər iha xamira, a tat-imosan iwallan zaddogən, təha tidət.

⁹ Day şirawt-in ta dat ta, əktābaƣ-awan-in as, ad tu-wər-təməl tassaƣ waliyyat gar-ewwan d aytedan win tagginen əzzəna.

¹⁰ Mišan ya wər əssoka s adi iba ən tassaḡ d aytedan win wər nəššokal daḡ əddənet ta ar daḡ igi n əzzəna, madex win as əffofen wallan-nasan, madex win narkaban əd win əḡbadnen əssənəman, fəlas aytedan win di, wər za taqqamim wər dər-san toseḡam, ar s ad təgmâdam əddənet ketnet da.

¹¹ Kala kalar a dawan-ganna, ad wər tasəḡam d awedan wədi igannin imos amadray-nawan daḡ əddin, ənta wər iššokal ar daḡ igi n əzzəna, iffofat əwəl-net, iḡbâd əssənəman, ilâ ark iləs, imos əməšwi n esmad, imos anarkab. Awedan šilat ən wa, wala ḡas tettay da a dər-əs tat-wər-tədrəwam.

¹²⁻¹³ Fəlas wərgex nak a iwar ad əbəza s əššəriḡa aytedan win wər nəzzəḡzan s Əlməsix, Məššina a tan-z-ibəzan s əššəriḡa, mišan aytedan win Əlkənisat-nawan, kawanay a iwar a tan-tabəzam s əššəriḡa, fəlas ənnan Əlkəttaban: «*Əkkəsət ḡur man-nawan inəllubas.*»

6

¹ As illam arat ḡər iyyan daḡ-wan d əmədi-net, ma kawan-issəhalan ad tətakkim aytedan wər nəzzəḡzan əs Məššina y a dawan-əššrəḡan, təḡləyam tamattay zəddigat ən Məššina?

² Awak masnat a wər təgem as, tamattay tədi ənta a za təsrəḡat y əddənet? Daḡ adi, dad imos as kawanay di da a z'əšrəḡnen y əddənet, manəmmək as wər təfregam əššəriḡa ən taḡawšiwən madrornen?

³ Awak masnat a wər təgem as, wala angalosan, nakkanay a dasan-z-išrəḡan, əngəm-in za šixawšiwən n əddənet ta!

⁴ Daḡ adi, as t-imal əḡšud ḡar-ewwan daḡ taḡawšay iyyat, manəmmək as tətayyim aytedan wər nəmos wala ḡur Əlkənisat šarrəḡan-awan?

⁵ Imos fall-awan təkarakit ad imos as, wər kawan-ihə awedan waliyyan ilân masnat a tu-təssifragat ad izəmməzzəy əššəriḡa i mədrayan-net daḡ əddin.

⁶ Awak ma kawan-igrawan as təšarrəḡam ḡar-ewwan har təqqimam əšərrəḡan-awan aytedan wər nəzzəḡzan s Əlməsix.

⁷ Wala ənəməšrəḡ wa tətəggim ḡar-ewwan da agadal zəwwəran a dawan-imos. Mafel wər təzəzzaydaram d iba ən tidət wa dawan-itâwagḡan, madex təzəzzəydəram d əmiḡi wa tətawagḡim?

⁸ Edaḡ n ad taḡim adi, kala kalar kawanay iman-nawan a itamazalan s iba ən tidət, tətəḡam aytedan win hadatnen, əs fadda imədrayan-nawan a əmosan daḡ əddin.

Inasbakkadan əd Taymar ta n Məššina

⁹ Awak masnat a wər tægem as inəllubas wər z'əgrəwan adagar daɣ Taɣmar ta n Məššina? Ǝqqəlat-du daɣ əxruk wa tægam, təssənəm as imaggan n əzzəna, d aytedan win əɣbadnen əssənəman, əd win tagginen i tədoden-nasan šidoden, əd meddan win tagginen iman-nasan šidoden əd win tagginen imidawan-nasan šidoden,

¹⁰ əd baydagan, əd win as əffofen wallan-nasan, əd mašwan n esmad, əd mawayan ən tənnawen, əd narkaban, aytedan win kul wər əlen adagar daɣ Taɣmar ta n Məššina.

¹¹ Wiyyad daɣ-wan kala ad əhan samal n aytedan win di, mišan əmərədda tətowašaradam daɣ awen, tətihazazdagam, təqqalam aytedan təsisaxad tarrayt n Ǝməli Ǝaysa Ǝlməsix d Infas wa Zəddigan n Ǝməli-nana Məššina!

Batu ta təqqalat iki ən təkərwaten

¹² Təgannim: «Arat kul xalal-ana», tidət mišan wərgex arat kul təh-ay tənfa. Tidət as «arat kul xalal-ana», mišan nak wər z'ayyaɣ arat waliyyan ittəf daɣ-i tanat.

¹³ Təgannim deɣ «Isudar, tadist a fəl d-əxlakan, amaran tadist, isudar a fəl du-təxlak.» Dər iga awen da za, tadist harkid mensewan ilkâm ad asabu Məššina tamayyamayt-nasan. Taɣəssa n awedan ənta wər du-təxlek fəl ad tagu əzzəna. Kalar təxlâk-du fəl ad tagu tara n Ǝməli, s ənta a tat-ilan.

¹⁴ Amaran Məššina a d-issənkarən Ǝməli Ǝaysa daɣ tamattant a dana-daɣ-as-d-issənker nakkanay da, əs tarnanet.

¹⁵ Wər təssenəm as, šiɣəswen-nawan, šisəllad n Ǝlməsix a mosnat? Daɣ adi manəmmək as z'əsərtəya šisəllad n Ǝlməsix əd təɣəssa ən təkərwat? Kala Kala! Wər ilkem ad iga adi!

¹⁶ Məɣ masnat a wər tægem as awedan wa issərtayan iman-net əd təkərwat, wədi iqqal dər-əs taɣəssa iyyadda? Awak wərgex ənnan Ǝlkəttaban: «*Aləs əd təntut-net ad əqqalan taɣəssa iyyadda*»?

¹⁷ Awedan amaran wa irtayan d Ǝməli, wədi Infas wa Zəddigan n Ǝməli a t-ihan.

¹⁸ Darragat y igi n əzzəna. Ibakkadan kul win tamazalan aytedan wər ədrewan arat əd təɣəswen-nasan; mišan awedan wa igan əzzəna, wədi iga abakkad immâran taɣəssa-net təmosat taslət n Ǝlməsix.

¹⁹ Awak masnat a wər tægem as šiɣəswen-nawan ehan n Infas wa Zəddigan a əmosnat, a kawan-ihân, ikf-âwan-tu Məššina? Wərgə kawanay a ilan iman-nawan.

²⁰ Fəlas izinz-iwan-du Məşşina s əlqimat zəwwərat. Day adi, səxmərat Məşşina əs təxəswen-nawan.

7

Batu ta təqqalat azalaf

Batu təqqalat aytedan win əzləfnen

¹ Amaran day batu ta təqqalat isəstanan win di-du-təgam day şirawt ta di-du-təktabam, tənnam: «Ofa y aləs ad aqqam wər inamansa əd tantut kuddey ta izlaf.»

² Dər iga awen da za, fəl ədərrəg y igi n əzzəna, əkkulluk n aləs ofa ad ila tantut, əkkulluk ən təntut dey təla aləs.

³ Aget aləs i təxurəs arat was iwwejjab a das-t-agu, təntut dey taget y aləs-net awen da.

⁴ Tantut wərgəy ənta a tətəfat tanat day təxəssa-net, aləs-net a ittafan tanat-net. Aləs ənta da, wərgəy ənta a ittafan tanat day təxəssa-net; tantut-net a tat-ittafan.

⁵ Day adi ad wər tənəməgdəlam iman-nawan ar s ad tənimardam s adi day temert təskâtam i təwatriwen. As təxrad, təqqəlam təməwit ta təwwəjjabat fəl aləs əd təntut-net, fəl təksəda n ad ib'as tənnodam day man-nawan, igrəw sər-wan Aşşaytan tarrayt s a kawan-ajjarab.

⁶ Arat wa ənnəy əddi, turagat n igi-net a kawan-əkfeş, wərgəy ammar a kawan-sər-əs-əgəş.

⁷ Nak əsidarana a dər-i olân aytedan kul, əfrəgan ad aqqamin wər əzlefan; mişan ya akkiyyan day-na əd təhəkkut ta das-iga Məşşina. Wiyyad day-na wər əfrəgan ad wər əzlefan, wiyyad əgrâwan təhəkkut təmosat fərregat y amayras.

⁸ Amaran meddan win as aba şidoden-nasan, əd tədoden şin as aba meddan-nasnat, ofa ad agin awa əgəş, aqqamin da wər əzlefan.

⁹ Mişan as imos as wər əfrəgan adi, wədi əzləfanet; fəlas ofa y awedan ad izləf, aqqam da wər isabbalaglag daran əwəl-net.

¹⁰ Aytedan amaran win əzləfnen, omâraq-qan s as: tantut ad wər tamməzzay d aləs-net. Əməli a innan adi, wərgə nak.

¹¹ Mişan as imos as təmməzzay dər-əs, wədi taqqamet wər təzlef, madəş taknu d aləs-net təqqəl-tu; aləs ənta da ad wər izəmməzzəy təxurəs.

¹² Aytedan amaran win hadatnen, ənnəy-asan: Amadray day əddin was wər təzzəgzan tantut-net əs ʔaysa, eges tərda s a tat-ittâf, wədi a tat-wər-izəmməzzəy. Batu tədi, nak a tat-igan, wərgə Əməli.

¹³ Tantut deyx ta n tamadrayt dağ əddin, tas wər izzəgzan aləs-net əs Ƴaysa, eges igla irâ a çur-əs tella, tədi a tu-wər-təfəl.

¹⁴ Fəlas aləs wədi wər nəzzəgzan əddi, zəddiğ id tantut-net a təmosat iyyat dağ mədrayan dağ zəgzan əs Ƴaysa. Tantut deyx tədi wər nəzzəgzan əs Ƴaysa əddi, təzəddiğ id aləs-net a imosan iyyan dağ mədrayan dağ zəgzan əs Ƴaysa. Adi a izzəzdagan bararan-nasan, mişan ənnar wər iga adi, bararan-nasan ehan ən taxxaramt a daq-qan ələn.

¹⁵ Dər iga awen dağ, wa dağ-san wər nəzzəgzan, gər za aləs wala tantut, as ira əməzzəy ən wa hadan, ammazzayət dər-əs. Amadray dağ əzəgzan wədi, madəx tamadrayt tədi, wər t-idu-z-iqqəl əşşərixa n adi, fəlas Məşşina, təməddurt iha alxer as ira a tat-təgâm.

¹⁶ Ma issanan, mijas kam ta n təməzzəgzənt əs Ƴaysa a du-z-awəyan s aləs-nam ad igrəw efsan? Kay da, aləs wa n əməzzəgzən əs Ƴaysa, ma issanan mijas kay a du-z-awəyan əs təntut-nak ad təgrəw efsan?

¹⁷ Amaran aytedan win wər nəmos win-di akkiyyan aglet dağ alxalat ta daq-qu iga Əməli Ƴaysa təmos təhəkkut-net, s ənta a iha as t-iyra Məşşina. Ammar wədi a taggay əlkənisaten kul.

Awedan kul aqqamiwet dağ alxalat ta iha

¹⁸ Kud awedan imminkad as t-id-iyra Məşşina, wədi a das-wər-iqqəl adi asakor. Kud deyx awedan wər immənkad as t-id-iyra Məşşina, ad wər igməy d ad itəwəsəmmənkəd.

¹⁹ Əmənkəd wala iba-net wərgəx ənta a imosan arat, amazal s ammaran ən Məşşina a t-imosan.

²⁰ Akk awedan aglet dağ alxalat ta iha as t-id-iyra Məşşina.

²¹ Kud as kay-d-iyra Məşşina akli a təmosax, a kay-wər-işşəwəş adi; mişan as təgrawa tarrayt əs tədarfit, a sər-əs wər tugəya, kalar darfat.

²² Fəlas awedan wa imosan akli as t-id-iyra Məşşina y a tu-təməl tassağ gar-es d Əməli, wədi ad iqqəl adaraf n Əməli. Emmək di dağ âs awedan wa wər nəmos akli, ənta da as t-id-iyra Məşşina, ad iqqal akli n Əlməsix.

²³ Əməli a irzəman fall-awan, isəddərfat-kawan; dağ adi ad wər tayyim aytedan agin-kawan eklan.

²⁴ Imədrayan-in, akkiyyan dağ-wan aglet iga attama-net dağ Məşşina, aqqam ənta da dağ alxalat ta iha as t-id-iyra Məşşina.

Batu təqqalat aytedan win wər nəzlef

²⁵ Amaran dağ batu ta təqqalat aytedan win wər ides azalaf, wər di-ikfa Məşşina ammar waliyyan y-asan; mişan

a dawan-agay ənnəsixa, ənnəsixa di da ig-âwan-tu aləs igrâwan dağ əhənətta n Əməli tişit n awedan issiflasan.

²⁶ Azzaman n alğazab a fall-anay əganen, dağ adi illa xur- i as, ofa y akk awedan kul ad aglu dağ alxalat ta iha.

²⁷ Kud kay təsımarkasa əd tantut, ad wər təgməya d a dər-əs tammazzaya. Kud wər təzlefa, a dər-əs wər təgməya.

²⁸ Dər iga awen da ya, as təzlafa, wərge abakkad a təgeç; tantut deç ta wər ides azalaf, as təzlaf, wərgeç abakkad a təga; mişan ya aytedan win əzlafnen dağ azzaman win, ad ənəyan təssust labasat s ənta as areç a tan-agəza dağ-as.

²⁹ Awa fəl dawan-gannay adi, imədrayan-in, as, təsəlkamt n alwaq a nəha da. Dağ adi a ibazan xur əmərədda, wala aytedan win əzlafnen, aginet as şilat n as wər əzlefan.

³⁰ win hallinen şilat n as wər həllin, win falawasnen şilat n as wər falawasan, win du-zanzinen deç əttəfanet as arat wa d-əzənzən wər t-əlen,

³¹ amaran aytedan win sattaçmalnen aratan n əddənet ta, a dağ-san wər zəzzəwen, fəlas arat kul wa itaggan dağ əddənet ta nəha da, ta n əçrud a iha.

³² Nak amaran a əreç ad tagim təməddurt dağ kawan-wər-işşəwəş wala. Aləs wa wər nəzlef, ifrâğ əddəguz dağ igi n aratan win fall-as ira Əməli, fəlas igammay d əmmək was z'igrəz y Əməli.

³³ Mişan aləs wa izlafan, şixawşiwen n əddənet a dağ idaggaz igammay əmmək was tu-za-tiru taçurəs;

³⁴ təzzar tuzan ənənəyat-net gər tara n igi n awa tara təntut-net d awa ira Məşşina. Amaran tantut ta wər nəzlef əd ta wər ides azalaf, əfrâgnat əddəguz dağ igi n aratan win fall-asnat ira Əməli, fəlas əranat ad əskətnat təməddurt-nasnat ketnet y əlçibada n Əməli; mişan tantut ta təzlafat, şixawşiwen şin əddənet a dağ tədaggaz, təgammay əmmək was tat-z-iru aləs-net.

³⁵ Arat wa ənneç da, tənfa-nawan a dağ-wan t-ənneç, wərgeç əzuk iyyan a kawan-sawara. Kalar tara a əgeç ad tagim awa inahaggan, təlkəmam y Əməli s əwəl iyyanda.

³⁶ As iga aləs arkawal n azalaf i təmidit-net har d-ewad alwaq wa dağ ihor a tat-izlaf, amaran iksud əsəkkərukəd-net, wədi izləfet-tat, kud adi a ira, wər imos awen abakkad.

³⁷ Mişan aləs wa d-inkaran gar-es əd man-net isammarkas as wər z'izləf tantut ta dər imarakan azalaf, amaran imos awedan ifrâğan dağ man-net, wədi igâ arat ihossayan.

³⁸ Dağ adi awedan wa issəndan arkawal n azalaf i təmidit-net, iga arat ihossayan; mişan of-ay wa igan tanat n a tat-wər-izləf.

³⁹ Tantut təzlâfat ilzâm-tat amel ħur aləs-net iket iddâr. Mišan as t-aba, ad tilu tarrayt n azalaf n iyyan aləs wa tara, eges kundaba wa izzəgzanan s Əməli Ƴaysa.

⁴⁰ Mišan nak dağ iduf wa-nin, oğar əbbələl wa za tagu as təqqim wər təzlef. Infas wa Zəddigan ən Məşşina a di-isassagan iduf wədi, amaran Infas en dağ as əgeğ iduf n âs əgrâwaq-qu.

Əlyibada n əssənəman

8

Əderrəg y əlyibada n əssənəman

Tara ən mədrayan-nana win əlməsixitan əd təkatawt-nasan

¹ Dağ batu ən şan ən təzəgzam šin təwagğanen y əssənəman ta dər-i təssəstanam, tənnam: «Masnat, ket-nana nəla dağ-as arat». Tidət a imos adi, mišan za masnat, adkul ən man a du-tətaway s awedan, as iga awen, tara ənta, əsəssuhi a tətəggu əzəgzan n awedan.

² Awedan wa ħur illa as ila masnat, wədi harwada wər işsən awas imməkkan ad t-issən.

³ Mišan awedan wa iran Məşşina, izday-tu Məşşina.

⁴ Amaran dağ batu ən tattay ən şan ən təzəgzam šin təwagğanen y əssənəman, nəssân âs wər t-illa əssənəm imosan əməli, Məşşina iyyanda ħas a t-illan imos Əməli.

⁵ Wala ad əttâfan aytedan as əllan-tu əssənəman aggot-nen dağ jənnawan d amađal tiwağbadnen, amaran tidət as əllan-tu,

⁶ da ħur-na, Məşşina iyyanda ħas a t-illan. Ənta a imosan Abba-nana, ixlak-du awa t-illan kul, s ənta a danağ-ilan nəsandu tara-net; wər t-illa değ ar Əməli iyyanda, Ƴaysa Əlməsix, s əssəbab-net as t-illa arat kul, amaran ənta a danağ-ittafan təməddurt.

⁷ Mišan wəgeğ aytedan kul tewâd masnat-nasan adi. Aytedan win di əs kala əzzəgzanan s əssənəman, harwa da as ətşan isan ən təzəgzəmt y əssənəm, ad əşşəkan iman-nasan, iməl ħur-san as isimadas-tan awen.

⁸ Dər iga awen da ya, wəgeğ tettay n amensay a dana-z-izənnəmihezən əd Məşşina: gər za nətsâ isan win di, wala wər tan-nətsâ, wərmad dana-za-təfnəz tettay-nasan s arat, wala değ təşşit-ana sər-əs.

⁹ Eges ya ənkədat əd man-nawan, tarrayt ta təgrawam əddi, a dawan-təssixlalat tettay n amensay kul, ad wər təqqəl təsənkəft y awedan was wər işsohat əzəgzan-net.

¹⁰ Fəlas kay wa ilan masnat tədi, as kay-inay amadəray-nak dağ əddin was wər işsohat əzəgzan-net təqqima dağ

adag n əlyibada n əssənəman tətatta, ak wərgex a sər-əs d-awəy adi ad ammazray iduf wa iga, təzzar ad itattu isan win təzəgzam y əssənəman ənta da?

¹¹ Dağ adi təssəxrakax əs masnat-nak ta tagget amadray-nak was wər issohat əzəgzan-net s ənta da əddəlil-net a fəl aba Əlməsix.

¹² As təbbəkkadam imədrayan-nawan as wər issohat əzəgzan-nasan əs təməwit tədi, wədi Əlməsix a təbbəkkadam.

¹³ Adi da fəlas, kud amensay wa tatta a z'iqqəlan y amadray-nin təsənkəft, wədi, nak, wər di-ilkem ad əlasax tettay ən şan, fəl a das-wər-əqqləla təsənkəft.

9

Təbəllant ən Buləs fəl əşşəxəl-net y Əlməsix

¹ Awak nak, wərgex əlləlli a əmosa? Wərgex ənəmmazul ən Yaysa Əlməsix a əmosa? Wərgex ənâyax Əməlinana Yaysa? Wərgex kawanay iman-nawan tənfa ta dutəgmadat əşşəxəl-in y Əməli a təmosam.

² Kud xur aytedan wiyyad wər əmosax anammazul, da xur-wan illikan as əmosaq-qu; adi da fəlas əzəgzan-nawan s Əməli a imosan ejwal ən tişit-in anammazul n Əməli.

³ Ənta da awa z'anna y a sər-əs əkkəsax iman-in dağ aytedan win di fall-i ganninen ark aratan:

⁴ Awak nakkanay inəmmuzal alxaq a wər nəla n ad nəgrəw a nətša d a nəşwa dağ əşşəxəl-nana?

⁵ Awak nakkanay tarrayt a wər nəla n ad nidaw əd təntut n iyyan dağ-na təmosat tamadrayt-nana dağ əddin dağ əşikəl, awa taggin nəmmuzal win hadatnen, taggin-tu deş mədrayan n Əməli Yaysa əd Butros?

⁶ Məş, nak əd Barnabas xas a wər nəla alxaq n ad nəddər dağ tişit-nana inəmmuzal? Kundaba ad nəddâr dağ əşşəxəl ən fassan-nana?

⁷ Məni dad kala ad itawanay soji irazzaman i man-net əşşəxəl wa itaggu? Wala əmagyak wər nətəttu tənfa ən tawagost-net? Madəş amadan wər nəsəssu ax n aharay a dər inittaf?

⁸ Awak arat a d-inzâm awedan gar-es əd man-net a dawan-ganna da, məş ak Əttawret da awa da a inna?

⁹ Fəlas a inna Əttawret: «Ad wər tədbəxa y azgar təzidizdiyiza dağ alkama itabakat-ak-tu.» Awak zələyat dağ zəgran a fəl inna Məşşina awen?

¹⁰ Wərgex əddəlil-nana nakkanay a fəl inna awen? Awalla illikan as əddəlil-nana a fəl iktawaktab awen fəl ad agu awedan wa igayyakan tawagost əd wa itabbakken tənfa

ta tat-du-təgmadat attama n ad əgrəwan adagar-nasan daɣ tənfa ten.

¹¹ Dad zamas nakkanay a d-issədwalan daɣ wallan-nawan tənfa ta du-təfalat Infas wa Zəddigan, awak arat zəwwəran a imos a kawan-d-igməd sər-na a təla əddənət?

^{12a} Kud əllân-tu aytedan as kawan-iwar alxaq-nasan, awak wərgəɣ ogar-tu wa-nana?

^{12b} Mišan harkid adi, wər daɣ-wan nəgmay alxaq n əşşəxəl-nana; kalar nəzmar y arat kul, fəl ad wər nagu arat a z'iqqəlan təsənkəft y awedan waliyyan igdəl-as awen tesalay y Əlinjil n Əlməsix.

¹³ Awak masnat a wər təgem as aytedan win şaqqalnen daɣ Ahan wa Zəwwəran n Əlyibada, ehan en da a tan-ihakkin isudar-nasan; win əşxalnen deɣ ɣur majmar wa daɣ taqqadnat təkutawen, əlân adagar-nasan daɣ təkutawen en?

¹⁴ Awen da a inna Əməli, omar s âs, aytedan win tagginen isalan n Əlinjil, əddəranet daɣ-as.

¹⁵ Mišan nak wər daɣ-wan əgmaya alxaq-in waliyyan; wala kattabaɣ-awan-in aratan win əmərədda fəl a daɣ-wan tan-əgməya. Fadda əssofaɣ a di-iba y a daɣ-i ikkəs awedan fərregat n igi n abarag wədi.

¹⁶ Wər ələɣ tarrayt waliyyat s igi n abarag n as taggaɣ isalan n Əlinjil; fəlas əşsil a di-imos igi-nasan. Iket alɣazab adi iqqəl as tan-wər-əgeɣ.

¹⁷ Ənnâr tara ən man-in a daɣ tagga isalan n Əlinjil, wədi ələɣ alxaq; mišan dad imos as, igi wa dasan-t-agga ilzâm-i, imos əşşəxəl a di-issiwar Məşşina,

¹⁸ wədi ma imosan alxaq-in? Adi za igi ən salan n Əlinjil y aytedan bannan, wər daɣ-san əgmaya alxaq waliyyan wa fall-asan ələɣ daɣ igi-nasan.

¹⁹ Nak əheɣ tara ən man-nin, wər di-ila awedan waliyyan, mišan əgeɣ iman-in akli y awedan kul fəl ad d-awəy awen əs taşşam n aytedan əzəgzan s Əlməsix.

²⁰ As əggazaɣ Kəl-Əlyəhud ad əqqələɣ şilat n iyyan daɣ-san fəl ad əzzəgzənan s Əlməsix; as əggazaɣ win əlkammen y Əttawret, ad əqqələɣ şilat n iyyan daɣ-san, kuddeɣ nak wər das-əlkema, fəl ad əzzəgzənan s Əlməsix.

²¹ As əggazaɣ aytedan win wər nəlkem y Əttawret, ad əqqalax iyyan daɣ-san fəl ad əzzəgzənan s Əlməsix; awen wər imos almaɣna-net as wər əlkema y əşşəriɣa ən Məşşina, kalar əlkəmaɣ-as fəlas əşşəriɣa wa n Əlməsix as əlkama.

²² As əggazaɣ aytedan win as wər issohat əzəgzan-nasan, ad əqqələɣ şilat n iyyan daɣ-san fəl ad əzzəgzənan s

Əlməsix; tәмəwit tәdi as əqqala arat kul y aytedan kul fəl a dağ-san səxxəlləsa wiyyad.

²³ Taggağ adi kul fəl əddəlil n Əlinjil, fəl ad ədrəwa albaraka-net d aytedan win sər-əs əzzəgzənən.

²⁴ Masnat a wər təgem âs, tammazaga aytedan aggotnen a tat-taggaznen, mişan awedan iyyanda a tat-d-itarnin? Dağ adi azəlat, tagim azzal wa kawan-du-z-isassarnin.

²⁵ Amaran aytedan kul win əganen ənnəyat ən tam-mazaga, əşinən labasan a ətaggin i man-nasan. Taggin awen fəl ad əgrəwan alak ixaşşadan, as iga awen nakkanay nətagg-ay fəl ad nəgrəw alak wa wər nəxəşşəd.

²⁶ Adi a fəl ozala nak, əzzillağa s adag wa n təzərəst; aheç şaşşelan n awedan ihakkin imankasan wər nəsəsikəy.

²⁷ Zağazzab təğəssa-nin wəllen, əgeq-qat taklit-in, fəl ad wər əgməda tammazaga, aqqama wər əgrewəğ alak, nak wa immâlan Əlinjil y aytedan.

10

Taryəmt fəl əlxibada n əssənəman

¹ Amaran imədrayan-in, wər areğ a dawan-ijhâl âs, imarawan-nana as d-əgmadan akal ən Masar ketnasan tollây dənnəg-san tagarak, ketnasan değ as ərdəğan dağ agaraw;

² iha awen şaşşelan n âs, ətiwasalməğan ketnasan dağ tagarak ten d agaraw wen fəl aşşaddat ən tassağ ta əgan d ənnəbi Musa.

³ Ketnasan değ ətsân amensay wa fall-asan d-izazzabbat Məşşina dağ jənnawan;

⁴ əşwân değ ketnasan dağ aman win dasan-d-ikkas Məşşina. Aman win, əngâyan-du dağ təhunt a dər-san təddewat ta tan-ikfa Məşşina, amaran təhunt ta, Əlməsix a tat-imosan.

⁵ Mişan harkid awen, taşşam-nasan wər təgrez i Məşşina. Adi a fəl wazawaznat təğəswen-nasan dağ taneray.

⁶ Amaran aratan win, əgân əmosan-anəğ almasal fəl ad nənkəd, naqqam wər nəsaddaran igi ən talbast ta əgan.

⁷ Ad wər təqqəlam aytedan əxbâdnən əssənəman, awa əgan wiyyad dağ-san; id iktâb as: «Təqqim tamattay, tətşa, təşwa təzzar təbdad, təggaz tara ən man-net.»

⁸ Ad wər nətaggu değ əzzəna, şilan awa əgan wiyyad dağ-san, təzzar ihlak dağ-san Məşşina sanatat təmərwen n əgim əd karad dağ əzəl iyyanda;

⁹ wala nagu tənəgməyt y Əlməsix awa das-əgan wiyyad dağ-san, təzzar a tan-əddadnat taşşolen, itiba-tan.

¹⁰ Wala deŷ təgətəntənam awa əgan wiyyad daŷ-san, təzzar ihlak-kan angalos wa n ənabaz ən man.

¹¹ Amaran awen kul igraw-tan fəl ad iqqəl almasal y aytedan, amaran itawaktab fəl a das-nənkəd nakkanay win fəl du-tosa təzərəst n əddənet.

¹² Daŷ adi awedan wa ƣur illa as ənta ikna tebdday, inkədet ad wər ifətəqqət.

¹³ Ətəwəjərrab təgam kul əgân-tu dat-wan aytedan; amaran Məşşina wər d itəqqəl daŷ allaman wa kawan-iga, wər z'ardu itəwəgg-awan ətəwəjərrab as wər təfregam. Amaran as tətawajərrabam, a kawan-akfu fərrəgat ən zəmmerat y-as, ar-awan tarrayt n ədərrəg y-as.

¹⁴ Daŷ adi, imaran-in, darragat y əlƣibada n əssənəman.

¹⁵ Awal wa itaggu awedan y aytedan əlānen tayttay a dawan-tagga, ənzərat daŷ-as kawanay iman-nawan ad tənəyam tidət-net.

¹⁶ Takabart n albaraka ta nətigudəy i Məşşina, as daŷ-as nəşwa, awak wərgəy tadrəwt a nəga əddi azni n Əlməsix wa inƣalan as t-aba? Tagəlla za ta nətuzan gar-ena! As tat-nətsə, awak wərgəy tadrəwt a nəga əddi təxəssa n Əlməsix?

¹⁷ Id tagəlla iyyadda a imos Əlməsix, nakkanay deŷ harkid igət-nana təxəssa iyyadda a nəmos fəlas ketnana nədrâw tagəlla iyyadda ta.

¹⁸ Ənəyat şikutawen şin taggin Kəl-İsrayil! Ak wərgəy aytedan win tanat-tagginen tattin-tanat əddəwan daŷ əlƣibada wa taggin i Məşşina daŷ adag wa daŷ taqqadnat təkutawen-nasan?

¹⁹ Awak mas gammayaŷ əd tənna-net da? Adis tənna a tagga əssənəm madəŷ imensewan tiwakfanen y əssənəm əmosan arət?

²⁰ Kala kala! A ganna, şikutawen şin di taggin aytedan win n aljahilan almaƣna aytedan wər nəmos Kəl-Əlyəhud, kələsuf as tanat-əkkâtan wərgə Məşşina. Amaran, wər areŷ ad tədrəwam arət waliyyan d aljaynan.

²¹ Wər təfregam ad təsəssim daŷ takabart ta kawan-du-təsaktit tanayla ta iga Ƴaysa azni-net fall-awan, təsəssim deŷ daŷ takabart ta daŷ sassin aytedan win əƣbadnen kələsuf. Wər təfregam ad tədarrəwam tagəlla ta kawan-du-təsaktit tehakkay ta iga Ƴaysa təxəssa-net fall-awan, tədarrəwam deŷ tagəlla ta tattin nəƣbidan ən kələsuf.

²² Məx tara a nəga ad nəssənkər şismiten daŷ Əməli? Awak norn-ay?

²³ Təgənim: «arət kul i xalalan», mişan wərgəy arət kul təh-ay tənfa. Təgənim deŷ: «arət kul i xalalan», mişan wərgə arət kul işatu awedan.

²⁴ A tu-wər-iməl waliyyan daɣ-wan igammayan tənfa ta n man-net ənta ɣas, kalar igməyet awa z'anfin imahharagan-net.

²⁵ Isan kul win nazzinen daɣ əssuk, təlâm tarrayt n a tan-tazzanzim, tatšim-tan, da wər təssəstanam d iguz wa d-əgan,

²⁶ id ənnan Əlkəttaban: *Amaɗal d awa t-ihan ketnet in Əməli.*

²⁷ As daɣ-wan igmay awedan wər nəzzəgzan s Əlməsix a t-in-tasim, təzzar tərɗam as, amensay kul wa issənsa dat-wan, atšat-tu da wər təssəstanam d iguz wa d-iga.

²⁸ Mišan as dawan-inna awedan: «Amensay di itiwakat y əssənəm», wədi a tu-wər-tatšim fəl əddəlil n awedan wa dawan-innan adi, d əddəlil n iduf wa iga.

²⁹ Wər gənna y iduf wa təgam daɣ amensay di kawanay iman-nawan, kalar iduf wa daɣ-as iga awedan wa hadan as ganna. Amaran mafel as di-igaddal iduf n awedan iyyan, igi n arat as ələx tarrayt n igi-net?

³⁰ Kud amensay wa tatta har təggodayaɣ i Məššina as təggazaɣ šin tattay, mafel as di-ilayyan awedan fəl as t-ətšəx?

³¹ Daɣ adi, gər za tettay a tətəggim wala təsəssim, a iqqal arat wa tətəggim, agiwat-tu fəl ədkul ən Məššina.

³² Ad wər təqqələm təsənkəft y awedan waliyyan, gər za Kəl-Əlyəhud wala aytedan win tan-wər-nəmos wala deɣ aytedan n Əlkənisat ən Məššina.

³³ Agat awa tagga; nak a igammayan d ad əgrəzaɣ y awedan kul daɣ arat kul; wər gəmməya tənfa i man-nin, kalar tənfa y aytedan aggotnen a gammaya fəl ad əgrəwan əlxillas ɣur Məššina.

11

¹ Ǝqqələt aytedan a di-əttilələn s əmmək was əttələla nak da Əlməsix.

Əlxibada ən Məššina daɣ Əlkənisat

Awa iwaran meddan əd tədoden daɣ Əlkənisat

² Ǝmmâlaq-qawan imədrayan-in fəl təkatawt ta di-du-tətəggim daɣ arat kul d iduf wa təgam alɣadaten s əmmək was dawan-tanat-əssəbdada.

³ Mišan areɣ ad təssənam as, aləs kul, Əlməsix a imosan eɣaf-net; tantut, aləs a imosan eɣaf-net; Əlməsix, Məššina a imosan eɣaf-net.

⁴ Amaran id iggaz aləs šin əlxibada ən Məššina daɣ Əlkənisat itattar madəɣ igraw emel y aytedan isalan a fall-as d-izizabbat Məššina, issilsa eɣaf-net, wədi izabaz wa das-imosan eɣaf təkarakit.

⁵ Eges tantut kul ta tətattarat madey təgrâw emel y aytedan isalan a fall-as d-izizabbat Məşşina, wər təssəwar aɣaf-net, daɣ Əlkənisat, tədi təzabaz wa das-imosan eɣaf təkarakit, šilat n as təsitabalbal.

⁶ Tantut ta wər nəşewir eɣaf-net, tədi təfnəzet anzadan-net! Mišan dad imos i təntut təkarakit afanaz n anzadan madey əsəttəbəlbal, wədi təssəwəret eɣaf-net!

⁷ Aləs ənta wər t-ilzem ad assalsu eɣaf-net id Məşşina a t-id-ixlakan əs šaššelan-net, ikf-ay tanaya šilat ən ta-net; mišan tantut ənta, saɣmar n aləs a təmos.

⁸ Fəlas wərge aləs a d-ixlak Məşşina daɣ təntut, kalar tantut a d-ixlak Məşşina daɣ aləs.

⁹ Wərgex deɣ aləs a d-itawaxlakan fəl əddəlil ən təntut, kalar tantut a du-tətaxlakat fəl əddəlil n aləs.

¹⁰ Adi a fəl ilzam tantut ad iwâr asannal ən taɣmar eɣaf-net, fəl udəm n angalosan.

¹¹ Mišan ya dat Əməli, aləs harkid təntut, akkiyyan iqqân daɣ wa hadan;

¹² Fəlas kud imos as tantut, aləs a du-təɣmad, da aləs, tantut a d-igmad, amaran arat kul Məşşina a d-ifal.

¹³ Kawanay iman-nawan ma tənnam: Awak ihôr ad tətattar təntut əs Məşşina daɣ aljamaɣat n əlməsixitan wər təssəwar?

¹⁴ Awak wərgex əttəbiɣat-nawan iman-net, təssosan-kawan as igi ən jəkkad imos təkarakit fəl aləs?

¹⁵ Mišan tantut ənta, ijəkkad almaqam a tat-hakkin? Id Məşşina a das-tan-ikfan y assatar n aɣaf-net.

¹⁶ Kud ill-ay awedan amaran irân ad ammazax adi, issenet as: Gər za nakkanay wala Əlkənisaten ən Məşşina, wər nəla iyyat alɣadat wər nəmos tədi.

Imensewan win saktan n Əməli

Šisəssukay šin tawagğanen alwaq wa n mensewan win saktan n Əməli

¹⁷ Amaran ammaran win dawan-tagga da, wər əmosan eməlan-nawan, id imənəyan-nawan win əlɣibada wərgex əšitəy a kawan-taggin, kalar ələqqam a kawan-suxulan.

¹⁸ Fəlas arat wa azzaran, wa sər-wan əsləx âs, id təmmənəy aljamaɣat n Əlkənisat-nawan y əlɣibada, ad təqqəlam šizunawen; amaran wər aba a əzzigzanax daɣ batu di.

¹⁹ Mišan ya əşšil ad təqqəlam šizunawen fəl a daɣ-wan təwənəyan win əhornen d ətəwəsəxmər, wərgex?

²⁰ Daɣ adi əmənəy wa tətəggim, wər tu-tətəggim y ad tədrəwam imensewan win saktan n Əməli ɣaysa.

²¹ Fəlas as təggazam šin tattay, akkiyyan daɣ-wan ad ihəz daɣ amensay wa d-eway atš-ay, ayyu əmidi-net; iqqəl âs, wiyyad daɣ-wan za ih-en gələk, amaran win hadatnen isimaswad-tan esmad.

²² Awak inan a wər tələm a daɣ tətšam, tašwim? Mey məlka a təgam Əlkənisat ən Məššina, təzabazam təkarakit win daɣ-as wər nəla arat? Ma dawan-z-anna za? A təram a dawan-aga təmmalen olaɣnen fəl as təgam adi? Wala ənəmihaz!

Imensewan win saktan n Əməli

²³ Fəlas nak iman-in alyadat ta di-d-oyya Əməli iman-net a dawan-d-oyyeɣ, a tat-imosan as: Ahad wa daɣ z'itəwəggu Əməli Ƴaysa daɣ fassan, idkal tagəlla,

²⁴ iga igodan i Məššina, təzzar irz-et, inna: «Taɣəssa-nin adi, [tətiwarzat] fəl əddəlil-nawan. Taggat awa da əs təməwit ta da, imos adi isaktan-in.»

²⁵ Zund əmmək en da âs, as ətšan, idkal təkabart, innasan: «Təkabart ta, arkawal wa aynayan ən tassaɣ a təmos gər Məššina əd tamattay-net. Arkawal wa, azni-nin a t-isattaddan. I daɣ-as təšwam, tagim adi isaktan-in.»

²⁶ Fəlas id tətšam tagəlla ta, təšwam deɣ daɣ təkabart ta, wədi isalan ən tamattant n Əməli Ƴaysa a tətəggim, har əzəl wa du-z-iqqəl.

Təttay ən mensewan win saktan n Əməli əs təməwit toɣadat

²⁷ Awen daɣ a fəlas, i itšan tagəlla ta təmosat isaktan ən təɣəssa n Əməli Ƴaysa, madəɣ iga daɣ təkabart ta təmosat isaktan n əzni-net tessay təgat s iba n safrar, wədi ibbikkad təɣəssa n Əməli Ƴaysa d əzni-net, amaran ad t-ibəz əššəriɣa s adi.

²⁸ Daɣ adi akk awedan aššəggaret iman-net təzzar, alwaɣ wədi amaran atšu tagəlla ta, ašəw daɣ təkabart ta;

²⁹ fəlas awedan wa itšan tagəlla ta, madəɣ išwa daɣ təkabart ta, wər igra arat wa idraw adi əd təɣəssa n Əlməsix Ƴaysa, wədi awedan izzibaz iman-net əššəriɣa ən Məššina.

³⁰ Adi a fəl kawan-əhan aytedan aggotnen ən nərkam əd wiyyad aggotnen ən miranan, aba daɣ-wan fadda wiyyad.

³¹ Ənnar nazzâr əs šəggara ən man-nana, wər dana-z-ibəz əššəriɣa.

³² Dər iga awen da ya, Məššina itəbaz-ana s əššəriɣa fəl a danaɣ-aɣəd, naqqam wər danaɣ-issərtay d əddənet daɣ əššəriɣa wa ilkaman.

³³ Daɣ adi imədrayan-in, id təddewam y ad tədrəwam imensewan, ad tətəqqalam i mədrayan-nawan!

34a Kud iyyan daɣ-wan ih-ay gələk, atšet daɣ ahan-net təzzar, fəl ad wər iqqəl əmənəy-nawan arat a sər-wan du-z-awəyan a kawan-abəz əššəriɣa.

34b Amaran daɣ batu ta təqqalat šixawšiwən šin hadat-nen, as din-oseɣ a tanat-akna.

12

Šihəkkuten šin itaggu Infas wa Zəddigan

1 Amaran imədrayan-in, daɣ batu ən təmətəkwəyen šin ihakku Infas wa Zəddigan, wər areɣ a daɣ-asnat təjhâlam.

2 Təssânam as dat iguz-nawan tarrayt ta n Məššina, aytedan a təmosam əxrâknen, əlkâmnen y əssənəman wər nəšiwil.

3 Awen da fəl areɣ ad təssənəm as, wər t-illa awedan a daɣ innoda Infas ən Məššina a du-z-inkəran ad igannu: «Məššina təlɣâna Ƴaysa!» wala deɣ ill-ay awedan ifrâgan ad annu: «Ƴaysa imos Əməli!» ar s a daɣ-as innoda Infas wa Zəddigan.

4 Amaran šihəkkuten əzzənəfan a əmosnat, mišan Infas iyyanda ɣas, a t-imosan Infas wa Zəddigan ən Məššina s ənta a tanat-ihakkin ketnasnat.

5 Tarrayen n əššəɣəl əzzənəfan a əmosnat, mišan Əməli di n iyyan as nəšɣal.

6 Igitan əzzənəfan a əmosan, mišan Məššina di n iyyan a ihakkin aytedan kul masnat n igitan kul win taggin.

7 Akk ənalkim igrâw ɣur Infas wa Zəddigan təhəkkut a tu-təssifragat əššəɣəl imosan tənfa-nana ketnana.

8 Awedan za iyyan ihakk-ay Infas wa Zəddigan igi ən batuten ən təla n əgərri, iyyan amaran ihakk-ay Infas igi ən batuten ən masnat.

9 Iyyan ihakk-ay Infas wa Zəddigan əzəgzan, iyyan ihakk-ay fərregat n əzuzəy ən miranan,

10 iyyan ihakk-ay fərregat n igi ən təlməɣjujaten, iyyan igrâw emel y aytedan isalan win fall-as d-izazabbat Məššina, iyyan ihakk-ay fərregat ən zələy gər təhəkkut ta n Infas wa Zəddigan əd ta tat-wər-nəmos. Iyyan ihakk-ay fərregat n iššiwəl n awalan wər nətawazday, iyyan ihakk-ay əfəssər n awalan win di;

11 mišan Infas wa Zəddigan wa da a itaggin aratan di ketnasan, akk awedan ihakk-ay təhəkkut ta das-ira.

Taxəssa əd təsəllad-net aggotnen

12 Ənəyat tišit ta təga təxəssa n awedan arat iyyanda igân daɣ təsəllad əknanen igət, eges harkid igət-nasnat, taxəssa iyyadda a əmosnat. Awen da za a əgan aytedan

win əlkamnen y Əlməsix, s əntanay a əmosnen təxəssa-net.

¹³ Fəlas gər za nəmos Kəl-Əlyəhud wala aytedan win wər tan-nəmos, gər za nəmos eklan wala illalan, Infas wa Zəddigan wədi da, a dəy nətawasalmağ ketnana, nəqqal təxəssa iyyadda. Ketnana dəy Infas wa Zəddigan wədi da, a idnayan iwallan-nana.

¹⁴ Amaran təxəssa wər təga dəy təslət iyyadda, kalar şisəllad aggotnen a dəy təga.

¹⁵ As d-iggad adar inna: «Nak wər di-təla təxəssa id wər əmosağ əfus.» Awak ikkâs-tu awen dəy tişit n iyyat dəy təsəllad ən təxəssa?

¹⁶ As tənna təməzzuk: «Nak wər di-təla təxəssa, id wər əmosağ şat.» Awak ikkâs-tat awen dəy tişit n iyyat dəy təsəllad ən təxəssa?

¹⁷ As təqqal təxəssa ketnet şat, mas z'aslu awedan? As təqqal təxəssa ketnet təməzzuk, mas z'iwət awedan ađu?

¹⁸ Kalar Məşşina a igan şisəllad dəy təxəssa, akkiyyat ig-et dəy adag was ira.

¹⁹ As imos as təxəssa ketnet təslət iyyadda a təmos, wədi ma z'iqqəlan təxəssa?

²⁰ Kalar şisəllad əknanen igət a t-əllanen, mişan təxəssa ənta iyyadda.

²¹ Awen dəy a fəl wər təfreg şat ad tannu y əfus: «nak wər sər-ək əddərar», wala dəy annu ağaf i daran: «nak wər sər-wan əddərar.»

²² Fadda şisəllad ən təxəswen-nana şin n as nəga iduf n as ərkamnat, əntanatay a dana-təha tənfa wəllen.

²³ Amaran şin di as çur-nağ iga as wər farornat, əntanatay a nəssəğmar wəllen. Dəy adi, şisəllad-nana şin əmosnen izuf, əntanatay a nəkannu assatar.

²⁴ Şin wər nəmos izuf amaran, əntanatay wər əddərarnat s assatar. Məşşina iman-net a d-ixlakan təxəssa tosâğ, iga as təməwit a fəl tawasaymarnat təsəllad-net, wəllen şin əddərarnen s adi,

²⁵ fəl ad wər təzun təxəssa gar-es, kalar əkkulluk ən təslət ad təssən dəy təmidit-net.

²⁶ Awen dəy a fəlas, as təlaggay iyyat dəy təsəllad ən təxəssa, şisəllad kul şin hadatnen əntanay da, ad laggaynat. As tətawazazwar dəy iyyat dəy təsəllad, şisəllad kul şin hadatnen ad fəliwəsnat.

²⁷ Kawanay təxəssa n Əlməsix a təmosam, amaran akkiyyan dəy-wan təslət ən təxəssa-net a imos.

²⁸ Adi a fəlas Əlkənisat, dəy tizarat iga dəy-as Məşşina inəmmuzal, dəffər-san ənnəbitan; dəffər ənnəbitan, əlfəqqitan; dəffər adi aytedan win əlanen fərregat n igi

ən təlməxjujaten, əlkaman-asan win ikfa fərregat n əzuzəy ən təwərnawen, əd win tilalnen y aytedan, əd win ikfa fərregat ən tizart y aytedan, əd win ikfa fərregat n əšiivəl n awalan wər nətawazday.

²⁹ Awak ketnasan as əmosan inəmmuzal? Awak ketnasan as əmosan ənnəbitan? Awak ketnasan as əmosan əlfəqqitan? Awak ketnasan as əgrawan fərregat n igi ən təlməxjujaten?

³⁰ Madex əgrāwan fərregat n əzuzəy ən təwərnawen, meyx fərregat n awalan wər nətawazday, meyx fərregat n əfəssər-nasan? Wala ənamihaz!

Tara: Tarrayt ta n tidət

³¹ Dağ adi səddirənat s əlluğ agaraw ən təhəkkuten šin ofanen! Amaran a kawan-assakna əmərədda tarrayt ta tofat tarrayen kul.

13

¹ Kud əššewalağ awalan n aytedan harkid win angalosan da, as di-wər-təha tara, wər izlay awal-in d əməsli n anayna madex əməsli n əğlal ən təzoli itatawatan.

² Kud əgrāwa təhəkkut n amel ən salan a d-izizabbat Məššina, wala əgrāwa əssiran kul əd masnat kul, wala ələy əzəğzan ikmālan a di-issifragan əsəggəli n ədyağan, da, as di-wər-təha tara, wər əmosağ wala.

³ Kud əzuna təla-nin kul i tələqqawen, əskatağ iman-in y əlxibada ən Məššina har xur-i iməl as oğarağ aytedan, da, as di-wər-təha tara wər di-z-anfu adi əs wala.

⁴ Awedan wa taha tara, təh-ay təzaydart, olâğ; wər izway y awedan waliyyan, wər itaggu ibaragan, wər idkel iman-net dənnəg aytedan.

⁵ Awedan taha tara wər itəggu əmazal n iba ən təkarakit, wər igəmməy awa tu-z-anfin ənta ɣas, wər rəxis alham-net, wər itəttəf dağ man ark amazal a das-iga awedan;

⁶ wər t-isədəwit arat wər noyed, kalar tidət a tu-təsadawet.

⁷ Faw izizaydar, faw izzigzan, faw igâ attama, izmâr y arat kul.

⁸ Tara, wər das-ilkem ad təxrâd, təhəkkut n amel ən salan a d-izizabbat Məššina ilkâm a tu-wər-təlla, ta n əšiivəl n awalan wər nətawazday ad tərəz, ta n masnat ənta da ilkâm a tu-wər-təlla;

⁹ fəlas masnat-nana wər tənda, emel-nana isalan win d-izizabbat Məššina deyx wər inda.

¹⁰ Mišan as du-tosa alkamalat, awa wər nəkmel ad iba tamayamat-net.

¹¹ Harwa əmosa barar, awal ən barar a taggaḡ, taggaḡ imedranan win barar; əley tayttay ta n barar; mišan as əqqalaḡ aləs, oyyeḡ-in aratan win barar dəffər-i.

¹² Əmərədda nəhannay as, masnat-nana, wala ad təggət, wər təmos wala dəgma n ta təlkamat; izlay-tanat awa izlayan anay n awedan daḡ šişset d anay-net udəm s udəm. Əmərədda masnat-in wər təkmel, mišan ilkâm ad təkməl, tagu alkamalat ta təga təməzdəyt ta di-iga Məşşina.

¹³ Amaran əmərədda karad aratan win, a t-əllanən, a tanimosan: əzəgzan d attama əd tara; mišan wa tan-ogaran tara.

14

Şihəkkuten şin Infas wa Zəddigan d akaras n Elkənisat

¹ Əgməyat za ad təqqəlam aytedan taha tara; təsəddirənam wəllen agaraw ən mazalan win ihakku Infas wa Zəddigan, wəllen emel ən salan win d-izizabbat Məşşina.

² Fəlas awedan wa ifragan əşşiwəl n awalan wər nətawazday, Məşşina as išşewal wərgəḡ aytedan; id wər t-illa awedan igrân əssiran win as t-ikfa Infas wa Zəddigan emel-nasan.

³ Mišan awedan wa igrawan emel ən salan a fall-as d-izizabbat Məşşina wədi aytedan as išawal, isisuhit əzəgzan-nasan, isasmad iwallan-nasan, italam-asan fəl man.

⁴ Awedan wa išşewalan awalan wər nətawazday, əzəgzan wa-net ḡas a isisuhit s adi, mišan awedan wa igrawan emel ən salan a d-izizabbat Məşşina wədi Elkənisat ketnet as isisuhit əzəgzan-net.

⁵ Nak areḡ ad təşşiwəlam ketnawan awalan wər nətawazday, mišan awa dawan-əssofaḡ, ad təgrəwam təhəkkut n amel ən salan win d-izizabbat Məşşina. Awedan wa igrawan emel ən salan a d-izizabbat Məşşina, ogar wa igrawan fərregat n əşiwəl n awalan wər nətawazday, ar s ad imos as ifrâḡ ad itafassar awa igannu fəl a sər-əs isəssuhət əzəgzan n Elkənisat.

⁶ Amaran əmərədda, imədrayan-in, nənna masalan oseq-qawan-in əşşewalaḡ awalan wər nətawazday, awak mas kawan-z-anfu adi? Mišan as kawan-in-oseḡ əmaləḡ-awan arət isinafalal Məşşina, madeḡ əşşita masnat ta təlam, madeḡ agaḡ-awan batu a fall-i d-izizabbat Məşşina madeḡ əsassaḡraq-qawan təssunt a du-təgmâdat Əlinjil, wərgəḡ a kawan-anfu adi?

⁷ Wala aratan win as tawaggin səwat, nənna masalan təsənsəq madeḡ təhərdant da, as wər əgen ewet olâḡan, manəmmək as z'izləy awedan aggay wa əgan?

⁸ Esək deḡ wa itawansayan y ad səmmutəgan aytedan y əməgər, as das-wər-itawagga anasaḡ wa itawassanan, ma z'isəmmutəgan y əməgər?

⁹ Kawanay da za, awen da: as təşşewalam wər tələffədam s əlxərəfan as itiwassan almaḡna-nasan, man əmmək as z'issən awedan waliyyan awa təgannim? Zun təşşewalam daḡ aḡu!

¹⁰ Igmâd aššak âs, əzzənəfan n awalan aggotnen a əhanen əddənet; mišan wər tan-iha is wərgəḡ ila almaḡna.

¹¹ Amaran as wər əssenəḡ iyyan daḡ-san, ad əqqələḡ s awedan wa t-işşewalan awedan ən tama, iqqəl-tu sər-i nak da.

¹² Daḡ adi kawanay da, dad zamas təsidarânam wəllen agaraw ən təmətəkwayen šin ihakku Infas wa Zəddigan, adi za, əşḡəlat daḡ agamay ən šin za səssuhətne əzəḡzan n Əlkənisat.

¹³ Awen da a fəlas awedan wa işşewalan awalan wər nətawazday, igməyet daḡ Məşşina ad t-akfu fərregat n əfəssər-nasan.

¹⁴ Fəlas as imos as tattara daḡ awalan wər nətawazday, iman-in ḡas a tattarnen, tayttay-in ənta, wər təşḡel daḡ təwatriwen šin tagga.

¹⁵ Daḡ adi ma z'aga? Adi za, ad əttərəḡ daḡ man-in, əttərə deḡ əs tayttay-in daḡ awal isisagran; agaḡ tagaytalt əs man-in, agaḡ-qat deḡ əs tayttay-in daḡ awal isisagran.

¹⁶ As wər iga adi, as iqqal âs tətəḡḡaḡ igodan i Məşşina əs man-nak ḡas, daḡ awalan wər nətawazday, awak awedan wa tu-wər-nəssen, wa dak-issəsəman daḡ Əlkənisat, manəmmək as z'annu i təwatray-nak: «Amin!», ənta wər issen awa təganna?

¹⁷ Illikan as igodan-nak i Məşşina hossayan, mišan wər isassahat adi əzəḡzan n aytedan win dak-əssəsəmnen id wər əssenən awa təganna.

¹⁸ Nak tigudəyaḡ i Məşşina as kawan-ogara ketnawan awal daḡ awalan wər nətawazday!

¹⁹ Mišan as aheḡ Əlkənisat, əssofaḡ igi ən wala ḡas səmmos əlxərəfan a za tawagrinen y ad əzzəbəzaḡ aytedan əlfaydat, igi ən maraw gim n əlxərəf daḡ awalan wər nətawazday.

²⁰ Imədrayan-in, ušarat, tammazzayam əd tišit ən bararan! Tidət as, daḡ awa iqqalan igi ən təllabəst, əqqələt šilat ən bararan; mišan daḡ awa iqqalan əḡərri n aratan win, əqqələt aytedan əkmâlne.

²¹ Ənnan Əlkəttaban: «İnna Əməli: "Tamattay ta, a das-əşşiwələḡ daḡ awal wər təssen, igməd-du sər-san awal

wen imawan ən naftayan, mišan harkid awen wər di-z-abbardagan."»

²² Adi a fəlas, əšiwəl n awalan wər nətawazday, asannal n əššərixa ən Məššina a imos y aytedan win wər nəzzəgzan, wərge win əzzəgzannen; as iga awen, awedan wa ikfa Məššina emel ən salan a d-izizabbat Məššina, wədi isalan win itaggu, asannal n arraxmat a mosan y aytedan win əzzəgzannen, wərge win wər nəzzəgzan.

²³ Nənna masalan Əlkənisat ketnet a təddewat day adag iyyanda, təzzar əššewalan ketnasan awalan wər nətawazday, har tan-d-osan aytedan wər nəgra awa imos awen, madex aytedan wər nəzzəgzan, wərgey ad annin əmməskəl a əgan?

²⁴ Mišan as imos as ketnaşan əmmâlan awal imosan emel ən salan a d-izizabbat Məššina har tan-d-osa awedan wər nəzzəgzan, madex iyyan wər əhen isalan n awen, ad t-əssusənan awalan kul win as isallu əddi as igâ ibakkadan, issən dey as ad t-ibəz əššərixa ən Məššina;

²⁵ ənta da affaggin aratan kul win əhanen əwəl n awedan wen, təzzar issəjəd i Məššina, ixbəd-tu, annu: «Tidət as illa Məššina gar-ewwan!»

Ənnizam day alwaq wa n əlyibada

²⁶ Day adi, imədrayan-in, mas imməkkan a tu-tagim? Adi za as təmmənayam day adag iyyanda, wiyyad day-wan aginet şigaytalen, wiyyad sassayrinet aytedan, wiyyad əməlanet awa dasan-isannafalal Məššina, wiyyad əššiwəlanet awalan wər nətawazday, wiyyad affassaranet-tan. Əqqəlanet aratan win di kul, arat a z'isəssuhen əzəgzan-nawan.

²⁷ Kud wiyyad day-wan a şawalnen awalan wər nətawazday, ad wər akəyan əššin aytedan madex karad. Əššiwəlanet s iyyan iyyan, amaran iməl-tu awedan iffəssaran awa gannin.

²⁸ Kud wər t-illa awedan a t-iffəssaran, affastinet, ad wər əššiwəlan day Əlkənisat, əššiwəlanet day man-nasan gar-əssan əd Məššina.

²⁹ Amaran win əmosnen ənnəbitan, əššiwəlanet day-san əššin madex karad, təzzar ašşaggaran aytedan win hədatnen n Əlkənisat awal wa d-izzəbben da.

³⁰ Mišan as d-isanaşafalal Məššina awal y iyyan awedan iqqiman den, awedan wa işşewalan, affastet i wədi.

³¹ Day adi ketnawan təfrəgam ad təmmâlam s iyyan iyyan isalan win d-izazabbat Məššina y aytedan, y ad təsassayrim inalkiman kul, taknim-asan iman ketnasan.

³² Təhəkkut n amel ən salan a d-izizabbat Məššina, immikkən as innôda day-as awedan wa tat-igrawan.

³³ Fəlas Məššina wər ira tanajarwayat, kalar ənnizam olāxan a ira, d alxer, šilat n awa igan daɣ Əlkənisaten ketnasnat, əmosnen tamattay zəddigat ən Məššina.

³⁴ Ad wər šawalnat tədoden daɣ mənənəyan win Əlkənisat, fəlas wər əlenat turagat n awen. Kalar ab-bardagnatet, id adi da as inna Əttawret ad t-aginat.

³⁵ Kud ill-ay arat as ərānat a daɣ-as əssənnat, əssəstannatet meddan-nasnat daɣ aɣaywan; fəlas təkarakit a imos fəl təntut ad təššiwəl daɣ əmənəy n Əlkənisat.

³⁶ Awak təyilt a təgam awal ən Məššina kawanay a d-igmad? Məɣ təyilt a təgam kawanay ɣas a t-iqbalan?

³⁷ Awedan wa daɣ-wan igan iduf n as ənta ənnəbi a imos, madəɣ innoda daɣ-as Infas wa Zəddigan, agret s əlluɣ əs aratan win dawan-kattaba da, əlwajib n Əməli a əmosan.

³⁸ Amaran awedan wa wər nəssəfrar adi, wədi ənta da wər tu-z-issəfrər Məššina.

³⁹ Daɣ adi imədrayan-in, səddirənat wəllen agaraw ən təhəkkut n əmel ən salan win d-izazabbat Məššina; mišan ad wər təgdəlam əšiwəl n əwalan win wər nətawazday.

⁴⁰ Adi kul agiwat-tu daɣ əzzəbun d ənnizam.

Tanakra ən ɣaysa daɣ tamattant

15

Isalan ən tanakra ən ɣaysa daɣ tamattant

¹ Imədrayan-in, əmərədda a kawan-d-assaktaɣ Əlinjil was dawan-əgeɣ isalan-net, təzzəgzanam sər-əs, təlkamam-as s əlluɣ;

² Əlinjil di da a kawan-igan daɣ tarrayt n əɣıllas, kud təttāfam-tu s əlluɣ s əmmək was dawan-t-əmala. As das-wər-təgem adi, əzəgzan ən bannan a təgam.

³ Fəlas isalan win əgrawa nak iman-in a dawan-əgeɣ, amaran isalan win di, eɣaf-nasan as, Əlməsix, aba-tu fəl əddəlil ən bakkadan-nana, imos as adi da ənnan Əlkəttaban.

⁴ Ənnan dəɣ Əlkəttaban, tətawagga təɣəssa-net daɣ təzəkka, as əzəl-net wa n karad d iba, itawasankar-du daɣ tamattant.

⁵ Inafalal-du i Butros, amaran inafalal i nəttulab-net win maraw d əššin.

⁶ Dəffər adi inafalal i tiddawat ən nalkiman togarat səmmosat təmad n awedan, arat daɣ-san aba-tu mišan təššam-nasan harwada təddâr.

⁷ Dəffər adi amaran inafalal i Yaquub, dəffər adi inafalal i nəmmuzal kul.

⁸ Dəffər-san ketnasan a di-inafalal nak da Buləs, nak ihân əlmital ən barar a d-ihəwan dəffər as okay alwaq ən təhəwt-net.

⁹ Fəlas nak inəmmuzal kul ogaran-i, wər əweda fadda a di-itəwənnu anammazul, id kala ad əssəknaq aytedan win Əlkənisat ən Məşşina arkanay.

¹⁰ A iqqal awa əmosa, dâ, əmosaq-qu s arraxmat ən Məşşina, amaran arraxmat ta di-ikfa, wər təbbənnan; fəlas ogaray inəmmuzal kul əşşəxəl, mişan ya wərgəx nak a igan adi, kalar arraxmat ən Məşşina a dəx-i təşxalat.

¹¹ Adi a fəlas, gər za nak, wala dəx inəmmuzal win hadatnen, isalan win di a nətaggu, amaran əntanay a təzzəzanam.

Tanakra ən nəmməttan

¹² Amaran dad gannin salan win nətaggu, Əlməsix inkardu dəx tamattant, manəmmək as gannin wiyyad dəx-wan, inəmməttan wər dəx-san təlkem tanakra dəx tamattant?

¹³ Kud tidət a imos as inəmməttan wər dəx-san təlkem tanakra, wədi Əlməsix da, wər d-itawasankar dəx tamattant!

¹⁴ Amaran kud Əlməsix wər d-itawasankar dəx tamattant, adi za təlxtubaten-nana wər əlenat tənfa waliyyat, əzəgzan-nawan sər-əsnat dəx wər ila tənfa waliyyat!

¹⁵ Amaran arat wədi as iga, nakkanay nəqqal şigəyyawen ən bahu id nətagayyat âs Məşşina issinkar-du Əlməsix dəx tamattant; ənta adi wər z'agu as wər təlkem tanakra dəx tamattant,

¹⁶ fəlas ənnar imos as inəmməttan wər du-zatəwəsənkəran dəx tamattant, adi za Əlməsix da, wər d-itawasankar dəx tamattant.

¹⁷ Amaran kud Əlməsix wər d-itawasankar dəx tamattant, adi za əzəgzan-nawan wər infa wala, amaran əwâran-kawan bakkadan-nawan;

¹⁸ aytedan dəx win aba əzzigzanan s Əlməsix, əntanay da wər dasan-t-illa attama waliyyan âr wa n əhluk.

¹⁹ Kud nakkanay attama-nana dəx Əlməsix wər okay əddənet ta da ɣas, adi za wər t-illa awedan dəx əddənet wər noqer təla ən təhanint.

²⁰ Kalar tidət dəx a imos as Əlməsix itiwəsankar-du dəx tamattant. Ənta a d-azzaran tanakra, imos awen arat isitaddan as aytedan win aba əzzigzanan sər-əs əntanay da a d-ənkəran dəx tamattant.

²¹ Id tamattant awedan iyyanda a tat-d-ewayan s əddənet, a t-imosan Adəm; əmmək di da za as tanakra dəx-as da, tosa-du əs tarrayt n awedan iyyanda, a t-imosan Əlməsix.

22 Id aytedan kul a tan-iba fəlas Adəm a d-əgmadan, əmmək di da za as aytedan kul win osaxnen d Əlməsix, ad əgrəwan təməddurt ta təxlalat.

23 Tanakra daɣ tamattant amaran, təgâ s ənnizam: Əlməsix a sər-əs d-azzaran, dəffər adi win sər-əs əzzəgzannen a du-za-təwəsənkərən ɣur tawaɣlay-net.

24 Amaran tasa-du təzərət n əddənet, ijəbbərəjjət Əlməsix təmənukəla kul d əlxəkuman kul əd təxmaren šin əttənkələn, dəffər adi idkəl təxmar akf-et i Məşşina di n Abba.

25 Fəlas ilzâm Əlməsix ad ittəf təxmar har agu Məşşina izənga-net kul daw daran-net.

26 Azangaw-net was z'izrəy s ahluk-net, tamattant.

27 Fəlas ənnan İlkəttaban: «*Iga Məşşina aratan kul daw daran-net*», amaran immun as «aratan kul» win as itawanna ad əməlan daw daran-net da, wər tan-iha Məşşina, s ənta iman-net a ikfan Əlməsix təxmar ta ittaf.

28 Amaran as iga Məşşina aratan kul daw daran n Əlməsix, alwaq wədi, ad z'agu Barar ənta da, almayna Əlməsix, iman-net daw əlxəkum ən Məşşina wa igan aratan kul daw daran-net fəl ad təkməl tizart ən Məşşina y arat kul daɣ adag kul.

29 Amaran ənzərət daɣ aytedan win tawasalmaɣan daɣ aman fəl əddəlil ən saɣmar n aytedan-nasan win aba: Awak ma imos awas əgan attama n agaraw-net daɣ igi n awen? Kud ənta tidət daɣ a imos as, wər tu-təlla tanakra daɣ tamattant, wədi ma fel tawasalmaɣan daɣ aman fəl əddəlil ən saɣmar n aytedan-nasan win aba?

30 Nakkanay iman-nana za, ma fel akk assaxat nəha tazak ən tamattant?

31 Akk əzəl təhoz-i-du tamattant! [Imədrayan-nin], arat wədi, ig-as aşşak agamad wa iga y əsəbbərəg wa fall-awan tagga fəl əddəlil n awa daɣ-wan iga Əməli-nana Ƴaysa Əlməsix.

32 Kud təbəllant ta əgeɣ daɣ əxrəm n Efez, wər nəzlay d aməgər əd wəxsan, wər təga ar fəl ares n əddənet, awak ma di-za-taknu? Kud inəmməttan wər du-za-təwəsənkəran daɣ tamattant, adi za, agatanaɣ awa ənnan aytedan wiyyad as ənnan: «*Natš-et, naşwet, fəlas wər daɣ-naɣ ilkem ar tamattant*»

33 Ad wər tətəwəsəxrəkam! Fəlas ənnan kəl awal: «*Tidawt d ark aytedan təxaşşad alxal olâyan.*»

34 Təqqəlet-kawan-du tayttay-nawan ta tolaɣat, tammaz-zayam d igi ən bakkadan. Fəlas wiyyad daɣ-wan wər əssenən Məşşina. Ənnəy adi fəl a kawan-izzəbəz təkarakit.

Tayəssa ta du-tənkərat daɣ tamattant

35 Mišan wər igdel awen ad annin wiyyad daɣ-wan: «Awak inəmməttan, məni təməwit tas du-za-təwəsənkəran? Ma təmos təyəssa ta dər du-za-təwəsənkəran?»

36 Aljahilan! As tənbalam tablalt n amasa, wərgəɣ kundaba təmmut as du-təgammad, təddâr?

37 Amasa deɣ ɣas a tanbalam den, iha mijas in alkama madeɣ tabzəst iyyat, wərgəɣ tasaytot təɣrâdat a tənbalala.

38 Təzzar ikf-ay Məşşina təyəssa ta das-ira, əkkulluk n amasa ikf-ay təyəssa ən man-net.

39 Şixəllak wər olenat təyəssa ketnasnat; aytedan zənnit təyəssa ta-nasan, eharay zənnit ta-net, igəɖad zənnit ta-nasan, kifitan deɣ zənnit ta-nasan.

40 Amaran ijənnawan da, əhân-tan aratan əlânen şixəswen, zund əmmək as, amaɖal əwaran-tu aratan əlânen şixəswen; mišan şihussay n aratan win əhanen ijənnawan wər tola əd təhussay ən win əwarnen amaɖal.

41 Zənnit ənnur wa n təfuk, zənnit wa n təllit, etran deɣ zənnit wa-nasan. Etran iman-nasan, ənnur-nasan əzzənəfan a imos, ənnur n iyyan ogar ənnur wa hadan.

42 Zund əmmək di da a təga tanakra ən nəmməttan. Təyəssa təyəşşadat a za tənbelat, tətəwəsənkər-du ta wər nətəməttəy.

43 Təyəssa ta dər inbal awedan, təbrâr; ta dər du-z-inkər təkna şihussay. Təyəssa ta dər inbal awedan, tərkam; ta dər du-z-itəwəsənkər təla tarna.

44 Inbal-in əd təyəssa ta n əddənet, itəwəsənkər-du əd təyəssa ta iha Infas wa Zəddigan. Da tu-təlla təyəssa ta n əddənet, wədi ta n Infas wa Zəddigan da təll-ay.

45 Adi a fəl ənnan Əlkəttaban: «*Adəm a d-azzaran y aytedan s əxluk, imal-tu iddâr,*» mišan Adəm wa n əşşin s ənta wa ilkaman, a t-imosan Əlməsix, infas a imos, ihakkin təməddurt.

46 Wərgəɣ wa imosan infas a d-azzaran, kalar wa imosan taxlək n əddənet təddârat a d-azzaran, dəffər-əs a d-osa wa imosan infas.

47 Awedan wa d-azzaran, əgodrar a daɣ iga, igmad-du amaɖal; awedan wa n əşşin, ənta ijənnawan a d-igmad.

48 Awedan wa igan daɣ əgodrar, awa imos, ənta a əmosan aytedan win əganen daɣ əgodrar; wa d-igmadan ijənnawan, ənta da, awa imos, ənta a əmosan aytedan win jənnawan.

49 Amaran tulat ta nəga d awedan wa igan daɣ əgodrar, ənta a za nagu əd wa d-igmadan ijənnawan.

50 Imədrayan-in, a dawan-gannaɣ, awa igan daɣ şan d əzni, wər z'ilu adagar daɣ Taymar ta n Məşşina, wala deɣ

ilu awa ixaşşadan adagar dağ awa wər nəxəşşəd.

⁵¹ Səsəmat, a dawan-əməlay əssir: Wər dana-z-iba ketnana, mişan dər iga awen da, ketnana as za nətəwəsəmməttəy,

⁵² fəl arat n amazay, fəl ellaf ən şat, xur anasay wa ilka-man n asak. Fəlas ad itəwənsəx asak, təzzar təwəsənkərandu nəmməttan əd təxəswen wər za nələs axsud, nakkanay deş nətəwəsəmməttəy.

⁵³ Fəlas təxəssa ta təxaşşadat, əşşil ad təggəz ta wər nəxəşşəd edag-net; ta tətəməttit deş əşşil ad təggəz ta wər nətəməttit edag-net.

⁵⁴ As təggəz təxəssa ta wər nəxəşşəd edag ən ta təxaşşadat, təggəz deş təxəssa ta wər nətəməttit edag ən ta tətəməttit, əddi amaran ad z'andu awa ənnan Əlkəttaban as ənnan: «*Tamattant tətəlmaz, tətawarna, ab'as tətəlla.*»

⁵⁵ «*Ya tamattant, ma təga tarna-nam? Ma iga endal-nam, was təddâgaş aytedan tənəqqaq-qan?*»

⁵⁶ Abakkad a imosan endal ən tamattant, abakkad amaran əşşərişə wa n Əttawret a imosan assahat-net.

⁵⁷ Mişan agoda i Məşşina a danay-isasarnin abakkad əs tarrayt n Əməli-nana Yaysa Əlməsix.

⁵⁸ Daş adi, imədrayan-in əkney tara, zəzzəwətat daş əzəgzan-nawan, tazzakkem daş-as s assahat, ad tətəggim faş s igət əşşəxəl olaşan wa tətəggim y Əməli, id təssānam as, əşşəxəl issohen wa tətəggim y Əməli wər ibbənnan.

Awa d-izdaran daş şirawt ta

16

Şirgiten d əşşərədan wiyyad n Əlkənisat

Şirgiten y Əlkənisat ta n Yerusalam

¹ Daş batu ta təqqalat şirgiten şin tawagginen i mizdan win Yerusalam, agat kawanay da, arat was omaray Əlkənisaten şin akal wa n Galatəya.

² Əkkulluk n əzəl wa azzaran daş əssuk, akkiyyan daş-wan idkāl daş awa sər-əs d-iggazan arat was ifrag, ixbər-tu har kawan-in-asa, fəl ad wər iqqəl əşidəw-nawan şirgiten y assa-nin.

³ As kawan-in-oseş, ad akfa aytedan-nawan win təsannafranam şira a fəl iktâb as aytedan-in a mosan, təzzar əssukaq-qan Yerusalam ewāyan şirgiten-nawan.

⁴ Kud deş itawanay əs ihôr ad agla nak iman-in, wədi a dər-i idawan.

Işikilan win d-əzaynen

⁵ Kundaba əmməray akal wa n Masedonəya as kawan-in-z-assa, fəlas ad ərzəga akal wa n Masedonəya.

⁶ Iha mijas a xur-wan agax adan, mijas dex tagrəst ketnet as xur-wan tat-z-əkkəsax, fəl a di-tagim allawtan kawanay iman-nawan s akal was kawan-z-əgməda.

⁷ Tidət as wər arex a kawan-in-asa əmərədda, agax-awan-in assa dax əzzikke; fəlas əgey attama n ad ahaga xur-wan kud ikf-i Əməli turagat.

⁸ Əmərədda, ad aqqamay dax əxrəm wa n Efez har di dax-as d-awəd amud wa n Fantəkawt.

⁹ Fəlas tənnolam-i dax-as tarrayt zəwwərat n əşşəxəl, kuddex as əggətan zənga win wər nərə awen.

¹⁰ Amaran as kawan-in-osa Timotay tabəzam-t-in əs man-nawan, a tu-wər-iməl arat as tu-təha tasa-net, fəlas əşşəxəl y Əməli a iha ənta da, şilat-in.

¹¹ Dax adi a tu-wər-alku awedan waliyyan; agiwat-as allawtan fəl a sər-i d-agu əşikəl olāxan fəlas əqqâlax-as ənta əd mədrayan-nana win dər iddew.

¹² Dax batu ta təqqalat amadray-nana Abbolos: əgmâya dax-as wəllen a kawan-in-asu iddew əd mədrayan-nana win di; igmâd aşşak âs wər ila ənnəyat n adi əmərədda. Mişan as igray s adi, a kawan-in-asu.

Ənnəsixatan d assalaman

Ənnəsixatan win əlkamnen

¹³ Agat ənnəyat, təzəzzəwem dax əzəgzan-nawan əs Yaysa Əlməsix, təqqəlam aytedan wər təha tasa, təssuhem.

¹⁴ Arat kul wa tətəggim, agiwat-tu əs man taha tara.

¹⁵ Əhân-kawan salan n aytedan n ahan wa n Əstefanos; təssânam as əntanay a əzzarnen s əzəgzan əs Yaysa Əlməsix dax akal wa n Akayya, əkkâsan dex iman-nasan s əşşəxəl i mizdagan. Onsayaq-qawan za imədrayan-in,

¹⁶ a dasan-tabbardagam, əntanay d id t-illa awedan ihân əşşəxəl wa əhan, əs gəlleyat.

¹⁷ Isidawat-i assa wa di-d-iga Əstefanos əd Fortunatos d Axaykos. Assa-nasan idbax-in təxərəbbet ta sər-i d-eway iba n əşinəy-nawan.

¹⁸ Fəlas issəsmad iman-in, issəsmad dex win-nawan. Dax adi, taget masnat fəl meddan zun win di, təwəsəxməran.

Assalaman win əlkamnen

¹⁹ Əhulan-kawan-in nalkiman win Əlkənisaten şin akal wa n Asəya. Ihul-kawan-in dex Akilas əd Friska əd nalkiman win Əlkənisat ta tətamanayat dax ahan-nasan. Əhulan-kawan-in wəllen wəllen fəl əddəlil ən tassaq ta nəga d Əməli Yaysa.

²⁰ Əhulan-kawan-in mədrayan-nawan daɣ əddin win əllanen da da ketnasan. Tinəməggat assalam zəddigan.

²¹ Təhult awa a din-təgmadat əfus wa-nin nak Buləs.

²² Məşşina təlxânaɣ awedan wa wər nəra Əməli Ƴaysa! Marana ta, almaɣna: Ya Əməli-nana asa-du!

²³ Əgmâya daɣ Məşşina a kawan-ikfan arraxmat n Əməli Ƴaysa.

²⁴ Əreq-qawan ketnawan fəl əddəlil ən tassaɣ ta nəga d Əlməsix Ƴaysa.

Şirawt ta n sanatat iktab Buləs i Kəl-Korent Əsənti

Təhult

¹ Awa nak Buləs, imosan əs tərəddawt ən Məşşina anammazul n Əlməsix Yaysa, nak d amadrax-nana Timotay ənnânen əhulan-in Əlkənisat ən Məşşina ta təhat ayxəm ən Korent əd mizdagan kul win əxsarnen dağ akal n Akayya ketnet.

² Əgmâya dağ Məşşina di n Abba-nana d Əməli Yaysa Əlməsix a kawan-ikfan arraxmat d alxer.

Igodan d ənnəsixatan

³ Təmmal i Məşşina di n Abba n Əməli-nana Yaysa Əlməsix, imosan Abba wa n əməhhenən, imos deş Məşşina di isasmadan iwallan kul,

⁴ s ənta a isasmadan iwallan-nana a təqqal təssust ta fall-ana təgat, fəl a danax-issəfrəg əs tarrayt n əssəsməd wa itag iwallan-nana, ad nəssəsməd nakkanay da, iwallan n aytedan win fəl təga təssust a təqqal.

⁵ Id igət wa iga alxazab wa nənnay fəl əddəlil ən tassaq-nana d Əlməsix, ənta a təga təsasmit ən wallan ta danax-ihakku Əlməsix.

⁶ Kud ətəwəsas wa nəga, təsasmit d efsan-nawan a imos, kud deş təsasmit ən wallan a danax-ikfa Məşşina, wədi kawanay as tat-ikfa. Təsasmit tədi təkf-iwan ad təzməram y alxazab wa nətəggu nakkanay da.

⁷ Wər kala ad nəga aşşak dağ attama wa daş-wan nəga, fəlas nəssân as, da dər-na tədrawam alxazab, təsasmit ta itəggu Məşşina iwallan-nana da a dər-na tat-tədrawam.

⁸ Amaran imədrayan-in, wər nara a kawan-wər-əhen salan ən təssust ta fall-ana təgat dağ akal n Asəya. Təgrâw-ana dağ-as təssust togarat awas nəfrag a dər-əs nəzəzzəydər, fadda har nəkkas attama ən man-nana.

⁹ Tidət as imâl şur-naş as, wər dana-t-illa ar tamattant. Arat wa, igrâw-ana fəl ad nəssən as wərge iman-nana, kalar Məşşina s ənta a d-isankaran inəmməttan, şas, as ihor a dağ-as nagu attama-nana.

¹⁰ Ənta a dana-d-ikkasan dağ tazak labasat ən tamattant ta nəggaz den, ənta a dana-du-z-ikkəsan dağ adag şilat ən wen. Nəgâ deş attama n as, i tu-nəggaz, a dana-d-ikkəs.

¹¹ Amaran kawanay tədhâlam-ana əs mansay wa dana-tətaggim Məşşina; adi a fəlas, arraxmat ta za nəgrəw

əs təwatriwen n aytedan aggotnen, a du-tawəy s aytedan aggotnen wiyyad ad əggudəyan i Məššina arat wa danağ-iga.

Buləs isasagru işikilan-net

Buləs isammattay ənnizam ən šikilan-net

¹² Amaran ənta da abarag-nana: wər nəssen fəl ark arat dağ əddənet ta da as dana-z-əbəzan man-nana, wəllen dağ tassağ ta dər-wan nəga. Wər nəga əmazal əs wərgəx əwəl iyyanda zəddigan wa ihakku Məššina as tu-nəga. Arraxmat ən Məššina a danağ-təssəfragat awen, wərgəx a d-ihân əs masnat n aggadəm.

¹³⁻¹⁴ Fəlas šira šin dawan-in-nəkattab, wər dağ-asnat nəssoka arat waliyyan wər nəmos wədi da təxarrim əddi, təgrâm-tu. Kud dana-wər-təgəm əgərri olâxan əmərədda, da əgəx attama-nin dağ ad tawədam a dana-tagim əgərri ikmâlan, tagim fəl əddəlil-nana abarag wa danağ-isassaga wa-nawan, əzəl wa du-z-asu Əməli[-nana] Yaysa.

¹⁵ Ikus wa əgəx aššak dağ adi, a fəl otasağ a sər-wan in-izara, fəl ad təgrəwam dağ assa-nin tənfa təmosat ənətfus;

¹⁶ akəyaq-qawan s akal wa n Masedonəya. As d-əgmada Masedonəya a kawan-d-əqqəla, tagim-i allawtan y əšikəl wa z'aga s akal wa n Yahudəyya.

¹⁷ Awak gəlleyat a wər əgəx dağ attas wa əgəx a kawan-in-asa? Məx ak aratan win as arex igi-nasan, wər əmosan ar deranan n aggadəm, igannin «ayew» as iga amazay ad annu «kala»?

¹⁸ Iggəyyat Məššina as, awa dawan-nəna, wər imos «ayew» irtâyan əd «kala»

¹⁹ Fəlas Yaysa Əlməsix di n Barar ən Məššina was dawan-nəga isalan-net, nak əd Silfanus əd Timotay, wər isərtəy «ayew» əd «kala». Kalar «ayew» xas a inna Məššina əs tarrayt-net.

²⁰ Almağna n awen as arkawalan ən Məššina ketnasan «ayew» a əmosan dağ Əlməsix, adi da değ a fəl nəmmâl adkul ən Məššina əs tənna ta nətəggu «Amin» əs tarrayt ən Yaysa Əlməsix.

²¹ Amaran, tartəyt ta nəga d Əlməsix, nakkanay dər-wan, Məššina iman-net a tat-isassahen, isannafran-ana,

²² issəwar-anağ değ ejwal-net alwaq wa d-iga Infas wa Zəddigan dağ wallan-nana, imos awen təsukəst n aššak dağ arozan win as ilkam a danaq-qan-akfu.

²³ Məššina a dağ-i z'ibəzan iman, əgeq-qu təgəyya as, wər din-əqqəla ağrəm ən Korent ar fəl as wər arex a dawan-əššita ağşud ən man;

²⁴ amaran arex ad təssənam as wər nəgəmməy d a kawan-nəşəhhəşşəl arat waliyyan daɣ batu ta n əzəgzan-nawan, kalar ənəməşəxal ɣas a dər-wan nəga daɣ arat wa kawan-z-isəffəliwəsan, fəlas əzəgzan-nawan issohat.

2

¹ Adi a fəl əgeɣ tanat təmosat as ənnex: wər z'ələsəy aɣşud ən man-nawan s iyyan assa.

² Fəlas, nak as əɣşada iman-nawan, awak ma di-z-isəddəwen, ar kawanay win as əɣşadaɣ iman?

³ Adi a d-ewayan as a dawan-in-əktaba şirawt fəlas wər arex a kawan-in-asa təɣşədam iman-in, kawanay win as ihor a di-təsəffəliwəsam; fəlas əkkâsəy aşşak as, arat wa di-isaffalawasan, kawanay da isifalawas-kawan ketnawan.

⁴ As dawan-in-əktabəɣ şirawt tədi, təga fall-i təssust labasat, isâs-i əwəl-in, əffâyan daɣ-i məttawan. Amaran wər dawan-tat-in-əktesəɣ fəl ad əɣşəda i man-nawan, kalar fəl ad təssənam daɣ təzzəwwərt ən tara ta dawan-əgeɣ.

Təsurreft i nadlaman

⁵ Amaran kud iyyan daɣ-wan a d-ewayan aɣşud ən man daɣ anamod iyyan, wərgəɣ nak as iɣşad iman, kalar ketnawan as dawan-tan-iɣşad, made z'anna fəl təksəda ən təsəssikəyt iɣşad-tan y arat daɣ-wan.

⁶ Awedan wədi, igd-âs əsənnərxəm wa das-təga taşşam-nawan.

⁷ Əmərədda ofa a das-təssurəfam, təssəsmadam əwəl-net, fəl a tu-wər-iɣləb əɣşud ən man, ihlək.

⁸ Daɣ adi, onsâyaq-qawan a tu-tassaknim tara ta das-təgam.

⁹ Id iyyan əddəlil wa fəl dawan-in-əktaba şirawt tədi, tara a əgeɣ a kawan-ajjarraba əssənaɣ kud təlkâmam y arat kul wa dawan-ənnex, wala.

¹⁰ Amaran awedan kul was təssorafam, nak da, əssorafəɣ-as; arat deɣ wa əssorafə den, kud ənta ill-ay fadda a əssorafəɣ y awedan, a das-əssurəfəɣ arat kul was kala a di-t-iga fəl əddəlil-nawan, dat Əlməsix,

¹¹ fəl ad wər igrəw Aşşaytan tarrayt waliyyat n a danaɣ-akkarras, id wər danaɣ-ədreɣnat təmərkas-net.

Buləs daɣ aɣrəm ən Trowas

¹² Alwaq wa din-oseɣ aɣrəm n Trowas y a daɣ-as əxtəbəɣ isalan n Əlinjil n Əlməsix, or-i daɣ-as Əməli tarrayt n adi,

¹³ mişan harkid awen, wər tənsa ənnəyat-in, fəlas wər daɣ-as əgrewəɣ amadray-nin Titəs. Adi a fəl namagga əd nalkiman win əhanen Trowas şiwatriwen, əgmadaq-qan s akal ən Masedonəya.

Buləs isasagru əşşəxəl-net wa n arkawal ən tassaq wa aynayan

Buləs isasagru əşşəxəl-net

Tarna ta igrav Elməsix

¹⁴ Nətaggu igodan i Məşşina a danaş-itaggin faw y əddənet əsəkni a itaggu əmənokal ikefəlan a d-oğâ. Arat wen ig-anaq-qu fəl əddəlil ən tassaq-nana d Elməsix isâknin agaraw-net tarna fəl Iblis. Ənta dəx a iziwəziwizan əs tarrayt-nana dəx adag kul ađu izodan wa təmos masnat n Elməsix.

¹⁵ Id ađu izodan a nəmos əs Məşşina, a sər-əs in-igmâdan Elməsix. Ađu wa, iwizawaz dəx aytedan win əhanen tarrayt ta n əlxillas əd win əhanen tarrayt ta n əhluk.

¹⁶ Aytedan za win əhanen tarrayt ta n əhluk, nəmos-asan ađu ən tamattant, a d-itawayan sər-san tamattant. Aytedan amaran win hadatnen, nəmos-asan ađu ən təməddurt, tan-issodaran. Awak ma ifragan igi n əşşəxəl oğdân d awa?

¹⁷ Nakkanay, wər nola d aytedan aggotnen, əganen jola dəx awal ən Məşşina. Kalar dəx tassaq ta nəğa d Elməsix nəmmâl dat Məşşina awal-net s əwəl iyyanda, amaran nəssân as Məşşina a dana-izammazalan.

3

Buləs, amaşşaxal a imos n arkawal ən tassaq wa aynayan

¹ Awak eməlan wiyyad a nətaggu iman-nana? Məx ak addararat a nəğa əs şira a danaş-z-akfinen şur-wan udəm, madəx nəddirar s a dana-tanat-tagim, awa taggin aytedan wiyyad?

² Kala kalar kawanay iman-nawan as təmosam şirawt-nana, təktâbat dəx wallan-nana, issân awedan kul, iyr-et dəx awedan kul.

³ Təssîknam dəx tişit-nawan şirawt n Elməsix, təktâbat s əşşəxəl-nana, wər nəkteb əs taddawat, kalar Infas ən Məşşina di iddaran əs təktab; wər təkteleb fəl əsellum ən təhunt, kalar iwallan a dəx təkteleb.

⁴ Aşşaddat n attama wa nəğa dəx Məşşina əs tarrayt n Elməsix a fəl nənney adi.

⁵ Wərgəx aşşaddat n as ill-ay arat waliyyan as nəfrâg igi-net gar-ena əd man-nana, kalar Məşşina a danaş-ihakkin fərregat n igi-net.

⁶ Ənta dəx a danaş-issəfragan ad nəqqəl imaşşaxalan n arkawal ən tassaq ta taynayət, wər nəmos əlqanun iktâban fəl selluman, kalar tassaq a imos iktâb Infas wa Zəddigan dəx wallan n aytedan; fəlas əlqanun wa irəwan iktâban fəl

səlluman, tamattant a d-itaway s aytedan, amaran tassaq ta iktab Infas wa Zəddigan daɣ əwəl, təməddurt a sər-san du-təaway.

Buləs imâl dad imməzray arkawal ən tassaq wa irəwan d arkawal ən tassaq wa aynayan

⁷ Ənnizam n əlqanun amaran wa d-itawayan tamattant s aytedan, isəlluman ən təhun a fəl iktab. İzizzabbat-t-idu Məşşina fəl Musa daɣ ənnur, s awa iga daɣ assahat, indar i Kəl-İsrayil ad əswədan daɣ udəm-net. Ənnur en da za arat ilakkayan a imos.

⁸ Əngəm-in za ənnizam wa d-ifalan Infas wa Zəddigan, iktaban daɣ wallan n aytedan, išsaqal daɣ-san! Manəmmək as wər z'agər wen tanaya?

⁹ Fəlas kud ənnizam n əlqanun wa d-itawayan s aytedan attadib, ila tanaya, wədi, ma dər za tagdu şigrat ən tanaya ta tu-z-əgu ənnizam ən tarrayt ta taynayət wa d-itawayan s aytedan taqqat?

¹⁰ İqqal as, arat wanad iknan təla ən tanaya, ab'as ila tanaya əmərədda fəl awa das-təga tarrayt ta taynayət daɣ şigrat ən tənaya.

¹¹ Fəlas kud arat ilakkayan osa-du əs tanaya, adi za ma dər za tagdu şigrat ta tu-z-əgu wa t-illan faw tanaya!

¹² Dad nəga attama oğdân d awen, wədi nəhal ad nammazal awa nəra ši wala tasa.

¹³ Nakkanay wər nəga awa iga ənnəbi Musa, issəlsan udəm-net afər fəl a daɣ-as wər əswədan Kəl-İsrayil iket di ad t-igammad ənnur wa imalawlawan daɣ udəm-net.

¹⁴ Mişan tawasaxaran wallan-nasan y awen, id har azalada, as ɣarrin Əlkəttaban win arkawal ən tassaq wa irəwan, şilat n as harwada ill-ay, igdal-asan əgərri n Əlkəttaban, id afər wen, tassaq d Əlməsix ɣas a ifragan ikus-net.

¹⁵ Awalla, har azalada, ɣarrin əlkəttaban n ənnəbi Musa, mişan wər tan-əgrən, fəlas afər wen a ilsan iwallan-nasan.

¹⁶ Tətubt ɣas s Əməli a itakkasan afər wen.

¹⁷ Amaran Əməli, Infas a imos. Awedan deɣ wa iggaz Infas n Əməli, wədi illəllat.

¹⁸ Nakkanay ketnana win as itawakkas əfər wen fəl udmawan-nana, nəswâd daɣ tanaya n Əməli şilan n as iswad awedan daɣ şişet. Isamattay-ana Əməli, s ənta Infas a imos, s əşşəxəl wa itaggu daɣ wallan-nana, išaşal-ana əd man-net, tətittəy daɣ-na tanaya-net.

4

Tidət a daɣ nəsusin aytedan

¹ Adi fəlas, dad zamas as ihanattat-ana Məşşina ig-ana dağ əşşəxəl ən tarrayt ta taynayət, wədi wər za nəqqəl dəffər-na;

² nakkanay nəmmizzay d ark mazalan sikərukidnen win tamazalan aytedan dağ əssir, wər nəgəmməy əd təkərras n awedan waliyyan, wala nəsafrax awal ən Məşşina. Kalar emel wa nətaggu tidət əs təməwit təzdarat, nəgəmməy sər-əs əsəfləs ən man-nana y əkkulluk n awedan dat Məşşina.

³ Aytedan win əhanen tarrayt n əhluk xas as ilsa arat isalan n Əlinjil win nətaggu, wər tan-əzzəgzanan.

⁴ Wər əzzəgzanan fəlas Iblis wa n əməli n əddənət ta, a tan-isaddarxalan; igdal-asan anay n ənnur wa d-igammadan Əlinjil, ənnur wa isaknin tanaya n Əlməsix imosan şaşşelan ən Məşşina.

⁵ Nakkanay isalan win nəmmâl, wər dağ-san nəmmil iman-nana, kalar emel a nətaggu as Yaysa Əlməsix a imosan Əməli, nəmmâl deyx as eklan-nawan a nəmos fəl əddəlil ən Yaysa Əlməsix.

⁶ Id Məşşina a innan: «*İmələwləwet ənnur dağ şiyğay*», ənta iman-net a imalawlawan dağ wallan-nana, ikf-anax ənnur, a t-imosan masnat ən tanaya ən Məşşina ta təmələwlawat dağ udəm ən [Yaysa] Əlməsix.

Əşşəxəl ən Buləs: Təməddurt ən Yaysa əd təmattant-net

Anammazul Buləs aggadəm a imos irkaman zun aytedan kul

⁷ Mişan ərrəzəx wa, imosan masnat ən tanaya ən Məşşina, ikassan ən talaq, as nakkanay a tan-imosan, a daq-qu neway, fəl ad itəwəssən as, tarna wər nəla əddukad ta, şin Məşşina, wərgeyx şin-nana.

⁸ Wər t-illa dağ ətəwəsas wər nətawagga, mişan wər kala nətawaxalab; əqqanan xafawan-nana, mişan wər nətəkkəs attama.

⁹ Faw nətiwadgaz mişan wər danağ-oyya Məşşina əd man-nana; nətawagadlu mişan nənakkar-du.

¹⁰ Fawda nəha tazak n igi ən tamattant şilat ən ta iga Yaysa, fəl ad tətəwənəy təməddurt-net ənta da dağ təxəswen-nana.

¹¹ Fəlas nakkanay win əddarnen, faw nəha tazak ən tamattant fəl əddəlil ən Yaysa, fəl ad tətəwənəy təməddurt ən Yaysa s əlluğ dağ təxəswen-nana əmosnen arat itamat-tin.

¹² Adi a fəl nəha faw tazak ən tamattant, fəl ad təggəzam kawanay tarrayt n agaraw ən təməddurt ta təxlalat.

Awa d-ixsalan dağ təməddurt n aytedan win Kəl-Korent

¹³ Ʒzəgzan-nana ola əd wa ittəmalan daƷ Ʒlkəttaban as ənnan: «Ʒzzigzanax! Adi a fəl əššewalax.» Nakkanay da əzəgzan wen da a nəga, adi a fəl nəššewal nakkanay da.

¹⁴ Id nəssân as, Məššina a d-issənkaran Ʒməli Ʒaysa daƷ tamattant, a dana-d-issənkər nakkanay da nəddew əd Ʒaysa, təzzar issəbdəd-ana dat-əs nakkanay dər-wan.

¹⁵ Fəlas awa ketnet tənfa-nawan a fəl tu-nətaggu, fəl a din-tawəd arraxmat n Məššina aytedan aggotnen, igatan godan i Məššina, fəl zazwar-net.

Ad wər nəkkəs attama gər za nətaxazzab wala natamat-tat

Tanaya təxlalat ta du-təzayat

¹⁶ Adi a fəl wər za nəqqəl dəffər-na. Kud imos as šixəswen-nana ta n əmindi a əhanat, da iwallan-nana əntanay akk əzəl ətiwašaşaynayan.

¹⁷ Fəlas təssust fəsusat wər za nihag ta nənnay əmərədda, a dana-za-takfit adkul iknan təzzəwwərt ixlâlan.

¹⁸ Nakkanay wər nəswəd daƷ aratan win tawanaynen, kalar win əhanen ətənkul a daƷ nəswəd; fəlas awa itawahannayan, wər itihag; as iga awen, awa ihan ətənkul, ənta ixlâl.

5

Nəsikalal iket di ad nəha əddənət

¹ Nəssân as ihəktan win nəha əmərədda, almaƷna šixəswen-nana, ad əhləkan, amaran isimatag-ana Məššina daƷ jənnawan šixəzmen əxlâlən, s ənta iman-net a tanat-ikrasan wərgəƷ ifassan n aytedan.

² Amaran ihəktan win nəha əmərədda, osaynat fall-anat təhənəffa, nəsidaran wəllen ad nagu i nan-nana win jənnawan iguz a itag awedan i səlsa aynaynen fəl wiyyad waššarnen.

³ As iga adi, ad nəstər, wər za nəqqəl iman Ʒas wər nəha təƷəssa.

⁴ Tidət as ihəktan win nəha əmərədda əmosan-ana šilat n əzuk zəwwəran a danaƷ-isihənəffen, eges wərgəƷ fəl aššaddat ən tara n əməzzəy dər-san, kalar fəl aššaddat ən tara n iguz ən təƷəswen-nana šin jənnawan, fəl ad təlməz təƷəssa ta təxlalat, ta wər nəƷləl.

⁵ Amaran Məššina iman-net a danaƷ-isammatagan awen, isattadd-anax əs təhakkay ta danaƷ-iga Infas-net as, ad agu awen.

Nəkna igi n attama id tara a nəga gərrezat y Ʒməli

⁶ DaƷ adi faw təkna ənnəyat-nana id nəssân as, iket təmos təƷəssa ta ehan-nana, nəggug Ʒməli.

⁷ Fəlas awa nəzzəgzan as nəlkam, wərgəx awa nəhannay əs šittawen-nana.

⁸ Awalla adi a fəl ənnəx təkna ənnəyat-nana, mišan nəsof wəllen ad nəgməd tağəssa ta nəha əmərədda s ahan-nana wa xur Əməli.

⁹ Awen da a fəlas, gər za nəha tağəssa-nana wala dəx wər tat-nəha, wər nədgez ar dəx a das-nəgrəz.

¹⁰ Fəlas kundaba nəbdad ketnana dat Əlməsix, işrəx-ana. Akkiyyan dəx-na ad igrəw awa dər ahoran mazalan win iga harwa iha tağəssa-net, gər za win olağnen wala win wər noleğ.

İmaşşaxalan ən Məşşina a nəmos, nəmos dəx almawakkilan-net

Əşşəxəl wa n igi n alxer gar-ena

¹¹ Dəx adi, dad zamas nəssân awa təmos təksəda n Əməli, nəgammay dəx aytedan a sər-əs əzzəgzanan əs gəlleyat. Məşşina issân wəllen awa nəmos, amaran əgəx attama n as kawanay da təssânam wəllen dəx wallan-nawan awa nəmos.

¹² Wərgəx təmmal a nəllas iman-nana xur-wan, kalar əddəlil xas a kawan-nəhakku n igi ən baragan fall-ana, fəl ad tilem a tənnam y aytedan win tagginen ibaragan fəl awa iwaran azzahir, imos sokni wərgəx təla n əwəl zəddigan dat Məşşina.

¹³ Kud a itawannan tayttay-nana a dana-təgmədat, wədi saymar ən Məşşina a fəl nəğa adi; kud dəx wər dana-təgmed, wədi tənfa-nawan a imos.

¹⁴ Fəlas tara ta danağ-iga Əlməsix a tənnodat dəx arat kul wa nətaggu. Id nəzzigzan as awedan iyyanda, a t-imosan Əlməsix, a immutan dəx adag n aytedan kul; dəx adi aytedan kul əddewan dər-əs dəx tamattant ta iga.

¹⁵ Aba-tu dəx adag n awedan kul, əgrawan aytedan təməddurt taynayət s əssəbab-net. Igâ awen fəl ad ammazayan əd təməddurt dəx wər əlkeman ar i tara ən man-nasan. Kalar ad əlkəman y Əlməsix a immutan fəl əddəlil-nasan, itawasankar-du dəx dəx tamattant.

¹⁶ Adi a fəlas əmərədda ab'as nəğa dəx awedan waliyyan iduf wa dəx-as əgan aytedan; kuddeğ as kala ad nəttaf Əlməsix dəx adag wa dəx t-əttafan aytedan, mišan əmərədda wər tu-nəttef dəx adag wen.

¹⁷ Dəx adi awedan wa ilan tassağ d Əlməsix, iqqal taxlək taynayət. Ab'as imos awedan was kala a t-imos, fəlas təməddurt tas kala tat-iga iğrad dər-əs; təggaz iyyat taynâyat edag-net.

¹⁸ Amaran awen kul Məşşina a t-igan, ənta a danax-iknan əd man-net əs tarrayt n Əlməsix, ikf-ana deş nakkanay əşşəşəl imosan igi n alxer,

¹⁹ imosan as: Məşşina eway-du alxer gar-es d əddənet ketnet əs tarrayt n Əlməsix, ab'as fall-asan ittaf ibakkadan-nasan. Əntanay da da isalan n igi n alxer win as danax-inna a tan-nagu y aytedan.

²⁰ Daş adi nakkanay almawakkilan n Əlməsix a nəmos, id Məşşina iman-net as kawan-işarru əs tarrayt-nana. Nonsay-kawan fəl udəm n Əlməsix ad təknaş əd Məşşina!

²¹ Əlməsix wər t-iwer abakkad waliyyan, mişan issəwar-tu Məşşina fəl əddəlil-nana ibakkadan-nana, fəl a sər-na du-tawəy tassaş-nana dər-əs taqqat dat Məşşina.

6

¹ Daş adi, dad imos as nəha əşşəşəl wa daş iha Məşşina, nəgmây daş-wan ad wər təsəbbənnanam arraxmat ən Məşşina ta təgrawam da.

² Id Məşşina iman-net as inna: «*As d-ewad alwaş wa daş kawan-z-akfa arraxmat-in, ad əqbəla šiwatriwen-nawan, as d-ewad alwaş wa daş kawan-z-əşləsaş, a dawan-ilalaş.*» Ənəyat za alwaş wədi, ewad-du, ənta da da deş əzəl wa n əşşillan-nawan.

Awa immozal Buləs əd tayaray ta iga Kəl-Korent

³ Wər nətəşşu arat waliyyan as z'iqqəlan təsənkəft y awedan waliyyan, fəl ad wər itəwənəy lahan waliyyan daş əşşəşəl-nana.

⁴ Kalar arat kul wa nətəşşu, nəsaknu daş-as as imaşşayalan ən Məşşina daş a nəmos əs zəmmerat tagget ta nəga i təssust, d aşşawaşa əd təməşutar,

⁵ əd təwit, əd kasaw. Nəzmər deş daş alşazab wa nəga daş tənəjarwayen şin fall-ana əganen, d əşşəşəl labasan wa nətəşşu, d-iba n agaraw s etəs əd gələk.

⁶ Nəsaknu tişit-nana imaşşayalan ən Məşşina əs man zaddogən, əd masnat ta nəşraw, əd təzaydart ta dana-təhat, əd man mallolnen. Nəsakn-et deş əs tədhəlt ta danax-iga Infas wa Zəddigan əd tara təgât s əwəl iyyanda ta dana-təhat.

⁷ Nəsaknu tişit-nana imaşşayalan ən Məşşina s awal imosan tidət wa nəmmâl, əd fərregat ta danax-ikfa Məşşina. Nəsaknu tişit-nana imaşşayalan ən Məşşina əs təzoli n əməşer ta n taqqat tas za nammagar nagşez iman-nana.

8 Gər za nətiwasaymar wala nətiwalka; gər za nətawarbad wala nətatamal, nakkanay tidət a nəmmâl, kuddeḡ as itiwattaf as əsəxrək a nətagg aytedan.

9 Nətiwazday wəllen, mišan šilat n as wər nətawazday. Nəššigga daḡ tamattant, mišan harwada nəddâr. Nətawaddab mišan wər nətəwənxu kərəz.

10 Əḡşâdan man-nana mišan wər danay-igdel awen as faw nəfilawas. Wər nəla wala mišan nəsaggargas aytedan aggotnen; wər nəla wala, ənta arat kul i-nana.

11 Ya işəqqəḡan-nana win Kəl-Korent, awa ihan iman-nana a dawan-tu-nəmmâl s əwəl iyyanda, amaran nolâm-awan iwallan-nana.

12 Nakkanay wər dawan-nəxfel iwallan-nana, kawanay amaran təxfalam-ana win-nawan.

13 A dawan-anna awa z'annay i bararan-in: Aləmat-ana iwallan-nawan, zun awa dawan-nəḡa.

Ammar n aytedan s ad izdagan

14 Ad wər tətasaḡam d aytedan win wər nəzzəḡzan s Əlməsix. Manəmmək as z'asəḡ əlluḡ d əššur, wala asəḡ ənnur əd šiyyay?

15 Ma imos arat wa fəl z'inəmənnək Əlməsix d İblis? Ma idraw awedan izzigzanan s Əlməsix d iyyan sər-əs wər nəzzəḡzan?

16 Ehan n Əlyibada ən Məššina deḡ ma təmos tərəddawt ta z'agu d əssənəman? Fəlas nakkanay a əmosnen Ehan ən Məššina di iddaran, id Məššina a innan: «*Ad əxsəra daḡ aytedan-in, idawa dər-san; əqqələḡ Əməli-nasan, əntanay deḡ əqqəlan tamattay-nin.*»

17 Awen daḡ a fəl inna Əməli: «*Əgmədat-du aytedan win wər nəzzəḡzan, tammazzayam dər-san, ad wər tədəsam a immidasan, əddi a kawan-əqbəla.*»

18 A dawan-əqqələḡ abba, təqqəlam bararan-in əd təbararen-in, adi a inna Məššina di n əməli ən tarna kul.»

7

1 Daḡ adi, imaran-in, dad zamas tawaggan-ana arkawalan win, zəzdəgat-ana iman-nana daḡ arat kul wa isamadasan təḡəssa d ənnəyat. Naḡet tazdak təkmalat, iga awen əs təkşəda ən Məššina.

Tədəwit ən Buləs ḡur tətubt ən Kəl-Korent

2 Aləmat-ana iwallan-nawan, nakkanay wər kala ad nəḡa təkma y awedan waliyyan, wala nəḡşâd-as arat wala deḡ nətša alxaq-net.

3 Wər ənnəḡ adi fəl a kawan-əssəwəra lahan waliyyan fəlas əmələḡ-awan dat adi as nəsinahal-kawan tara.

Təməddurt wala tamattant wər za təkəkəs tara tēdi day wallan-nana.

⁴ Wər day-wan əgey ašsak waliyyan. Tagga abarag day batu-nawan. Day təssust kul ta nənay təkna talxa-nawan təsasmit n əwəl-in, amaran təfalawist-in wər tēla əddukad.

⁵ As du-nosa akal ən Masedonəya wər kala ad nəgraw əs təsanfawt, kalar nəbdād day təməxutar labasnen as wər t-illa a day wər əgenat. Tagganat tamazaɣen dəgma-nana, amaran təh-âna tasa.

⁶ Mišan Məššina di n ənəssesməd ən man n i s əxşadan man-net, isasmad iman-nana s assa wa dana-d-iga Titəs.

⁷ Wərgəx assa-net ɣas a danaɣ-olaman fəl man; kalar əkənni wa das-təgam iman, d as imâl-ana əsənnəhəl wa təgam tara n a di-tənəyam, əd təmagrizt ta təgam, d əddəguz wa təgam day awer n aganna-nin; adi, a iknan əsəffəliwəs ən man-in.

⁸ Ab'as əmməgraza širawt ta dawan-in-əktaba, kuddey as idâs-i as əmmigrazaɣ akatab wa dawan-tat-in-əgey, fəlas əssânaɣ as təxşād iman-nawan, mišan ya aɣşud di wər ihog.

⁹ Fadda əmərədda isidawat-i as dawan-tat-in-əktabaɣ, wərgəx fəlas təxşad iman-nawan, kalar fəlas aɣşud wa əgan man-nawan əddi, eway-du sər-wan tətubt day bakkadan-nawan. Ezzənəf n əxşud ən man wədi day a ira Məššina y aytedan-net, day adi wər dawan-nəxşed arat waliyyan.

¹⁰ Fəlas Məššina ifrâg a sər-na d-awəy aɣşud ən man fəl ad nutab day bakkadan-nana, awəy-du sər-na əlxillas. Wər danaɣ-ilkem ad nəmmigraz əzzənəf n əxşud ən man wədi. Aɣşud ən man amaran wa sər-na du-teway əddənət wər d-itiway tətubt, təsəlkamt-net tamattant.

¹¹ Ənəyat iket n əsəbdəd wa kawan-iga əxşud ən man wa ira Məššina. Əsəbdəd wen ənta a d-ewayan gəlleyat ta təgam, d aggaz wa təgam iman-nawan, d alham wa day-wan iga, əd tasa ta sər-wan d-eway, d əsəddiran wa təgam anay-nin, d əddəguz wa təgam day amazal n awa olaɣan, d aggay wa sər-wan d-iga tara n ad awwaddaban aytedan win tagganen təkma. Təssiknam day anamod kul as, wər təlem lahan waliyyan day talxa tēdi.

¹² Day adi širawt ta dawan-in-əktabaɣ əddi, wər tat-in-əkteba fəl əddəlil n awedan wa igan arak amazal wala was itawagga; kalar əktâbaɣ-awan-tat-in fəl ad tətawasaknu gəlleyat ta təgam day batu-nana dat Məššina.

¹³ Iknâ adi iman-nana. Amaran əkənni wa əgan man-nana den, iwar-tu as, isidawat-ana wəllen anay wa nəga Titəs ikna təfalawist fəlas ketnawan as das-təknam iman.

¹⁴ Əgeç-as abarag fall-awan, təqqimam wər di-təzzəbazam təkarakit. Amaran wər kala a dawan-nənna arat wər nəmos tidət, abarag deç wa nəga i Titəs, ənta da, iqqal tidət.

¹⁵ İkn-iwan tara, wəllen as d-ikta əbərdəg wa təgam ketnawan y igi n awa inna əd saçmar aggen wa tu-təssəknam.

¹⁶ İket təfalawist əgeç-qat, fəlas əfrəgəç a fall-awan safalla daç arat kul.

Şirgiten əmosnen tadhəlt n əlməsixitan win əyrəm ən Yerusalam

8

Tadhəlt d igi ən tənfa y aytedan

¹ Imədrayan-in, nəra a dawan-nagu isalan n arraxmat ta iga Məşşina y Əlkənisaten şin əhanen akal ən Masedonəya.

² Təssust labasat ta tanat-təgrawat, d əlləqqəw labasan wa tanat-idgazan wər dasnat-igdel igi ən təfalawist s awa təga daç təzzəwwərt, teway-du sər-əsnaç igi ən təhək n əlləllu iknan təzzəwwərt.

³ Fəlas silakanəç-awan as, arat wa əfragnat a əragnat, fadda awa əkfanat, oğar awa əlanat, amaran əgənat awen gər-essanat əd man-nasnat.

⁴ Fadda mansay a daç ədgəznat a danəç-əganat a tanat-nayyu əgrəwnat arraxmat n ad ədhəlnat imizdagan win əyrəm ən Yerusalam əntanay da.

⁵ Arat wa əganat, oğar was nəga attama-net, ad t-imosan as azzarnat tehakkay ən man-nasnat y Əməli, dəffər adi əkfanat-anəç iman-nasnat, imos awen arat ira Məşşina.

⁶ Adi a fəl nədgaz Titəs, s ənta a daç-wan d-igan əstizarat ad tagim şirgiten, a dawan-ilal s ad tassandim əşşəçəl wa, imosan arraxmat.

⁷ Dad zamas təbbilalam s arat kul: almaçna təknaçm təla n əzəçzan, təknaçm masnat n awal, təknaçm təla ən masnat, təssənaçm gəlleçat daç arat kul, tədgəzam daç tara ta dawan-nəga; wədi arraxmat ta imos igi ən tərgiten da ədgəzat daç-as wəllen.

⁸ Wər dawan-ganna imos fall-awan əşşil igi n adi, kuddeç as Əlkənisaten şin hadatnen əknənat tara n igi-net. Kalar tara ças a əgeç ad əssəna da du-təqqal tara ta kawan-təhat.

⁹ Təssənaçm daç arraxmat ta danəç-isəkna Əməli-nana Çaysa Əlməsix. Ənta wa n əməggərgəs, isallaqqaw iman-net fəl əddəlil-nawan, fəl a kawan-isəggərgəs kawanay s ələqqəw-net.

10 Ēnta da ənnəsixa wa dawan-əgey daɣ batu tədi: of-awan ad təsəkkəsəwam arət âs kawanay iman-nawan ad t-issəntan ila adi əmərədda awatay, fəlas kawanay a zzarnen s igi-net, kawanay deɣ a t-id-iktan harwa daɣ tizarat.

11 Daɣ adi əmərədda agiwat daɣ əsəkkəsəw n əššəxəl di, əddəguz wa təgam as t-idu-təssəntam. Ērəgat daɣ arət a iqqal wa təlām awas təfragam širgit-net.

12 Fəlas kud deran issohen ill-ay wədi təhəkkut ad tətəwəqəbəl s əlluɣ ewal awen s awa nəla wərgəy awa wər nəla.

13 Wərgəy agamay a tagga ad əsənəfləyax aytedan wiyyad, kawanay amaran əsəmməxi-təraq-qawan. Kalar agamay xas a tagga ad tənəmiwəyam.

14 Ēmərədda kawanay a əbbəlalnən, immikkan ad tilalam y aytedan win tələqqawen; as iga adi, as ənnəflayan a dawan-ilalan əntanay da əzəl wa ad təməxataram. Ēmmək wədi as za tənəmiwəyam.

15 Ēnnan Ēlkəttaban: «*Awedan wa iššədawan a əggen, wər iššədaw a t-ogaran; wa iššədawan a əndərran, wər ikataytay.*»

Batu ta təqqalat Titəs daɣ ənnizam wa n širgiten y Ēlkənisat ta n Yerusalam

16 Ēggodayax i Məššina a ikfan Titəs gəlleyat daɣ batu-nawan šilat ən ta daɣ-as əgey.

17 Fəlas wərgəy tərəddawt xas a iga s arət wa daɣ-as nəgmay, fadda issəwar adi as d-inkar gar-es əd man-net ikk-iwan-in fəl gəlleyat a iga daɣ batu-nawan.

18 Nəššədaw-t-in d amadray-nana iyyan âs Ēlkənisaten ketnasnat əmməlnat əššəxəl wa itaggu daɣ batu n Ēlinjil.

19 Ēnta deɣ a sannafrannat Ēlkənisaten y a dər-naɣ iddaw daɣ əšikəl wa za nagu newây arraxmat ta əmosnat tərgiten šin, y a dər-əs annattaf, nassaknu s adi adkul-nana Ēməli d əddəguz wa nəga daɣ tilalt y aytedan.

20 Təmos tidawt-nana dər-əs ədərreg y a danax-itəwəsəwər lahan a iqqal daɣ talxa n ənnəttaf wa nəga əd təhəkkut zəwwərat ta.

21 Fəlas nəgammay awa olaɣan dat Ēməli d aytedan, nəgammay deɣ amazal sər-əs.

22 Meddan win sər-wan in-nəzammazal, nəššədaw-tan-in d amadray-nanaɣ iyyan. Amadray-nana wa, nərâm-tu daɣ taklaten aggotnən əs təməwiten aggotnən, faw iglây, wəllen əmərədda fəl awa dawan-iga daɣ fəllesat.

23 Daɣ batu ta təqqəlat Titəs, əmidi-nin a imos dər ədrâwax əššəxəl wa dawan-taggaɣ, amaran daɣ batu ən mədrayan-nana win hadatnən win dər iddew, əntanay

inəmmuzal a əmosan n Əlkənisaten, əşxəlneɣn gəmmayan adkul n Əlməsix.

²⁴ Day adi, sakniwat-tan tara ta kawan-təhat d əddəlil wa nəla s igi ən baragan day batu-nawan fəl a day-san əkkəsnaɣn Əlkənisaten aššak, ənəynat-tan.

9

¹ Day batu ta təqqalat tadhəlt ən mizdagan wər əddərara s a dawən-in-əktəbəx širawt.

² Fəlas əssənaɣ day gəlleɣat ta təgam day a dasan-tərəgam, d as əgeɣ y aytedan ən Masedonəya ibaragan fall-awan. Ənneɣ-asan: inalkiman n Əlməsix win akal n Akayya harwa naydan ad əran əsəgli ən tərgiten; fadda əddəguz-nawan day igi ən tərgiten a issəran taššam-nasan ad ərəgan əntanay da.

³ Adi a fəl sər-wan in-zammazalay imədrayan-nana win di, fəl ad wər əqqələn baragan win fall-awan nətaggu awal ən bannan. Ənneɣ-asan as kawan-in-z-asin širgiten-nawan əmmotagnat.

⁴ As wər iga adi, har kawan-in-oseɣ əddəway d arət day Kəl Masedonəya, nos-iwan-in wər təsammatagam; a dana-tabəz təkarakit ən baragan win dasan-əgeɣ fall-awan, amaran kawanay wəllən a za təbəz təkarakit.

⁵ Day adi ənayax as təga addararat s ad əgəmməya day mədrayan-nana win di a di-in-izaran y ad əššidəwan širgiten šin as təgam arkawal-nasnat; assaknu adi as təgəm-tanat s əlləllu, wərgəɣ əs gərrəz.

Maruzat ta təhat igi ən tənfa y aytedan s ərrəzəyan-nana

⁶ Ənta da awa əssoka əs batu tədi: Awedan wa inbalan amasa wər nəggət, ad d-aləy tənfa wər nəggət; awedan dəx wa inbalan amasa aggen, ad d-aləy tənfa tagget.

⁷ Akk awedan akfet awas iga ənneyat n ad t-akfu day man-net. Ad wər təqqəl təhakkay-net arət imigrəz, wala imos as əššil; fəlas Məššina ira awedan wa ihakkin əs man ərdānen.

⁸ Amaran Məššina ifrāg a fall-awan d-izəzzəbbət əzzənəfan n arraxmaten aggotnen, fəl a tu-wər-iməl arət a iqqal day alwaq a iqqal as təddiraram, har tawadam igi ən mazalan kul win olaxnen.

⁹ Adi a fəl ənnan Əlkəttaban: «*Ihakku s əlləllu, ihakku šiləqqawən; taqqat-net, təxləl.*»

¹⁰ Məššina a ihakkin amagyak amasa, ihakku dəx isudar. Ənta dəx a kawan-z-akfin amasa s iggət, təzzar isəggət tənfa ta du-təway taqqat-nawan.

¹¹ Awalla, Məššina a kawan-isəbbələl day arət kul fəl ad təfrəgam ad tallallem faw day arət kul; awəy-du adi

s aytedan win as za nawəy širgiten-nawan igi ən godan i Məššina.

¹² Fəlas širgiten šin təgam, wərgəx imizdagan win Yerusalam win maddararan xas as z'anfinat; kalar ad d-awəynat s aytedan aggotnen igi ən godan i Məššina.

¹³ Širgiten šin di əntanatay a d-ewaynen əs mizdagan win Yerusalam zazwar ən Məššina fəlas təssiknam əbərdəg wa sər-wan d-eway ləkkum wa təgam y Əlinjil n Əlməsix, təssiknam-tan dəx əlləllu əntanay d aytedan sahadan.

¹⁴ As dawan-taggin šiwatriwen a dawan-tanat-taggin əs man tədnay tara fəl əddəlil n arraxmat təknât təzzəwwərt ta kawan-ikfa Məššina.

¹⁵ Gudəyatanax i Məššina təhəkkut wər nəla tulat ta danax-iga.

Buləs isasagru ibbillan dəx fəl əššəxəl-net wa n tišit n anammazul

10

Tanaya ən Buləs

¹ Nak Buləs, nak wa fəl gannin aytedan as: šira šin dawan-in-kattabay xas a dəx əhâla awal, mišan as kawan-əheç ad əqçələx awedan ləmmidan; onsâyaç-qawan fəl udəm ən talmat d əlluç win iga Əlməsix,

² as, as kawan-in-oseç, a di-wər-təšəhhəššəlam a kawan-assakna taholat-in awal id otâsax ad assakna taholat-in awal aytedan win di gannin əddi nakkanay wər nəlkem ar i təla n əddənet. A dawan-ələsa tənna: Əgmâya dəx-wan a di-wər-təšəhhəššəlam igi n əmazal di!

³ Tidət a imos as əddənet a nəha, mišan wər nəmməgar fəl awa fəl əmməgaran aytedan win əlkamnen y əddənet.

⁴ Fəlas təzoli tas nəmməgar wər tat-təla əddənet ta, kalar tarna a danaç-ikfa Məššina as nəmməgar; nətadagdag sər-əs idaggan əsohatnen win ittaf Iblis. Nəssân dəx bahutanet, nəsaççag-en.

⁵ Nəzaraz sər-əs tamazaç kul ta təgaddalat y aytedan ad əssənan Məššina. Təzoli tədi da as du-nətabaz imedranan kul n aytedan, fəl ad abbardagan y Əlməsix.

⁶ As təssəknam alkamalat n əbərdəg-nawan, nəsimatag y ad nawwaddab awedan kul wa n ənəmmezrəy.

⁷ Əswədat dəx awa illan dat šittawen-nawan, tagrim-tu. Kud awedan a kawan-ihan ikkâsan aššak as Əlməsix a t-ilan; issənet za as, nakkanay da ig-âna Əlməsix təla tədi da a das-iga əddi.

⁸ Wala ad əgəç ibaragan aggotnen fəl as danaç-ikfa Əməli tanaya, da wər di-z-izzəbəz adi təkarakit. Tanaya

ta danaḡ-ikfa šin a kawan-nəsəssuhət, wərgəḡ a kawan-nəjbəbərəjjət.

⁹ Ənneḡ awen fəl ad wər tiḡalam šisəksədawen ḡas a dawan-tagga daḡ šira-nin!

¹⁰ Id itawannu sər-i: «A kawan-wər-iššəwəš Buləs. Šira-net ši labasnen, əssohatnat, mišan ənta əs man-net as dana-d-osa wər fərur, amaran wər issen awal.»

¹¹ Awedan wa sər-i innan adi, əssənet as, awa din-nəkəttab daḡ šira-nana, ənta a za nəmmazal as kawan-in-nosa.

¹² Tidət âs, wər za nəhəl ad nəšišagda iman-nana wala nəšišalen d aytedan win di a dawan-əmmalnen iman-nasan; wər nədəkkəd iman-nasan ar əs man-nasan, šašagdin deḡ iman-nasan əd man-nasan. Wər əlen əgərri.

¹³ Nakkanay za, wər za nagu ibaragan fəl aratan win wər nəmos tadagart-nana; amaran wər z'akəyan baragan-nana tadagart ta danaḡ-ikfa Məššina, a tat-imosan as kawan-in-newad.

¹⁴ İki wa dawan-in-nəga wər imos əsəssikəy fəl awa nətawakfa zun as kawanay wər təhem tədagart ta nəgraw, fəlas kawanay as nazzar nəşḡal ḡur-wan, nəmal-awan isalan n Əlinjil n Əlməsix.

¹⁵ Nakkanay wər nətəggu ibaragan fəl əššəḡəl ən wiyyad aytedan win əgrawnen tədagart wər nəmos ta nətawakfa nakkanay. Kalar attama-nana nəg-ay daḡ-âs, as ittitéy əzəgzan-nawan, a ḡur-wan nagu əššəḡəl as z'itizwaran wəllen, da wər nokay tədagart ta danaḡ-ikfa Məššina.

¹⁶ Almayna ad nəfrəg igi ən salan n Əlinjil daḡ kallan win dənnəg-wan əllanen, naqqam da wər nəga ibaragan fəl awa d-ixsalan daḡ əššəḡəl imôsan tadagart n awedan iyyan.

¹⁷ Ənnan Əlkəttaban: «I itaggin ibaragan, aget-tan fəl awa iga Əməli.»

¹⁸ Fəlas wərgəḡ awedan wa immalan iman-net a igrawan saymar, kalar awedan wa immâl Əməli a t-igrawan.

11

Buləs issinkad-anay i nəmmuzal win bahu

¹ Areḡ daḡ-wan a dər-i təzəzzəydəram! Ad aga arat ən təmətəkwayt n əmməskəl! Awalla, əzmarat y awa z'anna!

² Fəlas əgeḡ-awan tara ta n təsmiten, šismiten di da šin d-əfalnen Məššina, id təhâm-i šaššəlan ən təntut əs wər kala a tat-idas aləs, a dər isimarkas aləs iyyanda, a t-imosan Əlməsix, amaran nak a das-isamarkasan dər-əs.

³ Mišan əksudaḡ ad təwərkəbnat taytwen-nawan əs təsədək iyyat, tammazzayam d əḡyibada wa təgam Əlməsix

s əwəl iyyanda [əd man zaddogñen], itəwəgg-awan ətəwəsəxrak wa iga mələl Xawa əs təkərras-net.

⁴ Fəlas as kawan-in-osa awedan iyyan ig-awan isalan ən Ƴaysa iyyan wər nəmos was dawan-nəga isalan-net, madex təgrəwam infas iyyan wər nəmos Infas wa Zəddigan wa təgrawam, madex ag-awan isalan n əlinjil iyyan wər nəmos wa təqbalam, tarmâd as das-taknim tərəddawt s awen.

⁵ Dər iga awen da za, wər ħur-i iga as ill-ay arat as di-ogaran nəmmuzal-nawan wər nəla tulat win di.

⁶ Amaran kud awal wər əley madas-net, masnat ənta, əleq-qat wəllen; nəssikn-awan-tat dəx əkkulluk n arat s əmmək kul.

⁷ Awak abakkad a əgeç as əssərasax iman-in fəl a kawan-əzzəzwəra kawanay s amel wa dawan-əgeç isalan n Əlinjil ən Məşşina wər kawan-əzzərzama wala?

⁸ Oçe-du Əlkənisanen şin hadatnen əs tədhəlt ta di-əganat s awas əddərara dəx əşşəçəl wa dawan-əgeç.

⁹ Alwaç wa ħur-wan əlle, wər kala əqqalaç i waliyyan dəç-wan əzuk as məyatara s arat, fəlas imədrayan-nana win d-əfalnen akal ən Masedonəya a di-əkfanen awas əddərara. Əgdələç i man-in tişit n əzuk i waliyyan dəç-wan dəx əkkulluk n anamod, amaran ad agla dəç igi n adi.

¹⁰ Agamad wa iga aşşak tidət n Əlməsix ta di-təhat, ənta a iga as, wər iha awedan imədlan n akal n Akayya ifrâgan a di-igdəl igi n abarag wədi!

¹¹ Ma fəl əgeç adi? Awak iba ən tara-nawan? Məşşina issân as areq-qawan!

¹² Arat wa tagga da amaran, ad agla dəç igi-net, fəl ad əgdələç igi ən baragan y aytedan win əranen ad əgrəwan tarrayt n ad annin əşşəçəl-nasan wər izlay əd wa-nana.

¹³ Fəlas meddan win di, inəmmuzal ən bahu a əmosan, əmosan dəç imaşşaxalan ən məkkəddal, sakninen as inəmmuzal n Əlməsix a əmosan.

¹⁴ Wər iqqen adi eçaf, fəlas wala Aşşaytan itaggu iman-net angalos n ənnur itäggin tidət.

¹⁵ Dəç adi aytedan win das-əşşaxalnen wər isammaklal ad agin iman-nasan zun maşşaxalan sasayrinen aytedan taqqat. İlkâm ad əgrəwan awa dər əhoran mazalan-nasan.

Alyazab wa iga Buləs dəç tişit-net anammazul

¹⁶ A dawan-ələsa tənna, ad wər içal awedan waliyyan nak əmeskel. Mişan, kud əmeskel a di-təgam, təzməram-i, awa tətəggim y əmeskel, fəl ad agaç arat ən baragan-in nak da.

¹⁷ Arat wa ənne da, wərgəç arat as d-inna Əməli ad t-anna, kalar abarag adi, a di-təsisaga tulat-in d əmeskel.

18 Dad zamas əggətan aytedan win tagginen ibaragan fəl awa itaggu aggadəm daɣ əddənet, nak da, ad agaɣ ibaragan.

19 Fəlas kawanay win malan ən tayttay, təzmâram i məskelan, isidawat-kawan adi!

20 Təzmâram y i kawan-igan eklan, madeɣ aɣu awa təlam, təzmâram y i daɣ-wan tat-igân əs təkərras-net, madeɣ assakn-iwan məlka, madeɣ iwət-kawan daɣ udəm.

21a Isikarakad-i as, əlləqəw-nana nakkanay, igdâl-ana a dawan-nagu aratan šilat ən win di.

21b Dər iga awen da ya, arat a iqqal as ihal awedan a fall-as agu abarag, nak da, əhâlaɣ a fall-as agaɣ abarag. Batu ta əge da šilat n as ig-et ameskel.

22 Kud Kəl-ÿibri a əmosan, nak da, əmosaq-qu. Kud Kəl-İsrayil a əmosan, nak da, əmosaq-qu. Kud əzzurrəyya n İbrahim a əmosan, nak da, əmosaq-qu.

23 Kud imašşaxalan n Əlməsix a əmosan, ogaraq-qan tišit-net. Batu ta əge da šilat n as ig-et ameskel. Kud alɣazab a əgan, ogaraɣ-asan-tu; kud kasaw a əggazan, ogaraq-qan iguz-net; kud šiwwit a tawaggan, ogaraq-qan ətəwənɣa; kud deɣ tazak ən tamattant a əggazan, ogaraq-qan iguz-net.

24 İwəddiban səmmos a di-əgan Kəl-Əlyəhud, s akk iyyan əkkozat təmərwən ən tawatay daɣ aba iyyat.

25 Karadat tənəqq a di-əgan Kəl-Ərrum s ələkkud, taklat iyyat əgməyan aytedan əd tanaxay-nin kərəz əs təgur ən təhûn, karad əɣşudan da tənəmazray a dər-i iga əɣlal n aman. Idâs-i deɣ as əgeɣ ahad iyrâdan d əzəl daɣ ammas n agaraw əbukan aman a di-ətšin.

26 Əgeɣ işikilan aggotnen. Əggâzaɣ alɣarar n adi əbətən aman ən təsəssəngay šin raddaɣa madeɣ əgrəwan-i narkaban. Əggâzaɣ alɣarar daɣ aytedan win-da-nin ən Kəl-Əlyəhud əd win tan-wər-nəmos. Əggâzaɣ alɣarar daɣ ɣərman əd saffan. Əggâzaɣ alɣarar n a di-atšu agaraw. Əggâzaɣ deɣ alɣarar daɣ aytedan win ganninen əs bahu əmosan imədrayan-in daɣ əddin.

27 Əzdâyaɣ əšşəxəl iha alɣazab əd talawayt, d əmikər n etəs aggen. Əzdâyaɣ gələk əd fad, əyyəwana deɣ əzum. Əzdâyaɣ taysəst n asamed əd zəlləm.

28 Adi ketnet, iwâr-tu əddəguz wa əgeɣ akk əzəl daɣ masnat ta əgeɣ daɣ Əlkənīsaten kul.

29 As daɣ-asnat irkam awedan, a di-idəs rəkkəm-net nak da; as daɣ-asnat d-eway awedan s əmidi-net igi n abakkad, ad tarɣu temsay daɣ man-nin.

30 Kud əšşil a fall-i imos igi ən baragan, wədi aratan win sakinen rəkkəm-in a fəl tan-z-aga.

³¹ Issân Məşşina di n Abba n Ʒməli Ʒaysa as, wərgə bahu a əgəx. Attamalet esəm-net har faw.

³² Aləs wa izzozar əmənokəl Arestas y əxrəm ən Damas, kala ad omar meddan s ad əbdədan daɣ mawan n əxrəm fəl a di-əbəzan.

³³ Mišan tawagga daɣ azmam zəwwəran, tawasarasa əs fənetər ihân aɣalla wa iɣlayan əxrəm, əddərragax-as.

12

Targət ən Buləs əd təsasmit ta təhat taɣəssa-net

¹ Ilzām-i igi n abarag. Kud wər infa igi-net wala da, ad aɣlax əmmālay-awan aratan win di-issəkna Ʒməli əd win di-isannafalal.

² Ʒzdāyax aləs iyyan osāɣan d Ʒlməsix as kala ad immədkał har osa əjəna wa n əssa. Wər əssenax kud taɣəssa-net a təmmədkałat den, wala deɣ iman-net ɣas a əmmədkałnen, Məşşina ɣas a issanan. İla adi əmərədda maraw elan d əkköz.

³⁻⁴ Awalla əssānaɣ as aləs wədi, immidkał har osa aljanat, isla daɣ-as awalan simaklałnen as wər ifreg awedan emel-nasan daɣ awal waliyyan, wala deɣ xalal amel-nasan. Wər əssenax kud, taɣəssa-net a təmmədkałat den, wala deɣ iman-net ɣas a əmmədkałnen, Məşşina ɣas a issanan.

⁵ Ad aga abarag fəl awedan wədi, mišan wər tu-z-aga fəl man-in. Rəkkəm-in ɣas a fəl z'aga abarag.

⁶ Amaran kud areɣ igi ən baragan, da wər di-iga adi əmeskel, fəlas tidət a z'anna. Mišan ad ammazzaya d igi-nasan id wər areɣ a di-ittəf awedan waliyyan daɣ adag ogaran wa daɣ-i əgan mazalan-in d awa ganna.

⁷ Isinafalal-i Məşşina aratan əganen adkul wər nəla əddukad, adi a fəl di-igdal adakal ən man-nin s igi wa iga daɣ alam-in əşənnan, imosan ənammazul n Aşşaytan a di-izayazzaban fəl ad wər ədkelay iman-nin.

⁸ Karad gamayan daɣ tanamazray a əgəx daɣ Ʒməli a di-izəmməzzəy dər-əs.

⁹ Mišan inn-i: «Təgd-âk arraxmat-in; fəlas tarna-nin, rəkkəm a daɣ tətəggu ənəfiləl wa ikmalan.» Daɣ adi isaddawat-i igi ən baragan fəl rəkkəm-in, fəl a daɣ-i təzdəɣ tarna n Ʒlməsix.

¹⁰ Adi a fəl di-isaddawat rəkkəm, əd tərəbbad, d aɣazab, d ətəwədgaz, əd təməɣutar fəl əddəlil n Ʒlməsix. Fəlas alwaq wad ərkama, ənta a daɣ əssoheɣ.

Awa idgazan Buləs daɣ batu ən Kəl-Korent

¹¹ Təşahhaşşalam-i əmazal imosan igi ən baragan âs əmeskel ɣas a t-itaggin; ənta kawanay as ihor a fall-i

təsanamalam, fəlas kud wər əmosax arat da, wər di-ogeran nəmmuzal-nawan wər nəla tulat win di.

¹² Aļalamaten ən tişit-in anammazul wa n tidət tiwaganat gar-ewwan əddewnat əd zəmmerat, igâ awen s aļalamaten əd təjubab əd təlməxjujaten.

¹³ Arat iyyanda xas a xur-wan wər əgeç, âs Əlkənisaten şin hadatnen əgeç-qu xur-əsnat, a t-imosan as wər daçwan əgmaya tadhəlt waliyyat. Surəfat-i-id ark amazal wədi!

¹⁴ Əmərədda simâtaga y a dawan-in-agax assa wa n karad, amaran wər dawan-z-əqqələx əzuk; fəlas wər gəmməyax awa təlam, kalar kawanay a gammaya. Wərgəç bararan a iwar ad assansin arat iyyan i marwan-nasan, kalar imarwan a iwar ad assansin arat i bararan-nasan.

¹⁵ Nak za, isidawat-i a fall-awan akfa təla-nin kul, akfa harkid man-nin fəl əddəlil-nawan. Awak da dawan-əgeç tara togdat d awa, ad ifnəz adi ta di-təgam kawanay?

¹⁶ Təssânam as wər dawan-əmosax əzuk, mişan təgannim əməkerrəs a əmosax, əgeç-qat daçwan əs təkərras-in.

¹⁷ Məni təməwit tas kawan-əkkərrasax? Awak iyyan daç meddan win kawan-in-əssoka a daçwan itşan arat?

¹⁸ Nak a onsayan Titəs əgmaya daç-as a kawan-in-akku, əşşədawaç-q-in d amadray-nana daç əddin wa təzdayam. Awak arat iyyan a daçwan itşa Titəs? Awak wərgəç nak dər-əs tarrayt iyyadda as nəlkam s ənəyat iyyadda? Awak wərgəç almasal iyyanda as nəlkam?

¹⁹ Awak tədma a təgam, awal ketnet wa əgeç daç batu ta, agamay a sər-əs nətaggu aggaz daçwan iman-nana? Kala! Dat Məşşina ad nəşawal, əs tarrayt ən tassaç-nana d Əlməsix. Amaran, imaran-nana, əssənət as arat kul wa nətaggu tənfa-nawan a fəl tu-nətaggu.

²⁰ Eksudaç a kawan-in-asa wər oggema təxara-nawan, kawanay deç, wər toggemam ta-nin; əksudaç as mijas əllanat-tu tamaxən gar-ewwan, əd manjaç, d aşşar, d əzgən, əd tənnawen, d ədkul ən man, əd tənajarwayat, wər təgəmməyam ar tənfa ən man-nawan.

²¹ Eksuda deç a kawan-in-asa iləs-i Əməli-nin Məşşina əzəbəz ən təkarakit xur-wan; əksudaç ad əxşədan man-nin, fəlas wiyyad daçwan aggotnen a wər nəmməzzay d igi ən bakkadan win as kala a tan-taggin, wər ətuban deç daç igi ən mazalan samadasnen win taggin, d igi n əzzəna əd mazalan zizallatnen win taggin.

13

Igi daw axaf d əsəmmutəç y əşikəl wa n karad

¹ Iki-nin y-awan wa n karad awa. Ənnan Əlkəttaban: «*Taxtəst kul, təgəyya n əşšin aytedan madex karad a tat-isisuhen.*»

² Yur assa-nin y-awan wa n əşšin, əssinkadaş aytedan win di wər nəmməzzay d igi ən bakkadan, əntanay d aytedan kul win hadatnen. Əsənkəd za wədi da a dawan-əgeş əmərədda harwa da əgguga, əs: As kawan-in-oseş wər t-illa awedan itaggin ibakkadan, as z'aqqamin wər iwwəddab

³ dad zamas təgəmmayam a dawan-attaddu as Əlməsix a sər-i işşewalan. Amaran Əlməsix wər kawan-issəkna iba ən fərregat n arət, kalar issikn-iwan təlāt-net tarna.

⁴ Fəlas illikan as irkam alwaş wa daş itawataytay fəl təgəttawt, mişan iddar-du əs tarna ən Məşşina. Illikan deş as nakkanay da nərkam fəl əddəlil ən tassaş ta nəga d Əlməsix, mişan əs tarna ən Məşşina ad nagu təməddurt ta iga Əlməsix, fəl əddəlil n əşşəşəlan win dawan-nətaggu.

⁵ Şaggarat iman-nawan, təssənam kud tidət daş əs təzzigzanam! Ərəmat iman-nawan! Wər təssenam as Yaysa Əlməsix iha iman-nawan? Meş əzəgzan-nawan a wər nəzmer i şaggara!

⁶ Amaran əgeş attama-nin daş as, ad tənəyam tarđim deş s as, nakkanay da nənjāş daş şaggara wədi, issiknaş as nakkanay inəmmuzal win tidət a nəmos.

⁷ Nətattar əs Məşşina a dawan-igdalan igi ən təkma waliyyat. Wər dawan-nətəttər fəlas nənjāş daş əşşəşəl wa şur-wan nəga, kalar fəl tara n ad tagim awa olaşan, kuddeş as itiwattaf as nakkanay wər nənjəş.

⁸ Fəlas wər nəfreg əməzrəş ən tidət, kundaba şas tebadday fall-as.

⁹ Isiflawas-ana rəkkəm wa nəga, ənta kawanay təsohem. Awalla nətattar a iknan tebadday-nawan daş əzəgzan.

¹⁰ Adi a fəl dawan-in-kattaba harwa da əgugaş-qawan, fəl ad wər addarara s a dawan-aga ərruşmatan əsəsnen as kawan-in-oseş, fəlas tanaya ta di-ikfa Əməli fall-awan, ikf-i-tat fəl ad əşşəla daş anamod wa kawan-z-issukin afalla, wərgəş wa kawan-z-ijəbbərəşşen.

Təsəxtəmt: Ənnəsixatan d assalaman win təzərəst

¹¹ Əmərədda, imədrayan-in, fəliwəsət! Əqqələt aytedan əkmələn; tinəməgginen ənnəsixatan; tənimmannakam gar-ewwan. Imələt alxer gar-ewwan. Əddi a daş-wan issən Məşşina di ihakkin tara d alxer.

¹² Tinəməggat assalam zəddigan. Əhulan-kawan-in mizdagan kul win əllanən da da.

¹³ Əgmâya daɣ Məşşina a kawan-ikfan ketnawan arraxmat n Əməli-nana Ƴaysa Əlməsix, əd tara ta n Məşşina əd tassaɣ n Infas wa Zəddigan.

Şirawt ta iktab Buləs i Kəl-Galatəya

İsənti

Təhult

¹ Şirawt a din-təfâlat Buləs imosan anammazul a du-wər-zammazalan aytedan, wala deş izimazal-t-id awedan waliyyan. Kalar Məşşina di n Abba s ənta a d-issənkaran Ƴaysa daş təmattant, əd Ƴaysa Əlməsix iman-net a di-du-zammazalnen.

² Nahul-in Əlkənisaten şin n akal ən Galatəya nak harkid mədrayan-in win şur-i əllanen.

³ İg-awan Məşşina di n Abba-nana d Əməli-nana Ƴaysa Əlməsix arraxmat d alxer.

⁴ Ƴaysa Əlməsix ənta a ikfan iman-net fəl a danaş-agəz daş bakkadan-nana, işləs-ana deş daş talbast n əddənet ta n əmərədda, inimannak awen əd tara ən Məşşina di n Abba-nana,

⁵ a ilan tanaya har faw! Amin.

Əlinjil iyyanda

⁶ İqqan-i eşaf wəllen əsətrəb wa təgam agamad ən batu ən wa kawan-d-işran əs tarrayt n arraxmat ta d-eway Əlməsix, təkamam y əlinjil iyyan ən bahu.

⁷ Əssənat əs wər t-illa əlinjil waliyyan ar wa dawan-əməla. Aytedan şas a t-əllanen a kawan-şawaşnen, saşraşan Əlinjil n Əlməsix.

⁸ Amaran i igan isalan n Əlinjil wər nəmos win dawan-nəga, gər nakkanay iman-nana wala angalos a d-ifâlan ijənnawan, wədi itəwəşənət!

⁹ Arat wa ənnəş-awan-tu kala da, amaran a dawan-t-ələsa tənna əmərədda: As dawan-iga awedan iyyan isalan n Əlinjil wər nəmos win as təslam təşbalam-tan, wədi itəwəşənət!

¹⁰ Ma tənnam: Awak əmərədda aytedan a daş gammaya saşmar meş Məşşina? Awak aytedan as gammayaş a dasan-əgrəza? Ənnar harwa da gammaya a di-iren aytedan, wər z'əqqələş akli işbâdan Əlməsix.

Buləs ibillan fəl Əlinjil

Təməwit tas iqqal Buləs anammazul

¹¹ Arat da was areş a daş-as təssənam imədrayan-in: Əlinjil wa əmmala, wər d-ifel aggadəm.

¹² Fəlas nak iman-in da wərgəx aggadəm a di-t-ikfan wala deyx isisayr-i-tu. Kalar Yaysa Əlməsix iman-net as di-t-isannafalal.

¹³ A igan da təslâm alxal-in dat awa harwa ad əheyx əddin wa n Kəl-Əlyəhud. Azzaman di əknex wəllen əssus n Əlkənisat ən Məşşina, gammaya d əhluk-net.

¹⁴ Harwa ad əheyx əddin wa n Kəl-Əlyəhud, oğaraş kəl-tawşet-in aggotnen win jəytan-in əddəguz daş əddin, fəlas gəllejat tagget a əgeyx daş ləkkum y alxadat ən marawan-in.

¹⁵⁻¹⁷ Məşşina a di-isannafranan, harwa da aheyx tadist n anna-nin, iyr-i deyx s arraxmat-net y ad t-əşbada. Amaran assaya wa das-igraz a di-isənnəfiləl Barar-net fəl ad əmələş isalan-net a tan-imosan Əlinjil y aytedan win wər nəmos Kəl-Əlyəhud, assaya wədi daş ad əkkeş Arabəya, dəffər adi əqqala-du Damas, da wər əşşəwwarəş awedan waliyyan, za wər əggəzzaya əs Yerusalam y ad əssuməra tanat meddan win di-azzarnen tişit ən nəmmuzal.

¹⁸ As əgeyx karad elan dəffər awen, əkke Yerusalam fəl ad ammanayaş əd Qayfas nəməzdəya dər-əs, əgeyx şur-əs maraw adan əd səmmos.

¹⁹ Wər ənaya waliyyan daş nəmmuzal win hadatnen. Yaşub wa n amadray ən Yaysa, di n Əməli-nana, şas a ənaya.

²⁰ Silakanəş-awan dat Məşşina as, isalan win dawan-in-kattabaş da, wər əmosan bahu.

²¹ Əgmada Yerusalam əkkeş amadal wa n Surəya əd wa n Kilikəya.

²² Alwaş wədi aytedan n Əlkənisatən şin Yahudəyya, wər di-əzdayan.

²³ Əslân şas əs: «Aləs wanad a danaş-iknan əssus da, əmərdəda itaggu isalan n Əlinjil was kala ad ira əjəbbərəjji-net.»

²⁴ Arat wen eway-du sər-san igi ən təmalen i Məşşina daş batu-nin.

2

Buləs əd nəmmuzal win hadatnen

¹ As əgan maraw elan d əkkoz dəffər awen əlasa əgəzzəy əs Yerusalam nak əd Barnabas, əddəwa deyx əd Titəs.

² Məşşina a di-d-isannafalalan as iwar-i iki ən Yerusalam y a daş-as əmələş Isalan n Əlinjil win tagga y aytedan win wər nəmos Kəl-Əlyəhud. Arat wen amaran əknəq-qu wəllen emel i muzaran n Əlkənisat ən Yerusalam win oğarnen ətəwəsəşmar, fəl təksəda n ad abbannan əşşəşəl wa əgeyx əd wa z'aga dəffər awa.

³ Ǝqbalan-i nak əd Titəs a dər əddewa, imosan iyyan dağ Kəl-Ǝlyunan, s əmənəkəd da wər immənəkəd.

⁴ Awen wər t-igdel iguz wa danağ-əgan məzzəgzan ən bahu wər nəmos arat dağ-na, kalar iguz ɣas a dana-d-əgan fəl ad əssənan əmmək was nəşəşɣal tədarfit ta danağ-ikfa Ǝlməsix Ǝaysa. Ǝrân a danağ-əssuɣələn əkkəlu wa nəga dağ əşşəriɣa wa n Ǝttawret.

⁵ Mişan aytedan win den wər dasan-nəga wala arat n amazay ən tərəddawt s awa ərən. Arat wen nəg-ay fəl aggaz y-awan tidət ta n Ǝlinjil.

⁶ Aytedan amaran win ogarnen ətəwəsəɣmar - wər əzləya dağ awas kala ad t-əmosan: Məşşina wər itəggu təmərit! - Aytedan win tawasaymarnen en, wər di-şahhaşşalan wala.

⁷ Kalar əgran-in as isalan n Ǝlinjil tiwaggan-du dağ əfus-in y a tan-əməla y aytedan win wər nəmos Kəl-Ǝlyəhud, zund əmmək as tawaggan dağ əfus ən Butros y tan-əgu y aytedan win Kəl-Ǝlyəhud.

⁸ - Məşşina ikfa Butros fərregat n ad iqqəl anammazul-net əs Kəl-Ǝlyəhud, nak amaran ikf-i fərregat ən tişit n anammazul-net s aytedan win wər nəmos Kəl-Ǝlyəhud. -

⁹ Yaqub əd Qayfas əd Yaxya itiwassannen dağ tişit ən təgəttawen n Ǝlkənisat əgran-in arraxmat ta di-tətawaggat, əqbâlan-ana nak əd Barnabas əssəknan-ana tassağ ta gər mədrayan. Ǝmmək en da as əqbalan as nakkanay ad nakku aytedan win wər nəmos Kəl-Ǝlyəhud, əntanay amaran akkin Kəl-Ǝlyəhud.

¹⁰ Ǝgmâyan dağ-na ɣas ad nəkittəw şiləqqawen. Arat wen amaran nak ədgâza dağ igi-net.

¹¹ Mişan assaɣa wa d-osa Qayfas aɣrəm n Antəyoxəya, əşşewala fall-as udəm s udəm id tidət a wər iga,

¹² fəlas dat assa n aytedan wər nəggət win d-əşşokalnen ɣur Yaqub, idarraw imensewan d aytedan win wər nəmos Kəl-Ǝlyəhud; mişan as t-in-osan aytedan win, igaz şin n awer n aganna, fəl təksəda n əlməsixitan win as ələsəl-nasan Kəl-Ǝlyəhud zizawatnen dağ alɣadaten n Ǝttawret.

¹³ Kəl-Ǝlyəhud win hadatnen n əlməsixitan əntanay da əgan awen da, əɣbaran arat was əzzəgzanan zun awa iga Qayfas, har as Barnabas iman-net da ilkam i təmənuşşəqanənan.

¹⁴ Mişan assaɣa wad ənayax as wər zalalaxan dağ ləkkum i tarrayt ən tidət ta n Ǝlinjil, ənnex i Qayfas dat mədrayan-nana kul: «Kay was imos ələsəl-nak ag Ǝlyəhud, təgeɣ təməddurt tolat əd ta n awedan wər nəmos iyyan dağ Kəl-Ǝlyəhud, toyyex tarrayt ta n Ǝttawret. Dağ adi manəmmək

as za təşəhhəşşələx aytedan win wər nəmos Kəl-Əlyəhud ləkkum y alxadaten n Əttawret?»

Aytedan kul əgrawan taqqat s əzəgzan əs Yaysa Əlməsix

¹⁵ Nakkanay as imos ələsəl-nana Kəl-Əlyəhud, wər nəmos «inasbakkadan» šila n aytedan win wər nəssen Məşşina.

¹⁶ Dər iga awen da aggadəm wərgex ləkkum i tarrayt ta n əşşərixa wa n Əttawret a t-ihakkin taqqat xur Məşşina, kalar əzəgzan əs Yaysa Əlməsix. Awen da a fəl as nakkanay da nəzzəgzan s Əlməsix Yaysa fəl ad nəgrəw taqqat s əzəgzan s Əlməsix wərgex əs ləkkum y əşşərixa wa n Əttawret. Awalla wər t-illa awedan waliyyan a z'igrəwan taqqat xur Məşşina əs ləkkum y əşşərixa wa n Əttawret.

¹⁷ Mišan as imos as, dağ agamay wa nətaggu taqqat əs tərtəyt n Əlməsix, itawanay-du as nakkanay da nətaggu ibakkadan win taggin aytedan win wər nəmos Kəl-Əlyəhud, dağ adi Əlməsix a danax-illilan s igi n abakkad? Kala Kala! Wər ilkem ad iga adi!

¹⁸ As əlasax akaras n awa jabbarajjex a t-imosan tarrayt ta n ləkkum y əşşərixa wa n Əttawret, ad sənnəfilələx as nak ənəmmezrəy a mosa.

¹⁹ Nak əssəbab n əşşərixa a fəl əmməzayax əd təməddurt ta ihakku əşşərixa. Arat wen kul iga fəl ad iqqəl as təməddurt-in tartəyt əd Məşşina a dağ təga. Nak ab-i fəl təgəttawt əddəway d Əlməsix.

²⁰ Əddâra mišan ab'as imos as nak a iddaran, kalar Əlməsix a iddaran iha iman-nin. Əmərədda təməddurt-in ta n tişit n aggadəm, əgeq-qat s əzəgzan əs Barar ən Məşşina as awa di-iga dağ tara, iman-net a ikfa aba-tu dağ adag-in.

²¹ Dağ adi wər z'ugəya s ad əqbələx arraxmat ən Məşşina əqqəla-du tarrayt ta n ləkkum y əşşərixa wa n Əttawret, fəlas ənnar ləkkum y əşşərixa a ihakkin taqqat xur Məşşina, wədi Əlməsix bannan as t-aba!

3

Əzəgzan a igarrawan arkawal

Tarrayt ta n əzəgzan meyx ta n əşşərixa?

¹ Xa Kəl-Galatəya win aljahilan! Ma işwan tayttay-nawan? Awak wərgex dat şittawen-nawan a dawan-təbbəyyan təmattant ən Yaysa Əlməsix fəl təgəttawt ta fəl itawataytay?

² Əsəstan iyyanda xas as arex a dawan-t-aga, a t-imosan as: Awak ləkkum y Əşşərixa wa n Əttawret a kawan-ikfan Infas wa Zəddigan, meyx əzəgzan wa təgam əs salan n Əlinjil win as təslam?

³ Awak igrâw-kawan iba n tayttay ogdân d adi? Awak dæffer as tæssintam æs mazalan win lækkum y Infas ən Məššina, tara a təgam əmərədda ad tassandim æs mazalan win təgam kawanay iman-nawan?

⁴ Awak aratan win təjjərabam daɣ təməddurt-nawan kul əqqələn bannan? Wər t-illa əmmək as z'abbannanan!

⁵ Tehakkay ta kawan-iga Məššina Infas-net di Zəddigan, iga daɣ-wan deɣ təlməxujaten, awak lækkum-nawan y Əššərixa wa n Əttawret a fəl dawan-iga awen, meɣ əzəgzan-nawan əs salan n Əlinjil win as təslam?

⁶ Aktiwat-du awa ənnan Əlkəttaban s ənnəbi Ibrahim as ənnan: *«Izzəgzan əs Məššina, awen daɣ a fəl t-ikfa taqqat.»*

⁷ Daɣ adi əssənət as aytedan win əzzəgzannen əs Məššina əntanay a mosnen bararan n Ibrahim.

⁸ Fadda Əlkəttaban ənnân harwa dat əzəl: Aytedan win wər nəmos Kəl-Əlyəhud, əssəbab n əzəgzan-nasan a fəl z'iqbəl Məššina taqqat-nasan. Awen daɣ a fəlas Əlkəttaban əmâlan isalan n Əlinjil win y Ibrahim a irəwan as ənnan: *«Ad əgrəwnat tawseten kul n əddənet albaraka s əssəbab-nak.»*

⁹ Əmmək en daɣ as aytedan win əzzəgzannen əs Məššina, əntanay a z'əgrəwnen albaraka wa igrəw əməzzəgzən Ibrahim.

¹⁰ Amaran aytedan win saffallanen fəl lækkum-nasan y əššərixa wa n Əttawret, win di təsəlkamt-nasan tulɣant, fəlas ənnan Əlkəttaban: *«Təwəret tulɣant awedan kul wa wər nəbbərdag faw y əššərədan kul win əktabnen daɣ Əttawret.»*

¹¹ Daɣ adi wər t-illa awedan igrâwan əs lækkum-net y əššərixa taqqat xur Məššina fəlas a ənnan Əlkəttaban: *«Awedan wa oɣadan daɣ tarrayt ta n əzəgzan a igarrawan təməddurt taynayat.»*

¹² Amaran əššərixa wər idrew əd zagzan wala. Kalar ənnan Əlkəttaban: *«Əššərixa ənta a z'akfin təməddurt y aytedan win d-əssəndanen əššərədan-net.»*

¹³ Elməsix ikkas-ana-du daɣ tulɣant ta danaɣ-issəwar əššərixa wa n Əttawret, idkal-tat daɣ adag-nana, id Əlkəttaban a ənnanen: *«Təwâr tulɣant awedan kul wa itawaşalayan aşək.»*

¹⁴ Arat wen ig-ay Elməsix Ƴaysa fəl ad iqqəl tarrayt y aytedan win wər nəmos Kəl-Əlyəhud y ad əgrəwan daɣ albaraka n Ibrahim, nəgrəw ketnanay əs tarrayt n əzəgzan Infas was iga Məššina arkawal-net.

¹⁵ Imədrayan-in, a dawan-aga almasal s arat taggin aytedan: As iktab awedan imateran-net əs təməwit təlkâmat y əššərixa, wər t-illa i ifragan a dər-san d-iqqəl

dəffər adi gər za y a dağ-san ifnəz arat wala a dağ-san t-işşitu.

¹⁶ Amaran Ibrahim d əzzurrəyya-net as iga Məşşina arkəwalān. Wər itawanna: «y əzzurrəyyatan-net», zun as ila əzzurrəyyatan aggotnen, kalar iyyanda ɣas, fəlas a das-itawannan: «əzzurrəyya-nak», almaɣna Elməsix.

¹⁷ Dağ adi ənta da awas areɣ tənna-net: Arkawal ən tassaɣ iga Məşşina kala da, wər tu-z-iməs əşşəriɣa wa n Əttawret a d-osān əkkozat təmad n awatay əd karadat təmərwen dəffər awen, iqqəl as arkawal wen ab'as t-illa.

¹⁸ Amaran as iqqal as əşşəriɣa a ihakkin təkasi ten, adi za ab'as imos as arkawal wa iga Məşşina y Ibrahim a işɣalan. Arkawal wen amaran, tarrayt-net as iga Məşşina arraxmat-net y Ibrahim.

Tassaɣ d Elməsix

¹⁹ Dağ adi mafel osa-du əşşəriɣa wa n Əttawret? Əşşəriɣa wa itiwaşata-du fəl a du-tumman təmazrəyt n aytedan iket di a d-itawad əzzurrəyya n Ibrahim s ənta as iga Məşşina arkawal. Əşşəriɣa wen izzibbat-du əs tarrayt n angalosan, amaran aggadəm a imosan əməşşewəl daɣ batu ten.

²⁰ Əməşşewəl amaran wər sər-əs təga addararat ar s ad t-illa awedan iyyan was z'işşiwəl, Məşşina amaran nəssan as ɣas-net a imos.

²¹ Awak almaɣna n awen as əşşəriɣa immizray arkawalan ən Məşşina? Kala Kala! Wər ilkem ad iga adi! Fəlas ənnar d-itiwakfa əşşəriɣa iyyan ihakkan təməddurt taynayət, wədi illikan as ləkkum y əşşəriɣa as za tətəwəgrəw taqqat.

²² Kalar Əlkəttaban əməlan əs arat ketnet ila fəll-as abakkad tarna fəl ad iqqəl əs: Arat was iga Məşşina arkawal-net kundaba inda fəl məzzəgzan, fəl əddəlil ən təɣudəla ən ɣaysa Elməsix.

²³ Dat assa ən tarrayt ta n əzəgzan, ig-anax əşşəriɣa iməskəsa, ittaf-ana har d-ewad alwaɣ wa daɣ danaɣ-isannafalal Məşşina tarrayt ta n əzəgzan as irəw təzay-du.

²⁴ Dağ adi əşşəriɣa a danaɣ-isassaɣadan har d-osa Elməsix, fəl ad nəgrəw taqqat əs tarrayt ta n əzəgzan.

²⁵ Amaran dad zamas tarrayt ta n əzəgzan tosa-du, wədi ab'as danaɣ-isassaɣad əşşəriɣa.

²⁶ Fəlas ketnawan as təmosam bararan ən Məşşina s əssəbab n əzəgzan wa, daɣ tassaɣ d Elməsix ɣaysa.

²⁷ Awalla, ketnawan win tawasalmaɣnen daɣ aman daɣ tərtəyt d Elməsix, Elməsix en da a iqqalan zun telassay-nawan ta taynayət.

²⁸ Ab'as əzlayan Kəl-Əlyəhud, wala Kəl-Əlyunan, wala eklan, wala ilallan, wala əzlāyan meddan əd tədoden, fəlas

ketnawan awedan iyyanda a təmosam daɣ tassaɣ d Əlməsix Ƴaysa.

²⁹ Kud Əlməsix a kawan-ilan, wədi bararan n Ibrahim a təmosam, təmosam iməkkusa-net əs tarrayt n arkawal wa das-iga Məşşina.

4

¹ Arat da was areɣ a dawan-t-anna: Amakkasu, iket mədrəy wər izlay d əkli, kuddeɣ as ənta a ilan arat kul.

² Aytedan win dər-əs ənnəttafnen əd win ənnəttafnen əd təɣawşiwən-net as ilkam i tanat-nasan iket wər d-ewed alwaɣ wa imal abba-net.

³ Nakkanay da harwa ad nəmədrəy, wər nəlkem ar y əşşərədan win as təgla əddənet, nəmos zun eklan-nasan.

⁴ Mişan as d-ewad alwaɣ wa iskat Məşşina y awen, issəgla-du Barar-net, iggaz-du əddənet əs tarrayt ən təntut, ilkam y əşşəriɣa wa n Əttawret,

⁵ osa-du fəl ad isəddərfət aytedan win əmosnen zun eklan n əşşəriɣa. Osa-du deɣ fəl a danaɣ-akfu tarrayt n a danaɣ-iqbəl Məşşina daɣ tişit ən bararan-net.

⁶ Amaran tişit-nana bararan ən Məşşina, ənta a fəl d-iga Məşşina daɣ wallan-nana Infas ən Barar-net. Infas en da a idkalan əməsli igannu: «Abba! Abba!»

⁷ Daɣ adi ab'as təmosaɣ akli, kalar barar ən Məşşina a təmosa. Amaran dad zamas təmosa barar ən Məşşina, wədi a kay-akfu Məşşina arraxmat tas iga arkawal-net i bararan-net.

Awa išşəwaşan Buləs daɣ batu ən Kəl-Galatəya

⁸ Ənəyat Kəl-Galatəya! Kawanay əstizarat wər təssenam Məşşina, təɣbâdam imalan ən bahu, təmosam eklan-nasan.

⁹ Mişan əmərədda, dad zamas təssanam Məşşina, madeɣ dad zamas iqbal-kawan Məşşina daɣ tişit ən bararan-net, manəmmək as za tələsam ləkkum y əşşərədan wər nənfa wala win as təgla əddənet, tələsam tişit n eklan-nasan?

¹⁰ Təsisahem wəllen ijilan, əd təlil əd təmeren, d elan wiyyad!

¹¹ Išşiwaş-i ad abbannan əşşəxəl issohen wa əgeɣ fəl əddəlil-nawan.

¹² Ya imədrayan-in, are daɣ-wan ad təqqələm şilaten-in dad zamas nak da əmosa şilat-nawan. Wər di-təgem talbast waliyyat.

¹³ Təkittəwam tarrayt tas dawan-əgeɣ isalan n Əlinjil əs tizarat a tat-imosan tarrayt ən təwərna-nin.

¹⁴ Təfrâgam a di-talkim madeɣ tagləfam-i fəl əddəlil ən rəkkəm d əbrur ən təɣəssa-nin. Mişan wər təgem awen!

Kalar təgam-i əlqəbulat âs zun əmosax angalos a d-ifalan Məşşina, madex Əlməsix Ƴaysa iman-net.

¹⁵ Dağ adi ma iga alxer ən man was kala tu-təgrawam? Fəlas əsilakanax âs ənnar immikkan adi, şittawen-nawan da a tanat-du-təkəkkərəm takfim-i-tanat.

¹⁶ Awak azangaw-nawan a əqqalax əmərədda fəl as dawan-əmmala tidət?

¹⁷ Əssənət as aytedan di saknin-kawan as ədgâzan dağwan mişan ənnəyatən-nasan wər oleynat. Tara xas a əgan a kawan-zəmməzzəyan dər-i, fəl ad təkəmam y idufan-nasan, təzəzzəwem dağ-san.

¹⁸ Olay wəllen gəllejat dağ igi n awa olağan dağ alwaq kul, wərgex alwaq wad əlle xur-wan xas.

¹⁹ Bararan-in, nak əllâsa alyazab fəl əddəlil-nawan, zun tantut tətəggazət amzur, iket wər ikna Əlməsix iguz ən man-nawan.

²⁰ Arex wəllen ad əlle xur-wan dağ amazay wa, are dex a dawan-əşşiwəlay s əmmək iyyan wər nəmos wa, fəlas iqqân aɣaf-in dağ batu-nawan.

Masnət ta nəgraw dağ əlqissət n Ənnəbi İbrahim

²¹ Əməlat-i: Kawanay a əranen ad tagim təməddurt a dağ təkəmam y əşşərixa wa n Əttawret, awak masnət a wər təgem awa inna əşşərixa?

²² Wərgex ənnan Əlkəttaban: İbrahim ila əşşin bararan, iyyan teraw-tu təklit, wa hadan teraw-tu tələllit?

²³ Wa teraw təklit ihəw-du əs tarrayt ta n attas n əggadəm, wa teraw tələllit amaran ihəw-du əs tarrayt ta n arkawal ən Məşşina.

²⁴ Batu ta əlmital a təmos fəlas sanatat tədoden şin, əşşin arkawalan ən tassağ a mosnət. Arkawal iyyan za iga fəl ədxağ wa n Sinay imos təhəwt ən bararan əmosnən eklan, amaran arkawal wa Hajara a tu-təmosat.

²⁵ Hajara amaran adxağ wa n Sinay a tat-imosan, ihân amağal n Arabəya, təmmittal Yerusalam ta n əmərədda dağ əddənət, fəlas təha əkkəlu ənta harkid bararan-net.

²⁶ Sa hadan Yerusalam ta təhat ijənnawan tələllit a təmos, amaran ənta a təmosat zun anna-nana.

²⁷ Fəlas ənnan Əlkəttaban: «Fəliwəs tantut ta wər nətilu bararan, kam a wər ides aɣaraw ən barar. Ədkəl əməsli-nam wəllen takna tədəwit kam a wər nəzday təlawayt ta n əmzur. Fəlas bararan ən tantut ta tətawaksanat ad aɣəran win tantut ta wər izammazzay aləs-net igət.»

²⁸ Kawanay amaran imədrayan-in, bararan as itiwagga arkawal-nasan a təmosam, zun İsəhaq.

²⁹ Mişan zun awas kala iga, wa d-ihəwan əs tarrayt ta n attas n əggadəm, əddəguz a itaggu wa d-ihəwan əs tarrayt

ta n Infas ən Məşşina, amaran arat wen da a igan har əmərədda.

³⁰ Awak wərgəx a ənnan Əlkəttaban: «*Estəx taklit əd barar-net, fəlas barar wa n taklit wər z'inəməkusət əd barar*» wa n tələllit?

³¹ Dağ adi imədrayan-in, əssənət as nakkanay wər nəmos bararan ən təkli, kalar bararan ən tələllit a nəmos.

5

¹ Əlməsix a danax-isaddarfen fəl ad nallallat. Awen dağ a fəlas zəzzəwətət wəllen dağ əlləllu wa, fəl ad wər təqqəlam əkkəlu.

Tədarfit n əlməsixitan

² Ənəyat, nak Buləs əmalax-awan kawanay əlməsixitan win wər nəmos Kəl-Əlyəhud əs as təmmənkadam wər dawan-z-aknu Əlməsix wala.

³ Amaran arat wa ad t-ələsəx emel y awedan kul wa itawasamankadan: Awedan wədi iwar-tu ad ilkəm y əşşərixa ketnet.

⁴ Təmmizzayam d Əlməsix kawanay win gammaynen taqqat əs ləkkum y əşşərixa; aba fall-awan arraxmat ən Məşşina.

⁵ Nakkanay amaran tarrayt n Infas wa Zəddigan as nəssəgəd s ikus n aşşak i taqqat tas nəga attama n a danaqqat-akfu əzəgzan.

⁶ Fəlas awedan was təlla tassağ gar-es d Əlməsix Yaysa, wər izlay əmənəkəd d iba-net. Wər xur-əs imos arat ar əzəgzan. Əzəgzan amaran tara a tu-təsaknit.

⁷ Kawanay itittəy əzəgzan-nawan wəllen! Dağ adi ma dawan-iqqalan təsəwəq izzəbaz-kawan tarrayt wər nəmos ta n tidət ta n Əlinjil?

⁸ Tarrayt tas təqbalam iguz-net əddi, wər du-təfel wa kawan-d-iğran, a t-imosan Məşşina.

⁹ Itawannu: «Arat ən xamira a isakafan tagəlla ketnet.»

¹⁰ Dər iga awen da ya, nak əgəx attama dağ Əməli Yaysa dağ talxa-nawan: Əgəx iduf n as wər za tagim imedranan əmmizraynen win-in. Mişan awedan wa sərwan d-itawayan aşşawaşa a iqqal, ad awwaddab.

¹¹ Nak amaran imədrayan-in, ənnar emel a taggax əs təga addararat s əmənəkəd, wədi məni əddəlil wa fəl tawadgaza harwa da? Kud arat wədi a sasaxra, adi za ətəwətəytay ən Yaysa fəl təgəttawt ab'as imos təsənkəft y aytedan!

¹² Amaran aytedan win kawan-əhanen əddi ətawayan-du sərwan aşşawaşa dağ batu n əmənəkəd, əğrədanet azzam ən man-nasan!

Ənnəsixatan

Tarrayt ta n tara

¹³ Kawanay amaran imədrayan-in, iyr-iwan-du Məşşina y ad taddarfem. Eges tədarfit ten ad wər təqqəl arat a sər-wan d ewayan ləkkum y arak deranan ən tara ən man. Kalar akkiyyan daɣ-wan iqqəlet akli ən win hadatnen, iga awen əs tara.

¹⁴ Amaran əşşəriɣa wa n Əttawret kul as inda daɣ batu iyyadda təmosat: «*Ad taga y əşəqqaqɣ-nak tara ta təgeɣ i man-nak.*»

¹⁵ Ənkədat y ad tətınəmədıdam zun imudaran, tətınəməggim talbast gar-ewwan, fəl ad wər tənəməhləkam.

Tarrayt ta n Infas wa Zəddigan əd ta n aggadəm

¹⁶ Arat da was areɣ a dawan-t-anna: Ayyiwat Infas wa Zəddigan ad annadu daɣ təməddurt-nawan. As təgam adi, wər dawan-ilkem ad təmmozalam s arak deranan ən tara ən man.

¹⁷ Fəlas deranan win aggadəm iman-net, əllid a əmosan n Infas wa Zəddigan, Infas wa Zəddigan deɣ əllid a imos ən deranan win aggadəm. Əgân əməzrəy wa n as a sər-wan d-awəy awen ad tammazzayam d igi n awa təram.

¹⁸ Amaran as imos as Infas wa Zəddigan a daɣ-wan innodan, wədi ad ib'as fall-awan ixkam əşşəriɣa wa n Əttawret.

¹⁹ Imazalan win aggadəm iman-net əmmunan. Əmosan: Əzzəna d ammadas d igi n aratan win ogarnen taxxaramt,

²⁰ d igi n əmadraw əd şaxawan d əzzəngu d əməstan, əd manjə d aşşar əd tara ən man d əzəmməzəy n aytedan d əzəmməzrəy-nasan

²¹ d iba ən təla n igda, d əməswəd, d əsəssikəy daɣ tattay d aratan wiyyad olanen əd win. Ad dawan-ələsəɣ emel harwa əmərədda əs: Aytedan win tagginen aratan win di wər z'əggəzan Taɣmar ta n Məşşina.

²² Aratan amaran win d-əfalnen Infas wa Zəddigan, əmosnen əllid ən win di, əmosan: tara əd təfalawist d alxer əd təzaydart əd man mallolnen, d əlluɣ d əzəgzan,

²³ əd talmat, d ənudi daɣ wallan-nana. Amaran wər t-illa əşşəriɣa išşakan alxalan win di.

²⁴ Awalla, aytedan win əkfənen iman-nasan y Əlməsix Ƴaysa, win di əkkasan-in daɣ alxal-nasan tara ən man d arak deranan win daɣ-san ənnodanən, əttəytayan-tan fəl təgəttawt ta fəl itawataytay Əlməsix.

²⁵ Dad zamas Infas wa Zəddigan a ɣur du-təfal təməddurt-nana, nayyiwet-tu a daɣ-na ixkəm.

²⁶ Ad wər nəqqəl aytedan əzzizwarnen iman-nasan. Mazzayatana əd tədləmt gar-ena d igi n attama daɣ awa əlan midawan-nana.

6

Igi n awa olaɣan y awedan kul

¹ Imədrayan-in, as ewad jarraba awedan iga ark əmazal a iqqal, kawanay a əlkamnen y Infas wa Zəddigan, səssiɣədat-tu əs man lammodynən fəl a d-iqqəl tarrayt ta tolaɣat. Ənkədat wəllen əd man-nawan fəl a kawan-wər-awəd jarraba kawanay da.

² Akkiyyan daɣ-wan idkəlet əzuk ən win hadatnen. Emmək en daɣ as du-za-tassandim əlqanun wa n Əlməsix;

³ fəlas wa igan i man-net iduf n as imos awedan zəwwəran, as iga awen wər imos wala, wədi bahu a itaggu i man-net.

⁴ Akkiyyan daɣ-wan inzəret daɣ mazalan-net. As inay as imazalan-net hossayan, əddi ad igrəw əddəlil n ad ifləs iman-net s əssəbab ən mazalan-net wərgəɣ s ad išašalu iman-net d awedan iyyan.

⁵ Fəlas awedan kul kundaba ibdad fəl məzalan-net.

⁶ Awedan wa itawasasaɣrin awal ən Məššina, iwâr-tu ad idrəw ərrəzəɣan-net kul əd wa t-isasaɣrin.

⁷ Ad wər tətəfam alxata: Məššina wər t-illa i z'ayyu isəmmədrəy-tu. Awalla, amasa wa inbal awedan ənta a du-z-aləy.

⁸ Illikan əs awedan wa igan imazalan win tara ən man, aroz-net ad t-iqqəl awa d-itaway ləkkum y arak deranan, a t-imosan ahluk. Mišan wa itaggin imazalan win d-əfalnen Infas wa Zəddigan, ad igrəw aroz a d-ifalan Infas wa Zəddigan a t-imosan təməddurt ta təɣlalət.

⁹ Ad wər nəddəz igi n awa olaɣan, as iga adi ad nəgrəw arozan daɣ alwaq wa itawaskatan y awen, as wər nəqqəl dəffər-na.

¹⁰ Daɣ adi iket di ad nəgraw tarrayt n awen, taggi-watanay awa infan aytedan kul, wəllen imədrayan-nana daɣ əzəɣzan s Əlməsix.

Ərruymanın win əlkamnen d assalaman

¹¹ Ənəyat əlxərəfan win zawwarnen a. Əfus-in as dawan-tan-in-kattaba.

¹² Aytedan win gammaynen a kawan-šəhhəššəlan əs iwar-kawan əmənəkəd, win di agamay a taggin a tan-əssəxməran aytedan. Amaran arət wa gammayan wəllen, a tan-wər-ədgezan aytedan fəl əddəlil n əzəɣzan-nasan əs tamattant n Əlməsix fəl təgəttawt.

¹³ Aytedan win tamankadnen da, wər əlkeman y əşşəriya fadda. Tara ɣas a əgan a kawan-səmmənkədan fəl ad agin ibaragan s awen.

¹⁴ Nak amaran wər ilkem ad sibaragaɣ âr əs təgəttawt ta fəl itawataytay Əməli-nana Ƴaysa Əlməsix. Tarrayt ten daɣ ən təgəttawt en ənta a du-təwayat as ark aratan n əddənet a kul əmosan sər-i a ammen, zund əmmək as nak da əmosaɣ iri ammen daɣ batu ta təqqalat əddənet.

¹⁵ Fəlas wərgəɣ əmənəkəd wala iban-net a imosan əlməxsud, kalar axluk aynayan əs tarrayt n Əlməsix a imosan əlməxsud.

¹⁶ Ihənəttətət Məşşina y aytedan kul win əlkammen y anamod wa, akf-en alxer, s əmmək was iga adi i tamattay-net!

¹⁷ A obazan ɣur əmərədda, a di-wər-iləs awedan waliyyan əddəguz, fəlas elam-in əwarnat-tu təmijar ən ləkkum-in i Ƴaysa.

¹⁸ Ya imədrayan-in, əttâra s Əməli-nana Ƴaysa Əlməsix a kawan-ikfan arraxmat. Amin.

Şirawt ta iktab Buləs i Kəl-Efez Assalam

¹ Awa nak Buləs, imosan anammazul n Elməsix Yaysa əs tərəddawt ən Məşşina. Şirawt ta təkka aytedan win əmosnen tamattay ən Məşşina əhanen axtəm n Efez, almayna aytedan win əxdalnen day tassağ d Elməsix Yaysa.

² Egmaya day Məşşina di n Abba-nana, d Eməli-nana Yaysa Elməsix a kawan-ikfan arraxmat d alxer.

Təməddurt ta taynayət, almayna təməddurt ta təgat day tassağ d Elməsix

Təməddurt ta day nəzzəgzan s Elməsix

³ Təmmal i Məşşina, imosan Abba n Eməli-nana Yaysa Elməsix! Ig-anax albaraka day tassağ-nana d Elməsix əs tahakkay ta danağ-iga əkkulluk n albaraka wa d-izazzabbat Infas wa Zəddigan day jənnawan.

⁴ Day adi, əssənatanax as harwa dat əxluk n əddənət a danağ-isannafran Məşşina y ad nəqqəl i-net əs tarrayt n Elməsix fəl a dat-əs nəqqəl aytedan zaddogñen wər iwer a imosan lahan, fəl ad nagu təməddurt təha tara.

⁵ Məşşina ənta a danağ-isannafran harwa day tizarat y a danağ-agu bararan-net əs tarrayt ən Yaysa Elməsix. Awen day a igrazan i Məşşina,

⁶ amaran ig-ay fəl ad nəmmâl tanaya-net d arraxmat-net tas danağ-isabbalal əs tarrayt ən Barar-net a ikna tara.

⁷ Tartəyt əd Barar-net en da a dana-təkfət tədarfit əs tarrayt n əzni-net. Tədarfit ten təmos təsureft ən bakkadan-nana, amaran nəgrâw-tat s arraxmat ən Məşşina wər nəla əddukad

⁸ a fall-ana d-izizzabbat s igət, ikf-anax əzzənəfan kul ən masnaten d əgərri.

⁹⁻¹⁰ Awen ig-ay s əsusən wa day-na iga əssir ən tara-net. Əssir wen imos əşidəw n aratan kul win əhanen ijənnawan əd win əwarnen amağal fəl ad ittəf Elməsix tanat-nasan. Tarrayt ten ig-et-du harwa a irəwan s əssəbab n Elməsix, amaran awen da das-igrazan. Igâ awen fəl ad assandu tarrayt ten day alwaq wa das-iskat.

¹¹ Isinafran-ana değ Məşşina harwa day tizarat, əs tarrayt n Elməsix y ad nəqqəl i-net inimannak awen əd tarrayt ta d-iktab Məşşina s ənta a itaggin aratan kul s əmmək was tan-d-ikta əd was iga tanat-nasan.

¹² Məşşina ig-ânaḡ awen fəl ad nagu tēməddurt a daḡ-as nətaggu təmmalen fəl tanaya-net, nakkanay win azzarnen igi n attama daḡ Əlməsix.

¹³ Kawanay da təslâm y awal wa imosan tidət a t-imosan isalan n Əlinjil win kawan-hakkinen əlḡillas əs tarrayt n Əlməsix. Amaran as təzzəgzanam, wədi issəwar-kawan Məşşina əs tarrayt n Əlməsix ejwal issiknan âs tamattay-net a təmosam. Ejwal wen, imos-tu Infas wa Zəddigan as iga arkawal-net.

¹⁴ Infas wa Zəddigan en ənta a imosan tədagart ta tazzarat daḡ awa dana-z-akfu Məşşina daḡ jənnawan. Məşşina issiwar-anax ejwal-net iket di a du-tətawad tədarfit ən tamattay ta iskat i man-net. Arat wen kul ad t-agu Məşşina fəl ad təwəgginat təmmalen i tanaya-net.

Təwatray ən Buləs i Kəl-Efez

¹⁵ Awen daḡ a fəlas, nak da, dəffər as əsley əzəgzan-nawan s Əməli Ḡaysa, əd tara ta təssəknam i mizdagan ketnasan,

¹⁶ wər kala ad əməzzayax əd godan i Məşşina daḡ batunawan alwaq kul wa kawan-d-əkteḡ daḡ təwatriwen-in.

¹⁷ Əgammaya daḡ Məşşina imosan Əməli n Əməli-nana Ḡaysa Əlməsix, imosan deḡ Abba wa ilan tanaya, a kawan-akfu Infas wa ihakkin masnat, isinəfilil deḡ aratan win əhanen ətənkul, fəl a tu-təssənam.

¹⁸ Gammaya daḡ-as deḡ ad aləm iwəllan[-nawan] fəl ad təkənim əgərri n awa imos attama was kawan-iḡra, təssənam deḡ awa dər ogdanat təhussay ən saḡmar wa igarraw Məşşina ḡur-na nakkanay a n mizdagan,

¹⁹ təssənam deḡ awa dər togda təzzəwwərt wər nəla əddukad ən tarna-net sər-naḡ nakkanay a əzzəgzannen əs mazalan əssohatnen ən tarna-net.

²⁰ Tarna-net ten išşiḡal-tat daḡ Əlməsix, s əsənkər wa t-id-iga daḡ tēmattant d əsəḡḡimi wa t-iga daḡ əḡil-net daḡ jənnawan.

²¹ Ig-ay dənnəḡ taḡmar kul əd təmənukəla kul, əd tarna kul, d əlxəkum kul. Iga esəm-net dənnəḡ esəm kul wa t-illan gər za daḡ azzaman win əmərədda, wala deḡ azzaman win d-əzaynen.

²² Arat kul ig-ay daw daran-net, təzzar ig-ay əmuzar n arat kul daḡ Əlkənisat,

²³ təmosat taḡəssa-net. Taḡəssa en amaran ənta a daḡ ikannu Əlməsix əlkamalat, ənta a ihan edag kul.

2

Təmattant əd tanakra əs tarrayt n Əlməsix

¹ Amaran kawanay aba-kawan fəl aganna wa iqqalan tassağ əd Məşşina s əssəbab n arak mazalan-nawan əd bakkadan-nawan.

² Dat awa təşşokalam dağ arak mazalan win, təlkâmam y alxal wa n əddənet, təlkâmam y awa ira əmuzar ən kəl ətənkul win alhawa, a t-imosan infas wa ixkaman dağ nəmməzray ən Məşşina dağ əddənet.

³ Ketnana as tizarat nəmos arat dağ-san. Dat awa nəlkâm y arak deranan ən təxəswen-nana, nətamazal awa əranat təxəswen-nana əd medranan-nana. Dağ adi təsəlkamt-nana əstizarat, âs nakkanay da, a danağ-iwər attadib ən Məşşina wa iwaran aytedan kul.

⁴ Mişan təhanint ən Məşşina wər təla əddukad. Amaran əddəlil ən tara tagget ta danağ-iga,

⁵ nakkanay as zun danağ-aba s əssəbab n ark mazalan-nana, ənta a fəl danağ-ikfa təməddurt əs tarrayt n Əlməsix. Arraxmat ən Məşşina as təgrawam efsan.

⁶ Issənkar-ana-du nəddew d Əlməsix Ƴaysa, isayğam-ana dağ jənnawan nəddew dər-əs fəl əddəlil ən tassağ ta dər-əs nəga.

⁷ Awen ig-ay fəl ad assaknu dağ azzaman win d-əzaynen igət wər nəla əddukad a təga arraxmat-net əs tarrayt n əlluğ-net y-anay fəl əddəlil ən tassağ ta nəga d Əlməsix Ƴaysa.

⁸ Fəlas illikan âs arraxmat as təgrawam efsan, əs tarrayt n əzəgzan-nawan. Amaran wərgəç kawanay a çur d-ifal awen, kalar təhəkkut ən Məşşina a imos.

⁹ Wərgəç imazalan win olaynen a hakkinen efsan, ənnar adi a igan əzzəzwəran aytedan iman-nasan.

¹⁰ Şixəllak ən Məşşina a nəmos, a d-ixlâk əs tarrayt n Əlməsix Ƴaysa fəl ad nagu təməddurt dağ nətamazal awa olayan âs Məşşina a t-isammatagan harwa dağ tizarat y a tu-nammazal.

Tamattay taynat: Tamattay ta n Məşşina

Kəl-Əlyəhud əd win tan-wər-nəmos əgân alxer əs tarrayt n Əlməsix

¹¹ Dağ adi aktiwat arat wa: Dat awa təlâm alxalamat dağ təxəswen-nawan təssiknat as wər təmosam Kəl-Əlyəhud. Aytedan win ənnanen əmminkadan, gannin wər təmmənkadam. Əntanay amaran əmənəkəd-nasan wər imos âr arat əgân fassan n əggadəm.

¹² Aktiwat alxalat ta təham əstizarat. Azzaman win di wər təqbelam Əlməsix, itiwagdal-awan tişit ən tamattay n İsrayil. Təmosam inaftayan dağ batu ta təqqalat arkəwal

ən tassaq wa iga Məššina. Alwaq wədi wər təlem attama waliyyan, wər təlem tassaq waliyyat əd Məššina dağ əddənet.

¹³ Mišan əmərədda əs tarrayt ən tərtəyt-nawan d Əlməsix Yaysa, kawanay win as kala ad təggugam Məššina, təhozam-du əs tarrayt n əzni n Əlməsix.

¹⁴ Əlməsix ənta a imosan alxer-nana, ənta a issərtayan Kəl-Əlyəhud əd win tan-wər-nəmos ig-en arat iyyanda, irza tağərt ta tan-təzammazzayat, ikkas ənəməzəngə gar-essan, əs tarrayt ən tağəssa-net ta ikfa fəl təgəttawt.

¹⁵ Arat wen ig-ay s ikus wa din-iga Əttawret d əlwajiban-net d əššərədan-net. Iga alxer gər Kəl-Əlyəhud əd win tan-wər-nəmos əs tarrayt ən tassaq ta dər-san iga, ig-en tamattay iyyadda taynayat.

¹⁶ Təmattant ta iga Əlməsix fəl təgəttawt, ənta as issərtay Kəl-Əlyəhud əd win tan-wər-nəmos, ig-en tağəssa iyyadda. Ig-asan alxer əd Məššina, ikkas ənəməzəngə gar-essan s ətəwətəytəy wa iga fəl təgəttawt.

¹⁷ Amaran osa-du y a dawan-əgu isalan n alxer, a tan-imosan Əlinjil, kawanay a namaggagnen əd Məššina, iməl dəğ alxer i win t-əhoznen.

¹⁸ Id Əlməsix ənta a ifragan a danay-izənnəmihez ketnana əd Məššina di n Abba, əs tarrayt n Infas-net di Zəddigan.

¹⁹ Emmək en dağ as ab-as təmosam inaftaxan, wala iğərab. Kalar arat iyyanda a təmosam kawanay əd tamattay zəddigat ən Məššina, təmosam kəl ahan ən Məššina.

²⁰ Təmosam ehan əs inəmmuzal d ənnəbitan a mosnen šisəttəytay-net, imos Əlməsix Yaysa təhunt ta n təsəkbəlt-net.

²¹ Šihun šin as ikras ahan wen, kul əknənat ənəməttaf əs tarrayt ən tərtəyt d Əlməsix, əqqalnat ehan zəddigan n əlxibada əs tarrayt ən tassaq d Əməli.

²² Kawanay dəğ tərtəyam təqqalam əkərrus iyyanda fəl ad təqqəlam təməzduq ən Məššina əs tarrayt n Infas wa Zəddigan. Awen kul iga əs tarrayt ən tərtəyt-nawan d Əlməsix.

3

Buləs imâl tarrayt təmosat əssir ta d-iga Məššina - Əššəxəl ən Buləs

¹ Awen dağ a fəl əmosa nak Buləs, amaskasaw n Əlməsix [Yaysa] fəl əddəlil-nawan, kawanay a wər nəmos Kəl-Əlyəhud.

² A igan da təgrâwam isalan n əzuk wa di-issəwar Məššina dağ batu n arraxmat-net ta di-tətawakfat fəl tənfanawan.

³ Almayna Məşşina a di-isannafalalan əssir ən tarrayt ta d-iga, s ənta a əktaba da imos arat ən təfir.

⁴ As təxram awa əktaba da, ad tənəyam awa dər-ogda əgərri a əgey y əssir n Əlməsix.

⁵ Əssir wa, wər tətawakfa masnat-net y aytedan n azzaman win okaynen, zun əmmək was itawasanafalal əmərədda əs tarrayt n Infas wa Zəddigan i nəmmuzal n Əlməsix d ənnəbitan-net a zaddogən.

⁶ Əssir wen ənta da: Aytedan win wər nəmos Kəl-Əlyəhud, əd məzzəgzan s Əlməsix win əmosnen Kəl-Əlyəhud əgrâwan təkəsət, əqqalan təxəssa iyyadda, əqqalan dəx arat iyyanda əs tarrayt ən tassağ ta əgan d Əlməsix dəy arkawal wa ihan Əlinjil.

⁷ Əlməsix en dəy as əqqalağ amaşşaxal-net a t-iğbâdan, s əssəbab ən tarna ən təhəkkut ən Məşşina təgât s arraxmat-net ta əgrawa.

⁸ Nak a ogaran təmmədrəyt dəy məzzəgzan di ən mizdagan ən Məşşina ketnasan, mişan əgrâwağ arraxmat ta, a tat-imosan: Igi y aytedan win wər nəmos Kəl-Əlyəhud isalan n Əlinjil, imosan isalan n arraxmaten n Əlməsix as tu-wər-illa i ifrâgan əgərri-nasnat.

⁹ Sənnəfiləla dəy y aytedan [kul], əmmək was innəzzam Məşşina tarrayt ta, har tat-iğrad əsəkməl. Tarrayt ten, harwa dəy tizarat a tat-iga Məşşina a d-ixlakan arat kul, təmos əssir.

¹⁰ Ənəfilal wa təga tarrayt ta, ənta a du-z-awəyan əmərədda as təxmaren əd təmənukəla şin jənnawan, ad əzdəynat assayfaten wər nəla əddukad a təmos masnat ta n Məşşina. Arat wen tarrayt n Əlkənisat as z'agu.

¹¹ Amaran awen ad agu s əmmək was t-innəzzam Məşşina imos arat ixlalan, ikmal-du dəy dəy Əlməsix Yaysa Əməlinana.

¹² Tassağ ta nəga d Əlməsix Yaysa əs tarrayt n əzəgzan sər-əs a danax-təkfət tədarfit n ad nəfrəğ ənəmihaz əd Məşşina əs təfləst.

¹³ Dəy adi əgmaya dəy-wan ad wər təqqələm ələqqam fəl əddəlil n alxazab wa tagga da fəl əddəlil-nawan. Alxazab wa ənta a kawan-z-akfin tanaya.

Təwatray ta iga Buləs fəl ad tətəwəssən tara ta n Məşşina

¹⁴ Awen dəy a fəl əssəjada dat Məşşina di n Abba,

¹⁵ s ənta a igan esəm y id-illa ağaywan kul dəy jənnawan d amağal.

¹⁶ Awalla! Əgmâyax dəy-as ad aknu əssəsuhi ən wallanawan əs tarrayt n Infas-net wa Zəddigan s əssəbab ən tanaya-net təkmlat.

¹⁷ Onsâyaq-qu ad izdəy Əlməsix dəy wallan-nawan, əs tarrayt n əzəgzan-nawan, id təqqalam aytedan zizawatnen wəllen sihaddan dəy fəl tara.

¹⁸ Onsâyaq-qu dəy adi ad taknim əzəzzəwi dəy əzəgzan-nawan, təfrəgam ad təməsəsəgrim əd məzzəgzan di zad-doggen kul dəy batu ən tara n Əlməsix təkñât ilwi fəl aganna kul,

¹⁹ təzdəyam dəy tara ten təllât dənnəg masnat kul. Əddi a kawan-za-tədkər tanaya ən Məşşina s əmmək ikmâlan.

²⁰ Əmmək en dəy âs Məşşina ifrâg ad agu y arat kul igi ofân wa dəy-as nəgmay, ofa dəy awa nəxil. Arat wen, itaggay əs tarna-net ta dəy-na təşğalat.

²¹ Igrəwet Məşşina ətəwəsəğmar dəy Əlkənisat igâ awen dəy tassağ d Əlməsix dəy azzaman kul har faw. Amin.

Əşşərədan aynaynen: Əsənnəfiləl n ətəwəşəşinay wa danay-itawaggan

4

Əzəzzəwi dəy ad təqqəl Əlkənisat arat iyyanda, a t-imosan təğəssa n Əlməsix - Ənəmənnak ən məzzəgzan

¹ Dəy adi arat da wa dəy-wan gammaya, nak imosan amaskasaw fəl as əğbadəy Əməli: Kawanay a iğra Məşşina, agiwat alxal inihaggan d ətəwəğra wa tətəwaggan den.

² Əqqəlat faw aytedan wər nədkel iman-nasan, tilmadam, təqqəlam iməzəzzəydar. Nəməqbəlat gar-ewwan əs tara.

³ Ədgəzat faw dəy agamay ən tartəyt ta ihakku Infas wa Zəddigan əs tassağ n alxer ta təllat gar-ewwan.

⁴ Təğəssa iyyadda a tu-təllat, d Infas iyyanda. Əmmək en dəy as Məşşina iğr-iwan-du s ad tagim attama iyyanda, a t-imosan was du-tətəwəğram.

⁵ Əməli iyyanda a t-illan, ill-ay əzəgzan iyyanda, d alamağ dəy aman iyyanda,

⁶ Məşşina dəy iyyanda a imos, imos abba n awedan kul, ixkâm fəl i t-illân kul, itaggu igitan-net əs tarrayt n id t-illa iyyan, irtây dəy d id t-illa iyyan.

⁷ Dər iga awen da ya, akkiyyan dəy-na iğrâw arraxmat ən Məşşina, ewâl awen s adagar wa t-ikfa Əlməsix dəy əşşəğəl-net.

⁸ Awen dəy a fəl ənnan Əlkəttaban: «*Iggəzzay əs daggan win ədkalnen, ewây win əhanen təla, təzzar iga şihəkkuten y aytedan.*»

⁹ Ma imos almağna ən batu ta n «iggəzzay»? Wərgəy almağna n awen as iras har imal daw amağal?

10 Wa d-izzəbben, ənta a iggəzzayan imal dənnəg jənnawan kul fəl ad idnəy edag kul d arat kul.

11 Amaran Əlməsix, ənta a igan aytedan wiyyad inəmmuzal, iga wiyyad ənnəbitan, iga wiyyad imaggan ən salan n Əlinjil, iga wiyyad imadanan əd məssəsəyxa.

12 Şihəkkuten şin den ig-enat Əlməsix fəl əsəssuhi d əsəkməl ən məzzəgzan, fəl ad əfərgan əşşəxəl was tawaxran, y ad taknu təxəssa n Əlməsix assahat.

13 Emmək en dağ as ketnanay as za nawəd ənəmənnək dağ əzəgzan, iga awen dağ təməzdəyt ən Barar ən Məşşina. Təsəlkamt n awen as ad nəqqəl iməzzəgzan əkmâlne, tənifalal dağ-na tişit təkmâlat n Əlməsix.

14 Əddi ad z'ib'as nəmos bararan madrornen, əddagnen sa əd sa əbbatan-tan əzzənəfan ən səssəxritan taggin nəsbuha ən məkkərras saxraknen aytedan.

15 Kalar əddi ad za nəmmal tidət, nag-as emel igân əs tara, nəttəy dağ əkkulluk n anamod dağ tarrayt ən wa imosan əxaf-nana, almayna Əlməsix.

16 Ənta en dağ a isadwalan təxəssa ketnet, ənta deş a şur du-təgarraw təxəssa assahat-net, iga awen dağ tara. Ənta deş a isannamannakan təxəssa tənəmatfət əs səmməşras əssohatnen fəl ad təfrəg təslət kul igi n əşşəxəl-net.

Aggadəm wa irəwan d aggadəm wa aynayan

17 Dağ adi əggəyyəş əsilakanay-awan s esəm n Əməli as: Wər imməkkan ad tələsam igi ən mazalan win taggin aytedan win wər nəmos Kəl-Əlyəhud, a wər nəlkem ar i tayttay-nasan təmosat şibənnan.

18 Tayttay-nasan wər tat-ihə ənnur, əmosan inaftaxan i təməddurt ta təssəşmarat Məşşina s əssəbab n əljəhəl-nasan a sər-san du-tewây təşart ən wallan-nasan.

19 Ab-as əssanan awa olaşan wala awa wər noləş. Əşşokalan dağ təmazrəyt, taggin imazalan zizallatnen aggadəm, d ibə n tələ n igda dağ əzzənəfan kul ən mazalan samadasnen, əknân tara n əddənət.

20 Mişan kawanay wərgəş əmmək wen as təssanam awa imos Əlməsix.

21 Dad zamas təgrâwam isalan n Əlməsix, tətawasasayram dağ tərtəyt dər-əs, wədi tətiwasâsanam tidət ta təhât Şaysa.

22 Almayna n awen ad tamməzzayam d alxal-nawan wa irəwan, a t-imosan alxal n aggadəm was kala a tu-təmosam, tâwayan arak deranan-net s əşruk.

23 Əqqələt aytedan işişanay Infas wa Zəddigan isimattay taytəwen-nawan.

²⁴ Zund əmmək as ilassu awedan tabdoq, təqqəlet təbdoq-nawan alxal aynayan wa d-iga Məşşina. Alxal wen, itinəfilil dağ taqqat əd tazdak şin təhaku tidət.

²⁵ Awen dağ a fəlas mazzayat d igi ən bahu. «*Akkiyyan dağ-wan işşiwəlet tidət yas y əşəqqay-net*», id akkiyyan dağ-na təslət a imos ən win hadatnen.

²⁶ «*As kawan-iggaz alham, ad wər tagim abakkad.*» Ad wər tudu təfuk ih-iwan alham.

²⁷ Ad wər taləmam y Iblis tarrayt as d-iggaz.

²⁸ Wa imosan abaydag ammazzayet əd şikra, işşəşxəlet şığurad-net, işxəlet əs fassan-net fəl ad igrəw tənfa a za uzan i maddararan.

²⁹ A du-wər-təgməd batu waliyyat labasat imawan-nawan. Kalar ad wər tətəggim ar batuten hossaynen a za təggəz tənfa, as təga addararat s awen, əqqəlmat dəy arraxmat i wa dasnat-islan.

³⁰ Ad wər təzəzzəkənzəram Infas wa Zəddigan ən Məşşina, fəlas tarrayt n Infas wa Zəddigan en as kawan-issəwar Məşşina ejwal-net y əzəl wa n tədarfit ta n təzərəst.

³¹ Təgmədət-kawan i tu-təlla təssəməmt, d əxəşəşi, d alham, əd təhərəşşet, d ərrəbdan, d a iqqal aşşar.

³² Tinəməggiwat awa olağan gar-ewwan, akkiyyan iqqəl awedan təha təhanint, ləmmid i midiwən-net. Akkiyyan dağ-wan isurəfet i win hadatnen zund əmmək as dawan-isoraf Məşşina əs tarrayt n Əlməsix.

5

Agiwat təməddurt təgât dağ ənnur

¹ Dad zamas bararan ən Məşşina ikna tara a təmosam, wədi əlkəmat y almasal wa-net.

² Əqqəlmat aytedan əşşokalnen dağ tara, zund əmmək was danax-ira Əlməsix har as ikfa iman-net i Məşşina, imos təhəkkut əd təkutay təlāt xur-əs ađu izodan.

³ Nəməggəgat d əzzəna, əd mazalan samadasnen a əqqalan, əd tara n əddənət. Aratan win di a du-wər-təmmədkiel batu-nasan fadda xur-wan. Awen dağ as ihor ad t-agin mizdagan ən Məşşina.

⁴ Ad wər tətəggim aratan jargonnen wala batuten wər nəla almağna əs zun tanat-iga əmeskel, wala batuten jargonnen. Adi wər itəwəggu. Kalar taggiwat igodan i Məşşina.

⁵ Fəlas əssənət wəllen as, awedan kul wa itəggin əzzəna, wədi immidas, iga attama-net dağ ərrəzəğan n aytedan, almağna ixbəd əssənəman, wədi wər z'igrəw adagar waliyyan dağ taymar ta n Əlməsix əd Məşşina.

Agiwat tәмәddurt ta taggin aytedan əhānen ənnur ən Məššina

⁶ A kawan-wər-akkarras awedan waliyyan wala issəxrək-kawan əs batuten ən bannan, fəlas arat wen ənta a d-itawayan alham ən Məššina s aytedan win nəffəllag.

⁷ Dağ adi ad wər tilem tassağ waliyyat d aytedan win.

⁸ Fəlas illikan əs dat awa kala ad təham šiyyay, mišan əmərədda təhām ənnur dağ tərtəyt d Əməli. Agiwat alxal wa taggin aytedan əhanen ənnur,

⁹ fəlas tənfa ta d-itaway ənnur təmos əzzənəfan n aratan kul win olağnen, əd win oğadnen əd win əmosnen tidət.

¹⁰ Dad zamas təhām ənnur, wədi gəmmayat wəllen d ad təssənam awa igrazan y Əməli.

¹¹ Amaran ad wər tədrəwam wala əd mazalan ən bannan n aytedan win əhanen šiyyay, kalar tugəyat sər-san təsafəggim-tan.

¹² Fəlas illikan əs awa taggin aytedan win di dağ əssir, isikarakad fadda awal dağ batu-net.

¹³ Mišan əs əffəggan aratan win, əwaran azzahir, ad nəfiləlan mazalan-nasan ezal a mallan.

¹⁴ Amaran arat kul wa dağ innəflay ənnur, wədi ənnur a imos. Awen dağ a fəl itawanna:

«Ənkər-in kay wa insan,
Ənkər-in dağ nəmməttan,
Əddi a fall-ak

isəmmələwləw Əlməsix ənnur-net.»

¹⁵ Dağ adi ənkədat wəllen y alxal-nawan, ad wər təqqəlam zun imeskelan, kalar əqqəlat imalan ən tayttay.

¹⁶ Ad wər təsabannanam šimazayyaten šin təgarrawam, fəlas ark azzaman a nəha.

¹⁷ Awen dağ a fəlas ad wər təqqəlam zun aljahilan, kalar əqqəlat aytedan əgranen awa fall-awan ira Əməli.

¹⁸ Amaran ad wər təsamaswadam iman-nawan s esmad, arat wədi əjəmməjəlləd a z'agu təmәddurt-nawan. Kalar əqqəlat aytedan idnāy Infas ən Məššina, almağna n awen əs:

¹⁹ tinəməggiwat əlmağizatan gar-ewwan əs təsarnaten n Azzabur, əd təğaytalen, əd sakkan a d-əğmadnen yur Infas wa Zəddigan. Agiwat isakkan əmosnen təmmalen ən Məššina. Agiwat awen y Əməli s əwəl iyyanda.

²⁰ Tigudəyat faw arat kul i Məššina di n Abba, s esəm n Əməli-nana Yaysa Əlməsix.

Inəmad ən tassağ win aynaynen

Tassağ gər aləs əd tağurəs – Ağaywan n əlməsixitan

²¹ Akkiyyan dağ-wan abbardaget i win hadatnen, təğâm awen dağ təksəda n Əlməsix.

22 Şidoden, bardagmat i meddan-nakmat zun əmmək as təbbərdagmat y Əməli;

23 id aləs ənta a imosan əmuzar ən təntut zund əmmək as Əlməsix a imosan əmuzar n Əlkənisat təmosat təxəssa-net, amaran ənta iman-net a imosan Ənəssefsi-net.

24 Zund əmmək as təbbərdag Əlkənisat y Əlməsix, tantut kul tabbardaget y aləs-net day arat kul.

25 Meddan, iriwat şidoden-nawan, s əmmək as ira Əlməsix Əlkənisat har as iman-net a ikfa fəl əddəlil-net,

26 fəl a tat-iskət əs man-net dəffər as tat-izzizdag s aman, almayna Awal ən Məşşina.

27 Awen igmay sər-əs ad taknu Əlkənisat şihussay, wər tat-təwer a imosan tətənəqqet, wala ənəkəmmi, wala arat zun awen, fəl ad tizdag day a imosan lahan.

28 Əmmək en day əs meddan da iwâr-tan ad iren şidoden-nasan zun tara ta əgan i man-nasan. Awedan wa iran təxurəs, wədi iman-net a ira.

29 İllikan əs wər kala ad itawanay awedan ikyâdan təxəssa-net. Kalar awedan əşətşi a itaggu iman-net, innittaf əd təxəssa-net zun awa iga Əlməsix y Əlkənisat,

30 id nakkanay şisəllad ən təxəssa n Əlməsix a nəmos.

31 «Awen day a fəl z'ifəl aləs abba-net d anna-net aglu irtəy əd təxurəs əqqəlan təxəssa iyyadda.»

32 Arat wa ənne da day batu n Əlməsix d Əlkənisat, imos əssir zəwwəran ən Məşşina.

33 Xasil əkkulluk n iyyan day-wan agiwet i təxurəs tara ta iga i man-net, tantut dex təssəxməret aləs-net.

6

Tassaq gər bararan əd marwan-nasan

1 Bararan, bardagat i marwan-nawan [zun as təbbirdagam y Əməli], fəlas awen day a oğadan.

2 Alwajib wa azzaran as iga Məşşina arkawal n as ad ilu arozan, a inna: «Səxmər abba-nak d anna-nak,

3 fəl ad təgrəwax təfalawist, tilex təxrəst tagget day əddənet.»

4 Kawanay amaran abbatan, ad wər təşi xəşəşem bararan-nawan, kalar sassaxriwat-tan, tagim-tan day tarrayt təməlam-asan awa fəl irxam Əməli.

Tassaq gər eklan əd məssawwan

5 Eklan, bardagat i məssawwan win əddənet əs saxmar əd təksəda. Agiwat awen s əwəl iyyanda, zun əs Əlməsix as təbbərdagam.

⁶ A dasan-wər-tətaggim əşşəxəl olâxan fəl as kawan-ewalan, zun as wər tagəmməyam ar awa igrazan y aggadəm. Kalar agiwat y əşşəxəl wa igi n âs eklan n Əlməsix a təmosam. As tu-tətaggim təgammayam s əwəl iyyanda a du-təssəxsəlam tara ən Məşşina.

⁷ Agiwat-asan əşşəxəl igân əs man ərdânen, zun as Əməli as təşyalam, wərgex aggadəm.

⁸ Təssanam as: Arat kul olayan wa iga awedan, ad igrəw maruzat-net xur Əməli, gər imos awedan wen akli wala əlləlli.

⁹ Kawanay dəx məssawəs n eklan, agiwat aqqad en da y eklan-nawan. Ayyiwat-tan şihərəşša, id təssânam as Əməli a ihan ijənnawan ənta a imosan məşşikkawan kawanay dər-san. Əməli amaran wər fall-as t-illa igi ən təmərıt.

Təbəllant əd talbast: əttəfat axər wa n Məşşina

¹⁰ Xasil, a obazan xur əmərədda, əgməyat dəx Əməli ad isəssuhət tartəyt-nawan d Əlməsix əs tarna-net wər nələ əddukad.

¹¹ Əttəfat təzoli n əməgər ta n Məşşina fəl ad təzməram i təmərkas n İblis,

¹² id təbəllant ta nəga, wərgex aytedan a dər tat-nəga əmosnen tayəssa d əzni, kalar tayməren, d əlxəkuman, əd muzaran əlanen tarna əd fərregat a tan-imosan tayməren şin əxkamnen dəx şıyyay əd kəl ətənkul win əhanen ijənnawan tawayan-du təkma a dər nəmməgar.

¹³ Awen dəx a fəlas əttəfat təzoli n əməgər ta n Məşşina fəl ad təfrəgam zəmmerat y ark əzəl, taqqamim da wər təqqelam dəffər-wan dəx təbəllant ta təgam dəffər as du-təssifalam dənnəg aratan win den.

¹⁴ Xasil zəzzəwətat dəx əzəgzan-nawan, almayna n awen âs: Təqqəlet tidət əsatəb was totabam; təqqəl taqqat asalsaw n əməgər wa təzlagam.

¹⁵ Səmmutəgat i təbəllant ta dər d-osa Əlinjil n alxer wa nəzzəgzan, iqqəl Əlinjil en zun ixtəman-nawan.

¹⁶ Dənnəg adi kul, iqqəlet əzəgzan axər-nawan. Ənta a kawan-z-akfin fərregat n ad tanxim abalagleg kul wa z'intəs İblis.

¹⁷ Səwərat təkəbbut ta n əlxıllas, təzləgam takoba ta n Infas wa Zəddigan a tat-imosan Awal ən Məşşina.

¹⁸ Tattarat faw da əs tilalt n Infas wa Zəddigan, ad tətaggim əzzənəfan kul ən təwatriwen, əd mansayan ən Məşşina. Əgləyat dəx awen, a tu-tətaggim əs zəmmerat, ad tətaggim dəx şiwatriwen i məzzəgzan di ən mizdagan ketnasan;

19 a di-tanat-tətaggim nak da fəl ad əgrəwəx masnat n awal, əşšiwələx s ikus n aššak, agəx isalan n əssir n Əlinjil əs tanaya.

20 Əlinjil en day as əmosəx almawakkil-net day əddənet, amaran əddəlil-net a fəl aheyx iyunan. Tattarat-in fəl ad t-əmmala y aytedan s ikus n aššak, s əmmək was ihor a sər-əs əşšiwəla.

Assalaman win əlkamnen

21 Amadray-nana Tişik wa n əməri-nin imosan amaššaxal ixdâlan n Əməli, a dawan-əgu kawanay da isalan-in kul, fəl ad təssənam alxalat ta aheyx d awa tagga.

22 Əgmâyəx-in əsuki wa dawan-t-in-z-aga, fəl a dawan-əgu isalan-nana, aləm-awan fəl man.

23 Onsaya Məššina di n Abba d Əməli Yaysa Əlməsix ad akfu imədrayan-nana kul alxer əd tara day əttâfan əzəgzan-nasan.

24 Ya Məššina təgeyx arraxmat-nak y aytedan kul win ərənən Əməli-nana Yaysa Əlməsix, əgân-as tara wər nətəməttəy.

Širawt ta iktab Buləs i Kəl-Filib

Šihulawen

¹ Awa nak Buləs əd Timotay əmosnen eklan n Əlməsix Yaysa. Nəhul-in aytedan kul n əxrəm ən Filib win əmosnen arat dağ tamattay ən Məššina əs tərtəyt-nasan d Əlməsix Yaysa, əd muzaran n Əlkənisat əd madhalan-nasan.

² Əgmâya dağ Məššina di n Abba-nana d Əməli Yaysa Əlməsix a fall-awan d-izazzabben arraxmat d alxer.

Igodan əd təwatriwen

³ I kawan-d-əkteğ ad əggudəyax y Əməli-nin Məššina.

⁴ Šiwatriwen kul šin dawan-tagga, fawda təfalawist a dağ-wan tanat-tagga,

⁵ fəl əddəlil ən tədhəlt ta di-tətaggim dağ əzəwwəziwəz n Əlinjil, a d-obazan xur əzəl wa azzaran har əmərədda.

⁶ Fadda əkkasax aššak as, əššəğəl olağan wa dağ-wan issənta Məššina əddi, wər tu-z-izzərəz iket wər t-issənda əzəl wa dağ du-z-azzabbat Əlməsix Yaysa.

⁷ Wərgəğ bannan ifarray əwəl-in y adi dağ talğa-nawan ketnawan fəlas əkneq-qawan tara kawanay win dər-i ədrawnen arraxmat ta di-iga Məššina gər za əmərədda ad əheğ kasaw wala değ dağ təbəllant ta əgeğ fəl Əlinjil d əsəttəddi-net.

⁸ Məššina issan as tara ta dawan-əgeğ ketnawan Yaysa Əlməsix iman-net a du-təfal.

⁹ Amaran awa gammaya dağ təwatriwen-in, a dağ-wan tətittəy tara ta kawan-təhat dağ masnat ta n tidət d əgərri n id t-illa arat.

¹⁰ As iga adi ad təfrəgam əsənnəfrən n awa iknan əlluğ, təqqəlam aytedan zaddognen wər iwer lahan waliyyan əzəl wa du-z-iqqəl Əlməsix,

¹¹ təssəgətam imazalan win oğadnen as Yaysa Əlməsix a xur d-əfalan fəl ad itəwəsəxmər Məššina attamal.

Isalan ən təməddurt ən Buləs d əššəğəl-net

¹² Arey ad təssənam imədrayan-in as, arat wa di-igrawan da eway-du fadda as əslan aytedan aggotnen y Əlinjil.

¹³ Təzzar eway-du awen as əssanan sojitan kul win tagaznen əmənokəl d aytedan kul sa hadan as əddəlil n Əlməsix a fəl əheğ kasaw.

¹⁴ Amaran wərgəğ adi xas, kalar iguz-in kasaw eway-du əs taššam ən mədrayan-nana dağ əzəgzan tətəyt ən təfləst ta əgan y Əməli, a dağ-san tətittəy taholat n amel n awal ən Məššina wər tan-taha tasa.

15 Tidət a imos as wiyyad daḡ-san manjaḡ əd tara n əməzrəy a fəl taggin isalan n Əlməsix. Mišan win hadatnen taggin-tan s ənnəyat tolayat,

16 amaran tara a fəl taggin adi id əssânan as əddəlil ən təbəllant fəl Əlinjil a fəl aheḡ kasaw.

17 Mišan, aytedan win hadatnen wərgəḡ əwəl iyyanda as taggin isalan n Əlməsix, kalar tənfa-nasan ḡas a gammayan, əḡân iduf n as a fall-i əşšitin s adi arkanay wa ənnaya daḡ kasaw.

18a Wər imos adi wala! Əlməxsud as, gər za taggin adi s əwəl iyyanda wala deḡ s ark ənnəyat, isalan n Əlməsix a taggin amaran isifalawas-i adi.

18b A di-aknu deḡ əsəffəliwəs.

19 Fəlas əssanaḡ as, adi ketnet a d-awəy ad əgrəwəḡ efsan s əssəbab ən təwatriwen-nawan əd tilalt n Infas ən Ƴaysa Əlməsix.

20 Amaran əkneḡ əsəddirən wəllen əge deḡ attama n as wər di-za-tabəz təkarakit daḡ arat waliyyan. Kalar gər za dat awa wala əmərədda, fawda əmosaḡ amaqqajay fəl ad itəwəsəḡmər Əlməsix gər za əs təməddurt-in wala əs təməttant-in.

21 Fəlas nak Əlməsix a imosan təməddurt-in, amaran təməttant tənfa-nin a təməş.

22 Mišan ya as imos as əşşəḡəl n Əlməsix təh-as tənfa ad aḡlay əddara, wədi wər əssena awa za sənnəfrəna.

23 Əttirkaba fəl əşšin gannatan. Sinahala tara n agamad n əddənet əməla ḡur Əlməsix, arat s ənta a di-ofan wəllen.

24 Mišan ya fəl əddəlil-nawan ogar tənfa ta tahat ad aheḡ əddənet.

25 Arat wədi əkkasa daḡ-as aşşak. Əssanaḡ as ad aḡlay əlle ḡur-wan fəl a dawan-ilala ketnawan s ad ittəy əzəḡzan-nawan, akn-iwan adi əsəffəliwəs.

26 Adi a z'ışšitin saḡmar wa təgam Ƴaysa Əlməsix əs tarrayt-in, s əssabab ən tawaḡlay ta kawan-in-z-aga.

Əlməsix a imosan təməddurt-in - Almasal wa n Buləs

Təməddurt ta təməttalat Əlinjil

27 Taḡara təgat da, aḡiwat alxal was imməkkan ad t-agin aytedan əzzigzannen s Əlinjil n Əlməsix. As iga adi, gər za oseḡ-qawan-in wala deḡ imos as isalan-nawan ḡas a əgrawa, ad əssənaḡ as təḡlayam daḡ igi n aḡaf iyyanda, tənimmannakam s əwəl iyyanda daḡ təbəllant ta təgam fəl əzəḡzan isihaddan fəl Əlinjil.

28 A daḡ-wan wər agin aytedan win kawan-əzzəngatnen tasa s arat waliyyan. A sər-san d-awəy adi ikus n aşşak daḡ əhluk-nasan, kawanay awəy-du sər-wan ikus n aşşak daḡ

iguz wa təgam tarrayt ta n efsan. Amaran Məşşina a z'agin adi.

²⁹ Məşşina wərgex arraxmat n əzəgzan s Əlməsix xas a kawan-ikfa, kalar ikf-iwan harkid ta n alyazab fəl əddəlil-net.

³⁰ Əmərədda təgâm fall-as təbəllant şilat ən tas kala di-tənyam əgeq-qat fall-as, ənta dəx as təsallim as harwa da taggaq-qat.

2

Tartəyt d əsəmmədrəy ən man

¹ Dad zamas tənayam təsasmit əs tərtəyt-nawan d Əlməsix, tənayam allam fəl man wa du-tətaway tara-net, tənayam tassaq ta ihakku Infas wa Zəddigan, tənayam dəx təhanint d əlluq n Əlməsix,

² dəx adi səkməlat təfalawist-in s ad tagim təməddurt dəx tənimannakam, tənimaram, tərtəyam s əwəl iyyanda, tagim ənnəyat iyyadda.

³ Ad wər tagim arət waliyyan a dəx wər təgəmməyam ar tənfa ən man-nawan xas, wala təzzəzwəram iman-nawan id wər infa awen wala. Kalar akkiyyan dəx-wan isəmmədrəyet iman-net i win hadatnen, tagim fawda i midawan-nawan iduf n as ogaran-kawan.

⁴ Akkiyyan dəx-wan igməyet tənfa ən midawan-net, wərgex fa-net xas.

⁵ Agiwat tiddawt təgât s alxal wa n Əlməsix Yaysa.

⁶ Ənta di da a dəx du-təxsal tişit ən Məşşina ketnet.

Mişan tugdat əd Məşşina ta igraw den

Wər igmay d a tat-ittəf fəl man-net.

⁷ Kalar oyya awen ketnet

s igi wa iga iman-net akli,

iga-du təhəwt ta du-taggin aytedan.

Awa imos kul issikna tulat-net d aytedan.

⁸ Isammədray iman-net

s əbərdəg wa iga har təmattant.

Tamattant en dəx ta təgat fəl təgəttawt.

⁹ Adi a fəl t-ikfa Məşşina edag wa ogaran adkul,

ikf-ay dəx s arraxmat-net esəm

əs tu-wər-illa esəm wər oger,

¹⁰ fəl ad issəjəd i t-illan kul gər za dəx jənnawan

wala fəl amaḍal wala dəx daw amaḍal,

fəl saymar n esəm ən Yaysa;

¹¹ aggayyat dəx i t-illan kul

as Yaysa Əlməsix a imosan Əməli.

Imos awen arət izzizwaran Məşşina di n Abba.

Əmələwləw dəy əddənət

12 Dəy adi imaran-in zund əmmək as faw da təbbirdagam y Əməli agliwat təsinəfililam əs mazalan-nawan efsan win kawan-ikfa təgâm awen dəy təksədə-net. Awen dəy a təgam harwa a çur-wan əlle. Dəy adi ad wər tammazzayam d igi n adi, wəllen əməərədda ad wər əlle çur-wan.

13 Təfrâgam igi n adi fəlas Məşşina iman-net a işyâlan dəy wallan-nawan, ihakk-iwan ənnəyat əd fərregat n igi n arat kul, ilkâm awen i tara-net.

14 Arat kul wa tətəggim, agat-tu da wala agatanten wala tamazaq

15 fəl ad təqqələm aytedan wər iwer lahan waliyyan, zad-doggen, əmosan bararan əkmâlneən ən Məşşina, əhanen ammas n ark aytedan, əxrakneən ən nəllubas. Təgâm dəy-sən əmələwləw wa iga ənnur dəy şiiyyay,

16 təzizawem dəy salan win hakkinen təməddurt ta təylalat. As təgam adi, ad əfləsəy iman-nin əzəl wa du-z-asu Əlməsix, fəlas ad assaknu adi âs əşşəxəl-in d arkanay wa ənaya wər əbbənnanan.

17 Mişan mijas a dəy-i təwəkkəsan man, əqqəla şilat ən təkutay tətivançalat a du-təssindat əşşəxəl wa kawan-isassagan əzəgzan-nawan. Kud iga adi da ad fəliwəsa nak, fəliwəsa dəy nak dər-wan.

18 Kawanay da fəliwəsət, təfəliwəsəm dəy nak dər-wan.

Timotay d Ebafroditəs

19 Əgeç attama dəy Əməli Ƴaysa n a kawan-in-əssuka Timotay. As kawan-d-ifal ad əgrəwəç isalan-nawan tansu taytay-nin.

20 Fəlas Timotay ças a ifarrayan y awas farraya, tewây-as talça-nawan əd man.

21 Amaran aytedan kul win hadatneən tənfa ta n man-nasan ças a gammayan, wərgəç talça ta n Ƴaysa Əlməsix.

22 Amaran təssânam dəy təməwit tas isitadda Timotay tişit-net awedan ilan almaçna, fəlas ənəməşçal wa itaggu barar d abba-net a dər-i inamagga, iddew dər-i dəy əşşəxəl wa n amel n Əlinjil.

23 Dəy adi ənta as əgeç attama n a dawan-t-in-əssuka. Wər əqqələy ar y ad əssənəy awa dəy-i z'agin.

24 Amaran əkkasəy əşşək çur Əməli, as a kawan-in-asa nak iman-in dəy alwaq ihozan.

25 Ənâyəç as olâç as kawan-in-əssoxala Ebafroditəs, imosan amadəy-nin imos dəy əmidi-nin dəy əşşəxəl əd təbəllant ta əgeç təmosat amel n Əlinjil s ənta a sər-i du-təzammazalam ewây tadhəlt tas əddərara.

²⁶ Isidaran wəllen anay-nawan ketnawan, fəlas tədgâz-tu tasalay ta təgam tafrəyt-net.

²⁷ Awalla tədâs-tu təfrəyt zəwwərat har zama ad t-aba. Mišan ihanattat-as Məššina. Amaran wərge ənta ɣas as ihannattat, kalar nak da ihinattat-i, igdal-i aɣšud ən man ogaran wa di-igrawan.

²⁸ Adi fəl ədgaza daɣ a t-in-zəmmizəla sər-wan fəl a tu-tələsam anay təfəliwəsam, isəssikəy-i adi aɣšud ən man nak da.

²⁹ Agiwat-as əlqəbulat təgât əs təfalawist tagget id amadray-nawan a imos daɣ əzəgzan s Əməli Ƴaysa, təssəxməram aytedan win šilat-net.

³⁰ Fəlas har iga iman-net daɣ aɣarar ən təmattant fəl əššəxəl y Əlməsix. Awen kul ig-ay fəl a di-agu tilalt tas wər təfregam a di-tat-tagim kawanay fəlas igəg a di-təgam.

3

Təɣudəla daɣ tarrayt n Əlməsix

¹ Amaran, imədrayan-in, təsəffəliwəset-kawan tassaɣ ta təgam d Əməli Ƴaysa. Wər fall-i imos əzuk a dawan-in-ələsaɣ akatab n aratan win as kala dawan-tan-in-əktaba, fəlas təha tənfa awen daɣ aggaz-nawan.

² Ənkədat y aytedan win wər nəzlay əd ɗan, taggin əššur, sisahen əmənəkəd əttafan as ənta a itaggin daɣ tamattay ən Məššina. Ənkədat-asan wəllen.

³ Nakkanay a igan əmənəkəd wa n tidət, fəlas əɣibada a nəga Məššina s Infas wa Zəddigan. Ƴaysa Əlməsix a imosan abarag-nana. Wər nəga attama waliyyan daɣ arat iga aggadəm.

⁴ Amaran nak iman-nin əley əddəlilan s igi n attama-nin daɣ aratan əgân aytedan. Kud ill-ay awedan ilân əddəlil s igi n attama-net daɣ arat iga aggadəm, awedan wədi ogaraq-qu təla n əddəlil s awen,

⁵ fəlas nak a itiwasammankadan əzəl wa n əttam dəffər təhəwt-in. Əgmâda-du Kəl-İsrayil, təl-i tawşet ta n Benyamin, əmosaɣ aw Ƴibri wa n ələsəl, əssinda-du əššərədan ketnasan win əššəriɣa wa n Əttawret id Fərisay as kala ad t-əmosa.

⁶ Awa əgeɣ daɣ gəlleɣat daɣ tarrayt ten, iyyəwanay əzəɣɣəzzəb n əlməsixitan. Daɣ batu ta təqqalat aqqad daɣ əššəriɣa, wədi wər əley lahan waliyyan.

⁷ Aratan kul win di, kala daɣ-san əgeɣ iduf n as əmosan-i tətəyt, mišan əmərədda əge daɣ-san iduf n as afanaz a di-əmosan, fəl əddəlil n awa iga Əlməsix.

⁸ Fadda wərge aratan win di ɣas, kalar arat kul əge daɣ-as asawad n as afanaz a di-imos fəl əddəlil n ədkul a dənnəg

wər illa iyyan a təga masnat n Əlməsix Yaysa, Əməli-nin. Əddəlil-net fəl əqbalax a di-igməd arat kul, amaran arat kul əgeç-as iduf n as tajjargant a imos, fəl ad əttəya daç tarrayt n Əlməsix,

⁹ almaçna tassaç dər-əs. Wərgəç ləkkum y əşşəriça wa n Əttawret a di-ikfan taçqat dat Məşşina, kalar əzəçzan-in s Əlməsix. Məşşina a ihakkın taçqat, amaran ihakk-et s əzəçzan s Əlməsix.

¹⁰ Arat wa areç masnat n Əlməsix, almaçna ad əssəna tarna ən tanakra-net daç təmattant, əd tərtəyt dər-əs daç alçazab wa iga, ala dər-əs deç daç təmattant ta iga.

¹¹ Adi a di-z-issəfrəçan igi n attama n a di-d-issənkər Məşşina daç təmattant.

Aggad n əlməxsud

¹² Wər ənneç əçrəwaç masnat tədi, ənta wala tişit n awedan ikməlan, kalar azzal a əgeç daç açaçay n a tanat-əçrəwa, fəlas əddəlil n awen da a fəl di-d-obaz Əlməsix Yaysa əs man-net.

¹³ İmədrayan-in, wər ənneç əçrəwa aratan win di; mişan ya arat iyyanda a tagga a t-imosan as: wər din-səççəda daç awa okayan, kalar arat wa əfrəçax a tagga fəl ad awədaç awa illan dat-i.

¹⁴ Azzal a əgeç s əsərəkən, fəl ad əçrəwa tefert təmosat təçaray ta danaç-iga Məşşina əs çənnawan əs tərtəyt d Əlməsix Yaysa.

¹⁵ Daç adi nakkanay ketnana win as ikna əzəçzan-nana assahat immikkan ad naku alçal wen, amaran wala ad təçəm alçal iyyan, Məşşina a dawan-z-isənnəfiləlan awas ihor a tu-təssənam daç batu tədi.

¹⁶ Arat iyyanda a dawan-z-annaç as: dad zamas newad-du edaç wa nəha da əmərədda, açlatana nəddew daç anamod wa da.

¹⁷ Ya imədrayan-in, əççələt ketnawan imattalalan-in, tattalalam aytedan win əlkamnen y alçal wa kawan-nəkfa.

¹⁸ Əmmalaç-awan as əllan-tu aytedan aççotnen saçraçnen s alçal-nasan almaçna ən təmattant n Əlməsix fəl təçəttawt. İyyəwanaç-awan igi ən batu ta, amaran əmərədda həlləç as dawan-tat-ələsaç igi.

¹⁹ Tilkamat-nasan ahluç, fəlas şidusen-nasan a mosnen əməli-nasan, sinafasan arat was ihor a tan-isikarakad, wər təkka ənnəyat-nasan ar əddənət.

²⁰ Nakkanay amaran akal-nanaç içənnawan. Amaran içənnawan en da as nəççal y a sər-na tan-d-igməd Ənəssefsi a t-imosan Əməli Yaysa Əlməsix.

²¹ Ənta a z'isəmməttəyan əs tarna ta ila fəl arat kul şixəswen-nana ərkammen, tamattatnat, išşəşil-enat əd taret təkñât təla ən tanaya.

4

¹ Imədrayan-in əknex tara, sinahala tara n anay-nawan! Təmosam-i təfalawist, təmosam dəx əssəbab n ətəwəsəxmar-in. İmaran-in, zəzzəwətət dəx əzəgzan s Əməli.

Ənnəsixatan

² Əfodəya əd Santik, onsayaq-çamat ad tənəmənnəkmat fəl əddəlil ən tassaq ta təgamat d Əməli.

³ Amaran kay da, imosan əmidi-nin wa n tidət dəx əşşəxəl, əgməya dəx-ak ad tilalaş i tədoden di əs maknan gar-essanat fəlas əllilnat-i əs təbəllant fəl Əlinjil, nak əd Kəleman əd midawan-in win hadatnen dəx əşşəxəl s əsmawan-nasan əktəban dəx əlkəttab wa əhan əsmawan n aytedan win əgrawnen təməddurt ta təxlatat.

⁴ Fəliwəsət faw dəx tassaq ta təgam d Əməli. Əlasa tənna n adi, fəliwəsət.

⁵ İssənət awedan kul dəx əlluş-nawan. Əməli ihôz.

⁶ A kawan-wər-işşəwəş arat waliyyan. Kalar a təqqal alxalat ta təggazam, əgməyat dəx Məşşina arat was təddəraram, ad tətattaram s əwəl iha agoda.

⁷ As iga adi, alxer wa ihakku Məşşina, imosan alxer illân dännəg arat kul was ifrag awedan əgərri-net, ad agəz iwəllan-nawan əd medranan-nawan dəx arat kul id tartəyt a təgam d Əlməsix Yaysa.

⁸ Xasil imədrayan-in, aratan da win as ihor a tan-tagim faw da dəx taytwen-nawan əd medranan-nawan: imazalan kul win əknanen əlluş, əhoran d i tan-imalan, əd mazalan win əmosnen tidət, əmosan əzzəbun, oşâdan, zaddogan, əssiran, tatamalan.

⁹ Əlməxsud as tamazalat faw s arat wa fall-i təxram, təqbalam-tu, təslam-as, tənayam-i tamazalaq-qu. Əddi a dəx-wan issən Məşşina di n əməggi n alxer.

Igodan ən Buləs i Kəl-Filib tadhəlt-nasan

¹⁰ Amaran əşəşinəy wa təgam masnat ta dəx-i təgam, eway-du sər-i təfalawist tagget dəx tassaq-in d Əməli, kuddeş as dat awa da, təssânam dəx-i mişan wər təgrewam tarrayt n əsəkni n adi.

¹¹ Wər ənnex adi fəl as əddərara s arat iyyan, kalar nak əlmâdəş əgəddi s alxalat kul ta əhex.

¹² Əssana təməddurt dəx təməyatirt, əssana dəx təməddurt dəx tənəfləyt. Amaran dəx alxalaten kul şin

əggaza əlmâda tewant, əlmâda deŷ gələk, əlmâda tənəfləyt harkid təməyatirt.

¹³ Alxalaten kul əfragaŷ-asnat əs tilalt ən wa di-ihakkin tarna.

¹⁴ Dər iga awen da ya, təgâm a olaŷan as di-tədhalam daŷ təməŷutar-in.

¹⁵ Amaran kawanay Kəl-Filib təssânam wəllen as, as əgmada akal wa n Masedonəya, azzaman win daŷ əssəntəŷ emel n Əlinjil, wər tu-təlla Əlkənisat a di-tədhâlat ar tanawan.

¹⁶ Fəlas wala alwaŷ wad əheŷ aŷrəm ən Tesalonik təsisawayam-in awas əddərara har wərgəŷ taklat iyyadda.

¹⁷ Wərgəŷ agamay a taggaŷ a əgrawa, kalar arozan-nawan as gammayaŷ ad əttəyan.

¹⁸ Əleŷ arat kul was əddərara, ənniflaya. Wər din-odena wala id əgrâway təhəkkut-nawan ta di-d-eway Ebafroditəs, təmosat takutay iqbâl Məşşina, təla ŷur-əs ađu izodan, oggam-tat.

¹⁹ Amaran əgmâya daŷ Əməli-nin, ilân tanaya wər nəla əddukad, a kawan-ikfan awas təddəraram kul fəl udəm n Əlməsix Ƴaysa.

²⁰ Adkul i Məşşina Abba-nana har faw. Amin!

Assalaman win təzərəst

²¹ Təhulam-in aytedan kul win əzzəgzannen s Əlməsix Ƴaysa. Əhulan-kawan-in mədrayan-nana n əlməsixitan win ŷur-i əllanen.

²² Iməzzəgzan əs Ƴaysa Əlməsix kul win əllanen da, əhulan-kawan-in. Wəllen win məşşaxalan n aŷaywan n əmənokal Qaysara.

²³ Əttâra s Əməli Ƴaysa Əlməsix a kawan-ikfan arraxmat ketnawan.

Širawt ta iktab Buləs i Kəl-Kolosəya

Šihulawen

¹ Awa nak Buləs, imosan anammazul ən Ƴaysa Əlməsix əs taradawt ən Məššina, nak d əmidi-nin daƳ əzəgzan Timotay, ənnânen əhulan-in

² Kəl-Kolosəya win əhanen tarrayt ən Məššina, ənnimanakan daƳ esəm ən Ƴaysa Əlməsix, əmosnen imidawan-nana n alƳadılan sər-əs. Izazzabbat-du fall-awan Məššina Abba-nana alxer d arraxmat.

Igodan əd təwatriwen

³ Faw da daƳ təwatriwen-nana nətigudəy-awan i Məššina di n Abba n Əməli-nana Ƴaysa Əlməsix,

⁴ fəlas nəslâ əzəgzan wa təgam əs Ƴaysa Əlməsix, d əsəkni-nawan tara y i t-illân izzigzan sər-əs.

⁵ Əzəgzan wa əd tara ta, eraw-tan-du attama wa təgam daƳ Məššina, n awa dawan-issənsa daƳ aljannat. Attama wa təgam-tu əzəl wa kawan-d-ewad Əlinjil, a imosan isalan win tidət ən Ƴaysa Əlməsix.

⁶ Əlinjil wa ig-awan d assa ad d-iga fəl əddənet ketnet. Ənta a isammattayan alxalan n aytedan s əlluƳ, ətittəyan məzzəgzan sər-əs. Əmmək wa da a daƳ-wan igan kawanay da, a d-obazan Ƴur əzəl wad təslam i salan n arraxmat ən Məššina əs tidət, təgrawam əgərri-net.

⁷ Ebafras, əməllil-nana, n əməri-nana, ənta a kawan-issosanan isalan win. Imos əməggi ən salan n alƳadil n Əlməsix y-awan,

⁸ ənta a danax-imalan tara ta iga Infas Zəddigan ən Məššina daƳ wallan-nawan.

⁹ Adi da fəlas a kawan-nəsla nətattar-awan əs Məššina. Nəgammay daƳ-as a kawan-aknu əsusən ən tara-net, s a kawan-akfu s Infas Wa Zəddigan, tayttay kul d əgərri.

¹⁰ Šiwatriwen šin nətagg-enat fəl ad tilem alxal ən məzzəgzan, isənnəhəl-tu Əməli təggəma, ad tətəggim imazalan olâƳnen, tətittəy daƳ-wan masnat ən Məššina,

¹¹⁻¹² akn-iwan Məššina əsəssuhi daƳ anamod kul əs tarna-net di maqqarat fəl ad tilem zəmmerat, təggəz-kawan tazaydart, təggudəyam əs man filawasnen y Abba wa kawan-issəfragan agaraw daƳ təkəsət ta issənsa daƳ taymar-net di təmosat ənnur təhat ijənnawan iskat y aytedan-net win əhanen tarrayt ta n Əlməsix.

Assayfaten n Elməsix

¹³ Ənta a dana-d-ikkasan dağ əlxəkum n Iblis di imosân şiyay ig-anax dağ wa n Barar-net Yaysa Elməsix a ikna tara.

¹⁴ Əddəlil ən Barar-net a fəl nəgraw tədarfit, təmosat təsureft ən bəkkadan-nana.

¹⁵ Barar wa, şaşelan ən Məşşina a imos di wər nətəwəhənnəy,

imos dəx əmuzar ən təxlək kul,

¹⁶ fəlas axluk a sər-əs d-iga Məşşina aratan kul

fəl amaḍal əd jənnawan,

win ətawahənnaynen

əd win wər nətəwəhənnəy,

şixurad şin əttənkəlnen

gər əqqalnat tətəbəla wala taymar,

wala əlxəkum, wala təmənukəla,

aratan win kul ətiwaxlakan-du sər-əs,

fəl əddəlil-net.

¹⁷ Yaysa Elməsix ənta iman-net ill-ay dat təxlək kul,

aməran təxlək kul tənimməttəf əs tarrayt-net,

issan dağ-as.

¹⁸ Ənta iman-net imos eyaf n Əlkənisat,

ig-as tizart ta iga axaf i təxəssa.

Ənta ələsəl n Əlkənisat,

fəlas ənta ad azzaran tanakra dağ win aba

fəl ad iqqəl ill-ay, azzâr y arət kul.

¹⁹ Aratan kul win ətawənnənen s Elməsix da,

kul tidət id fəlas Məşşina iman-net

a isəgəttəkən əs tara-net

əsəxsəl ən tişit-net di təndat dağ Barar-net,

²⁰ aməran ikna tolas iman-net əd təxəllək kul

şin amaḍal əd jənnawan s əddəlil ən Barar-net,

izəzzəbbat-du fall-asnat alxer

əs tanayla n əzni ən Barar-net

xur təməttant-net fəl təgəttawt.

²¹ Kawənan da əstizarat tənimməggəgam əd Məşşina təmosam iməgəzaran-net s ark ənnəyatən-nəwan d arak məzalan-nəwan.

²² Mişan əməərədda, əs təməttant ən Barar-net ikfan iman-net, Məşşina ikn-iwan əd man-net fəl a dat-əs təbdədəm təmosam aytedan zəddəgnen, wər nəla lahan,

²³ kud imos as təqlam tətəfəm əzəgəzan-nəwan, təzizawem dağ-as iman-nəwan, təzikkem dağ-as s əssəhat, wər təkkəsəm əttəmə wa təgəm əs təslam y Əlinjil. Əlinjil wa, ittimalan y aytedan kul n əddənət, ənta əs əqqala nak Buləs əməggi ən salan-net.

İşşəyəl wa n Buləs y Əlkənisat

²⁴ Əmərədda isidawat i arkanay wa ənnaya fall-awan. Fəlas əmmək wa ənta as əsakkasawa əs təxəssa-nin, dağ aganna wa-nin, arat wa din-aba dağ alxazab wa inay Əlməsix fəl təxəssa-net di, təmosat Əlkənisat ən nalkiman-net.

²⁵ Əlkənisat ta ənta as əqqala amaşşaxal-net s awa dər togda tanat-nawan ta di-issodaf Məşşina. Izammazal-i-du fəl a kawan-əxrəday əsusən n awal-net,

²⁶ s a dawan-əsaffagğay əssir wa ixbar elan s elan. Mişan əmərədda əssir wa itawasanafalal i win das-əlkammen,

²⁷ əntanay as ira Məşşina a tan-issusən dağ igət wa dər ogda ədkul n əssir wa iqqalan şimattiwen n əddənet kul. Əssir wa imos-tu as: Əlməsix ixsâr dağ wallan-nawan adi da fəlas illikan as ad tilem tadagart dağ əlxurma ən Məşşina.

²⁸ Əlməsix wa ənta a nəmmal nakkanay. Nərakkab şiməzzugen n awedan kul, nəsassaxr-ay əs tayttay təndât fəl ad ikməl akkiyyan dağ tənəmmənaka d Əlməsix.

²⁹ Dağ tara n agğad n arat wa a fəl əsannahalax əşşəxəl, əs tarna ta du-təfalat Əlməsix, a dağ-i tətımətəkwəyat s assahat tagget.

2

¹ Arêx ad təssənam awa dər togda təbəllant ta fall-awan ətagga, kawanay d aytedan n əxrəm wa n Lawodikəya, əd wiyyad şilat-nawan as wər kala ənayan udəm-in.

² Arat wa əgeq-qu fəl tara n ad tilem kawanay dər-san əlhimmat, tənəmərım gar-ewwan s əwəl iyyanda, fəl ad təsənnəhəlam gəlleyat təndât ta ihakku əgərri ikkisawan, təssənam əssir ən Məşşina wa imos Əlməsix.

³ Əlməsix ənta xas a imosan təsassarut ən təgərgist a təmos tayttay əd masnat.

⁴ Arat wa ənney-awan-tu fəl a tu-wər-iməl awedan a kawan-issəxrakan a əganat batuten-net dağ şizada.

⁵ Dağ adi kud imos as wər xur-wan əlle s azzat-in da iman-in əllân xur-wan amaran isidawat i as əsley as tənizzamam, təzikkem s assahat dağ əzəgzan wa təgam s Əlməsix.

Tənəddawt ən tarrayt ta n Əlməsix

⁶ Dağ adi azzama təqbâlam as Əlməsix Yaysa imos Əməli, wədi awəyat əd tarrayt-net.

⁷ Səssəhətat dağ-as iman-nawan. Əqqəlat aytedan əkrâsnen dağ-as, əssohatnen dağ əzəgzan-nasan, s əmmək was tətawasasaxram, təqqəlam dəx aytedan əknanen dəkkur n agoda y Əməli.

⁸ Ənkədat i y ad t-imal awedan a kawan-issəxrakan s əljəmaten wər təha tənfa əd batuten ən təkərras ad

əzzirratnen day tanaden n aytedan, əzziratnat-du deyx day təxurad šin əttənkalnen, a du-wər-nəha s Əlməsix.

⁹ Fəlas Əlməsix ənta day təxəssa-net a day təxsar tišit kul ən Məššina,

¹⁰ amaran kawanay win day-as ənamannaknen təgrâwam arat kul əs tənəddawt. Ənta a imosan eɣaf n əlxəkuman kul əd təmənukəla kul.

¹¹ Day tənəmənnəka day as tətawasamankadam s əmənəkəd wər igâ əfus n awedan mišan wa dawan-iga Əlməsix imosan as day-wan ikkas tišit kul ta n nas-bakkadan,

¹² s alamaɣ-nawan day aman tənbalam təddewan dər-əs, amaran deyx tətawasankaram-du sər-əs təddewam dər-əs fəlas əzəgzan a təgam əs tarna ən Məššina di maqqarat a t-id-təssənkərat day tamattant.

¹³ Kala təmosam aytedan abâ day wallan-nawan fəl əddəlil ən bakkadan-nawan d əddəlil n as wər təmosam arat day Kəl-Əlyəhud, wər təmmənkadam, mišan əmərədda Məššina ilas-kawan d əsudər təddəwam d Əlməsix, sas dawan-issoraf ibakkadan-nawan kul s arraxmat-net.

¹⁴ Imas arak mazalan-nana əd win-nawan əwârnen iɣafawan-nana, irzam-tan fall-ana s ətəwətəytəy-nasan fəl təgəttawt.

¹⁵ Ikkas Məššina assahat ta təhat taɣmaren ən kələsuf, osaq-qanat ilway-tanat dat aytedan əmosnat ajjab, iɣlab-tanat s Əlməsix.

¹⁶ Day adi a tu-wər-iməl awedan a kawan-z-išrəɣan fəlas wər tətəggim awa ira gər iga day tattay wala tessay wala ijilan-nawan win maddan əd win əlyibada,

¹⁷ fəlas aratan win wər əmosan ar telay ən win d-əzaynen: tidət-nasan təha Əlməsix.

¹⁸ Ad wər tayyim iman-nawan y awedan a iqqal issəwər-kawan əlhigga fəl as sər-əs əzzodan mazalan n azzahir, issilaqqaw iman-net sər-san, izod sər-əs deyx əlyibada n angalosan, isisahat iduf-net wa iga as tan-inay. Izzizwar iman-net əs medranan wər təha tənfa a d-əgmâdnen tayttay wər nəha tarrayt ta n Əlməsix,

¹⁹ amaran ab'as isassahat iman-net day tərtəyt d Əlməsix a imosan eɣaf ən təxəssa. Taɣəssa ta kul ənta a tətittəyat s Əlməsix s əmmək wa ira Məššina, s ənəmənnək ən təsəllad wa du-tawayan səmməɣras əd zərwan.

²⁰ Azzama aba kawan-tənimannakam d Əlməsix, tətawaytasam-du day taɣmaren ən kələsuf day əddənet, day adi mafel təlakkamam i batuten n əddənet, təqqabbalam əlqanunan əmosnen:

²¹ «ad wər tədkələx awa», «ad wər tərəməx awa», «ad wər tədəsəx awa»?

²² Aratan win wərge wər əgen ar y a tan-təgməd tənfa dəffər as sər-san iga əmazal? Wər əmosan ar əlqanunan d awalan n aytedan!

²³ Tidət as dağ anay-nasan aratan win oğadan fəlas əkfân əs tayttay dağ mazalan-nasan əmosnen: əlxibada əs gəlleyat, əsələqqu ən man, əsəkni ən təxəssa arkanay. Mişan ya məssawsan wər əlen a imosan fərregat n iduf dağ tara ən man.

3

Təməddurt ta təzrayat dağ Əlməsix

¹ Dad zamas tətawasankaram-du kawanay d Əlməsix dağ təmattant, wədi əgammayat aratan win jənnawan dad illa Əlməsix iha ağıl ən Məşşina.

² Sədəgat ənnəyaten-nawan sa sər-san wərge sa sər win n əddənet.

³ Fəlas şilat n aytedan aba a təmosam ab'as tətamazalam aratan win tətamazalam əstizarat, amaran təməddurt-nawan təstâr s Əlməsix xur Məşşina.

⁴ As d-itawasanafalal Əlməsix a imosan təməddurt-nawan, kawanay da a du-tətəwəsənəfilələm dər-əs, təgrəwam əlxurma-net.

⁵ Dağ adi anxat dağ man-nawan ənnəyaten kul şin əddənet a tanat-imosan: əzzəna, ammadas, tara ən man, arak deranan, tara n əddənet təmosat əmadraw.

⁶ Aratan win əddəlil-nasan a fəl itaggaz alham Məşşina n aytedan win ugaynen s as sər-əs əzzəgzanan.

⁷ Kawanay iman-nawan kala a tan-tətamazalam harwa ad wər təfregam iduf dağ man-nawan.

⁸ Əmərədda aratan win kul mazzayat dər-san a tan-imosan: alham, aşşar, əzzəngu, şizmit, ark batuten.

⁹ Ad wər tətənəməggim bahu gar-ewwan, fəlas təjwaram təkkasam dağ man-nawan tişit-nawan ta tərəwat əd mazalan-net,

¹⁰ təzzar təgam dağ-san əmərədda iyyat təzrâyat. Iman-nawan win əntanay a ətawaşəşaynaynen faw əs şaşelan n Əmaxlak-nasan fəl ad tilem masnat təndât ən Məşşina.

¹¹ Dağ təməwit ta təzrayat a, wər tu-təlla zələyat gər aytedan kul gər əqqalan Kəl-Əlyəhud wala win tan-wər-nəmos, gər win əmmənkadnen wala win wər nəmmənkad, gər əmosan iyərab wala aljahilan, gər əmosan eklan wala ilallan, əlməxsud as ketnasan əhân Əlməsix di imosan arat kul.

¹² Kawanay tēhām win d-isannafran Məššina, issəwärtan aganna ir-en. Dağ adi tēggəzet-kawan tēhanint, tilem iman mallolnen, təsəlləqqəwam iman-nawan, taləxam, tēggəz-kawan tazaydart.

¹³ Nəmiwəyat gar-ewwan, ad tətınəməsufam gar-ewwan as inamaššak iyyan dağ-wan d əmidi-net. Ad tətınəməsufam gar-ewwan kawanay da əs təməwit tas dawan-issoraf Əməli.

¹⁴ Aratan win kul agiwat tara dənnəg-san, as təgam adi ad taknim ənəmənnak.

¹⁵ Alxer wa iga Əlməsix dağ wallan-nawan ixkəmet šinaden-nawan, fəlas alxer wen da as kawan-d-iğra Məššina fəl ad təqqəlam arat iyyanda, a das-tətigudəyam.

¹⁶ İxsəret awal n Əlməsix dağ wallan-nawan s igət. Ad tətınəməsəşərim, tətınəməsənkidam gar-ewwan əs tayttay təndāt, amaran ad tətəggim şigaytalen i Məššina əs man əğlaynen, əd təmmalen, əd sakkan win d əgmadnen dağ İnfəs Wa Zəddigan. Ətaggat-tan fəl ad tassaknim igodan-nawan i Məššina.

¹⁷ Arat kul wa təgannam əd wa tətəggam, mazalat-tu s esəm n Əməli Ƴaysa, a sər-əs tətigudəyam i Məššina di n Abba-nana.

Aharog n aytedan dağ təməddurt ta təzrayat

¹⁸ Šidoden əlkəmmat i tənna ən meddan-nakmat əmmək as ihor a t-ətagginat tədoden šin əhanen tarrayt n Əlməsix.

¹⁹ Meddan iriwat šidoden-nawan amaran a kawan-wər-ətaggazan arak man sər-əsnat.

²⁰ Bararan bardagat i marwan-nawan dağ arat kul, fəlas adi da oggam Əməli.

²¹ Amaran kawanay imərwan ad wər tətihərəşem bararan-nawan faw fəl ad wər Ʒaşšadan man-nasan.

²² Eklan bardagat i məssawwan dağ arat kul. Ad wər tətəggim arat fəl as tətıwawalam Ʒas, tərām igi n awa oggaman aytedan, kalar agat-tu gar-ewwan əd man-nawan əs təkşəda n Əməli.

²³ Əşşəxəl wa tətəggim kul mazalat-tu s əwəl iyyanda. Agiwat as igi n as imos əşşəxəl təgām y Əməli wərgex y aytedan.

²⁴ Fəlas təssanam as Əməli a kawan-akfu alak imosan təkəsıt ta issənsa y aytedan-net. Əlməsix ənta Əməli-nawan.

²⁵ İ igan ark əmazal ad t-irzəm fəlas əşşərixa ən Məššina ola, wər tu-təha təmərıt.

4

1 Məssawəs n eklan ətamazalat s alxaq d əşşəriya day tənəttuft ta təgam y eklan-nawan, taktim as kawanay iman-nawan təlâm Məşikkawan day jənnawan.

Aholan

2 Sənnəhəlat təzakkit day igi ən təwatriwen a day-asnat tənakkadam, tətigudəyam i Məşşina.

3 A dana-tətaggim şiwatriwen nakkanay da fəl a danağ-aləm Məşşina tarrayt n əzəwwəziwəz ən salan n əssir-net a imos Əlməsix. Əssir wa ənta a imosan əddəlil n ətəwəttaf-in day kasaw əmərədda.

4 A danaq-qanat tətaggim dey fəl ad akna fərregat n igi ən salan n Əlməsix s əmmək wa ihoran.

5 İliwat alxal olağan day tassağ-nawan d aytedan win wər nəha tarrayt ta n Əlməsix, amaran ad wər təsabannanam şimazayyaten şin təgarrawam wər day-asnat təgem isalan-net.

6 Awal-nawan ihor ad olâx imos in əlməxsud, fəl ad təfrəgam masnat n aljawab igân day adag-net y əkkulluk n awedan.

Şihulawen şin əlkamnen

7 Amaran isalan kul win-nu əmidi-nana day əzəgzan igân esəm Tişik n əməri-nana imosan amaşşayal n alxadil n əməllil-nana day əşşəxəl n Əməli, ənta a dawan-tan-z-iyrədan igi.

8 Adi da a fəl as əgmâyax-in əzəmmizəl wa t-in-əge sərwan fəl a dawan-əgu isalan-nana, aləm-awan fəl man.

9 İddəw dər-əs əmidi-nana day əzəgzan n alxadil n əməri-nana igân esəm Onesim, imosan iyyan day-wan. A dawan-əgin isalan n arat kul wa itawamazalan da.

10 Aristarxus, a dər ənimaha kasaw, ıssislam-in fall-awan ənta əd Markus wa n əşşin ən Barnabas. Markus tərəwam as təgrawam isalan-net, amaran as kawan-in-osa təqbəlam-tu.

11 Yaysa was itawannu Yustus, ıssislam-in fall-awan ənta da. Meddan win ən karad a əntanay xas iməzzəgzan day Kəl-Əlyəhud win dər ənamaşğala i taşmar ən Məşşina, amaran olâman i fəl man.

12 Ebafras wa n iyyan day-wan imosan akli n Əlməsix Yaysa, ıssislam-in fall-awan ənta da. Faw itagg-awan şiwatriwen, igamma day Məşşina əs gəlleyat a kawan-ıssəhət day tarrayt-nawan, təqqəlam aytedan əndânen day əzəgzan, əkmâlnen day ənnəyaten-nasan əndânen ətamazalnen tara ən Məşşina kul əs təməwit təkmâlat.

13 Nak iman-in əggəyeyəş əşşəxəl ıssohen wa dawan-ıga kawanay əd Kəl Lawodikəya əd Kəl Yerəfolis.

¹⁴ Luqa əməri-nana n anasmagal əd Demas əhulan-kawan-in.

¹⁵ Səslamat-anax-in fəl midawan-nana daɣ əzəgzan win əhanen aɣrəm ən Lawodikəya əd Nimfa d Əlkənisat ta tətamanayat daɣ ahan-net.

¹⁶ Dəffər as təɣrâdam teɣaray ən širawt ta, agat təməwit a fəl za tətəwəɣru y Əlkənisat daɣ Lawodikəya, taɣrim kawanay da širawt ta-nasan ta dawan-du-z-assaglin.

¹⁷ Tannim y Arxifus: əkkəs ašsak daɣ əɣrud n əššəxəl wa təggaza y Əməli.

¹⁸ Arat wa əfus wa-nu as t-əktaba: Assalaman a din-əgmâdnen daɣ Buləs. Daɣ təwatriwen-nawan a din-wər-tattawim ətəwəttaf wa əge da, daɣ kasaw. Izazzabbat-du fall-awan Məššina arraxmat-net.

Širawt ta tazzarat iktab Buləs i Kəl-Tesalonik

Assalaman

¹ Awa širawt a din-təfâlat Buləs əd Silfanus əd Timotay. Nəhul-in Elkənisat ta n əxrəm ən Tesalonik, təmosat tamattay tərtayat əd Məššina di n Abba d Əməli Ƴaysa Əlməsix. İkf-iwan Məššina arraxmat d alxer.

Buləs d əlməsixitan win Tesalonik

Əzəgzan ən Kəl-Tesalonik d almasal wa əmosan

² Faw da nətigudəy i Məššina dəy talxa-nawan ketnawan assaxa kul wa kawan-du-nəkta dəy təwatriwen-nana.

³ Faw da nəkittəw dat Məššina di n Abba-nana awa dər ogda əzəmmizəl wa təgam əzəgzan-nawan, d əmmək was təşxalam əs tara ta kawan-təhat, əd zəmmerat-nawan dəy igi n attama dəy Əməli-nana Ƴaysa Əlməsix.

⁴ Nəssân, imədrayan-nana as, isinafran-kawan Məššina, kawanay a ira, y ad təqqəlam tamattay-net.

⁵ Adi da fəlas isalan n Əlinjil win dawan-nəga, wər kawan-in-osen əmosan awal xas, kalar əmosan imazalan ən tarna, d əsəggətəkki zəwwəran win ihakku İnfəs wa Zəddigan. Təssânam wəllen imazalan win nəga gar-ewwan fəl agamay ən tənfa-nawan.

⁶ Təttəlalam-nana, təttəlalam dəy Əməli. Təmiyataram wəllen eges wər dawan-igdel awen əlqəbulat n awal ən Məššina əs tədəwit ta ihakku İnfəs wa Zəddigan.

⁷ Əmmək wen dəy as təqqqalam almasal olâxan y əlməsixitan kul win əhanen akal ən Masedonəya, əd wa n Akayya.

⁸ Wərgəx Masedonəya d Akayya xas a dəy tawaslan igitan n awal ən Məššina win xur-wan əganen, kalar edag kul wizawazan dəy-as salan n əzəgzan-nawan əs Məššina har as wər nəddərar s əsuxəl n awen.

⁹ Ənta awedan kul immal əmmək was dana-təqbalam assaxa wa kawan-in-nosa, d əmmək was təgmadam batu n əssənəman təmalallayam sa sər Məššina y a tu-təxbədam, ənta a imosan Əməli iddaran, ittidda.

¹⁰ Təqqqâlam dəy y a d-ifəl Barar-net Ƴaysa ijənnawan s ənta a d-issənkər dəy təmattant, a danax-agəz dəy alham ən Məššina əzəl a ilkaman.

2

Emel n Elinjil day Tesalonik

¹ Kawanay iman-nawan imədrayan-nana, təssanam as assa wa dawan-in-nəga wər ibbənnan

² Təssanam harwa day as dat assa-nana y-awan, nətiwadgaz, tiwaggan-anay ərrəbdan day əyrəm ən Filib, mišan nəgraw tadhəlt ən Məşşina s as danaş-ikfa taholat n a dawan-nəməl Elinjil, kuddeş as iyyəwanan aytedan agamay n a danaş-əgdəlan awen.

³ Aratan win dər kawan-nəsammatar wər əmosan a igmayan əsəxrək n awedan wala iga s ark ənnəyat wala əs təkərras.

⁴ Kalar dad zamas Məşşina išşəggar iwallan-nana fəl a danaş-isənnəttəf d amel n Elinjil-net, day adi wər nətəggu awal a day nəgammay ad nəgrəz y aytedan, kalar Məşşina as nəra a das-nəgrəz s ənta a itaşəggaran iwallan-nana.

⁵ Təssanam wəllen as wər kala ad nəga batuten əmosnen şixiyyan, wala deş nəga ənnəyat iyyat təxbârat təmosat agamay ən tənfa i man-nana, Məşşina danaş-imosan təgəyya fəl adi.

⁶ Wər nəgmay deş saşmar day aytedan, gər za day-wan wala day aytedan wiyyad.

⁷ Nəfrâg a kawan-nəssəwər igi n awa nəra fəlas nakkanay a mosnen inəmmuzal n Elməsix, mišan talmat a kawan-nəssəkna. Zund əmmək as tətənatfə anna əd bararan-net,

⁸ əmmək en day as nakkanay da, fəl tara ta dawan-nəga, nara a dawan-nagu isalan n Elinjil a d-ifâlan Məşşina. Amaran wərgəş isalan n Elinjil şas, kalar iman-nana da nəga edag y a tan-nakfu fəl əddəlil-nawan, fəl awa dawan-nəga day tara!

⁹ Təkittəwam ya imədrayan-nana əşşəxəl issohen izzəwat wa nətaggu ehad ezal fəl ad wər nəqqel əzuk i waliyyan day-wan, assaxa wa dawan-nəmmal Elinjil a d-ifâlan Məşşina.

¹⁰ Təggiyyem iman-nawan, amaran Məşşina da iggiyyat as kawanay a mosnen iməzzəgzan, nəg-awan tidawt təgat əs tazdak, d əzəluləş, d iban əlxib waliyyan.

¹¹ Təssanam as əkkulluk n iyyan day-wan nəg-as arat wa z'agu abba i bararan-net.

¹² Nəsimatar-kawan, nolam-awan fəl man, nəzzidgaz-kawan deş y ad tagim alxal wa ira Məşşina s ənta a kawan-iyran fəl ad təggəzam taymar-net əd tanaya-net.

Əlqəbulat ən Kəl-Tesalonik awal ən Məşşina

¹³ Faw da nətigudəy i Məşşina fəl əddəlil n as təslam y awal-net wa dawan-nəmal, təqbalam-tu, wər das-təgem

iduf n as awal n aytedan, kalar təgam-as iduf n awa imos, a t-imosan awal ən Məşşina a işxalan dağ wallan-nawan kawanay a sər-əs əzzəgzannen.

¹⁴ Ənta imədrayan-nana, kawanay təqqalam aytedan əttılalnen əlməsixitan win Əlkənisaten ən Məşşina şin əhanen akal ən Yahudəyya. Awen da a fəlas kawanay da ziğazzaban-kawan kəl akal-nawan zund əmmək as Əlkənisaten şin əntanatay da ziğazzaban-tanat Kəl-Əlyəhud.

¹⁵ Əntanay a ənyanən Əməli Yaysa, d ənnəbitan, əmərədda ədgazan-ana wəllen nakkanay da. Wər əgrezan i Məşşina, amaran əmosan izənga n aytedan kul.

¹⁶ Gaddalan-anay ad nətamagrad i təmattiwen şin wər nəmos Kəl-Əlyəhud nətagg-asnat isalan n efsan win ihakku Məşşina. Əmmək en dağ as faw sandin ibakkadan-nasan. Mişan illikan əs, ilkâm a fall-asan d-izəzzəbbət Məşşina alham-net.

Deran ən Buləs ad iləs iki ən Kəl-Tesalonik

¹⁷ Nakkanay amaran imədrayan-nana, illikan as isigalam-anay əzəmməzzəy wa danağ-əgan dər-wan azzaman, nənamaggag dər-wan dağ akal mişan wərge dağ wallan, nədgâz wəllen dağ agamay n anay-nawan fəlas nəsidaran-tu wəllen.

¹⁸ Awen da fəlas nara a kawan-in-nakku, wəllen nak Buləs. Wərgeğ taklat iyyadda ɣas a dağ əgmayağ a kawan-in-akka, mişan awen igdal-anaq-qu Aşşaytan.

¹⁹ Awak wərgeğ kawanay ɣas a mosnen attama-nana, təmosam əssəbab ən təfalawist-nana, təmosam fella-nana əzəl wad za nəbdəd dat Əməli-nana Yaysa assaɣa wa du-z-asu?

²⁰ Awalla kawanay a imosan abarag-nana, təmosam deɣ əssəbab ən təfalawist-nana.

3

¹ Awen da fəlas imədrayan-nana, təgmad-ana təzaydart n əsəgəd wen, nəssof ad naqqam ɣas-nana nak əd Silfanus dağ əyrəm n Atena.

² Təzzar nəzammazal-in amadray-nana Timotay, imosan əmadhal dağ əşşəxəlan win Məşşina, tan imosan əzəwwəziwəz ən salan n Əlinjil n Əlməsix, y ad isəssuhət əzəgzan-nawan aləm-awan fəl man,

³ fəl a kawan-wər-iggəz i oyyan iman-net issəfəl-du dənnəg-əs ətəwədgaz wa təgam. Təssānam iman-nawan as ətəwədgaz wədi iha aratan win as otas Məşşina harwa dağ tizarat as a danağ-əgrəwan.

⁴ Harwa ħur-wan nälla nəyyəwan-awan igi daw aħaf âs itiwatas ad nətəwədgəz, amaran arat wa, təssânam as ənta iman-net a igan əmərədda.

⁵ Awen da fəl di-təgmad təzaydart n əsəgəd, təzzar zammazalaħ-in Timotay y a di-d-abəz isalan n əzəgzan-nawan, fəl təkşəda n ad təfətəqqəm daħ taftawen n Ğnəjjerrəb abbannan əşşəħəl issohen wa nəga.

⁶ Mişan əmərədda Timotay səket sər-anaq qawan-d-ifal, nəgraw ħur-əs əmərrəgəz-nawan olâħan. Imal-anay iduf wa təgam əzəgzan-nawan, əd tara ta kawan-təhat, d as təkittəwam-ana s əlluħ. Təsıdaranam wəllen a dana-tələsam anay, arat wa, ənta a nəga nakkanay da.

⁷ Ğmmək en daħ as imədrayan-nana, şirəmmaħ, əd tarsəmmawen kul şin nəga, təkfâm-ana təsasmit s əzəgzan-nawan.

⁸ Awalla əmərədda əqqalan-ana-du man-nana, fəlas kawanay təglâyam daħ tərtəyt-nawan d Ğməli.

⁹ Mas nəfrag igi-net y ad nəggudəy i Məşşina daħ talħa-nawan əd tədəwit tagget ta sər-naħ du-tewayam dat-əs?

¹⁰ Ehad ezal nətansay Məşşina əs gəlleyat a danaħ-akfu turagat n a kawan-nələs anay, d a kawan-naknu əsəssəgri fəl ad isuhət əzəgzan-nawan.

¹¹ Aħədət Məşşina di n Abba-nana d Ğməli-nana Ƴaysa, tarrayt ta dana-za-təsəmmənəyat dər-wan!

¹² Kawanay amaran aget Ğməli əşitəy aggen y ənəmərə wa təgam gar-ewwan, əd tara ta təgam y əkkulluk n aggadəm, zund əmmək as nakkanay da nəg-awan tara wər nəla əddukad.

¹³ Isəssuhətət Ğməli iduf-nawan, fəl ad təqqələm imizdagan, wər nəla əlħib waliyyan dat Məşşina di n Abba-nana, əzəl wa du-z-iqqəl Ğməli Ƴaysa iddew d aytedan kul win-net. Amin.

4

Ammaran

Təməddurt toħâdat

¹ Imədrayan-nana, nəssosan-kawan əmmək was za tagim təməddurt ta daħ za təgrəzam i Məşşina, amaran harwa əmərədda da awen daħ as təlkamam. Ğmərədda nəgmay daħ-wan əs gəlleyat s esəm n Ğməli Ƴaysa ad təşşitim daħ anamod wen.

² Nəzzidgaz-kawan daħ awen fəlas təssânam awas kawan-nomar s ənta a danaħ-issəwar Ğməli Ƴaysa.

³ Arat wa ira Məşşina, ad təqqələm imizdagan ogaznen iman-nasan daħ igi n əzzəna.

⁴ Ɛkkulluk n iyyan daɣ-wan ittəfet tanat daɣ təɣəssa-net əs tazdak n əwəl d əzzəbun.

⁵ Taqqamim da wər təlkemam y arak deranan ən tara ən man, zun awa taggin nəmməzray wər nəssen Məşşina.

⁶ A kawan-wər-iggəz i igân iba n tidət y əmidi-net daɣ batu tədi wala idləm-tu. Fəlas Ɛməli ad awwaddab awedan kul wa igan arak mazalan zun win di. Arat wa dat əzəl da nəg-awan-tu daw aɣaf.

⁷ Ɛnta Məşşina wər danaɣ-ira ammadas, kalar tazdak a danaɣ-ira.

⁸ Awen da fəlas awedan wa din-igaran ammaran win, wədi wərgəɣ awedan a inkur, kalar awedan wədi Məşşina a inkur s ənta a kawan-ikfan Infas-net Zəddigan.

⁹ Daɣ talɣa ən tara ta gər mədrayan, wər təddəraram i dawan-in-iktaban širawt, fəlas Məşşina a kawan-issosanan kawanay iman-nawan ənəmərə gar-ewwan.

¹⁰ Fadda ənəmərə wa ənta iman-net a təsannafalalam i mədrayan-nana kul win akal ən Masedonəya. Mišan nəgmay daɣ-wan əs gəlleyat ya imədrayan-nana, ad təsatim daɣ əsəkni ən tara ta.

¹¹ Ɛqqələt aytedan wər nədgez ar daɣ igi ən təməddurt təgât daɣ alxer, tannattafam d əşşəɣəlan-nawan, ad təgammayam təməddurt daɣ təɣurad-nawan. Adi da as kawan-nomar.

¹² Ɛmmək di daɣ as sər-wan du-z-awəy alxal-nawan ətəwəsəɣmar daɣ aytedan win wər nəmos əlməsixitan, təqqələm aytedan wər nəmos əzuk y awedan waliyyan.

Isalan ən tanakra ən nəmməttan

¹³ Imədrayan-nana, nəsidaran ad təssənam awa imosan tidət daɣ talɣa n aytedan win aba, fəl ad wər təqqələm aytedan as əɣşadan man-nasan, zun awa igrawan aytedan win hadatnen wər nəga attama-nasan daɣ wala.

¹⁴ Dad zamas nəzzigzan as Ɛaysa aba-tu inkar-du daɣ təmattant, wədi ad nəzzəgzən as Məşşina a d-issuxəl əs tarrayt ən Ɛaysa aytedan win aba, əqqələn-du əddewan əd Ɛaysa.

¹⁵ Arat da wa dawan-za-nəməl daɣ awa danaɣ-isannafalal Ɛməli: Nakkanay win du-za-tagəz tewaylay n Ɛməli nəddar, wər za nagu wala arat ən tizart i win aba.

¹⁶ Fəlas Ɛməli iman-net as du-z-azzabbat daɣ jənnawan ɣur əkuray, imosan əməsli n angalos wa zəwwəran, d anasay n asək ən Məşşina. As iga adi aytedan kul win aba əzzigzanan s Ɛlməsix, əntanay a du-z-izarnen tanakra.

¹⁷ Dəffər adi nakkanay win d-ogaz alwaq wen nəddar, a dər-san nidaw nəmmidkal daɣ təgnawen, nəssəlkəd y Ɛməli daɣ alhawa, nəməl ɣur-əs har faw.

18 Dağ adi əqqəlanet salan win arat a du-tətinəməsəktim gar-ewwan, imos-awan ares ən təfalawist.

5

1 Wər təddəraram imədrayan-in i dawan-in-iktaban dağ talxa n azzaman wala assaxat ta dağ z'agin aratan win.

2 Fəlas təssânəm iman-nawan as əzəl wa ilkaman a d-agu assa wər nəla şisənnəfray, zund abaydag a d-idâlan ehad.

3 As ənnan aytedan: «İket alxer, iket iba ən tazak waliyyat»! Amazay wen da dağ fall-asan du-z-azzabbat alwaba ihân samal ən təlawayt ta du-tətasat tantut tətəggazat amzur, amaran wər z'əfrəgan əderrəg y-as.

4 Mişan kawanay, imədrayan-in, wərge şiyay a təham əngəm a dawan-itaggu əzəl wədi təxdərt ta n abaydag.

5 Ənta ketnawan as təmosam bararan n ənnur, təmosam bararan n azal: Wərmad a danax-ila ahad za wər danax-əlenat şiyay.

6 Dağ adi ad wər nətaggu etəs wa taggin aytedan win hadatnen, kalar nəqqəlet aytedan okaynen as əkkulluk n arat əttâfan dağ-as alwasat.

7 Win nassinen, ehad ad nassin, amaran win tamaswadnen, ehad ad samaswadan iman-nasan.

8 Mişan nakkanay a mosnen ənnur, nəqqəlet aytedan əttâfnen alwasat dağ arat kul, təzzar nagu əzəgzan əd tara ağər ilsân idmaran-nana, iqqəl-ana dəx attama n efsan wa nəga təkəbbut ən təzoli ta n əməgər,

9 fəlas Məşşina wər danax-otes temsay, kalar efsan a danax-otas əs tarrayt n Əməli-nana Ƴaysa Əlməsix

10 aba fəl əddəlil-nana, fəl ad iqqəl as nəddew dər-əs dağ təməddurt gər za nəddar wala dəx ab-ana.

11 Awen da fəlas akkiyyan dağ-wan issəsmədet əwəl n əmidi-net, tənəmədhəlam gar-ewwan dağ əşitəy n əzəgzan-nawan zun awa da tətəggim kala da.

Ənnəsixa wa ilkaman

12 Nəgmay dağ-wan ya imədrayan-nana, ad tətəggim a iknan əlluğ y aytedan win dağ-wan əşxalnen id Əməli a dawan-tan-d-isannafranan y a dawan-izaran, agin-kawan dağ tarrayt-net.

13 Nəgmay dağ-wan a dasan-tagim sağmar aggen igân əs tara fəl əşşəxəl wa taggin. Iməlet alxer gar-ewwan.

14 Nəgmay dağ-wan dəx imədrayan-nana, ad tərəqqamam y aytedan win məssəndad, tətəggim ənnəsixatan olaynen i win əksannen iman, tədahhəlam inərkam, təqqəlam iməzəzzəydar y aytedan kul.

15 A tu-wər-iməl awedan izzizalan təkma s iyyat, kalar gammayat faw igi n awa olağan, gər za gar-ewwan kawanay iman-nawan, wala deḡ gar-ewwan d awedan a iqqal.

16 Eqqələt aytedan as faw filawasan.

17 Ad wər tammazzayam d igi ən təwatriwen.

18 Ekkulluk n alxalat fall-awan təgat, ad tətigudəyam i Məššina. Ənta əddi da arat wa fall-awan ira Məššina fəlas tərtayam əd Ƴaysa Elməsix.

19 Ad wər təgaddalam y Infas wa Zəddigan a kawan-ismələwləw.

20 Ad wər tətalkim awa gannin ələwlitan,

21 kalar arat kul nazzarat daḡ-as, təttəfam daḡ-as awa olağan.

22 Nəməggəgat əd təkma ketnet, a təqqal.

23 Nəgmay daḡ Məššina a ihakkin alxer, a dawan-əgü əzəzdəg ikmâlan ənta iman-net, agəz-kawan əmmək wa təmosam, gər iman-nawan wala iwallan-nawan, wala taḡəssa-nawan, təqqələm aytedan as tu-wər-illa i ifragan a sər-san annu ark arat, har d-asu Əməli Ƴaysa, Elməsix!

24 Məššina kawan-d-îḡrăn əs man-net, alḡadil a imos, amaran ənta z'əgin əddi.

Assalaman

25 Tattarat-anax-in imədrayan-nana:

26 Səsləmat-in imədrayan-nana kul tassaknim-tan-in tara ta n tidət.

27 Egmaya daḡ-wan fəl udəm n Əməli, ad taḡrim širawt ta i mədrayan-nana kul.

28 Izazzabbat-du fall-awan Əməli-nana Ƴaysa Elməsix arraxmat-net!

Şirawt ta n sanatat iktab Buləs i Kəl-Tesalonik

Assalaman

¹ Şirawt a din-təfâlat nak Buləs əd Silfanus əd Timotay. Nəhul-in Əlkənisat ta n əxrəm ən Tesalonik təmosat tamat-tay tərtaşat əd Məşşina di n Abba-nana, d Əməli Үaysa Əlməsix.

² İkf-iwan Məşşina di n Abba-nana d Əməli Үaysa Əlməsix arraxmat d alxer.

Əşşərixa wa z'agin xur tawaylay n Əlməsix

³ İmədrayan-nana, iwâr-ana ad nətigudəy i Məşşina faw dağ talya-nawan. İmos adi arat as inihagga a tu-nagu fəlas əzəgzan-nawan a itittəyan wəllen, itittəy əntada ənəmərə-nawan.

⁴ Adi da a fəlas nakkanay iman-nana nəsanamal fall-awan dağ Əlkənisaten şin hadatnen ən Məşşina. Nəmmâl zəmmerat-nawan d əzəgzan-nawan dağ ətəwədgaz kul wa tatawaggam d arkanay wa tənnayam.

⁵ İsitadda adi aqqad n əşşərixa ən Məşşina, amaran adi da a kawan-z-issəhəran əd tağmar-net ta fəl tənnayam arkanay.

⁶ Arat oğâdan xur Məşşina a imos ad izzəzəl dağ win kawan-zaxəzzabnen.

⁷ Amaran kawanay win tağəzzabnen əmərədda, a kawan-akfu təsasmit akf-anaq-qat nakkanay da. Arat wa, ad agu assaxa wa du-z-inəfiləl Үaysa Əlməsix ifâl-du jənnawan ənta d angalosan-net əlanen tarna,

⁸ dağ ammas ən təmsay təbilaglagat fəl ad awwaddab aytedan win wər nəssen Məşşina, ugayan əs ləkkum y Əlinjil n Əməli-nana Үaysa Əlməsix.

⁹ Attadib-nasan, ad iqqəl ahluq ixlâlan, nəməggəgan d Əməli-nana. Wər dasan-ilkem anay ən tanaya ən tarna-net.

¹⁰ Adi kul ad agu əzəl wa du-z-azzabbat Үaysa iha ammas n aytedan win mizdagan əd win sər-əs əzzəgzannen kul fəl ad t-əssəxməran ad t-əmmalan. Kawanay da a tan-təggəzam əzəl wədi fəlas təzzigzanam isalan win dawannəga.

¹¹ Adi a fəl dawannətansay Əməli-nana faw a kawan-issəhəran əd tarrayt ta daq-qawan iga. Nəgammay dağ-as ad assandu əs tarna-net deranan-nawan kul win olaxnen, agu değ əzəgzan-nawan arat təha tənfa.

¹² Eddi ad za tæssəxməram esəm n Əməli-nana Ƴaysa, issəxmər-kawan ənta da s arraxmat ən Məşşina d Əməli-nana Ƴaysa Əlməsix.

2

Əzəbbi n Əlməsix

¹ Imədrayan-nana, dağ batu ta təqqalat əzəbbi wa du-z-agu Əməli-nana Ƴaysa Əlməsix əd tidawt ta za nagu ƣur-əs, nəgmây dağ-wan:

² Ad wər ašəw awedan waliyyan əd tayttay-nawan, wala təşşəwəşam fəl əddəlil ən batu as itiwanna isinafalal-ənatat-du Məşşina s Infas-net wa Zəddigan, wala təşşəwəşam fəl əddəlil ən batu nəgâ dağ anamod wen, wala deƣ şirawt iyyat as dawan-itiwanna nakkanay a din-təfal nəmmal dağ-as əs əzəl wa ilkaman ewad-du.

³ A tu-wər-iməl əmmək as kawan-issəxrak awedan, fəlas əzəl wədi wər du-z-asu iket wər tənayam əfəlləg, təzzar inifiləl Ənəmməzrəy as itawannu In-Tajat as təsəlkamt-net ahluq.

⁴ Imos azangaw ən Məşşina a z'ammazrayan arat kul was itawanna ifəl-du Məşşina əd wa itawağbadan, agu iman-net dənneğ-san. Fadda ad aqqam dağ Ahan wa Zəwwəran n Əlğibada, agu iman-net əməli.

⁵ Awak takatawt a wər tətəggim as dawan-əmalay aratan win ketnasan harwa ƣur-wan əlle?

⁶ Amaran əməərədda təşşanam awa t-in-iwağan fəl a du-wər-inafalal iket wər d-osa alwaq-net.

⁷ Wala əməərədda da təmazrəyt tətawamazal daw amağal, əngəm in za əs ab'as t-illa wa tat-in-iwağan.

⁸ Amaran inəfiləl-du In-Tajat mišan əs d-osa Əməli Ƴaysa a dağ-as ikkəs iman s Infas-net, assabu tamayyamayt-net s əmələwləw n assa-net.

⁹ Assa n In-Tajat a d-agu əs tarrayt n Aşşaytan iddew d əzzənəfan aggotnen ən təlməğjujaten d alğalamaten əd təjujab əmosnen bahutan.

¹⁰ In-Tajat iddew d əkulluk n abakkad issixrakan aytedan win z'əhləknen, fəlas wər əqbelan za wər əren tidət ta təfrəgət əsəfsi-nasan.

¹¹ Eddəlil-net a fəl dasan-d-issəgla Məşşina tarrayt təsaxrakat, fəl ad əzzəgzənan əs bahu,

¹² fəl ad awwaddaban win wər nəzzəgzan əs tidət, əssofan ləkkum y awa wər noğed.

Akniwat əzəzzəwi dağ əzəgzan-nawan

¹³ Nakkanay amaran imədrayan-nana ən maran n Əməli, iwâr-anay ad nətigudəy faw i Məşşina dağ talğa-nawan fəlas kawanay təzzar a isannafran Məşşina y ad təgrəwam

efsan s əzəzdəg wa itaggu Infas ən Məşşina d əzəgzan əs tidət.

¹⁴ Awen da as kawan-d-iyra s Elinjil wa dawan-nəmal fəl ad təgrəwam tanaya n Əməli-nana Ƴaysa Əlməsix.

¹⁵ Dağ adi imədrayan-nana, zəzzəwətət dağ iduf n əsəssəxri wa dawan-nəga gər za s əmi wala da əs šira šin dawan-in-nəktab.

¹⁶ Amaran nəgmây dağ Məşşina di n Abba-nana d Əməli-nana Ƴaysa Əlməsix iman-net danağ-ərânen, əkfân-ana s arraxmat təsasmit təxlâlat d-igi n attama issohen,

¹⁷ a kawan-akfin təsasmit n əwəl, səssuhen-kawan fəl ad təfrəgam əmazal əd tənna n awa olağan.

3

Taggiwat šiwatriwen

¹ Əmərədda imədrayan-nana, tansayat-anax-in Məşşina, fəl ad iwəziwəz awal n Əməli itəwəgg-as sağmar wa das-itawaggan çur-wan.

² Əgməyat ənta da dağ Məşşina a danağ-ogazan dağ zənga əd nəzzulam fəlas wərgəç aytedan kul a əttafnen əzəgzan.

³ Mišan, Əməli alyadil a imos, ənta a kawan-z-isəssuhen ağəz-kawan dağ İblis.

⁴ Nəga attama s esəm n Əməli as tətamazalam awas kawan-nomar taglim deç tətamazalam-tu.

⁵ Issədəget Əməli iwallan-nawan sa sər tara ən Məşşina əd zəmmerat ta ihakku Əlməsix.

Batu təqqâlat aytedan win məssəndad

⁶ Imədrayan-nana, nomâr-kawan fəl udəm n Əməli-nana Ƴaysa Əlməsix s ad tənəməggəgam əd məzzəgzan kul win məssəndad, wər əlkeman y awa tan-nəsassaçra.

⁷ Kawanay iman-nawan, təsşanam wəllen as immikkan ad tataggim awa nətəg. Harwa a çur-wan nəlla, wər nəmos iməssəndad.

⁸ Wər nəgmay dağ waliyyan dağ-wan a danağ-işatşu bannan, kalar nərça s anay n arkanay d iduz labasan, nəşxâl ehad ezal fəl ad wər nəqqəl əzuk i waliyyan dağ-wan.

⁹ Wər dana-isassaga adi iba ən təla n alxaç n a dana-tilalam, kala ar nəg-ay fəl a dawan-nəqqəl almasal.

¹⁰ Harwa kawan-nəha, nomâr-kawan s as: Wa ugayan s əşşəxəl, ad wər atşu.

¹¹ Amaran əmərədda nəsla as ahân-kawan aytedan əglânen əs tamajalladat, wər tan-iha ar iguz ən taçawşiwen a tan-wər-nəqqəl.

¹² Aytedan win di nomâr-tan, nəgmây day-san deɣ s esəm n Əməli Ƴaysa Elməsix, ad agin əşşəxəl-nasan əs tənagrit fəl ad atşin day əşşəxəl ən fassan-nasan.

¹³ Amaran kawanay imədrayan-nana, ad wər təddəzam igi n awa olaɣan.

¹⁴ Kud ih-iwan awedan wər nəlkem y awa nənna day şirawt ta, əssənət-tu, a tu-wər-təməl tassaɣ waliyyat gar-ewwan dər-əs, fəl ad ikərukəd.

¹⁵ Dər iga adi da, a das-wər-tagim iduf n azangaw, taggat-as ənnəsixa wa za tagim y amadray-nawan.

Şiwatriwen d assalaman

¹⁶ Akfet-kawan Əməli n alxer ənta iman-net alxer faw day arat kul, ilal-awan ketnawan.

¹⁷ Əfus wa-nin iman-in a iktaban awa: Şihulawen a din-əgmadnen Buləs. Awa da a imosan ejwal ən şira-nin kul. Emmək wə da as tanat-kattaba.

¹⁸ Məşşina ya təkfeq-qawan arraxmat n Əməli-nana Ƴaysa Elməsix.

Širawt ta tazzarat iktab Buləs i Timotay

Šihulawen

¹ Awa nak Buləs, anammazul n Elməsix Ƴaysa s ammar ən Məššina di n Ənəssefsi-nana d Elməsix Ƴaysa wa daƷ nəga attama-nana.

² Əhulax-in Timotay imosan barar-in wa n tidət daƷ əzəgzan əs Ƴaysa Elməsix. Əgmâya daƷ Məššina di n Abba, d Əməli-nana Elməsix Ƴaysa, a fall-ak d-izazzabben arraxmat, əd təhanint, d alxer.

Arraxmat ən Məššina əd təbəllant ta tolayat

Ərruymatan fəl səssəyritan win saxraknen

³ Ƴur iki-nin akal ən Masedonəya, əgmâya daƷ-ak ad taqqama daƷ əyrəm n Efez, fəl ad təzzərəzaƷ isəssəyritan saxraknen, a daƷ-as taggin aytedan wiyyad.

⁴ Ann-asan ad ammazzayan əd ləkkum i mayyan ən Kəl-Əlyəhud, əd masnat n əsmawan n aljadan, wər nəla təzərəst! Aratan win wər du-tiwəyan ar tamazaq wər təha əlfaydat waliyyat, edag a n ad ədgəzan daƷ iduf n aratan win isəbdad Məššina daƷ tarrayt ta n əzəgzan.

⁵ Elməxsud n awas kay-omarax əddi, a tu-təməl tara daƷ aytedan s əwəl iyyanda, d ənnəyaten olaxnen, d əzəgzan wər təha təmənufəqa.

⁶ Aytedan wiyyad namaggagan d əššərədan win, fataqqen daƷ igi ən batuten šiyyad wər nəla əlmaƷna waliyyan.

⁷ Sidaranan ad əqqəlan imusanan n əššərixa wa n Əttawret, ənta wərmad əgrân awa gannin wala deƷ aratan win as əššewalan əkkasan daƷ-san aššak.

⁸ Nəssân as əššərixa wa n Əttawret olâx as das-ilkam awedan s əllux.

⁹ Nəssân deƷ as əššərixa wər d-osa fəl əddəlil n aytedan win oƷadnen, kalar osâ-du fəl əddəlil n arak aytedan, əd nəmməzray, d aytedan win wər nəksud Məššina, əd win nasbakkadan əd win wər nəha əddin əd maggan n əlfawaxišan əd win əganen iman n əbbatan-nasan d annaten-nasan əd win maggan ən man

¹⁰ əd maggan n əzzəna, əd win tinəməgginen əzzəna gər za meddan gar-essan, wala šidoden gar-essanat, d aytedan win din-zanzinen wiyyad, əd nəsbuha əd win tagginen təhuday ən bahu, d aytedan kul win əmməzraynen əsəssəyri wa isxan.

¹¹ Æsæssæȝri wædi, igmâd-du Ælinjil en Mæššina ilân albaraka ila tanaya. Ælinjil en da a dær-i isannattaf.

Igodan en Bulas i Mæššina arraxmat-net

¹² Eggodayaȝ y Ælmæsix Ȝaysa æmæli-nana a di-issæfragan igi n æššæȝæl-in, fêlas æsønnæhi a di-iga æd tæflæst, isannafran-i fêl a das-æšȝæla,

¹³ nak was harwa das-wær-ælkema tibuduraq-qu, sakna inalkiman-net arkanay, rabbadaq-qan, mišan ihanattat-i fêlas æljêhêl d iba n æzægzan sær-æs a daȝ ægeȝ awen.

¹⁴ Tæzzar isannahal-i Æmæli-nana tehakkay n arraxmat-net, ikf-i deȝ æzægzan æd tara win sær-na du-tætaway tassaȝ æd Ȝaysa Ælmæsix.

¹⁵ Batu ta, igmâd-tat aššak, têhor deȝ d i tat-izzægzanan ketnet tæmosat as: Ælmæsix Ȝaysa osâ-du æddænet fêl ad assafsu inasbakkadan as nak eȝaf-nasan.

¹⁶ Mišan ihanattat-i Mæššina, fêl a sær-i assaknu Ælmæsix Ȝaysa nak a oȝaran inasbakkadan, tazaydart-net ket-net, æqqælæȝ almasal y aytedan win sær-æs z'æzægzænne ægræwan tæmæddurt ta tæȝlalæȝ.

¹⁷ Ya Æmænokal n Amæȝlol
Wær nætæmættæȝ har faw
wær itæwænæȝ
Wær ila æmidi.
Sæȝmar d ædkul kul
kay a dær-san ihoran har faw.
Amin!

Awa iwaran Timotay

¹⁸ Ya barar-in Timotay, ænta da arat was kay omara, amaran inimannak æd batuten šin fall-ak æȝan ælæwlitan dat awa æs tilalt n Infas en Mæššina, imosan as, batuten šin di æȝ-enat tæzoli-nak daȝ æmæȝær olâȝan wa tæȝe d aytedan win safræȝnen awal en Mæššina.

¹⁹ As tætagȝaȝ adi tættafaȝ æzægzan-nak, tæzinamazlaya wællen gær awa olæȝan d awa wær noleȝ. Aytedan wiyyad teway-du sær-san tugæȝt s adi as ibarajjat æzægzan-nasan.

²⁰ Aytedan win di ih-en Himani d Alaskandær. Oyyeȝ Aššaytan orn-en fêl ad aknin, ammazzayan d ikus en tarna i Mæššina.

2

Ænnizam n Ælkænisat

Æȝyibada daȝ Ælkænisat

¹ Ɛgmâya daɣ-wan daɣ adi ad tɛgammayam daɣ Məššina a iknan tumaɣlaten n aytedan, tətattaram, tətansayam-tu y aytedan kul, tətigudəyam-as awa iga y akk awedan.

² Ad tətaggim adi da i mənokalan d aytedan kul win əhanen taɣmar fəl ad nagu təməddurt tədrârat, iha alxer daɣ nəksud Məššina d əzzəbun daɣ əkkulluk n anamod.

³ Adi a olaɣan, igray y Ɛnəssefsi-nana Məššina,

⁴ irân əsəfsi n aytedan kul, awədan masnat ən tidət.

⁵ Fəlas Məššina iyyanda ɣas a t-illan, awedan deɣ iyyanda, a t-imosan Ƴaysa Ɛlməsix a imosan almawakkil gər Məššina d aytedan;

⁶ ikfa iman-net, fəl ad addarfen aytedan kul.

Ɛnta den da tɛgəyya ta iga Məššina daɣ alwaq was imal.

⁷ Tɛgəyya ten da as di-isannafran Məššina y a tat-aga. Igi əməggi ən salan n Ɛlinjil, d anammazul. Issok-i aytedan win wər nəmos Kəl Ɛlyəhud y a tan-sassaɣra awa iqqalan əzəgzan əd tidət. Awa ənne da, tidət a imos, wərgə bahu.

⁸ Daɣ adi, daɣ adag kul, as təddewam y əlɣibada, əgmâya daɣ meddan ad tattaran ədkâlan ifassan-nasan s əwəl zəddigan wər iha alham wala əsəmməsəndəd.

⁹ Ɛmmək en da as areɣ ad tagginat tədoden telassay təzzibanat, tətârat, təhât edag. Ad wər ədləgnat iman-nasnat əs lətfan əmmittaynen, wala s urəɣ əd təssaɣeren madeɣ tabdoq təkñât əzzəwi.

¹⁰ Kalar ədləgnatet iman-nasnat əs mazalan olaɣnen win tagginat tədoden šin əksudnen Məššina.

¹¹ Daɣ alwaqan win əsəssəɣri n əljəmaɣat, tantut iwâr-tat ad tədrər taknu əsəsəm a daɣ təbbirdag y əməsəsəssəɣri.

¹² Wər əkfe tantut turagat n əsəssəɣri wala da tizart y aləs. Kalar iwâr-tat əsəsəm.

¹³ Fəlas Adəm a d-ixlak Məššina daɣ tizarat, dəffər adi ixlak-du Xawa.

¹⁴ Harwa, wərgə Adəm a issəxrak Iblis; kalar tantut a issəxrak, təqqal tənəmmezrəyt.

¹⁵ Mišan ya ad tɛgrəw əlɣillas s əssəbab n as tətalu bararan. Amaran šidoden ad əɣləsnat as zazzawatnat daɣ əzəgzan-nasnat, təh-enat tara, əgânat alxal zəddigan, əgânat awen daɣ əzzəbun.

3

Imuzaran n Ɛlkənisat

¹ Illikan as awedan was imos amadammad-net tišit n əmuzar ən nalkiman ən Ƴaysa, əššəɣəl ihossayan a ira əddi.

² Æmuzar n Ælkənisat iwâr-tu a tu-wər-illa i ifragan a daḡ-as d-inəy ark arat, izlâf tantut iyyadda, iḡdal i təntut-net, imos awedan səmmidan, innoda daḡ əwəl-net, ila əzzəbun, ih-ay amagaru, ifrag wəllen əsəssəḡri.

³ Wər t-itəqqəl əməšwi n esmad wala awedan n əməkkənnəs. Kalar əmuzar n Ælkənisat iwâr-tu ad imos awedan ilân aladab, wər imos ənadlam, wər iwwəlat azrəf.

⁴ Iwâr-tu ad ittâf s əlluḡ tanat n aḡaywan-net, əbbirdagan bararan-net, iga awen s əzzəbun.

⁵ Awak awedan wa wər nəfreg ənəttaf ən wala aḡaywan-net, manəmmək as z'issən daḡ nalkiman ən Ƴaysa?

⁶ Ad wər iqqəl awedan as səket ilkam i Ƴaysa fəl ad wər idkəl iman-net dənnəḡ aytedan təzzar udu daḡ tədləmt ta daḡ iggədlə Iblis iman-net.

⁷ Iwâr-tu ad imos awedan əflâsan aytedan win wər nəmos əlməsixitan, fəl a tu-wər-iməl i ifrâgan a daḡ-as d-inəy ark arat, ifətəqqat daḡ taftaw n Iblis.

Imadhalan n Ælkənisat

⁸ Imadhalan n Ælkənisat, əntanay da iwâr-tan ad əttafan əzzəbun-nasan, təssiflas deḡ batu-nasan. Ad wər iqqəl alxal-nasan tessay n esmad wala tattan alxaram.

⁹ Iwâr-tan ad zizawen daḡ tidət ta tənafalalat təhât əzəḡzan s Ælməsix, ilen ənnəyaten zaddoggen.

¹⁰ Təwəjərrəbanet təzzar, dəffər adi kud wər t-illa i ifragan a daḡ-as d-inəy ark arat, assantın əššəḡəl wa n tišit ən madhalan.

¹¹ Emmək en daḡ as šimadhalen n Ælkənisat da iwâr-tanat ad əlânat əzzəbun, wər tizəmnat, sammodnat, əḡdâlnat daḡ əkkulluk n arat.

¹² Æmadhal n Ælkənisat iwâr-tu ad iḡdâl i təntut-net, iga ənəttaf olaḡan i bararan-net d aḡaywan-net.

¹³ Imadhalan n Ælkənisat win tagganen əššəḡəl-nasan s əlluḡ garrawan almaḡam d ikus n aššak ikmalan daḡ əzəḡzan s Ælməsix Ƴaysa.

Əssiran ən tarrayt ta n Æməli

¹⁴ Attama wa əgeḡ n a kay-ənəya tarmad wər di-igdel a dak-in-əktəba isalan win di

¹⁵ fəl ad iqqəl as kud fall-ak in-əlləleḡ, da ad təssənəḡ alxal was imməkkan ad t-agin aytedan daḡ ahan ən Məššina di n Aməḡlol a t-imosan Ælkənisat. Ælkənisat ta ənta a təmosat təḡəttawt ta n təsəkbəlt ən tidət.

¹⁶ Igmâd aššak as əssir wa danəḡ-isannafalal Məššina a t-imosan Ælməsix, i zəwwəran:

Inafalal imos awedan.

Iḡḡəyyat Infas ən Məššina as oḡâd.

Ʒnâyan-tu angalosan.
 Tiwaggan salan-net
 y aytedan win wər nəmos Kəl-Ʒlyəhud.
 Ʒzzigzanan sər-əs aytedan daƷ əddənet ketnet.
 Immədkal əs jənnawan əs tanaya.

4

ƷsəssəƷri wa olaƷan d amaššəƷal n Ʒlməsix

ƷrruƷmatan fəl səssəƷritan ən bahu

¹ Dər iga awen da ya Infas imâl s əlluƷ as daƷ azzaman win əlkamnen, aytedan wiyyad ad ammazzayan d əzəƷzan s Ʒlməsix, əlkaman i kələsuf saxraknen, əd təssunen n Aššaytan.

² Təssunen šin əfâlnat-du inəsbuha n əlmunafiqan, əs əmmutan wallan-nasan,

³ əgdâlan azalaf, ərƷâman fəl tattay ən wiyyad imensewan as Məššina a tan-d-ixlakan fəl a tan-atšin aytedan win əzzəƷzannen əgğodayan i Məššina, ətanay a əssanen tidət.

⁴ Fəlas awa d-ixlak Məššina kul olâƷ. Wər t-ihə a xaraman, igğudəyet Ʒas awedan i Məššina təzzar atšet awa ira.

⁵ Id izzizdak-ku awal ən Məššina əd təwatray.

AmaššəƷal wa olaƷan ən Ʒaysə Ʒlməsix

⁶ As təmmâləƷ isalan win dak-əge da i məzzəƷzan, ad təqqələ amaššəƷal olâƷan n Ʒlməsix Ʒaysə, iddaran s Ʒlinjil imosan ənəfilal ən Məššina daƷ Ʒaysə, əd təssunt tolâƷat taš təsle.

⁷ Ad wər təsasamaƷ i mayyan ən bannan əmmizraynen awal ən Məššina. Kalar səlməd iman-nak təməddurt ta daƷ tosaƷa əd Məššina.

⁸ Ʒšinən ən taƷəssa wər tu-taha tənfa tagget, mišan əšinən n əwəl ləkkum y awal ən Məššina, tah-ay tənfa daƷ tarrayt kul, fəlas nəƷarraw sər-əs əmərədda təməddurt tas iga Məššina arkawal-net, nəgrəw-tat deƷ dəffər ibə.

⁹ Batu adi igmâd aššak, tənlihat da sər-əs arđin aytedan kul.

¹⁰ Nənnây arkanay, nəbbillan fəlas nəƷâ attama-nana daƷ Məššina di n AmaƷlol imosan Ʒnəssefsi n aytedan kul, wəllen win sər-əs əzzəƷzannen.

¹¹ Aratan əddi da win as za tətamarəƷ aytedan təsasəƷraƷ-asən-tan.

¹² Ad wər tayyaƷ awedan waliyyan alkik fəl as wər tawaššera. Kalar əqqəl almasal i məzzəƷzan s awa təganna

d alxal-nak əd tara ta kay-təhat d əzəgzan-nak əd tazdak n əwəl-nak.

¹³ Əgməd əs taɣaray n Awal ən Məşşina i məzzəgzan, d əsəhəl-nasan d əsəssəɣri-nasan har din-asa.

¹⁴ Ad wər taqqama wər təşşəşɣala təhəkkut ta təgrawa, ta kay-ikfa Məşşina s awal wa sər-ək iga ələwli iyyan əs tarrayt n Infas ən Məşşina, assaɣa wa kay-əssəwaran muzaran n İlkənisat ifassan.

¹⁵ Aratan win dak-əməla da, ədgəz daɣ-san, fəl ad ənəyan aytedan kul əməttəy wa tətəgga.

¹⁶ Əssən daɣ man-nak, təssəna ənta da daɣ aratan win təsassaɣra, ad wər tammazzaya d igi n adi. As tətəggaɣ adi, ad tassafsəɣ iman-nak, tassafsa deɣ aytedan win dak-sasannen.

5

Awa iwaran Timotay gar-es əd məzzəgzan

¹ Ad wər tətihərəşşey iɣmaran. Tagg-asan ənnəsixa şilat ən wa za taga y abba-nak; tagaɣ i meddan win madrornen ənnəsixa wa za tagaɣ i mədrayan-nak.

² Şiɣmaren ag-asnat ənnəsixa wa za taga y anna-nak. Taga deɣ i tədoden şin madrornen ənnəsixa wa za tagaɣ i təmədrayen-nak, iga awen s əwəl zəddigan.

³ Səɣmər şidoden şin as aba meddan-nasnat wər əlenat əşəqqəɣ a dər-əsnat inəttafan, təssəna daɣ-asnat.

⁴ Mişan kud əlānat bararan madəɣ ihayawan, wədi zəmmizəlanet təksəda-nasan Məşşina s ad əssənan daɣ marwan-nasan, ərzəman-asan əsədwəl wa tan-əgan fəlas adi da igrazan i Məşşina.

⁵ Amaran ta wər nəla i dər-əs, təxsâr əd man-net ənta əddi təgat attama-net daɣ Məşşina, təgammay daɣ Məşşina a iknan tuməɣlaten-net, tətəttar ehad ezal.

⁶ Mişan as imos as tantut as wər idder aləs-net, təga təməddurt a daɣ təlkâm i tara ən man-net, kud imos as təyəssa-net təddar, da fəl aganna wa n tassaɣ-net əd Məşşina şilat n as wər tədder.

⁷ Ənta əddi da awa as kay-iwar a tanat-tətamara sər-əs, fəl a tu-wər-iməl i ifragan a daɣ-asnat d-inəy ark arat.

⁸ Amaran awedan wa wər nəssen daɣ aytedan-net, wəllen win nəmmuray-net, wədi zun as oyya əzəgzan-net, išşam-as fadda awedan wa wər nəzzəgzan.

⁹ Ad wər təktəba tantut as wər idder aləs-net daɣ şin as tətəlal İlkənisat ar s ad təga sədisat təmərwən n awatay madəɣ tokay-tanat, ənta da, wər tat-ides ar azalaf iyyanda.

¹⁰ Əggəyyen deɣ aytedan as tətəg imazalan olaynen, əmosnen əsədwəl olāɣan ən bararan-net, d amagaru, wər

təsassagar iman-net igi n əşşəxəl a iqqal i məzzəgzan, əd tilalt y aytedan win maɣatarnen, d əmazal n arat kul wa olaɣan s əwəl iyyanda.

¹¹ Amaran šidoden šin aynaynen, šin as wər ədderan meddan-nasnat ad wər təqbəla tilalt y-asnat fəlas as daɣ-asnat d-inkar Iblis, ad usafnat azalaf əşşəxəl y Elməsix.

¹² Təzzar ibəz-tanat əşşəriɣa ən Məşšina s agamad wa tanat-iga əzəgzan-nasnat s ənta arkawal-nasnat wa azzaran,

¹³ aqqaminat wər əlenat əşşəxəl waliyyan ar ilum gər nan. Adi ogar-tu âs, a tanat-təggəz šizmit; əşšiwəlnat daɣ taɣawšiwən n aytedan, d aratan as wər imməkkan a daɣ-san šawalnat.

¹⁴ Daɣ adi šidoden šin aynaynen, šin as wər ədderan meddan-nasnat, əssofaɣ ad əzləfnat, ilenat bararan, əssənnat daɣ ɣawnatan-nasnat fəl ad wər əgrəwnat i maksanan-nanaɣ tarrayt n a daɣ-na d-ənəyan ark arat a sər-naɣ ənnan,

¹⁵ fəlas šiyyad daɣ-asnat har âs əxraknat, əlkamnat y Aşşaytan.

¹⁶ Kud təll-ay təlməsixit təlât šişəqqəɣən as wər ədderan meddan-nasnat, təssənet daɣ-asnat, aqqaminat wər əmosnat əzuk y Elkənisat, fəl ad tilal i šin wər nəla i dər-əsnat.

Imuzaran n Elkənisat

¹⁷ Imuzaran n Elkənisat win tagginen tizart tolaɣat əhoran d ətəwəsəɣmar imosan ənətfus, wəllen win tagganen təlxutbat sasaxrin Awal ən Məşšina.

¹⁸ Fəlas a ənnan Elkəttaban: «Ad wər tədbəɣa y azgar wa təşşəşɣala». Ənnân deɣ: «Amaşşayal ihor d alxaq-net».

¹⁹ Ad wər tətattafa taɣtəst tətiwaggat y əmuzar n Elkənisat ar s a *tat-əggəyyen əşšin aytedan madex karad*.

²⁰ Imuzaran n Elkənisat win tagginen ibakkadan, raqqam-asan dat Elkənisat ketnet, fəl ad təggəz tasa əlməsixitan win hadatnen.

²¹ Onsayaq-qay fəl Məşšina d Elməsix ɣaysa d angalosan win isannafran ad təlkəma y aratan win as kay-omara da, daɣ wər təgeɣ arak torda waliyyat, wala təmərıt.

²² Ad wər tərrurəda əsəwər ən fassan-nak awedan, wala deɣ tileɣ adagar daɣ bakkadan n awedan waliyyan. Agəz iman-nak, təttəfa tazdak-nak.

²³ Mazzay əd tassay n aman ɣas, kalar sassu arat n esmad n alɣanab ad anfu adi tadist-nak, anf-ik daɣ təfrəyt ta sər-ək du-təsaylayat.

²⁴ Ællan-tu aytedan as ibakkadan-nasan wær tan-iqqærat arat, tiwassanan harwa dat æššæriða, mišan wiyyad dæffer tærut ad tawanayan win-nasan.

²⁵ Æmmæk en dað as, imazalan win olaðnen wær tan-iqqærat arat, amaran wala win iqqærat arat da wær tæhigin æðbâran.

6

Eklan æd mæssawsan

¹ Ælmæsixitan kul win æmosnen eklan, iwâr-tan saðmar æn mæssawsan wællen fæl ad wær ækkesan aytedan tarnan i Mæššina, wala deð alkin tæssunt ta næsassaðru.

² Amaran win dað-san ælan ælmæsixitan, ad wær assaknin mæssawsan iba æn saðmar fælas dær-san æmosan arat iyyanda dað æddin. Kalar aginet-asan æššæðæl ofân was kala a dasan-tu-taggin, fælas aytedan win garrawnen tænfa n æššæðæl-nasan æddi, æntanay da ælmæsixitan a æmosan sinahalnen ætæwæra.

Ammaran ækkanen Timotay imosan æmaray æs Mæššina

Isæssæyritan æn bahu d æzægzan wa n tidæt

Adi a za tasassaðrað aytedan tæzzædgæzaq-qað dað-as.

³ Awedan wa isasaðran aratan wær næmos win dak-æmala da, harwa wær ilkem y awal wa isxan n Æmæli-nana Ýaysa Ælmæsix d æsæssæðri wa d-itawayan tælyudæla,

⁴ wædi awedan anasbarag a imos n aljahil tæssiran tara æn tamazaq æd takat wær næga ar fæl almaðna n ælxæræfan. Itaraw-du adi manjað æd tamazaq d arak batuten d arak tordaten,

⁵ æd mæzræyan wær nærriz gær aytedan as wær oðednat ænnæyatæn-nasan, tægmæd-tan tidæt. Ægân iduf n âs a tan-isæggærgæs iguz n æddin.

⁶ Mišan illikan as, tæksæda æn Mæššina tæmos tægærgist zæwwærat fælas tæhakk-anay tæmæddurt a dað nægda s awa næla.

⁷ Fælas wær neway wala as du-næggaz æddænæt zund æmmæk en dað as a tat-nægmæd wær neway wala.

⁸ Dað adi, agdet-anay as næla isudar æd talassay.

⁹ Amaran aytedan win æranen tægærgist, tifætæqqen dað jarrabatan, æd taftawen d arak deranan aggotnen a tan-ækmanen, a du-wær-nætiwæy s awedan ar æbæræjji d æhluk.

¹⁰ Tara n æzræf a tæmosat ælæsæl n æššur kul. Ællan-tu aytedan s awa das-ægan dað tara, æxrakan, igmæd-tan æzægzan-nasan, ewayan-du æs man-nasan šimægraz aggotnen.

Ammaran ækkanen Timotay

11 Amaran kay Timotay, imosan əmaray əs Məşşina, darrag y adi ketnet. Əgməy taqqat, əd təksəda ən Məşşina, d əzəgzan, əd tara, əd zəmmerat, əd talmat.

12 Agu təbəllant ta tolağat, təmosat aggaz n əzəgzan. Əqbəl təməddurt ta təxlalat, fəlas Məşşina iyr-ik y a tat-təgrəwax, amaran batu-net a dağ təmalax əzəgzan-nak dat təgəyyawen aggotnen.

13 Omâraq-qay fəl Məşşina a itaggin iman dağ arat kul, d Elməsix Ƴaysa a imalan s əlluğ əzəgzan-net dat Fons Bilatəs,

14 ad təlkəma y awas kay-omara, a daq-qay wər iwer lahan waliyyan, wər t-illa i ifragan a dağ-ak d-inəy ark arat, har d-inəfiləl Əməli-nana Ƴaysa Elməsix.

15 Ənəfilal-net ad agu dağ alwaq wa issənsa Məşşina y awen,

Ənta a ilan albaraka
Ənta Ƴas ənaxkim wa n tidət

Əmənokal ən mənokalan,
Əməli ən malan

16 Wər itəməttəy har faw

Izdâx dağ ənnur

Wər din-itəwəhiz

Wər t-illa awedan as kala ad t-inay

Wala ifrag anay-net

Ənta a ilan saƳmar əd tarna har faw.

Amin!

Awa iwaran iməggərgas

17 Amər win əggərgasnen dağ əddənet s ad wər ədkelan iman-nasan dənəg aytedan wala agin attama-nasan dağ təgərgist wər za nahag. Amər-tan s ad t-agin dağ Məşşina a danax-ihakkin arat kul s igət fəl ad nagu təməddurt a dağ nəddəwat.

18 Amər-tan s əmazal n awa olağan, əggərgasanet dağ mazalan olağan, təggəzet-tan tahakkay, ardinet əs tədrəwt d aytedan.

19 Emmək di as z'əşşidəwan i man-nasan təgərgist a za təqqəlat təsəbdət tolağat y awa d-izayan əzəl a ilkaman fəl ad əgrəwan təməddurt ta n tidət.

Ənnəsixa wa ilkaman əd təhult

20 Ya Timotay, agəz awa kay-issəxlaf Məşşina. Nəməggəg əd batuten ən bannan əmmizraynen əddin, əd tamazayən əgānen dağ təssunt ən bahu.

21 Wiyyad əlməsixitan əlkəmnen i təssunt tədi, əxrakan əmməzzayan d əzəgzan.

Məşşina ya təgeç-awan arraxmat-net.

Širawt ta n sanatat ta iktab Buləs i Timotay

Təhult

¹ Awa nak Buləs, anammazul ən Ƴaysa əs tərəddawt ən Məššina. Iwâr-i amel ən təməddurt tas danaƳ-itawagga arkawal-net əs tarrayt ən tərtəyt d Elməsix Ƴaysa.

² Əhulax-in Timotay imosan zun barar-in əkneƳ tara: Onsaya Məššina di n Abba, d Elməsix Ƴaysa Əməli-nana, a kay-ikfan arraxmat əd təhanint d alxer.

Ammar ən Timotay s ad aglu daƳ əššəƳəl-net

Agoda ən Buləs i Məššina daƳ batu ən Timotay d ammar-net

³ Nak əggodayax i Məššina, s ənta a əƳbada s əwəl iyyanda zund əmmək as t-əƳbadan marawan-in, amaran kittəwaq-qay faw daƳ təwatriwen-in ehad ezal.

⁴ KittəwaƳ iməttawan-nak əkneƳ tara n a kay-ələsaƳ anay fəl ad aknin man-in təfalawist.

⁵ Kittəwa deƳ əzəƳzan wa təgeƳ əs Ƴaysa s a wər nəmos sokni, amaran əzəƳzan wa, ənta təga Lawisa ta kay-təsahhayawat, d anna-nak Anika. ƏkkasaƳ aššak as kay da təgrāwaq-qu s əmmək en da.

⁶ Awen da fəl kay-du-saktaƳ as: sudər təhəkkut ta dak-iga Məššina, s əssəbab n əsəwər wa kay-əgeƳ ifassan.

⁷ Infas wa danaƳ-ikfa Məššina, wər imos Infas ən tasa, kalar Infas a imos ən tarna əd tara d iduf n əzzəbun.

⁸ DaƳ adi a kay-wər-təggəz təkarakit n ad tətagayye fəl Əməli-nana, wala deƳ isəkkərukəd-kay iguz-in kasaw fəl əddəlil-net. Kalar nərtəyet daƳ alƳazab wa tagga daƳ tarrayt n Əlinjil, iga awen əs tarna ən Məššina

⁹ s ənta danaƳ-issəfsan,
ig-ana təxaray zəddigat,
wərgəƳ fəl əddəlil ən mazalan-nana,
kalar fəl əddəlil n awa issəbdad Məššina əs tara-net,
d arraxmat ta dana-tətawakfat əs tarrayt n Elməsix Ƴaysa harwa dat axluk-net əddənət.

¹⁰ Arraxmat ta isannafalal-tat-du əmərədda assa n Ənəssefsi-nana Elməsix Ƴaysa s ənta a ikkasan tarna daƳ təmattant, isammalawlaw təməddurt ta təƳlalət tas itaggu Əlinjil isalan-net.

¹¹ Əddəlil n Əlinjil en da a fəl di-isannafran Məššina ig-i əməggi ən salan, n anammazul n əməsəsəƳri.

¹² Amaran əddəlil n aratan win da, a fəl tawazaxazzabay əmərədda, mišan wər fall-i imos awen təkarakit, fəlas əssana was əzzəgzana, əknex dey ikus n aššak as ifrâg ad agəz taɣlift ta ɣur-əs əle har əzəl a ilkaman.

¹³ Elkəm y almasal wa ihan isalan ən tidət win dak-əgeɣ, təzəzzəwe daɣ-as s əzəgzan əd tara win du-tətaway tassaɣ n Elməsix Ƴaysa.

¹⁴ Taɣlift təhossayat ta təgrawa ɣur Məššina, agəz-tat əs tarna n Infas wa Zəddigan a danaɣ-ihan.

¹⁵ Təssənax âs aytedan kul win akal n Asəya əfalan dəffər-i, harkid Figelus, əd Hermogenus.

¹⁶ Əməli ya təzizabbe du təhanint-nak fəl aɣaywan n Onesiforus, fəlas faw italam-i fəl man, amaran wər ikarakad y iguz-in kasaw.

¹⁷ Kalar assaxa wa din-osa Ɛrrum, iswad-i əs tidət har di-igraw.

¹⁸ Əməli ya təhinattəɣ-as əzəl a ilkaman. Kay iman-nak a issanan wəllen daɣ tilalt ta di-igi daɣ əxrəm wa n Efez.

2

Anammagar wa n tidət n Elməsix

¹ Daɣ adi kay barar-in səssuhət iman-nak s arraxmat ta təhat tartəyt n Elməsix Ƴaysa.

² Amaran arat was di-təsle ənneq-qu dat təgəyyawen aggotnen, sənnəttəf dər-əs aytedan əxdâlnen, əfrâgnen a tu-sassaɣrin əntanay da i wiyyad.

³ Ɛzmər kay da i tadagart-nak daɣ aɣazab fəlas adi da a itaggu anammagar wa n tidət n Elməsix Ƴaysa.

⁴ Awedan imosan anammagar, wər izlay daɣ təɣawšiwen n əddənət sa hadan, fəlas wər igəmməy ar gərrezat y əmənokal-net.

⁵ Zund əmmək di daɣ as ənəbbellen wər inəjjəx ar s ad ilkâm y əššərədan kul win təbəllant.

⁶ Amaran əmagyak wa igan əššəɣəl olâɣan, ənta a itizaran agaraw ən ɣarat.

⁷ Ɛnzər wəllen daɣ awa dak-ganna da, fəlas Məššina a kay-z-akfin əgərri daɣ əkkulluk n arat.

⁸ Kattəw Ƴaysa Elməsix, s ənta a d-itawasankaran daɣ nəmməttan, imos arat daɣ əzzurrəyya ən Dawəd. Arat wa iššewal sər-əs Ɛlinjil wa əmmala.

⁹ Əddəlil n Ɛlinjil en da, a fəl taɣazzaba, har as əgan-i ɣunan iguz a taggin y əjajəb n anasgafa. Mišan awal ən Məššina ənta wər t-əhen ɣunan.

¹⁰ Awen da fêlas æddêlil ên win isannafran Mæššîna a fêl æzmara y arat ketnet, fêl ad ægrêwan æntanay da efsan æs tarrayt n Êlmæsîx Ƴaysa, ægrêwan tanaya tøyilat.

¹¹ Îllîkan as awal wa tidêt a imos:
As dêr-æs nærtay day têmattant ta îga,
a dêr-æs nærtêy dey day têmæddurt.

¹² As næzmar, wêdi a dêr-æs nærtêy day tağmar,
as tu-nênkur, wêdi a danax-unkar ænta da.

¹³ Kud nakkanay wêr næğdel, ænta faw îğdâl,
fêlas wêr z'unkar iman-net.

Amaššaxal itiwaqbalan

¹⁴ Aratan win as tæsley da, sakt-en-du i mæzzægzan tæzzar tægmya day-san fêl udêm ên Mæššîna ad ammazzayan æd tamazaq ên têfir. Wêr tat-têha tênfa waliyyat. Wêr dutêwiwêy ar ahluk n aytedan win das-sasammen.

¹⁵ Gammay wêllen d ad tagax iman-nak alês isitad-dan æzêlulêğ-net dat Mæššîna, têqqêlay awedan wêr nêtêkêrukud day æššêğêl-net, têtaggax îgi oğâdan i salan win tidêt.

¹⁶ Nêmæggêg d awalan wêr nêla almağna waliyyan, æmosan êllid n æzægzan, fêlas win as æmosan awalan win æššêğêl-nasan, îket tahagin kannin ênêmæggag æd tæksêda ên Mæššîna.

¹⁷ Awal-nasan îha êlmital an šiqqest labasat, a dutêjibêrêjjet elam. Aytedan win arat day-san a imos Himani æd Filetos.

¹⁸ Êntanay a sannamaggagnen iman-nasan æd tidêt, ênnan tanakra ên nêmmêttan wêr têmos arat îlkâman, kalar arat okâyan a têmos, takkasan s awen æzægzan day aytedan.

¹⁹ As îga awen šîgêttawen šîn issêbdad Mæššîna, arat a mosnat izizawen, iwâr-tanat ejwal ên Mæššîna imosan batuten šîn: «*Êmêli issan win-net.*» Iwâr-tanat dey as: «Awedan kul wa innan ænta in Êmêli, wêdi iwâr-tu ad ugag arat kul wa wêr noğed.»

²⁰ Ağaywan zêwwêran îhossayan wêrgêğ îkassan n urêğ d æzrêf ças a t-êhanen, kalar êhan-tu win eškan, æd win talaq. Wiyyad za tiwasansan y æzêl a sêr-san iskatan, win hadatnen amaran tiwasataymalan æzêl kul.

²¹ Day adi as îzzêzday awedan iman-net day ark aratan win êmala da, ad immutêg y æššêğêlan a sêr-æs êskâtnen, îqqêl awedan zêddigan têha tênfa i mæššîs, amaran îgâr îri y îgi ên mazalan kul win olağnen.

²² Darrag y arak deranan ên têmmêdrêyt, ad tægammayax æd taqqat d æzægzan æd tara d alxer, tærtêya d aytedan win tansaynen Mæššîna s êwêl zêddigan.

²³ Nəməggög əd təmazayən wər nəla almayna, əmosnat əljəhəl, id təssânaş as ikənnasan a du-tawaynat.

²⁴ Akli n Əməli wər ihor ad ikannas, kalar iwâr-tu ad səmmid y aytedan kul, imos awedan ifrâgan əsəssəşri, tahay tazaydart,

²⁵ iwâr-tu ad itaggu əsəssəşri ləmmidan y aytedan win das-tamazaynen, daş igi n attama n a tan-akfu Məşşina tətubt y ad ənəyan tidət.

²⁶ Əddi a tan-du-za-təqqəl tayttay-nasan ta tolayat, əkkəsan iman-nasan daş taftawen n Iblis a tan-ibâzan, ig-en daş agna-net.

3

Tilkamat n əddənət

¹ Əssən Timotay as azzaman win əlkamnen, a daş-san agin jilan labasnen.

² Əddi aytedan ad ib'as kittəwan ar iman-nasan, iren azrəf, əqqəlan inasbaragan, əzzəzwəran iman-nasan, taggin alfawaxişan, ib'as əbbərdagan i marwan-nasan, ib'as tan-iha agoda, amaran wər z'əssəşmaran aratan win əqqalnen əddin.

³ İkwalan wallan-nasan, wər tan-təha təhanint, jiwanken daş şizmit, wər əlen əzzəbun, əknân aşşar, əgzaran arat kul olaşan,

⁴ əqqəlan iməkkəddal, əlkəman y awa dasan-dəwayan medranan-nasan, ih-en əttəkəbbur wəllen, usafan deranan-nasan i talya ta n Məşşina.

⁵ Ad əttəfan əddin daş azzahir, mişan ad unkaran tarnanet. Aytedan win, nəməggög dər-san!

⁶ Əhan-tan wiyyad as imos alxal-nasan ilum gər şawnatan, tabazan əs taftawen-nasan şidoden şin ərkamnen, ən tənəsbakkaden. Şidoden şin den wər əlkəmnat ar y arak deranan-nasnat əmosnen əzzənəfan.

⁷ Faw da əgammaynat teşaray mişan wər əfregnat masnat ən tidət.

⁸ Əmmək was əmməzrayan maşşaxawan ən Masar əmosnen Yanus əd Yanbres ənnəbi Musa, əmmək wədi daş as əmməzrayan aytedan win di tidət. Meddan win taytwen-nasnat wər tanat-iha ar aşşud, amaran əzəgzan-nasan wər izmer i jarrabatan.

⁹ Mişan wər z'əgrəwan tətəyt waliyyat, fəlas əmməskəl-nasan ad inəfiləl y əkkulluk n awedan, zun awa igrawan Yanus əd Yanbres.

Əgəlli daş əzəgzan ən tidət

¹⁰ Kay amaran, tækneḡ lækum y əsəssəḡri-nin d alxal-in, təssānəḡ wəllen aratan win as ənnəyyeḡ igi-nasan, tənāyəḡ wəllen əzəḡzan-in əd təzəydart-in əd tara-nin əd zəmmerat-in

¹¹ d ətəwədḡaz-in d alyazab-in. Təssāna daḡ arat kul wa di-igrawan daḡ əḡrəm n Antəyoxəya əd wa n İkonəyüm əd wa n Lustra. Məni-tu ətəwədḡaz wa wər əḡeḡ? Mišan ikkas-i-du Məššina daḡ awen kul.

¹² Amaran aytedan kul win miksadan ən Məššina əs tərtəyt n Əlməsix Үaysa, win di ad təwədḡəzan.

¹³ Mišan aytedan win maksanan, n əlmunafiqan, ad šatin daḡ arak mazalan, saxrakan aytedan-nasan, saxrakan iman-nasan.

¹⁴ Kay amaran, aknu əsəḡḡətəkki daḡ aratan win təssana, təkkaša daḡ-san aššak. Təssānəḡ wa dak-tan-issosanan.

¹⁵ Harwa da təmosa barar as təssanaḡ Əlkəttaban win Zaddognen, amaran əfrāḡan a kay-akfin masnat ta tətawayat s agaraw n əlyillas s əzəḡzan s Əlməsix Үaysa.

¹⁶ Əlkəttaban win Zaddognen kul Infas wa Zəddigan a d-əfalan amaran təh-en tənfa daḡ əsəssəḡri n aytedan d aqqad-nasan d ikus-nasan daḡ alxata d əsəssəḡri-nasan daḡ tarrayt ta toḡadat.

¹⁷ Əmmək di as awedan wa imosan əmaray əs Məššina ad ifrəḡ, aknu deḡ əmutəḡ y igi n əššəḡəl kul wa olaḡan.

4

Emel ən salan win tidət

¹ Onsayaq-qay fəl udəm ən Məššina, d Əlməsix Үaysa, s ənta a z'ışrəḡan win əddarnen əd win aba d udəm n ənəfilal n Əlməsix əd taḡmar-net as:

² Ədḡəz daḡ amel n awal ən Məššina əs təməwit daḡ du-wər-tətəqqəla dəffər-ək, ḡər za təḡrawəḡ edaḡ n igi n awen wala. Əqqəl awedan a d-isardın aytedan əs wər əlen tidət, ad təraqqama y aytedan tətamaraq-qan, iga awen əs təzəydart təkmālat d əsəssəḡri iknān.

³ Fəlas əlkāman azzaman a daḡ wər z'əqbəlan aytedan əsəssəḡri wa n tidət təzzar əlkəman y arak deranan, ad šadawan fəl man-nasan iməssəsəḡra a dasan-ganninen aratan kul win as saddaranan tesalay y-asan.

⁴ Ad ədbəḡan šiməzzugen-nasan i tidət, usafan əsəsəm i mayyan.

⁵ Kay amaran əqqəl awedan ilan əzzəbun daḡ əkkulluk n arat, təzməra y alyazab, iqqəl əššəḡəl-nak emel n Əlinjil y aytedan.

⁶ Nak amaran alwaq ən teklay-nin ihoz-du, alwaq ewadu wa daḡ z'akfa təməddurt-in təmos takutay.

⁷ Ɛggâza s ɛllux tɛbɛllant, ɛggâza tammazaga har tɛɣrad, ɛglex ogâzax ɛzɛgzan-in.

⁸ Day adi, awa obazan ɣur ɛmɛrɛdda, tɛtiwasans-i tɛkɛbbut ta n aqqad tɛmosat aroz ɛn wa d-ornan, s ɛnta di-z-akfu Ɛmɛli imosan ɛmašrax wa oɣadan, ɛzɛl a ilkaman. Wɛrgɛx nak ɣas as tat-z-akfu, kalar a tat-akfu y aytedan kul win ɛqqalnen ɛs tara y ɛnɛfilal-net.

Ammaran ɛkkanen Timotay

⁹ Ɛdgɛz wɛllen day a di-du-takka day ɛtrub,

¹⁰ fɛlas Demas igmad batu-nin id issɔf lɛkkum y ɛddɛnet, ikka ɛɣrɛm ɛn Tesalonik. Kreses amaran ikka akal ɛn Galatɛya, Titɛs dɛx ikka akal ɛn Dalmatɛya.

¹¹ Wɛr ɣur-i d-iqqim ar Luɣa. Idaw-du ɛd Markus fɛlas tah-i-tu tɛnfa day ɛššɛɣɛl-in.

¹² Zimazala Tišik s ɛɣrɛm n Efez.

¹³ As du-tɛgle tɛmmɛrax-i-du ɛbɛrnuz wa din-oyye ɣur Karfus day ɛɣrɛm ɛn Trowas, tɛmmɛrax-i-du dɛx ɛlkɛttaban-in, wɛllen win ɛganen day agašek.

¹⁴ Alaskandɛr wa n anad issikn-i arak mazalan aggotnen labasnen. Ɛmɛli a das-z-ixkɛman ɛs mazalan-net.

¹⁵ Kay da ɛnkɛd-as, fɛlas ikna tišit n ɛllid n awa nɛsassaɣru.

¹⁶ ɣur ɛššɛriɣa-nin wa azzaran wɛr t-illa awedan iwâran aganna-nin, kalar awedan kul igmad batu-nin. Məššina ya wɛr tan-tobeza s ɛmazal di.

¹⁷ Ɛmɛli a iwaran aganna-nin, isassahat-i, fɛl ad aslin aytedan kul win wɛr nɛmos Kɛl-Ɛlyɛhud y ɛmazal-net, šišawadax ɛs tɛmɛwit tɛkmâlat, ikkas-i-du day ɛmi n ahar.

¹⁸ A di-agɛz Ɛmɛli day i t-illa ɛššur ɛn maksanan, assafs-i y a di-agu day taɣmar-net ta n jɛnnawan. Ɛnta a ilan tanaya ta tu-tɛllat day ɛɣlul ɛn tɛmeren! Amin.

Šihulawen

¹⁹ Tɛhulax-in Friska d Akilas, ɛntanay harkid aɣaywan n Onesiforus.

²⁰ Erastus ɛnta iqqim-in day ɛɣrɛm ɛn Korent. Trofimɛs, as t-id-ɛfalax irin day ɛɣrɛm ɛn Miletɛs.

²¹ Ɛdgɛz wɛllen day a du-tasa dat tɛgrɛst. Ɛhulan-kay-in id Ebulay ɛd Fudenɛs ɛd Linɛs ɛd Klawdɛya ɛd mɛdrayan-nana kul day ɛzɛgzan.

²² Illil-ak Ɛmɛli, ikf-iwan arraxmat ketnawan! Amin!

Širawt ta iktab Buləs i Titəs

Isənti

¹ Awa nak Buləs, imosan akli ən Məššina, əmosa dey anammazul ən Ƴaysa Elməsix. Issiwar-i Məššina əzuk n a d-awəyay əs tarrayt ta n əzəgzan aytedan win isannafran; əssusənaq-qan tidət ta tan-za-tassaknit anamod was z'agin təməddurt tənimmannakat əd tara ən Məššina.

² Emmək en dağ as z'agin attama ən təməddurt ta təxlalat. Təməddurt ten, Məššina di wər nətəggu bahu a igan arkawal-net dağ əxluk n əddənet.

³ Amaran Məššina isinafalal awal-net dağ alwaq was otas. Awal wen ənta a iha əlməyiza was du-tawaflesa s igi-net, dağ əlkâma y awas omar Məššina di n Ənəsəfsi-nana.

⁴ Əhulaq-qay-in Titəs. Təmosa zun barar-in wa n tidət a dər ədrâwax əzəgzan. Əgmâya dağ Məššina di n Abba, d Ənəsəfsi-nana Ƴaysa Elməsix, a fall-ak d-izazzabben arraxmat d alxer.

Əššəxəl ən Titəs dağ Kəret

Ətəwəsənəfran ən muzaran d əššəxəl wa tan-iwaran

⁵ Oyyeq-qay-in dağ akal ən Kəret fəl ad təsəkkəsəwax awa din-iqqiman dağ əššəxəl-nana, təzzar taga dağ əkkulluk n əyrəm imuzaran y Əlkənisat ta tu-təhat. Aktəw aratan win as kay-omara, a tan-imosan as:

⁶ Akkiyyan dağ muzaran win, ihor a tu-wər-illa i ifragan a dağ-as d-inəy ark arat, izlâf tantut iyyadda, ila bararan əzzigzannen, as tu-wər-illa i z'annin əlan arak aladab, madəx wər əbbərdagan.

⁷ Ənta amyar n Əlkənisat Məššina a t-iflasan izzozar-tu i tamattay-net, dağ adi ilzâm-tu ad imos awedan as tu-wər-illa i ifragan a dağ-as d-inəy ark arat: Wər idkel iman-net dənnəg aytedan, wər ila tuksay n əwəl, wər imos əməšwi n esmad, wər imos əməkkennəs, wala dey itattu alxaram.

⁸ Kalar arat wa t-ilzaman ad imos aləs iha amagaru, ira imazalan win olaxnen, imos ag əlməxsud, n əməzzələləx, n əmizdag innodan dağ əwəl-net.

⁹ Isigatakkat wəllen dağ ləkkum y awal wa ilan ələsəl s əmmək was itawasasaxra. As iga adi, ad igrəw fərregat n ad itamar aytedan s əsəssəxri wa n tidət itaggu, ifrəg dey ad isattaddu y aytedan win das-əggewalnen as əntanay a əhanen alxata.

Ənnəkud i səssəxritan win bahu

¹⁰ Ænta ællan-tu aytedan aggotnen, wællen win d-ægmadnen Kæl-Ælyæhud, æmosnen inæffellag, æššewalnen ixsæsan, saxrakan aytedan.

¹¹ Aytedan win di ilzâm ad tæwædbæxan mawan-nasan, fêlas saxrakan ixsawnatan æxrâdnen s æsæssæxri n aratan wær næmmækkan. Tattin s awen alxaram.

¹² Iyyan daȝ kæl akal-nasan, imosan ænnæbi a innan: «Kæl-Kæret, har faw tæmosam inæsbuha, tæmosam šilan wæxsan aššarnen, æn næffæræšša wær næsæmædrin ar daȝ a ætšan.»

¹³ Amaran arat wa inna da, tidæt a imos. Awen da fêlas ag-
asan ærruyxmatan æsæsnen, fêl ad izælulæȝ æzægzan-nasan,

¹⁴ aqqamin da wær ælkeman i mayyan æn Kæl-Ælyæhud d idufan n aytedan win æmmæzraynen tidæt.

¹⁵ Arat kul zæddig y aytedan win as zaddogan man-nasan. Mišan aytedan win as wær zaddogan man-nasan, ugâyan deȝ s æzægzan, xur-san wær t-illa a zæddigan, fêlas taytwen-nasan, d ænnæyaten-nasan kul ih-enat iba æn tazdak.

¹⁶ Gannin æksudan Mæššina, mišan imazalan win taggin sataddin as ænkuran-tu. Æmosan aytedan tagginen igitan æssiglafnen, æmosan inæmmæzray a fêl tu-wær-illa igi n æmazal olaȝan.

2

Æsæssæxri ikkan Ælkænisat

Ammaran ækkanen æzzænæfan n aytedan

¹ Amaran kay, tamar s aratan win namannaknen æd tarrayt ta imal æsæssæxri wa n tidæt.

² Tannaȝ i meddan win waššarnen ad æqqælan aytedan sammodnen, ættâfnen æzzæbun, ænnodan daȝ wallan-nasan, issohat æzægzan-nasan, tæh-en tara, æknan zæmmerat.

³ Æmmæk wen daȝ as ilzam ad t-aginat tædoden šin waššarnen. Amær-tanat s ad ættæfnat æzzæbun-nasnat dat Mæššina. Ad wær tazamnat wala iqqæl alxal-nasnat tessay n esmad aggen. Æqqælnatet šidoden tamarnen s æmazal n awa olaȝan.

⁴ Ædgæznatet daȝ ammar æn tædoden šin madrornen s ad irenat meddan-nasnat, æd bararan-nasnat.

⁵ Æqqælnat šidoden ænnodanen daȝ wallan-nasnat, aginat alxal zæddigan. Annattafnat d æššæxælan æn xsawnatan-nasnat, alæxnat, abbardagnat i meddan-nasnat. As iga adi, wær z'itæwælku Awal æn Mæššina.

⁶ Tamar harwa s æmmæk wen da meddan win madrornen s ad annadin daȝ wallan-nasan.

⁷ Kay iman-nak da ilzâm-kay ad tətəggəy imazalan olaynen dağ əkkulluk n anamod fəl ad təqqələy almasal y aytedan. Taggu əsəssəxri igân s əwəl iyyanda, ilân almağna.

⁸ Taggu batuten oğadnen as tu-wər-illa i dər-əsnat du-z-iqqəlan. As iga adi inəmmənkənanax a dasan-iba a sər-nax ənnan təha təkma, tabəz-tan təkarakit.

⁹ Amər eklan s ad abbardagan i məssawsan dağ əkkulluk n arat, a dasan-taggin arat wa fəl tan-z-irin, ayyin-tan təmazrəyt,

¹⁰ amaran a dağ-san wər takaran. Kalar əqqələnet aytedan əssiflasnen wəllen. As iga adi a d-awəyan ətəwəsəxmar igân dağ əkkulluk n anamod y əsəssəxri kul wa iqqalan Məşşina di n Ənəssefsi-nana.

Arraxmat ən Məşşina

¹¹ Ənta arraxmat ən Məşşina tənifalal, tewây-du efsan y aytedan kul.

¹² Təsakn-anax əmmək was za nammazzay əd mazalan win iba ən təksəda ən Məşşina əd tara n əddənet, fəl ad nagu dağ əddənet təməddurt a dağ nənnoda dağ wallan-nana, toğâdat, tənimmənkənanax əd tara ən Məşşina.

¹³ Arat wa a tu-nagu nəssigad, nəga attama n əzəl isifalawasan, imosan ənəfilal n ədkul ən Məşşina di maqqaran, a t-imosan Ənəssefsi-nana Ƴaysa Əlməsix.

¹⁴ Ənta a ikfan iman-net, fəl a danax-isəddərfu dağ id t-illa əşşur, izzəzdəg-ana, nəqqəl tamattay-net a sər-əs təkâtat, təsigatakkat dağ igi ən mazalan win olaynen.

¹⁵ Arat da da was kay-ilzam a tu-təsasaxra, d anamod was ilzam a sər-əs tətamarax aytedan, təsuxulağ-asan-t-idu. Agu y əşşəxəl wa igi n aləs ilân batu. A tu-wər-iməl i kay-olkân.

3

Alxal was ilzam ad t-agin əlməsixitan

¹ Sakt-en-du as ilzâm-tan ad əbbirdagan y əlxəkumat d almawakkilan-net, əkkiwanan-asan, əgəran iri y id t-illa əmazal olayan.

² Ad wər taggin arak batuten s awedan waliyyan, wala əqqəlan inadlamən, ilən aladab, əqqəlan aytedan zamazal-nən talmat y əkkulluk n awedan.

³ Fəlas nakkənax iman-nana da əstizarat wər nəla almağna, nəmos inəmməzray əxrâknen. Nəha əkkəlu fəlas nəlkâm y ark ənnəyaten d arak deranan, əmosnən əzzənəfan. Nəmos aytedan as kawalan wallan-nasan,

əranen əddənet, nəla alxal isinaglafan, nənimaksan gar-ena.

⁴ Mišan assaşa wad tənafalal ənnixmat ən Məşşina di n Ənəssefsi əd tara-net y aytedan,

⁵ issəfs-ana əs təhanint-net. Wərgəx imazalan olaşnen win nətaggu a fəl nəgraw efsan win. Kalar nəgraw-tan s əşirəd wa danaş-iga Infas wa Zəddigan. Əşirəd wa, ənta a danaş-ewayan əs təhəwt ta təynayat, isammattay-ana nəssənta təməddurt iyyat təynayat.

⁶ Infas wa izazzabbat-t-idu fall-ana Məşşina s igət s əssəbab n awa iga Şaysa Əlməsix imosan Ənəssefsi-nana.

⁷ Arat wa ig-ay fəl ad nəqqəl iməkkusa ən təməddurt ta təxlalat s ənta daş nəga attama-nana, fəlas ikkas-ana-du daş tişit ən nəmməzray-net, s arraxmat-net.

⁸ Arat wa imos awal illikanan, amaran areş a daş-as tədgəza fəl ad awəy adi s aytedan win əzzəgzannen əs Məşşina ad səggətəkken daş igi ən mazalan win olaşnen. Arat da da wa olaşan, təh-ay tənfa y aytedan.

Tərxəmt fəl əzənnəməzrəy n aytedan

⁹ Nəməggəg əd takkayen wər nəla almaşna d agamay ən masnat n əsmawan n aljadan. Tənəməggəga deş d amel gər aytedan əmmizraynen, d əməstan igân daş talşa n əşşərişə ən Kəl-Əlyəhud, fəlas wər əlen əlfaydat waliyyat, za wər tan-təha tənfa.

¹⁰ I igmayan d əzənnəməzrəy n aytedan, tərxəməş-as har sanatat təklaten. As ilas dəffər adi təstəşəq-qu daş Əlkənisat.

¹¹ Fəlas təfragəş ad təkkəşəş əşşək as ələs şilat ən wədi immizray tarrayt ta toşadat, amaran itaggu ibakkadan, izabaz iman-net y əşşərişə.

Ammaran win əlkamnen

¹² As sər-ək înzammazalaş Artemas madeş Tişik, tənəmənşə d a di-du-takka daş əşrəm ən Nikobolis, fəlas ənta as otasa a daş-as əkkəsa tamert ta daş gaddalan konakan d əsamed əşikəl.

¹³ Akn-in masnat daş əşikəl ən Zaynas wa n əmusan n əşşərişə, d Abbolos. A tu-wər-iməl as mişataran.

¹⁴ Amaran aytedan win-nana də iwar-tan ad əlmədan əsəggətəkki daş igi ən mazalan win olaşnen, fəl a d-əssəxsələn aratan win as təkna addararat igi, wərgəş ad əgân təməddurt a daş wər ənfen wala.

Şihulawen şin əlkamnen

¹⁵ Aytedan kul win dər namahaş edag, əhulan-kay-in. Təhulaş-in imaran-nana win dər nədraw əzəgzan. Məşşina ya təgeş-awan arraxmat ketnawan.

Širawt ta iktab Buləs i Filemona

Šihulawen

¹⁻² Awa nak Buləs, imosan amaskasaw fəl əddəlil n Elməsix Ƴaysa, nak d əmidi-nana daƷ əzəƷzan Timotay, ənnanen əhulan-in əməri-nana Filemona n əmadhal-nana, d Əlkənisat ta tətamanayat daƷ ahan-nak. Nəhul-in deƷ təmidit-nana daƷ əzəƷzan Affəya d Arxifus əmadhal-nana daƷ təbəllant.

³ Izazzabbat-du fall-awan Məššina di n Abba-nana əd Ƴaysa Elməsix, Əməli-nana, arraxmat d alxer.

Tara d əzəƷzan ən Filemona

⁴ Əmidi-nin Filemona faw id əggaza šin igi ən təwatriwen a kay daƷ-asnat d-əkatta ətigudəya y Əməli-nin.

⁵ Fəlas əsləƷ tara ta təgeƷ y aytedan kul win əlkamnen y Əməli Ƴaysa, d əzəƷzan wa sər-əs təge.

⁶ Šiwatriwen-in ətaggaq-qanat fəl ad təgrəwa s əlləllu-nak, wa d-igmadan əzəƷzan-nak, əgərri iknan tənəddawt, n albaraka kul wa nəla daƷ ənəmənnak-nana əs ləkkum y Elməsix.

⁷ Tara ta kay-təhat amidi-nin teway-du sər-i tədəwit agget d allam fəl man, təssismada deƷ iwallan n aytedan kul win əlkamnen i Ƴaysa Elməsix.

Efsan ən Buləs Onesim

⁸ Awen daƷ a fəlas kud imos as tartəyt-in d Elməsix təkfi fərregat n a kay-aməra s arat wa ihoran,

⁹ da əssofaƷ ad imos as agamay Ʒas a daƷ-ak z'aga a di-taga tənəfust fəl əddəlil n ənəməra wa nəga. Nak Buləs imosan almawakkil n Elməsix Ƴaysa əhe kasaw əmərədda fəl əddəlil-net,

¹⁰ əgməya daƷ-ak a di-taga tənəfust daƷ talƷa n Onesim, wa Ʒur-ək d-iddərragan, imosan barar-in daƷ əzəƷzan fəlas tarrayt ta n Ƴaysa Elməsix a daƷ t-əge harwa a Ʒur-i illa da da daƷ kasaw.

¹¹ Kala a dak-ku-wər-təha tənfa mišan əmərədda təh-anaq-qu, gər za i kay wala i nak.

¹² Əmərədda əssoƷalaƷ-ak-k-in imos aganna-nin.

¹³ Əsidarana a Ʒur-i illa da da iket əhe kasaw fəl əddəlil n Əlinjil, a di-ilal daƷ adag-nak.

¹⁴ Mišan wər areƷ igi n adi ar əs turagat-nak fəlas wər areƷ a kay-əšəhhəššəla əmazal a, olaƷan a, əssofa a tu-taga gar-ek əd man-nak.

¹⁵ Mijas Onesim wər dak-iga arat n afel, ar fəlas as kay-in-iqqal, a ħur-ək aqqam har faw,

¹⁶ əmərədda wər imos akli ħas, ogar akli, əmidi-nin daɣ əzəɣzan n əməri-nin a imos. Wala nak əknêq-qu tara wəllen əngəm za kay a das-issertayan tara ta n as imos akli-nak imos deɣ əmidi-nak daɣ əzəɣzan s Əməli.

¹⁷ Daɣ adi kud amidi-nak daɣ əzəɣzan a əmosa wədi əqbəl-tu tətəfaq-qu daɣ adag wa daɣ-i tətəfa.

¹⁸ As imos as iɣşād-ak arat made tər wəsaɣ-as-tu wədi nak a daq-qu təssana.

¹⁹ Arat wa əfus wa-nu nak Buləs as t-əktaba: nak a dak-z-irzəman. Kud ira wər kay-d-əssəktəɣ as kay təməddurt-nak iman-net a daɣ-ak əle.

²⁰ Əgmâya daɣ-ak əmidi-nin a di-taga tənəfust ta fəl udəm n Əməli. As di-təgeɣ adi fəl əddəlil ən tartəyt ta nəga daɣ Əlməsix a di-taləma fəl man.

²¹ As dak-in-əkattaba şirawt ta əkkasaɣ aşşak as arat wa daɣ-ak in-əgammaya da a di-tu-taga ənta madeɣ a t-ogaran.

²² Əgmâya daɣ-ak deɣ a din-təsəmmutəga edag ən təɣimit fəlas ordêɣ as a kawan-in-ətəwəsuxəla as iqbəl Məşşina şiwatriwen-nawan.

Şihulawen şin əlkamnen

²³ Ebafras wa n əmidi-nin daɣ kasaw fəl əddəlil n Əlməsix Ƴaysa, issislam-in fall-ak,

²⁴ ənta əd Markus d Aristarxus əd Demas əd Luqa əmosnen imadhalan-in daɣ əşşəɣəl.

²⁵ Izazzabbat-du fall-awan Əməli Ƴaysa Əlməsix arraxmat-net.

Širawt ta tətawaktab i Kəl-Ÿibri Ʒsənti: Məššina iššewal-ana əs tarrayt ən barar-net

¹ Dəffər as iššewal Məššina a irəwan i marawan-nana əs tarrayt n ənnəbitan, daɣ taklaten aggotnen əd təməwiten aggotnen,

² iššewal-ana nakkanay da daɣ azzaman win əlkammen a, əs tarrayt ən Barar. Barar wen iga Məššina arat kul daɣ əfus-net, ixlak-du deɣ əddənet əs tarrayt-net.

³ Tanaya ən Məššina kul təmilawlaw fall-as, amaran tənda-du daɣ-as tišit ən Məššina, awal-net deɣ ilən tarna, ənta as ittaf arat kul. Dəffər as issinda əššəxəl wa n əzəzdəg-nana daɣ bakkadan, ikka ijənnawan, iqqim daɣ əxil ən Məššina di idkalan.

⁴ Almaqam-net ikna šigrat ən wa n angalosan, fəlas esəm wa t-ikfa Məššina ogar wəllen win-nasan.

Awa dər togda šigrat ən Barar ən Məššina y angalosan almaqam

Barar ən Məššina ogar angalosan

⁵ Amaran məni daɣ angalosan was kala a das-inna Məššina: «*Barar-in a təmosa, azalada, ad əqqalax abba-nak.*» Məni deɣ daɣ angalosan was inna Məššina: «*Nak a das-əqqalax abba, ənta deɣ iqqəl barar-in.*»

⁶ Amaran barar wa n aɣafadday en, as t-id-iga Məššina daɣ əddənet, omar angalosan kul s a das-əssəjədan.

⁷ Daɣ batu ta təqqalat angalosan, inna Məššina: «*Angalosan-net, ig-en zun aɗu, inaybidan-net ig-en zun abalagleg ən təmsay.*»

⁸ Daɣ batu amaran ta təqqalat Barar, a inna Məššina: «*Taymar-nak, ya Barar-in di n Amadkol, təll-ay har faw, əttəbil-nak, əttəbil n əššərixa a imos.*»

⁹ «*Tareɣ taqqat, təkyâda təmazrəyt. Awen da fəlas ya Barar-in di n Amadkol, Ʒməli-nak Məššina a kay-igan əmənokəl, isannafran-kay ikf-ik təfalawist tagget, togarat ta n midawan-nak.*»

¹⁰ Innâ deɣ Məššina: «*Kay Barar-in di n Amadkol, əstizarat, kay a d-ixlakan amaɗal, ijənnawan deɣ kay a tən-d-ixlakan.*»

¹¹ «*Ad əməsan kul, mišan kay təlleq-qu har faw. Ketnasan ad aɣin əməndi wa tətəggu təbdoq.*»

¹² «*A dasan-tagay aqda wa itawaggin i takadkat, itawaggasan dey əsəmməttəy wa itawaggan*» i səlsa. «*Mišan kay, har faw wər təmməttəya, taxrəst-nak dey wər təla təzərəst.*»

¹³ Amaran, məni dəx angalosan was kala a das-inna Məşşina: «*Qamu dəx əxil-in, har daw-ək əssərəsay izəngan-nak, əmalan daw daran-nak.*»

¹⁴ Awak angalosan, wərgex iməttənkəl a mosan s akkiyyan ilə əşşəxəl-net, tiwamazalan-du y ad ilalan y aytedan win z'əgrəwnen əlyillas?

2

Ad wər nəsettəlkək awal wa d-eway Barar ən Məşşina

¹ Awen dəx a fəlas iwâr-anax ənnəkud wəllen, nə səssuhət aratan win as nəsla, fəl təksəda n ad nəgməd tarrayt ta tolayat.

² Arat kul wa əmalan angalosan i marawan-nanax ittidda, amaran abakkad kul əd təmazrəyt kul n awal wədi itiwaggasan attadib wa dər əhoran.

³ Mənəmmək as za naqqam wər nəwwəddab as imos əs wər nəssəfrar əlyillas oqdân d awa təzzəwwərt? Fəlas əlyillas wa, Əməli iman-net a t-id-imalan dəx tizarat, win das-əslanen dey sitaddan-anax as tidət a imos.

⁴ Məşşina a isattaddan təgəyya-nasan s alyalamaten, d aratan simaklalnən, əd təlməxjujaten əmosnən əzzənəfan, əd təhəkkuten a d-əfalnən Infas wa Zəddigan. Aratan win kul ig-en əs təməwit tənimmannakat əd tara-net.

Əsəmmədrəy ən man əd tanaya ən Barar ən Məşşina

⁵ Wərgex angalosan a izzozar Məşşina y əddənət ta du-təzayat, tas nəşşewal dəx batu-net da.

⁶ Amaran təll-ay təgəyya dəx adag iyyan tənənât: *Ma imos əggadəm as t-idu-təkatta? Ma imos əg əggadəm as dəx-as tətəssana?*

⁷ *Təssərəsaq-qu dəx arat n azzaman, imal daw angalosan, dəffər awen təkfəq-qu tanaya d ədkul.*

⁸ *Təssərəsay arat kul daw-əs.* Əzuzər wa t-iga Məşşina y arat kul, ənta a d-ewayan as wər t-illa i ifragan təmazrəyt-net. Amaran harwa da, wər nəhənnəy əs arat kul illa daw tanat-net.

⁹ Mişan nənây Ƴaysa as iga arat n azzaman illa daw angalosan, dəffər awen igrəw tanaya d ədkul fəl əddəlil n alyazab wa iga əd təməttant ta iga. Əmmək en dəx as iğazankazət təməttant, imos awen arat iga fəl əddəlil n aytedan kul, s arraxmat ən Məşşina.

¹⁰ Məşşina a d-ixlakan aratan kul, amaran əddəlil-net a fəl t-əllan. Məşşina amaran igrəz-as ad əgrəwan aytedan

aggotnen day tanaya-net. Dad zamas Ƴaysa a imosan əssəbab n əlyillas-nasan, wədi ilzâm ad t-akfu Məššina alkamalat kul əs tarrayt n alyazab wa iga.

¹¹ Wa izazdagan, əd win tawazazdagnen, ketnasan iyyanda a d-əfalan, a t-imosan Məššina. Awen day a fəlas Ƴaysa wər fall-as imos təkarakit tənna ta dasan-itaggu: «Imədrayan-in»,

¹² assaƳa wad inna: *Ad əmmâlay esəm-nak i mədrayan-in. A dak-agaƳ təmmalen day əljəmaƳat.*

¹³ Inna deƳ: *A tu-sənnəhəlay fəllesat.* Inna harwada: *Nak da, nak əd bararan win di-ikfa Məššina.*

¹⁴ Day adi, dad zamas bararan win olân, əgân day azni əd təxəssa, wədi, Ƴaysa da iggâz alxalat ta əhan. Arat wen ig-ay, fəl ad attaftaf əs təmattant-net wa ittafan tarna ən təmattant, a t-imosan Iblis,

¹⁵ isəddərfət deƳ aytedan win əhanen əkkəlu day təxrəst-nasan fəl təksəda ta əgan i tamattant.

¹⁶ Igmâd aššak as Ƴaysa wər d-osa fəl ad issən day angalosan. Kalar əzzurrəyya n ənnəbi Ibrahim a d-ikka y a daƳ-as issən.

¹⁷ Awen day a fəlas ilzâm ad alu əd mədrayan-net day arat kul, fəl ad iqqəl əlimam wa zəwwəran, imosan əməhhenən n alyadil day əlyibada ən Məššina. Emmək en da as z'igrəw təsureft ən bakkadan ən tamattay.

¹⁸ Fəlas, alyazab wa iga assaƳa wad itawajarrab, ikf-ay fərregat n ad agəz win tawajarrabnen.

3

Ƴaysa ənta ogaran tišit n alyadil, ogar deƳ Musa almaƳam

¹ Adi day a fəlas ya imədrayan-in kawanay a zaddoggen iyr-iwan Məššina y a təgrəwam tadagart day əššəxəl-net, agiwat ənəzər-nawan day anammazul s ənta a imosan əlimam wa zəwwəran ən tarrayt ta nəha, a t-imosan Ƴaysa.

² İydâl i Məššina di a t-isannafranən, zun awa iga ənnəbi Musa i tamattay ketnet ən Məššina.

³ Amaran, itiwaxkam-as âs ihor əd tanaya təkknât šigrat ən ta n Musa, zund əmmək âs əmakras n ahan, ogar ehan iman-net almaƳam.

⁴ Ehan kul ill-ay wa t-ikrasan, Məššina amaran, ənta a ikrasan əkkulluk n arat.

⁵ Musa iydâl i tamattay ketnet ən Məššina, amaran amaššaxal a imos işewalan day batu n aratan win z'iməl Məššina.

⁶ Ælməsix amaran barar n ahan ən Məššina a imos, iydâl i tamattay ən Məššina, imos əmuzar-net. Ehan wen amaran nakkanay a t-əmosnen as imos as nəzazzawat daɣ təfləst təgļayət d attama was nəsabarag.

Edag ən təsanfawt wa ihakku Məššina i win əzzəgzannen əd tarna n awal ən Məššina

⁷ Awen daɣ a fəl inna Infas wa Zəddigan: «Azalada, as təslam y awal-net,

⁸ *ad wər təsəggərməmam iwallan-nawan zun alwaq wanad n əfəlləg ən marawan-nawan win ərəwnen. Əzəl wa di-əjjarraban daɣ taneray,*

⁹ *əgan-i tənagmayt təmosat jarraba-nin, ənâyan igitan-in*

¹⁰ *har əgan əkkozat təmərwen n awatay. Awen daɣ a fəl di-iggaz alham wəllen ən tamattay n azzaman win den. Təzzar ənney: Aytedan win, iwallan-nasan faw əxrâkan, wər kala ad əssanan tarrayen-in.*

¹¹ *Alham en daɣ a sər-i d-ewayan tahuday n âs wər ilkem ad əggâzan akal wa sammatagay i təsanfawt-nasan.»*

¹² *Ənkədat ya imədrayan-in! A kawan-wər-iggəz i ilân əwəl aššaran wər nəzzəgzan har awəd awen ad ammazray šiyyat Məššina di iddaran.*

¹³ *Kalar tinəməggiwat təlxutbat gar-ewwan akk əzəl, iket əfragan aytedan ad annin: «azalada», fəl a kawan-wər-iggəz i udân daɣ jarraba n abakkad aggarmam əwəl-net.*

¹⁴ *Nakkanay imidawan n Ælməsix daɣ əššəxəl a nəmos as imos as nəzazzawat har təzərəst daɣ gəlleyat ta nəga harwa daɣ tizarat.*

¹⁵ *Ənnan Ælkəttaban: «Azalada, as təslam y awal-net, ad wər təsəggərməmam iwallan-nawan zun alwaq wanad n əfəlləg.»*

¹⁶ *Amaran ma mosan aytedan win əffəllagnen fəl Məššina dəffər as əslân y awal-net? Awak wərgəx aytedan win d-əgmadnen Masar azâr-asan Musa?*

¹⁷ *Ma mosan za aytedan win as iga Məššina əkkozat təmərwen n awatay ih-ay alham-nasan? Awak wərgəx win əganen abakkad amaran əxradan maxsay daɣ taneray?*

¹⁸ *Təzərəst n awen âs ma mosan aytedan win as ihad Məššina âs wər ilkem ad əggâzan akal wa isammatag i təsanfawt-nasan? Awak wərgəx win ugaynen s a das-abbardagan?*

¹⁹ *Daɣ adi nəhannay as wər əgrewan iguz n akal wa n təsanfawt fəlas tugəyt a əgan sa sər-əs əzzəgzənan.*

4

1 Day adi, iket di ad t-illa arkawal ən Məššina wa n ad nəggəz akal ən təsanfawt wa imal, ənkədat wəllen a kawan-wər-iggəz awedan waliyyan igân iduf n as ab'as ogaz wala.

2 Fəlas igmâd aššak as isalan n Elinjil nəg-asan agaraw zun wa dasan-əgan daɣ taneray. Mišan awal was əssəsaman wər dasan-ikna wala fəlas wər əgen əzəgzan wa əgan aytedan win t-əqbalnen.

3 Nakkanay win sər-əs əzzəgzannen, ad nəggəz akal ən təsanfawt was inna Məššina daɣ batu-net: *«Igaz-i alham-nasan. Alham en daɣ a sər-i d-ewayan tahuday n âs wər ilkem ad əggâzan akal wa sammatagay i təsanfawt-nasan.»* As itaggu awen da Məššina iyrâd arat kul harwa ɣur ənətti n əddənet.

4 Fəlas ill-ay adag a daɣ innâ, daɣ batu n əzəl wa n əssa: *Təzzar izzəraz Məššina əššəɣəl-net kul wa n əxluk ən jənnawan d amaɖal, əzəl wa n əssa.*

5 Ənnân deɣ Əlkəttaban: *Igmâd aššak as wər z'əggəzan akal ən təsanfawt ta hakka.*

6 Daɣ adi, dad zamas əgrâwan wiyyad iguz ən təsanfawt ten, amaran win əslanen isalan n alxer əstizarat wər əgrewan iguz n akal ən təsanfawt wen fəl tišit-nasan inəmməzray,

7 ikkas Məššina əzəl iyyan aynâyan daɣ batu ten, *a t-imosan azalada, əs tənna ta iga dəffər awen wəllen əs tarrayt n ənnəbi Dawəd, s əmmək was t-inna dat awen: Azalada, as təslam y awal-net, ad wər təsəggərməmam iwəllan-nawan.*

8 Awəlla, ənnar iddew Joswe əd tamattay ten har tat-išaššawad edag ən təsanfawt wen, wədi wər z'ammagrad Məššina daɣ batu n əzəl iyyan ən təsanfawt dəffər awen.

9 Almaɣna n awen as harwada təll-ay təsanfawt i tamattay ən Məššina, tolât d əzəl wa n əssa s ənta daɣ izzəraz Məššina əššəɣəl-net kul wa n əxluk ən jənnawan d amaɖal.

10 Amaran awedan wa iggazan edag ən təsanfawt ta ihakku Məššina, wədi ad assanfu daɣ əššəɣələn-net, zun awa iga Məššina daɣ win-net iman-net.

11 Day adi ədgəzatana wəllen daɣ iguz n adag ən təsanfawt ta, fəl ad wər ixrək waliyyan daɣ-na awa əgan marawan-nana a əməzraynen Məššina.

12 Fəlas awal ən Məššina iddâr, ila tarna, amaran təwəlanet togar ta n takoba. Itaggaz iman n aytedan əd wallan-nasan, igəllu har isəmməɣras, d əkəlkəl ən ɣasan. Amaran awal ən Məššina ənta a ixakkaman y awas ifarray awedan daɣ man-net d awa isamadran daɣ əwəl-net.

¹³ Wər tu-təlla təxlək as wərgex ihannay-tat Məššina. Arat kul immun-as, inniflay dağ-as. Amaran ənta a dat za nəbdəd fəl mazalan-nana.

Awa dər ogda almaqam ən Barar ən Məššina, imosan Əlimam-nana wa Zəwwəran, dağ batu ən təkutawen

Nəla əlimam wa zəwwəran ikmâlan ihân ijənnawan

¹⁴ Dad zamas nəla əlimam wa ogaran ilimaman kul, ihân ijənnawan, a t-imosan Ƴaysa, Barar ən Məššina, wədi zəzzəwətətana dağ əzəgzan-nana.

¹⁵ Fəlas əlimam-nana wa zəwwəran en, ifrâğ a danağ-ikbəl dağ rəkkəm-nana, id əgrâwan-tu jarrabatan zun win danağ-garrawnen dağ anamod kul, eges kala wər iga abakkad.

¹⁶ Dağ adi ihazatanax-in əmənokal-nana a t-imosan Məššina di n əməggi n arraxmat, nəgâ awen əs təfləst, fəl ad nəgrəw əhənəttə, nəgrəw değ arraxmat s ənta dana-zə-takfit tilalt dağ alwaq wa dağ nəddərar s awen.

5

Ƴaysa Əlməsix itiwasanafrafran imos əlimam dağ taggayt ta n Malək-Assaddeq

¹ Əkkulluk n Əlimam wa Zəwwəran, itiwasanafrafran dağ aytedan, amaran tənfa n aytedan en da a fəl itawazazar y ad agu əşşəxəl ən Məššina, agu šihəkkuten əd təkutawen fəl agamay ən təsureft ən bakkadan-nasan.

² Əlimam wen, ifrâğ əgərri n aljahilan d aytedan win əxraknen, id ənta iman-net da irkäm.

³ Rəkkəm-net en dağ a fəlas iwâr-tu ad agu šikutawen fəl agamay ən təsureft ən bakkadan win-net, harkid win taməttay.

⁴ Amaran wər t-illa awedan ifrâğan ad akfu iman-net almaqam ən tişit n Əlimam wa Zəwwəran. Kalar Məššina a sər-əs d-iğarrin aytedan, zund əmmək as sər-əs d-iğra Harun.

⁵ Əmmək en dağ âs Əlməsix wərgex ənta a ikfan iman-net tanaya ən tişit n Əlimam wa Zəwwəran. Kalar Məššina a çur igraw tanaya ten s ənta a das-innan: *Barar-in a təmosax. Azalada əqqalay abba-nak.*

⁶ Zund əmmək was inna Məššina dağ Əlkəttaban: *Əlimam a təmosa har faw, dağ taggayt ta n Malək-Assaddeq.*

⁷ Əlməsix harwa ad iha əddənet, ittâr əs təkalelt əd məttawan, onsay Məššina s ənta a ifrağan ad t-iğləs dağ

tamattant. Iqbal Məşşina təwatray-net, fəlas əmiksad ən Məşşina a imos.

⁸ Elməsix Barar ən Məşşina a imos, mišan ilmâd əbərdəg id alyazab a iga.

⁹ Emmək en da as igraw alkamalat kul, iqqal wa ihakkin əlxillas ixlâlan i win das-əbbərdagnen,

¹⁰ id Məşşina a t-ikfan tişit n əlimam wa zəwwəran dağ taggayt ta n Malək-Assaddeq.

Ammar s əzəgzan ikmâlan d ammar s ad wər nəqqal dəffər-na

¹¹ Aratan aggotnen as nəfrag a tan-nannu dağ batu ta, as izzəwat əsəssəgri-nasan id aytedan a təqqalam a fəl izzəwat əgərri.

¹² Edag an âs tərəwam as təqqalam iməssəsəygra, kalar har harwada təddiraram s ad tətawasasayrim aratan win təsəntit n awal ən Məşşina. Təhâm edag was wərgex imensewan win əqqurnen as təddəraram, kalar harwada təddiraram s əx.

¹³ Amaran awedan was harwada iddirar s əx, wədi harwada wər ifreg zələy gər awa olağan d awa wər noley. Awedan wa, imos zun ajançay.

¹⁴ Imensewan win əqqurnen i n aytedan win ədwalnen. Aytedan win, əntanay a əgrawnen masnat ta tan-təkfət zələy n awa olağan d awa wər noley fəlas əjjirraban aratan win di.

6

¹ Dağ adi, akəyatanaç edag wa n əsənti ən taçaray dağ batu n Elməsix. Akkiwatana dat y ad nawəd alkamalat da wər nəles tewaylay n əsənti iyyan aynayan, almaçna n awen: tətubt d əməzzəy d arak mazalan tawaynen aggadəm s əhluk d əzəgzan əs Məşşina

² d əsəssəyri igân dağ batu n əzəzdəg d əsəwər n aytedan ifassan d əsənkər ən nəmməttan d əşşəriça wa n əzəl wa n tabadday.

³ Amaran awen dağ a za nagu, kud irda Məşşina.

⁴⁻⁶ Aytedan win əjwarnen əgrawan ənnur ən Məşşina, əsammatammen təhəkkut ən Məşşina, əgrawan Infas wa Zəddigan, ənayan as awal ən Məşşina ihôssay, ənayan dəç tarna ta təsəknit əddənet ta du-təzayat, amaran əmməzrayan tarrayt ta tolaçat, win di, wər t-illa əmmək as əlasan tətubt; fəlas agamay ən tənfa ən man-nasan a fəl əlasan ətəytəy ən Barar ən Məşşina fəl təgəttawt, sammadrayan-tu dat awedan kul.

⁷ Amaḍal igarrawan akonak olaḡan, amaran itaraw-du annabatan təha tənfa i win tu-gayaknen, amaḍal wədi igrâw albaraka ən Məššina.

⁸ Mišan amaḍal wa d-erawan y aytedan annabatan aššarnen, wədi wər infa wala. Tulyant a tu-za-təwərat, amaran təsəlkamt-net ahluk igân əs təmsay.

⁹ Ya imaran-in, kud imos âs nəššewal-awan s əmmək wa, da nəkkâs aššak âs izay-kawan-du arat iknân əlluḡ a t-imosan əlyillas.

¹⁰ Awalla, Məššina Əməli oḡadan a imos, daḡ adi wər din-z-attaw imazalan-nawan, wala tara ta tu-təssəknam daḡ əššəḡəl wa təgam fəl saḡmar n esəm-net i məzzəḡzan âs harwada tətəḡḡim-tu.

¹¹ Mišan nəsidaran âs akkiyyan daḡ-wan ad assaknu ḡəllejat tədi da har təzərəst, fəl ad təḡrəwam igi n attama indân.

¹² As təgam adi wər za təḡḡələm iməssəndad, kalar ad tattalalam win əḡrawnen arraxmat tas itawagga arkawal-net əs tarrayt n əzəḡzan-nasan əd təzaydart-nasan.

¹³ Amaran, assaḡa wad iga Məššina arkawal y ənnəbi Ibrahim, wər t-illa esəm iyyan ogaran wa n Məššina əḡəm ihəd sər-əs. Awen daḡ a fəl *ihad Məššina s azzat-net*,

¹⁴ inna: *Illikan âs a kay sənnəhəlay tehakkay n albaraka, akna dey əsəḡət n əzzurrəyya-nak.*

¹⁵ Emmək en daḡ âs dəffər as issikna Ibrahim təzaydart-net, igraw arat was das-itawagga arkawal-net.

¹⁶ Aytedan, tahuday a taggin s esəm wa ogaran win-nasan, amaran tahuday ten, ənta a təsətaddit batu-nasan, təḡdəl a dər-əs d-iqqəl awedan waliyyan.

¹⁷ Emmək en daḡ as Məššina, isigatakkat y ad issusən aytedan win as iga arkawal âs aratan win issəbdad wər təməttəyan. Awen daḡ a fəl *ihad Məššina daḡ batu ten.*

¹⁸ Daḡ adi əššin aratan a t-əllanen wər nətəməttəy, amaran wər t-illa əmmək as daḡ-san iga Məššina bahu. Aratan win əntanay a dana-za-səssuhətne wəllen, nakkanay a oyyanen arat kul nəḡmay taggast s əzəzzəwi-nana daḡ attama wa danaḡ-itawakfan.

¹⁹ Attama wen, ənta a danaḡ-imosan šisəttəytay əssiflasnen, əssohatnat, amaran ənta a danaḡ-ewayan har dənneḡ anaxer wa illan ḡər adag wa zəddigan əd wa ogaran tazdak.

²⁰ Edag wen ənta a iggaz ʔaysa fəl əddəlil-nana, azzaranax-in sər-əs, iqqal əlimam wa zəwwəran har faw, daḡ tagḡayt ta n Malək-Assaddeq.

7

Taggayt ta n Malək-Assaddeq

¹ *Malək-Assaddeq* wen, ənta as kala ad imos əmənokəl n əyrəm ən Salem, imos əlimam ən Məššina di n Amadkol. Ənta a issəlkadan y ənnəbi Ibrahim, assaya wad irza imənokalan, ittar y Ibrahim a das-igan albaraka.

² Ənta en da a ikfa Ibrahim təməssədək n awa ila kul. Almayna n esəm wa n Malək-Assaddeq: *Əmənokəl ən taqqat, imosan deḡ əmənokəl ən Salam*, almayna "əmənokəl n alxer".

³ Wərmad ila abba, wala anna, wala aljadan. Təməddurt-net wər təla ənətti za wala təzərəst. Itawašašala əd Barar ən Məššina, iqqal əlimam har faw.

⁴ Ənzərat daḡ ədkul n əlimam wen, har əs Ibrahim iman-net wa n aljad-nanaḡ a t-ikfan təzunt ta n marawat n awa d-oḡa.

⁵ İlimaman win Kəl-Lebi, ikf-en alwajib ihân Əttawret alxaq n ad garrawan šiməssədək ən tamattay n Is-rayil, əmosnen imədrayan-nasan, kuddeḡ əs əntanay da ihayawan n Ibrahim a mosan.

⁶ Malək-Assaddeq amaran, wər imos iyyan daḡ Kəl-Lebi, mišan igraw təməssədək n awa ila Ibrahim. Təzzar ittar Malək-Assaddeq a igan albaraka y Ibrahim s ənta as iga Məššina arkəwalan!

⁷ İgməd aššak əs wa ogaran adkul ənta a itattaran a igan albaraka i wa das-əndərran.

⁸ İlimaman win garrawnen šiməssədək ən tamattay, aytedan a mosan a z'iba əzəl iyyan, Malək-Assaddeq amaran, sitaddan Əlkəttaban əs iddâr.

⁹ Xasil Kəl-Lebi iman-nasan, s əntanay a garrawnen šiməssədək, irzâm fall-asan Ibrahim təməssədək əs tahakkay ta tat-iga i Malək-Assaddeq.

¹⁰ Fəlas as issəlkad Malək-Assaddeq y Ibrahim, Lebi wər ihəw.

¹¹ Ənnar ikmâl ənnizam wa n limaman win Kəl-Lebi, s ənta a isəbdadan əlqanun wa issəwar Məššina tamattay, wədi wər tu-z-iməl əlimam ən taggayt ta n Malək-Assaddeq daḡ adag ən limaman ən taggayt ta n Harun.

¹² Amaran dad zamas imməttay ənnizam wa n limaman, wədi əlqanun da ilzâm ad ammattay.

¹³ Əlimam wa fəl əmməgradan salan win, in tawşet iyyat. Tawşet ten amaran wər tat-ihə awedan as kala ad iqqal əlimam.

¹⁴ İllikan əs Əməli-nana, tawşet ta n Yahuda a d-igmad, tawşet ta amaran wər d-idkel Musa batu-net fadda daḡ batu n əšşəḡəl wa n tişit n əlimam.

15 Arat wen, isitadd-ay wëllen as d-inafalal əlimam iyyan olân əd Malək-Assaddeq.

16 Əlimam wa, wər d-iga iguz n ənnizam wa n ənəməkusa. Kalar iguz ən tarna ən təməddurt təxlâlat a d-iga,

17 fəlas ənnan Əlkəttaban daɣ batu-net: *Əlimam a təmosa har faw, daɣ taggayt ta n Malək-Assaddeq.*

18 Əlqanun wa t-illan kala da, itawakkas-in, fəlas wər ila tarna waliyyat za wər infa wala.

19 Əlqanun wa, wər d-issəxsal arat waliyyan ikmâlan. Attama amaran wa danaɣ-itawakfan ofâ wa n əlqanun wen. Attama wa, ənta a danaɣ-issəfragan ənəmihaz əd Məşşina.

20 Arat wa kul Məşşina a ihadan daɣ batu-net. İlimaman win hadatnen wər ihed Məşşina daɣ batu-nasan,

21 Ƴaysa amaran, Məşşina a ihadan daɣ batu-net, id Əlkəttaban a ənnanen: *Əməli a ihadan, amaran wər ilkem a d-iqqal daɣ batu-net. Əlimam a təmosa har faw.*

22 Əmmək en daɣ as tarrayt ta n Ƴaysa a fəl nəkkas aşşak âs nəgrâw arkawal ən tassaɣ əd Məşşina ofân wa irəwan.

23 İlimaman əknânen igət a t-əmalnen s ənəməkusa, fəlâs wər tan-toyya təmattant s ad t-əməlan har faw.

24 Ƴaysa amaran ill-ay har faw. Awen daɣ a fəlas tişit-net əlimam wər tətəməttəy.

25 Daɣ adi ifrâg tehakkay n əlɣillas ikmâlan y aytedan win din-əzzəhaznen iman-nasan Məşşina əs tarrayt-net, id iddâr har faw, y ad işşâwal i Məşşina s esəm-nasan.

26 Ƴaysa ənta a imosan əlimam wa zəwwəran was nəddərar, id zəddig, wər t-iwer lahan waliyyan, wər kala ad iga abakkad, wər ola əd nasbakkadan alxal, immədkal imal dənnəg jənnawan.

27 İlimaman win hadatnen zawwarnen ilzâm-tan igi ən təkutawen akk əzəl fəl əddəlil ən bakkadan win-nasan iman-nasan təzzar, dəffər adi win tamattay. Ƴaysa amaran ənta wər iddərar s awen, fəlas takutay iyyadda a iga, ig-et şiyyat əs tahakkay ta iga iman-net.

28 İlimaman win zawwarnen isannafran Əttawret, aytedan a mosan ərkamnen. Mişan wa isannafran Məşşina ig-ay əlimam wa zəwwəran əs təhuday ta iga daɣ batu ten, wədi Barar-net a imos, igrâwan alkamalat har faw. Tahudday ten ig-et Məşşina dəffər as iziraz ənnizam wa n Əttawret.

8

Əlməsix, ənta a imosan Əlimam wa zəwwəran daɣ arkawal wa idkalan

¹ Amaran, əntada əlməxsud n awas nara tənna-net: Nəla əlimam igân ta day təzzəwwərt, iqqıman day əxil ən Məşşina day taɣmar-net di maqqarat day jənnawan,

² iha əşşəxəl wa n adag wa zəddigan, s ənta a imosan ahaket wa n tidət, ahaket was Ɛməli Məşşina iman-net a t-ikrasan, wərgex aggadəm.

³ Ɛkkulluk n əlimam wa zəwwəran, əşşəxəl-net igi ən təhəkkuten əd təkutawen. Day adi əlimam wa-nana da iwâr-tu ad agu takutay ta-net.

⁴ Ɛnnar iha ȴaysa əddənet dada, wədi wər z'iqqəl əlimam, fəlas əşşəxəl wen əhân-tu limaman win tagginen şikutawen s əmmək wa imal Ɛttawret.

⁵ İlimaman win, ɣabbadan Məşşina s əmmək imosan əsəkbar əd şaşşelan n aratan win əhanen ijənnawan. Fəlas assaxa wad isimutug Musa y akaras n ahaket, omar-tu Məşşina inn-as: *Ɛnəy, arat kul ag-ay s əmmək iman-net wa kay-itawasaknan fəl ədɣax.*

⁶ Amaran əmərədda, əşşəxəl ogaran wəllen wa n limaman a itawakfan ȴaysa s ənta a imosan əlimam-nana wa zəwwəran, fəlas ənta a imosan almawakkil-nana day arkawal ən tassaɣ ta tofat, təbdâdat fəl arkāwalan win ofänen.

⁷ Amaran, ənnar ikmâl arkawal wa azzaran, wər za tagu addararat s ad iggəz wa aynayan edag-net.

⁸ Tidət as Məşşina issiwar tamattay-net lahan, assaxa wad inna: *«Inna Ɛməli: Ɛnəy! Ɛzayan-du adan a day za nəməggax əd tamattay n İsrayil əd ta n Yahuda arkāwal ən tassaɣ aynayan.*

⁹ *Arkawal ən tassaɣ wa, wər z'alu əd wa naməggax əd marawan-nasan, assaxa wa tan-d-ədkalay əkkasaq-qan-du day Masar. Dad zamas wər əɣdelan day arkawal ən tassaɣ wa dər-san namagga, wədi əgmada batu-nasan, inna Ɛməli.*

¹⁰ Amaran ənta da arkawal wa aynayan ən tassaɣ wa za nəməggax əd maddanəs n İsrayil dəffər adan win den, inna Ɛməli: *Ad agax əşşərədan n əşşəriɣa-nin day əgərri n akkiyyan day-san, əktəbaq-qan day wallan-nasan, əqqəlay Ɛməli-nasan, əqqəlan tamattay-nin.*

¹¹ *Wər tan-iha i z'iləsan əsəssəɣri n əmidi-net, wala amadrax-net ann-as: "Iwâr-kay ad təssəna Məşşina" fəlas ketnasan a di-əssənan a d-ibazan ɣur wa əddarran-nasan, har wa waşşaran-nasan.*

¹² *Fəlas a dasan-əhənətteɣ day talbast ta əgan, əssurəfay-asan ibakkadan-nasan şiyyat.»*

¹³ Dad zamas Məşşina inna: *wa aynayan, day adi arkāwal wa azzaran iqqal arat waşşaran. Amaran arat as waşşar, wədi iha tarrayt n ad iba tamayyamayt-net.*

9

*Adkul ən təkutay ta n arkawal wa aynayan**Arkawal wa irəwan əd wa aynayan*

¹ Arkawal wa azzaran ila əşşərədan win əlxibada, ila deş edag n əlxibada ihân əddənet dada.

² Ahaket a itawakrasan, imosan əşşin daggan. Edag wa azzaran ih-ay əsəkbəl ən fətəlaten əd tabəl əd təgəlwen şin tat-əggarnen a d-əmmewaynen əmosnat şikutawen y Əməli. Edag wen esəm-net Edag wa Zəddigan.

³ Amaran dəffər anayər wa n əşşin illân den, ill-ay adag was itawannu Edag wa Ogaran Tazdak.

⁴ Edag wen ih-ay majmar n urəş a fəl tawasaqqadan ađutan win əzodnen. Ill-ay deş əssənduq wa n tassaş ilsân urəş. Əssənduq wen ih-ay əşəzu n urəş ihâ amensay wa n Manna, tah-ay deş tallaş ta n Harun tənşârat, əd səlluman əşşin win fəl iktab arkawal ən tassaş.

⁵ Afalla n əssənduq wen, əbdâdan fall-as şaşşelan n angalosan win Kəruban əssiknənən tanaya ən Məşşina əgân telay s əfrutan-nasan y əsəhər-net s ənta a fəl inaqqal əzni ən takutay ta təmmasat ibakkadan. Mişan əmərədda wər za nagu isalan kul day batu ta.

⁶ Amaran Ahaket wa n əmənəy imos əşşin daggan, a tanimosan Edag wa Zəddigan d Adag wa Ogaran Tazdak. Edag wa Zəddigan taggazan-tu limaman alwaş kul, agin day-as əşşəşəl-nasan wa n əlxibada.

⁷ Edag wa n əşşin day Ahaket amaran, Əlimam wa Zəwwəran şas a das-itaggan iguz iyyanda day awatay. Den day ad itaway azni n əmudar ag-ay takutay dat Məşşina fəl ad igrəw təsureft ən bakkadan win wər nəga s əttənəşmur gər za win-net wala win tamattay.

⁸ Infas wa Zəddigan issikn-anay s awen âs, tarrayt ta n Adag wa Ogaran Tazdak wər za tənəfiləl iket əşşalan aytedan s ahaket wa azzaran n arkawal.

⁹ Arat wen, imos əlmital n azzaman win nəha əmərədda. Almayna n awen as şihəkkuten əd təkutawen wər əfregnat ad əzzəzdəgnat iwallan n aytedan win şabbadnen Məşşina s əmmək wa.

¹⁰ Aratan win əmosan əşşərədan əqqâlnen imensewan, d aratan win tamaşwinen, d əzzənəfan aggotnen n alwalatan. Əşşərədan win den, əntanay as əşşalan aytedan har d-ewad alwaş wa day issəbdad Məşşina ənnizam wa aynayan.

¹¹ Mişan Əlməsix osâ-du imos əlimam wa zəwwəran n aratan olâşnen win t-əlanen. Iggaz ahaket wa ogaran

təzzəwwərt, ikmâlan, âs wərgex ifassan n aytedan a t-əganen, almaɣna wər iha əddənet dada.

¹² Əlməsix iguz iyyanda a iga šiyyat y Adag wa Zəddigan. Amaran azni-net iman-net a ikfa imos takutay, wərgex azni ən zulaɣ wala izəgran. Əmmək en daɣ as dana-d-igraw əlɣillas iɣlâlan.

¹³ Fəlas, dad zamas azni ən zulaɣ d əzni ən zəgran d eɣəd ən təharaten šin rakammattnen win tawanbasnen əfrâgan əzəzdəg ən təɣəssa-nana,

¹⁴ ma dər z'agdu əzəzdəg wa dana-z-agu əzni n Əlməsix, izzəzdəg iwallan-nana daɣ arak mazalan win tawaynen aggadəm s əhluk, fəl ad nəɣbəd Məššina di iddarän, id Əlməsix a ikfan iman-net i Məššina əs tarrayt n Infas wa Zəddigan di iɣlâlan, imos takutay wər nəla a imosan əlɣib.

¹⁵ Awen daɣ a fəlas Əlməsix a imosan almawakkil-nana daɣ arkawal ən tassaɣ wa aynayan. Dad zamas Əlməsix aba-tu fəl ad əgrəwan aytedan tədarfit daɣ bakkadan win əgan daɣ azzaman ən tassaɣ ta tərəwat, aytedan win du-tawaɣranen, ad əgrəwan təkəsət təɣlâlat tas itawagga arkawal-net.

¹⁶ Amaɣer ilzâm as kundaba igmad aššak təmattant ən wa t-igan,

¹⁷ fəlas amaɣer, wər sər-əs itəwəggu əššəɣəl iket wər aba wa t-igan, id wər z'itəwəqbəl iket iddâr məššis.

¹⁸ Awen daɣ a fəlas arkawal wa azzaran, ənta da tanaɣla n əzni as inta.

¹⁹ Dəffər as imâl ənnəbi Musa alwajiban kul win Əttawret i tamattay, idkal-du azni ən zəgran əd zulaɣ d aman, idkal-du təduft zaggaxat d agabal ən xisof, infas sər-əs əlkəttab iman-net əd tamattay ketnet,

²⁰ igannu: Ənta da *azni n arkawal ən tassaɣ wa dawan-issəbdad Məššina*.

²¹ Dəffər awen, infas Musa s əmmək wen da s əzni wen Ahaket əd mutag-net kul win əlɣibada.

²² Daɣ awa inna Əttawret, taššam n aratan azni as tawazazdagan, amaran wər tu-təlla təsureft ən bakkadan âr s ad inɣâl əzni.

²³ Daɣ adi, ilzâm as šaššelan n aratan win əhanen ijənnawan əmmək wen daɣ den as z'izdagan, aratan amaran iman-nasan win əhanen ijənnawan, ilzâm ad izdagan əs təkutawen ədkâlne wəllen.

²⁴ Amaran Əlməsix, wərgex Edag wa Ogaran Tazdak əkrâsan aytedan imos əlmital ən wa n tidət a iggaz, kalar ijənnawan iman-nasan a iggaz, fəl ad iməl dat Məššina har əmərədda, imos almawakkil-nana.

²⁵ Wər iggez deŸ edag wen y a daŸ-as akfu iman-net imos takutay daŸ taklaten aggotnen, zun awa itaggu Əlimam wa Zəwwəran əkkulluk n awatay itaway-in azni wər ila.

²⁶ Ənnar adi a igan, wədi Əlməsix a du-tənta əddənet itaŸazzab. Kalar ənəfilal iyyanda šiyyat a iga Əlməsix, daŸ ələqqam n azzaman, fəl ad iməs ibakkadan n aytedan əs tahakkay ta iga iman-net imos takutay.

²⁷ Zund əmmək əs aggadəm təsəlkamt-net təmattant iyyadda, dəffər adi ibdəd fəl mazalan-net,

²⁸ əmmək wen daŸ den əs Əlməsix da ətəwəkfa iyyanda a itawagga imos takutay, fəl ad iməs ibakkadan n aytedan aggotnen. Amaran assa-net wa n əşšin, wər d-igla fəl ames ən bakkadan, kalar fəl ad ixləs win das-əssəgadnen əknân tara n a d-asu.

10

ƏşşəŸəl ikmâlan wa təmos təkutay ta iqqal Əlməsix

¹ ƏşşəriŸa wa n Əttawret şaşşelan Ÿas a imos ən tənfaŸen şin d-əzaynen. Əlmital-nasnat da wər t-ewed. Awen daŸ a fəlas şikutawen şin izzəlzam ənnizam wa n Əttawret, tawagginen har faŸ daŸ əkkulluk n awatay, wər ilkem ad əfragnat tehakkay n alkamalat i win əŸbadnen Məşşina.

² Ənnar ihakku əşşəriŸa wen alkamalat, wədi aytedan win əganen şikutawen şin den ad ammazzayan d igi-nasnat fəlas irəw as əgrawan təsureft ən bakkadan-nasan šiyyat, zaddogan wallan-nasan daŸ id t-illa abakkad.

³ Kalar şikutawen şin den, əkkulluk n awatay əssiktanat-du aytedan ibakkadan-nasan.

⁴ Fəlas wər t-illa əmmək as ifrâŸ əzni ən zəgran wala wa n zulaŸ emes ən bakkadan.

⁵ Awen daŸ a fəlas assaŸa wa d-iggaz Əlməsix əddənet, inna i Məşşina: *Wərmad təddirarəŸ əs təkutay za wala təhəkkut, mişan təkfey-i tayəssa.*

⁶ *Wərmad dak-əgraznat təkutawen şin tirəkəmmittən za wala şin takkasnen ibakkadan.*

⁷ *Awen daŸ a fəl ənne: Nak da a d-osan da, fəlas batu-nin a daŸ əşşəwalan əlkəttaban. Ose-du ya Əməli-nin y ad aŸay tara-nak.*

⁸ Inna: *Wərmad tareŸ şikutawen, wala şihəkkuten, wala şikutawen şin tirəkəmmittən, wala şikutawen şin takkasnen ibakkadan, wər dak-əgreznat wala andərran. Dər iga awen da ya şikutawen şin den, tiwagganat s əmmək iman-net wa imal əşşəriŸa wa n Əttawret.*

⁹ Dəffər awen inna: *«Nak da a d-osan da y ad aŸay tara-nak.»* Əmmək en daŸ as izzərəz ənnizam wa azzaran, issəbdad wa n əşšin.

¹⁰ Tehakkay ta iga Ƴaysa Ǝlməsix taƷəssa-net əs tara ən Məššina, ənta a danaƷ-takfat tazdak əs tarrayt ən təkutay iyyadda ta n təzərəst ta təqqal təƷəssa-net.

¹¹ Ǝkkulluk n əlimam iha edag n əššəƷəl-net akk əzəl y ad agu šikutawen aggotnen olânen, mišan wər ilkem ad əfragnat emes ən bakkadan n aytedan.

¹² Ǝlməsix amaran, dəffər as iga takutay iyyadda ta n təzərəst fəl bakkadan n aytedan, iqqim daƷ əƷil ən Məššina.

¹³ Illa den da iqqâl y əzəl wad za təwəggin zənga-net daw daran-net.

¹⁴ Takutay iyyadda wər nəla təmidit as ikfa alkamalat har faw y aytedan win izzəzdaƷ daƷ bakkadan-nasan.

¹⁵ Infas wa Zəddigan isitadd-anay batu ta, id a inna:

¹⁶ *Ǝnta da arkawal wa dər-san za nəməgga dəffər adan win den, inna Ǝməli: Ad agay əššərədan n əššəriƷa-nin daƷ wallan-nasan, əktəbaq-qan daƷ əgərri n akkiyyan daƷ-san.*

¹⁷ Dəffər awen inna: *Wər ilkem a d-ələsa təkatawt ən bakkadan-nasan, wala talbast-nasan.*

¹⁸ Amaran, dad zamas ibakkadan tawasarafan, wədi ab'as təga addararat əs təkutawen šin əmmasnen ibakkadan.

Ǝzəgzan əd zəmmerat

Ǝnəmihaz n Ǝməli d iba n tawaƷlay n ələqqam

¹⁹ DaƷ adi imədrayan-in, nakkanay nəkkâs aššak daƷ iguz n Adag wa Ogaran Tazdak, id Ƴaysa a inƷalan azni-net fəl əddəlil-nana.

²⁰ Ƴaysa a danaƷ-olaman tarrayt ta taynayət, təddârat, issəƷras-anay anayər s Adag wa Ogaran Tazdak, almayna issəƷras-anay əs təƷəssa-net iman-net.

²¹ Ǝmmək en daƷ âs nəla əlimam wa zəwwəran s ənta a itawazazaran y ahan ən Məššina.

²² DaƷ adi, zənnəmihəzatanay iman-nanay əd Məššina əs wallan əxdâlnen, d əzəgzan ikmâlan, fəlas ətəwəzəzdaƷ a əgan wallan-nana daƷ igi n id t-illa arak əmedran, tətawašarad təƷəssa-nana s aman win zaddognen.

²³ Zəzzəwətətana wəllen daƷ əzəgzan d attama win nəga, nəkkâs daƷ-san aššak, fəlas wa danaƷ-igan arkāwalan issiflas wəllen.

²⁴ Akkiyyan daƷ-na issənet daƷ win hadatnen, fəl ad nətinəməggu aholan ən tara əd mazalan win olaynen, nəga awen əs gəlleyat.

²⁵ Ad wər nəgməd əljəməƷat ən məzzəgzan ta nəha, zun awa imosan alxal n aytedan wiyyad. Kalar tinəməggiwatanay ənnəsixatan id təhannayam as əzəl wa ilkaman ihoz.

Ërruymatan d ənnəsixatan: Ad wər nəmmazzay d igi n attama

²⁶ Amaran as nətaggu abakkad igân s əttənəgmur, dəffər as nəssân tidət, wədi wər tu-təlla təkutay iyyat a fall-anaq-qu za təməsət.

²⁷ As iga adi, ad ib'as tu-təlla tarrayt waliyyat âr ta n əsəgəd y əşşərixa labâsan ən Məşşina əd təmsay ta za təsərrəkəmmet aytedan kul win əmosnen izənga ən Məşşina.

²⁸ As ugay awedan əs ləkkum y əşşərixa wa n Əttawret, imos âs əllânat-tu sanatat madey karadat təgəyyawen a t-ənaynen, wədi wər das-tu-təlla təsüref t waliyyat, kalar əşşərixa-net təmattant.

²⁹ Dağ adi, ma dər z'agdu attadib wa dər ihor awedan wa issəkna iba ən safrar i Barar ən Məşşina, issəkna məlka y əzni ən tassağ wa t-izzəzdagan, isammadray Infas wa Zəddigan ihakkin arraxmat?

³⁰ Nakkanay nəssân wa innan: *Nak a itabazan s əşşərixa, nak a z'ixkəman y awedan kul awa dər ihor.* Innâ dey: *Əməli ad abəz tamattay-net s əşşərixa.*

³¹ Arat səksədan wəllen a imos ad iggəz awedan ifassan ən Məşşina di iddaran.

³² Aktiwat-du azzaman win azzarnen, dəffər as kawan-ikfa Məşşina ənnur-net, təmmiqqasam d alğazab labasan, əd təbəllant təsohet,

³³ fəlas alwaq iyyan tətawakaggaram dat awedan kul, tətawasaknim arkanay, alwaq iyyan amaran tətawayam tadhəlt-nawan y aytedan win tawasakninen alğazab zun wen.

³⁴ Təhinattem y aytedan win əhanen kasaw, təssânam dağ-san, təqbalam əs man filawasnen a dağ-wan attar-masan ərrəzəxan-nawan, id təssânam âs təlâm ərrəzəxan ədkâlnen, a t-əllânen har faw.

³⁵ Dağ adi, ad wər tammazzayam d ikus n aşşak wədi, fəlas ənta a kawan-z-akfin arozan zawwarnen.

³⁶ Təddiraram əs zəmmerat fəl a du-tassandim tara ən Məşşina təgrəwam arat was iga arkawal-net.

³⁷ Fəlas inna Məşşina: *Wər din-iqqim âr arat n azzaman, azzaman wər nəggət xas, y a d-asu was ihor a d-asu. Wər din-z-ahag.*

³⁸ *Fəlas wa dat-i oyadan, ad igrəw təməddurt ta təxlalat s əzəgzan-net. Mişan as iqqal dəffər-əs, wədi ad ib'as t-əran man-in.*

³⁹ Nakkanay amaran, wər nəha aytedan win taqqalnen dəffər-san abəzan tarrayt ta n əhluk. Kalar nəha win əttafnen əzəgzan-nasan y ad əgrəwan əlyillas.

11

Ʒægzan ən təgəyyawen n arkawal wa irəwan

¹ Ʒægzan almayna-net âs arat was nəga attama-net, wədi nəkkâs aššak as nəgrâw-tu. Almayna-net ikus n aššak daɣ aratan kudde wər tan-nəhənnəy.

² Ʒægzan en daɣ a fəl əgrawan marawan-nana ətəwəqbal ɣur Məššina.

³ Amaran ənta a danax-isassagran âs əddənet awal ən Məššina as du-təxlak. Ʒemmək en daɣ as awa nəhənnay, igmâd-du a wər nətəwəhənnəy.

⁴ Ʒægzan, ənta a fəl ikfa Habila takutay tofât ta ikfa Qayin. Ʒægzan en daɣ a fəl tətəwəqbal tišit ən Habila alyadil id Məššina iman-net a iggəyyen as šikutawen-net tiwəqbalnat. Ʒægzan a d-ewayan âs Habila aba-tu mišan har harwa iššewal.

⁵ Ʒægzan, ənta a fəl immədkal Xenok əs jənnawan, wər tu-tədes tamattant. *Wər kala ad ilas ətəwənanay dəffər awen, fəlas Məššina a t-idkalan.* Amaran dat əmədkəl-net, igrâw ətəwəqbal ɣur Məššina id ənnan Ʒlkkəttaban: *Xenok igrâz i Məššina.*

⁶ Ʒægzan ənta ɣas a ihakkin aytedan ad əgrəwan gərrezat i Məššina, fəlas awedan wa iqbalan Məššina daɣ əwəl-net, wədi kundaba izzəgzan âs Məššina ill-ay, izzəgzan deɣ âs itaggu arozan i win gammaynen masnat-net.

⁷ Ʒægzan, ənta a fəl ikras ənnəbi Nux aɣlal n aman fəl ad iɣləs ayaywan-net, id əmiksad ən Məššina a imos ikkâs aššak daɣ arat wa das-isannafalal Məššina, kudde wər t-ihənnəy. Ʒemmək en daɣ as obaz Nux əddənet s əššəriɣa, iqbal Məššina tišit-net aləs oɣâdan əs tarrayt n əzəgzan-net.

⁸ Ʒægzan a fəl ibbərdaɣ ənnəbi Ibrahim i Məššina s iki wa iga akal was das-itawanna ilkâm ad iggəz təla-net, assaxa wa t-ixra Məššina. Ifal akal-net, igla da wər issen id ikka.

⁹ Ʒægzan a fəl igla Ibrahim, ikka akal was das-iga Məššina arkawal-net, iqqal daɣ-as ənaftax, ixsâr daɣ həktan ənta d Isəhaq əd Yaquub âs ənta dər-san as iga Məššina arkawal wen.

¹⁰ Arat wen ig-ay Ibrahim fəlas issigad y əɣrəm wa wər nətəbərəjjit, aɣrəm was Məššina iman-net a t-id-inzaman ikras-tu.

¹¹ Ʒægzan a ikfan Sarata barar daɣ tušaray-net. Sarata wər tətulu bararan, mišan təgraw əzzurrəyya, id əzəgzan a təga s arkawal ən Məššina di n alyadil.

12 Awen day a fəlas aləs iyyanda, ihân ələqqam ən təxrəst-net, a igrawan əzzurrəyya igân igət wa əgan etran day jənnawan, madex şiblalen n amaḍal əs tu-wər-illa i ifrâgan əşidən-nasnat.

13 Əzəgzan en day a əgan aljadan win den, har tan-aba da wər əgrewan aratan win as dasan-itawagga arkawal-nasan, mişan awa sər-san əgan day əzəgzan zun as ənayan-tan day igəg, əgâran fall-asan assalam, əggiyyen dat awedan kul âs inaftaxan əd xərab xas a mosan day əddənet.

14 Amaran win əganen awal wa, sitaddan sər-əs âs gammayan akal ən man-nasan.

15 Ənnar tan-iggâz əsuf n akal wa d-əfalan, wədi ad t-əqqəlan, fəlas əgrâwan edag n awen.

16 Mişan, akal idkâlan dənnəg wen as əgan ənnəyat-net, almaɣna ijənnawan. Awen day a fəlas, Məşşina wər fall-as imos təkarakit tişit ta iga Əməli-nasan, fəlas isimatag-asan aɣrəm day jənnawan.

17 Əzəgzan ənta a fəl ikfa Ibrahim barar-net Isəhaq y ad iqqəl təfaskay assaxa wad ijjərrab Məşşina əzəgzan-net. Barar-net a n iyyanda a ikfa, ənta wa igrawan arkawal.

18 Amaran ənta en day as inna Məşşina: *Tarrayt n Isəhaq as za təgrəwax əzzurrəyya.*

19 Day iduf n Ibrahim, Məşşina ila tarna n əsənkər day təmattant. Awen day a fəl das-oyya Məşşina barar-net, zun as issinkar-as-t-idu day tamattant.

20 Əzəgzan a fəl ittar Isəhaq i bararan-net Yaqub d Ezaw a dasan-igan albaraka day azzaman win d-əzaynen.

21 Əzəgzan a fəl ittar Yaqub day ələqqam ən təxrəst-net y akkiyyan day bararan ən Yusəf, *issjad issîdad s əmi ən tallaq-net.*

22 Əzəgzan a fəl išşewal Yusəf i Kəl-İsrayil dat təmattant-net, day batu n agamad-nasan Masar, omar-tan s awa z'agin i ɣasan-net.

23 Əzəgzan ənta a fəl itawayɣbar Musa ɣur təhəwt-net har iga karadat təlil. Əɣbaran-tu marwan-net id ənâyan as barar ihossayan a imos, amaran əzəgzan-nasan a dasan-igḍalan a tan-təggəz tasa n awas omar Firɣawna, imosan əmənokəl ən Masar.

24 Əzəgzan a fəl uɣay Musa dəffər tadwala-net s ad iqbəl tişit ən barar n elles ən Firɣawna.

25 Əzəgzan en day a fəl issof Musa ad irtəy əd tamattay ən Məşşina day aɣazab, iksan tənəfləyt n əddənet əd bakkadan-net wər nəmos âr arat n adan.

26 Musa issof ad itəwəsəknu məlka wa itawasakna Elməsix, fəlas arozan win z'igrəw əs tarrayt ten, ogaran

wəllen ərrezəyan ən Masar; Musa iswād day aratan win d-əzaynen, a tan-imosan arozan win ihakku Məššina.

²⁷ Ʒəzəzən a fəl igmad Musa Masar, wər tu-taha tasa n əmənokal iha alham labasan, fəlas əsəggətəkki a iga id ihannay a wər nətəwənəy.

²⁸ Ʒəzəzən a fəl iga Musa təfaskay ta n əmud wa n Akkay, infās azni ən təfaskay ten i tamawen ən təsəhar ən nan ən Kəl-Israyil, fəl ad wər idəs əmahlak iğəfədda-nasan.

²⁹ Ʒəzəzən a tan-issəxrasan Agaraw was itawannu wa Zaggayan, jiwanken fəl amaḍal iqquran, ilmaz agarew en Kəl-Masar win əgmaynen d a tan-awədan.

³⁰ Ʒəzəzən a iggədlan afarag wa iğlayan ayrəm ən Yerikaw, dəffər as əgân Kəl-Israyil əssa adan ɣallayan-t-id.

³¹ Ʒəzəzən wa təga Rahab ta n təkərwat ənta a das-igdalan a tat-iba assaxa wad əhlakan aytedan win ugaynen s əbərdəg i Məššina, id Rahab a təqbalat a ɣur-əs əssəgənan nassasaman n Israyil, təg-asan isəxlak.

³² Ma dawan-z-anna dəffər aratan win? Wər z'əgrəway alwaq ewādan a dawan-əššiwəla day batu ən Jedeyon d Ʒəmbərek əd Samson əd Yəftay əd Dawəd əd Saməwel, d ənnəbitan win hadatnen.

³³ Ʒəzəzən as obazan meddan win ikallan, əxkaman fallasan s əššəriɣa oɣadan, əgrawan arkəwalan win dasan-tawagganen, ədbayan imawan ən harran.

³⁴ Ʒəzəzən as ənɣan šiməs zawwarnen, əɣlasan day təkabiwen əknānen tawala, əgrawan tarna day adag ən rəkkəm was kala t-əgan. Ʒsəknan tišit-nasan inammagan, ərzan igənan.

³⁵ Ʒəzəzəzannat tədoden tawasankaran-asnat-du nəmməttan-nasnat day təmattant. Wiyyad amaran tawasaknan aɣazab səksədan, mišan ugayan s ad əgrəwan tədarfit ɣur aytedan win tan-zaxəzəzabnen. Arat wen əgāntu fəl ad əgrəwan təməddurt ta təɣlalət dəffər tanakranasan day tamattant.

³⁶ Wiyyad əgrawan-tan jarrabatan labasnen əgānen day təmakkakkayt, əd təwit, əd təzabagawen, əd kasaw.

³⁷ Wiyyad tawənɣan əs təgür ən təhun, wiyyad əmmolayan əs təkəjaten, wiyyad tawənɣan əs təkabiwen. Wiyyad itāway-tan aɣaf wər əssenən is ədagan, əlsân igəškan n ayfəd əd win wəlli, wər əlen a d-ixlākan, irtāy-asan awen d as tiwadgazan, tawasaknin arkanay.

³⁸ Aytedan win, wər təhor əddənət d a tat-əhân, itāway-tan aɣaf day tənariwen, d ədɣayan, əd kəzman əd ɣayan.

³⁹ Aytedan win kul iqbal-tan Məššina əs tarrayt n əzəzən-nasan, mišan wər tan-iha i ināyan arkawal wa

dasan-itawaggan.

⁴⁰ Məşşina kala dâ issins-anax arat idkâlan wəllen fəl ad wər əgrewan aytedan win den alkamalat iket wər dər-san nəjjəyat agaraw-net.

12

Ləkkum i tarrayt ta n zəmmerat d igi ən təməddurt zəddigat

¹ Awen daɣ a fəlas nakkanay da, dad zamas ɣilayɣalayan-ana məzzəgzan əgānen igət ogdān d awa, wədi əgəratanax-in əzuk kul wa danax-iwaran, əd bakkadan əssirɣasnen alamaz-nana, naglu har təzərəst ən təbəllant ta danax-issəwar Məşşina.

² Əswədatana faw daɣ Ƴaysa s ənta a danax-olaman tarayt ta n əzəgzan, təkakit alkamalat. Ƴaysa iqbəl aɣazab fəl təgəttawt imosan təkakit zəwwərat, id təkakit ten wər ɣur-əs təmos wala, fəlas ihannay təfalawist ta das-təqqalat. Dəffər awen ikka ijənnawan, iqqim daɣ əxil ən Məşşina daɣ taɣmar-net.

³ Awalla, aktiwat was əgan nasbakkadan akyud ogdān d awa, fəl ad wər tayyim iman-nawan təgmədam tarrayt.

⁴ Təbəllant ta təgam d abakkad, wər tat-təgem har tamattant.

⁵ Təttəwam-in ammar wa dawan-iga Məşşina, olān d ənnəsixa wa itaggu awedan i bararan-net, inna: *Barar-in, ad wər təsəttəlkəkəy attadib n Əməli, ad wər təqqəla dəffər-ək as kay-issəwar Əməli lahan.*

⁶ *Fəlas Əməli itawaddab win ikna tara, iggāt win iqbəl daɣ tişit ən bararan-net.*

⁷ Əqbəlat aɣazab wa tətəggim. Məşşina itawaddab-kawan fəlas bararan-net a təmosam. Awak ill-ay barar wər itəwəddib abba-net?

⁸ As imos əs wər kawan-itəwəddib Məşşina, zun awa itaggu i bararan-net kul, wədi wər təmosam bararan-net win tidət, kalar bararan ən bannan a təmosam.

⁹ Dad zamas ketnana nəla abbatan daɣ əddənət a danatawaddabnen, nəssiɣmar-tan, manəmmək as wər za nab-bardag i Məşşina s ənta a imosan Abba-nana wa ihan ijənnawan, fəl ad nəgrəw təməddurt ta təɣlalət?

¹⁰ Abbatan-nana win əddənət tawaddaban-ana daɣ arat n azzaman wər nəggət daɣ batu n idufan-nasan, Məşşina amaran, tənfa-nanax a fəl danax-itawaddab, fəl a danax-iqbəl daɣ tazdak-net.

¹¹ Attadib wər imos arat izodan s awedan daɣ amazay wa das itawaggu, kalar arat a imos iyaşşadan iman. Mişan

win tawawaddabnen, təsəlkaamt-nasan ad əgrəwan alxer, əd təməddurt toxâdat.

¹² Awen daɣ a fəlas: ifassan-nawan ərkaman, ifaddan-nawan deɣ ərkaman, daɣ adi səssuhətat-tan.

¹³ Əlkəmat i tarrayen šin oɣadnen. As təgam adi, aytedan win ərkammen, wər dasan-z-ittəy rəkkəm, kalar ad əzzəyan.

¹⁴ Aɣliwat daɣ igi n alxer d awedan kul, tagim təməddurt zəddigat. Awedan wa wər nəga təməddurt zun tədi, wədi wər z'ammanay d Əməli.

¹⁵ Əɣləyat wəllen, fəl a tu-wər-iməl awedan issiban fəl man-net arraxmat ən Məššina. A daɣ-wan tu-wər-iməl awedan waliyyan a z'iqqəlan zun annabat səməman a du-z-idwəlan awəy-du iɣšudan a z'əgdələn y aytedan aggotnen tazdak.

¹⁶ Ad wər ikkəs waliyyan daɣ-wan tarna i Məššina, madəɣ isəmmədrəy aratan win zaddogən zun awa iga Ezaw a din-izzənzən alxaq-net wa n tišit n aɣafadday, isammaskal-tu amensay.

¹⁷ Təssānam əs dəffər awen, igmay albaraka wa n tišit n aɣafadday, mišan igdal-as-tu abba-net. Iyyəwan tala, mišan indar-as a d-issuɣəl abba-net daɣ batu ten.

Təkawent i Məššina d əlyibada-net

¹⁸ Amaran, wərgəɣ arat as ifrāɣ awedan edes-net a din-təhozam, zun təmsay təmihandarət, madəɣ šiyay, madəɣ əhu, madəɣ tazəkkay, zun awa əgan Kəl-İsrayil daɣ tanəɣay.

¹⁹ Wərmad təslām y anasaɣ n asak, wala tərnuq zun tas əslan Kəl-İsrayil, əgməyan a das-wər-ələsan tesalay,

²⁰ fəlas wər əqbelan tarɣəmt ta dasan-tənnat: *Wa idasan adɣaɣ, gər iqqal awedan wala əmudar, wədi ad ammat əs təɣur ən təhun.*

²¹ Arat wa itawanayan den, i səksədan wəllen, har əs idkal Musa əməsli-net inna: «*Tah-i tasa wəllen, təga daɣ-i taysəst.*»

²² Kala kalar kawanay, təhozam-in adɣaɣ wa n Səyon, d əyrəm ən Məššina di iddaran, a t-imosan Yerusalam ta təhat ijənnawan, təhozam-in deɣ šimərwen ən gimən n angalosan əmmınaynen əknân təfalawist.

²³ Təhozam-in deɣ tiddawat ən ɣəfədda win as ik-tab Məššina esmawan-nasan daɣ jənnawan, təhozam-in Məššina s ənta əmašraɣ n aytedan kul, təhozam-in aytedan kul win oɣadnen, əgrəwan alkamalat ɣur Məššina.

²⁴ Təhozam-in deŷ ŷaysa, s ənta a imosan almawakkil-nana daŷ arkawal ən tassaŷ wa aynayan, d əzni-net wa inŷalan, ogaran wa n Habila təla n əməsli daŷ jənnawan.

²⁵ Daŷ adi ənkədat y ad təzəmməzəgam i wa iššewalan. Dad zamas Kəl-İsrayil win ugaynen s ad əqbəlan awa dasan-itawaggan daw aŷaf daŷ əddənet da da, ketnasan əwwəddaban, wədi ma dər z'agdu attadib wa dana-z-itəwəggin as nəzammazag i wa dana-d-iššewalan daŷ jənnawan?

²⁶ Əməsli-net isannagaynagay amaɖal daŷ azzaman win okaynen, amaran əmərədda arkawal da wa iga: «*Taklat ta du-təzayat, wərgəŷ amaɖal ŷas a za sənnəgəynəgəya, kalar ijənnawan da a tan-sənnəgəynəgəya.*»

²⁷ Batu ta n «taklat ta du-təzayat» almaŷna-net âs arat kul ad iba tamayyamayt-net, fəl a d-aqqamin aratan win as wər ilkem ad niŷaynagayan.

²⁸ Daŷ adi, dad zamas nəgrâw taŷmar as wər ilkem ad tənigaynagay, sənnəfiləlataŷ agoda i Məššina, nag-as əlŷibada wa das-igrazan igân s əbərdəg, əd saŷmar,

²⁹ fəlas, Əməli-nana, temsay da imos-tat təsirəkəmmet.

Təsəxtəmt

13

İnnəsixatan aggotnen

¹ Ad wər tammazzayam d ənəmərə wa taggin mədrayan.

² Əqqələt aytedan iha amagaru. Ad wər talkim adi fəlas aytedan win iha amagaru, wiyyad daŷ-san simagaren angalosan da wər əssenən.

³ Aktiwat aytedan win əhanen kasaw, zun as tənimaham-tu dər-san. A din-wər-tətatawim aytedan win tawasakninen arkanay, fəlas kawanay da təlâm taŷəssa zun tada-nasan.

⁴ Səxmərat azalaf ketnawan. Aləs əd təntut win ənnəzlafnən, əxdəlanet gar-essan fəlas Məššina ad awwaddab imaggan n əzzəna.

⁵ Ad wər təqqələm aytedan əwwəlatnən azrəf. Agdiwat s awa təlâm əmərədda, fəlas Məššina iman-net as inna: *Wər ilkem a kay-oyye za wər ilkem ad əgmada batu-nak.*

⁶ Awen daŷ a fəlas nəfrâg ad nannu, s ikus n aššak: *Əməli a imosan fella-nin, wər əksuda wala. Ma di-z-iŷšəd aggadəm?*

⁷ Aktiwat imuzaran-nawan win ŷur təslam y awal ən Məššina. Əttəfat awa dawan-d-oyyan, tattalalam əzəgzan-nasan.

⁸ ŷaysa Əlməsix iman-net awa imos əndazəl ənta a imos azalada, imos-tu deŷ har faw.

⁹ Ad wər tarđim əssəxrəkan-kawan səssəxritan wər nəmos win as nəzzəgzan. Fəlas aggadəm, ofa ad igrəw assahat ta təhakku arraxmat ən Məşşina, wərgex ta hakkin mensewan. Əşşərixa wa iqqalan batu ən mensewan, wər ikna wala i win das-əlkamnen.

¹⁰ Nəla edag wa n əsəqqəd ən təkutawen, mišan iliman win əşxalnen dağ Ahaket wa n əlxibada, wər əlen turagat ən tattay ən təkutawen šin dağ-as tawakfinen.

¹¹ Azni ən mudaran wa itawakfan wa d-immewayan y ames ən bakkadan, əlimam wa zəwwəran a t-itawayan s Adag wa Ogaran Tazdak, amaran šifəkkawen ən mudaran win den, təwəsəqqədnat sədi y aɣaywan.

¹² Awen dağ a fəlas Ƴaysa da, aba-tu dəffər as itiwakkas dağ əxrəm fəl ad izzəzdəg tamattay s əzni wa-net iman-net.

¹³ Dağ adi əgmədatanax aɣaywan, nəlkam-as, nəgər iri y ad nətəwəsəknu məlka wa itawasakna.

¹⁴ Fəlas dağ əddənət dada, wər nəla edag ən təməxsurt ixlâlan. Kalar əxrəm wa d-izayan a dağ nəgammay edag ən təməxsurt.

¹⁵ [Dağ adi] iwâr-anax ad nətaggu faw i Məşşina šikutawen əs tarrayt ən Ƴaysa. Šikutawen šin əmosnat təmmalen, almaɣna šigaytalen a dağ nəqbâl dat awedan kul as ənta a imosan Əməli.

¹⁶ Ad wər tammazzayam d əmazal n awa olaɣan, d əsəssuhi ən tassaɣ gar-ewwan, id awen dağ a imosan šikutawen šin əgraznen y Əməli.

¹⁷ Bardagat i muzaran-nawan, takkawanam-asan. Əntanay a kawan-ogaznen, id əssânan âs ilkam ad əbdədan fəl mazalan-nasan dat Məşşina, dağ batu n əşşəxəl wa tan-issəwar. As dasan-təbbərdagam, ad agin əşşəxəl-nasan əs man filawasnen, fəlas as t-əgan əs man əxşâdnen əd təhənəffa, wər dawan-tu-za-təggəz tənfa waliyyat.

¹⁸ Agliwat dağ igi y-anax šiwatriwen, fəlas nəkkâs aşşak âs iman-nanax i zaddognen id əlqəbulat a nəga əzəluləğ dağ əkkulluk n anamod.

¹⁹ Onsâyaq-qawan wəllen ad taglim dağ təwatriwen, fəl a kawan-in-təwəsuxəla tarmad.

Assalaman əd təwatriwen

²⁰ Məşşina di n Əməggi n alxer a d-issənkaran dağ təmattant Əməli-nana Ƴaysa imosan amadan wa ofan imadanan, əs tarrayt n əzni n arkawal ən tassaɣ ixlâlan,

²¹ əgmâya dağ-as a kawan-issəfrəg igi n arat kul wa olaɣan y ad tammazalam tara-net. Agiwet sər-na Məşşina arat kul wa das-igrazan əs tarrayt ən Ƴaysa Əlməsix s ənta a ilan tanaya har faw! Amin!

²² Širawt ta əzzigzala daḡ-as wəllen, amaran əgmâya daḡ-wan imədrayan-in, ad təqbəlam təlɣutbat ta, təzəzzəwem daḡ-as.

²³ Əssənat âs amadray-nana Timotay, igmad-du kasaw. As di-d-osa tarmad, a dər-əs in-idawa sər-wan.

²⁴ Təhulam-in imuzaran-nawan kul, əd tamattay zəddigat ən Məššina. Əhulan-kawan-in šəqqaqan-nana win akal n Italəya.

²⁵ Ig-awan Məššina arraxmat-net ketnawan.

Širawt ta iktab Yaqub Assalaman

¹ Awa nak Yaqub, akli ən Məššina d Əməli Ƴaysa Əlməsix, a din-ihulan marawat tawšetən əd sanatat wizawaznen daɣ əddənət.

Əlməsixi əd jarrabatan

Əzəgzan əd zəmmerat

² Ya imədrayan-in, as fall-awan d-osan jarrabatan əmosnen əzzənəfan, əqqəlanət arat a kawan-isifalawasan wəllen.

³ Fəlas təssānam as, ətəwəjərrab n əzəgzan-nawan a sərwan d-itarawan zəmmerat.

⁴ Daɣ adi ayyat zəmmerat tədi, a daɣ-wan tassəndu əššəxəl-net, fəl ad təqqəlam aytedan əndānen, əkmālan.

⁵ Kud ih-iwan awedan iddiraran əs masnat, ansəyet Məššina, a das-tat-akfu; fəlas Məššina illillat, ihakku awedan kul, da wala təgna.

⁶ Mišan ansəyet Məššina, iziɣzan, wər iga aššak. Fəlas awedan wa igan aššak wər izlay əd tanazzamaren n agaraw wa zəwwəran isaggād aɗu, ibbāt-tanat sa əd sa.

⁷ Awedan šilat ən wədi, ad wər agu attama n as ad igrəw arat waliyyan ɣur Əməli,

⁸ id əwəl-net a izunan, wər t-illa arat itaggu a daɣ ittāf edag iyyanda.

⁹ Amadray-nana wa n tələqqay addawatet, isəbbərəg fəl adkul wa igrəw ɣur Məššina əddi.

¹⁰ Amadray-nana deɣ wa n əməgğergəs addawatet, isəbbərəg fəl əsəmmədrəy wa t-iga Məššina əddi; id taɣart a tətəggu takawkawt ən yel, iba tamayyamayt-net a z'agu ənta əd təgərgist-net.

¹¹ Yel, as du-təgmad təfuk, təga tuksay, a tu-təssəxər, tərtək takawkawt-net, iba šihussay-net. Adi da za a igarrawan awedan n əməgğergəs ozālan daɣ taɣawšiwennet.

¹² Ibbilal awedan wa izmaran i jarrabatan, fəlas as fall-as okayan ad igrəw alak imosan təməddurt təxlālat, tas igā Məššina arkawal-net y aytedan win t-əranen.

Jarrabatan d arak deranan

¹³ As itawajarrab iyyan daɣ-wan, ad wər annu: «Məššina a di-ijərraban», fəlas Məššina iman-net wər t-igərrəw jarraba n igi n ark əmazal, wala deɣ itajarrab awedan s igi-net.

¹⁴ Kalar akk awedan lëkkum y arak deranan-net a tu-tawaynen, har tu-sëffëtöqçen daç jarraba.

¹⁵ Arak deranan win, äntanay a du-tawaynen igi n abakkad. Abakkad amaran, as innoda daç äwël n aggadäm, a d-awëy tëmattant ta tëxlalat.

¹⁶ Ya imädrayan-in äknëç tara, ad wër tëtawësudëfam alxata!

¹⁷ Æssënat as tühëkkut kul ta tolaçat äd ta n tëfërënt, Mëššina di n Abba s änta a imosan ämaxlak än tëfuk äd tällit d etran a tat-d-izazabben fël aytedan. Wërmad itamattay, wala deç itaggu y edag-net agamad a das-tëtaggu telay.

¹⁸ Arat irâ a tëmos tahakkay ta danaç-iga tëmëddurt ta täynayat s awal-net imosan tidët, a t-imosan Ælinjil, fël ad nëqqël šilat än çëfëdda daç tëxëllak-net šin ikfa tëmëddurt ta täynayat.

Imazalan n äzëgzan

Awal än Mëššina d äbärdäg

¹⁹ Ya imädrayan-in äknëç tara, säsëmat: ägmâya daç äkkulluk n awedan ad issëryës äsäsëm, ayyu tararada n awal, wala irças alham-net.

²⁰ Fëlas awedan iha alham wër ifreg amazal n awa oçadan çur Mëššina.

²¹ Daç adi, mazzayat äd mazalan kul win kawan-samadasnen, äd tällabëst kul ta tëtamazalam, tëqbëlam äs man lammodnen awal wa itawaggan daç wallan-nawan, ifrâgan a kawan-içlës daç Jahannama.

²² Ad wër iqçël äs äsäsëm ças a tëtaggim y awal än Mëššina, amaran wër tëtëmizilam s awa inna, tëssëxrëkam iman-nawan s adi.

²³ Fëlas awedan wa isasaman ças y awal wa, amaran wër itëmizil s awa inna, wëdi ola d awedan iššëggan daç šiššët,

²⁴ izaggazda udëm-net, igla, ittëw-in daç tamazayt ten da awa dër ola.

²⁵ Mišan awedan wa iššëggan daç äššëriça ikmâlan än Mëššina, s änta a imosan äššëriça wa isadarfen, ittaf-tu, ad itamazal s awa inna, wër din-ittëw awas isla, awedan wëdi ad abbalal daç awa itamazal.

²⁶ Kud ih-iwan awedan a çur iga as ittâf äddin, änta wër innoda daç ilës-net, wëdi iman-net a isaxrak. Amaran iduf-net äddin wër infa wala.

²⁷ Äddin wa zëddigan wër ila älyib dat Mëššina di n Abba, imos-tu ad issën awedan daç gugelan win maçatarnen äd tädoden šin as aba meddan-nasnat äddirarnat, igdël deç i man-net a tu-tëssëwër äddënet älyib waliyyan.

2

Ad wər tətəggim təmərıt

¹ Ya imədrayan-in, kawanay win əzzəgzannen s Əməli-nana, Ƴaysa Əlməsix ilân tanaya, ad wər tətəggim təmərıt.

² Nənnə masalan, osan-kawan-du meddan əşşin daƳ Əlkənisat-nawan. İyyan za əməggərgəs as ədnaynat təsəndar n urəƳ idədwan-net, ılsa isəlsa əknanen şihussay, wa hadan amaran talaqqay ılsân irakkan.

³ As din-təgram aləs wa ılsan isəlsa win hossaynen, tənnam-as: «Mədam, edag da wa ofan, qam daƳ-as»; amaran aləs wa n tələqqay ənta tənnam-as: «Xa! Əbdəd den» madəƳ «qam daƳ amaƳal.»

⁴ WərgəƳ əzənəməzləy a təgam aytedan-nawan əddi, təzzar isəkna adi as imazalan-nawan əlkâman y arak medranan-nawan?

⁵ Ya imədrayan-in əknəƳ tara, səsəmat: Awak wərgəƳ aytedan win əlləqqawnen daƳ əddənət a isannafran Məşşina fəl ad əqqəlan iməggərgəs fəl aganna wa ıqqalan əzəgzan-nasan, əqqəlan dəƳ iməkkusa ən taƳmar tas ıga arkawal-net y aytedan win t-əranen?

⁶ Eges kawanay tolkâm-tan. Awak wərgəƳ iməggərgəs a kawan-ədgaznen, tawayyan-kawan s adag n əşşəriƳa?

⁷ Awak wərgəƳ əntanay a tibudurnen esəm idkâlan n Əlməsix was tətawayrim?

⁸ İllikan as kud əsəndi a du-təgam əşşəriƳa ən taƳmar ta n Məşşina əs təməwit tas iktâb daƳ Əlkəttaban as: «*Agu y əşəqqaq-ıak tara ta təgeƳ i man-ıak*» wədi təgâm a olâƳan.

⁹ Mişan kud təmərıt a tətəggim, wədi təgâm abakkad, ıbâz-kawan əşşəriƳa s əməzrəy wa tu-təgam.

¹⁰ Ənta awedan wa ilkaman y əşşəriƳa ketnet amaran inagartattaf daƳ əlwajib-net iyyanda, wədi əşşəriƳa ketnet as t-imməzray.

¹¹ Fəlas wa innan «*Ad wər tagay əzzəna*» inna «*Ad wər tagay iman*» da. DaƳ adi, as təgeƳ iman n awedan, ad tammazrayaƳ əşşəriƳa ketnet, kuddeƳ wər təgeƳ əzzəna.

¹² Adi a fəlas, aratan win təgannim madəƳ win tətamazalam taggiwat-asan ıgi daƳ təssânam as ilkâm daƳ-wan əşşəriƳa wa isadarfen.

¹³ Fəlas əşşəriƳa wər təha təhanint a z'ıtəwəggın y awedan wa wər təha təhanint. İsəkni wa itaggu Məşşina y aytedan təhanint ogâr əbbaz wa tan-itaggu s əşşəriƳa.

14 Ya imədrayan-in, ma z'aknu y awedan ad igannu izzigzan, ənta wər itəggu imazalan olaɣnen sitaddanen əzəgzan-net? Awak ifrâg əzəgzan wədi əlɣillas-net?

15 Nənnə masalan inay iyyan daɣ-wan amadrəy-net daɣ əddin madəɣ tamadrəyt-net əzlâmnən madəɣ wər əlen a ətšan.

16 Awak ma dasan-z-aknu a dasan-annu: «Agliwat daɣ alxer, yawanat, talsim», ənta wər tan-ikfa aratan win as əddərarnat təxəswen-nasan?

17 Əmmək di da za as, əzəgzan ɣas wər igda. Əzəgzan wa wər nətəwənəy əs mazalan olaɣnen, wədi immut, wər infa wala.

18 Amaran as inna awedan: «Nak əzəgzan-in a fəl saffalla.» Inn-as iyyan: «Kəy əzəgzan-nak a fəl təsaffalla, nak amaran imazalan olaɣnen win tagga fəl saffalla. Sakn-i əzəgzan-nak da wala imazalan olaɣnen, nak a kəy-assaknaɣ wa-nin əs mazalan-in olaɣnen.»

19 Wərgəɣ təzzigzanəɣ as Məššina iyyanda? Təgəɣ a olâɣan, əssən z'âs Iblis da əzzigzan adi, amaran issindawtu taysəst.

20 Xə əljahil wa, awak əgərri a din-wər-təgəɣ as əzəgzan wər nəddew əd mazalan olaɣnen, wər infa wala?

21 Məni əmmək was igraw amaraw-nana İbrahim tişit n alɣadil dat Məššina? Wərgəɣ əddəlil ən mazalan-net, alwaq wad ikfa barar-net İsəhaq y ad iqqəl tənəgzamt i Məššina fəl edag ən təkutawen.

22 Təhannayəɣ? Əzəgzan-net iddew əd mazalan-net daɣ arat kul wa itaggu. Imazalan-net a əssəkmalnen əzəgzan-net.

23 Təxsal-du bətu ta tənnat daɣ Əlkəttaban: «*Izzəgzan İbrahim əs Məššina, ikf-ay Məššina taqqat fəl əddəlil n awen*», təzzar itawagg-as esəm: Əmidi ən Məššina.

24 Xasil, təhannayam as awedan əddəlil ən mazalan-net d əzəgzan-net a fəl t-ihakku Məššina tişit n alɣadil, wərgəɣ əddəlil n əzəgzan-net ɣas.

25 Rahab za ta n təkərwat ənta məni əmmək was təgraw taqqat dat Məššina? Awak wərgəɣ əddəlil ən mazalan-net alwaq wad təsammagarat inassasaman ən Kəl-İsrayil təsəlɣas-tan daɣ ahan-net, təzzəbaz-tan tarrəyt iyyat əgmadan akal.

26 Zund əmmək as təɣəssa wər əhen man təmmût, əmmək di daɣ as əzəgzan wər nəddew əd mazalan olaɣnen ənta da immût.

3

Iduf ən tanat daɣ iləs

¹ Ya imədrayan-in, a daɣ-wan wər igatan əlfəqqitan fəlas təssānam as nakkanay win əlfəqqitan a danax-itəwəggu əššəriɣa labasan ogaran wa z'itəwəggin y aytedan win hadatnen.

² Fəlas ketnana nətinəgərtəttif daɣ tarrayen aggotnen; amaran kud ill-ay awedan as wər kala inagartattaf s a du-təgmad ark batu imi-net, awedan wədi, ikmâl, ifrâg iduf ən tanat daɣ təxəssa-net ketnet.

³ Nətaggu aɣaba daɣ ays fəl a daɣ-as nəttəf tanat, nəssuk-ay edag was nərə.

⁴ Ənəyat deɣ aylal n aman wala ad ikna təzzəwwərt, ibātu tu aɟu iknan assahat, da ašək iknân təmmədrəyt as t-itikurit awedan wa t-ewayan fəl aman, isadak-ku s as ira.

⁵ Adi da a iga iləs n aggadəm. Taslət əndərrat a imos daɣ təxəssa, mišan aratan zawwarnen as ifrag igi n abarag-nasan. Zund as, arat ən tamantast təfrâg əsəbbələgləg n əgoras iknân təzzəwwərt!

⁶ Iləs, ənta da temsay a imos. Wər t-illa əzzənəf ən talbast a tu-wər-nəha, isamadas šisəllad-nana kul, issirɣa fall-ana temsay daɣ əddənet wa n təhəwt-nana har ibanana, amaran ənta iman-net temsay ta n Jahannama a tu-təsəbbalaglagat.

⁷ Wər t-illa əzzənəf ən tawaqqast wala əgədid, wala əmudar imiraradan fəl amaɟal wala iyyan n aman as wər ifreg aggadəm əšinən-net, amaran iššonan-tan deɣ.

⁸ Eges iləs, ənta wər t-illa awedan ifrâgan əšinən-net. Talbast a imos din-wər-ikka awedan d arat, amaran idkâr assam inaqqin.

⁹ Ənta as nətagg təmmalen y Əməli di n Abba-nana, ənta deɣ as nəbayyak aytedan, as Məššina a tan-d-ixlakan əs šaššəlan-net.

¹⁰ İmi iyyanda a du-gammadnat təmmalen igammad-t-id deɣ abayak. Ya imədrayan-in, arat wədi wər imməkkan ad itaggu.

¹¹ Awak šat n aman iyyadda, taffayan-du daɣ-as aman əzodnen əd win samomnen?

¹² Ya imədrayan-in, awak ašək ən fig itaraw zaytun, wala deɣ itaraw asab n alɣanab fig? Šat n aman za əganen tembay n əsalax, ənta da wər tat-du-gəmmadan aman əzodnen.

Masnət ta n tidət

¹³ Məni-tu daɣ-wan wa imosan əmusan ila deɣ əgərri? Awedan wədi, assaknet adi s alxal olaɣan əd mazalan əgānen əs talmat ən man əd masnat.

¹⁴ Mišan kud kawanay iwallan-nawan manjax labasan a tan-ihan, wər təgəmməyam ar tənfa ən man-nawan, wədi

wər təhoram d igi ən baragan fəl masnat-nawan. Arat wədi isəbbəhəw a imos ən tidət ən Məššina.

¹⁵ Masnat tədi, wər du-təfel Məššina, kalar šin əddənet ta da. Šin awedan ilkâman i tara ən man-net d Iblis.

¹⁶ Fəlas id t-imal manjaɣ d agamay n awa infan iman ɣas, a t-iməl iba n ənəmənnək labasan d əzzənəfan kul n arak mazalan.

¹⁷ Mišan masnat ta du-təfalat Məššina, arat wa azzaran təga âs ši zəddigat. Awedan wa tat-igrawan, ira alxer, læmmid, igarru, təkñ-ay təhanint iguz, itaggu deɣ imazalan olaynen. Wər itəggu təmərıt za wər tu-təha təlmənufəqa.

¹⁸ Amaran aytedan win maggan n alxer amasa imosan alxer a ənabalan təzzar ələyan-du tənfa təmosat aqqad dat Məššina.

4

Erruymatan aggotnen

Erruymatan fəl əkənnas

¹ Ma d-itawayan gar-ewwan šimazaɣen əd kənnasan? Wərgəɣ arak deranan-nawan əmmigarnen daɣ təɣəswen-nawan?

² Tətəggim attama n arat taqqamim wər tu-təgrewam. Təmosam imaggan ən man, təmosam deɣ inəmmənzaɣ, amaran wər təfregam agaraw n awa taram. Aratan win təgammayam-tan əs təmazaɣen əd kənnasan. Wər təlem awa taram, fəlas agamay a tu-wər-təgem daɣ Məššina.

³ Amaran kud daɣ-as tu-təgmayam da, wər tu-təgərrəwam fəlas əddəlil wa fəl daɣ-as tu-təgammayam a wər noleɣ, id wər təgəmməyam âr ark aratan win əran man-nawan.

Erruymatan fəl tara n əddənet

⁴ Xa inəmməzray ən Məššina! Masnat a wər təgem as, tara n əddənet gezzar ən Məššina a təmos? Daɣ adi awedan wa igan iman-net əmıdi n əddənet, wədi azangaw ən Məššina a imos.

⁵ Meɣ ak təɣilt a təgam as Elkəttaban tənna ən bannan a əgan as: Məššina ikna tara n Infas wa daɣ-naɣ iga.

⁶ Mišan tara n Infas wa, togar-tat arraxmat ta danaɣ-ihakku. Adi a fəl ənnan Elkəttaban: «Məššina iɾnâz y aytedan win əzzəzwarnen iman-nasan, amaran win əssərasnen iman-nasan arraxmat-net a tan-ihakku.»

⁷ Daɣ adi bardagat i Məššina, təgdəlam iman-nawan y Iblis, a kawan-ugag.

⁸ Zənnəmihezət iman-nawan əd Məššina, a dər-wan inəmihez. Xa inasbakkadan, širədat ifassan-nawan daɣ igi

ən bakkadan, təzzəzdəgam iwallan-nawan, təkəkəsam dağsan igi n aššak!

⁹ Əxšədanet man-nawan, talim d aytedan a fəl təga təfəyyawt, təhallim. Təggəzet tala edag ən tadaza-nawan, təggəz təkənzert edag ən təfalawist-nawan.

¹⁰ Sərəsat iman-nawan dat Əməli, a kawan-idkəl.

Ərruymatan fəl šizmit

¹¹ Ya imədrayan-in, ad wər təməl šizmit gar-ewwan. Awedan wa ožaman amadray-net madeğ issəwar-tu lahan, wədi əššəriğa a ožam, issəwar-tu lahan. Amaran awedan wa issəwaran əššəriğa lahan, wədi ab'as ilkam y əššəriğa, iqqal əmaşrağ ənta iman-net.

¹² Məššina ğas a imosan Amaşrağ iğattasan əššəriğa, isafsu, ihallak değ. Kay ma təmosağ as təşarağa y iyyan awedan?

Ərruymatan fəl zazwar ən man

¹³ Səsəmmat za, kawanay win ganninen: «Azalada madeğ tufat ad nakku ayrəm mandâm, nag-in dağ-as awatay nəgâ jola, nəgrəw riba.»

¹⁴ Ənta kawanay wər təssenam wala ğas awa dər kawan-du-z-ifaw! Wər təzlayam d əhu, s ad t-illa, mišan as z'agu arat n amazay, wər t-illa.

¹⁵ Edag n ad tannim: «Kud Əməli irða, ad nəddər, nagu awa madeğ awa.»

¹⁶ Mišan əmərədda ibaragan a tətəggim tədkâlam iman-nawan. Ibaragan za kul win šilat ən win di talbast a əmosan.

¹⁷ Dağ adi awedan kul issanan əmazal wa olayan amaran iqqim wər t-iga, wədi abakkad zəwwəran a iga di.

5

Ərruymatan fəl iba n əššəriğa wa tamazalan məggərgas

¹ Amaran kawanay iməggərgas, səsəmat-i: Əggəzat šin tala, təsəkkələlam fəl əddəlil n əlməssibatən šin kawan-d-əzaynen.

² Təgərgist-nawan tərka, isəlsa-nawan tətš-en təwəkay.

³ Urəğ-nawan d əzrəf-nawan tətš-en tənək. Amaran tənək di da a fall-awan za taggayyet, tatšu šixəswen-nawan zun tanat-tətša təmsay. Təššədawam təgərgist dağ adan win, s əntanay a əmosnen təsəlkaht n əddənət.

⁴ Ənəyat, alxaq ən mašşaxalan win təsassalayam šiwəgas-nawan, isixarat fall-awan; amaran təkurayt-nasan, tewad Məššina di n Əməli ən tarna.

⁵ Tənniflayam dağ əddənət, təhâm tara ən man-nawan. Təsâdarem iman-nawan y əzəl wa n agazam.

⁶ Təbazam s əşşərixa alxadilan ən Məşşina a kawan-in-wər-nəkka d arat, təgam iman-nasan.

Ənnəsixatan aggotnen

Təzaydart day alxazab

⁷ Ya imədrayan-in, day adi zəzzəydərat har d-asu Əməli. Ənəyat tewaylay a itaggu əmagyak i tənfa ta du-təgammadat tawagost-net. Əzəzzəydər a itaggu har təgrəw tawagost-net akonak wa azzaran əd wa ilkaman.

⁸ Kawanay da za, zəzzəydərat, tilem əwəl, fəlas assa n Əməli ihôz.

⁹ Ya imədrayan-in, ad wər tətınəməşşikam gar-ewwan ibəz-kawan əşşərixa. Ənəyat! Əmaşraç wər iggug, illa çur imi n ahan.

¹⁰ Day batu ta təqqalat alxazab əd təzaydart, ya imədrayan-in əqqəlat aytedan olänen d ənnəbitan win əşşəwalnen s esəm n Əməli.

¹¹ Ənəyat, a nəgannu aytedan win əlanen zəmmerat əbbilalan. Təslâm əlqıssat ən zəmmerat n ənnəbi Ayuba, tənâyam deç təsəlkamt ta das-iga Əməli, id Əməli təkn-ay tara əd təhanint iguz.

Ənnəsixa day batu ən təhuday

¹² Ya imədrayan-in, are day-wan dat arat kul ad wər təhhadam gər za əs jənnawan wala s amaçal wala s arat a iqqal. Ganniwat ças «Ayew» y awa imosan tidət, təgannim «kala» ças y awa tat-wər-nəmos fəl a kawan-wər-iwər abakkad, ibəz-kawan əşşərixa.

Şiwatriwen i miranan

¹³ Awak ih-iwan i itaxazzaban? Wədi aget şiwatriwen. Awak ih-iwan awedan iflawasan? Wədi aget təmmalen i Məşşina.

¹⁴ Awak ih-iwan awedan irinan? Issəgməyet imuzaran n Əlkənisat a das-əttəran, əzwəyan-as widi s esəm n Əməli Yaysa.

¹⁵ Təwatray ta təgat s əzəgzan ad tassafsu əmiran wa fəl təga, izzuzəy-tu Məşşina day təwərna. Wala ad imos as ibakkadan a sər-əs tat-d-ewaynen, a das-ətəwəsürəfan.

¹⁶ Day adi, tinəməmilat gar-ewwan ibakkadan-nawan, tutabam day-san, ad tətınəməggim şiwatriwen fəl ad təzzəyam. Təwatray təglâyat n awedan oçadan təh-et tarna tagget əd tənfa.

¹⁷ İlyas, awedan a imos ən şilat-nana. Iga təwatray a day iglây a igdalan y akonak ewet. Təzzar iga akonak karad elan əd sədisat təlil wər itteb fəl amaçal.

¹⁸ Dëffər awen ittar, ifay-du akonak day jənnawan, ikkas-du amaḍal tənfa-net.

Batu ən məzzəgzan win əxraknen

¹⁹ Ya imədrayan-in, as ixrak iyyan daḡ-wan igmad tidət, issuḡəl-as-tat-du əmidi-net,

²⁰ təssənam as, awedan wa d-issoḡalan anasbakkad, ikkas-t-idu daḡ axarak wa iga, wədi iman a d-issəfsa daḡ təmattant, eway-du deḡ təsureft ən bakkadan aggotnen.

Širawt ta tazzarat iktab Butros

Šihulawen

¹ Awa nak Butros imosan anammazul ən Ƴaysa Ǝlməsix, a din-ihulan iməzzəgzan win wazawaznen, əmosan iḡərab daḡ kallan ən Fontəs, əd Galatəya, əd Kabadokəya, d Asəya, əd Bitinəya. Isinafran-tan Məššina

² di n Abba harwa dat alwaq əs masnat-net d ənnizam-net. Ig-en aytedan a sər-əs əskâtnen s əssəbab n In-fas wa Zəddigan, fəl ad abbardagan i Ƴaysa Ǝlməsix, təwəzəzdəgan deḡ s əzni-net. Məššina ya təzizabbe-du fall-awan arraxmat, d alxer wər nəla əddukad.

Tišit n əlməsixi

Agoda i Məššina attama wa danax-ikfa

³ Təmmal i Məššina di n Abba n Ǝməli-nana Ƴaysa Ǝlməsix. Təhanint-net wər nəla əddukad as danax-iga aytedan əgânen təhəwt taynayət, fəl ad nagu təməddurt təgât s attama ittiddan, s əssəbab ən tanakra ən Ƴaysa Ǝlməsix daḡ təməttant,

⁴ nəgrəw deḡ təkasit n arət wər nətəməndu, wər itəmədis, za wər itəbəkəssit, a dawan-itiwagazan daḡ jənnawan.

⁵ Kawanay a ogaz Məššina əs tarna-net, fəlas əzəgzan a təgam, fəl ad təgrəwam efsan. Efsan win isimatak-kan Məššina fəl ad təwəgrəwan daḡ azzaman win əḡrud n əddənet.

⁶ Isəffəliwəset-kawan awen, kuddeḡ as əmərədda ihhiššal a kawan-zəzzəkənzəran jarrabatan əmosnen əzzənəfan, mišan ya awen wər z'ihag.

⁷ Jarrabatan win, əntanay a sataddinen assahat n əzəgzan-nawan ogaran urəḡ almaqam. Urəḡ iman-net wər iḡlel, amaran temsay a daḡ itawaggu fəl ad itəwəssən kud imos wa n ələsəl wala. Ǝzəgzan-nawan da za kundaba itawajarrab. Ǝddi amaran, assaḡa wa du-z-azzabbat Ƴaysa Ǝlməsix, itəwəsənəfiləl y əddənet ketnet, ad təgrəwam təmmalen d ədkul əd saḡmar, s əssəbab n assahat n əzəgzan-nawan.

⁸ Ƴaysa Ǝlməsix tərâm-tu təzzigzanam sər-əs da wər tu-tənyam harwa da. Awen daḡ a fəl təgam təfalawist as tu-wər-illa i ifragan emel-net za wər tu-təlla tulat-net.

⁹ Təfalawist tədi təgâm-tat fəlas aggad a təgam əlməxsud n əzəgzan-nawan, a t-imosan agaraw n efsan.

10 Efsan win di, əyyəwanan ənnəbitan win əmalnen arraxmat ta dawan-z-agu Məşşina agamay d əgərri-nasan.

11 Ədgâzan wəllen dağ ad əssənan awa mosan azzaman d alxalaten, win z'assakninen awa imal Infas n Əlməsix. Infas wa, illa xur-san kala da; amaran imâl-asan alxazab wa z'agu Əlməsix əd tanaya ta du-za-təlkəmat y awen.

12 Isannafalal Məşşina y ənnəbitan as isalan win d-əgrawan den, wərgex əntanay a d-əkkan, kalar kawanay a d-əkkan, iwâr-tan a dawan-tan-agin. Isalan win əntanay a dawan-əmalan məssəsəxra win sasaxrinen Əlinjil əs tilalt n Infas wa Zəddigan. Infas wa, ijənnawan a dağ d-itawasagla. Əlinjil, angalosan da sidaranan wəllen masnat-net.

Alxal wa issəxmaran Məşşina

13 Dad zamas tayttay-nawan təsimatag y əşşəxəl, təttafam değ alwasat dağ arat kul, wədi agiwat attamanawan ketnet dağ arraxmat ta za təgrəwam xur əzəbbi ən Yaysa Əlməsix d ənəfilal-net y əddənet.

14 Bardagat y Əməli-nawan, awa taggin bararan y abbanasan, tammazzayam d arak deranan win as kala a tan-tətaggim harwa ad təmosam aljahilan.

15 Əmmək was zəddig wa kawan-d-ixran əs man-net, əmmək en dağ as kawan-iwar ad izdag alxal-nawan kawanay da,

16 Fəlas iktâb as: «*izdagat, fəlas nak əmizdag a mosa.*»

17 Amaran dad zamas təgannim dağ təwatriwen-nawan «Abba» i wa wər nəzlay aytedan, kalar ixakkam akkiyyan dağ-san əs mazalan-net, dağ adi agiwat təməddurt a dağ təksudam Məşşina dağ azzaman win əmərədda, a dağ təmosam inaftaxan dağ əddənet.

18 Alxal wa dawan-d-oyyan marawan-nawan wər infa wala. Təssânam as Məşşina irzâm əlqim zəwwəran y a kawan-d-ikkəs dağ anamod ən təməddurt wen. Amaran inazzan win den, wər əgen s əzrəf, wala urəx a mosnen aratan tamandinen,

19 kalar azni ilân almaqam wəllen n Əlməsix as əgan. Azni wa, iha əlmital n əzni n ajağol wər nəga əlxib.

20 Əlməsix təga fall-as masnat dat əxluk n əddənet, amaran itawasanafalal dağ azzaman win əlkammen a fəl əddəlil-nawan.

21 Əddəlil-net a fəl təzzəgzanam əs Məşşina s ənta t-id-issənkaran dağ təməttant ikf-ay tanaya. Adi a d-ewayan as təzzəgzanam əs Məşşina təgam dağ-as attama-nawan.

22 Təzzizdagam iman-nawan s əbərdəg wa təgam i tidət fəl ad tagim ənəmərə igân s əwəl iyyanda, awa taggin mədrayan. Dağ adi akniwat ənəmərə əs wallan zaddoggen.

²³ Æssənat as təhəwt taynayat a təgam təlât ələsəl ixlâlan, wərgəx təhəwt ta n aggadəm təmosat arat wər nəxləl. Kalar awal ən Məššina ixlâlan ihakku təməddurt a imosan ələsəl ən təhəwt ta təgam da.

²⁴ Id iktâb as: «*Aggadəm wər izlay əd yel, tanaya-net dey ketnet wər təzlay əd təcīgay ən yel. Yel amaran taɣart a itag tærtək təcīgay-net,*

²⁵ *mišan awal wa n Ěməli ənta, ill-ay, ixlâl.»*

Amaran awal wen Ělinjil wa dawan-ittəmalan a t-imosan.

2

Awa təmos tamattay ta n Məššina

¹ Daɣ adi sənnəməggəgat iman-nawan d a imosan əzzəngu, əd təkərras, əd təlmənufəqa əd manjaɣ, d əzgən.

² Awal ən Məššina zun ax wər nəqqer a dawan-imos. Agiwat-as tara ta taggin bararan əs səket əhəwan y əx, fəl a kawan-issədwəl daɣ tišit-nawan əlməsixitan.

³ Tara ten da a das-za-tagim as imos as «tənayam kawanay iman-nawan awa dər ogda əlluɣ n Ěməli.»

⁴ Zənnəmihezət iman-nawan d Ěməli s ənta a imosan təhənt təddarat, tas aytedan za əgəran-tat-in, ɣur Məššina amaran ənta a təmosat təhənt ta tənnəfranat təla almaqam.

⁵ Dad zamas kawanay da təmosam zun təhun əddarnen, itawakras sər-wan ahan n əlyibada ən Məššina əs tilalt n Infas wa Zəddigan, wədi təqqalam ilimaman zaddog-nen hakkinen šikutawen šin imal Infas wa Zəddigan s əntanatay a əgraznen i Məššina əs tarrayt ən Ƴaysa Ělməsix.

⁶ Ěnta Məššina inna daɣ Ělkəttaban: «*Ěnəyat, əssinsa daɣ Səyon təhənt ta təkəbbalat ehan, tənnifranat, təlat almaqam. Wa sər-əs izzəgzanan, wər z'ikərukəd.»*

⁷ Daɣ adi kawanay a əzzəgzannen, təkfiwan təhənt ta ətəwəsəɣmar. Aytedan amaran win wər nəzzəgzan əssənanet as: «*Təhənt ta din-əgəran makrasan, ənta a təqqalat təhənt ta təkbalat ehan.*

⁸ *Amaran təhənt ta təmos təsənkəft y aytedan, tətəgadl-en.»*

Təhənt ten nakkafan-as aytedan, tətəgadl-en, fəl tugəyt ta əgan s ad əzzəgzənan s Awal ən Məššina, amaran tugəyt ten da a dasan-tətawatasat.

⁹ Kawanay amaran:

«Tawšət tənnifranat a təmosam, tiddawat ən limaman ən Məššina di n Ěmənokəl, təmosam harwa da aɣrəf iskatan əs Məššina, təmosam dey tamattay-net.

Ikkas-kawan-du

fəl ad təmmalam igitan simaklalnən,»

win iga id ənta a kawan-d-iğran dağ šiyyay, ig-iwan dağ ənnur-net isinahalan əmələwləw.

¹⁰ Kawanay dat awa, wər təmosam fadda tamattay, amaran əmərədda təqqalam tamattay ən Məşşina. Dat awa wər təgrewam əhənəttə fadda, əmərədda amaran təgrawam-tu.

Alxal wa iwaran əlməsixitan

Alxal wa iwaran əlməsixitan gar-essan d aytedan

¹¹ Imaran-in dad zamas əddənət a inaftayan əd yərab a dağ-as təmosam, wədi onsəyaq-qawan ad tənəməggəgam d arak deranan win aggadəm, fəlas əntanay a əmosnən izəngə n əzəgzan-nawan.

¹² Ad wər tammazzayam d alxal wa olağan dat aytedan win wər nəksud Məşşina. Əddi as imos as sawaran-kawan bahutan ən tişit ən nəsgufa, iman-nasan as z'ənəyan igitan olağnən win tətəggim dağ anamod wen, awəy-du sər-san awen sağmar n Əməli əzəl wa du-z-asu.

¹³ Bardagat i muzaran-nawan kul fəl udəm n Əməli, gər əmənokəl s ənta a ixkaman fəl arət kul,

¹⁴ wala deş inaxkiman-net win d-izammazal imos əşşəxəl-nasan əwəddəb n aytedan win tagginən təkma, əd tahakkay n almaqam i win tamazalnen awa olağan.

¹⁵ Məşşina a ira ad tətəggim awa olağan fəl ad tədbəyam imawan n ark aytedan n aljahilan.

¹⁶ Agiwat alxal ən lallan, mişan əlləllu-nawan a tu-wər-tagim arət a daw təssolamam aşşar, kalar taggiwat imazalan n as təmosam eklan ən Məşşina.

¹⁷ Səxmərat aytedan kul. Iriwat imədrayan-nawan kul dağ əzəgzan. Iksadat Məşşina, təssəxməram imənokalan-nawan.

¹⁸ Eklan, bardagat i məssawwan, tagim-asan sağmar kul wa kawan-iwaran, gər za əmosan aytedan olağnən, lammodan, wala deş əmosan ark aytedan labasnen,

¹⁹ fəlas arraxmat a imos ad izmər awedan, izəzzəydər d alyazab imosan tədləmt, as imos əs təkatawt ən Məşşina a fəl iga awen.

²⁰ As imos as təgeş abakkad, ma imos aroz wa za təgrəwa dağ əzəzzəydər d attadib n awen? Mişan ya as imos as təmosaş awedan itamazalan awa olağan, amaran təzmâra y ətəwəzəşəzzab imosan tədləmt, wədi əssən as arraxmat a təgrawa şur Məşşina.

²¹ Awalla, ənta da da awas tətawayram, fəlas Əlməsix iman-net da işxizzab fall-awan, oyy-awan-du almasal, fəl ad təlkəmam y awa iga.

²² Ælmæsix amaran, ænta *as wær kala ad iga abakkad, za wala iga bahu y awedan waliyyan.*

²³ Ænta a iyyëwanan ætæwærbad, mišan wær izzæzal. As itawazağazzab, wær iga arak batu y awedan waliyyan, kalar talğa-net kul as tat-iga dağ æfus n Æmaşrağ wa Oğadan a timosan Mæşşina.

²⁴ Ænta değ a itawataytayan fæl tægəttawt, idkal ibakkadan-nana, næga æd bakkadan ænæmæggag wa tæga tæmæddurt æd tæmattant, fæl ad nagu tæmæddurt a dağ noğâd. Dağ adi Ælmæsix ænta a kawan-izzozayan æs busan win dağ-as tawagganen.

²⁵ Æstizarat tæmosam zun ayfæd æssiggalnæn, mišan æmæredða tæqqalam-du amadan-nawan, s ænta a imosan æmagaz æn man-nawan.

3

Alxal wa iwaran ælmæsixitan dağ azalaf

¹⁻² Kamatay değ şidoden, bardagmat i meddan-nakmat. As tægamat adi, kud imos as wiyyad dağ-san wær æzzægzanan s awal æn Mæşşina da, as hannayan alxal-nakmat olâğ zæddig, hannayan değ sağmar wa dasan-tægamat, a sær-san d-awøy awen æzægzan da wær dasan-tæşşewalmat.

³ Ad wær æqqælnat tæhussay-nakmat arat iwâran azzahir ças, a du-wær-eway ar æzzænæfan æn latafan wiyyad æmmittaynen, madeğ uğænan n urəğ, wala şibæddağ æknanen æzzæwi.

⁴ Kalar ægmæymat şihussay şin æğbarnen dağ æwæl, s æntanatay a wær nægæmmæd, æmosnen talmat d æsænsi æn tayttay. Şihussay den da şin æknanen tæla n almaqam çur Mæşşina.

⁵ Ænta den dağ æmmæk was dallagnat tædoden şin dat awa a æskatnen æs Mæşşina ægânat dağ-as attama-nasnat, æbbirdagnat i meddan-nasnat,

⁶ zun Sarata, s awa tæga y Ibrahim dağ æbærdæg, a das-tægannu: Mæşşi. Æmæredða kamatay a mosnen şibararennet, as imos as tætamazalmat awa olağan a dağ wær toyyemat iman-nakmat tæggæz-kamat tasa n arat waliyyan.

⁷ Kawanay değ meddan agiwat i tædoden-nawan tidawt tægât s ænæmæsæsægra, a dağ tæssânam fæl tişit a ægânat tædoden şinærkam. Sæğmærat-tanat, fælas tædrawam dær-æsnat tækasit n arraxmat tæmosat tæmæddurt. As dasnat-tægamat adi, wær t-illa a z'inkæfan i tæwatriwen-nawan.

Alxal wa iwaran ælmæsixitan gar-essan

⁸ Xasil iliwat tayttay iyyadda, tilem tafreýt i tækmawen n aytedan kul. Æqqelat aytedan a day tæggæt tara ta tællat gær mædrayan d ælluð d iban zazwar æn man.

⁹ Ad wær tæzazalam day aytedan win dawan-tagganen tækma wala takaggaran-kawan. Kalar tattarat-asan a dasan-igan arraxmat, fêlas awen da as têtawaxram s a tu-tætægim, fêl ad tæqqelam imækkusa æn maruzat ta dawan-tænsat.

¹⁰ Ænnan Ælkættaban:

«As ira awedan ad igræw tæmæddurt a day iddæwat, ifaw-du fall-as ijilan a day inniflay, wædi agæzet ilæs-net day tækma, igdæl-as ællæfæd n awa imosan šikærras.

¹¹ Isænnæmæggæget iman-net æd tækma, ad itamazal awa olaðan.

Igmæyet alxer, iššikæl day-as.

¹² Amaylol iswåd day aytedan win oðadnen, amaran iqabbal šiwatriwen-nasan.

Amaran win æššokalnen day tækma, akyud a tan-iga.»

Alxal wa olaðan ættælal n Ælmæsix a t-imosan

¹³ Awak ma imos wa dawan-z-agin tækma as imos as tæsigatakkem day æmazal n awa olaðan?

¹⁴ Amaran as imos as affaw-du fall-awan æzæl iyyan a day tæxðizzabam fêl as tæmmozalam awa oðadan, wædi tæbbilalam!

Ad wær tiksadam awa æksudan aytedan, amaran ad wær æxšedan man-nawan.

¹⁵ Zæzwærat day wallan-nawan Ælmæsix imosan Æmæli, tarðim as ænta a imosan Æmizdag. Sæmmutægat faw y æsæssægri n awedan kul wa kawan-issæstanan day batu n attama wa tægam.

¹⁶ Awen amaran agiwat-tu æs talmat æd saðmar n aytedan. A tu-wær-imæl arat waliyyan a daq-qawan tæha tæræk. As iga adi edag iman-net wa day sær-wan tawagginat batuten æbrarnen, a day-as kærukædan aytedan win jajargannen alxal olaðan wa tægam day tassa-q-nawan d Ælmæsix,

¹⁷ fêlas ofa ad aðxazzab awedan itamazalan ælluð, as imos as awen day a ira Mæššina, y ad aðxazzab awedan itamazalan tækma.

¹⁸ Ælmæsix iman-net iga alðazab iyyanda, aba-tu fêl bakkadan n aytedan. Ænta wa n alðadil, aba-tu fall-awan kawanay a wær næðdel, fêl a kawan-izænnæmihæz æd Mæššina. Tæmattant ta n tæxæssa-net a iga, mišan iddar-du æs tarna n Infas Wa Zæddigan.

¹⁹ Amaran tarna n Infas wa Zæddigan as igla Ælmæsix iga tælxutbat i win æhanen alaxirat æxfálan.

²⁰ Aytedan win əntanay as kala ad əffəllagan əs Məşşina daḡ azzaman ən Nux. Azzaman di izizaydar Məşşina iqqâl y ad iḡrəd Nux akaras n əḡlal-net. Ettam aytedan ḡas a əggaznen aḡlal wen əragan-du daḡ akonak wa n Nux.

²¹ Arat wen əlmital a imos n alamaḡ daḡ aman was ənta a kawan-issəfsan əmərədda əs tarna tas d-inkar Ḡaysa Əlməsix daḡ təmattant. Alamaḡ wa wərgəḡ əşirəd ən şiday fəl təḡəssa a imos, kalar igi n arkawal dat Məşşina əs man wər təha tərək waliyyat a t-imosan.

²² Illikan as Ḡaysa Əlməsix a d-obazan ḡur əgəzzəy-net əs jənnawan, iqqim daḡ əḡil ən Məşşina, angalosan, əd təmənukəla kul əd taḡmaren kul əbbirdagan-as.

4

¹ Daḡ adi, dad zamas Əlməsix da təḡəssa-net tənây aḡzab, kawanay da səmmutəgat y arat zun wen da. Fəlas awedan wa iḡəzzaban əs təḡəssa-net daḡ anamod wen, wədi immizzay əd bakkadan.

² Awen daḡ a fəlas a obazan ḡur azala, ad wər tələsam şiyiyit ən man-nawan təlkamam i deranan win aggadəm, kalar əlkəmat i tara ən Məşşina daḡ awa din-iqqiman daḡ təḡərras-nawan.

³ Igd-awan awas kala tu-təgam, imosan awa əran aytedan wər nəssen Məşşina. Wər təzlayam a təmmozalam, tətəggim arak deranan, təmosam imaşwan n esmad. Tətəggim tettay tagget, əd tassay tagget, təḡbâdam əssənəman əmosnen arat issiksadan.

⁴ Amaran ark aytedan win isimaklal sər-san as dasan-wər-təlkemam daḡ arak mazalan win taggin əmosnen əsəssikəy aggen daḡ təmazrəyt, əqqiman amaran ḡaşşadan-awan esəm.

⁵ Kundaba əbdadan fəl mazalan-nasan dat wa isammata-gan y ad işrəḡ win əddarnen əd win aba.

⁶ Awen daḡ a fəlas win əmosnen inəmməttan əmərədda, da itiwamal-asan Əlinjil. Arat wen itiwagg-asan fəl ad awwaddaban əs təməwit tas tawaddaban aytedan daḡ əddənet, agin deḡ dəffər awen təməddurt a daḡ innoda Infas wa Zəddigan əs təməwit ta ira Məşşina.

⁷ Təzərəst n əddənet təhöz. Əqqəlat aytedan əlanen əzzəbun tannadim daḡ man-nawan, fəl ad təfrəgam igi ən təwatriwen.

⁸ Zuzərat y arat kul ənəmərə aggen gar-ewwan, *fəlas tara, ənta a təhakkıt təsureft ən bakkadan aggotnen.*

⁹ Əqqəlat aytedan iha amagaru gar-ewwan əs man ərdānen.

¹⁰ Akkiyyan daɣ-wan agiwet i win hadatnen tənfa əs təhəkkut ta təgrawam s arraxmat ən Məššina. Əmmək di da as za təqqəlam inaxlifan olaynen n arraxmaten aggotnen šin dawan-iga Məššina.

¹¹ I daɣ-wan iššewalan, aget awal n as Məššina a t-id-izammazalan. I daɣ-wan idahhalan imidawan-net, idhəlet-tan əs fərregat ta danay-ihakku Məššina fəl ad itəwəsəymər Məššina daɣ arat kul, əs tarrayt ən Ƴaysa Əlməsix. Ənta a ilan tarna, əd tanaya har faw! Amin!

Allam fəl man d ənnəsixa y aytedan daɣ azzaman win aɣazab

Aɣazab fəl Əlməsix

¹² İmaran-in, ad wər əqqənan ɣafawan-nawan i təmsay n aɣazab ta kawan-təhat əddi təmos jarraba-nawan, a das-wər-tagim iduf n as igraw-kawan arat immittayan.

¹³ Kalar isəffəliwəset-kawan as tədrâwam d Əlməsix aɣazab, fəl ad taknim təfalawist əd tədəwit assaya wa du-za-tənəfiləl tanaya-net.

¹⁴ Təbbilalam kawanay win tawarbadnen fəl as kawan-ila Əlməsix id İnfas wa ilan tanaya, a t-imosan İnfas ən Məššina, a dər-wan iddewan.

¹⁵ A kawan-wər-iggəz i iɣɣizzaban fəl igi ən man, wala šikra, wala tišit n anasgafa, madəɣ awedan itaggazan šixawšiwən a tu-wər-nəqqəl.

¹⁶ Mišan as tətayazzabam fəl tišit n əlməsixitan, a kawan-wər-isəkkərəkəd awen, kalar sənnəməlat fəl Məššina, fəl awer wa kawan-iga esəm n Əlməsix.

¹⁷ Fəlas alwaq ewad-du wa daɣ z'antu əššəriɣa, amaran tamattay ta n Məššina as inta. Daɣ adi dad zamas nakkanay as issənta əššəriɣa-net, ma dər za talu təsəlkaht ən win wər nəzzəgzan s Əlinjil-net?

¹⁸ Ənnan Əlkəttaban: «*Dad zamas aytedan win oɣadnen da gərrid as z'afsin, ma dər z'alın win wər nəksud Məššina əššokalan daɣ igi ən bakkadan?*»

¹⁹ Daɣ adi win tayazzabnen daɣ əddənət fəl as əmmožalan tara ən Məššina, aginet iman-nasan daɣ təɣlift n Əmaxlak n əkkulluk n arat, s ənta a imosan aɣadıl, aglin daɣ əmazal n awa olayan.

5

Tizart daɣ Əlkənisat

¹ Əmərədda ad agaɣ ənnəsixatan əkkənen win daɣ-wan əmosnen imuzaran n Əlkənisat. Əššewalaɣ-asan s esəm ən tišit-in əmuzar nak da, šilat-nasan, əmosa deɣ təgəyya

n alɣazab n Ɛlməsix, əddewa dər-əs deɣ daɣ tanaya ta du-za-tənəfiləlat.

² Ɛdənət eharay wa kawan-issəɣlaf Məššina. Ɛssənət daɣ-as s a wər nəmos əššil, kalar əs man ərdənən s əmmək was ira Məššina. Ad wər tətəggim adi fəl tara n əddənət, kalar taggiwat-tu s əwəl iglayan.

³ Ad wər tətəggim adi s əddəguz ən məzzəgzan win kawan-tawasaxlafnen, kalar agiwat-as igi a daɣ təmosan almasal olaɣan i tamattay ən Məššina.

⁴ Ɛddi assaɣa wa du-z-inəfiləl əmuzar ən madanan n əlməsixitan, ad təgrəwam maruzat təmosat təkəbbut ən tanaya wər nətəməndu.

⁵ Ɛmmək en daɣ as əɣreɣ aytedan win əmosnen təmmədrəyt s ad abbardagan i muzaran n Ɛlkənisat. Daɣ tassaɣ ta təgam, əqqələt aytedan əssirasnen iman-nasan, gar-ewwan, fəlas a ənnan Ɛlkəttaban: «*Məššina iɾnâz y aytedan win əzzəzwarnen iman-nasan, amaran win əssərasnen iman-nasan arraxmat-net a tan-ihakku.*»

⁶ Sərəsat iman-nawan dat Məššina di ən Məššis ən tarna, fəl a kawan-izzəzwər alwaɣ was otas.

⁷ Agiwat talɣiwen šin kawan-əššəwašnen kul daɣ təɣlift ən Məššina, fəlas ənta a daɣ-wan issanan.

⁸ Ɛqqələt aytedan ənnodanen daɣ man-nasan, tənəkədam. Azangaw-nawan Iblis, itiɣələyɣələy-kawan zun ahar ihhir-nanan, igammay i ijalaqqat.

⁹ Ɛgdələt-as iman-nawan, s ad təsəggətəkkem daɣ əzəgzan. Təssānam as imədrayan-nawan daɣ əzəgzan, taggin alɣazab olān əd wa da tətəggim əddi daɣ adag kul wa əhan daɣ əddənət.

Igi n attama daɣ Məššina daɣ alɣazab

¹⁰ Məššina di n Ɛməggi n arraxmat, s ənta a kawan-d-iɣran əs tanaya-net təɣləlat daɣ tassaɣ d Ɛlməsix, ənta iman-net as dawan-italam fəl man, isisuhit-kawan, ihakk-iwan fərregat n ad təzəzzəwem daɣ əzəgzan, dəffər as təgām arət ən tamert n alɣazab.

¹¹ Ɛnta a ilan tarna har faw! Amin!

Šihulawen šin əlkamnen

¹² Ɛgeɣ-awan-in arət ən batuten šin əssiktaba Silfanus imosan amadray-nana n alɣadil, əmosnat ənnəsixa y-awan, əd təgəyya y-awan as arraxmat ən Məššina ta n tidət, ənta əddi da təgrawam əddi təzizawem daɣ-as.

¹³ Təhul-kawan-in Ɛlkənisat ta n əɣrəm ən Babəylon, as Məššina a tat-isannafranan zun awa dawan-iga. Barar-in Markus da ihul-kawan-in.

¹⁴ Nəsəsləmat ketnawan əs təzələmma šin tinəməggin mədrayan. Ig-awan Məššina alxer ketnawan kawanay a ərtaynen d Əlməsix!

Širawt ta n sanatat iktab Butros

Šihulawen

¹ Awa nak Simyōn Butros, wa n əkli d anammazul ən Ƴaysa Ǝlməsix, a din-ihulan aytedan kul win əgrawnen əzəgzan ilân almaqam zun wa nəgraw. Ǝzəgzan wa, nəgraw-tu əs taqqat n Ǝməli-nana, n Ǝnəssefsi-nana Ƴaysa Ǝlməsix.

² Ig-awan Məššina arraxmat d alxer wər nəla əddukad, əs masnat ta təgam Məššina, d Ǝməli-nana Ƴaysa!

Ǝtəwəyra n əlməsixitan d ətəwəsənəfran-nasan

³ Ǝgey-awan təwatray tədi fəlas tarna ən Məššina as danaɣ-ihakku arat kul was nəddərar y ad nagu təməddurt a daq-qu nəksud. Ǝnta a danaɣ-iknan əsusən ən wa danaɣ-ixran əs tanaya-net d əlluɣ-net.

⁴ Ǝssəbab ən tanaya-net d əlluɣ-net əntanay as nəgraw arkawalan win ogarnen təla n almaqam, ogaran deɣ təzzəwwərt. Arkawalan win, təgrawam-tan fəl ad tagim alxal wa d-ifalan Məššina, tənəməggəgam d arat kul wa ihallakan a du-tawayan arak deranan n əddənət.

⁵ Fəl əddəlil n awen daɣ as, agiwat awa təfragam kul fəl ad təssərtəyam əzəgzan-nawan d əlluɣ, təssərtəyam əlluɣ əd masnat,

⁶ təssərtəyam masnat d ənudi daɣ wallan-nawan, təssərtəyam ənudi daɣ wallan-nawan əd zəmmerat, təssərtəyam zəmmerat əd təksəda ən Məššina,

⁷ təssərtəyam təksəda ən Məššina əd təmmədrəyya gar-ewwan təssərtəyam təmmədrəyya əd tara.

⁸ As daɣ-wan d-əndan aratan win di, əqlan tittəyan daɣ-wan, ad təqqəlam aytedan təha tənfa tətittəy daɣ-san masnat n Ǝməli-nana Ƴaysa Ǝlməsix.

⁹ Mišan awedan wa daɣ du-wər-ənden aratan win di, wədi ola d əmədderɣəl. Ǝgərri-net wər fəruɣ, ittəw-in fadda as itiwazazdaq daɣ bakkadan-net win ərəwnen.

¹⁰ Awen daɣ a fəlas əgmāya daɣ-wan imədrayan-in, ad taknim əddəguz wəllen, təsəssuhem teɣaray ta kawan-iga Məššina, d əsənnəfrən wa kawan-iga. Fəlas arat wədi as tu-təgam, wər dawən-ilkem ad tudām daɣ a imosan təkma.

¹¹ Ǝmmək en daɣ as za tagim agaraw ikmalan y iguz ən taɣmar təɣlalət n Ǝməli-nana, s ənta Ǝnəssefsi-nana, a t-imosan Ƴaysa Ǝlməsix.

¹² Ænta da da æddəlil wa fəl kawan-du-saktaγ har faw aratan win, kuddeγ as tæssân-am-tan kala da tæzizawem daγ tidət ta tættafam.

¹³ Mišan iket æheγ æddænet iwâr-i a kawan-du-sakta batu ta fəl ad tænkədəm.

¹⁴ Fəlas daγ awa di-isannafalal Æməli Ƴaysa Ælməsix agamad-in æddænet ihôz wəllen.

¹⁵ Mišan ad agaγ awa æfraga kul y ad iqqəl as dæffər tæmattant-in da, ad taglim tækattim-du aratan win har faw.

Tanaya n Ælməsix d awa ænnan Ænnəbitan

¹⁶ Amaran æssənat as wərgəγ imayyan a du-tiwanzammen əs təla ən tayttay tagget as nəlkam, nəsusun-kawan sər-san fəl tarna n Æməli Ƴaysa Ælməsix d assa-net. Kalar adkul-net a nənay əs šittawen-nana.

¹⁷ Fəlas igraw ətəwəsəγmar əd tanaya γur Məššina di n Abba. Aratan win igraw-tan assaγa wad isla y əməsli isinnahalan təla ən tanaya, as das-inna: «Wa, ənta a imosan barar-in wa əkneγ tara, ikna əsəffəliwəs ən man-in.»

¹⁸ Æməsli wa nakkanay iman-nanaγ as das-nəsla as d-igmad ijənnawan, assaγa wad nəddew d Æməli Ƴaysa fəl ədγaγ wa zəddigan.

¹⁹ Awa dawan-ənnəγ əddi, ittəy-du fall-as awal n ənnəbitan s ənta a ihoran wəllen d ətəwəzəγzan. Æmazal wen, təgām tanat tolâγat as sər-əs təzzəγzanam, təssəγmaram-tu, fəlas iha əlmital a ən fətəla təbilazlatat daγ adag əhânat šiyay, har d-assarrat azal, isəmmələwləw Ælməsix imosan atri wa n tifawt iwəllan-nawan.

²⁰ Arey a kawan-əssusənaγ təzzar as wər t-illa awal n ənnəbitan ihân Ælkəttaban as ifrag ənnəbi a t-id-inzəm gar-es əd man-net.

²¹ Fəlas wər t-illa awal n ənnəbitan imosan arat a d-ifalan aggadəm wala ewâl s awa ira aggadəm. Kalar Infas wa Zəddigan a d-igan daγ wallan n aytedan as əmməgradan s awal a d-ifalan Məššina.

2

Aytedan win sasayrinen bahutan

¹ Kala ad əhan ənnəbitan ən bahu tamattay n Israyil. Æmmək en daγ as kawanay da a daγ-wan t-əməlan musanan sasayrinen bahu, a daγ-wan du-z-əssədnen əs təkərras masnaten saxraknen, a du-tawaynen ahluk, har as ad unkaran Æməli wa tan-isaddarfan; awəy-du sər-san awen ahluk ən man-nasan a fall-asan du-z-agin əzəbbi a tan-iγdāran.

² A dasan-əlkəman aytedan aggotnen daχ igi ən mazalan win ogarnen taxxaramt, amaran iməssəsəχra ən bahu en da a du-z-awəynen iba n ətəwəsəfrar ən tarrayt ta n tidət.

³ Tara-nasan əddənət, a sər-san du-tawəy əs a daχ-wan ayyawanan agaraw ən tənfa əs batuten a d-ənzaman. Aytedan win irəw wəllen as tan-ibaz əššəriχa, amaran ahluk-nasan wər iggug!

⁴ Məššina wər iχles angalosan win əganen abakkad, kalar igar-tan daχ anu wər nəl-eder, tawattafan daχ-as əs sassaran den da daχ šiyyay har əzəl wa n tabadday.

⁵ Aytedan win ərəwnen da, iwiddab-tan Məššina fəl bakkadan-nasan. Mišan assaχa wa tan-iχrad ahluk s alwabil wa zəwwəran, issəfsa Nux a itamaran aytedan əs tarrayt ta n taqqat. Issəfsa deχ əssa aytedan wiyyad.

⁶ Məššina ihlāk aχrəm an Sədom, əd wa n Gamora əs təmsay, har əqqalan ezəd. Iwiddab-tan Məššina s əhluk wen fəl ad əqqəlan almasal y aytedan win tu-wər-nəksud.

⁷ Mišan iχlas Lot a imosan awedan oχādan, iχšād ark alxal labasan ən nəmməzray win den iman-net.

⁸ Fəlas Lot aləs iχdālan a imos, izdāχan ammas n ark aytedan win, ihannay, isallu deχ y ark aratan wər nəmməkkan win taggin əkkulluk n əzəl. Arat wen da a izzožaran iman ən Lot wəllen fəlas əwəl-net a iχdalan.

⁹ Daχ adi arat wa, issikna as Əməli issân əmmək was z'iχləs daχ jarrabatan aytedan win t-əksudnen, issân deχ əmmək was z'ittəf aytedan win tu-wər-nəksud, har d-awəd əzəl a ilkaman s ənta a daq-qan z'awwaddab.

¹⁰ Aytedan win əlkamnen y arak deranan samadas-nen šiχəswen-nasan, olkân taχmar ən Məššina, əntanay wəllen a z'awwaddab.

Iməssəsəχra ən bahu win, olkân aytedan, əzzizwaran iman-nasan, wər əgen wala arat ən safrar i Kəl Tanaya win jənnawan, kalar takkasan-asan tarna.

¹¹ Wala angalosan, a tan-ogarnen wəllen təla ən fərregat, ogaran-tan təla ən tarna, da wər təkkəsan tarna dat Məššina i Kəl Tanaya win.

¹² Mišan aytedan win, wər əssenən a taggin den, wər əzlayan əd wəxsan a du-wər-nəhəw ar y ad tatarmasan, tāwanχin. Aytedan win takkâsan tarna y a wər əzdayan, amaran ad agin ətəwənχa wa tawaggin wəxsan.

¹³ Ənta den daχ attadib wa dasan-z-itəwəggin fəl arak mazalan-nasan. Ezal a mallan ad tamazalan arak deranan-nasan. As dər-wan naχaman daχ məğura, ad arin a kawan-takarrasan, amaran ənəχima-nasan iχšad-awan esəm wəllen.

¹⁴ Šittawen-nasan, wər tanat-ihā ar tara n igi n əzzəna, faw da ərân igi n abakkad, takarrasan-du əs man-nasan aytedan win as irkam əzəgzan-nasan y a tan-səssugin ibakkadan. Aytedan win, faw da wər gəmməyan ar a əgrawan əs təməwit wər noyed, amaran təwâr-tan tulxant.

¹⁵ Əgmadan tarrayt ta tolaɣat, əlkaman i Balxam wa n ag Bosor, əxrakan. Balxam tara n əzrəf n alxaram a tu-tewayat s as irda s igi ən təkma.

¹⁶ Mišan ya isla y ərruɣmatan fəl təmazrəyt ta iga den. Tajat fadda, a təššewalat s əməsli n aggadəm, təgdal y ənnəbi wen igi n əmazal n əmməskəl was otas igi-net den.

¹⁷ Iməssəsəɣra ən bahu win, olân d enwan wər əhen aman, əd garakan təbbât təkəkay sa əd sa. Edag-nasan issins-asan-tu Məššina daɣ šiyyay šin ogarnen tallabəst.

¹⁸ Awalan-nasan wər nəla almayna waliyyan, za wər ənfen wala, d arak deranan-nasan as du-takarrasan aytedan win as səket a d-əggazan tarrayt ta tolaɣat, əmməzzayan-du d aytedan win əxraknen, a tan-sisuginen əzzəna.

¹⁹ Gannin-asan a tan-əkkəsan daɣ təla, ənta iman-nasan as əmosan eklan n arak deranan-nasan tawaynen s əhluk. Ənta awedan kul akli a imos n arat wa t-ornan.

²⁰ Kud aytedan win əssannen Əməli-nana Ƴaysa Əlməsix, imosan Ənəssefsi-nana, namaggagan əd tajjarganen n əddənet, dəffər adi amaran oyyan iman-nasan əqqalan tajjarganen šin den, adi za tawarnan. Alxalat ta əggazan den təššam-as fadda ta d-əgmadan əs tizarat.

²¹ Fəlas of-asan fadda, ad imos as wər kala ad əzdəyan tarrayt ta n taqqat y ad imos as əzdəyan-tat, dəffər awen amaran ammazrayan alwajib zəddigan was dasan-itawanna a das-əlkəman.

²² Awa igrawan iməssəsəɣra ən bahu win, isitadda batu ta əgan kəl awal as ənnan: «Idi as iga afši, a t-id-iqqəl atš-ay.» Ənnan deɣ: «Əzubarā kud das-təššorada da, amazay wədi da a daɣ z'iqqəl talaɣ izəggəluləz daɣ-as.»

3

Arkawal ən tawaylay n Əməli

¹ Ya imaran-in, širawt-in ta, ənta ta n sanatat a dawan-in-əkta. Šira šin kul, gammaya daɣ-asnat a dawan-agay ənnəsixa n ad tətagim ənnəzər olaɣan igân s əwəl iyyanda daɣ əsəssəɣri wa təgrawam. Awen daɣ as areɣ a dawan-t-id-assakta.

² Æddi ad za taktim awalan win as kala tan-əgan ənnəbitan a zaddognen. Taktim deɣ alwajib wa dawan-əmalan nəmmuzal-nawan. Alwajib wa, ifâl-du wa imosan Æməli, imos deɣ Ænəssefsi.

³ Daɣ tizarat, areɣ ad təssənam âs daɣ adan win əlkamnen, ad t-əməlan nujaban labasnen, wər nəlkem ar y arak deranan-nasan, ad tajaban daɣ əzəgzan-nawan.

⁴ Ad gannin: «Inna a d-asu! Ænda ya, mas iqqal asa-du? Imarawan-nana da aba-tan, amaran wa du-tənta əddənet, wər imməttay wala daɣ talɣa ta har əmərədda!»

⁵ Mišan aytedan win ganninen awa, ill-ay arat iyyan a din-tatawin, amaran əgməyan-in awen, a t-imosan as ijənnawan d amaɖal, a irəwan wəllen a d-əxlakan. Məššina a izamməzayan aman d amaɖal s awal-net, amaran aman en da, as d-ixlak amaɖal.

⁶ Aman win daɣ den, as təhlak əddənet ta tərəwat, əɣradan-tat alamaz.

⁷ Amaran awal wen daɣ den as tawagəzan jənnawan d amaɖal har harwa da, fəl ad təwəkfin i təmsay, har d-awəd əzəl wa daɣ z'abəz əššəriɣa aytedan win wər nəksud Məššina əhləkan.

⁸ Dər iga awen da ya, ill-ay arat iyyan as a t-in-wər-tattawim, imaran-in, a t-imosan as: Ȳur Æməli, əzəl iyyanda wər izlay d əgim n awatay, amaran agim n awatay wər əzlayan d əzəl.

⁹ Æməli wər isəɟulit əsəndi n arkawal, awa əɟilan aytedan wiyyad. Təh-ay təzəydart wəllen y-awan. Wər ira ad ihlək awedan waliyyan. Kalar a ira ad utaban aytedan kul.

¹⁰ Æzəl wa ilkaman, a d-əgu assa wa d-itaggu abaydag. Æzəl wen, ad təɣrəd təmsay ahluk n awa ihan ijənnawan kul, iba taməyyaməyt ən jənnawan, iddew awen d əməsli iknân tallabəst, ikšəf amaɖal d awa fall-as itawamazalan kul fəl ad təwəxkəman.

¹¹ Dad zamas aratan win kul ad əɣrədan ahluk, wədi əssənat ənnuɣ n anamod was kawan-iwâr a das-təlkəmam daɣ təməddurt-nawan. Iwâr-kawan ad tagim alxal zəddigan wa ira Məššina, tiksadam-tu,

¹² awen agiwat-tu təssigadam, tədgâzam daɣ a d-awəd əzəl a ilkaman, imosan əzəl a daɣ za bələgləgan jənnawan, ibələgləg deɣ awa tan-ihan kul, əlyəman.

¹³ Nəqqâl y ad t-əməlan jənnawan d amaɖal aynaynen, a daq-qu z'iməl əššəriɣa oɣadan, imos as awen daɣ as danaɣ-iga Məššina arkawal-net.

Aholan win əlkamnen

¹⁴ Daɣ adi imaran-in, daɣ əsəgəd wa təgam da, ədgəzat wəllen, daɣ agamay n a kawan-d-asu Æməli təzəddigam,

wər tælem a imosan əlyib, tæssibdadam awa imosan alxer gar-ewwan əd Məššina.

¹⁵ Agiwat iduf n as təzaydart n Əməli-nana, ənta a təmosat efsan-nawan. Arat wədi amadray-nana n əməri-nana Buləs da imâl-awan-tu daɣ širawt-net, əs masnat ta t-ikfa Məššina.

¹⁶ Awen daɣ a itaggu daɣ šira-net kul šin daɣ iga batu ta. Šira šin, əhân-tanat daggan as izzəwat əgərri-nasan. Idaggan win, safrayan-tan aytedan win aljahilan, as irkam əzəgzan-nasan, awa taggin y Elkəttaban win hadatnen, amaran awen hallakan sər-əs iman-nasan.

¹⁷ Ya imaran-in, dad zamas təgrâwam isalan, ənkədat wəllen, fəl ad wər təlkəmam y əxruk wa əgan aytedan win wər nəksud Məššina, fəl ad wər tammazzayam d əsəggətəkki wa təgam daɣ əzəgzan-nawan.

¹⁸ Kalar are daɣ-wan ad təššitim əzəzzəwi daɣ arraxmat ta təgrawam, əd masnat ən Ƴaysa Əlməsix, s ənta Əməli-nana n Ənəssefsi-nana. Ənta a ilan tanaya əmərədda, il-et deɣ har faw. Amin!

Şirawt ta tazzarat iktab Yaxya

Təzugəst ən salan

¹ Nəkattab-awan-in isalan ən wa imosan awal ihakku tēməddurt. Awal wa ill-ay dat ənətti n əddənət: nəsl-as nənay-tu əs şittawen-nana, nəzigəzd-ay, amaran ədâsan-tu fassan-nana.

² Wa imosan tēməddurt, itawasanafalal-du nənay-tu nəggəyat-as, amaran nəmmâl-awan tēməddurt ta təxlalat tas kala tälla xur Abba. Tēməddurt ta əmərədda tətawasanafalal-ana-du.

³ Tidət a imos as arat wa nənay əd was nəsla nəmâl-awan-tan, fəl ad təqqəlam kawanay da aytedan a dər-na ertaynen. Tartəyt ta tidət a imos as nəg-et əd Məşşina Abba-nana əd Barar-net Yaysa Əlməsix.

⁴ Aratan win wər dawan-tan-in-nəkəttəb ar fəl ad tandu tədəwit-nana.

Məşşina ənnur a imos

⁵ Əntanay da isalan ən Yaysa Əlməsix win as nəsla, nətagg-awan-tan: Məşşina ənnur a imos, wər t-ihə a imosan şiyay.

⁶ Kud a nənna nərtay dər-əs amaran nəgla nəjiwankat dağ şiyay, wədi nakkanay inəsbuha, wər nəlkem y arat wa dana-iwaran imosan əmazal əs tidət.

⁷ Mişan as nəjiwankat dağ ənnur s ənta a ihə Məşşina iman-net, wədi nərtây, amaran azni ən barar-net Yaysa izzizdag-ana dağ id t-illa abakkad.

⁸ As nənna wər dana-iwer abakkad waliyyan wədi bahu a nətaggu i man-nana, amaran wər təha tidət iwallan-nana.

⁹ Mişan as wər nənkur ibakkadan-nana, dad zamas imos alxadil, oğad, wədi a danaq-qan-issurəf, izzəzdəg-ana dağ arat wər noxed kul wa nəmmoza.

¹⁰ As nənna wər nəgə abakkad waliyyan wədi əsəbbəhəw a nəgə Məşşina, amaran awal-net wər ihə iwallan-nana.

2

¹ Bararan-in arat wa əkattabağ-awan-t-in fəl ad wər tətəggim ibakkadan. As iqqal as iga iyyan dağ-wan abakkad wədi nəla almawakkil xur Abba a t-imosan Yaysa Əlməsix s ənta a oğadan,

² fəlas iman-net a ikfa iqqal takutay ta təmmasat ibakkadan-nana. Amaran wərgəx ibakkadan win-nana xas kalar harkid win aytedan kul.

Ammar irəwan aynay

³ Ēnta da arat wa dana-z-issusənan as nəssân-tu: Ad nətamazal arat kul was danax-omar.

⁴ As inna awedan issân-tu ənta amaran wər itəmizil arat was omar, awedan wədi anasbahu a imos isitaddan as wər təha tidət iman-net.

⁵ Mišan wa itamazalan s awal-net wədi tənifalal dağ-as tara ən Məššina təkmâlat. Ēnta da əmmək was nəssan as nertay d Ēlməsix:

⁶ Wa innan iha Ēlməsix iman-net iwâr-tu igi ən təməddurt ta iga Ēlməsix.

⁷ Imaran-in ammar wa wər imos arat aynayan a dawan-in-kattaba, ammar awa wanad da irəwan a, təgrâwam harwa dağ tizarat imosan isalan win as təslam.

⁸ Dər iga awen da ya ammar wa dawan-in-kattaba da aynay. Šinaya-net tətawahannay dağ Ēlməsix, tətawahannay değ dağ-wan, fəlas šiyay a tamattatnen itimələwləw d ənnur wa n tidət.

⁹ Wa innan iha ənnur ənta ikyad amadrax-net wədi harwa da iha šiyay.

¹⁰ Wa iran amadrax-net wədi ənnur a iha, amaran dad zamas iha ənnur wədi wər tu-təlla təsənkəft a tu-zataggadlit.

¹¹ Mišan wa ikyadan amadrax-net wədi šiyay a iha, ijiwankat dağ-asnat, wər issen sas idag fəlas sidarɣalnat-tu.

Əddənet əd zənga n Ēlməsix

¹² Bararan əkattabaɣ-awan-in as: ibakkadan-nawan ətiwasarafan-awan s əssəbab n arat wa iga Ƴaysa Ēlməsix.

¹³⁻¹⁴ Bararan, kattabaɣ-awan-in fəlas təssânam Abba.

Abbatan əkattabaɣ-awan-in fəlas təssânam wa t-imalan harwa dağ tizarat.

Təmmədrəyt, əkattabaɣ-awan-in arat wa fəlas assahat a təgam dağ tarrayt ta n Məššina tornâm əlxəkum n Iblis.

¹⁵ Ad wər tirem əddənet wala tirem arat a tat-ihan təll-ay. As ira awedan əddənet tara ta n Abba wər tu-zatəggəz.

¹⁶ Fəlas aratan kul win əddənet, a tan-imosan: tara ən man, tara n əddənet, zazwar ən man wa du-tətaway təgərgist, aratan win kul wər d-əfelan Abba, kalar in əddənet.

¹⁷ Əddənet d ətəwəra-net ad əğrədan, mišan win əlkamnen i tara ən Məššina ad əğləsan har faw.

¹⁸ Bararan-in tilkamat n assayət tənta. Təslam as a d-asu awedan imosan azangaw n Ēlməsix. Ēmərədda aytedan aggotnen a d-osanen əmosnen izənga-net. Arat wa da a danax-issosanan as təmastant tənda.

¹⁹ Aytedan win əmosnen izənga n Əlməsix nakkanay a da din-əgmadan, mişan wər əmosan arat day-na. Fəlas ənnar t-əmosan wər dana-z-əgmadan. Mişan əfalan-ana fəl ad igməd aššak as wər əmosan arat day-na.

²⁰ Amaran kawanay ikf-iwan Infas wa Zəddigan tarna s ənta a kawan-təkfət ketnawan masnat n arat kul wa imosan tidət.

²¹ Wərgəy fəlas wər təssenam tidət a fəl dawan-in-kattaba, kalar fəlas tat-təssanam, tidət amaran wər t-illa bahu a tat-du-z-igmədan.

²² Day adi ma imosan anasbahu ar wa inkuran as Yaysa a imosan Əlməsix? Wədi ənta a imosan azangaw n Əlməsix, inkuran Abba əd Barar.

²³ I inkuran as Yaysa a imosan Barar wədi Abba da wər t-iqbel, amaran wa iqbala Barar, wədi Abba da iqbâl-tu.

²⁴ Adi da fəlas sənnəhəlat iduf ən salan win təgrawam day tizarat. As təglam tətəfam arat was təslam day tizarat wədi har faw tərtayam əd Barar d Abba.

²⁵ Amaran ənta da arkawal wa dawan-iga Əlməsix: A kawan-akfu təməddurt ta təylalat.

²⁶ Aratan win kattabağ-awan-tan-in fəl əddəlil n aytedan win gammaynen d əsəxrək-nawan.

²⁷ Amaran kawanay tarna n Infas wa Zəddigan ta təgrawam xur Əlməsix, tah-iwan. Day adi wər təddəraram s ətəwəsəsəxra fəlas tarna tədi da a kawan-təsasaxrit arat kul. Arat wa təsasaxru tidət a imos, fəlas wər tətəggu bahu. Nəmənnəkət day esəm ən Yaysa s əmmək was kawan-isassaxra Infas wa Zəddigan.

Bararan ən Məššina

²⁸ Bararan-in akniwat tassağ d Əlməsix, əddi as du-z-inəfiləl da nəkkâs aššak fəl man-nana, wər dər-əs nənamağgag, wər nəkarakad xur assa-net.

²⁹ Təssânam as Əlməsix ənta a oğadan, day adi awedan kul wa itamazalan awa oğadan, wədi irtây d Əlməsix imos değ barar ən Məššina.

3

¹ Təhannayam as awa dana-iga Abba da tara a danağ-itawannan bararan ən Məššina. Amaran nəmos-tan. Əddənət wər dana-təssen, fəlas wər təssen Əlməsix.

² İmaran-in nakkanay əməredda bararan ən Məššina a nəmos, amaran arat wa za nəqqəl dəffər awa harwa da wər dana-d-inafalal. Nəssân xas as Əlməsix as du-z-inəfiləl nola dər-əs, fəlas anay a tu-za-nagu ənta iman-net.

³ Aytedan win əganen attama wa, win di əzzizdagan iman-nasan s əmmək as zəddig Əlməsix.

⁴ Wa igan abakkad wædi immizray æššəriḡa ən Məššina fəlas abakkad almaḡna-net əməzrəy n æššəriḡa.

⁵ Amaran təssānam as Əlməsix osa-du fəl a fall-anax ikkəs ibakkadan. Ənta iman-net wər kala a tan-iga.

⁶ Daḡ adi wa dər-əs irtayan iməzzay d igi ən bakkadan, mišan wa tan-itaggin wædi wər issen Ƴaysa za wər igra awa imos.

⁷ Bararan-in a tu-wər-iməl awedan a kawan-issəxrakan. Awedan wa oḡadan ənta a izalalaxan daḡ tarrayt, s əmmək as oḡad Əlməsix.

⁸ Wa itaggan ibakkadan Iblis as ilkam fəlas Iblis ḡur ənətti ad iggaz šin igi ən bakkadan. Amaran Barar ən Məššina osā-du fəl ad izzərəz æššəḡəl n Iblis.

⁹ Awedan kul wa imosan barar ən Məššina wər itəḡḡu ibakkadan fəlas təməddurt ta du-təfalat Məššina təha iman-net. Wər ifreg igi ən bakkadan fəlas barar ən Məššina a imos.

¹⁰ Ənta da arat wa izlayan bararan win Məššina əd win Iblis: Aytedan kul win wər nətəimizil awa oḡadan, wər əren deḡ imədrayan-nasan win əzzəḡzannen s Əlməsix. Aytedan win di əntanay a əmosnen bararan win Iblis.

Tara ḡər mədrayan daḡ əzəḡzan

¹¹ Təkittəwam isalan win as təslam harwa daḡ tizarat əmosnen əs: «Nəmərətana ḡar-ena!»

¹² Daḡ adi a dana-wər-iggəz i igān awa iga Kayin, ilkaman y Iblis iga iman n amadray-net. Mafel za itagḡ-en? Iga iman n amadray-net fəlas alxal-net a wər noḡed amaran wa n amadray-net oḡād.

¹³ Daḡ adi imədrayan-in, a dawan-wər-iqqən eḡaf as tətəwakyadam daḡ əddənət.

¹⁴ Nakkanay nəssān as nəḡmād-du təmattant əs təməddurt təzrāyat fəlas imədrayan-nana daḡ əzəḡzan a nəra. Awedan wa wər nəra amadray-net daḡ əzəḡzan, wædi harwa da ənəmmettən a imos.

¹⁵ Awedan wa ikyadan amadray-net daḡ əzəḡzan, wædi əməḡḡi ən man a imos, amaran təssānam as əməḡḡi ən man wər das-tu-təlla təməddurt ta təḡlalət.

¹⁶ Tehakkay ta iga Ƴaysa iman-net fəl əddəlil-nana, ənta a dana-təssosanət awa təmos tara. Nakkanay da iwār-anax ad nakfu iman-nana fəl əddəlil ən mədrayan-nana daḡ əzəḡzan.

¹⁷ Awedan n əməḡḡergəs inayan amadray-net daḡ əzəḡzan iddiraran izazzandar-tu, manəmmək as z'itəwənnu təha tara ən Məššina əwəl-net?

¹⁸ Bararan-in ad wər təqqəl tara-nana arat ihān imi ḡas, kalar tamazalat-tat əs tidət əs mazalan a tat-sinafalalnen.

Ikus n aššak fəl man-nana ħur Məššina

¹⁹ Təməwit ta da as nəssan as aytedan əlkâmmen i tidət a nəmos, daħ adi wər danaħ-iššəwaš wala dat Məššina,

²⁰ kudde tihammen-ana wallan-nanaħ arak əmazal. Fəlas Məššina ogar iwallan-nana, amaran issân daħ arat kul.

²¹ Imaran-in, as dana-wər-tahammen wallan-nana arak əmazal, wədi nəkkəset aššak fəl man-nana ħur Məššina.

²² Arat kul wa daħ-as nəğmay a danaq-q-akfu fəlas əlwajiban-net as nəlkam, amaran nətamazal awa das-igrazan.

²³ Ənta da arat was danaħ-omar: Ad nəzzəgzən s esəm ən Barar-net Ƴaysa Əlməsix nənəmərü gar-ena s əmmək was danaħ-omar.

²⁴ Awedan wa ilkaman i tənna ən Məššina wədi Məššina iha iman-net. Ma danaħ-issosanan za as iha iman-nana? Adi za Infas wa Zəddigan wa danaħ-ikfa.

4*Mas za nəssən wa d-ifalan Məššina*

¹ Ənkədat imaran-in, ad wər təzagzanam y i d-iggadan kul inna Məššina a t-id-izammazalan, kalar jarrabat-tan təzzar har təssənam daħ-san win d-izammazal Məššina, fəlas ənnəbitan ən bahu aggotnen a əhanen əddənet.

² Ənta da əmmək was za təssənam awedan wa d-issəgla Infas wa Zəddigan: Awedan kul wa iqbala as Ƴaysa Əlməsix osâ-du əddənet iha təğəssa n aggadəm wədi Infas wa Zəddigan t-id-izammazalan.

³ Mišan awedan kul wa inkuran Ƴaysa wədi wər t-id-izammazal Məššina. Awedan wədi əmagzar n Əlməsix was təslam âs a d-asu a t-id-izammazalan. Əmagzar n Əlməsix wədi iha əddənet əmərədda.

⁴ Kawanay bararan-in, Məššina a kawan-ilan amaran tornâm ənnəbitan ən bahu win, fəlas wa dər tərtayam ogar wa işyalan y əddənet.

⁵ Əntanay kəl əddənet a əmosan. Adi da a fəlas batuten šin n əddənet a taggin, amaran sasaman-asan aytedan.

⁶ Nakkanay Məššina a dər nərtay; awedan wa issanan Məššina isasam-ana, wa tu-wər-nəssen amaran wər danaħ-isəsım. Əmmək wa da as za nəfrəg zələyat gər awedan wa d-izammazal Infas wa Zəddigan əd wa d-izammazal əməssexrək.

Məššina tara a imos

⁷ İmidawan-in ən maran-in nəmərətana gar-ena fəlas tara Məššina a du-təffal. Awedan wa təha tara, barar ən Məššina a imos amaran issân-tu.

⁸ Wa wər tēha tara wər issen Məššina fəlas Məššina ənta tara.

⁹ Ənta da əmmək was dana-isannafalal Məššina as ir-ana: Barar-net an iyyanda a d-issoka əddənet fəl a sər-əs nəgrəw təməddurt taynayat.

¹⁰ Ənta da awa təmos tara: Wərgəx nakkanay a issəknan Məššina tara, kalar ənta a danaq-qat-issəknan issokadu Barar-net əddənet fəl ad iqqəl takutay təmmasat ibakkadan-nana.

¹¹ İmaran-in, dad zamas Məššina ig-ana tara togdât d awa wədi nəməratana gar-ena nakkanay da.

¹² Məššina wər kala ad t-inay awedan. Mišan kud nənimara gar-ena wədi iha iman-nana, tənifalal-du daɣ-na tara-net əs təməwit təkmlat.

¹³ İnfas-net wa Zəddigan a danaɣ-ikfa, a di da a danaɣ-issosanan as nərtay dər-əs iha iman-nana.

¹⁴ Abba issigla-du Barar-net fəl ad iqqəl Ənəssefsi n əddənet. Nənây-tu əs şittawen-nana, nətagayyat deɣ awen.

¹⁵ İ innan s əwəl iyyanda Ƴaysa Barar ən Məššina a imos, wədi Məššina iha iman-net, amaran irtây əd Məššina.

¹⁶ Nakkanay nəssân daɣ tara ta danaɣ-iga Məššina nəzzigzan-tat deɣ. Məššina tara a imos. Was tēha tara iman-net irtây əd Məššina iha Məššina iman-net.

¹⁷ As du-təga tara ta ənəfilal ikmâlan daɣ wallan-nana, ad nəkkəs ašşak fəl man-nana əzəl wa n tabadday, fəlas təməddurt-nana daɣ əddənet a tolat əd ta n Əlməsix.

¹⁸ Tara wər tərəttəy əd təksəda, fəlas tara təkmlat asatay a tətag təksəda. Daɣ adi wa taha tasa wər daɣ-as təkmlə tara fəlas tasa mərda ən tazak n əttadib a təmos.

¹⁹ Nakkanay tēha tara iwallan-nana, fəlas Məššina a danaɣ-iran əstizarat.

²⁰ As inna awedan ənta ira Məššina amaran ikyad əmidinet, awedan wədi anasbahu. Fəlas wa wər nara əmidinet ihannay manəmmək as z'iru Məššina a wər ihənnəy?

²¹ Alwajib da wa dana-d-oyya Əlməsix: İ irân Məššina, ired əmidinet.

5

Əzəgzan təgəyya ən Məššina

¹ İ izzəgzanan as Ƴaysa ənta Əlməsix wədi barar ən Məššina a imos. İ iran əmaraw, ad iru bararan-net.

² Əntada awa danaɣ-issosanan as nəra bararan ən Məššina: Tara a nəga Məššina nəlkâm y alwajiban-net.

³ Tara ən Məššina ləkkum y alwajiban-net, amaran alwajiban ən Məššina wər əmosan əzuk,

⁴ fəlas bararan ən Məşşina kul ornan əddənət, amaran tarna ta təylabat əddənət tədi əzəgzan-nana.

⁵ Ma imos za wa ornan əddənət? Adi za awedan wa izzəgzanan as Ƴaysa Barar ən Məşşina a imos.

⁶ Ƴaysa osâ-du əddənət, itawasalmay dəy aman, azni-net dəy inyal fəl təgəttawt, dəy adi wərgəy aman ƣas as d-inafalal, kalar aman d əzni as d-inafalal. Infas wa Zəddigan a isattaddan arat wa, Infas wa Zəddigan amaran tidət a imos.

⁷ Dəy adi karadat təgəyyawen a t-əllanen əmosnen:

⁸ Infas wa Zəddigan d aman d əzni, amaran ketnasnat fəl karadatesnat nimannaknat əs təgəyya ta.

⁹ As əggəyen aytedan fəl arat ad nəqbəl təgəyya-nasan. Mişan təgəyya ta n Məşşina ənta a zəwwərat, amaran ənta a iga i Barar-net.

¹⁰ Wa izzəgzanan əs Barar ən Məşşina, ənta da təha təgəyya ta iman-net. Wa wər nəzzəgzan əs Məşşina wədi əsəbbəhəw a t-iga, fəlas əzəgzan a wər iga təgəyya ta iga Məşşina fəl Barar-net.

¹¹ Ma təsətadda təgəyya ta? Təsətadda as Məşşina ikfana təməddurt ta təylalat, amaran təməddurt ta ənta a du-təgmadat Barar-net.

¹² Wa izzəgzanan əs Barar ən Məşşina igrâw təməddurt ta, wa sər-əs wər nəzzəgzan wər tat-igrew.

Əzəgzan igmâd aşşak

¹³ Aratan win əkattabaƣ-awan-tan-in fəl ad təssənam as təgrâwam təməddurt təylalat, kawanay a əzzəgzannen s esəm ən Barar ən Məşşina.

¹⁴ Ənta da əmmək was nəkkas aşşak fəl man-nana ƣur Məşşina: As dəy-as nəgmay arat inimannakan əd tara-net wədi issisam-ana.

¹⁵ Amaran dad zamas nəssân as issisam-ana wədi arat wa dəy-as nəgmay nəssân as nəgrâw-tu.

¹⁶ As inay iyyan dəy-wan amadray-net dəy əzəgzan itaggu abakkad a tu-wər-nəşşətša i təmsay, igməyet-as dəy Məşşina a das-issurəf. Aytedan as ganna win tagginen ibakkadan win wər nəşətšu əs təmsay. Mişan ill-ay abakkad wa itawayan əs təmsay, amaran wərgəy ənta as dawan-ənneƣ ad tətteram i wa t-igan.

¹⁷ Tidət as iba n aqqad abakkad a imos, mişan wərgəy ibakkadan kul şatşin əs təmsay.

¹⁸ Nəssân as bararan ən Məşşina wər gəllin taggin ibakkadan, fəlas Barar ən Məşşina a tan-ogazan. Adi da fəlas wər dəy-san ifreg Iblis wala.

¹⁹ Nəssân as nakkanay Məşşina a danay-ilan, amaran əddənət ketnet innoda dəy-as Iblis.

²⁰ Nəssân as Barar ən Məşşina osâ-du, amaran ənta a danay-ikfan əgərri fəl ad nəssən Əməli wa n tidət, amaran nərtây d Əməli wa n tidət əs tarrayt ən Barar-net Yaysa Əlməsix. Ənta a imosan Əməli wa n tidət ihakkan təməddurt ta təxlalat.

²¹ Bararan-in agəzat iman-nawan dağ əssənəman.

Širawt ta n sanatat iktab Yaxya

Šihulawen

¹ Awa nak amyar a din-ihulan Elkənisat ta tənnefranat əd bararan-net. Areq-qawan əs tidət, amaran wərgəy nak ɣas a kawan-iran, aytedan kul win əssannen tidət aran-kawan.

² Nar-iwan fəlas tidət a təhat iman-nana, wər tan-təgəmməd har faw.

³ Egmaya daɣ Məššina di n Abba əd Barar-net ɣaysa Elməsix a danay-ikfan arraxmat əd təhanint, d alxer, attaddin daɣ-na əs tidət əd tara.

Təməddurt ta təlkatat i tidət

⁴ Eknəy təfalawist wəllen as əsley as wiyyad daɣ bararan-nam əzilalaxan daɣ tarrayt ta n tidət s əmmək was dana-omar Abba-nana.

⁵ Emarədda, Elkənisat, ənta da arat wa daɣ-am gam-maya: ad nənəmərü gar-ena. Wərgəy alwajib izrayan a dam-in-əktabax da kalar alwajib awa nəgraw harwa ɣur ənətti.

⁶ Tara almayna-net ad nəzəluləy daɣ alwajiban ən Məššina. Ənta da da alwajib was za təlkatam s ənta as təslam harwa ɣur ənətti.

⁷ Iməssəxrak aggotnen əwizawazan daɣ əddənet. Ma imosan za əməssəxrək n aytedan imos deɣ azangaw n Elməsix? Adi za wa inkuran as ɣaysa Elməsix osâ-du əddənet imos aggadəm.

⁸ Daɣ adi ənəkədat əd man-nawan fəl ad wər təsəbbənənəm əššəyəl-nawan. As təgam ənəkud wa ad təgrəwam aroz-nawan indân.

⁹ Awedan kul wa inamaggagan d əsəssəxri n Elməsix wədi wər irtay əd Məššina. Amaran wa iglan ittâf əsəssəxri wa, wədi irtây d Abba əd Barar-net.

¹⁰ As kawan-d-osa awedan d əsəssəxri iyyan wər nəmos wa, a tu-wər-təqbəlam, amaran a das-wər-tayim assalam fadda.

¹¹ Fəlas i das-oɣan assalam wədi inimannak dər-əs daɣ arak mazalan-net.

Šihulawen šin əlkamnen

¹² Əllan-tu aratan aggotnen as areɣ a dawan-tan-in-annay mišan s a wər nəmos akatab ən širawt əs taddawat. Əssofay a kawan-in-asay iman-in annay-awan-tan s əmi d əmi fəl ad təkməl təfalawist-nana.

13 Əhulan-kawan-in bararan ən təmidit-nawan ta tənnefranat.

Širawt ta n karadat iktab Yaxya

Šihulawen

¹ Awa nak amȳar a din-ihulan əməri-nin Gayəs arey əs tidət.

² Əməri-nin əsidaranay-ak tətəyt day anamod kul, d assahat ən təxəssa-nak zun ta təge day əzəgzan-nak.

³ Əknəy təfalawist wəllen y assa wa di-d-əgan mədrayan-nana day əzəgzan, əmalan-i ənəfilal wa du-təga tidət day təməddurt-nak d əzəluləy wa day-as təge.

⁴ Wər t-illa a di-igân əsəffəliwəs ewadan wa di-iga ad aslay as bararan-in əlkâman i tidət.

Ənəmännak d əməzrəy

⁵ Əməri-nin tətamazala s alyadala day arat kul wa tətəgga i mədrayan-nana day əzəgzan, wəllen win dak-əmosnen inaftayan.

⁶ Əntanay dak-əggəyatnen dat Əlkənisat fəl tara ta kay-təhat. Ad tagay arat olağan as dasan-təsamataga əşikəl-nasan s əmmək wa igrazan i Məşşina.

⁷ Fəlas wər imos əşikəl-nasan ar igi ən salan n Əlməsix, amaran wər əgməyan wala day aytedan win wər nəssen Məşşina.

⁸ Day adi nakkanay a iwar ad nədhəl aytedan ən šilat ən win di fəl a dər-san nənəməşxəl day tarrayt ta n tidət.

⁹ Kala a din-əktabay arat ən širawt gəzzulat y Əlkənisat mišan Dəyodrefəs irân a dasan-azzâr day arat kul, wər iqbel a danay-in-igmâdan.

¹⁰ Adi da a fəlas as din-osey a dawan-agay isalan n aratan win immozal, əmosnen arak awalan win sər-nay itaggu. Amaran wər das-igda awen xas, fəlas tugəyt a iga s ad issəgən i mədrayan-nana day əzəgzan əmosnen iməşşukal, igdal dey y aytedan a tan-səmməguren, istaq-qan day Əlkənisat.

¹¹ Əməri-nin tələl awa olağan, wərgəy awa labasan. Awedan wa itaggan a olağan ənta a irtayan əd Məşşina, wa itaggan awa labasan wər issen Məşşina.

¹² Day batu ta n Demetrəyəs aytedan kul əgân fall-as təgəyya tolayat, amaran tidət tas ilkam, iman-net as fall-as təgəyyat. Nakkanay dey nəga fall-as təgəyya tolayat, amaran təssânay as təgəyya ta-nana ənta tidət.

Šihulawen šin əlkamnen

¹³ Ellan-tu aratan aggotnen as areḡ a dak-kan-in-annay
mišan s a wər nəmos akatab ən širawt əs taddawat,

¹⁴ fəlas əknêḡ mərda n a kay-ənəya tarmad fəl a dak-kan-
anna s əmi d əmi.

¹⁵ Ǝgmâya daḡ Məššina, a fall-ak d-izazzabben alxer.
Ǝhulan-kay-in midawan-nana. Təhulaḡ-in imidawan-nana,
əkkulluk n iyyan təmalay-as.

Širawt ta iktab Yuday

Šihulawen

¹ Širawt a din-təfalat Yuday, imosan akli ən Ƴaysa Ɣlməsix, imos dey amadray ən Yaqub. Ɣhulay-in aytedan win iƳra Məššina di n Abba, ir-en, ogâz-tan y əzəl wa du-z-iqqəl Ƴaysa Ɣlməsix.

² Məššina ya təgəx-awan tehakkay təkmâlat i təhanint-net d alxer-net əd tara-net!

Batu ta day təmməgrad širawt ta

³ Ya imaran-in, ədgâza wəllen day a dawan-in-əktəba day batu n efsan win nəgraw ketnana. Ɣmərədda amaran ənayax as ilzâm-i a dawan-in-əktəba fəl a day-wan əgməyax ad tabballanam fəl əzəgzan wa ikfa Məššina i win iskat i man-net. Ig-asan y as tehakkay iyyadda,

⁴ əkattabay-awan-in fəlas aytedan wər nəksud Məššina a kawan-əggaznen daw amađal. Safraxan əmazal iqqalan arraxmat wa dana-d-issoka Ɣməli-nana Məššina, fəl ad əgrəwan tarrayt n ad ammazalan aratan win ogarnen taxxaramt. Ɣnkuran dey Ɣmakraz-nana n Ɣməli-nanax an iyyanda a t-imosan Ƴaysa Ɣlməsix. Ark aytedan win, a irəwan wəllen ad əmalan Ɣlkəttaban attadıb wa dasan-z-itəwəggin.

Iməssəsəyra win bahu

⁵ A kawan-d-assaktax aratan as ketnawan təkittəwamtan. Aktiwat ikus n Ɣməli tamattay-net day Masar a day təha əkkəlu, dəffər adi ihlak win ugaynen s a sər-əs əzzəgzənan.

⁶ Aktiwat əlqissat n angalosan win as wər təgda tarna ta əgrawan, əgmadan edag was kala ad t-əhan. Awen a fəl tan-iwax Məššina day adag a day tiwagazan har faw, əqqânan, əhân šiyyay har əzəl maqqaran wa ilkaman.

⁷ Aktiwat-du əlqissat ən Sədom əd Gamora əd Ƴərman win tan-əhoznen. Ɣntanay da zund əmmək en day as əgan ibakkadan əmosnen əzzəna, gammayan dey igi n əzzəna əd təxəllak šiyyad. Ɣmərədda taxazzaban day təmsay təxlâlat, fəl ad əqqəlan almasal.

⁸ Ɣssənat as əhan-kawan aytedan əddi da tagginen targəten, taggin imazalan zun win nəmal əddi. Targəten šin den nazzaman-tanat-du fəl ad əlkəman y arak deranan ən təxəssa-nasan, olkan taxmar n Ɣməli taggin alfawaxišan day batu n angalosan əlanen tanaya.

⁹ Wala Mikayil s ənta a imosan əmənokal n angalosan da assaxa wad imməstan d Iblis day batu ən təxəssa ən Musa, wər ihel šikəggar-net. Kalar tənna xas a das-iga: Awwaddabet-kay Əməli!

¹⁰ Ark aytedan win amaran, takaggaran i wər əzdayan fadda. Amaran arat wa əssanan, əgân-as masnat zun ta n mudaran a wər nəla əgərri, ahluk xas a tan-z-agu.

¹¹ Iket alxazab ad t-agin! Fəlas ləkkum a əgan i tarrayt ta n Kayin. Tara n a əgrawan a sər-san du-tewayat as oyyan iman-nasan əggazan alxata olân əd wa n Balxam. Ad əxrədan ahluk fəlas əgan əfəlləg zun wa iga Quray.

¹² Awalla olân əd təkmawen əllanen daw amaçal. Taggazan-kawan day tədrəwt ta tətəggim imensewan garəwwan kawanay a n əlməsixitan. Tattin s igət, wər əlen təkarakit, wər kəttəwan ar iman-nasan. Olân dey d əgnawan wər iha akonak ibbat-tan ađu. Olân harwa da d eškan as d-ewad alwaq n ara-nasan wər tan-iha ara waliyyan, tiwalbayan-du əd kewan-nasan, əknân tağart.

¹³ Əgân arak mazalan-nasan əmosnen təkarakit olân əd fanxalan win iggar agarew əs təšəšwit-net. Olân d etran itaway ağaf wər əssenən is ədagan, əqqiman day šiyyay šin ogarnen har faw.

¹⁴ Əntanay da təqqal-tan batu ta iga ənnəbi Xenok, imosan ahaya wa n əssa n Adəm. Inna sər-san: «*Ənəy, Əməli a d-asu iddew əd təmərwen ən gimən n angalosan,*

¹⁵ fəl ad işrəy y əddənət ketnet. Ad issəbdəd aytedan kul fəl mazalan wər noyed win əgan əmosnen iba n təksəda ən Məššina. Ad issəbdəd dey inasbakkadan fəl ikus wa əgan tarna y esəm-net.»

¹⁶ Aytedan win, wər əlen igda, faw əššakan awa tan-igrawan, əlkâman y arak deranan-nasan. Taggin batuten əmosnen ibaragan, əmmalan aytedan imos awen agamay n a əgrawan.

Awal ən nəmmuzal d ənnəsixa

¹⁷ Mišan kawanay ya imaran-in, aktiwat awa əmalan nəmmuzal n Əməli-nana Ƴaysa Əlməsix. Arat wa harwa da wər iga as t-əmalan, a t-imosan

¹⁸ as dawan-ənnan: «*Day azzaman win əlkamnen, ad t-əməlan ark aytedan ən nujaban a z'əlkəmnen y arak deranan-nasan.*» Awa taggin aytedan win issikna as wər əksudan Məššina.

¹⁹ Əntanay əddi da aytedan win zamazzaynen əlməsixitan. Wər əlkeman ar i tara ən man-nasan, wər tan-iha Infas wa Zəddigan.

²⁰ Mišan kawanay ya imaran-in, səssuhətat əzəgzan-nawan a day təsihaddam fəl əsəssəxri ittiddan zəddig, ad tətattaram əs tilalt n Infas wa Zəddigan.

²¹ Zəzzəwətat day tara ən Məššina. Agiwat attamanawan day Əməli-nana Ƴaysa Əlməsix, a dawan-ihənəttət, akf-iwan təməddurt ta təxlalat.

²² Hənəttətət y aytedan win as iha aššak əzəgzan-nasan.

²³ Safsiwat win day togazam arat təkəkəsam-tan-du day təmsay. Win hadatnen amaran hənəttətət-asan a daq-qan təksudam, takədam əd wala šibədday-nasan fəlas simadasan-tanat bakkadan-nasan.

²⁴⁻²⁵ Agiwatana təmmalen i Məššina di n iyyan s ənta a danax-issəfsan əs tarrayt n Əməli-nana Ƴaysa Əlməsix! Ənta a ifragan agadal y-awan ad təfətəqqem day igi ən talbast. Ifrâg a kawan-agu aytedan as tu-wər-illa i ifragan a day-san d-inəy ark arat, taknim təfalawist fəlas tørtâyam dər-əs day tanaya-net. Ənta a ihoran əd tanaya d ədkul əd tarna əd tağmar, har faw, gər day azzaman win okaynen, wala əmərədda, wala awa d-izayan! Amin!

Elkəttab wa n Ənəfilal İsənti d assalaman

İsənti

¹ Elkəttab wa tidət təxbârat a mosan salan win t-əhanen, amaran Ƴaysa Əlməsix a tan-isannafalalan. Məşşina a t-issosanan dəy tidət ta, fəl ad assaknu inaybidan-net aratan a z'aginen dəy azzaman wər nəggug. Ƴaysa Əlməsix a issosanan aratan win y ənaybid-net Yaxya s əsuki wa t-id-iga angalos-net.

² Arat kul wa inay Yaxya da, illikan as awal ən Məşşina a imos, illikan dəy as təgəyya ən Ƴaysa Əlməsix a imos.

³ İbbilal wa iyarrin s əməsli idkâlan isalan win nafalalnen dəy əlkəttab wa əşşewalnen dəy batu n aratan win əmərədda əd win d-əzaynen! Əbbîlalan win das-sasammen, əbbirdagan-as, fəlas alwaq wər iggug.

Assalaman

⁴ Awa nak Yaxya, a din-iktâban y Əlkənisaten a n əssayat əhanen akal n Asəya. Əməli s ənta a t-illan kala da, ill-ay dəy əmərədda, amaran ənta a d-izayan, a dəy əgmayağ a dawan-əgu arraxmat d alxer. Təgrəwamet arraxmat d alxer yur əssa ərruxanitan win əllanen dat təxawit ta n taymar n Əməli!

⁵ Təgrəwamet-tan dəy yur Ƴaysa Əlməsix, imosan təgəyya təssiflasat, imos dəy Barar wa n aƳafadday a d-inkaran dəy təmattant, imos əmuzar ən mənokalan n əddənet. Ƴaysa Əlməsix ir-anay amaran isaddarfata ana dəy bakkadan-nanağ, əs təkutay ta iqqal əzni-net.

⁶ İg-anay imənokalan əd limaman i Məşşina di n Abbanet. Ənta a ilan tanaya, azzar y arat kul har faw! Amin!

⁷ Ənta əddi a d-izayan əddi iha-du şignawen.

Aytedan kul ad t-ənəyan

harkid win t-ədagnen saxxarabben-tu əs təzoli.

Tawşeten n əddənet kul a fall-asnat tagu təfəyyawt

dəy talxa n awa t-igrawan.

Awalla awen dəy a igan. Amin!

⁸ Əməli Məşşina ənta a innan: «Nak a imosan Alfa, əmosa dəy Omega, almayna wa azzaran, ilkâm. Əmosa wa t-illan kala da, əmosa wa t-illan əmərədda, əmosa dəy wa d-izzayan; əmosa Məşşina di n əməli ən tarna kul.»

Aratan win nafalalnen i Yaxya

*Ənəfilal ən Wa d-Inkaran dağ tamattant əd šira əkkanen
Elkənisaten šin əssayat*

Ənəfilal ən Wa d-Inkaran

⁹ Nak Yaxya, amadray-nawan a mosa, əheğ təssust zun ta dağ təham, ədrâwa dər-wan Taymar ta n Məşşina əd zəmmerat. Awen kul ədrâwaq-qu dər-wan dağ tərətəyt əd Ƴaysa. Əheğ akal imosan gərwətlan as itawannu Fatmos fəlas emel a əgeğ awal ən Məşşina, əmosa değ təgəyya n awa iga Ƴaysa.

¹⁰ Əzəl n alxad imosan əzəl iskâtan y Əməli, tobaz-i tarnə n Infas wa Zəddigan ən Məşşina, əsleğ dəffər-i y əməsli issohen olân d əməsli n anasağ n asak.

¹¹ Inn-i əməsli wen: «Əktəb dağ əlkəttab awa təhannaya da, təsəssiwəyaq-qu y Elkənisaten a n əssayat a tanat-imosan: ta n Efez əd ta n Əsmurna əd ta n Fergamos əd ta n Təyatir əd ta n Sardes əd ta n Filadelfəya əd ta n Lawodikəya.»

¹² Malallayağ-in y ad əssənağ awa imos əməsli wen. As din-malallayağ, ənayağ əssa səkbəl ən fətəlaten əgânen dağ urəğ.

¹³ Ogge dağ garegaray-nasan azzat tolât əd ta n aggadəm. Azzat ten, təzlâg təkadkat zagret, totâb idmaran-net s əsatəb n urəğ.

¹⁴ Eɣaf-net əd jəkkad-net əgân təməllay ta n təduft, madəğ təməllay ta n əx. Şittawen-net olânat d abalagleg ən təmsay.

¹⁵ İdaran-net imilawlawan zun daroğ illiğlayan, ikna səllul, əməsli-net amaran ola d əjit zəwwəran n aman aggotnen.

¹⁶ Əfus-net wa n əxil əhan-tu əssa etran, imi-net təgammad-t-idu takoba təkñât tawala fəl əşšin fayyan-net. Udəm-net iga əmələwləw wa n təfuk a du-təkñât əzərəyyi.

¹⁷ As t-ənaya, fataqqe ħur daran-net, zun âs əgmâdan-i man. Təzzar issəwar-i əfus-net wa n əxil, inn-i: «A kay wər təggəz tasa! Nak a imosan wa azzaran, əmosa değ wa ilkanan.

¹⁸ Əmosa wa iddaran! Kala a di-aba, mişan əmərədda, nak da iddaran da, har faw! Əttâfa tanat ən təmattant d əlaxirat.

¹⁹ Dağ adi əktəb awa təhannaya, gər za wa itaggin əmərədda, wala değ wa d-izayan.

²⁰ Ənta da almağna n əssir wa n əssa etran win əhanen əfus-in wa n əxil d əssa səkbəl ən fətəlaten win əganen dağ urəğ: Əssa etran win, əmosan angalosan win əssa n Elkənisaten a n əssayat, amaran isəkbəl ən fətəlaten win əssa əmosan Elkənisaten a n əssayat iman-nasnat.»

2

Şirawt təkkât Elkənisat ta n Efez

¹ Ektəb y angalos n Elkənisat ta n Efez as: «Arat da wa inna wa ittafan etran win əssa dağ əfus-net wa n əxil, ijiwankat gər səkbəl ən fətəlaten win əssa n urəx:

² "Kawanay kəl-Elkənisat ta n Efez, əssâna dağ mazalan-nawan, d əşşəğəlan win təgam, əd zəmmerat-nawan. Əssânay âs wər təqbelam inəllubas, tətajarrabam deş win ənnanen əs bahu əmosan inəmmuzal. Təsattaddam as bahu a taggin.

³ Təmosam Elkənisat təzmarat y aratan kul. Təyyəwanam alyazab fəl əddəlil n esəm-in, mişan wər sər-wan d eway awen tewaylay dəffər-wan.

⁴ Mişan ya ill-ay arat a dağ-wan əşşâka, a t-imosan şiyiyit ta təgam tara ta kawan-təhat əstizarat.

⁵ Dağ adi, a din-wər-tattawim igəğ wa din-təgam dağ igi ən bakkadan! Utabat, tərəzam dağ igi-nasan, ad tətəggim imazalan olaşnen win tətəggim harwa dağ tizarat. As wər tətubam, wədi a kawan-in-asa, əkkəsəş əsəkbəl ən fətəlaten-nawan dağ adag-net.

⁶ Dər iga awen da ya, təlâm əlxislat tolayat a tat-imosan as təkyađam imazalan âs nak da əkyâdaq-qan win taggin aytedan win Nikolayitatan.

⁷ Wa isallin aslet y awa inna Infas wa Zəddigan y Elkənisaten: "Wa d-ornan, ad t-aşşatşəş ara n aşək wa n təməddurt, ihân aljannat ən Məşşina."»

Şirawt təkkât Elkənisat ta n Esmurna

⁸ Ektəb y angalos n Elkənisat ta n Esmurna as: «Ənta da awa inna wa imosan wa azzaran, imos deş wa ilkaman, aba-tu inkar-du dağ təmattant:

⁹ "Kawanay Kəl-Elkənisat ta n Esmurna əssâna dağ təssust ta kawan-təgrawat, d əlləqqəw-nawan labasan. Mişan arat wa imosan tidət, as iməggərgas a təmosam! Əssâna dağ ərrəbdan win kawan-taggin aytedan win ganinen əmosan Kəl-Əlyəhud əs bahu, əntanay amaran wər əmosan ar tiddawat ən nalkiman n Aşşaytan!

¹⁰ Ad wər tiksadam alyazab wa dağ-wan ilkaman. Səsəmat, kəl-Elkənisat ta n Esmurna! İblis a kawan-ajarrab s ad agu arat dağ-wan dağ kasaw. Ad tagim maraw adan tətihadgazam. Əşdəlat dağ əzəgzan-nawan iket təddaram, əddi a kawan-akfaş aroz imosan təkəbbut ta n annajax.

¹¹ Wa isallin aslet y awa inna Infas wa Zəddigan y Elkənisaten! Wa d-ornan, wər z'iggəz Jahannama."»

Širawt tækkât Ælkænisat ta n Fergamos

¹² Æktæb y angalos n Ælkænisat ta n Fergamos as: «Arat da wa inna wa ilan takoba ta tæknât tawala fæl æššin fayyannet:

¹³ "Kawanay kæl-Ælkænisat ta n Fergamos, æssâna dad tællam, amaran æddi day ad tælla taɣmar n Aššaytan. Tæsigatakkem day tarrayt ta-nin. Wær tæmmæzzøyam d æzægzan sær-i. Tættafam æzægzan-nawan harkid day azzaman win day tawaggan man n Antifas, imosan ænalkim-in iɣdâlan, imos deɣ tægøyya-nin. Itawanyæ day aɣræm-nawan, imosan dad illa Aššaytan.

¹⁴ Mišan ya, ællan-tu aratæn a day-wan æššâka, a tan-imosan âs: Æhân-kawan aytedan ælkâmmen i tarrayt ta n Balyâm s ænta a isassayran æmænokal Balaq æmmæk was z'agu taftaw i Kæl-Israyil y a tan-isæssugu abakkad. Ig-asan tæmærkest a fæl z'atšin isan æmmidasnen æn tækutawen tiwagganen y æssænæman, agin deɣ æzzæna.

¹⁵ Æmmæk en day as kawanay kæl-Ælkænisat ta n Fergamos æhân-kawan aytedan zizawatnen day tarrayt ta n Nikolayitatan.

¹⁶ Utabat day adi. As wær iga adi, a kawan-in-asa tarmad, ammagara d aytedan win di, æs takoba, a tat-imosan awal-in.

¹⁷ Wa isallin aslet y awa inna Infas wa Zæddigan y Ælkænisaten! Wa d-ornan, ad t-akfaɣ manna tæɣbârat, akfaɣ-qu deɣ tæhunt mallat a fæl iktâb esæm aynayan as tuwær-illa i t-issânan ar wa t-igrawan."»

Širawt tækkât Ælkænisat ta n Tøyatir

¹⁸ Æktæb y angalos n Ælkænisat ta n Tøyatir as: «Ænta da awa inna Barar æn Mæššina, as šittawen-net olânat d abalagleg æn tæmsay, amaran milawlawan daran-net zun daroɣ illiɣlayæn, ikna sællul:

¹⁹ "Kawanay kæl-Ælkænisat ta n Tøyatir, æssânay awa tætamazalam, æssâna day tara ta kawan-tæhat, d æzægzan-nawan d æššøɣæl-nawan æd zæmmerat-nawan. Æssânay deɣ as æššøɣælan-nawan win æzraynen, ogaran win az-zarnen.

²⁰ Mišan ya ill-ay arat a day-wan æššâkaɣ a t-imosan as toyyam tantut ta tægat Yezabel, tægannu tænnæbit a tæmos. Tæsasaɣru inayɣbidan-in tæsaxrak-kan, tæsisugen arak mazalan æmosnen æzzæna, æd tattay æn şan æn tækutawen tiwagganen y æssænæman.

²¹ Ækfeq-qat alwaq ewâdan ad tutab, mišan wær tara æmæzzøy d alxal-net wa n igi n æzzæna.

²² Awen daɣ a fəlas a tat-in-əssukay təwərna d alyazab əmosnen attadib-net. Win dər tənammagga əzzəna, a sər-san d-awəya təssust labasat as wər ətuban daɣ arak mazalan win tan-təsisugu.

²³ Ad əhləkay inalkiman ən təntut ten. Ëlkənisaten kul ad əssənnat as nak əmosa wa itamayyazan iwəllan, amaran akkiyyan daɣ-wan ad t-akfaɣ awa tu-šaššawadan mazalan-net.

²⁴ Kawanay amaran kəl-Ëlkənisat ta n Təyatir win wər nəlkem i tarrayt ten, za wər təzdayam aratan win as gannin aytedan win den 'əssiran win din-əggugnen n Aššaytan', arat da wa ənne daɣ batu-nawan: wər kawan-əssəwəra lahan iyyan.

²⁵ Zəzzəwətat ɣas daɣ əzəgzan-nawan har din-asa.

²⁶ Wa d-ornan ilkām y alwajiban-in har təzərəst, wədi ad t-akfaɣ tizart i tawšeten n əddənet.

²⁷ A dasnat-izar əs taɣmar təkənət assahat, addagdak-kanat zun təkən ən talaq,

²⁸ s əmmək as di-ikfa Abba-nin tizart. Ad t-akfa deɣ atri wa n aɣora, almayna a dər-əs ədrəwa taɣmar-in.

²⁹ Wa isəllin əslet y awa inna Infas wa Zəddigan y Ëlkənisaten!"»

3

Širawt təkkāt Ëlkənisat ta n Sardes

¹ Ëktəb y angalos n Ëlkənisat ta n Sardes as: «Arat da wa inna wa ilan əssa ərruxanitan d əssa etran: "Kawanay kəl-Ëlkənisat ta n Sardes, əssənay imazalan win tətəggam. Itawannu 'Ëlkənisat ta n Sardes təddar', kawanay amaran zun as aba-kawan.

² Ënkədat, təsəssuhem awa dawan-d-iqqiman daɣ aytedan. Ad wər iɣrəd adi ketnet təməttant, fəlas əgreq-in as waliyyan daɣ mazalan-nawan, wər imos arat ikməlan dat Ëməli-nin Məššina.

³ Daɣ adi, aktiwat Ëlinjil was təslam d əsəssəɣri wa təgrawam. Aɣədat daɣ-as, tutabam. As wər tənkeram daɣ etəs, a din-asay əheɣ əlmital n abaydag, wər za təssənam alwaq wa daq-qawan in-z-əɣdəra.

⁴ Dər iga awen da ya, əhan-kawan aytedan əs harwa da wər əmməzrayan Məššina. Win di a dər-i idawan, əmosan isamlalan, id əhoran d awen.

⁵ Ëmmək en daɣ as wa d-ornan ad əlsu tabdoq təgat təməllay təsiraqəet, amaran wər z'əməsəɣ esəm-net daɣ əlkəttab wa əhan əsmawan n aytedan win əgrawnen təməddurt ta təɣlalət. Ad əqbəla dat Abba-nin, d angalosan-net əs awədan wədi i-nin.

⁶ Wa isallin aslet y awa inna Infas wa Zæddigan y Ælkænisaten!"»

Širawt tækkât Ælkænisat ta n Filadelfæya

⁷ Æktæb y Angalos n Ælkænisat ta n Filadelfæya, as: «Ænta da awa inna wa imosan æmizdag, imos tidæt, amaran ænta a ittafan *tæsassarut ta n æmænokal Dawød, s ænta âs, as olam arat wær t-illa i ifragan tæmæhirt-net, as ihar deŷ wær t-illa i ifragan allam:*

⁸ "Kawanay kæl-Ælkænisat ta n Filadelfæya, æssânay imazalan win tægam, æssânay as wær tælem šixurad aggotnen, dær iga awen da ya tæŷdâlam daŷ awal-in, wær di-tænkuram. Æssænät za as olâmây-awan tæsæhært, as wær t-illa i ifragan tæmæhirt-net.

⁹ Ænæyat, ænta da awa z'agin: tiddawat æn nalkiman n Aššaytan, a tat-aga daŷ fassan-nawan. Gannin æmosan Kæl-Ælyæhud ænta wær tan-æmosan, taggin bahu. Ænæyat, ænta da awa dasan-z-aga: A tan-d-assaglaŷ, æssæjædan ŷur daran-nawan, amaran ad æssænan, æqbælan deŷ as areq-ŷawan.

¹⁰ Dad zamas tælkâmam y awal-in omaran æs zæmmerat, wædi nak da a kawan-agæza daŷ tamert ta n jarrabatan win d-æzaynen æddænet ketnet, fæl ad iqqæl awen jarraba ægeŷ y aytedan n æddænet kul.

¹¹ A din-asa tarmad. Akniwat æzæzzæwi daŷ awa tælam, fæl a daŷ-wan wær abæz awedan waliyyan aroz-nawan imosan šikæbba-nawan šin tarna.

¹² Wa d-ornan, ad t-aga tægættawt daŷ ahan n ælŷibada æn Mæššina di n Æmæli-nin, amaran wær t-idu-z-igmæd har faw. A fall-as æktæbaŷ esæm æn Mæššina di n Æmæli-nin, d esæm n æŷræm n Æmæli-nin Mæššina, a t-imosan Yerusalem ta taynayat, a du-tæzzibbet daŷ jønnawan, isisaway-tat-du Æmæli-nin, æktæbaŷ deŷ fall-as esæm-in wa aynayan.

¹³ Wa isallin aslet y awa inna Infas wa Zæddigan y Ælkænisaten!"»

Širawt tækkât Ælkænisat ta n Lawodikæya

¹⁴ Æktæb y angalos n Ælkænisat ta n Lawodikæya, as: «Arat da wa d-inna was itawannu "Amin", s ænta a imosan tægæyya ta tæŷdalat, tæmos tidæt, amaran ænta ælæsæl n ækkulluk n arat:

¹⁵ "Kawanay kæl-Ælkænisat ta n Lawodikæya, æssânay awa tætamazalam: Wærmad tæsemmidam, za wær tækkusam. Ænnar tæsemmidam madeŷ tækkusam!

¹⁶ Mišan dad zamas tælimzayyanam, wærmad tæsemmidam za wær tækkusam, wædi a kawan-d-afsa,

¹⁷ id a tægannam: 'Næggirgas, amaran iman-nana a næsaggargas. Wær næddærar æs wala.' Awen tægannim-tu fælas wær tæssenam as kawanay tællam-tu d æŷsud æn

man, təhoram d i dawan-ihanatten, təmosam şiləqqawen, təddiryalam, wər tələsem wala.

¹⁸ Əgeş-awan ənnəsixa n a şur-i tazzanzim urəş wa itawajarraban əs təmsay, fəl a sər-əs taggargasam, tazzanzim şur-i deş tabdoq mallat, fəl ad talsim, ib-as kawan-tətabaz təkarakit n as təzzafam, tazzanzim şur-i deş amagal a za təzwəyam i şittawen-nawan, iqqəl-kawan-du asawad-nawan.

¹⁹ Nak, aytedan win areş, əntanay a fəl şawala, suşulaq-qan-du tarrayt. Daş adi akniwat gəllejat, tutabam.

²⁰ Ənəyat! Nak ələş şur təsəhərt n ahan takawkawaq-qat. As di-İsla awedan, olam-i ehan, ad əggəzəş aşaywan-net, ədrəwa dər-əs təməklawt.

²¹ Wa d-ornan, a t-akfaş tətəyt n a dər-i inəşimu fəl təxawit ta n təşmar-in, zund əmmək as nak da assaşa wa d-orneş, əgleş naşama d Abba-nin fəl təxawit ta n təşmar-net.

²² Wa isallin aslet y awa inna Infas wa Zəddigan y Elkənisaten!"»

4

Awa du-z-inəfiləlan daş jənnawan

Ənəfilal ən təxawit ta n təşmar ən Məşşina

¹ Dəffər awen ənaya təsəhərt tənnołamat daş jənnawan. Əsleş y əməsli was əsleş dat awen, olən d anasaş n asak. İgann-i əməsli wen: «Gazzay-du sa da, a kay-assaknaş arat was kundaba iga dəffər awa.»

² Wala ihoggan tobaz-i tarna n Infas wa Zəddigan, oggeş təxawit ən təşmar ta təhat ijənnawan. Təxawit ten iqqim fall-as awedan.

³ Wa iqqiman fəl təxawit ten, iga əmələwləw a n təhunt iyyat tələt almaqam, as itawannu jasfa d iyyat as itawannu sardwan. Təşlay-tat təzzəl-adar a du-təsaktit təhunt iyyat təmilawlawat tələt almaqam as itawannu emrod.

⁴ Təxawit ta n təşmar en, əşlaynat-tat sanatat təmərwən ən təxawit ən təşmar d əkkozat, a fəl əqqiman sanatat təmərwən n əmşar d əkkoz ən samlalan, əssiwarnen şikəbba ən təşmar əgənen daş urəş.

⁵ Gammadan-tat-du esman əd maslan d eggagan. Ərxən dat-əs əssa belan ən təmsay, əmosnen əssa ərruxanitan ən Məşşina.

^{6a} Təxawit ta n təşmar en, oray-tat-du arat olən d agaraw imilawlawan wəllen, igən əşətəs a n təlfənjart.

^{6b} Ammas-net əd şələyşələyan-net əhən-tan əkkoz mudaran as ilamawan-nasan əlsən şittawen sa sər dat, əlsəntanat deş sa sər ələqqam.

⁷ Æmudar wa azzaran ola d ahar, wa n æššin ola d æhæri, wa n karad amaran isakta-du udæm-net wa n aggadæm, wa n ækkoz ola æd tænaɡmart tæggâdat.

⁸ Amaran imudaran win ækkoz en, ækkulluk n iyyan daɣsan ila sædis æfrutan ælsânat šittawen sas ammas æd sas afalla. Wær tæfæstin ehad ezal gannin:

«Æmizdag, Æmizdag, Æmizdag,
Æmæli Mæššina s ænta a imosan
mæššis æn tarna kul,
imos wa t-illan kala da,
imos deɣ wa t-illan æmæreɣda,
amaran izay-du!»

⁹ Æssiggadan daɣ tæmmalen æn tanaya æd saɣmar æd godan i Mæššina, s ænta a iqqiman fæl tæxawit ta n taɣmar, ill-ay har faw.

¹⁰ Amaran id æssæggadan mudaran win den, ad æssæjædan æmɣaran ɣur daran æn wa iqqiman fæl tæxawit ta n taɣmar, assansin šikæbba-nasan šin taɣmar, annin:

¹¹ Ya Æmæli-nana Mæššina,
kay a ihoran æd tanaya
d ætæwæsæɣmar, æd tarna,
id kay a d-ixlakan ækkulluk n arat.
Aratan kul ællan-tu æs tarrayt æn tara-nak,
amaran kay a tan-d-ixlakan.

5

Ænæfilal n Æjemar d ælkættab wa tæwar talxatimt

¹ Tæzzar oggeɣ daɣ æfus wa n æɣil æn wa iqqiman fæl tæxawit ta n taɣmar ælkættab iwar akatab sa sær ammas æd sa sær afalla. Ælkættab wen æwarnat-tu æssayat tælxatimen, a das-æmosnen šisæɣfal.

² Oggeɣ angalos iknân tæla æn tarna igannu s æmæslisohen: «Ma imos wa ewadan ad alæm ælkættab wa, aru tælxatimen šin t-æwarnen?»

³ Mišan wær t-illa daɣ jænawan za wala amaɣal, wala daw amaɣal, i ifragan allam n ælkættab wen, wala inøy awa t-ihan.

⁴ Tæzzar ad halla wællen id wær t-illa i ifragan allam n ælkættab wen, wala deɣ ifrâg anay n awa t-ihan.

⁵ Tæzzar inn-i iyyan daɣ æmɣaran: «Ayyu tala! Ænøy, ahar wa n tawšet æn Yahuda, a d-igmâdan æzzurrøyya æn Dawæd, ænta a d-ornan, amaran ænta fadda a z'alæman ælkættab wa d æssayat tælxatimen-net.»

⁶ Tæzzar oggeɣ Æjemar ibdâdan daɣ ammas æn tæxawit ta n taɣmar æd mudaran win ækkoz, daɣ garegaray n æmɣaran. Æjemar wen ola d æmudar igzaman, amaran

ila əssa əskawan d əssayat şittawen əmmittalnen [əssa] ərruxanitan ən Məşşina a d-issoka əddənət ketnet.

⁷ Ihoz-in y ad igrəw əlkəttab dağ əfus wa n əxil ən wa iqqiman fəl təxawit ta n tağmar.

⁸ Assağa wad igrəw Əjemar əlkəttab, ənkarən mudarən win əkkoz, d əmğarən win sanatat təmərwen d əkkoz əssəjadən dat-əs. Akkiyyan dağ-san ittâf təhərdänt, əd təkərwasen n urəx ədnâynen ađutan əzodnen taqqadnen əmmittalnen şiwatriwen ən mizdagan.

⁹ Əssiggadan dağ təmmal taynayət, gannin:

Kay a ihoran d agaraw n əlkəttab, tarzağ talxatimt-net, id ətəwəgzam a təgeğ.

Amaran azni-nak as tərzama tədarfit n aytedən ən tawşeten kul d awalan kul əd təmattiwen kul əd kallan kul, tewayaq-qan-du əs tarrayt ta n Məşşina.

¹⁰ Təgeq-qan imənokalan əd limaman,

əxbâdnen Əməli-nana, amaran ad əxkəman fəl əddənət.

¹¹ Əlasax-in asawad, təzzar əsleğ i maslan n angalosan əknânen igət. Əmosan igiman ən giman, xilayxalayan təxawit ta n tağmar, xilayxalayan imudarən d əmğarən.

¹² Əssiggadan gannin s əməsli issohen:

«Əjemar wa igzaman iqqal takutay, ihor d agaraw ən tarna əd təgərgist əd masnat əd təğurad d ətəwəsəğmar əd tanaya əd təmmalen!»

¹³ Təzzar əsleğ dağ amazay wen da i təxəllak kul dağ jənnawan d amađal, əd daw amađal, əd gərwan, ganninat: «Təmmalen əd sağmar əd tanaya

əd tarna hər faw in wa iqqiman fəl təxawit ta n tağmar d Əjemar!»

¹⁴ Təzzar ənnan mudarən win əkkoz: «Amin!» Əssəjadən əmğarən əxbadan Məşşina d Əjemar.

6

Talxatimen şin əssayat

Əniləm ən talxatimt ta tazzarat

¹ Dəffər awen oggeğ Əjemar as olam talxatimt ta tazzarat dağ şin əssayat, əsleğ y iyyan dağ əkkoz mudarən as inna s əməsli olân d eggag: «Iyyaw!»

² Təzzar əswadağ ənayağ ays mallan as d-osa. Ays wen amawan-net ila təganzağ. Itawakfa təkəbbut ta n tarna. Iğla, imos wa d-ornan, igâ değ ənnəyət n ad işitu annajax.

Əniləm ən talxatimt ta n sanatat

³ As olam talxatimt ta n sanatat, əsleḡ y əmudar wa n əşšin as inna: «İyyaw!»

⁴ Təzzar ənayax ays iyyan igân təzuḡay ta n təmsay. Itawakfa amawan n ays wen fərregat n ikus n alxer daḡ əddənet, fəl ad tinəmənḡin aytedan, itawakfa deḡ takoba zəwwərat.

Əniləm ən talxatimt ta n karadat

⁵ As olam Əjemar talxatimt ta n karadat, əsleḡ y əmudar wa n karad as inna: «İyyaw!» Təzzar əswadaḡ ənayax ays kawalan. Wa iwanan ays wen, ittâf əlmizan daḡ əfus-net.

⁶ Əsleḡ y a olân d əməsli a d-ifalan imudaran win əkkoz, igannu: «Aḡanna ən təyya n alkama ḡas as itawarzam əzəl iḡrâdan n əşşəḡəl. Amaran arat wen əlqimat-net wər tokay təyya d aḡanna n əşşəḡir. Widi n azzayt d esmad n alḡanab amaran a tan-wər-tədəsa.»

Əniləm ən talxatimt ta n əkkozat

⁷ As olam talxatimt ta n əkkozat, əsleḡ y əməsli n əmudar wa n əkkoz as inna: «İyyaw!»

⁸ Təzzar əswadaḡ oggeḡ ays igân taddalət ta n yel təlhây təməllay. Wa iwanan ays wen, esəm-net təməttant, iddew d alaxirat. Təzzar tətawakfa təməttant d alaxirat tarna fəl təzunt ta n əkkozat n amaḡal, fəl ad anḡinat kərəz aytedan əs takoba əd laz əd təwərnawen əmosnen alwaba əd mudaran n əsuf win tattinen aytedan.

Əniləm ən talxatimt ta n səmmosat

⁹ As olam talxatimt ta n səmmosat, oggeḡ daw majmar wa zəwwəran n əsəqqəd ən təkutawen iman n aytedan win as tawagḡan man-nasan fəl əddəlil n awal ən Məşşina əd təḡəyya tolayat ta əḡan daḡ batu n Əlməsix.

¹⁰ Ad saḡaren wəllen gannin: «Əməli, imosan əmizdag, imos tidət, har əmmay tətüluleḡ wər təwwəddabaḡ aytedan n əddənet, fəl a daḡ-san izəl əzni-nana wa ənḡalan?»

¹¹ Iman n aytedan win ənaya daw majmar, akkiyyan daḡ-san itiwakfa təkadkat zagret mallat, təzzar itawannasan ad əşşitin daḡ təzaydart har d-andin mədrayan-nasan win dər olan əşşəḡəl daḡ tarrayt ta n Əməli, s əntanay da əhan tarrayt n a dasan-tətəwəḡḡu tanaḡay zun ta dasan-tətawagḡat.

Əniləm ən talxatimt ta n sədisat

¹² Dəffər awen oggeḡ Əjemar as olam talxatimt ta n sədisat. Təzzar iḡa amaḡal ənəḡəynəḡəy labasan. Təqqal təfuk şikawalat, təḡa təllit ketnet təzuḡay ta n əzni.

¹³ Fataqqen-du etran day jənnawan fəl amaḍal, zund əmmək as tifətəktikan aratan n ašək a fəl d-igâr aḍu issohen.

¹⁴ Ad tatankalan jənnawan, gallin zun təsalat a dīn-tətadit, əmmədkalan əḍḡaḡan kul, əd gər wətlan win əhanen igərwan, tawakkasan day daggan-nasan.

¹⁵ Imənokalan n əddənət kul d aytedan win day-as əlanen almaqam əd muzaran ən sojitan əd məggərgas əd kəl tarna d eklan əd lallan, kul əḡradan alaḡas day kəzman d ammas n əḍḡaḡan.

¹⁶ Gannin y əḍḡaḡan, əd təhun: «Fətəqqətat fall-ana. Səḡəsət-anay ad nugag wa iqqiman fəl təxawit ta n taḡmar. Səḡəsət-anay ad nənəməggəg d alham n ʕjemar,

¹⁷ id əzəl wa zəwwəran n alham-nasan a d-osan, amaran mənī wa ifragan zəmmerat y-as?»

7

Temeday n əgim d əkkozat təmərwen d əkkoz win təwar talxatimt ən Məššina

¹ Dəffər awen, oggeḡ əkkoz angalosan əbdâdnen day əkkozat təḡəmmar n amaḍal. ʕttâfan-in əkkoz aḍutan fəl amaḍal, fəl ad wər iger aḍu fəl amaḍal, wala fəl agarew, wala deḡ iger fəl ašək waliyyan.

² Təzzar əswadaḡ sa sər dənnəg oggeḡ angalos iyyan itagazzayan əs jənnawan, ittâf talxatimt ən Məššina di Iddaran. Isayḡarat s əməsli issohen y əkkoz angalosan win əgrawnen tarna n igi ən təkma y amaḍal əd gərwan.

³ Inn-asan: «Ad wər tagim təkma y amaḍal, wala agaraw, wala eškan, iket wər nəjjəjwal əs talxatimt ən Məššina šikannaren ən nəḡbidan n ʕməli-nana.»

⁴ Təzzar əsleḡ y əket n aytedan win tətawasawar talxatimt ən Məššina. ʕmosan temeday n əgim d əkkozat təmərwen d əkkoz ən tawšeten kul n Israyil:

⁵ Maraw gim n awedan d əššin day tawšet ta n Yahuda a təwar talxatimt ən Məššina,

təwar maraw gim d əššin day tawšet ta n Ruben, əd maraw gim d əššin day tawšet ta n Gad,

⁶ əd maraw gim d əššin day tawšet ta n Aššer,

əd maraw gim d əššin day tawšet ta n Naftali,

əd maraw gim d əššin day tawšet ta n Manasay,

⁷ əd maraw gim d əššin day tawšet ta n Šiməḡon,

əd maraw gim d əššin day tawšet ta n Lebi,

əd maraw gim d əššin day tawšet ta n Issakar,

⁸ əd maraw gim d əššin day tawšet ta n Zəbulun,

əd maraw gim d əššin day tawšet ta n Yusəf,

əd maraw gim d əşşin dağ tawşet ta n Benyamin,
kul təwâr-tan talxatimt ten.

Təmmal n əljəmayat

⁹ Dəffər awen əlasay asawad, oggey tiddawat zəwwərat wəllen, as wər t-illa i ifragan əşidən-net. Tiddawat ten təga dağ xərfa n əddənət kul, əd tawşeten kul, əd təmattiwen kul, d awalan kul win tawaşawalnen. Əbdâdan dat təxawit ta n taymar, dat Əjəmar, əzlâgan şikadkaden zagrotnen mallolnen, əttâfan ilədlad ən tagayt.

¹⁰ Sağaren s əməsli issohen, gannin:

«Efsan Əməli-nana Məşşina a tan-ihakkin
s ənta a iwaran təxawit ta n taymar,
ənta d Əjəmar.»

¹¹ Təzzar əğradan angalosan kul təbadday den da, yilayçalayan təxawit ta n taymar, d əmğaran, əd mudaran win əkkoz. Əssəjadan dat təxawit ta n taymar en, əğbadän Məşşina,

¹² gannin:

«Amin!
Təmmalən əd tanaya əd masnat
əd godan d ətəwəsəğmar
əd tarna əd fərregat,
kul in Əməli-nana Məşşina, har faw!
Amin!»

¹³ Təzzar išşewal iyyan dağ əmğaran, inn-i: «Awak ma mosan win əzlagnen şikadkaden zagrotnen mallolnen en, mənīs d-əhan?»

¹⁴ Ənnəy-as: «Təssanay awa mosan, Əməli-nin.» Təzzar inn-i: «Awen aytedan win d-əğmadnen təssust ta labasat. Ərbazan şikadkaden-nasan, əssəmlalan-tanat s əzni n Əjəmar.

¹⁵ Awen dağ a fəl əbdadan dat təxawit ta n taymar ən Məşşina, əğbâdan-tu ehad d azal dağ adag-net wa n əğibada. Amaran wa iqqiman fəl təxawit ta n taymar, a *dər-san z'inəməxsəran ağəz-tan.*

¹⁶ Wər ilkem a tan-iggâz gələk, za wala fad. *Wər ilkem a tan-təlâs təfuk əzəğğəzzəb,* za wala tuksay waliyyat,

¹⁷ id Əjəmar wa ihan ammas ən təxawit ta n taymar a dər-san z'annattafan, s əmmək as itanattaf amadan d aharay-net, awəy-tan əs şittawen n aman win sidurnen, təzzar *iməs Məşşina iməttawan-nasan kul.*»

8

Əniləm ən talxatimt ta n əssayat

¹ As olam Əjəmar talxatimt ta n əssayat, təga təfastit dağ jənnawan tewadat amađal n ağanna n alwaq.

*Anasay n əskawan win əssa**Angalosan win əssa*

² Oggey əssa angalosan win əbdadnen dat Məşşina, as tawakfan iskawan əssa.

³ Təzzar osâ-du angalos iyyan ibdad xur majmar wa n əsəqqəd n ađutan win əzodnen igân day urəx, ittâf majmar əndərran n əsəqqəd ən taşəlbast igân ənta da day urəx. Itawakfa taşəlbast təgget y a tat-isəqqad, təmos takutay, fəl majmar wa n əsəqqəd n ađutan, dat təxawit ta n taşmar, iddew awen əd təwatriwen ən mizdagan kul.

⁴ Igmad-du əhu ən taşəlbast ten əfus n angalos, iggəzzay dat Məşşina, iddew awen əd təwatriwen ən mizdagan.

⁵ Dəffər awen inkar angalos əs majmar wa n əndərran n əsəqqəd ən taşəlbast as kala da ittaf-tu, idkar-t-idu şimakaten ərxanən day majmar wa n əsəqqəd n ađutan, igar-tu fəl amađal. Əmalan-tu eggagan, əd maslan, d esman, d ənəgəynəgəy n amađal.

⁶ Təzzar ənkarən əssa angalosan win əttafnen iskawan win əssa ad simutugan y anasay-nasan.

Əkkoz əskawan win tawansaynen day tizarat

⁷ Insay angalos wa azzaran esək wa ittaf, təzzar əmalan-tu dagrazan əd təmsay ərtəynən d əzni, iffay-du awen kul fəl amađal. Tərakammat təzunt ta n karadat n əddənet, tərakammat təzunt ta n karadat n eşkan kul, irakammat yel kul.

⁸ Insay angalos wa n əşşin esək wa ittaf. Itawagar-du arat olân d ədxaş zəwwəran ibilaglagan, irtak day agaraw. Təqqal təzunt ta n karadat n agaraw ketnet azni.

⁹ Təzzar təmmut təzunt ta n karadat ən mudaran win əhanən agaraw, təhlak deş təzunt ta n karadat n əxlalan n aman kul win əwarnən agaraw.

¹⁰ Insay angalos wa n karad esək wa ittaf. Irtak-du ətri zəwwəran day jənnawan, igân əbələzləz an abela ən təmsay, irtak fəl təzunt ta n karadat ən gərwan win əngaynen, əd şittawen n aman.

¹¹ Atri wen esəm-net «Abəsintəs». Təmməttay təzunt ta n karadat n aman n əddənet, təqqal aman samomnen, əgânen təssəməmt ta da iga abəsintəs. Təzzar aba aytedan aggotnen win əşwânen aman win den.

¹² Insay angalos wa n əkkoz esək wa ittaf. Təzzar ihlak awen təzunt ta n karadat ən təfuk, əd təzunt ta n karadat ən təllit, əd təzunt ta n karadat n etran. Awa day-san immar awen kul iqqal şiyay. Ezal da təgmad-tu təzunt ta n karadat n ənnur-net, ehad deş awen da.

Ətəwəmal n alwabatan win karâd

¹³ Təzzar əswadağ ənayax tənagmart təggâdat day təsəggərigərəyt ən jənnawan, əsley as təgannu s əməsli issohen: «Xašša! Xašša! Xašša wəllen i win əhanen əddənet, çur anasağ n əskawan win z'ənsəğan angalosan win karad dəffər win!»

9*Anasağ n asak wa n səmmos*

¹ Inkər angalos wa n səmmos insağ esək wa ittaf. Oggeç atri as d-irtak dağ jənnawan fəl amađal. Atri wen itiwakfa təsassarut n əxəçi wa wər nəla eder.

² Olam əxəçi wa, iggəzzay-du dağ-as əhu olân əd wa d-igammadan əxəçi a dağ təmihandar təmsay. Arat wen issəkwal təfuk, d alhawa ketnet.

³ Təzzar əgmadan-du əjwalan əhu wen, əllilan əddənet ketnet. Tawakfan əjwalan win talbast togdât əd ta n təzurdam.

⁴ Itawarçam-asan fəl igi n a imosan təkma i taddalət a təqqal, gər za yel a ilsan amađal, wala eškan. Kalar tawamaran s ad zəxçəzzəban aytedan ças win as wər iwer əjwal ən Məššina šikannaren-nasan.

⁵ Wər tawakfan turagat ən tanaxay n aytedan win den kərəz. Kalar tawamaran ças s a tan-zəxçəzzəban wəllen har səmmosat təlil. Amaran əsəsnan ən tədud n əjwalan win den, ogda əd wa n taddod ən təzardəmt.

⁶ Azzaman win den a dağ-san səddirənan aytedan təmattant, mišan wər tat-z-əgrəwan. Ad gammayan təmattant, tətinəməggig dər-san.

⁷ İjwalan win den olân d əggəsan simatagnen y iki n əməgər. İyafawan-nasan iwar-tan arat olân əd təkəbba ən taymar əgânen dağ urəç, amaran udmawan-nasan olan əd wa n əggadəm.

⁸ İjəkkad-nasan olân əd jəkkad ən tədoden, işenan-nasan olân əd šenan n ahar.

⁹ İdmâran-nasan ils-en arat olân əd təzoli, amaran imaslan n əfrutan-nasan olân d əməsli n amalankaytan n əməgər əlwâyan əggəsan əgğotnən, ozâlan s adag n əməgər.

¹⁰ Əlân šisbaten olânen əd šin təzurdam, əlânen işkaran zun win dağ ən təzardəmt, amaran imawan ən təsbaten-nasan en da a dağ iddew aššar n igi ən təkma labasat y aytedan har səmmosat təlil.

¹¹ Ark angalos n Aššaytan wa ihan əxəçi wər nəla eder, a imosan əmənokal n əjwalan win den. Esəm-net dağ təlyibrit Abaddon, dağ awal ən Kəl-Əlyunan esəm-net Aboləyon, almaçna n awen «Əmahlak.»

¹² Okay albala wa azzaran, amaran əllan-tu əşšin wiyyad as kundaba əlkaman-as-du.

Anasay n asak wa n sədis

¹³ Insay angalos wa n sədis esək wa ittaf. Təzzar əsley y əməsli a d-igmâdan [əkkozat] təxəmmar ən majmar n urəx wa illan dat Məşşina, imosan majmar wa n əsəqqəd n adutan.

¹⁴ Əməsli wen igannu y angalos wa n sədis ittafan esək: «Ara-du əkkoz angalosan win əqqannen dax təgadamayt n agarew wa zəwwəran, a t-imosan Efrat.»

¹⁵ Təzzar tawâran-du angalosan win əkkoz en ti-wasamatagnen y alwaq wen da, dax əzəl wen da, dax təllit ten da, dax awatay wen da, fəl ad əhləkan təzunt ta n karadat n aytedan kul n əddənət.

¹⁶ Əmosan sanatat təmad ən miləyaw n amawan n ays. Ənta den da međan-nasan, amaran əsley-as.

¹⁷ Emmək da was di-du-nafalalan əggəsan win den əd mawanan-nasan dax targət-in. Əggəsan win, idmaran-nasan ils-en əxər igân karad əlmawan əmosnen: təzuxay ta n təmsay, əd taddalət ta n jənnawan tədâgat sa sər takkawalt ta n təhünt iyyat təlât almaqam as itawannu safir, əd təruxay ta n adaxas-ən-tahart. İxafawan n əggəsan win, olân əd xafawan ən harran, imawan-nasan təgammad-tan-du təmsay d əhu d adaxas-ən-tahart irxân.

¹⁸ Albalatan win karad en əmosnen temsay d əhu d adaxas-ən-tahart irxân, əhləkan təzunt ta n karadat n aytedan kul n əddənət.

¹⁹ Fəlas tarna n əggəsan win den, təha imawan-nasan, əd təsbaten-nasan, id şisbaten-nasan olânat əd taşşolen, olânat ixafawan as tagginat y aytedan təkma labasat.

²⁰ Mişan aytedan win wər aba dax albalatan win den, wər ətuban dax ark aratan win tamazalan. Wər əmməzzayan d əlxibada ən kələsuf, wala əssənəman n urəx əd win əzrəf əd win darox əd win təhun əd win eşkan. Əssənəman win den, wərmad za as hannayan, wala sallin, wala əfrâgan əmətəkwəy.

²¹ Aytedan win, wər ətuban dax igi ən man, wala igi ən şaxawan, wala əzzəna, wala şikra.

10

Elkəttab wa əndərran

¹ Dəffər awen oggeş angalos iyyan iknân təla ən tarna, itazabbat-du dax jənnawan, ils-ay əgnaw zun awedan ilsan təkadkat zagret. Eyaf-net təxlay-tu təgələllet təgât dax

təzzəl-adar təbilazlazat. Udəm-net ibilazlaz s ənnur zun təfuk. Elyan-net olân əd lallagan ən təmsay.

² İttaf dağ əfus-net arat n əlkəttab innolaman. İssənsa adar-net wa n əxil fəl agaraw, issənsa wa n zalgat fəl amađal.

³ İga y əməsli-net adakal issohen, olân əd tənagawt n ahar. As iga y əməsli-net adakal wen, əgan eggagan win əssa əmosnen zun awal.

⁴ Təzzar əgmaya d ad əggəza šin akatab n awa ənnan eggagan win den. Amazay wen dağ ad əsley y əməsli a d-igmadan ijənnawan as di-inna: «Əxbər dağ əwəl-nak awa ənnan eggagan win əssa di. A dağ-as wər təktəba wala!»

⁵ Təzzar inkar angalos wa ənayax ibdâd fəl amađal d agaraw izzal əfus-net wa n əxil sa sər jənnawan,

⁶ ihad s esəm ən wa iddaran har faw, s ənta a d-ixlakan ijənnawan d awa tan-ihan, d amađal d awa t-iwaran, əd gərwan d awa tan-ihan, as wər tu-za-tələs təmastant emel.

⁷ Mišan amazay wa dağ iggaz angalos wa n əssa šin anasax n asak wa ittaf, ənta a dağ z'assandu Məşşina əsənnəfiləl n əssir-net, s əmmək was isabbayyan isalan win den i naxbidan-net, a tan-imosan ənnəbitan.

⁸ Təzzar ilas-i əməsli was əsley den awal dağ jənnawan inn-i: «Ədkəl arat n əlkəttab əndərran wa ihan əfus n angalos wa ibdadan fəl agaraw d amađal.»

⁹ Əkkeş angalos ənneş-as a di-d-akfu əlkəttab wa əndərran en. Inn-i: «Ədkəl-tu tatşaq-qu. Ad tədnyə təsəmmay-net tadist-nak, mišan dağ əmi-nak iga šizada an turawat.»

¹⁰ Ədkala-du arat n əlkəttab wen dağ əfus n angalos en, ətşeq-qu. İga šizada an turawat dağ əmi-nin, mišan as t-ətşey, tədkar tadist-in təsəmmay-net.

¹¹ Dəffər awen itawann-i: «Harwada iwar-kay amel ən salan win d-izazzabbat Məşşina dağ batu ən təmattiwen aggotnen, əd xərfan aggotnen, d awalan əd mənokalan aggotnen.»

11

Şigəyyawen šin sanâtat

¹ Təzzar tawakfay agabal ən telant, olân əd təburək tas tətəggu takkot. Itawann-i: «Ənkər, təkətaş edag n əlyibada ən Məşşina, əd majmar wa n təkutawen, təxsəba win dağ-as əxbadnen.

² Mišan aħarħar wa iħlayan edag wa n əlyibada, ayy-ay s aganna, a tu-wər-təkəta, fəlas itiwakfa y aytedan win wər nəksud Məşşina. Aytedan win di ad agin əkkozat

təmərwen ən tællit æd sanatat tidəyæzdəyizan aɣrəm wa zæddigan di.

³ Amaran a din-assagla sanatat tægəyyawen, əmosnen ənnəbitan-in, əlsānen šibəddaɣ ən təfəyyawt. ʕnnəbitan win ad əmmalan isalan a d-izizabbat ʕməli har agin agim n əzəl æd sanatat təmad æd sədisat təmərwen.

⁴ Šigəyyawen šin sanatat en əmosnat əššin eškan ən zaytun æd sanatat fətəlaten šin əzzəkkatnen dat ʕməli n əddənet.

⁵ As ira awedan igi y-asnat təkma, a du-təgməd təmsay əs mawan-nasnat təsərrəkəmmət-tu. Awalla, wa iran igi y-asnat təkma, əmmək en daɣ as tu-z-iba.

⁶ ʕnnəbitan win əššin en əmosnen šigəyyawen-in əlān fərregat n agadal y akonak ewet daɣ azzaman win daɣ əmmalan isalan win d-izazzabbat ʕməli. ʕlān fərregat n əsəmməttəy n aman əqqəlan azni. ʕfragan dəɣ a d-awəyan s əddənet əzzənəfan aggotnen n albalatan, iket ərān awen.»

⁷ Mišan as əɣradan tægəyya ta taggin den, a dər-san ammagar əmudar səksədan wa du-z-igmədan əɣəɣi wər nəla eder, arn-en, anɣ-en kərəz.

⁸ Šiməxxa-nasan ad ansinat fəl tarrayt daɣ əɣrəm zəwwəran wa daɣ itawataytay ʕməli-nasan. Aɣrəm wen itawann-as «Sədom» æd «Masar», imos awen tədugent as isinafal Məššina awa t-id-izayan.

⁹ Edes n aytedan ən təmattiwen kul æd tawšeten kul d awalan kul æd kallan kul ad agin karad adan d aganna hannayan šiməxxa n ənnəbitan win əššin en, əgdəlan-asan dəɣ a din-təwənbəlan.

¹⁰ Iba-nasan isidawat aytedan n əddənet kul, har as əknān saday, tinəməggin šinəfas gar-essan, id əzəɣɣəzzəb aggen a dasan-əganat tægəyyawen šin sanatat en.

¹¹ Mišan dəffər karad adan d aganna win, iga Məššina infas ən təməddurt daɣ ənnəbitan win aba den, əddaran-du, əbdadan. Təggaz tasa səksədat aytedan win tanəyən.

¹² ʕslan daɣ jənnawan y əməsli issohen igannu y ənnəbitan win əššin: «Gazzayat-du sa da!» ʕggəzzayan əs jənnawan əhān ignawan, hānnayan-tan zəngə-nasan.

¹³ Amazay wen da a daɣ iga amaɖal ənəgəynəgəy labasan, təbarajjat təzunt ta n marawat n əɣrəm en, təzzar aba əssa gim n awedan daɣ əhluk wa igan den. Win d-əragneɣ daɣ awen, təggaz-tan tasa səksədat, əssəɣmaran Məššina di n ʕməli ən jənnawan.

¹⁴ Okay alwaba wa n əššin, amaran wa n karad izay-du tarmad.

Anasaɣ n asak wa n əssa

¹⁵ Insaɣ angalos wa n əssa esək wa ittaf. Itawasla i maslan zawwarnen daɣ jənnawan. Imaslan win den gannin:

«Əmərədda tarna ta n tizart y əddənet

şin Əməli-nana Məşşina

d Əlməsix-net.

Ad iqqəl əmənokal har faw.»

¹⁶ Ənkaran əmɣaran win sanatat təmərwen d əkkoz əqqimnen fəl təxiwa-nasan dat Məşşina, fataqqen daɣ amaɖal, əssəjadan, əɣbadan Məşşina.

¹⁷ Ad gannin:

«Nəggoday-ak Əməli,

kay a imosan Məşşina di n əməli ən tarna kul,

kay a t-illan əmərədda,

təllec-qu deɣ kala da.

Nəggoday-ak id əşşəxəl a təgeɣ tarna-nak zəwwərat

y ad təssəbdəda taɣmar-nak,

¹⁸ şimattiwen n əddənet iggâz-tanat alham labasan,

mişan əmərədda alham wa nak a d-ewadan.

Alwaq wa n əşşərixa ən nəmməttan a d-osan.

Alwaq ewad-du wa daɣ za tərzəməɣ y eklan-nak

a tan-imosan ənnəbitan,

takfaq-qan arozan-nasan,

əntanay əd mizdagan kul,

d aytedan kul win miksadan-nak,

gər win muzaran wala win tan-wər-nəmos.

Alwaq ewad-du wa n əhluk ən win hallaknen əddənet!»

¹⁹ Təzzar innolam ahan n əlɣibada ən Məşşina wa ihan ijənnawan, inafalal-du daɣ-as əssənduq wa n arkawal ən tassaq. Dəffər awen əgan esman, əmalan-tu maslan d eggagan d ənəgəynəgəy n amaɖal əd dagrazan labasnen.

12*Ənəfilal ən təntut ta təgat tadist*

¹ Tənafalal-du aɣalamat zəwwərat daɣ jənnawan: Aɣalamat ten təmos tantut təlsât təfuk, təlla təllit daw daran-net, təssiwar təkəbbut ta n tarna təgat daɣ maraw etran d əşşin.

² Təsikaray əd təlawayt n iguz n əmzur.

³ Tənafalal-du aɣalamat iyyat daɣ jənnawan. Imos awen əməxluk olân d əzzənəf n aɣata igân təzzəwwərt səksədat. Iga təzuxay a n təmsay, ila əssa ɣafawan əd maraw əskawan, amaran əkkulluk n iyyan daɣ ɣafawan win den təwar-tu təkəbbut ta n taɣmar.

⁴ İfraɖ əs təsbat-net təzunt ta n karadat n etran, igar-tan-du fəl amaɖal. Təzzar imal əməxluk wen dat təntut ta

tətaggazat amzur fəl ad atšu barar-net dəy amazay wa da dəy du-z-ihəw.

⁵ Təntut ten təgraw barar ən yay, s ənta a z'izaran i təmattiwen n əddənət kul əs təxmar təkənət assahət. Təzzar imməway barar wən əs təxawit ən təxmar ta fəl iqqim Məşşina.

⁶ Təddəggag təntut ten s əsuf təkka edag iskət Məşşina y awen. Den da a dər-əs z'agu ənəttaf har əgim n əzəl əd sanatat təmad, əd sədisat təmərwen.

⁷ Təzzar iga əməgər dəy jənnawan. Imməgar Mikayil d angalosan-net d əməxluk wən. Imməgar dər-san dəy əməxluk ənta d ark angalosan-net.

⁸ Mişan itawarna əməxluk d angalosan-net, ab-as dasan-tilla adag dəy jənnawan.

⁹ Əməxluk wa zəwwəran en, imosan aşşol wa irəwan, as itawannu Iblis, itawann-as dəy Aşşaytan, s ənta a isaxrakan aytedan dəy adag kul wa əhan dəy əddənət, itawagar-du fəl amaḍal, iddew d angalosan-net.

¹⁰ Dəffər awen əsley y əməsli issohen igannu dəy jənnawan: «Əmərədda alwaq wa n efsan osa-du! Əmərədda Əməli-nana isinafalal tarna-net, əd təxmar-net! Əmərədda təxmar təlla gər fassan n Əlməsix-net, id Aşşaytan s ənta a isawaran imədrayan-nana lahanan dat Məşşina ehad ezal, a d-itawakkasan dəy jənnawan, itawagar-du s amaḍal.

¹¹ Mişan ya ornan-tu mədrayan-nana win əs tarrayt n əzni n Əjəmar əd tarrayt ən salan n Əlinjil win əmalan. Əqbalan tehakkay ən man-nasan, iba-tan dəy tarrayt ten.

¹² Dawatat dəy adi ijənnawan əd win tan-əzdaynen! Mişan iket alxazab ill-ay y amaḍal əd gərwan, id Iblis izzəbbat-in sər-wan, ih-ay alham wəllen, fəlas alwaq əndərran a das d-iqqiman, amaran issân dəy awen.»

¹³ As inay əməxluk as itiwagar-du fəl amaḍal, istay təntut ta təggazat amzur ən barar ən yay.

¹⁴ Mişan tətawakfa təntut ten əşşin əfrutan ən tənagmart ta zəwwərat. Əmmək en dəy as təfrag şigget s əsuf, s adag wa dəy za tənəməggag d aşşol. Den dəy a dər-əs z'agu ənəttaf har karad elan d aganna.

¹⁵ Təzzar ifsa-du aşşol aman əmosan zun agarew dəffər təntut, fəl a tat-əbətən.

¹⁶ Mişan illil amaḍal i təntut. Ora amaḍal imi-net, ilmaz agarew wa d-ifsa əməxluk.

¹⁷ Əməxluk ih-ay alham labasan ən təntut, təzzar igla y ad ammagar əd maddanəs ən təntut win hadatnen, a tan-əmosnen win əbbərdagnen y alwajiban ən Məşşina, tagayyen dəy batu ən Yaysa Əlməsix.

18 Dəffər awen ikka əməxluk təgadamayt n agarew, isammatag y əməgər.

13

Ənəfilal n əmudar səksədan wa d-igmadan agaraw

1 Dəffər awen oggey əmudar səksədan as d-igmad agaraw. Əmudar wen ilə maraw əskawan, d əssa xafawan. Əkkulluk n iyyan dağ əskawan-net təwar-tu təkəbbut ta n tarna, amaran əkkulluk n iyyan dağ xafawan win əssa en, iwâr-tu esəm imosan ikus ən tarna i Məşşina.

2 Əmudar wa oggey den, ola d əzzənəf n adal. Idaran-net olân əd daran n əmudar iyyan igân urəs, imi-net ola d əmi n ahar. İkf-ay əməxluk tarna-net, əd təxawit-net ta n tağmar, əd tağmar zəwwərat.

3 Iyyan dağ xafawan-net olâ d as ih-ay əbus inaqqin, mişan izzây. Əqqanan xafawan n aytedan n əddənət kul, əlkaman y əmudar wa səksədan en.

4 Əssəjadan aytedan dat əməxluk id tağmar-net a ikfa y əmudar. Əğbadan əmudar, gannin: «Məni-tu wa olân d əmudar wa səksədan, məni wa ifragan əməgər-net?»

5 İgraw əmudar wa səksədan en fərregat n igi ən batuten əmosnen zazwar ən man-net, d ikus ən tarna i Məşşina. İgraw turagat n igi ən mazalan win den, har əkkozat təmərwen ən təllit əd sanatat.

6 Ad itakkəs əmudar en tarna i Məşşina, d adag wa iha, əd win əzdağnen ijənnawan kul.

7 Itawakfa fərregat n əməgər əd mizdagan ən Məşşina əd tarna-nasan. Itawakfa tizart i tawşeten kul əd təmattiwen kul d aytedan a əşşewalnen awalan kul əd kallan kul.

8 Aytedan n əddənət kul ad t-əğbədan ar win as əktaban esmawan-nasan dağ əlkəttab wa n təməddurt harwa xur əxluk n əddənət. Elkəttab en in Əjəmar wa igzaman iqqal takutay.

9 Wa isallin aslet!

10 Kud kasaw a itaggaz awedan ad t-iggəz. Kud ətəwənyə a z'agu əs təzoli, a sər-əs itəwənyu. Win əmosnen imizdagan ən Məşşina, alwaq-nasan da da wa n əşitəy ən zəmmerat d əzəgzan.

Ənəfilal n əmudar wa d-igmadan amađal

11 Təzzar oggey əmudar iyyan səksədan as d-iggəzzay igmâd-du amađal. Əmudar wen ilə əşşin əskawan olänen əd win akar, amaran itaggu awal olan əd wa n əməxluk.

12 İşşəşyal tarna kul n əmudar wa azzaran a d-osan dat-əs, təzzar eway-du s amađal əd win t-əwarnen, as

əssəjadan y əmudar səksədan wa azzaran as izzay əbus-net imosan abus inaqqin.

¹³ Ad itaggu təlməxjujaten zawwarnen, har as temsay a d-izazabbat dəx jənnawan fəl amaḍal, əswādan aytedan.

¹⁴ Issəxrak aytedan n əddənet əs təlməxjujaten šin as igraw igi-nasnat dat əmudar wa das-d-azzaran. Igannu y aytedan ad agin šaššəlan n əmudar wen, təsabasa takoba, iddar-du.

¹⁵ Igraw fərregat n igi ən man dəx šaššəlan n əmudar wa das-d-azzaran, təzzar eway-du awen əs šaššəlan wen as išawal, isanxū dəx kərəz aytedan win ugaynen s ad t-əxbədan.

¹⁶ Eway-du as aytedan kul, gər win wər nəla almaqam, wala win t-ələnən, gər win məggərgas wala win məggənza, gər ilallan wala eklan, kul išahhaššal-tan as iwar ejwal-net ifassan-nasan win əxil, madəx šikannaren-nasan.

¹⁷ Təzzar ab-as t-illa awedan ilân turagat n ad azzanzu, wala dəx azzanz-in ar s ad t-iwar ejwal n əmudar wen d esəm-net, madəx meḍan wa iddewan d esəm-net.

¹⁸ Den dəx ad za tagu addararat əs tayttay əd masnat. Wa ilan tayttay, ixsəbet meḍan n əmudar wen. Meḍan wen immittal esəm n awedan, amaran imos sədisat təmad əd sədisat təmərwen əd sədis.

14

Ənəfilal n Əjəmar əd meḍan wa n 144000

¹ Əlasax asawad, oggex Əjəmar ibdād fəl ədyağ wa n Səyon. Əllân xur-əs aytedan əmosnen temeday n əgim d əkkozat təmərwen d əkkoz. Aytedan win den iwâr esəm n Əjəmar d esəm n Abba-net šikannaren-nasan.

² Əsleğ y əməsli a d-igmadan ijənnawan. Əməsli wen ola d əjit zəwwəran n aman aggotnen d əməsli n eggag zəwwəran, ola dəx d əməsli ən təhərdənən aggotnen.

³ Aytedan win den əssiggadan dəx təmmal iyyat taynayət dat təxawit ta n tağmar, dat mudaran win əkkoz d əmğaran. Wər t-illa awedan ifrâğan ad issən təmmal ten, ar temeday n əgim d əkkozat təmərwen d əkkoz, win d-isaddarfət Məššina dəx aytedan n əddənet.

⁴ Ətanay wər sammadasan iman-nasan s əzzəna fəlas wər kala ad əlan tassağ waliyyat əd tədoden. Əlkâman y Əjəmar s adag kul wa ikka. Tawasadarfen-du dəx aytedan əmosan zun tənfa ta tazzarat ən təwəgas təskâtat i Məššina d Əjəmar.

⁵ Amaran imawan-nasan wər tan-d-igmed a imosan bahu, wər t-illa a imosan lahan a tan-iwâran.

Ənəfilal n angalosan win karâd əd mazalan win d-əssəglan

⁶ Təzzar oggeɣ angalos iyyan as iggad daɣ təsəggərigərəyt ən jənnawan. Angalos wen eway Əlinjil di iɣlalan a z'iməl y aytedan n əddənet, daɣ kallan kul əd tawşeten kul d awalan kul əd təmattiwen kul.

⁷ Idkâl əməsli-net wəllen igannu: «Səxmərat Məşşina, tagim-as adkul wa dər ihor, id alwaq osa-du wa daɣ z'agu əşşəriɣa-net. Əybədat wa d-ixlakan ijənnawan d amaɣal d agaraw əd şittawen n aman.»

⁸ Inkar angalos iyyan wa n əşşin, ilkam-du i wen, igannu: «Babəylon ta n təmizwart, tuda! Awalla tuda Babəylon tas tallabast n igi-net əzzəna, ihan əlmital n əşəşwi n aytedan esmad, təsəxrək şimattiwen kul n əddənet, teway-du sər-əsnat as tanat-ibaz əşşəriɣa ən Məşşina.»

⁹⁻¹¹ İlkam-as-du angalos iyyan wa n karad, igannu s əməsli ihhoken: «Aytedan win əɣbadnen əmudar wa səksədan əd şaşşelan-net, iwâr-tan asannal-net daɣ təkannaren, madeɣ ifassan, win di ad aşwin esmad wa n alham ən Məşşina. Esmad wen izdâr amaran a dasan-itəwəggu daɣ təkabart ta n alham ən Məşşina, agin alɣazab səksədan igan əs təmsay d adaɣas-ən-tahart irɣân, dat angalosan a zaddognen d Əjemar. Əhu n alɣazab-nasan, ill-ay har faw, amaran wərmad a dasan-tu-təlla təsasmit ehad, za wala ezal.

¹² Alwaq wen ənta wa n zəmmerat ən mizdagan ən Məşşina, əbbirdagnen y alwajiban-net, əknân deɣ təlyudəla i Ƴaysa.»

¹³ Dəffər awen əsleɣ y əməsli a d-ifalan ijənnawan as inna: «Əktəb as: "Əbbilalan aytedan win as harwa əmərədda da ərtâyan d Əməli, iba-tan deɣ ərtâyan dər-əs." Awalla, inna Infas wa Zəddigan, assanfinet daɣ əşşəɣəl wa əgan, fəlas ad əgrəwan maruzat ən mazalan-nasan.»

Ənəfilal ən tənfa ta du-təgmadat amaɣal

¹⁴ Əlasaɣ asawad oggeɣ agnaw mallan. Agnaw wen təqqim fall-as azzat tolât əd ta n aggadəm. Əɣaf-net təwərtu təkəbbut ən taɣmar təgât daɣ urəɣ, ittâf əlmoşi iwalan wa n allay ən təwəgas.

¹⁵ Dəffər awen igmad-du angalos iyyan ehan n əlyibada isayɣarat wəllen inna i wa iqqiman fəl əgnaw: «Şəşəɣəl əlmoşi-nak wa n allay, taləya ɣarat. Alwaq ewad-du wa n əmiləy ən ɣarat, annabatan win əwarnen amaɣal əŋɣän.»

¹⁶ Təzzar inkar wa iqqiman fəl əgnaw olay s əlmoşi-net awa iwaran amaɣal ketnet daɣ tənfa.

17 Dæffær awen igmad-du angalos iyyan ehan n ælyibada wa ihan ijønnawan. Ænta da ila ælmoši iwalan wa n allay ən tæwægās.

18 Tæzzar igmad-du angalos iyyan majmar wa n tækutawen. Angalos wen ixkâm fæl tæmsay, idkal æmæsli-net wællen, inna s æmæsli issohen i wa ittafan ælmoši iwalan wa n allay ən çarat: «Sæšçæl ælmoši-nak wa n allay ən çarat, taləyax-du ara n alçanab kul wa iwaran amaðal, fəlas šibašakšaken-net kul æññānat, isimatag y æššəriça ən Mæššina.»

19 Tæzzar olay angalos s ælmoši-net, alçanab kul wa iwaran amaðal, igar-tu ketnet daç tægdayt ta daç itawazmu alçanab, a tat-imosan tagdayt zæwwərat ta n alham ən Mæššina.

20 Tæzzar itawadayazdayaz alçanab wen itawazma sədi y əçrəm. Ingay-du daç-as əzni har ilsa karadat tæmad ən kilaw, iggəzzay har ewad edag ən karad çalan.

15

Ænæfilal n angalosan win æssâ d agaraw

1 Tæzzar ənaya daç jønnawan alçalamat iyyat zæwwərat, tæknât æsæmmækləl, tæmosat: Æssa angalosan ættafnen æssa alwabatan win ælkammen s æntanay a daç d-inda alham ən Mæššina.

2 Ænayax arat olân d agaraw igân daç arat a d-isaktin tælfənçart tærtâyat æd tæmsay, amaran æbdâdan fall-as win ærzanen æmudar sæksədan æd šaššelan-net æd meðan wa iddewan d esəm-net, ætâfan šihərdänen a tan-ikfa Mæššina.

3 Æssiggadan daç tæmmal n ækli ən Mæššina, a t-imosan Musa æd tæmmal ta n Æjemar, gannin:

«Içitan-nak zawwarnen, simaklalan, ya Æmæli Mæššina!

Kay a imosan mæššis ən tarnā kul!

Tarrayen-nak æntanatay a oçadnen, æmosnat tidət, ya Æmənokal ən tæmattiwen.

4 Ma imos wa ewadan a kay wər iksud ya Æmæli?

Ma imos wa wər za næssəçmər esəm-nak?

Fəlas kay ças a imosan æmizdag.

Amaran tawšeten kul a d-asinat, əçbadnat-kay,

fəlas içitan-nak oçādnen a nafalalnen.»

Šikərwasen šin æssâyat n alham ən Mæššina

5 Dæffær aratan win den, æswadaç oggeç edag wa zæddigan n ahaket wa n æmənəy as innolam daç jønnawan.

6 Tæzzar ægmadan-du angalosan win æssa edag wa zæddigan ættâfan alwabatan win æssa, ælân tabdoç ən lin iqqitasan isiraçqen, otâban idmaran-nasan æs sutab n urəç.

⁷ Inkar iyyan dağ mudaran win əkkoz, ikfa angalosan win əssa əssayat təkərwasen n urəx ədkârnen alham ən Məşşina di iddaran har faw!

⁸ Idkar adag wa zəddigan əhu a d-ifalan tanaya ən Məşşina əd tarna-net. Wər t-illa i ifragan iguz n adag wa zəddigan en, iket wər ənden əssa alwabatan win d-ewayan angalosan win əssâ.

16

¹ Dəffər awen əsleḡ y əməsli zəwwəran as d-igmad ehan n əlxibada, inna y angalosan win əssâ: «Ağliwat tənḡəlam fəl amaḡal ketnet əssayat təkərwasen šin alham ən Məşşina.»

² Təzzar igla wa azzaran daḡ-san, inḡal təkərwast-net fəl amaḡal. Əwatnat šiqqas labasnen aytedan kul win iwar ejwal n əmudar, əḡbâdan šaşşelan-net.

³ Inḡal angalos wa n əşšin təkərwast-net fəl gərwan, əqqalan aman-nasan azni olân d əzni n ənəmməttən. Immut id t-illa əmudar kul ihan igərwan.

⁴ Təzzar inḡal wa n karad daḡ-san təkərwast-net daḡ təsəssəngay əd šittawen n aman, əqqalnat azni.

⁵ Əsleḡ y angalos wa inəttafan d aman igannu:

«Toḡâda, kay wa t-illan əmərədda,
təllec-qu kala da, təmosaḡ əmizdag,
id əmmək wa da
as təkəməḡ aratan win y aytedan n əddənət.

⁶ Fəlas tanaxla a əgan azni ən mizdagan d ənnəbitan, amaran təkfeq-qan azni y ad t-aşwin, id əhoran dər-əs.»

⁷ Əsleḡ i majmar wa n təkutawen igannu:

«Awalla, Əməli Məşşina
s ənta a imosan məşşis ən tarna kul,
əlxəkuman-net tidət a mosan, oḡâdan.»

⁸ Inḡal angalos wa n əkkoz təkərwast-net fəl təfuk, tətawakfa təfuk fərregat n akaway n aytedan.

⁹ Tosa-du tuksay labasat ad təkaggay aytedan. Təzzar ad takasan tarna y esəm ən Məşşina s ənta a ixkaman daḡ alwabatan win, edag an a das-ətuban əssəḡməran-tu.

¹⁰ Təzzar inḡal angalos wa n səmmos təkərwast-net fəl təxawit ta n taḡmar n əmudar wa səksədan. Əlsanat šiyay taḡmar n əmudar, əgan aytedan təkəraḡit tas har əqqiman əddâdan idədwən-nasan.

¹¹ Ad takkasan tarna i Məşşina di n Əməli ən jənnawan fəl əddəlil ən təsənnay səksədat ta taggin əd šiqqas šin tanəhanen, wər ətuban daḡ mazalan-nasan.

¹² Inḡal angalos wa n sædis tækærwast-net fæl agarew wa zæwwæran n Efrat. Æstakan aman-net, fæl ad tæmmutæg tarrayt æn mænokalan a d-æfalnen dænnæg.

¹³ Tæzzar oggeḡ imi n æmæxluk, æd wa n æmudar, æd wa n ænnæbi æn bahu as tan-d-ægmadan karad aššayatīnan æhânen assawwarat æn garan.

¹⁴ Aššayatīnan win den æntanay a tagginen tælmæḡjujaten, æntanay deḡ a z'akkinen imænokalan n æddænet kul y a tan-d-æššidæwan y æmægær wa z'agin daḡ æzæl wa zæwwæran n Æmæli Mæššīna di s ænta mæššīs æn tarna kul.

¹⁵ Ænta da awa z'agin: a din-agay assa zun wa d-itaggu abaydag. Ibbilal wa okayān, iqqān isælsa-net fæl ad wær ijæwænkæt izzâf tætæwænøy aḡawrat-net.

¹⁶ Tæzzar æššedawan-du aššayatīnan imænokalan n æddænet kul daḡ adag iyyanda. Edag wa itawann-as daḡ tælḡibrit: «Armagedun».

¹⁷ Inḡal angalos wa n æssa tækærwast-net daḡ alhawa. Tæzzar igmad-du æmæslī issohen ehan wa zæddigan æd tæxawit ta n taḡmar æn Mæššīna igannin: «Arat kul iḡrad!»

¹⁸ Ægan esman æd maslan d eggagan, iga amaḡal ænægæynægøy as wa d-æwaran aytedan tesayt n amaḡal wær iga ænnuḡ-net.

¹⁹ Tæzzar iga æḡræm wa zæwwæran æn Babæylon karadat tæzunen. Barajjen ḡærman æn kallan kul. Aḡræm wa zæwwæran æn Babæylon ikittæw Mæššīna ibakkadan-net. Adi a fæl t-iššæšwa tækabart n esmad n aḡyanab immittalan alham-net d æššæriḡa-net labasnen wællen.

²⁰ Tæzzar æmasan kallan kul win gærwætlan, aba tæmayyamayt n ædḡaḡan.

²¹ A du-tifætæqqen dagrazan as akkiyyan daḡ-san imos æzuk-net edag n ækkozat tæmærwæn æn kilaw, rattakan fæl aytedan. Ad takkasan aytedan tarna i Mæššīna fæl æddæwil n alwaba wa n dagrazan en, fælas alwaba iknân tæzzæwwært wællen a imos.

17

Awa inafalalan daḡ taneray

Æššæriḡa wa z'itæwæxkæman i tækarwat ta labasat

¹ Dæffær adi osa-du iyyan daḡ æssa angalosan win ættafnen æssayat tækærwæsen, iššewal-i, inn-i: «Iyyaw a kay-assaknaḡ æššæriḡa æn tækarwat labasat ta tæqqimat fæl aman aggotnen.

² Ænta a dær namaggan mænokalan n æddænet æzzæna, tæzzar ad taggin aytedan n æddænet æzzæna s igæt, æknân

tara n awen, zun awedan isassin esmad s igət amaran ikna tara n awen.»

³ Eway angalos iman-in s əsuf, tobaz-i tarna n Infas wa Zəddigan. Təzzar oggeɣ tantut təqqimat fəl əmudar zaggaxan əwāran əsmawan aggotnen əmosnen ikus ən tarna i Məşşina. Əmudar wen ila əssa ɣafawan əd maraw əskawan.

⁴ Tantut ten təlsa tabdoq zaggaxat d iyyat təgât təzuxay tənnât, təqqân urəɣ əd təhun šin əlanen almaqam, d əljuhər. Təttâf təkabart n urəɣ tədkârat imazalan zizallatnen aggadəm, d ammadas, win tišit-net təməggit n əzzəna.

⁵ Təkannart-net iktâb fall-as esəm âs almaɣna-net imos əssir. Ənta da awa inna akatab wa iwaran təkannart-net: «Aɣrəm wa zəwwəran ən Babəylon, ənta imosan anna ən təkərwaten əd mazalan win zazallatnen aggadəm.»

⁶ Təzzar oggeɣ tantut ta təgat iman ən mizdagan aggotnen əd nalkiman aggotnen ən ɣaysa win fall-as tagganen təgəyya tolayat. Iqqal igi ən man wen arat a tat-isimaswadan zun tassay n esmad. As tat-oggeɣ, iqqan aɣaf-in wəllen.

⁷ Təzzar inn-i angalos: «Mafel iqqân aɣaf-nak? A dak-əmələɣ əssir wa təssəkna təntut-en d əmudar wa təwan, əd ɣafawan win əssa, d əskawan win maraw.

⁸ Əmudar səksədan wa toggeɣ əddi, kala ad t-illa, mišan əmərədda ab-as t-illa. Daɣ alwaq wər nəggug, a d-igməd əɣəɣi wa wər nəla eder, akku edag n əhluk. Amaran aytedan n əddənet kul win as wər əkteban esmawan-nasan daɣ əlkəttab wa n təməddurt harwa ɣur ənətti n əddənet, ad əqqənan ɣafawan-nasan as ənayan əmudar id kala ad t-illa, dəffər adi ab-as t-illa, amaran ijwâr a d-osa.

⁹ Den daɣ ad təga addararat əs tayttay əd masnat. Iɣafawan win əssa a, almaɣna-nasan əssa ədɣaxan win fəl təqqim təntut. İmosan deɣ əssa mənokalan

¹⁰ as səmmos daɣ-san ab'as t-əllan, iyyan ill-ay, ixkâm, iyyan amaran harwa da wər d-osa, amaran as d-osa, ad agu arat n azzaman.

¹¹ Əmudar səksədan was kala ad t-illa, ab'as t-illa əmərədda, ənta da əmənokal a imos. Ənta a imosan wa n əttam, idrâw deɣ əlməxsud iyyanda d əssa win hadatnen, amaran ad akku edag n əhluk.

¹² Maraw əskawan win tənayaɣ, almaɣna-nasan maraw mənokalan as harwa da wər əgrewan taɣmar-nasan, mišan ad əgrəwan arat n azzaman ən taɣmar əntanay d əmudar.

¹³ İduf iyyanda a əgan, amaran əkfân tarna-nasan əd taɣmar-nasan y əmudar.

¹⁴ Ad ammagaran d Əjemar, mišan a tan-arnu arz-en, id ənta a imosan Əməli ən malan, imos əmənokal ən

mənokalan. Aytedan win du-tawaɣranen, tawasanafranan əmosan alɣadılan, ad idawan d Əjemar daɣ tarna ta du-z-
agu den.»

¹⁵ Iгла angalos išşewal, inn-i: «Aman win toggeɣ təqqim fall-
asan təkərwat, adi šimattiwen əd tiddawaten əd tawşeten d awalan.

¹⁶ Maraw əskawan win toggeɣ d əmudar, ad azzangen təkərwat,
əkkəsan daɣ-as tələmmest, əzzəfan-tat, atšin isan-net, sərrəkəm-
men-tat əs təmsay.

¹⁷ Awalla Məşşina a d-igan daɣ wallan-nasan as ad ammazalan s
awa ira, ammazalan əlməxsud iyyanda, akfin taɣmar-nasan y əmudar.
Arat wen daɣ a z'agin iket wər d-ewed alwaq wa daɣ z'andin
aratan win ixkam Məşşina.

¹⁸ Amaran tantut ta toggeɣ den, təmmittal aɣrəm wa zəwwəran
azzaran i mənokalan n əddənet.»

18

¹ Dəffər awen oggeɣ angalos iyyan ilân taɣmar wəllen itazabbat-
du daɣ jənnawan, imalawlaw amaɣal ketnet s ənnur ən tanaya-net.

² Inna s əməsli issohen wəllen:
«Babəylon ta n təmizwart, tuda!

Awalla tuda Babəylon!

Təqqal edag ən təməxsurt n ašşayatınan

d adag ən təməxsurt ən kələsuf

d asammanay ən gəɣdād kul win xaramnen

[d asammanay n əzzənəfan kul

ən mudaran win xaramnen]

əd win wər əren man əd win ətawaglafnen.

³ Šimattiwen n əddənet kul əddəwnat dər-əs daɣ arak deranan-
net labasnen n igi n əzzəna,

imos awen zun esmad sassinat.

Imənokalan n əddənet nimaggan dər-əs əzzəna,

kəl jola n əddənet deɣ

isaggargas-tan aɣrəm wa n Babəylon,

s ərrəzəɣan-net əknânen igət.»

⁴ Təzzar əsleɣ y əməsli iyyan as d-igmad ijənnawan inna:
«Əgmədat-du aɣrəm

wədi kawanay win əmosnen tamattay-nin,

fəl ad wər təgəm ibakkadan win itaggu,

awəd-kawan-in albala wa fall-as z'uden.

⁵ Fəlas ibakkadan-net əɣlan har ewadan ijənnawan,

amaran Məşşina ikittəw

arak mazalan labasnen n aɣrəm wədi.

⁶ Ərzəmat-as s əmmək was irazzam,

takfim-tu ənətfus ən mazalan-net!

Təkabart tas ikkat, əkətət-as ənətfus-net.

⁷ Emmək was idkal iman-net,
 immozal arat kul wa əran man-net,
 əmmək di dağ as agiwat-as əzəyxəzzəb səksədan,
 təsəssugim-tu təkənzert labasat oğdānen d awen da,
 id tənna a itaggu əxrəm wa n Babəylon:
 "Təxawit ta n təmənukəla a fəl əqqıma,
 wər əmosa tantut as aba aləs-net,
 wər ilkem ad əggāzağ afartay."

⁸ Awen dağ a fəlas albalatan zawwarnen
 əddi win das-ənsanen:
 Təmattant əd təkənzert labasat əd laz.
 Əzəl iyyanda a fall-as z'uden albalatan win di,
 təsərrəkəmmət-tu değ temsay.
 Awalla, Əməli Məşşina
 imosan Məşşis ən tarna
 a itawaddaban əxrəm wen.»

İsəmmədənnigan əğānen fəl əxrəm ən Babəylon

⁹ Imənokalan n əddənet kul win dər-əs əddewnen,
 nimaggan dər-əs əzzəna d aratan win əran man-nasan dağ
 əddənet, ad ənəyan əhu ən təmsay ta tu-za-təsərrəkəmmət,
 ad hallin səkkələlan fəl awa z'agu əxrəm wen dağ alyazab.

¹⁰ A dər-əs nəməggəgan, fəl təksəda n a tan-in-awəd
 alyazab wa z'agu den. Ad gənnin:

«Xaşşa! Xaşşa wəllen
 y əxrəm wa zəwwəran ən Babəylon ilan tarna.
 Alwaq iyyanda ças a fəl t-iwwəddab Məşşina!»

¹¹ Kəl jola n əddənet kul ad hallin fəl tərəmməq y əxrəm
 wen. Wər t-illa awedan a çur-san izanzin awa əssətəgan,

¹² gər urəğ, wala azrəf, wala şihun şin əlanen almaqam,
 wala əljuhər, wala lin, wala tabdoq təgāt təzuxay tənğāt,
 wala əlxərir, wala tabdoq ta təgāt təzuxay təhossayat, wala
 eşkan kul win as izod ađu-nasan, wala aratan win əganen
 dağ təhunt təkənāt təməllay s ənta dağ itaggu uğən wa n
 xummaysa, wala win eşkan win əlanen almaqam, wala win
 daroğ, wala win təzoli, wala win təhun şin hossaynen,

¹³ wala egel n aşək was itawannu kanel, wala əzzənəfan n
 annabatan win əlanen ađu, wala alwarditan, wala ađutan
 win əzodnen əmosnen mir d əlməsək, wala esmad n
 alyanab, wala widi wa n azzayt, wala egel, wala alkama,
 wala şitan, wala ayfad, wala əggəsan wala amalankaytan
 wala eklan, wala ikefəlan.

¹⁴ Ad gənnin kəl jola y əxrəm wen:

«Aratan win əran man-nak kul
 əddəggəgan fall-ak.
 Tənafləyt, d aratan win hossaynen,
 əzodnen aba-tan fall-ak.
 Wər ilkem ad əlasan ətəwənay!»

¹⁵ Kəl jola win əggərgasnen daɣ əsətəg wa taggin daɣ əxrəm wen, a dər-əs nəməggəgan fəl təksəda n a tan-in-awəd alɣazab-net. Ad hallin, sikalalan;

¹⁶ gannin:

«Xašša! Xašša wəllen
y əxrəm wa zəwwəran a!
Dat awa ilsa tabdoq ən lin ihossayan,
əd tabdoq təgât təzuxay təŋgât
əd tabdoq ta təgat təzuxay təhossayat,
iqqân uɣənan hossaynen n urəɣ
əd təhun šin əlanen almaqam d əljuhər.

¹⁷ Amaran alwaq iyyanda ɣas
a fəl aba təgərgist ten!»

Aytedan kul win azzarnen y əɣlalan win aman əzzozalan-tan d aytedan kul win šakalnen fəl gərwan win zawwarnen əd win mašşaxalan n əɣləlan n aman əd win əganen jola gər kallan əs tarrayt ən gərwan, əbdadan-in daɣ igəg

¹⁸ assaxa wad ənayan əhu ən təmsay ta təsirəkəmmet əxrəm wen, sakkarayan gannin:

«Wər kala ad itawanay
arat šilat ən wa igraw əxrəm ogdân əd wa.»

¹⁹ Sawaran iɣafawan-nasan aboqqə, hallin, əɣšâdan man-nasan wəllen, sikarayan gannin:

«Xašša! Xašša wəllen
y əxrəm wa zəwwəran a,
s ənta a daɣ əggərgasan aytedan kul
win əlanen iɣlalan n aman win zawwarnen,
mišan alwaq iyyanda ɣas a fəl iɣrad ahluk!»

²⁰ «Dawatat ijənnawan!

Aɣrəm iɣrad ahluk!

Dawatat kawanay da win əmosnen imizdagan ən Məššina əd nəmmuzal d ənnəbitan.

Awalla, Məššina iwwəddab
əxrəm wa fəl təkma ta dawan-iga.»

²¹ Təzzar idkal angalos iknân təla ən tarna təhunt zəwwərat tolât əd ta fəl itawazad alkama, igar-tat daɣ agarew igannu:

«Ənta da da əmmək was din-z-itəwəgər
əxrəm wa zəwwəran ən Babəylon
əs təməwit labasat,
amaran wər z'iləs ətəwənay dəffər adi.

²² Wər ilkem ad əlasan aytedan

tesalay daɣ əxrəm wen
i səwat win əganen əs təhərdânt wala asak,
wala win əganen əs təsənsəq, wala esək.
Wər ilkem a daɣ-as itiwənan əššəɣəl

wa n əfus, wala win tu-tagginen.
Wər ilkem a dağ-as itiwəsla y əməsli
n əzed n attaxam.

²³ Wər ilkem a dağ-as imilawlaw
ənnur ən fətəla
za wər ilkem a dağ-as ilas ətəwəsla
y əməsli n əmərmuš əd təmazlayt-net.
Amaran ənta da əddəlil wa fəl iga adi:
"Kəl jola-nak, əntanay a ogarnen
təla ən batu dağ əddənet kul,
işaxawan-nak deş əssixrakan şimattiwen kul.

²⁴ Kay aşrəm wa n Babəylon,
a dağ itawanyal əzni n ənnəbitan
d əzni ən mizdagan ən Məşşina
d aytedan kul win tawanyanen dağ əddənet."»

19

Təmmalen əgânen dağ batu n əhluk ən Babəylon

¹ Dəffər awen əsleş dağ jənnawan y arat olân d əməsli
issohen n əljəmaşat tagget təgannit:

«Alleluya!

Efsan, əd tanaya,

əd tarnə in Əməli-nana Məşşina,

² fəlas əlxəkuman-net tidət a əmosan, oşad deş.

Obaz s əşşərişə-net təkərwat ta labasat

təssəxrakat əddənet əs tişit-net təməggit n əzzəna,

izzəzal deş əzni ən nəşbidan-net

wa inşal əfus ən təkərwat ten.»

³ Təlas aljamaşat ten tənna:

«Alleluya!

Əhu ən təmsay ta təsaqqadat aşrəm wen,

ill-ay har faw.»

⁴ Təzzar garaffen əmyaran win sanatat təmərwən d

əkkəz, əntanay əd mudaran win əkkəz, əşbadan Məşşina,

iqqiman fəl təxawit ta n taşmar-net, gannin:

«Amin! Alleluya!

Təmmal i Məşşina!»

⁵ İğmad-du əməsli təxawit ta n taşmar en, inna:

«Aşiwat təmmalen y Əməli-nana,

ketnawan inəşbidan-net, win t-əksudnen

gər win wər nəla almaşam wala win t-əlanen!»

Takrəst n Əjəmar

⁶ Təzzar əsleş y arat olân d əməsli ən tiddawat tagget,
olân d əjit n aman aggotnen, ola deş d eggagan labasnen as
inna:

«Alleluya!

Fəlas Əməli Məşşina di ən məşşis ən tarna,
issəbdad tağmar-net.

⁷ Fəliwəsətana, naknu tədəwit, nəssəxmər Məşşina,
fəlas izəzlay n Əjemar ewadan-du,
amaran təmazlayt-net təsimatag.

⁸ Tətawakfa tabdoq ən lin wa n ələsəl,
itibələzzen, iqqitasan, y a tat-talsu.»

Tabdoq ən lin wa ihossayan en, almağna-net imazalan
oğādnen win əgan mizdagan ən Məşşina.

⁹ Inn-i angalos ad əktəbəx as: «Əbbilalan win
tawaxranen s ad əggəzan izəzlay n Əjemar!» Dəffər adi
inn-i: «Batuten ən tidət awa əs Məşşina iman-net as tanat-
iga.»

¹⁰ Təzzar garaffe xur daran n angalos wen y ad t-əxbəda,
inn-i: «Alak! Ad wər tagax adi! Nak ənağbid ən Məşşina a
mosa wa da təmosa kay əd mədrayan-nak əd təmədrayen-
nak a tagayyatnen fəl Yaysa. Məşşina as kay-iwar a tu-
təxbəda. Amaran, təgəyya fəl Yaysa, almağna-net emel ən
salan ən Yaysa win d-izazzabbat Infas wa Zəddigan.»

Ənəfilal n awedan iwânan ays mallan

¹¹ Dəffər awen oggeğ ijənnawan as ənnolaman, ih-en ays
mallan, amaran wa t-iwanan esəm-net «wa imosan Alxədil,
imos Tidət». Elxəkuman-net oğādan, itamagar değ fəl
tidət.

¹² Şittawen-net əmosnat zun abalagleg ən təmsay, eyaf-
net əwarnat-tu təkəbba ən tağmar aggotnen. Iktâb fall-as
esəm as wər t-illa i t-issânan ar ənta.

¹³ Amawan n ays wen esəm-net «Awal ən Məşşina»,
amaran ilsa tabdoq təlmâğat dağ əzni.

¹⁴ Elkâman-as gənan ən jənnawan əwannen əggəsan
mallolnen. Ketnasan əqqânan tabdoq ən lin wa n ələsəl,
iqqitasan, igân təməllay təsiraqqet.

¹⁵ Təğmad-du takoba təkñât tawala imi ən wa iwanan ays
en, fəl ad tanxu şimattiwen n əddənet. Amaran wa iwanan
ays en ad ixkəm fəl təməttiwen n əddənet əs tağmar təkñât
assahat. Ad aźmu alyanab dağ təğdayt zəwwərat y a sər-əs
agu esmad immittalan alham labasan wəllen ən Məşşina di
ən Məşşis ən tarna.

¹⁶ Təkadkat-net əd tağma-net iktâb fall-asnat «Əmənokal
ən mənokalan d Əməli ən malan.»

Ənəfilal ən saksas zəwwəran ən matsān ən təməxsə

¹⁷ Dəffər awen oggeğ angalos ibdâdan dağ təfuk.
Isaxğarat s əməsli issohen wəllen i gəğad kul win
əggadnen dağ təsəggərigərəyt ən jənnawan, inn-asan:

«Ayewat, idawat-du ketnawan i mensewan əknânen igət win Məşşina,

¹⁸ fəl ad tatsim şiməxsə ən mənokalan əd muzaran ən sojitan, əd nammagaran, əd təməxsə n əggəsan əd win tan-əwannen, əd təməxsə n aytedan kul, gər wa imosan əlləlli wala akli, gər wa wər nələ almaqam wala wa t-ilan!»

Ənəfilal n əmudar d ənnəbi ən bahu

¹⁹ Oggeğ əmudar səksədan, əd mənokalan n əddənet, əd gənan-nasan əddəwan y ad ammagaran əd wa iwanan ays, d agan-net.

²⁰ Təzzar ittərmas əmudar ittərmas değ ənnəbi ən bahu wa dər iddew. Ənnəbi ən bahu wa, iga aɣalamaten zawwarnen dat əmudar wen. Əmmək en dağ as issəxrak win iwar ejwal n əmudar, əğbâdan değ şaşşelan-net. Əmudar wa, ənta harkid ənnəbi ən bahu wa, tawagaran da əddâran dağ ağazar ən təmsay d adağas-ən-tahart irğân.

²¹ Awa d-iqqiman dağ agan wen ketnet tənğ-ay takoba ta du-təğmadat imi ən wa iwanan ays. Təzzar əyyəwanan gəğdad wəllen dağ təməxsə-nasan.

20

Ənəfilal n əməxluk iqqânan har əgim n awatay

¹ Dəffər awen oggeğ angalos itazabbat-du igmâd-du ijənnawan, ittâf dağ əfus-net təsassarut n əğəği wa wər nələ eder, ittâf değ asassar zəwwəran.

² Obaz əməxluk, a t-imosan aşşol wa irəwan, a imos Iblis, itawann-as değ Aşşaytan, ig-as tewaxnay a za tagit agim n awatay.

³ Igar-tu angalos dağ əğəği wen, ihar-tu fall-as, iɣfal-tu s əlluğ fəl ad wər iles əsəxrək ən təmattiwen har agu agim n awatay. Dəffər awen ilzâm ad annalam ammaru har arat n azzaman.

Ənəfilal n ətəwərna n Aşşaytan

⁴ Oggeğ şixiwa ən tağmar. Win fall-asnat əqqimnen əgrâwan tarna n ad əqqəlan imaşrağan. Oggeğ iman n aytedan win as tawasaben rawan-nasan fəl əddəlil ən təgəyya tolâğat ta taggin dağ batu ən Ƴaysa d awal ən Məşşina. Oggeğ değ aytedan win wər nəğbed əmudar wa səksədan za wər əssəjadan i şaşşelan-net, wər tawajajwalnat təkannaren-nasan wala ifassan-nasan. Aytedan win den əqqalan-tan-du man-nasan, namaggazan tağmar d Əlməsix, amaran awen ad agu agim n awatay.

⁵ Ənta den da tanakra ta tazzarat ən nəmməttan. İnəmməttan win hadatnen, wər d ənkeran har inda əgim n awatay wen.

⁶ Æbbilalan aytedan zaddognen win d-ænkarneŋ day tanakra æn næmmættan ta tazzarat! Aytedan win di wær tan-in-tækka Jahannama æd wala! Æntanay a z'æqqælneŋ iliman æn Mæššina d Ælmæsix, amaran a dær-æs næmæggæzan taɣmar-net har agim n awatay.

⁷ As inda ægim n awatay wen, a d-itæwæyyu Aššaytan day kasaw wa iha,

⁸ aglu ad isaxrak šimattiwen a æwarnen tesayt n amaḍal, æmosnen Yajuj æd Majuj. A tan-d-iššidæw y æmægær, amaran ægân igæt wa n tæblalen n amaḍal a dabayyakneŋ day afay n agaraw.

⁹ Æssæwalan æddænet ketnet, æbazan aɣræm wa iknan ætæwæra, ɣalayɣalayan imizdagan æn Mæššina. Mišan tæzzæbbat-du tæmsay day jænnawan, tæsarrakammat-tan.

¹⁰ Iblis s ænta dasan-azzaran, isaxrak-kan, itawagar day aɣazar æn tæmsay tægât s adayas-æn-tahart wa iha æmudar d ænnæbi æn bahu. Den day a dasan-z-itæwæggu ætæwæzæɣæzzab sæksædan ehad ezal har faw.

Ænæfilal n æššæriɣa æn Mæššina

¹¹ Ogge tæxawit æn taɣmar tæknât tæzzæwwært, tækna dey tæmællay, æd wa fall-as iqqiman. Æddæggagan-as jænnawan æd mædlan, æggugan-tu, wær d-oyyen wala ædæriz.

¹² Dæffær awen oggeɣ inæmmættan win wær næla almaɣam, harkid win t-ælanen æbdâdan dat tæxawit ta n taɣmar en. Ænnolaman ælkættaban. Innolam ælkættab iyyan s ænta a imosan ælkættab wa n tæmæddurt. Tawaxkaman næmmættan s awa ihan ælkættaban win den, ewâl awen æs mazalan-nasan.

¹³ Ikfa-du agaraw inæmmættan win t-æhanen, tækfa-du tæmættant d alaxirat inæmmættan win-nasnat, itawaxkam akkiyyan day-san æs mazalan-net.

¹⁴ Tætawagar tæmættant d alaxirat day aɣazar æn tæmsay. Aɣazar æn tæmsay wen ænta a imosan Jahannama.

¹⁵ Awedan ketnet was wær ikteb esæm-net day ælkættab wa n tæmæddurt, itawagar day aɣazar æn tæmsay wen.

21

Ænæfilal æn jænnawan d amaḍal win aynaynen

¹ Dæffær awen oggeɣ ijænnawan aynaynen, d amaḍal aynayan. Ijænnawan win æræwnen, d amaḍal wa iræwan, ab'as t-ællan, igærwan dey ab'as t-ællan.

² Tæzzar oggeɣ aɣræm wa zæddigan, a t-imosan Yerusalem ta taynayat, tætazzæbbat-du day jænnawan, issigl-et du Mæššina. Tæsimatag zun tæmazlayt tægât æddælugan-net win hossaynen y ad tammanay d alæs-net.

³ Əsley y əməsli issohen a d-igmâdan təxawit ta n taɣmar igannu:

«Əmərədda ehan ən Məşşina illa gər aytedan.

A dər-san inəməxsər, əqqələn şimattiwen-net.

Məşşina iman-net as ɣur-san z'iməl, iqqəl Əməli-nasan.

⁴ A dasan-iməs id t-əllân məttawan,

ib'as tu-təlla təmattant,

wala təweşkent, wala təkurayt, wala tisanant,

fəlas aratan win d-azzarnen, ab'as t-əllan.»

⁵ Inn-i wa iqqiman fəl təxawit ta n taɣmar: «Ənəy! Aratan

kul sammattayaq-ğan əge win aynaynen.» Təzzar inna:

«Əktəb, fəlas batuten şin əssiflasnat, əmosnat deɣ tidət.»

⁶ Inn-i: «Arat wa, iga! Nak a imosan Alfa, əmosay deɣ

Omega, almayna wa azzaran ilkâm. Wa iha fad, nak a das-

z-agin təhəkkut təmosat tessay daɣ şat ta daɣ du-naggayan

aman win sidurnen.

⁷ Awedan kul wa d-ornan, a ɣur-i igrəw aratan win,

əmosan-as təhəkkut, əqqələy deɣ Əməli-net, iqqəl barar-

in.

⁸ Mişan awedan wa imosan əddəyyus, d aytedan win wər

nəɣdel əd win tamazalnen awa labasan əd maggan ən man

əd win tagginen əzzəna əd maşşayawan əd nəɣbidan n

əssənəman əd nəsbuha kul, əntanay tədagart-nasan iguz

ən Jahannama təmosat aɣazar ən təmsay tərɣât s adayəs-

ən-tahart.»

Awa inafalalan i Yaxya alwaq wad iwar adɣay wa zəwwəran: Yerusalam ta təynayət

⁹ Təzzar ikk-i-du iyyan daɣ angalosan win əssâ əttâfnen

əssayət təkərwasen şin ədnaynen əssa alwabatan win

əlkamnen inn-i: «Iyyaw, a kay-assaknaɣ tantut ta n

təmazlayt n Əjəmar.»

¹⁰ Eway-i angalos s afalla n ədɣay iyyan zəwwəran,

zagren, tobaz-i tarna n Infas wa Zəddigan, issəkn-i aɣrəm

wa zəddigan, a t-imosan Yerusalam, a d-izzibben daɣ

jənnawan, ifal-du ɣur Məşşina.

¹¹ Aɣrəm wen igrâw tanaya ən Məşşina. Iga əmələwləw

a n təhunt təlât almaqam as itawannu jasfa, təgât əxətəs

wa n təlfənjart.

¹² Iɣlay-tu aɣalla zəwwəran zagren, ilân marawat təsəhar

əd sanat a ɣur əllân maraw angalosan d əşşin. Şisəhar

şin den əktâban fall-asnat esmawan ən marawat tawşeten

əd sanat şin maddanəs n Israyil.

¹³ Taɣərt n aɣalla en ta n dənnəg tələ karadat təsəhar,

ta n tamasna deɣ tələ karadat, ta n agala tələ karadat, ta n

ataram deɣ tələ karadat.

14 Aǵalla wen ila marawat təsəttəytay əd sanatat a das-əmosnen şığurad, amaran əwaran-tanat maraw esmawan d əşšin əmosnen esmawan ən maraw nəmmuzal d əşšin n Əjemar.

15 Angalos wa di-işşewalan ittâf əsəkət imosan agabal ən telant igân daǵ urəǵ y a sər-əs ikət aǵrəm əd təsəhar-net, d aǵalla wa t-iǵlayan.

16 Aǵrəm wen ogda fəl gannatan-net kul win əkkoz. Tamawen-net kul togda təzzəgrət-nasnət, harkid sa sər afalla. Ikat-tanat angalos s agabal wa n urəǵ en, əqqalnat əşšin gim ən kilaw əd sanatat təmad.

17 Ikat angalos təzzəgrət ta n afalla n aǵalla wa iǵlayan aǵrəm en, iqqal temeday n əyil d əkkozat təmərwen d əkkoz. Takkot ten ig-et angalos s əmmək was tat-taggin aytedan fawda.

18 Aǵalla n əǵrəm wen igâ əs təhun əhossaynen əlânen almaqam as itawannu jasfa, aǵrəm amaran iman-net iga daǵ urəǵ wa izdaran igân əǵətəs wa n təlfənjart.

19 Şisəttəytay şin əmosnen şığurad n aǵalla ədlâgnat s əzzənəfan ən təhun kul şin hossaynen əlanen almaqam. Təsəttəytəyt ta tazzarat təga daǵ jasfa, ta n sanatat təga daǵ təhunt as itawannu safir, ta n karadat təga daǵ təhunt as itawannu kalsaydun, ta n əkkozat təga daǵ təhunt as itawannu emrod.

20 Ta n səmmosat təga daǵ təhunt as itawannu onəyks, ta n sədisat təga daǵ təhunt as itawannu sardwan, ta n əssayat təga daǵ təhunt as itawannu kərzolit, ta n əttamat təga daǵ təhunt as itawannu beril, ta n tazayat təga daǵ təhunt as itawannu tofaz, ta n marawat təga daǵ təhunt as itawannu kərizofəraz, ta n marawat d iyyat təga daǵ təhunt as itawannu həyasint, ta n marawat əd sanatat təga daǵ təhunt as itawannu ametist.

21 Şisəhar şin marawat əd sanatat en, marawat təhun n əljuhər əd sanatat a daǵ əganat. Əkkulluk ən təsəhərt təga daǵ təhunt iyyadda n əljuhər. Amaran tarrayt ta zəwwərat n əǵrəm en, təga daǵ urəǵ wa izdaran igân əǵətəs a n təlfənjart.

22 Aǵrəm wen wər daǵ-as hənnəya ehan n əlǵibada. Awalla Əməli Məşşina di ən məşşis ən tarna a imosan ehan-net wa n əlǵibada, ənta d Əjemar.

23 Aǵrəm wen wərmad iddirar s ənnur ən təfuk za wala wa n təllit, fəlas tanaya ən Məşşina a tu-təsammalawlawat, amaran Əjemar a imosan ənnur-net.

24 Ənnur-net a daǵ-as jəwənkətnat təmattiwen, asin-t-idu mənokalan n əddənət əssəyməran-tu.

²⁵ Şisəhar n əxrəm wen wər əhhirnat dəy təzzəgrət ən jilan, amaran wər ilkem ad əhârnat fəlas ehad s ab'as t-illa.

²⁶ Şimattiwen n əddənet kul a d-awəynat s əxrəm wen aratan a tu-z-akfinen tanaya d ətəwəsəxmar.

²⁷ Wər tu-z-iggəz a immidasan, wala dəy i itamazalan talbast, wala bahu. Kalar wər tu-z-iggəz ar win as əktaban əsmawan-nasan dəy əlkəttab wa n təməddurt n Əjemar.

22

¹ Təzərəst n awen as di-issəkna angalos agarew was əhakkin aman-net təməddurt, əgân aman-net əxətəs a n təlfənjart. Aman win əngâyan-du dəy təxawit ən taşmar ən Məşşina d Əjemar,

² əkkan-du ammas ən tarrayt ta zəwwərat n əxrəm. Şigadamayen n agarew wen əwâran-tanat eşkan win əhakkinen təməddurt tarawnen maraw əzzənəfan n aratan d əşşin, əkkulluk ən təllit. Ifərkak n eşkan win, zuzəyan şimattiwen n əddənet.

³ Aşrəm wen wər tu-z-iggəz arət təwâr tulşant. Təxawit ta n taşmar ən Məşşina d Əjemar ad təggəz aşrəm en da, təşbəd tamattay-net Məşşina.

⁴ Aytedan win əhanen aşrəm wen ad ənəyan udəm n Əməli, iktəb dəy esəm-net fəl təkannaren-nasan.

⁵ Wər z'iləs ahad igi, za wər z'ələsan addararat s ənnur ən fətəla, wala ənnur ən təfuk, fəlas Əməli Məşşina a tan-z-isəmmələwləwan, amaran əxkəman har faw.

Təsəxtəmt: Assa ən Ƴaysa

⁶ Inn-i angalos: «Batuten şin əssiflasnat, əmosnat dəy tidət; Əməli Məşşina, s ənta a imosan Əməli n ənnəbitan a d-issəqlan angalos-net fəl ad assaknu inaybidan-net arət as kundaba iga dəy azzaman wər nəggug.»

⁷ Inna Ƴaysa: «Ənəy! Əzayaş-in tarmad! İbbilal wa izzəgzanan ibbirdag dəy i batuten a nafalalnen dəy əlkəttab wa əmosnen isalan n aratan win əmərədda əd win d-əzaynen!»

⁸ Nak Ƴaxya a islan y aratan win, amaran ənâyaq-qan. As əsleş y aratan win, ənayaq-qan, fataqqeqş şur daran n angalos wa di-tan-issəknan y ad t-əşbədə.

⁹ Mişan inn-i: «Alak! Ad wər tagaş adi! Nak ənaybid ən Məşşina a mosa şilat-nak kay əd mədrayan-nak win ənnəbitan, əd win əbbərdagnen y awal wa ihan əlkəttab wa. Əşbəd Məşşina!»

¹⁰ Dəffər awen inn-i: «Ad wər təşbərə isalan win nafalalnen dəy əlkəttab wa əşşewalnen dəy batu n aratan win əmərədda əd win d-əzaynen, fəlas alwaq ihoz!»

¹¹ Wa wər noyed, agliwet day iba n taqqat-net, wa immədasan, agliwet day ammadas-net. Wa oɣadan amaran agliwet day taqqat-net, wa zəddigan deɣ iššitiwet tazdak.»

¹² Inna Ƴaysa: «Awalla! Əzayaɣ-in tarmad, amaran ewayax-in ərruzmatan-in y ad akfaɣ awedan kul arozan win tu-šaššawadan mazalan-net.

¹³ Nak a imosan Alfa, əmosa deɣ Omega, almaɣna wa azzaran ilkâm, təsəntit əd təzərəst.

¹⁴ Əbbilalan win rabbaznen šikadkaden-nasan zazdagan-tanat fəl ad əgrəwan alxaq day ašək wa n təməddurt, əggəzan deɣ aɣrəm wa zəddigan en əs təsəhar šin as itawaggaz!

¹⁵ İdan əd maššaɣawan ədəganet sədi, əntanay əd maggan n əzzəna əd maggan ən man əd naɣbidan n əssənəman d awedan kul wa iran bahu itagğ-ay!

¹⁶ Nak Ƴaysa, əssiglaɣ-in angalos-in y a dawana-itagayyat day Əlkənisaten fəl aratan win di. Nak əzzurrəyya ən Dawəd a d-əgmada, əmosaɣ atri imilawlawan wa d-igammadan s aɣora.»

¹⁷ Inna Infas wa Zəddigan əd təntut ta n təmazlayt: «Asadu!» I isallin kul anniwet: «Iyyaw!» Wa iffudan kul asiwet-du. I iran adi kul ašwet aman win sidurnen tawagrawnən wala inazzan!

¹⁸ Nak iman-in Ƴaxya, əggəyyeɣ y awedan kul wa islan isalan win nafalalnen day əlkəttab wa əššewalnen day batu n aratan win əmərədda əd win d-əzaynen as: I iššotan arat fəl salan win, a das-iššitu Məššina day albalatan win əttəmalnen day əlkəttab wa.

¹⁹ I day-san ikkasan arat deɣ, ad ikkəs Məššina adagar-net day ašək wa isiduran d əɣrəm wa zəddigan win əttəmalnen day əlkəttab wa.

²⁰ Wa igəyyen fəl aratan win, isattadd-en, inna: «Awalla, əzayaɣ-in tarmad.» Amin! Iyyaw, Əməli Ƴaysa!

²¹ Ya Əməli Ƴaysa təkfeq-qawan arraxmat ketnawan.